



পবিত্র কুরআন

BENGALI

পবিত্র কুরআন

অনুবাদ

মওলানা ওয়াহিদুদ্দিন খান

অধ্যাপিকা-ফরিদা খানম

GOODWORD BOOKS

This translation of the Quran is copyright free
First published by Goodword Books 2019
Reprinted 2022

Translation and Editorial Team:

Waliur Rahman, Chandpuri
Md Israfil Islam Nadwi
Maulana Israfil Mondal
Mohammed Abdullah
Mustafa Kamal Haider
Subedar Major Mahiuddin Mondal

Goodword Books

A-21, Sector 4, NOIDA-201301

Delhi NCR, India

Tel. +91 120 4131448, Mob. +91-8588822672

email: info@goodwordbooks.com

www.goodwordbooks.com

CPS International, Center for Peace and Spirituality International
1, Nizamuddin West Market, New Delhi-110 013

Mob. +91-9999944119

email: info@cpsglobal.org

www.cpsglobal.org

Peace and Spirituality Forum

Mohammed Abdullah

C/O, Babu Ali, Near Sona Footwear Shop

83/A/H/48/1, Belgachia Road Kolkata - 700037.

Contact Nos: +91-9831345685, +91-9674677871, +91-9836950130

Printed in India

পবিত্র কুরআন

সূচী পত্র

পরিচয়	7
১ অধ্যায় : আল-ফাতিহা (উদ্বোধনী)	19
২ অধ্যায় : আল-বাকারাহ (গাভী)	19
৩ অধ্যায় : আল-ইমরান (ইমরান পরিবার)	67
৪ অধ্যায় : আন-নিসা (নারী)	94
৫ অধ্যায় : আল-মায়িদাহ (খাদ্য)	122
৬ অধ্যায় : আল-আনআম (গৃহপালিত পশু)	144
৭ অধ্যায় : আল-আরাফ (শিখর)	169
৮ অধ্যায় : আল-আনফাল (যুদ্ধলব্ধ সম্পদ)	195
৯ অধ্যায় : আত-তাওবা (অনুতাপ)	206
১০ অধ্যায় : ইউনুস (যোনাহ)	226
১১ অধ্যায় : হুদ (হুদ)	240
১২ অধ্যায় : ইউসুফ (যোসেফ)	256
১৩ অধ্যায় : আর-রা'দ (বজ্রধ্বনি)	271
১৪ অধ্যায় : ইবরাহীম (আবরাহাম)	278
১৫ অধ্যায় : আল-হিজর (শিলাময় প্রান্তর)	285
১৬ অধ্যায় : আন-নহল (মৌমাছি)	291
১৭ অধ্যায় : আল-ইসরা (নৈশভ্রমণ)	306
১৮ অধ্যায় : আল-কাহফ (গুহা)	320
১৯ অধ্যায় : মারইয়াম (মেরী)	333
২০ অধ্যায় : ত্বা-হা (ত্ব-হা)	342
২১ অধ্যায় : আল-আম্বিয়া (দিব্যপুরুষ)	354
২২ অধ্যায় : আল-হজ্ব (তীর্থযাত্রা)	364
২৩ অধ্যায় : আল-মুমিনুন (আস্থাবানগণ)	375
২৪ অধ্যায় : আন-নূর (জ্যোতি)	384
২৫ অধ্যায় : আল-ফুরকান (মানদণ্ড)	394
২৬ অধ্যায় : আশ-শুআ'রা (কবিগণ)	402

২৭	অধ্যায় : আন-নাম্‌ল (পিপীলিকা)	413
২৮	অধ্যায় : আল-কাসাস (বিবরণ)	423
২৯	অধ্যায় : আল-আনকাবুত (মাকড়সা)	434
৩০	অধ্যায় : আর-রুম (রোমান)	442
৩১	অধ্যায় : লুকমান (লোকমান)	449
৩২	অধ্যায় : আস-সাজ্‌দাহ (প্রণতি)	453
৩৩	অধ্যায় : আল-আহযাব (সম্প্রদায়)	456
৩৪	অধ্যায় : সাবা (সাবা)	466
৩৫	অধ্যায় : ফাতির (স্রষ্টা)	473
৩৬	অধ্যায় : ইয়াসীন (ইয়াসীন)	479
৩৭	অধ্যায় : আস-সাফ্‌ফাত (সারিবদ্ধ)	485
৩৮	অধ্যায় : সোয়া-দ (সোয়া-দ)	493
৩৯	অধ্যায় : আয-যুমার (সমাবেশ)	500
৪০	অধ্যায় : আল-গাফির (ক্ষমাশীল)	509
৪১	অধ্যায় : ফুস্‌সিলাত (স্পষ্ট ব্যাখ্যা)	519
৪২	অধ্যায় : আশ-শুরা (পারস্পরিক পরামর্শ)	525
৪৩	অধ্যায় : আয-যুখরুফ (স্বর্ণালঙ্কার)	532
৪৪	অধ্যায় : আদ-দুখান (ধূস্র)	539
৪৫	অধ্যায় : আজ-জাসিয়াহ্ (নতজানু)	543
৪৬	অধ্যায় : আল-আহ্‌কাফ (বালুময় পাহাড়)	546
৪৭	অধ্যায় : মুহাম্মাদ (মুহাম্মাদ)	552
৪৮	অধ্যায় : আল-ফাত্‌হ (বিজয়)	556
৪৯	অধ্যায় : আল-হুজুরাত (কামরা)	561
৫০	অধ্যায় : আল-ক্বাফ (ক্বাফ)	564
৫১	অধ্যায় : আয-যারিয়াত (বিক্ষিপ্ত বাতাস)	567
৫২	অধ্যায় : আত-তুর (সিনাই পর্বত)	570
৫৩	অধ্যায় : আন-নজম (সুবিন্যস্ত তারকা)	573
৫৪	অধ্যায় : আল-ক্বামার (চন্দ্র)	576
৫৫	অধ্যায় : আর-রহমান (করণাময়)	580
৫৬	অধ্যায় : আল-ওয়াকিয়াহ্ (অনিবার্য ঘটনা)	583

৫৭	অধ্যায় : আল - হাদীদ (লৌহ)	587
৫৮	অধ্যায় : আল - মুজাদলাহ্ (প্রতিবাদীপক্ষ)	592
৫৯	অধ্যায় : আল - হাশর (নির্বাসন)	595
৬০	অধ্যায় : আল - মুমতাহিনা (পরীক্ষিতা)	599
৬১	অধ্যায় : আল - সাফফ (সারিবদ্ধ)	602
৬২	অধ্যায় : আল - জুমুআহ (সমাবেশ)	604
৬৩	অধ্যায় : আল - মুনাফিকুন (কপটাচারীগণ)	605
৬৪	অধ্যায় : আত - তাগাবুন (লাভ-ক্ষতি)	607
৬৫	অধ্যায় : আত - তালাক (বিবাহ-বিচ্ছেদ)	609
৬৬	অধ্যায় : আত - তাহরীম (নিষেধাজ্ঞা)	611
৬৭	অধ্যায় : আল - মুল্ক (রাজ্য)	613
৬৮	অধ্যায় : আল - কলম (কলম)	616
৬৯	অধ্যায় : আল - হাক্কাহ (অনিবার্যক্ষন)	619
৭০	অধ্যায় : আল - মা'আরিজ (আরোহী সিঁড়ি)	621
৭১	অধ্যায় : নূহ (নোয়াহ)	623
৭২	অধ্যায় : আল - জ্বিন (জ্বিন জাতি)	625
৭৩	অধ্যায় : আল - মুযাশ্মিল (চাদরাবৃত)	628
৭৪	অধ্যায় : আল - মুদ্দাসসির (বস্ত্রাবৃত)	629
৭৫	অধ্যায় : আল - কিয়ামাহ (পুনরুত্থান দিবস)	632
৭৬	অধ্যায় : আল - ইনসান (মানব সম্প্রদায়)	633
৭৭	অধ্যায় : আল - মুরসালাত (প্রেরিতগণ)	635
৭৮	অধ্যায় : আন - নাবা (সংবাদ)	637
৭৯	অধ্যায় : আন - নাযিআত (নিমজ্জিত)	639
৮০	অধ্যায় : আল - আবাসা (ঈকুশিত)	641
৮১	অধ্যায় : আত - তাকবীর (ভাঁজ)	642
৮২	অধ্যায় : আল - ইন্ফিতার (চূর্ণবিচূর্ণ)	643
৮৩	অধ্যায় : আল - মুতাফফিফীন (যারা ওজনে কম দেয়)	644
৮৪	অধ্যায় : আল - ইনশিকাক (চৌচির)	646
৮৫	অধ্যায় : আল - বুরাজ (নক্ষত্রপুঞ্জ)	647
৮৬	অধ্যায় : আত - তারিক (নৈশ আগন্তুক)	648

৮৭	অধ্যায় : আল-আলা (সর্বোচ্চ)	648
৮৮	অধ্যায় : আল-গাশিয়াহ (অপ্রতিরোধ্য ঘটনা)	649
৮৯	অধ্যায় : আল-ফজর (ভোর)	650
৯০	অধ্যায় : আল-বালাদ (শহর)	651
৯১	অধ্যায় : আশ-শামস (সূর্য)	652
৯২	অধ্যায় : আল-লাইল (রাত্রি)	653
৯৩	অধ্যায় : আয-যুহা (গৌরবান্বিত সকাল)	653
৯৪	অধ্যায় : আল-ইনশিরাহ্ (স্বস্তি)	654
৯৫	অধ্যায় : আত-ত্বীন (ডুমুর)	654
৯৬	অধ্যায় : আল-আলাক (জমাট বাধা)	655
৯৭	অধ্যায় : আল-কদর (ভাগ্য রজনী)	656
৯৮	অধ্যায় : আল-বাইয়িনাহ (স্পষ্ট প্রমাণ)	656
৯৯	অধ্যায় : আয-যিলযাল (ভূমিকম্প)	657
১০০	অধ্যায় : আল-আদিয়াত (হেযাধ্বনি)	657
১০১	অধ্যায় : আল-কারিআহ (মহাপ্রলয়)	658
১০২	অধ্যায় : আত-তাকাসূর (প্রাচুর্যের লালসা)	658
১০৩	অধ্যায় : আল-আসর (অতিক্রান্ত সময়)	658
১০৪	অধ্যায় : আল-হুমাযাহ (নিন্দুক)	659
১০৫	অধ্যায় : আল-ফীল (হাতি)	659
১০৬	অধ্যায় : কোরাইশ (কুরাইশ)	659
১০৭	অধ্যায় : আল-মা'উন (তুচ্ছ দ্রব্য)	660
১০৮	অধ্যায় : আল-কাওসার (প্রাচুর্য)	660
১০৯	অধ্যায় : আল-কাফিরূন (সত্য প্রত্যাখ্যানকারী)	660
১১০	অধ্যায় : আন-নাসূর (সাহায্য)	661
১১১	অধ্যায় : আল-লাহাব (অঙ্গারবর্ণ)	661
১১২	অধ্যায় : আল-ইখলাস (একত্ব)	661
১১৩	অধ্যায় : আল-ফালাক (উষাকাল)	662
১১৪	অধ্যায় : আন-নাস (মানব সম্প্রদায়)	662

—ঃ পরিচয় :—

কুরআন হলো ঈশ্বরের প্রেরিত এক গ্রন্থ যা অবিকৃত অবস্থায় সর্বকালের সকল মানুষের জন্য সু-সংরক্ষিত। এই গ্রন্থ আরবী ভাষায় অবতীর্ণ হলেও, অনুবাদের কল্যাণে অন্যান্য ভাষাভাষী মানুষজনের জন্য এটা সহজবোধ্য হয়েছে। যদিও মূল গ্রন্থের কোনো বিকল্প হয় না, তবুও বিভিন্ন ভাষাভাষী অগণিত মানুষজনের নিকটে ঈশ্বরের বাণী পৌঁছে দেওয়ার প্রাথমিক উদ্দেশ্য অনুবাদের মাধ্যমে সাধিত হয়েছে।

আপাতদৃষ্টিতে কুরআনের ভাষা আরবী হলেও, বাস্তবিক ভাবে এটাই হলো প্রকৃতির ভাষা। এটা হলো সেই ভাষা যে ভাষায় ঈশ্বর সৃষ্টির আদি লগ্নে সমগ্র মানবজাতিকে সম্বোধন করেছিলেন। সেই পবিত্র সম্বোধন প্রত্যেক মানুষের চেতনায় চিরভাস্বর হয়ে আছে। সেইজন্য কুরআন সার্বজনীনভাবে বোধগম্য - কারো নিকট সচেতন রূপে, কারো নিকট অবচেতন রূপে। এই ঘটনার প্রতি ইঙ্গিত করে কুরআনে বলা হয়েছে - ‘বস্তুতঃ যাদেরকে জ্ঞান দেওয়া হয়েছে, তাদের অন্তরে এটা (কুরআন) স্পষ্ট নিদর্শন। শুধু যালিমরাই আমার নিদর্শন অস্বীকার করে (২৯ : ৪৯)।’

অর্থাৎ চেতনার স্তরে কুরআন যে পবিত্র বাস্তবতার কথা বলে, তা মানুষের অবচেতনে পূর্বাহ্ন থেকেই বিদ্যমান আছে। সেই জন্য কুরআনের বাণী মানুষের নিকটে অস্বাভাবিক কিছুই নয়; বরং এটা সেই পবিত্র বাস্তবতার এক শাব্দিক অভিব্যক্তি যা মানুষের নিজস্ব প্রকৃতির সঙ্গে সঙ্গতিপূর্ণ এবং যার সাথে সে পূর্বাহ্ন থেকেই পরিচিত। কুরআনে বলা হয়েছে যে, পরবর্তী যুগে যে সমস্ত মানুষ জন্মগ্রহণ করছে, তাদের সকলকেই প্রাথমিকভাবে আদম সৃষ্টির সময়ই সৃষ্টি করা হয়েছিল এবং তখন ঈশ্বর সকল মানবাত্মাদের প্রত্যক্ষ ভাবে সম্বোধন করেছিলেন। এই সম্পর্কে কুরআনে বলা হয়েছে - ‘যখন

তোমাদের প্রভু আদমের পৃষ্ঠদেশ হতে তাদের বংশধরদের বাহির করলেন এবং তাদেরকেই তাদের সাক্ষী বানিয়ে জিজ্ঞাসা করলেন, “আমি কি তোমাদের প্রভু নই?” তারা সমস্বরে উত্তর দিলঃ “হ্যাঁ, আমরা সাক্ষী থাকলাম যে আপনিই প্রভু।” সুতরাং পুনরুত্থান দিবসে বলতে পারবে নাঃ ‘আমরা এ বিষয়ে সম্পূর্ণ অনবহিত ছিলাম (৭ : ১৭২)।’

অন্য একটি বাক্যে, ঈশ্বর ও মানবাত্মার কথোপকথন বর্ণিত হয়েছে- ‘আমি আকাশ, পৃথিবী ও পর্বতমালার নিকট এই দায়িত্ব অর্পন করেছিলাম, তারা এটা বহন করতে অস্বীকার করল এবং মানুষ তা উঠিয়ে নিল। নিঃসন্দেহে সে যালিম এবং অঙ্গ ছিল (৩৩ : ৭২)।’

মানুষের নিকটে কুরআনের সারমর্ম কোন অজ্ঞাত বিষয় নয়, বরং এ বিষয়ে সে পূর্ব থেকেই জ্ঞাত আছে। বস্তুতঃ কুরআন হলো মনুষ্য হৃদয়ের এক অনুপম উন্মেষ।

যার মধ্যে সেই অনুপম প্রকৃতি প্রাণময় হয়ে আছে, যে পরবর্তী সকল প্রকার হীন প্রভাব থেকে নিজেকে সুরক্ষিত রেখেছে, সে যখন কুরআন পড়ে, তার মস্তিষ্কের যে সমস্ত কোষগুলিতে ঈশ্বরের প্রথম সম্ভাষণ সংরক্ষিত আছে, সেগুলি তখন জাগ্রত হয়ে ওঠে। যদি আমরা এটা স্মরণে রাখি, তাহলে আমরা অনুধাবন করতে পারবো যে কুরআন হৃদয়ঙ্গম করার জন্য এর অনুবাদ পাঠ একটি যুক্তিসিদ্ধ পন্থা।

সৃষ্টির আদিলগ্নে ঈশ্বর মানবাত্মাদেরকে প্রথম সন্মোদন করেছিলেন এবং কুরআন হলো তাঁর দ্বিতীয় সন্মোদন। এই সন্মোদন দুটি একে অপরের পরিপূরক। যদি কেউ আরবী ভাষা না জানে বা অল্প জানে এবং কেবলমাত্র কুরআনের অনুবাদ পড়ে, তাহলে সে কুরআন বুঝবে না, এমন ধারণা করার কোন হেতু নেই- কারণ বর্তমানে কুরআনের এই ধারণা সর্বজনবিদিত যে

মানুষ হলো ঈশ্বরের বাণীর স্বতঃস্ফূর্ত সংগ্রাহক। জেনেটিক কোড সংক্রান্ত আধুনিক ধারণা এবং নৃবিদ্যা সংক্রান্ত আবিষ্কার এই দৃষ্টিভঙ্গীকে পরিপূর্ণরূপে সমর্থন করে।

—ঃ ঈশ্বরের সৃষ্টি পরিকল্পনা :—

প্রত্যেক গ্রন্থের একটা উদ্দেশ্য থাকে এবং কুরআনের উদ্দেশ্য হলো ঈশ্বরের সৃষ্টি পরিকল্পনা সম্পর্কে মানুষকে অবগত করা। অর্থাৎ মানুষকে জানানো - কেন ঈশ্বর এই পৃথিবী সৃষ্টি করেছেন, মানুষকে পৃথিবীতে স্থান দেওয়ার উদ্দেশ্য কি? মৃত্যুর পূর্ববর্তী জীবদশায় মানুষের নিকট কি কাঙ্ক্ষিত হয়েছে, এবং মৃত্যুর পরবর্তী জীবনে মানুষের কি ঘটবে। মানুষ এক অমর সৃষ্টি হিসাবে জন্মলাভ করেছে। তিনি মানুষের জীবনকালকে দুটি ভাগে ভাগ করেছেন। প্রথম ভাগ হলো মৃত্যু পূর্ববর্তী জীবন বা পরীক্ষার জীবন। দ্বিতীয় ভাগ মৃত্যু পরবর্তী জীবন বা মৃত্যু পূর্ববর্তী জীবনে কৃতকর্মের প্রতিদান হিসাবে পুরস্কার বা তিরস্কার গ্রহণের জীবন, যা অনন্ত স্বর্গ বা অনন্ত নরক হিসাবে মানুষের জীবনে প্রতিভাত হবে। এটাই এই পবিত্র গ্রন্থের মূলভাব যা মানুষের ইহজীবন থেকে পরজীবনে উত্তোরনের যাত্রাপথে পথ প্রদর্শকের ভূমিকা পালন করে।

সন্দেহাতীত ভাবে বলা যায় মানুষ জন্ম থেকেই সত্যাস্থেয়ী। তার মনের গহনে নানা প্রশ্ন উঁকি দেয় - ‘আমি কে? আমার জীবনের উদ্দেশ্য কি?’ জীবন মৃত্যুর মাঝে কি সত্য প্রচ্ছন্ন হয়ে আছে, মানুষের সাফল্য বা ব্যর্থতা কিসের মধ্যে নিহিত আছে? ইত্যাদি। কুরআনের ভাষ্য অনুসারে - মানুষের পার্থিব জীবন কেবলমাত্র পরীক্ষার জন্য এবং যা কিছু মানুষ মৃত্যু পূর্ববর্তী জীবনে লাভ করে, তা সবই পরীক্ষার উপকরণ। পরজীবনে মহান প্রভু পরীক্ষার ফল

প্রকাশ করবেন এবং তখন পুরস্কার বা তিরস্কার হিসাবে মানুষ যা কিছু প্রাপ্ত হবে তা ইহজীবনে কৃতকর্মের সমানুপাতিক হবে। ঈশ্বরের এই সৃষ্টি পরিকল্পনা সম্পর্কে অবহিত হওয়া এবং তদানুসারে জীবন পরিকল্পনা রচনা করার মধ্যেই ইহজীবনের সাফল্য নিহিত আছে।

—ঃ ঐশ্বরিক সাবধানবাণীর গ্রন্থ :—

কুরআন হলো ঐশ্বরিক সাবধানবাণী সংবলিত এক গ্রন্থ, যার মধ্যে শিক্ষা ও উপদেশাবলীর মহাসম্মিলন ঘটেছে। এ এক নির্ভুল প্রজ্ঞাময় গ্রন্থ। কুরআন প্রচলিত নীতিমূলক গ্রন্থের কাঠামো অনুসরণ করে না। সেই জন্য সাধারণ পাঠক যখন কুরআন পাঠ করে, তখন তার মনে হয়, এই গ্রন্থটি কিছু বিচ্ছিন্ন বিবৃতির সংকলন মাত্র। আপাতভাবে এমন মনে হওয়াটা অস্বাভাবিক কিছু নয়। কোন ক্রটির কারণে কুরআনের এমন বিন্যাস হয়নি, বরং কুরআনের প্রাথমিক উদ্দেশ্য - কোন নৈমিত্তিক পাঠক যদি একবালকে এই গ্রন্থের কোন একটি পৃষ্ঠা বা পংক্তি পাঠ করে তার কাছে সত্যের বাণী পৌঁছে দেওয়া - এর সঙ্গে এই বিন্যাস যথার্থরূপে সামঞ্জস্যপূর্ণ হয়েছে।

কুরআন হলো মহান করণাময়ের অপার অনুগ্রহের এক স্মারক গ্রন্থ। মানুষ সৃষ্টির সময়ে ঈশ্বর তাকে এক অনন্য গুণ সম্পন্ন করেছেন। তিনি তাকে পৃথিবীতে স্থান দিয়েছেন এবং সমস্ত ধরনের জীবনোপকরণ দান করেছেন। ঐ সমস্ত জীবনোপকরণ ভোগ করার সময়ে মানুষ মহান করণাময়কে স্মরণে রাখবে এবং তাঁর মহানুভবতার স্বীকৃতি জানাবে - এটাই সুনিশ্চিত করা কুরআনের অন্যতম উদ্দেশ্য। এর মাধ্যমে মানুষ অনন্ত স্বর্গে প্রবেশাধিকার অর্জন করবে। পক্ষান্তরে করণাময়ের অনুগ্রহ অস্বীকার করার ফলস্বরূপ নরকের (দোজখের) পথে পরিচালিত হবে। কুরআন এই অবশ্যম্ভাবী বাস্তবতাকে স্মরণ করিয়ে দেয়।

—ঃ আত্মচেতনা ও ঈশ্বরের উপলব্ধি :—

কুরআনের অন্যতম গুরুত্বপূর্ণ বৈশিষ্ট্য হলো - এই গ্রন্থের মাধ্যমে এক মৌলিক এবং অত্যাবশ্যাকীয় নীতি শিক্ষা দেওয়া এবং ঐ শিক্ষণীয় বিষয়ের প্রতি গুরুত্ব আরোপ করার লক্ষ্যে প্রায়শই তার পুনরাবৃত্তি করা হয়েছে। বিপরীতক্রমে আনুযায়িক বা বিন্যাস সংক্রান্ত বিষয়সমূহ এই গ্রন্থে খুবই অকিঞ্চিৎকর স্থান লাভ করেছে। কুরআনের পরিকল্পনায় বিন্যাসের গুরুত্ব খুবই নগন্য। কেবলমাত্র মৌলিক নির্দেশিকা সমূহকে কুরআনের গুরুত্ব আরোপ করা হয়েছে। এই দিকটি কুরআনে এত স্পষ্ট যে, পাঠক তার তারিফ না করে পারে না।

বস্তুত ইসলামী ব্যক্তিত্ব গড়ে তোলার জন্য আত্মচেতনার গুরুত্ব অপরিসীম। যখনই আত্মচেতনার বিকাশ ঘটবে, তখনই তার বিন্যাস সুনিশ্চিত হবে। কিন্তু বিন্যাসের মাধ্যমে আত্মচেতনা অর্জিত হয় না। সেই জন্য কুরআনের লক্ষ্য হলো ব্যক্তির বৌদ্ধিক বিপ্লবের সূচনা করা এবং তাকে চরিতার্থ করা। কুরআনের ভাষায় যাকে বলে, ‘মা ‘রিফাহ’ (সত্যাপলব্ধি) (৫ : ৮৩)। উপলব্ধির মাধ্যমে সত্য উদঘাটনের প্রতি কুরআনে গুরুত্ব আরোপ করা হয়েছে। উপলব্ধির মাধ্যমেই মানুষ ঈশ্বরের প্রতি প্রকৃত বিশ্বাস অর্জন করে। যেখানে উপলব্ধি নাই, সেখানে বিশ্বাসও নাই।

—ঃ ঈশ্বরের বাণী :—

কুরআন পাঠ করার সময়ে দেখা যায় একটি কথা বারবার ঘোষিত হয়েছে- ‘এটা ঈশ্বরের বাণী।’ আপাতভাবে এটা সাধারণ বিষয় মনে হলেও, অনুসঙ্গগতভাবে এটা একটা অসাধারণ বিবৃতি। পৃথিবীতে আরো অনেক গ্রন্থ আছে যেগুলি পবিত্র গ্রন্থ হিসাবে বিশ্বাস করা হয়, কিন্তু কুরআন ব্যতীত

অন্য কোন ধর্ম গ্রন্থে সেটাকে ঈশ্বরের বাণী হিসাবে বর্ণনা করা হয়নি। কুরআনের এই অনন্য উক্তি পাঠকের মনে এক প্রবল আকাঙ্ক্ষা জন্ম দেয়। তখন সে মানুষের লিখিত সাধারণ পুস্তক হিসাবে নয়, বরং এক অসাধারণ গ্রন্থ হিসাবে এটা পাঠ করতে থাকে। কুরআনে একটি বিষয় অল্পবিস্তর এমনভাবে পুনরাবৃত্ত হয়েছে - ‘হে মানব সকল! তোমাদের প্রভু তোমাদেরকে সম্বোধন করেছেন। তার কথা শ্রবণ কর এবং তা অনুসরণ কর।’ এ এক ব্যতিক্রমধর্মী সম্বোধন। এই ধরনের প্রত্যক্ষ পবিত্র সম্বোধন অন্য কোন গ্রন্থে নেই। এই সম্বোধন পাঠকের মনে একটা স্থায়ী ছাপ ফেলে এবং ঈশ্বরের এই দ্ব্যর্থহীন সম্ভাষণকে সে অনুভব করে। তখন সে কুরআনের বিবৃতিগুলিকে অসাধারণ গুরুত্ব সহকারে অনুধাবন করে, সাধারণ পুস্তকের আটপৌরে বিবৃতির মতো করে নয়। কুরআন সংকলনের রীতিটিও অনন্য সুলভ। মানুষের লিখিত পুস্তক সমূহ বিষয় বস্তু অনুসারে ক্রমান্বয়ে সংকলিত হয়। কিন্তু কুরআনে এই রীতি অনুসৃত হয় নি। তাই সাধারণ পাঠকের ধারণা হতে পারে যে, এখানে ক্রম বিন্যাসের অভাব হয়েছে। কিন্তু বাস্তবতার দিক থেকে এটা শীঘ্রই প্রতিভাত হয় যে এটা একটা চূড়ান্ত ভাবে সুসংগত ও সুবিন্যস্ত গ্রন্থ এবং এর রচনাই প্রকৃতপক্ষে ঐশ্বর্যমণ্ডিত। এই গ্রন্থ পাঠ করার সময়ে এটা অনুভূত হয় যে, এর রচয়িতা কোন উচ্চ স্থান হতে নিম্নে অবস্থিত সমগ্র মানবজাতিকে সম্বোধন করেছেন-এটাই এর বিশেষ বিশেষত্ব। পৃথক পৃথক মানবগোষ্ঠীকে উদ্দেশ্য করে তাঁর এই সম্বোধন প্রকৃতপক্ষে সমগ্র মানব জাতিকেই সন্নিবেশিত করে।

কুরআনের একটা বিশেষ বৈশিষ্ট্য হলো, এর পাঠক যে কোন মুহূর্তে এর রচয়িতার সঙ্গে পরামর্শ করতে পারে, তাঁর নিকট প্রশ্ন উত্থাপন করতে পারে এবং তার উত্তর ও পেতে পারে, কারণ এর রচয়িতা হলেন ঈশ্বর নিজেই। তিনি সদাজাগ্রত। সৃষ্টিকর্তা হিসাবে, তিনি মানুষের ডাক শোনেন এবং তার ডাকে সাড়া দেন।

—ঃ শান্তিপূর্ণ ভাবাদর্শগত সংগ্রাম :—

কেবলমাত্র মিডিয়ার মাধ্যমে যাদের সাথে কুরআনের পরিচয় ঘটেছে তারা জানে যে কুরআন একটি জিহাদী গ্রন্থ এবং হিংসার মাধ্যমে উদ্দেশ্য চরিতার্থ করার নামই জিহাদ। এই ধারণা সম্পূর্ণভাবে অমূলক। যারা কুরআন পাঠ করে, তারা শীঘ্রই অনুভব করে, হিংসার সাথে কুরআনের কোন সম্পর্ক নাই। কুরআন সামগ্রিকভাবে শান্তির বাণী ঘোষণা করে এবং হিংসাকে প্রশ্রয় দেয় না। তবে এটা সত্য কুরআনের অন্যতম শিক্ষা হলো ‘জিহাদ’। প্রকৃত অর্থে জিহাদ হলো শান্তিপূর্ণ সংগ্রাম, হিংসাত্মক কার্যকলাপ নয়। কুরআনের ভাষায় - ‘কুরআনের সাহায্যে তুমি বৃহত্তর জিহাদ (কঠোর সংগ্রাম) চালিয়ে যাও (২৫ : ৫২)।’

স্পষ্টত কুরআন কোন অস্ত্র নয়, বরং শান্তিপূর্ণ সংগ্রামের পবিত্র আদর্শ সংবলিত এক গ্রন্থ। এই সংগ্রামের কৌশল সম্পর্কে কুরআনের নির্দেশিকা হলো - ‘তাদের সাথে হৃদয়স্পর্শী কথা বল (৪ : ৬৩)।’

কুরআন অনুসারে কাঙ্ক্ষিত পথ এমন হবে যা মানুষের হৃদয় ও মনকে আন্দোলিত করে। হৃদয়ের এই সম্ভাষণের দ্বারা মানুষ পরিতৃপ্ত হয়, কুরআনের সত্যাসত্যতা উপলব্ধি করে এবং তার মধ্যে এক বৌদ্ধিক বৈপ্লব সংঘটিত হয়। এটাই কুরআনের বিশেষ লক্ষ্য। যুক্তিসঙ্গত তর্কের মাধ্যমে এই মহালক্ষ্যে উপনীত হওয়া যায়। হিংসা বা সশস্ত্র সংগ্রামের মাধ্যমে উপনীত হওয়া যায় না।

তবে এটা সত্য, কুরআনে এমনও ভাষ্য আছে - ‘তাদেরকে যেখানেই পাও, হত্যা কর (২ : ১৯১)।’ এই ধরনের ভাষ্যগুলি উল্লেখ করে এমন একটি ধারণা প্রতীয়মান করার চেষ্টা করা হয় যে, ইসলাম হলো একটি হিংসা ও সংঘাতের ধর্ম। এটা সম্পূর্ণরূপে অসত্য। এই ধরনের ভাষ্যগুলি বিশেষরূপে

তাদের জন্য প্রযোজ্য যারা একতরফা ভাবে মুসলিমদের আক্রমণ করে। উক্ত ভাষ্যগুলি কখনই ইসলামের সাধারণ নির্দেশিকা নয়।

কুরআনকে আমরা বর্তমানে যে আঙ্গিকে পাই, এমন সম্পূর্ণ আঙ্গিকে একই সময়ে এই গ্রন্থ অবতীর্ণ হয় নি। বিভিন্ন সময়ের পরিপ্রেক্ষিতে প্রায় ২৩ বছর ধরে এটা অবতীর্ণ হয়। এই সময়কালকে যদি যুদ্ধের সময়কাল ও শান্তির সময়কাল হিসাবে বিভাজন করা হয়, তাহলে দেখা যাবে যুদ্ধের কালের স্থায়িত্ব ছিল মাত্র ৩ বছর এবং শান্তির কালের স্থায়িত্ব ছিল দীর্ঘ ২০ বছর। এই ২০ বছরে শান্তির কালে অবতীর্ণ কুরআনের ভাষ্যের মধ্যে ঈশ্বর উপলদ্ধি, উপসনা, নৈতিকতা, ন্যায়বিচার ইত্যাদি বিষয় আলোচিত হয়েছে।

নানা বিভাজনে বিভাজিত নির্দেশিকা সমূহ একটি স্বাভাবিক সহজাত বিষয় যা অন্যান্য ধর্মগ্রন্থেও প্রতীয়মান হয়। উদাহরণ স্বরূপ হিন্দুদের পবিত্র গ্রন্থ গীতার মধ্যে প্রজ্ঞা ও নৈতিক মূল্যবোধ সংক্রান্ত বিষয় অবতারনার পাশাপাশি দেখা যায় শ্রীকৃষ্ণ অর্জুনকে যুদ্ধে অবতীর্ণ হওয়ার জন্য প্রেরণা দান করেছেন (ভগবত গীতা, ৩ঃ ৩০)। তার অর্থ এই নয় যে গীতার অনুসারীদেরকে সদা সর্বদা যুদ্ধে ব্যাপ্ত থাকার জন্য পরামর্শ দেওয়া হয়েছে। সর্বোপরি এই গীতা থেকেই মহাত্মাগান্ধী অহিংসার দর্শন উপলদ্ধি করেন। যখন অন্য কোন উপায় না থাকে, তেমন ব্যতিক্রমী পরিস্থিতিতেই যুদ্ধ সংক্রান্ত গীতার নির্দেশিকা কার্যকরী হয়ে থাকে। কিন্তু স্বাভাবিক দৈনন্দিন পরিস্থিতিতে শান্তির নির্দেশিকাই মুখ্যরূপে প্রতীয়মান হয়, যা মহাত্মাগান্ধী উপলদ্ধি করেছিলেন।

বাইবেলে কথিত আছে, যীশুখৃষ্ট বলেছেন - ‘মনে করো না আমি পৃথিবীতে শান্তি স্থাপনের জন্য এসেছি। আমি শান্তি নয়, তলোয়ারের জন্য এসেছি (ম্যাথিউ, ১০ঃ ৩৪)।’ সুতরাং যীশুখৃষ্ট কতৃক প্রচারিত ধর্ম কেবলমাত্র হিংসা ও যুদ্ধের প্ররোচনা দেয়, এমন সিদ্ধান্তে উপনীত হওয়া যথার্থ নয়, কারণ বিশেষ ব্যতিক্রমী পরিস্থিতিতে এই কথাগুলি প্রযোজ্য। জীবনের সাধারণ

ক্ষেত্রে, যীশু শান্তির বাণী তথা সৎচরিত্র গঠন, পারস্পারিক ভালোবাসা, দরিদ্র ও অভাবগ্রস্তদের সাহায্য করা ইত্যাদি বিষয় সমূহ প্রচার করেছেন।

কুরআনের ক্ষেত্রেও বিষয়টি অনুরূপ। যখন মহানবী মুহাম্মাদ (সঃ) মক্কা ত্যাগ করে মদিনায় দেশান্তরী হন, তখন পৌত্তলিক উপজাতি সমূহ তাঁর প্রতি নানা উৎপীড়ন মূলক আচরণ করেন। কিন্তু নবী (সঃ) ধৈর্য্য ও পরিহারের কৌশল দ্বারা তাদের উৎপীড়নকে প্রতিহত করেন। বিশেষ কিছু পরিস্থিতিতে যখন আত্মরক্ষা ছাড়া অন্য আর কোন উপায় অবশিষ্ট ছিল না, কেবল তখনই তাঁকে যুদ্ধ করতে হয়েছিল। এমন বিশেষ পরিস্থিতির পরিপ্রেক্ষিতে যুদ্ধ সংক্রান্ত নির্দেশিকাগুলি অবতীর্ণ হয়। যেহেতু এই নির্দেশিকাগুলি বিশেষ পরিস্থিতির সঙ্গে সংশ্লিষ্ট, স্বাভাবিক ভাবে যে কোন সাধারণ পরিস্থিতিতে বা ভবিষ্যতের সকল সময়ের জন্য এগুলি প্রযোজ্য নয়। সেইজন্য নবী (সঃ) কে ‘সমগ্র মানবজাতির আশীর্বাদ’ হিসাবে আখ্যায়িত করা হয়েছে।

ইসলাম হলো পরিপূর্ণ অর্থে একটি শান্তির ধর্ম। কুরআনের ভাষায় বলা হয়েছে- ‘শান্তির পথ (৫ঃ ১৬)।’ আরও বলা হয়েছে- ‘আপোষ মিমাংসাই উত্তম পস্থা (৪ঃ ১২৮)।’ ‘ঈশ্বর অশান্তি পছন্দ করেন না (২ঃ ২০৫)।’ তাই একথা নিঃসন্দেহে বলা যায় - হিংসা ও ইসলাম দুটি পরস্পর বিরোধী বিষয়।

—ঃ এক অবতীর্ণ গ্রন্থ :—

কুরআন হলো নবী মুহাম্মদ (সঃ) এর উপর অবতীর্ণ এক গ্রন্থ। এই গ্রন্থ পরিপূর্ণ আকারে একবারে অবতীর্ণ হয় নি। দীর্ঘ ২৩ বছর ধরে আংশিকভাবে অবতীর্ণ হয়। ৬১০ খৃষ্টাব্দে, নবী (সঃ) যখন মক্কায় থাকতেন তখন সর্বপ্রথম এই গ্রন্থের সামান্য অংশ অবতীর্ণ হয়। পরবর্তীকালে বিভিন্ন সময়ে বিভিন্ন পরিস্থিতিতে নিয়মিতভাবে অবতীর্ণ হতে থাকে। সর্বশেষে ৬৩২ খৃষ্টাব্দে, নবী (সঃ) যখন মদিনায় থাকতেন তখন কুরআনের অন্তিম অংশ অবতীর্ণ হয়।

কুরআনে মোট ছোট বড়ো মিলিয়ে ১১৪ টি অধ্যায় আছে। আয়াতের (বাক্যের) সংখ্যা ৬২৩৬ টি। পাঠের সুবিধার্থে কুরআনকে ৩০ টি অংশে (পারা) ভাগ করা হয়েছে। ফেরেস্তা জিব্রাইলের (গ্যাব্রিয়েলের) মাধ্যমে ঈশ্বর কুরআন অবতীর্ণ করেন এবং তারই পরামর্শক্রমে কুরআনের অংশ সমূহ বিন্যাস্ত করা হয়।

সপ্তম শতকের প্রথম অংশে যখন কুরআন অবতীর্ণ হতে শুরু করে, তখন কাগজের উদ্ভাবন হয়ে গেছে। বিশেষ এক প্রকার গাছের তন্তু দিয়ে ‘প্যাপিরাস’ নামে এই কাগজগুলি সাধারণতঃ হাতে বানানো হতো। যখনই কুরআন অবতীর্ণ হত, অবতীর্ণ পংক্তিগুলি তখনই ‘প্যাপিরাস’, যার আরবী প্রতিশব্দ ‘কিরতাস’ (৬ঃ ৭) এর উপর লিখে নেওয়া হতো। এই সময় নবী (সঃ) এর সাথীরা অবতীর্ণ অংশটি স্মৃতিতে সংরক্ষণ করে নিতেন, কারণ কুরআনই হল একমাত্র ইসলামী ভাষা যা প্রার্থনার সময় বা দাওয়াহ এর কাজে আবৃত্তি করা হয়। এই ভাবে কুরআন লিখিত আকারে এবং মানব স্মৃতিতে সংরক্ষিত হতে থাকে। নবী (সঃ) এর জীবৎকালে এই প্রক্রিয়া চালু থাকে।

তৃতীয় খলীফা উসমান বিন আফফান কুরআনের কিছু অনুলিপি প্রস্তুত করেন এবং বিভিন্ন শহরে সেগুলি প্রেরণ করেন। বড়ো বড়ো মসজিদে সেগুলি রাখা হতো। অনুগামীগণ সেগুলি কেবলমাত্র আবৃত্তিই করতো না, তা থেকে আরও অনুলিপি বানিয়ে নিত।

ছাপাখানা আবিষ্কারের পূর্ববর্তী সময়কাল পর্যন্ত কুরআন হাতে লিখিত হতো। শিল্প বিপ্লবের পরবর্তী সময়ে কাগজ উৎপাদন যখন অত্যাধিক পরিমাণে বৃদ্ধি পায়, তখন থেকে কুরআনের ছাপা অনুলিপি প্রকাশিত হতে থাকে। এখন কুরআনের ছাপা অনুলিপিগুলি এত সহজলভ্য হয়ে গেছে যে, প্রায় প্রতিটি বাড়ি, মসজিদ, পাঠাগার বা পুস্তক বিপনীতে দেখতে পাওয়া যায়। এখন যে কোন মানুষ পৃথিবীর যে কোন প্রান্ত থেকে কুরআনের একটি সুন্দর অনুলিপি সংগ্রহ করতে পারে।

—ঃ কুরআন পাঠের রীতি :—

কুরআনে বলা হয়েছে - ‘কুরআন আবৃত্তি করো ধীরে ধীরে এবং স্পষ্টভাবে (৭৩ঃ৪)।’ অর্থাৎ কুরআন ধীরে ধীরে এবং পরিমিত ছন্দোবদ্ধসুরে পাঠকরতে বলা হয়েছে, যাতে বিষয়বস্তুর প্রতিপূর্ণ মনসংযোগ স্থাপন করা যায়। এই ভাবে পাঠের মাধ্যমে কুরআন ও পাঠকের মধ্যে একটি দ্বিমুখী সম্পর্ক তৈরী হয়। তখন সে অনুভব করে - কুরআন হলো ঈশ্বরের সম্ভাষণ বা বাণী এবং তার অন্তর প্রতিটি ছত্রের মধ্যে নিহিত ঈশ্বরের সম্ভাষণে সাড়া দিতে থাকে। কুরআনের মধ্যে যেখানেই ঈশ্বরের মহানুভবতার কথা বলা হয়, পাঠকের সমগ্র অস্তিত্ব তাঁর মহানুভবতার দ্বারা গভীরভাবে আলোড়িত হয়। কুরআনে যখন ঈশ্বরের আশির্বাদের কথা উল্লেখ করা হয়, তখন পাঠকের অন্তর কৃতজ্ঞতায় আপ্লুত হয়; আবার যখন ঈশ্বরের শাস্তি বিধানের কথা বলা হয়, তখন পাঠক হৃদয় প্রকম্পিত হয়; আর যখন কোন নির্দেশনা দান করা হয়, তখন পাঠক হৃদয়ে ঈশ্বরের ঐ নির্দেশনা মান্য করার মাধ্যমে তার একান্ত অনুগত বান্দা হওয়ার বাসনা তীব্রতর হয়।

মওলানা ওয়াহিদুদ্দিন খান, নিউ দিল্লি

www.mwkhana.com

—ঃ এই পুস্তকে ব্যবহৃত পরিভাষা ও প্রতিশব্দ সংক্রান্ত কিছু কথা :—

কুরআনে ব্যবহৃত পরিভাষাগুলির একটি বিশেষ অর্থ, অভিমুখ ও উদ্দেশ্য আছে। অন্য কোন প্রতিশব্দ কুরআনে ব্যবহৃত পরিভাষাগুলির বিকল্প হতে পারে না। সাধারণ নৈমজ্জিক পাঠকের সুবিধার্থে কুরআনে ব্যবহৃত পরিভাষাগুলির অনুরূপ বহুল প্রচলিত কিছু প্রতিশব্দ এই অনুবাদ পুস্তকে ব্যবহার করা হয়েছে যা কুরআনের অন্তরের প্রকৃতির সঙ্গে সম্পূর্ণভাবে সঙ্গতিপূর্ণ নয়। অনুসন্ধিৎসু পাঠকের নিকট নিবেদন-কুরআনের মধ্যে নিহিত শিক্ষা ও উপদেশাবলী গভীরভাবে অনুধাবন করার জন্য এ বিষয়ে আরও কিছু নির্ভরযোগ্য ও প্রামাণিক গ্রন্থ পাঠ করা আবশ্যিক। এখানে কুরআনে ব্যবহৃত পরিভাষা এবং এই পুস্তকে ব্যবহৃত প্রতিশব্দের একটি সংক্ষিপ্ত তালিকা দেওয়া হলোঃ

আল্লাহ	- ঈশ্বর	সালাত/নামাজ	- প্রার্থনা
ফেরেস্তা	- দেবদূত	ঈমান	- বিশ্বাস
জালিম	- অত্যাচারী	মুত্তাকি	- ঈশ্বরভীরু
ওহী	- প্রত্যাদেশ	আয়াত	- শ্লোক, বাক্য
বেহেস্তু	- স্বর্গ	দোজখ	- নরক
সূরাহ	- অধ্যায়	জাকাত	- আবশ্যিক দান
তাওবা	- অনুতাপ	মুমিন	- বিশ্বাসী/আস্থাবান
হজ্ব	- তীর্থযাত্রা	সাজ্দাহ/সিজদা	- প্রণতি
মুশরিক	- অংশীবাদী	শির্ক	- অংশীদার স্থাপন
মুনাফিক	- কপটাচারী	কেয়ামত	- মহাপ্রলয়/মহাবিনাশ

অধ্যায় ১ : আল-ফাতিহা (উদ্বোধনী)

ঈশ্বরের নামে আরম্ভ যিনি পরম করুণাময় ও অতি দয়ালু।

- (১) সমস্ত প্রশংসা ঈশ্বরের জন্য যিনি নিখিল জগতের প্রভু।
 (২) পরম করুণাময়, দয়ালু। (৩) প্রতিফল দিবসের মালিক। (৪) আমরা
 আপনারই উপাসনা করি এবং আপনারই সহায়তা চাই। (৫) আমাদের
 সোজাপথ দেখান। (৬) তাঁদের পথ, যাদের প্রতি আপনি কৃপা করেছেন।
 (৭) তাদের পথ নয় যারা আপনার ক্রোধের পাত্র এবং তাদের পথও নয়
 যারা পথভ্রষ্ট।

অধ্যায় ২ : আল-বাকারাহ (গাভী)

ঈশ্বরের নামে আরম্ভ যিনি পরম করুণাময় ও অতি দয়ালু।

- (১) আলিফ-লাম-মীম। (২) এটা সেই গ্রন্থ, যাতে কোন সন্দেহ নেই,
 এতে ঈশ্বরভীরু সদাসতর্ক ব্যক্তিদের জন্য পথনির্দেশ আছে। (৩) যারা
 অদৃশ্যে বিশ্বাস স্থাপন করে এবং প্রার্থনা করে আর আমি তাদেরকে যা
 কিছু দিয়েছি, তা থেকে খরচ করে। (৪) আর যারা তদ্বিষয়ে বিশ্বাস স্থাপন
 করে, যা (অর্থাৎ কুরআন) তোমার উপর অবতীর্ণ করেছে এবং যা তোমার
 পূর্বে অবতীর্ণ করা হয়েছিল আর যারা পরলোকে বিশ্বাসী। (৫) এই ধরনের
 লোকেরাই আপন প্রভুর পথ অনুসরণ করছে এবং তারাই হবে সফলকাম।

- (৬) যারা সত্যকে অস্বীকার করে, তাদের সতর্ক কর আর না কর,
 উভয়ই তাদের জন্য সমান, তারা বিশ্বাস স্থাপন করবে না। (৭) ঈশ্বর তাদের
 অন্তরসমূহের উপর ও কর্ণসমূহের উপর মোহরাক্ষিত করে দিয়েছেন, আর
 তাদের চোখের উপর আবরণ আছে, ওদের জন্য কঠোর শাস্তি নির্ধারিত।

(৮) আবার এমন কিছু মানুষ আছে যারা বলে আমরা ঈশ্বরের উপর এবং বিচার দিবসের উপর বিশ্বাস স্থাপন করেছি; কিন্তু বাস্তব এটাই তারা বিশ্বাসী নয়। (৯) তারা ঈশ্বরকে ও বিশ্বাসীদের ধোঁকা দিতে চায়; কিন্তু তারা কেবল নিজেরাই নিজেদেরকে ধোঁকা দিচ্ছে আর তারা এটা বুঝতে পারছে না। (১০) তাদের অন্তরে ব্যাধি আছে ঈশ্বর তাদের ব্যাধি বাড়িয়ে দিয়েছেন আর তাদের জন্য যন্ত্রণাদায়ক শাস্তি রয়েছে, কারণ তারা মিথ্যা বলত। (১১) আর যখন তাদের বলা হয় যে, পৃথিবীতে বিশৃংখলা কোরো না তখন তারা উত্তর দেয় আমরা তো শাস্তি প্রতিষ্ঠা করতে চাই। (১২) সাবধান! বাস্তবে এরাই বিশৃংখলা সৃষ্টিকারী; কিন্তু তারা বুঝতে পারে না। (১৩) আর যখন তাদের বলা হয়ঃ তোমরাও ওদের মত বিশ্বাসী হও (নিষ্ঠাবান হয়ে যাও) যেভাবে অন্যেরা বিশ্বাসী হয়ে গেছে তখন তারা বলেঃ আমরা কি ঐ রকম বিশ্বাসী হয়ে যাব যে রকম বিশ্বাসী মুর্থ লোকেরা হয়ে গেছে। সাবধান! মুর্থ স্বয়ং এরাই; কিন্তু তারা জানে না। (১৪) আর যখন তারা বিশ্বাসীদের সাথে মিলিত হয় তখন বলে আমরাও বিশ্বাস করেছি, আর যখন তারা তাদের ভ্রষ্ট নেতাদের সান্নিধ্যে যায় তখন বলে আমরা তোমাদের সঙ্গেই আছি, আমরা তো ওদের সাথে কেবল উপহাস করে থাকি। (১৫) ঈশ্বর ওদের সাথে উপহাস করছেন আর তিনি তাদের বিদ্রোহের অবকাশ দিচ্ছেন। তারা পথহারা হয়ে ঘুরছে। (১৬) এরা সেই লোক যারা সঠিক পথের পরিবর্তে পথভ্রষ্টতা ক্রয় করছে ফলে তাদের ব্যবসা লাভজনক হয় নি এবং তারা সৎপথ প্রাপ্ত হয় নি।

(১৭) তাদের উদাহরণ এমন যেমন এক ব্যক্তি আগুন প্রজ্জ্বলিত করলো, আগুন যখন তার আশপাশ আলোকিত করল, তখনই ঈশ্বর তাদের চোখের আলো ছিনিয়ে নিলেন এবং তাকে অন্ধকারে ছেড়ে দিলেন তখন তারা আর

কিছুই দেখতে পায় না। (১৮) তারা বধির, বোবা ও অন্ধ সুতরাং তারা সঠিক পথে ফিরে আসবে না। (১৯) অথবা তাদের উদাহরণ এরকম যেমন আকাশ থেকে মুষলধারায় বৃষ্টি পড়ছে, যাতে আছে অন্ধকার ও বজ্র-বিদ্যুৎ, তারা বজ্রপাতের শব্দে ভীত হয়ে মৃত্যু হতে বাঁচার জন্য কানে আঙুল দিয়ে রাখছে, বস্তুতঃ ঈশ্বর অবজ্ঞাকারীদের পরিবেষ্টন করে নিয়েছেন। (২০) বিদ্যুৎ তাদের দৃষ্টি কেড়ে নেওয়ার উপক্রম করে, যখনই বিদ্যুৎ ঝলক দিয়ে ওঠে তখন তারা পথ চলতে থাকে, আবার যখন তাদের উপর অন্ধকার নেমে আসে তখন তাদের চলা থেমে যায়। আর ঈশ্বর ইচ্ছা করলে তাদের শ্রবণশক্তি ও দৃষ্টিশক্তি ছিনিয়ে নিতে পারতেন। বাস্তব এই যে, ঈশ্বর সবকিছুই করার সামর্থ্য রাখেন।

(২১) হে মানবমণ্ডলী! তোমরা তোমাদের প্রতিপালকের দাসত্ব করো, যিনি তোমাদেরকে এবং তোমাদের পূর্বে যারা চলে গেছে তাদেরকেও সৃষ্টি করেছেন, যাতে তোমরা পুণ্যবান হতে পারো। (২২) তিনিই, যিনি তোমাদের জন্য পৃথিবীকে বিছানা ও আকাশকে ছাদ বানিয়েছেন এবং আকাশ থেকে বৃষ্টিধারা বর্ষণ করেছেন এবং তা থেকে সকল প্রকার ফল তৈরী করেছেন, তোমাদের জন্যে জীবিকারূপে। অতএব তোমরা জেনেশুনে কাউকে ঈশ্বরের সমকক্ষ বানিওনা। (২৩) আর আমি আমার বান্দার উপর যে বাণী অবতীর্ণ করেছি (কুরআন) সে সম্বন্ধে তোমাদের মনে যদি কোন সন্দেহ হয় তাহলে তার মত একটি পরিচ্ছেদ রচনা করে দেখাও আর ডেকে নাও ঈশ্বর ব্যতীত তোমাদের সমর্থকদের, যদি তোমরা সত্যবাদী হও। (২৪) আর যদি তোমরা এরকম করতে না পার এবং কখনই করতে পারবে না তাহলে ভয় কর সেই আগুনের যার জ্বালানী হবে মানুষ ও পাথর, যা অবজ্ঞাকারীদের জন্য প্রস্তুত করা হয়েছে। (২৫) আর তাদের সু-সংবাদ

দাও যারা বিশ্বাস স্থাপন করেছে ও সৎকর্ম করেছে যে, তাদের জন্য এমন উদ্যান থাকবে যার পাদদেশ দিয়ে নদী প্রবাহিত হতে থাকবে, যখনই তাদের ঐ উদ্যান হতে কোন ফল খেতে দেওয়া হবে তখন তারা বলবেঃ এটাতো ঐ ফল যা ইতিপূর্বে আমাদের দেওয়া হয়েছিল, তাদেরকে একই আকৃতির বস্তু মিলবে এবং ওদের জন্য সেখানে পবিত্র সঙ্গিনীও থাকবে এবং তারা সেখানে চিরকাল বাস করবে।

(২৬) ঈশ্বর মশা বা এর চেয়েও ক্ষুদ্র কোন বস্তুর উপমা দিতে সংকোচ বোধ করেন না। যারা বিশ্বাসী তারা জানে যে, এই সত্য তার পালনকর্তার নিকট হতে এসেছে। আর যারা সত্য অস্বীকার করে তারা বলে এই উপমার দ্বারা ঈশ্বর কি চাইছেন? ঈশ্বর এর মাধ্যমে অনেককে বিপথগামী করেন এবং অনেককে এর মাধ্যমে পথের সন্ধান দেন, আর তিনি তাদেরকেই বিপথগামী করেন যারা অবজ্ঞাকারী। (২৭) যারা ঈশ্বরের সঙ্গে নিজকৃত অঙ্গীকার ভঙ্গ করে আর ঈশ্বর যা অক্ষুন্ন রাখতে আদেশ দিয়েছেন তা ছিন্ন করে আর পৃথিবীতে বিশৃংখলা সৃষ্টি করে, তারাই ক্ষতিগ্রস্ত। (২৮) তোমরা কিভাবে ঈশ্বরকে অস্বীকার করো? অথচ তোমরা প্রাণহীন ছিলে, তারপর তিনিই তোমাদের জীবন দান করলেন, অতঃপর তিনি তোমাদেরকে মৃত্যু দেবেন, আবার জীবিত করবেন, পুনরায় তাঁর কাছেই তোমাদেরকে প্রত্যাবর্তন করতে হবে। (২৯) তিনিই তোমাদের জন্য সব কিছুই তৈরী করেছেন যা কিছু পৃথিবীতে আছে, তারপর তিনি আকাশের দিকে মনোনিবেশ করলেন এবং সপ্ত আকাশ সুষমভাবে তৈরী করলেন, আর তিনি সবকিছুই জানেন।

(৩০) আর যখন তোমার প্রতিপালক দেবদূতগণকে বললেনঃ আমি পৃথিবীতে এক খলীফা (উত্তরাধিকারী বা প্রতিনিধি) বানাব; দেবদূতগণ বলেছিলঃ

আপনি কি পৃথিবীতে এমন কাউকে বসাতে চান যারা ওখানে বিশৃংখলা করবে আর রক্তপাত ঘটাবে। আমরাইতো আপনার প্রশংসা করি এবং আপনার পবিত্রতা বর্ণনা করি। ঈশ্বর বললেনঃ আমি যা জানি তোমরা তা জানো না। (৩১) এবং তিনি আদমকে সমস্ত নাম শিখিয়ে দিলেন, তারপর তাকে দেবদূতগণের সম্মুখে এনে বলেন যদি তোমরা সত্যবাদী হও তাহলে এদের নামগুলো বল। (৩২) দেবদূতগণ বললঃ আপনিই পবিত্র, আমরা কেবল ওটাই জানি যা আপনি আমাদের বলেছেন। নিঃসন্দেহে আপনিই জ্ঞানী এবং পরম প্রাজ্ঞ। (৩৩) তিনি বলেছিলেনঃ হে আদম! ওদেরকে নামগুলো বলে দাও। যখন আদম ঐ গুলোর নাম বলে দিল তখন ঈশ্বর বললেন আমি কি তোমাদের বলিনি যে, আকাশ ও পৃথিবীর অদৃশ্য রহস্য আমিই জানি আর আমি জানি তোমরা যা কিছু প্রকাশ করো আর যা কিছু গোপন করো।

(৩৪) আর যখন আমি দেবদূতদের বললাম যে আদমের সামনে প্রনত হও, তখন ইবলিস (শয়তান) ব্যতীত সকলে প্রনত হলো। সে অস্বীকার করল ও অহংকার করল এবং সে অস্বীকারকারীদের দলভুক্ত হয়ে গেল। (৩৫) আর আমি বললামঃ হে আদম! তুমি আর তোমার পত্নী দুজনেই জন্মাতে থাক এবং এর মধ্যে যখন যেখানে খুশি সেখান থেকে আহার কর; তবে ঐ বৃক্ষের নিকটে যেওনা তাহলে তোমরা অত্যাচারীদের দলভুক্ত হয়ে যাবে। (৩৬) অতঃপর শয়তান (ইবলিস) তাদের দুজনকেই (ঐ বৃক্ষের মাধ্যমে) বিচলিত করে তুলল এবং তাদের ঐ আনন্দময় জীবন হতে বার করে দিল যেখানে তারা ছিল। আর আমি বললামঃ তোমরা এখান হতে একে অপরের শত্রু রূপে নেমে যাও এবং পৃথিবীতে কিছুকালের জন্য তোমাদের বসবাস ও জীবিকা রয়েছে। (৩৭) আদম তখন তার প্রতিপালকের নিকট হতে কয়েকটি (প্রার্থনার) বাক্য প্রাপ্ত হলেন। অতঃপর তিনি তার (আদমের) অনুশোচনা

গ্রহণ করলেন। নিঃসন্দেহে তিনি ক্ষমাশীল ও পরম দয়ালু। (৩৮) অতঃপর আমি বললামঃ তোমরা এখান থেকে নেমে যাও; অনন্তর যদি আমার পক্ষ হতে তোমাদের নিকটে কোন নির্দেশনা যায় তাহলে যারা আমার নির্দেশনা অনুসরণ করবে তাদের কোন ভয় বা দুঃখ থাকবে না। (৩৯) আর যারা অবজ্ঞা করবে এবং আমার নিদর্শনগুলি মিথ্যা বলবে তারাই নরকের অধিবাসী হবে, সেখানে তারা চিরকাল থাকবে।

(৪০) হে ঈসরায়েলের সন্তান! আমার সেই অনুগ্রহ স্মরণ কর যা আমি তোমাদের করেছি, আর আমার অঙ্গীকার পূরণ কর। আমিও তোমাদের অঙ্গীকার পূরণ করবো, আর আমাকেই ভয় কর। (৪১) আর আমি যা (কুরআন) অবতীর্ণ করেছি তার উপর বিশ্বাস স্থাপন কর, যেটা প্রত্যায়ন করে (তাদের ধর্মগ্রন্থে শেষ পয়গম্বর মুহম্মদ সঃ এর ভবিষ্যতবাণী) যেটা তোমাদের কাছে ইতিমধ্যে আছে, আর তোমরা তার প্রথম মিথ্যা প্রতিপন্নকারী হয়ো না, আর আমার বাণীর বিনিময়ে সামান্য মূল্য গ্রহণ করো না, আর আমাকেই ভয় কর। (৪২) আর সত্যকে মিথ্যার সাথে মিশ্রিত করো না, আর জেনে শুনে সত্য গোপন করো না। (৪৩) প্রার্থনা কর, উদ্বৃত্ত সম্পদ থেকে আবশ্যিক দান প্রদান কর, এবং অবনতকারীদের সাথে অবনত হও। (৪৪) তোমরা মানুষকে সৎকাজ করতে বল আর নিজের ক্ষেত্রে ভুলে যাও; অথচ তোমরা গ্রন্থ পাঠ কর, তোমরা কি বোঝ না? (৪৫) ধৈর্য ও প্রার্থনার মাধ্যমে সাহায্য প্রার্থনা কর, নিঃসন্দেহে এ খুব কঠিন; কিন্তু ঐ লোকদের জন্য নয়, যারা ভয় করে। (৪৬) যারা মনে করে যে, তাদেরকে নিজ প্রতিপালকের সাথে সাক্ষাৎ করতে হবে এবং তাদেরকে তাঁরই নিকটে ফিরে যেতে হবে।

(৪৭) হে ঈসরায়েলের সন্তান! আমার সেই অনুগ্রহের কথা স্মরণ কর যা আমি তোমাদের উপর করেছি এবং আমিই তোমাদের

বিশ্ববাসীর উপর শ্রেষ্ঠত্ব দান করেছি। (৪৮) এবং ঐ দিনকে ভয় কর যখন কেউ কারো কোন কাজে আসবে না, কারো কোন সুপারিশ (recommendation) গৃহিত হবে না। কারো নিকট থেকে বিনিময়ে কিছু নেওয়া হবে না আর তাদের (অপরাধীদের) কোন সাহায্য করা হবে না। (৪৯) আর (স্মরণ কর) যখন আমি তোমাদেরকে ফ্যারাও এর লোকদের থেকে রক্ষা করেছিলাম, সে তোমাদের নির্যাতন করত। তোমাদের পুত্রদের হত্যা করত আর তোমাদের কন্যাদের জীবিত রাখত, এতে তোমাদের প্রতিপালকের এক বিরাট পরীক্ষা ছিল। (৫০) আর (স্মরণ কর ঐ সময়) যখন আমি সমুদ্রকে বিভক্ত করে তোমাদের পার করিয়েছিলাম। অতঃপর তোমাদের বাঁচিয়ে ফ্যারাও এর লোকদের ডুবিয়ে দিলাম, যা তোমরা দেখছিলেন। (৫১) আর যখন আমি মূসাকে (মোজেসকে) (সিনাই পর্বতে) অঙ্গীকার করলাম চল্লিশ রাতের জন্য, আর তাঁর অনুপস্থিতিতে তোমরা বাছুরকে উপাস্য বানিয়ে নিলে, বস্তুতঃ তোমরা অত্যাচারী ছিলে। (৫২) এরপরেও আমি তোমাদের ক্ষমা করলাম যাতে তোমরা কৃতজ্ঞ হও। (৫৩) আর যখন আমি মূসা (মোজেস) কে গ্রন্থ দিলাম এবং যা (সত্য ও মিথ্যার মধ্যে) ফয়সালাকারী, যাতে তোমরা দিক-নির্দেশনা পাও। (৫৪) আর যখন মূসা (মোজেস) তাঁর জাতিকে বলেছিলেন হে আমার জাতি! তোমরা বাছুরকে উপাস্য বানিয়ে নিজেদের উপর বড় অন্যায্য করেছ। এখন আপন সৃষ্টিকর্তার দিকে মনোযোগ দাও এবং অপরাধীদের নিজ হাতে হত্যা কর। এটা তোমাদের জন্য তোমাদের সৃষ্টিকর্তার নিকটে কল্যাণকর। ঈশ্বর তোমাদের ক্ষমা প্রার্থনা স্বীকার করেছেন, নিঃসন্দেহে তিনি বড়ই ক্ষমাশীল ও অতি দয়ালু। (৫৫) আর যখন তোমরা বলেছিলেঃ হে মূসা (মোজেস)! আমরা তোমাকে বিশ্বাস করবো না যতক্ষণ না আমরা ঈশ্বরকে প্রকাশ্যে দেখতে পাব। তখনই

তোমাদের উপর বজ্রপাত হল আর তোমরা তা দেখছিলে। (৫৬) তারপর তোমাদের মৃত্যুর পর আবার তোমাদের জীবিত করেছিলাম যাতে তোমরা কৃতজ্ঞতা প্রকাশ কর। (৫৭) আর আমি তোমাদের উপর মেঘের ছায়া দিয়েছিলাম এবং তোমাদের জন্য মাল্লা এবং সালওয়া (এক বিশেষ উপকারী খাদ্য) পাঠিয়েছিলাম এবং বলেছিলাম, “আমার দেওয়া উত্তম খাবার আহার কর” তারা আমার কিছুই ক্ষতি করেনি, বরং তারা নিজেদেরই ক্ষতি করেছিল।

(৫৮) আর যখন আমি বলেছিলামঃ এই জনপদে প্রবেশ করে যেখান থেকে চাও আহার কর, আর মাথা নত করে এর প্রবেশ দ্বার দিয়ে প্রবেশ কর আর বলতে থাক হে আমাদের প্রতিপালক! আমাদের পাপ সমূহ মার্জনা করুন। আমি তোমাদের পাপ সমূহ দূর করে দেব আর উত্তম কাজ সম্পন্নকারীদের আরো অধিক দেব। (৫৯) কিন্তু অত্যাচারীরা একথা বদলে দিল যা তাদের বলা হয়েছিল। তাই তাদের অবাধ্যতার কারণে আকাশ থেকে শাস্তি অবতীর্ণ করেছিলাম। (৬০) আর স্মরণ কর ঐ সময় যখন মূসা (মোজেস) তাঁর জাতির জন্য জল চেয়েছিল, তখন আমি বলেছিলামঃ তোমার লাঠি পাথরে আঘাত কর তখন তা হতে প্রবাহিত হল বারটি স্রোত। প্রত্যেক দল তাদের জল পানের জায়গা চিনে নিল। আহার কর ও পান কর ঈশ্বরের দেওয়া জীবিকা হতে এবং পৃথিবীতে গোলযোগ সৃষ্টিকারী হয়ে বিচরণ কোরো না। (৬১) এবং স্মরণ কর, যখন তোমরা বলেছিলে হে মূসা (মোজেস)! আমরা একই প্রকার খাবারে সন্তুষ্ট নই। তোমার প্রতিপালককে আমাদের জন্য বল যে, তিনি আমাদের জন্য ভূমিজাত দ্রব্য, সবজী, শসা, গম, মসুর এবং পেঁয়াজ দান করুন। মূসা (মোজেস) বললঃ তোমরা কি এক উত্তম জিনিষের পরিবর্তে সাধারণ জিনিষ চাও তাহলে কোন এক শহরাঞ্চলে চলে যাও তোমরা যা চাইছ সেখানে পেয়ে যাবে, তাদের উপর লাঞ্ছনা ও

দারিদ্র নিপতিত হল আর তারা ঈশ্বরের ক্রোধভাজন হয়ে গেল। তাদের এই পরিণতির কারণ তারা ঈশ্বরের নিদর্শন সমূহ মিথ্যা মনে করত ও দূতকে অকারণে হত্যা করত। তাদের এই পরিণতির কারণ তারা অবজ্ঞা করেছিল এবং তারা সীমালঙ্ঘন করেছিল।

(৬২) নিঃসন্দেহে যারা মুসলমান হয়েছে, যারা ইহুদী হয়েছে এবং খৃষ্টান ও সাবেয়ী (নক্ষত্র পূজারী) এদের মধ্যে যে ব্যক্তি ঈশ্বরকে বিশ্বাস করে এবং পরকাল বিশ্বাস করে আর সৎকাজ করে তাদের জন্য তাদের প্রতিপালকের নিকট ভাল প্রতিফল আছে, আর তাদের জন্য না আছে কোন ভয়, আর না কোন দুঃখ।

(৬৩) যখন আমি তোমাদের কাছে প্রতিশ্রুতি নিয়েছিলাম এবং তুর পাহাড় তোমাদের উপর তুলে ধরেছিলাম এই বলে যে, তোমাদের যা দিয়েছি তা দৃঢ় রূপে ধারণ কর আর যাতে তোমরা (অনিষ্ট হতে) সুরক্ষিত থাকো। (৬৪) তার পরেও তোমরা ফিরে গেলে। যদি ঈশ্বরের দয়া ও অনুগ্রহ তোমাদের প্রতি না থাকত তাহলে অবশ্যই তোমরা ক্ষতিগ্রস্ত হতে। (৬৫) আর তাদের অবস্থা তোমরা তো জানো যারা শনিবার সম্পর্কে ঈশ্বরের আদেশ লঙ্ঘন করেছিল তখন আমি তাদের বলেছিলামঃ তোমরা অপমানিত বানর হয়ে যাও। (৬৬) অতঃপর আমি এটাকে শিক্ষাপ্রদ করে দিলাম ঐ লোকদের জন্য যারা সেখানে ছিল এবং পরবর্তী বংশধরদের জন্য আর আমি এতে শিক্ষা রেখেছি যারা ভয় করে তাদের জন্য।

(৬৭) যখন মুসা (মোজেস) তাঁর জাতিকে বললঃ ঈশ্বর তোমাদের আদেশ দিচ্ছেন একটি গাভী উৎসর্গ কর। তারা বললঃ তুমি কি আমাদের সাথে ঠাট্টা করছো। মুসা (মোজেস) বললঃ আমি ঈশ্বরের নিকট আশ্রয় চাই মুখদের অন্তর্ভুক্ত হওয়া থেকে। (৬৮) তারা বললঃ তোমার প্রতিপালকের

নিকট জিজ্ঞাসা করো যেন তিনি আমাদের বলে দেন যে, ঐ গাভী কেমন হবে। মুসা (মোজেস) বললঃ ঈশ্বর বলছেন ঐ গাভী না অতি বয়স্কা আর না বাচ্চা, এর মধ্যবর্তী হবে। সুতরাং যা আদিষ্ট হয়েছে, তা পালন কর। (৬৯) আবার তারা বললঃ আপন প্রতিপালকের নিকটে নিবেদন কর তিনি বলে দিন তার রং কেমন হবে। মুসা (মোজেস) বললঃ ঈশ্বর বলছেন সেটি গাঢ় হলুদ বর্ণের হবে, সেটি দেখতে খুবই সুন্দর হবে। (৭০) আবার তারা বলতে থাকলঃ তোমার প্রভুকে জিজ্ঞাসা কর তিনি আমাদের বলে দিন সেটি কেমন হবে? কেন না গাভীতে আমাদের সন্দেহ হচ্ছে আর ঈশ্বর চাইলে অবশ্যই আমরা সঠিক দিক-নির্দেশনা পাব। (৭১) মুসা (মোজেস) বললঃ ঈশ্বর বলছেন সেটা এমন একটা গাভী হবে যাকে ভূমিচাষ বা ক্ষেতে জলসেচের কাজে ব্যবহার করা হয় নি, সম্পূর্ণ নিখুঁত গাভী। বললঃ এবার তুমি ঠিক বলেছ। অতঃপর, তারা ওকে উৎসর্গ করল। যদিও কাজটি তারা করতে পারবে বলে মনে হচ্ছিল না। (৭২) আর যখন তোমরা এক ব্যক্তিকে মেরে ফেললে এবং তোমরা একে অপরের প্রতি দোষারোপ করছিলে, আর ঈশ্বর সেটাকে প্রকাশ করে দিতে চাইছিলেন যা তোমরা গোপন করছিলে। (৭৩) তখন আমি আদেশ দিয়েছিলাম যে, ওই মৃতকে বধকৃত গাভীর একটি টুকরো দিয়ে আঘাত কর; এভাবেই ঈশ্বর মৃতকে জীবিত করেন। আর তিনি তোমাদের নিজের নিদর্শন দেখান যাতে তোমরা বুঝতে পার।

(৭৪) এরপর তোমাদের মন আবার কঠিন হয়ে গেল। তা যেন পাথর বা তার চেয়েও কঠিন। পাথরের মধ্যে কিছু এমন পাথরও হয় যা থেকে বর্ণাধারা প্রবাহিত হয়, কিছু পাথর ফেটে তা থেকে জল বের হয় আবার এমন পাথরও আছে যা ঈশ্বরের ভয়ে নিচে ধসে পড়ে আর ঈশ্বর অনবহিত নন যা তোমরা কর।

(৭৫) তোমরা কি আশা কর যে, তারা তোমাদের কথায় বিশ্বাস স্থাপন করবে? অথচ ওদের মধ্যে এমন কিছু লোক গত হয়েছে যারা ঈশ্বরের বাণী শুনত আবার তা জেনে শুনে বিকৃত করত। (৭৬) যখন তারা বিশ্বাসীদের সঙ্গে সাক্ষাৎ করে তখন বলে আমরা বিশ্বাস করি। আর যখন নিজেরা পরস্পর একান্তে মিলিত হয় তখন বলে ঈশ্বর তোমাদের নিকটে যা প্রকাশ করেছেন তা তোমরা ওদের কাছে বল না কি? তাহলে তো তারা এটা দিয়ে তোমাদের প্রতিপালকের কাছে তোমাদের বিরুদ্ধে তর্ক-বিতর্ক করবে। তোমরা কি বুঝতে পার না? (৭৭) তারা কি জানে না যে, ঈশ্বর সবই জানেন যা তারা গোপন করে আর যা প্রকাশ করে?

(৭৮) আর তাদের মধ্যে কিছু নিরক্ষর লোক আছে যাদের গ্রন্থ সম্পর্কে কোন জ্ঞান নেই। তারা কেবলমাত্র মিথ্যা কল্পনা ও অলীক ধারণা পোষন করে। (৭৯) অতঃপর তাদের জন্য আফসোস! যারা নিজের হাতে গ্রন্থ লেখে আর বলে এটা ঈশ্বরের নিকট থেকে এসেছে, যাতে এর মাধ্যমে কিছু অর্থ সংগ্রহ করতে পারে। অতঃপর তাদের উপর দুর্ভোগ আছে যা তাদের হাত লিখেছে এবং এর মাধ্যমে যারা উপার্জন করেছে, তাদের জন্য ও দুর্ভোগ আছে! (৮০) আর তারা বলে নরকের আগুন আমাদের স্পর্শ করবে না হাতে গোনা কয়েকদিন ছাড়া। বলঃ তোমরা কি ঈশ্বরের নিকট হতে কোন অঙ্গীকার পেয়েছ যে, ঈশ্বর তাঁর অঙ্গীকারের বিরোধ করবেন না। অথবা ঈশ্বর সম্পর্কে এমন কথা বলো যার জ্ঞান তোমাদের নেই। (৮১) বস্তুত যারা কোন পাপ করে এবং নিজেদের পাপের দ্বারা যারা পরিবেষ্টিত হয়ে থাকে, তারাই নরকবাসী, তারা সেখানে চিরকাল থাকবে। (৮২) আর যারা বিশ্বাস স্থাপন করেছে এবং সৎকর্ম করেছে তারাই স্বর্গবাসী, তারা সেখানে চিরকাল থাকবে।

(৮৩) আর যখন আমি ইস্রায়িল এর সন্তানদের নিকট হতে অঙ্গীকার নিয়েছিলাম যে, তোমরা ঈশ্বর ছাড়া কাউকে উপাসনা করবে না এবং তোমরা মাতা পিতার সঙ্গে ভাল ব্যবহার করবে, আত্মীয়স্বজনের সাথে, অনাথ ও গরীবদের সাথে, আর মানুষের সাথে সদালাপ করবে এবং প্রার্থনা করবে, উদ্বৃত্ত সম্পদ থেকে আবশ্যিক দান প্রদান করবে; কিন্তু অল্পসংখ্যক লোক ছাড়া তোমরা সকলে বিমুখ হলে, যেহেতু তোমরা অগ্রাহ্যকারী ছিলে।

(৮৪) আর যখন আমি তোমাদের নিকট হতে অঙ্গীকার নিলাম যে, তোমরা নিজেদের মধ্যে রক্তপাত করবে না এবং নিজেদের লোকজনকে ঘরছাড়া করবে না। তখন তোমরা স্বীকার করেছিলে আর তোমরাই তো তার সাক্ষী। (৮৫) তারপর এই তোমরাই নিজেদের লোকদের হত্যা করছো এর নিজেদেরই একটি দলকে তাদের শহর থেকে বের করে দিচ্ছো। তাদের বিরুদ্ধে তাদের শত্রুদের সাহায্য করছো পাপ ও অন্যায়ের সাথে। আর যদি তারা তোমাদের নিকটে বন্দী হয়ে আসে তাহলে তোমরা মুক্তিপণ (অর্থদণ্ড) নিয়ে তাদেরকে ছেড়ে দিচ্ছো; অথচ তাদের বের করে দেওয়াটাই তোমাদের জন্য নিষিদ্ধ ছিল। তোমরা কি ঈশ্বরের গ্রন্থ কিছু অংশ মানো আর কিছু অংশ অমান্য কর? অতএব তোমাদের মধ্যে যারা এরূপ করে, তাদের পার্থিব জীবনে লাঞ্ছনা আর শেষ বিচারের (পুনরুত্থান দিবসের) দিনে কঠোর শাস্তিতে নিষ্ক্ষেপ করা হবে। তোমরা যা কিছু করছ ঈশ্বর সবই জানেন। (৮৬) এরাই সেই লোক যারা পরলোকের বদলে পার্থিব জীবন ক্রয় করেছে; অতএব তাদের দণ্ড লঘু হবে না ও তারা সাহায্য প্রাপ্তও হবে না।

(৮৭) আমি মূসাকে (মোজেসকে) গ্রন্থ দিয়েছি এবং তারপরে একে একে পয়গম্বর পাঠিয়েছি। মারইয়ামের (মেরীর) পুত্র ঈসাকে (যিশুকে) স্পষ্ট নিদর্শন দিয়েছি এবং পবিত্র আত্মার (জিবরাঈলের) মাধ্যমে তাকে

সহায়তা করেছি। তবে কি যখনই কোন পয়গম্বর তোমাদের কাছে তোমাদের অনভিপ্রেত বিষয় নিয়ে এসেছে তখন তোমরা উদ্ধত হয়ে গেছো; অতঃপর তোমরা একদলকে অবিশ্বাস করেছ আর একদলকে হত্যা করে দিয়েছ। (৮৮) এবং তারা বলে আমাদের হৃদয় অভেদ্যরূপে আচ্ছাদিত; বরং অস্বীকার করার জন্য ঈশ্বর তাদেরকে প্রত্যাখ্যান করেছেন। এই কারণে তারা খুবই কম বিশ্বাস করে। (৮৯) আর যখন ওদের নিকটে ঈশ্বরের তরফ হতে একটি গ্রন্থ এল যা তাদের নিকট বিদ্যমান গ্রন্থের (অন্তিম পয়গম্বরের পূর্বাভাস বিষয়ক) সত্যতা স্বীকারকারী, আর এর পূর্বে তারা স্বয়ং অমান্যকারীদের বিরুদ্ধে বিজয় প্রার্থনা করত। আর যখন ওদের নিকট সেই জিনিষ এল যা তারা চিনতে পেরেছিল তখন তারা তাকে অবিশ্বাস করল। অতএব ঈশ্বরের অভিসম্পাত সত্য অস্বীকারকারীদের জন্য। (৯০) কতই নিকৃষ্ট ওটা যার বিনিময়ে তারা নিজের প্রাণের সওদা করেছে, তারা অস্বীকার করেছে ঈশ্বরের অবতীর্ণ বাণীকে এই ঈর্ষার কারণে, যে ঈশ্বর তাঁর বান্দাদের মধ্য হতে যাকে ইচ্ছা অনুগ্রহ করেন। অতএব তারা ক্রোধের উপর ক্রোধের পাত্র হয়েছে আর অস্বীকারকারীদের উপর রয়েছে লাঞ্ছনাদায়ক শাস্তি।

(৯১) আর যখন তাদের বলা হয় ঐ বাণী বিশ্বাস কর যা ঈশ্বর অবতীর্ণ করেছেন তখন তারা বলে আমরা ওটাই বিশ্বাস করি যা আমাদের উপর অবতীর্ণ হয়েছে। আর তারা ওটাকে অবিশ্বাস করে যা পরে অবতীর্ণ হয়েছে। যদিও তা সত্য এবং তাদের কাছে যা আছে তারও সমর্থক। বলঃ যদি তোমরা বিশ্বাসী হয়ে থাক তাহলে ইতিপূর্বে যে দূতগণ এসেছিল তাদের কেন হত্যা করেছিলে? (৯২) আর মূসা (মোজেস) তোমাদের নিকট স্পষ্ট নিদর্শন নিয়ে এসেছিল; কিন্তু তোমরা তার অনুপস্থিতিতে বাছুরকে উপাস্য বানিয়ে নিয়েছিলে, আর তোমরা অত্যাচারী হয়ে গেলে।

(৯৩) আর যখন আমি তোমাদের নিকট হতে অঙ্গীকার নিয়েছিলাম আর তুর পাহাড়কে তোমাদের উর্দ্ধেতুলে ধরেছিলাম এইবলে যে, ‘তোমাদেরকে যা দিয়েছি তা দৃঢ়ভাবে ধারণ কর এবং শ্রবন কর।’ তারা বলেছিলঃ আমরা শুনলাম ও অমান্য করলাম। আর তাদের অঙ্গীকার এর কারণে বাছুরের প্রতি ভালোবাসা তাদের অন্তরে বদ্ধমূল হয়েছিল। বলঃ যদি তোমরা বিশ্বাসী হয়ে থাকো তাহলে কত খারাপ ঐ জিনিষ, যা তোমার বিশ্বাস তোমাকে শেখায়। (৯৪) বলঃ যদি ঈশ্বরের নিকটে পরলোকের নিবাস সকলকে বাদ দিয়ে কেবলমাত্র তোমাদের জন্যই হয়, তাহলে তোমরা মৃত্যু কামনা কর, যদি তোমরা সত্যবাদী হও। (৯৫) কিন্তু তারা কখনই মৃত্যু কামনা করবে না, তাদের হাত যা পাঠিয়েছে তার কারণে। ঈশ্বর এই অত্যাচারীদের কথা ভাল করেই জানেন। (৯৬) আর অবশ্যই তুমি তাদেরকে জীবিত থাকার প্রতি যে কোন মানুষের চেয়ে অধিক আগ্রহী দেখতে পাবে, এমনকি অংশীবাদীদের চেয়েও। তাদের মধ্যে প্রত্যেকে চায় যে সে হাজার বছর আয়ু পায়, যদিও এতদিন বেঁচে থেকেও তারা শাস্তি হতে বাঁচতে পারবে না আর ঈশ্বর দেখছেন তারা যা করছে।

(৯৭) তুমি বলঃ যে জিবরাঈল (ঈশ্বরের বাণী পয়গম্বরের নিকট যে দূত নিয়ে এসেছেন) এর বিরোধী, তিনিই এই বাণী (কুরআন) ঈশ্বরের নির্দেশে তোমার হৃদয়ে অবতীর্ণ করেছেন যা পূর্ববর্তী গ্রন্থের (পূর্বে প্রকাশিত অন্তিম পয়গম্বরের সংক্রান্ত পূর্বাভাস) সত্যতা স্বীকার করে এবং তা বিশ্বাসীদের জন্য পথ নির্দেশ ও সুসংবাদ স্বরূপ। (৯৮) যারা ঈশ্বরের, তাঁর দেবদূতগণ, পয়গম্বরগণ, জিবরাঈল ও মিকাইলের শত্রু, নিশ্চিতভাবে ঈশ্বর ঐ সব সত্য প্রত্যাখ্যানকারীদের শত্রু। (৯৯) আর আমি তোমার উপরে স্পষ্ট নিদর্শন সমূহ অবতীর্ণ করেছি, আবাত্যরা ব্যতীত কেউই তা অঙ্গীকার করতে পারবে না।

(১০০) তাহলে কি যখনই তারা কোন প্রতিজ্ঞা করেছে তখনই তাদের কোন না কোন দল তা ভঙ্গ করেছে? আসলে তাদের অধিকাংশেরই প্রকৃত বিশ্বাস নেই। (১০১) আর যখন ওদের নিকটে ঈশ্বরের পক্ষ হতে একজন বার্তাবাহক এসেছেন যিনি তাদের কাছে বিদ্যমান গ্রন্থের সত্যতা স্বীকার করেন, তখন ঐ লোকেরা যাদের গ্রন্থ দেওয়া হয়েছিল ঈশ্বরের গ্রন্থকে এমনভাবে পিছনে ফেলে দিয়েছে যেন তারা কি ছুই জানে না।

(১০২) সুলাইমানের (সলোমান) রাজত্বের নামে শয়তানেরা অসাধুভাবে যা করতো তারা তা মানতে লাগলো। সুলাইমান (সলোমান) সত্য অস্বীকারকারী ছিল না; বরং শয়তানরাই ছিল অস্বীকারকারী। ব্যাবিলনের দুই দেবদূত হারুত ও মারুত এর উপর অবতীর্ণ জাদুবিদ্যা তারা মানুষকে শেখাত। কিন্তু এই দুজন একথা না বলে শিক্ষা দিত না যে, “আমরা তো কেবল এক পরীক্ষার জন্য, অতএব, তুমি অস্বীকারকারী হয়ো না।” তারা তাদের নিকট ঐ বিষয়টি শিখতো যার দ্বারা তারা স্বামী-স্ত্রীর মধ্যে বিচ্ছেদ ঘটাতে পারে। যদিও ঈশ্বরের নির্দেশ ছাড়া এর দ্বারা তারা কারো কোন ক্ষতি করতে পারত না। এই মানুষগুলো যা শিখতো তার দ্বারা তাদেরই ক্ষতি হতো, কোন লাভ হতো না। আর তারা ভালোভাবেই জানতো যে, যারা এই জ্ঞান অর্জন করে, পরলোকে তাদের কোন অংশ নেই। যার বিনিময়ে তারা নিজেদেরকে বিক্রয় করেছে, তা কতই না নিকৃষ্ট! যদি তারা এটা বুঝত! (১০৩) আর যদি তারা বিশ্বাসী হয়ে যেত এবং ঈশ্বরকে ভয় করত তাহলে ঈশ্বরের তরফ হতে উত্তম প্রতিফল পেত। যদি তারা এটা বুঝত!

(১০৪) হে বিশ্বাসীগণ! তোমরা পয়গম্বরকে বলো না ‘রাইনা’ (আমাদের মেসপালক), বরং বলো ‘উনযুরনা’ (আমাদের প্রতি খেয়াল কর) এবং শুনে নাও; অবজ্ঞাকারীদের জন্য রয়েছে পীড়াদায়ক শাস্তি।’ (১০৫) যারা অবজ্ঞা করেছে, তারা গ্রন্থধারীই হোক বা বহুদেববাদী, তারা চায় না যে, তোমাদের উপর তোমাদের প্রতিপালকের তরফ হতে কোন কল্যাণ আসুক। ঈশ্বর যাকে ইচ্ছা নিজ অনুগ্রহের পাত্র হিসাবে বেছে নেন, ঈশ্বর পরম দয়াবান। (১০৬) আমি যে বাণী রহিত কিংবা বিস্মৃত করি তার চেয়ে উত্তম অথবা তার সমান বাণী আনয়ন করি। তোমার কি জানা নেই যে, ঈশ্বর সবকিছু করতে সক্ষম? (১০৭) তুমি কি জান না যে, আকাশ ও পৃথিবীর সাম্রাজ্য কেবল ঈশ্বরের জন্য, আর ঈশ্বর ছাড়া তোমাদের অতিরিক্ত কোন বন্ধু বা সাহায্যকারী নেই? (১০৮) তোমরা কি চাও যে, তোমরা তোমাদের বার্তাবাহককে প্রশ্ন কর যেমন ইতিপূর্বে মূসাকে (মোজেসকে) প্রশ্ন করা হয়েছিল। আর যে ব্যক্তি ঈমানকে অবজ্ঞা দ্বারা বদলে দিয়েছে সে নিশ্চিতরূপে সঠিক পথ হারিয়ে ফেলেছে। (১০৯) অনেক গ্রন্থধারী ঈর্শা বশতঃ চায় তোমাদের বিশ্বাসী হয়ে যাওয়ার পর যেকোন প্রকারে তোমাদেরকে আবার মুনকির (অবজ্ঞাকারী) করে দেয়, যদিও সত্য তাদের সামনে প্রকট হয়েছে। অতএব, তোমরা ক্ষমা করে যাও আর উপেক্ষা করতে থাক যতক্ষণ না ঈশ্বরের নির্ণয় আসে। নিঃসন্দেহে ঈশ্বর সবকিছু করতে সক্ষম।

১ বিঃদ্রঃ (২ঃ ১০৪) নবী(সঃ) এর সাহচর্যে এমন কিছু লোক থাকতো, যারা ভাষার চাতুরী প্রয়োগ করে বাণীসমূহকে বিদ্রূপ করতো। যেমন, দ্ব্যর্থহীন আরবী শব্দ ‘উনযুরনা’ (অর্থাৎ আমাদের প্রতি খেয়াল কর) পরিবর্তে তারা দ্ব্যর্থবোধক শব্দ ‘রাইনা’ অর্থাৎ আমাদের মেসপালক বলত।

(১১০) আর প্রার্থনা কর, উদ্বৃত্ত সম্পদ থেকে আবশ্যিক দান প্রদান কর, আর যে ভাল কর্ম তোমরা পূর্বে পাঠাবে সেটা তুমি ঈশ্বরের নিকটে পাবে, যা কিছু তোমরা কর, ঈশ্বর নিশ্চিতরূপে তা দেখছেন। (১১১) আর তারা বলে স্বর্গে (জান্নাতে) কেবল তারাই প্রবেশ করতে পারবে যারা ইহুদী অথবা খৃষ্টান। এটা তাদের মনের ইচ্ছা। বলঃ তোমাদের প্রমাণ নিয়ে আসো যদি তোমরা সত্যবাদী হও। (১১২) বরং যে নিজেকে স্বয়ং ঈশ্বরের কাছে সমর্পণ করে এবং সৎকর্মশীল, এমন ব্যক্তির জন্য তার প্রতিপালকের নিকট প্রতিফল আছে। তাদের কোন ভয় নেই, কোন দুঃখ ও নেই।

(১১৩) আর ইহুদীরা বলে, “খৃষ্টানদের কোন ভিত্তি নেই।” আর খৃষ্টানরা বলে, “ইহুদীদের কোন ভিত্তি নেই।” অথচ তারা সবাই ঐশীগ্রস্থ পাঠ করে, এবং যাদের জ্ঞান নেই তারাই কেবল এমন কথা বলে। অতএব, ঈশ্বর বিচার দিনে তারা যা নিয়ে মতভেদ করত সে বিষয়ের মীমাংসা করবেন। (১১৪) তার চেয়ে বড় অত্যাচারী আর কে হবে যে ঈশ্বরের মসজিদে তাঁর নাম স্মরণ করতে বাধা দেয় এবং তা ধ্বংসের চেষ্টা করে? তাদের অবস্থাতো এমন হওয়া উচিত ছিল যে, তারা মসজিদে ঈশ্বরের ভয়ে ভীত হয়ে প্রবেশ করত। তাদের জন্য পৃথিবীতে লাঞ্ছনা আর পরলোকেও বড় ধরনের শাস্তি নির্ধারিত। (১১৫) আর পূর্ব ও পশ্চিম ঈশ্বরেরই তুমি যে দিকেই মুখ ফেরাও ঈশ্বর রয়েছেন। নিশ্চিতরূপে ঈশ্বর সর্বব্যাপী, মহাজ্ঞানী। (১১৬) তারা বলে ঈশ্বর একজন সন্তান গ্রহণ করেছেন! ঈশ্বর এ হতে পবিত্র; বরং আকাশ ও পৃথিবীতে যা কিছু আছে সবই তাঁর, সবাই তাঁর অনুগত। (১১৭) তিনি আকাশ ও পৃথিবী তৈরী করেছেন। তিনি যখন কোন কাজ করার সিদ্ধান্ত নেন তিনি বলে দেন ‘হয়ে যাও’ তখনই তা হয়ে যায়।

(১১৮) যারা অজ্ঞ তারা বলেঃ ঈশ্বর আমাদের সাথে কথা বলেন না কেন? অথবা আমাদের কাছে কোন নিদর্শন আসে না কেন? এভাবে এদের

পূর্ববর্তীরাও এদের মতই বলেছিল, তাদের অন্তর একই রকমের। আমি দৃঢ় বিশ্বাসী লোকদের জন্য নিদর্শন সমূহ স্পষ্ট করে দিয়েছি। (১১৯) আমি তোমাকে সত্যসহ, সুসংবাদ দাতা এবং ভয় প্রদর্শনকারী রূপে পাঠিয়েছি। আর তোমাকে নরকবাসীদের জন্য কোন প্রশ্ন করা হবে না। (১২০) ইহুদী আর খৃষ্টানগণ কখনই তোমার প্রতি সন্তুষ্ট হবে না, যতক্ষণ না তুমি তাদের ধর্মের অনুসারী না হও। তুমি বলঃ যে পথ ঈশ্বর দেখান সেটাই সঠিক পথ। আর যে জ্ঞান তোমার উপর অবতীর্ণ হয়েছে তা অর্জনের পর যদি তুমি তাদের ইচ্ছার অনুসরণ কর তাহলে ঈশ্বরের মোকাবিলায় না তোমার কোন বন্ধু থাকবে, না কোন সাহায্যকারী। (১২১) যাদের আমি গ্রন্থ দিয়েছি যারা তা যথার্থ ভাবে পাঠ করে, তারা তা বিশ্বাস করে, আর যারা তা অবিশ্বাস করে তারাই ক্ষতিগ্রস্ত।

(১২২) হে ইসরাইলের সন্তান! আমার সেই অনুগ্রহ স্মরণ কর যা আমি তোমাদের উপর করেছি এবং নিশ্চয় আমি তোমাদেরকে জগৎবাসীদের মধ্যে শ্রেষ্ঠত্ব দান করেছি। (১২৩) আর সেই দিনকে ভয় কর যে দিন কেউ কারো কোন কাজে আসবে না, আর না কারো থেকে কোন অর্থদণ্ড নেওয়া হবে, কারো সুপারিশ কারো কোন উপকার করতে পারবে না, কারো কোন সাহায্য ও পাওয়া যাবে না। (১২৪) আর যখন ইবরাহীমকে (আব্রাহাম) তার প্রতিপালক কয়েকটি কথা দ্বারা পরীক্ষা করেছিলেন তখন সে তা পূরণ করেছিল। ঈশ্বর বললেনঃ আমি তোমাকে মানবমণ্ডলীর জন্য পথ প্রদর্শক করবো। ইবরাহীম (আব্রাহাম) বললঃ আমার সন্তানদের মধ্য থেকেও? তখন ঈশ্বর বললেন আমার অঙ্গীকার অত্যাচারীদের ক্ষেত্রে প্রযোজ্য হবে না।

(১২৫) আর যখন আমি কাবাকে মানুষের একত্রিত হওয়ার স্থান এবং শান্তির স্থান ঘোষণা করলাম আর আদেশ দিলাম যে, মকামে-ইবরাহীম (আব্রাহামের

দাঁড়াবার স্থান) কে নামায পড়ার জায়গা বানিয়ে নাও। আর আমি ইবরাহীম (আব্রাহাম) ও ইসমাইলকে আদেশ দিলাম যে, আমার ঘরকে পরিষ্কারকারী, এতেকাফকারী (বসে বসে স্তুতি) আর রুকু ও সিজদাকারীদের (আনতি ও প্রণতি জ্ঞাপনকারীদের) জন্য পবিত্র রাখবে। (১২৬) আর যখন ইবরাহীম (আব্রাহাম) বলেছিলঃ হে আমার প্রতিপালক! এই নগরকে শান্তির নগর বানিয়ে দিন আর এর বাসিন্দাদের মধ্যে যারা ঈশ্বর ও পরলোকে বিশ্বাসী তাদের ফল দ্বারা জীবিকা প্রদান করুন। ঈশ্বর বললেনঃ যারা অবজ্ঞা করবে আমি তাদেরকে কিছু দিনের জন্য উপভোগ করতে দেব; অতঃপর তাদেরকে আগুনের শাস্তির মধ্যে নিক্ষেপ করবো আর সেটা অত্যন্ত নিকৃষ্ট গন্তব্যস্থল।

(১২৭) আর যখন ইবরাহীম (আব্রাহাম) ও ইসমাইল কা'বার দেওয়াল গেঁথে তুলছিল আর বলছিলঃ হে আমাদের প্রতিপালক! আমাদের একাজ গ্রহণ করুন, আপনি সবই শোনে সবই জানেন। (১২৮) হে আমাদের প্রভু! আমাদের উভয়কে আপনার অনুগত করুন, আর আমাদের বংশ থেকে আপনার অনুগত একটি জাতি তৈরী করুন, আর আমাদের উপাসনা পদ্ধতি বলে দিন আর আমাদের ক্ষমা করুন, আপনিই ক্ষমাশীল ও অতি দয়ালু। (১২৯) হে আমাদের প্রভু! সে দলে এদের মধ্য হতে একজন বার্তাবাহক পাঠান যে ওদেরকে আপনার বাণী শোনাবে আর ওদেরকে গ্রন্থ ও বিবেকের শিক্ষা দিন আর ওদের তাজকীয়া (শুদ্ধিকরণ ও আধ্যাত্মিক বিকাশ) করুন। নিঃসন্দেহে আপনিই তো পরাক্রমশালী, প্রজ্ঞাময়।

(১৩০) নির্দোষ ছাড়া কে, ইবরাহীমের (আব্রাহামের) ধর্মকে পছন্দ করে না? আমিই তাকে পৃথিবীতে মনোনীত করেছিলাম, আর পরলোকেও সে সৎকর্মশীলগণের অন্তর্ভুক্ত হবে। (১৩১) যখন তার প্রভু তাকে বললেন, 'আত্মসমর্পণ করো।' তখন সে বলল, 'আমি স্বয়ং নিজেকে জগৎ স্বামীর নিকট সমর্পণ করলাম।'

(১৩২) আর এই পস্থা অনুসরণের জন্য ইবরাহীম (আব্রাহাম) তার সন্তানদের উপদেশ দিয়েছিল, আর এই উপদেশ দিয়েছিল ইয়াকুব তার সন্তানদের। হে আমার পুত্রগণ! ঈশ্বর তোমাদের জন্য এই দ্বীন (ধর্ম) মনোনীত করেছেন; অতএব, তাঁর অনুগত না হওয়া পর্যন্ত তোমরা মৃত্যু বরণ করো না। (১৩৩) তুমি কি ইয়াকুবের মৃত্যুর সময় উপস্থিত ছিলে? যখন সে তার পুত্রদের বলেছিল আমার পরে তোমরা কার উপাসনা করবে? তারা বলেছিলঃ আমরা ঐ ঈশ্বরের উপাসনা করবো যাঁর উপাসনা তুমি আর তোমার পূর্বপুরুষ ইবরাহীম (আব্রাহাম), ইসমাইল, ইসহাক করে এসেছে। তিনিই একমাত্র উপাস্য আমরা তাঁরই অনুসরণকারী। (১৩৪) এরা ছিল এক জাতি যারা অতিক্রান্ত হয়েছে। তারা যা উপার্জন করেছে তা তাদের আর তোমরা যা উপার্জন করছো তা তোমাদের। তারা যা করত সে সম্পর্কে তোমাদের জিজ্ঞাসা করা হবে না।

(১৩৫) তারা বলে ইহুদী অথবা খৃষ্টান হয়ে যাও তাহলে সঠিক পথ পাবে। বলঃ না বরং আমরাতো অনুসরণ করি ইবরাহীমের (আব্রাহামের) ধর্ম, যে ঈশ্বরের প্রতি একাগ্রচিন্ত ছিল আর সে বহুদেববাদী ছিল না। (১৩৬) বলঃ আমরা বিশ্বাস করি ঈশ্বরকে এবং যা আমাদের প্রতি অবতীর্ণ হয়েছে এবং যা ইবরাহিম, ইসমাইল, ইসহাক, ইয়াকুব ও তার সন্তানদের প্রতি অবতীর্ণ হয়েছিল আর যা প্রদান করা হয়েছিল মূসা (মোজেস) ও ইসাকে (যিশুকে) আর যা প্রদত্ত হয়েছিল বার্তাবাহকদের তাদের প্রতিপালকের তরফ হতে। আমরা তাদের মধ্যে কারো সাথে কারো প্রভেদ করি না। আর আমরা ঈশ্বরেরই অনুগত (মুসলিম)। (১৩৭) তোমরা যা যা বিশ্বাস করেছ তারা যদি তদ্রূপ বিশ্বাস করে, তাহলে নিঃসন্দেহে তারা সঠিক পথ পেয়ে গেছে। আর যদি তারা বিমুখ হয় তাহলে তারা বিরোধের মধ্যেই থাকল। অতএব তোমাদের তরফ হতে ঈশ্বরই তাদের জন্য যথেষ্ট তিনি সব কিছুই শোনেন, সব কিছুই জানেন।

(১৩৮) আমরা আপন করে নিয়েছি ঈশ্বরের রং। আর ঈশ্বরের রং হতে আর কার রং উত্তম? আর আমরা তাঁরই উপাসনাকারী। (১৩৯) বলঃ তোমরা কি ঈশ্বর সম্পর্কে আমাদের সাথে ঝগড়া করতে চাও? অথচ তিনি আমাদের ও প্রভু আর তোমাদের ও প্রভু। আমাদের জন্য আমাদের কর্ম আর তোমাদের জন্য তোমাদের কর্ম, আর আমরা তাঁরই জন্য নিবেদিত। (১৪০) তোমরা কি বলতে চাও যে, ইবরাহীম (আব্রাহাম), ইসমাঈল, ইসহাক, ইয়াকুব আর তার সন্তানেরা সবাই ইহুদী অথবা খৃষ্টান ছিল? বলো, তোমরা বেশী জানো না ঈশ্বর? আর ওর চেয়ে অধিক অত্যাচারী আর কে হবে যে সেই সাক্ষ্য গোপন করে যা ঈশ্বরের নিকট থেকে এসেছে? আর যা কিছু তোমরা করছো সে সম্পর্কে ঈশ্বর অনবহিত নন। (১৪১) এরা ছিল এক জাতি যারা গত হয়েছে। তারা যা করেছে তা তাদের জন্য এবং তোমরা যা করছ তা তোমাদের জন্য। তাদের সম্পর্কে তোমাদের জিজ্ঞাসা করা হবে না।

(১৪২) নির্বোধ লোকেরা অচিরেই বলবেঃ বিশ্বাসীদের কি কারণে তারা যে দিকে মুখ করে প্রার্থনা করত তার থেকে অন্য দিকে মুখ ফেরালো? বলঃ পূর্ব আর পশ্চিম ঈশ্বরের। তিনি যাকে ইচ্ছা সরল পথ দেখান। (১৪৩) এভাবেই আমি তোমাদের মধ্যপন্থী সম্প্রদায় বানিয়েছি, যাতে তোমরা মানবমণ্ডলীর জন্য সাক্ষ্যদাতা হও এবং পয়গম্বর তোমাদের জন্য সাক্ষ্যদাতা হন। পূর্বে তোমরা যে দিকে মুখ করে প্রার্থনা করত, তা পরিবর্তন করেছি এই জন্য যে এর দ্বারা আমি পরিস্কার ভাবে বুঝতে পারবো কারা পয়গম্বরের অনুসারী আর কারা উল্টো দিকে ফিরে যায়। ঈশ্বর যাদেরকে পথ প্রদর্শন করেছেন তারা ছাড়া অন্যদের জন্য এটা অবশ্যই খুবই কঠিন বিষয়। ঈশ্বর এরূপ নন যে তিনি তোমাদের বিশ্বাস নষ্ট করেন। নিঃসন্দেহে ঈশ্বর মানুষের প্রতি অত্যন্ত স্নেহপ্রায়ণ ও পরম দয়ালু।

(১৪৪) আমি তোমাকে বার বার আকাশের দিকে তাকাতে দেখছি। অতএব আমি তোমাকে ঐ কিবলার (কেন্দ্রের) দিকে ফিরিয়ে দেব যেটা তুমি পছন্দ করো, এখন আপন মুখ মসজিদে হারাম (কাবা) এর দিকে ফিরিয়ে নাও। আর তোমরা যেখানেই থাকো আপন মুখ ওদিকেই কর। আর যাদের গ্রন্থ দেওয়া হয়েছে তারা ভালভাবেই জানে যে, এটা তাদের প্রভুর তরফ হতে সঠিক বিধান। তারা যা করছে ঈশ্বর সে সম্পর্কে অনবহিত নন। (১৪৫) আর যদি তুমি ঐ গ্রন্থধারীদের নিকট সমস্ত প্রমাণ উপস্থিত করো তবুও তারা তোমার প্রার্থনা করার অভিমুখ মানবে না, তোমরাও তাদের প্রার্থনা করার অভিমুখ মানবে না। এবং তাদের কেউই একে অপরের প্রার্থনা করার অভিমুখ মানবে না। তোমার নিকট যে জ্ঞান এসেছে তার পরে ও যদি তুমি ওদের ইচ্ছার অনুসরণ কর তাহলে অবশ্যই তুমি অবাধ্য দলের অন্তর্ভুক্ত হয়ে যাবে। (১৪৬) আমি যাদের গ্রন্থ দিয়েছি তারা তাকে (বার্তাবাহককে) ওভাবেই চেনে যে ভাবে তারা আপন পুত্রদেরকে চেনে। আর ওদের মধ্যে একদল জেনে শুনে সত্য গোপন করে। সত্য ওটাই যা তোমার প্রতিপালক বলেন। (১৪৭) অতএব তুমি কখনও সন্দেহ পোষন করো না।

(১৪৮) প্রত্যেকের জন্য তার নিজস্ব অভিমুখ রয়েছে, যেকিকে সে তার মুখ ফেরায়। অতএব তোমরা ভালোর দিকে ধাবমান হও। তোমরা যেখানেই থাক না কেন ঈশ্বর তোমাদের সকলকে একত্রিত করবেন। নিঃসন্দেহে ঈশ্বর সবই করতে পারেন। (১৪৯) আর তুমি যেখান থেকেই বেরোও না কেন মসজিদে হারামের দিকে মুখ ফেরাও। নিঃসন্দেহে এটা তোমার প্রভুর তরফ হতে সত্য আর যা কিছু তোমরা করো সে সম্পর্কে ঈশ্বর অনবহিত নন। (১৫০) তুমি যেখান থেকেই বের হওনা কেন মসজিদে হারামের দিকে মুখ ফেরাও; আর তোমরা যেখানেই থাকনা কেন এই মসজিদের দিকেই মুখ

ফেরাবে। যারা অবিবেচক তারা ছাড়া কোন মানুষ যেন তোমাদের বিপক্ষে কোন যুক্তি দাঁড় করাতে না পারে। অতএব তুমি ওদের ভয় করনা, আমাকেই ভয় কর। যাতে আমি আমার কৃপা তোমাদের উপর পূর্ণ করে দিই, আর যাতে তোমরা সঠিক দিশা পেয়ে যাও। (১৫১) যেভাবে আমি তোমাদের নিকট তোমাদের মধ্য হতে একজন বার্তাবাহক পাঠিয়েছি যিনি তোমাদেরকে আমার বাণী (নিদর্শনাবলী) পড়ে শোনায় আর সে তোমাদের পবিত্র করে আর তোমাদেরকে গ্রন্থের (কুরআনের) এবং হিকমতের (বিবেকের বা প্রজ্ঞার) শিক্ষা দান করে। আর তোমাদের ঐ জিনিষ শেখায় যা তোমরা জানতে না। (১৫২) অতএব তোমরা আমাকে স্মরণ কর আমিও তোমাদেরকে স্মরণে রাখবো। আর আমার প্রতি কৃতজ্ঞ থাক, কৃতঘ্ন হয়ো না।

(১৫৩) হে বিশ্বাসীগণ! ধৈর্য আর প্রার্থনার মাধ্যমে সহায়তা প্রার্থনা কর। নিশ্চয়ই ঈশ্বর ধৈর্যশীলদের সঙ্গে আছেন। (১৫৪) আর যারা ঈশ্বরের রাস্তায় মৃত্যুবরণ করে তাদেরকে মৃত বলো না, তারা জীবিত; কিন্তু তোমরা জান না। (১৫৫) আর আমি অবশ্যই তোমাদেরকে পরীক্ষা করবো কিছু ভয় আর ক্ষুধা দ্বারা, সম্পত্তি, প্রাণ আর ফল ইত্যাদির ক্ষতি দ্বারা। আর ধৈর্য ধারণ কারীদের সুসংবাদ দাও। (১৫৬) যারা বিপদ আসলে বলে নিশ্চয়ই আমরা সবাই ঈশ্বরের জন্য এবং আমরা সবাই তাঁরই সান্নিধ্যে ফিরে যাব। (১৫৭) এরাই সেই লোক যাদের উপর তাদের প্রতিপালকের নিকট থেকে বিশেষ কৃপা আর অনুগ্রহ রয়েছে। আর এরাই সঠিক পথে আছে।

(১৫৮) সাফা আর মারওয়া (মক্কার দুটি পাহাড়) নিঃসন্দেহে ঈশ্বরের নিদর্শন। অতএব যারা ঈশ্বরের ঘরে হজ্ব অথবা উমরা করতে যায় তারা এদুটি পরিক্রমা করায় তাদের জন্য কোন ক্ষতি নেই, এবং স্বতঃপ্রনোদিত হয়ে যদি কেউ কিছু ভালকাজ করে তাহলে ঈশ্বর যথার্থ পুরস্কারদাতা ও সর্বজ্ঞাত।

(১৫৯) যারা গোপন করে আমার অবতীর্ণ করা স্পষ্ট নিদর্শন সমূহ এবং আমার দিক নির্দেশনাকে, যেগুলি আমি মানুষের জন্য গ্রন্থের মধ্যে স্পষ্ট করেছি, তাদের জন্য আছে ঈশ্বরের প্রত্যাখ্যান, আর তাদেরকে প্রত্যাখ্যানকারীরাও প্রত্যাখ্যান করে। (১৬০) তবে যারা অনুশোচনা করেছে এবং শুধরে নিয়েছে এবং স্পষ্ট রূপে ঐগুলো বর্ণনা করে দিয়েছে তাদেরকে আমি ক্ষমা করবো এবং আমি তো ক্ষমাশীল, দয়ালু। (১৬১) নিঃসন্দেহে যারা অস্বীকার করেছে এবং ঐ অবস্থায় মৃত্যুবরণ করেছে তাদের উপর ঈশ্বরের, দেবদূতগণ এবং মানুষের অভিসম্পাত। (১৬২) তারা ঐ অভিশাপ নিয়েই চিরকাল থাকবে। তাদের শাস্তি ও লঘু করা হবে না, তাদেরকে বিরাম ও দেওয়া হবে না।

(১৬৩) তোমাদের উপাস্য এক উপাস্য, তিনি ছাড়া কোন উপাস্য নেই, তিনি অত্যন্ত করুণাময় ও অতি দয়ালু। (১৬৪) নিঃসন্দেহে আকাশ ও পৃথিবী সৃষ্টিতে, রাতদিনের বিবর্তনে, মানুষের উপকারী সামগ্রী নিয়ে জলপথে ভাসমান নৌযানে, আকাশ থেকে যে বৃষ্টি ঈশ্বর বর্ষণ করেন যার দ্বারা মৃত ভূমি জীবিত হয় এবং তার উপর নানা প্রকার পশু বিচরণ করে, বাতাসের দিক-পরিবর্তনে এবং আকাশ ও পৃথিবীর মাঝখানে নিয়োজিত মেঘমালা সঞ্চরণে, বুদ্ধিমান লোকদের জন্য নিদর্শনাবলী রয়েছে।

(১৬৫) কিছু লোক এমন আছে যারা ঈশ্বরের পরিবর্তে অন্যকে তাঁর সমকক্ষ মনে করে। তারা তাকে এমন ভালোবাসে যেমন ভালবাসা ঈশ্বরের প্রতি থাকা উচিত। আর যারা বিশ্বাসী তারা সবচেয়ে বেশি ঈশ্বরকে ভালবাসে। আর যদি অত্যাচারীরা তাদের ঐ অবস্থাটা দেখে নিতে পারতো যখন তারা কঠিন শাস্তির মুখোমুখী হবে, তবে তারা উপলব্ধি করতে পারতো সমুদয় শক্তি ঈশ্বরের এবং ঈশ্বর কঠোর শাস্তিদাতা। (১৬৬) যখন শাস্তি তাদের সম্মুখবর্তী হবে, তখন তারা যাদের অনুসারী ছিল, তাদের থেকে বিচ্ছিন্ন

হয়ে পড়বে এবং তাদের সমস্ত সম্পর্ক ছিন্ন হয়ে যাবে। (১৬৭) আর তাদের অনুসারীরা বলবে, হায়! যদি আমরা আর একবার পৃথিবীতে ফিরে যেতে পারতাম তাহলে তারা যেভাবে আমাদের দায় অস্বীকার করেছে তেমনি আমরাও তাদের দায় অস্বীকার করতাম। এভাবে ঈশ্বর তাদের কর্মসমূহকে তাদের জন্যে আক্ষেপে পরিণত করে দেখাবেন। আর তারা আগুন (জাহান্নাম) থেকে বের হতে পারবে না।

(১৬৮) হে মানুষ! পৃথিবীর বৈধ ও পবিত্র বস্তু আহার কর আর শয়তানের পদাঙ্ক অনুসরণ করো না। নিঃসন্দেহে শয়তান তোমাদের প্রত্যক্ষ শত্রু। (১৬৯) সে কেবল তোমাদেরকে মন্দ কাজ এবং নির্লজ্জতার আদেশ দেয় আর ঈশ্বর সম্পর্কে তাই বলতে বলে যা তোমরা জান না। (১৭০) আর যখন তাদের বলা হয় ঈশ্বর যে বিধান অবতীর্ণ করেছেন তা মেনে চল, তখন তারা বলে আমরাতো তাই মেনে চলব যা আমাদের পূর্বপুরুষদের মেনে চলতে দেখেছি। যদি ও তাদের পূর্বপুরুষদের কোনই জ্ঞান ছিল না এবং তারা সুপথগামী ও ছিল না। (১৭১) আর সত্য অস্বীকারকারীরা ঐ পশু গুলোর মতো যাদের আহ্বান করলে কেবল আওয়াজটাই শুনতে পায় তার অর্থ বোঝে না। তারা বধির, মূক ও অন্ধ। তারা কিছুই বোঝে না।

(১৭২) হে বিশ্বাসীগণ! আমার দেওয়া পবিত্র বস্তুসমূহ আহার কর এবং ঈশ্বরের কৃতজ্ঞতা প্রকাশ কর যদি তুমি তাঁর উপাসক হও। (১৭৩) ঈশ্বর তোমাদের জন্যে অবৈধ করেছেন মৃতদেহ, রক্ত, শূকরের মাংস এবং যা ঈশ্বর ছাড়া অন্যের নামে উৎসর্গীকৃত। আর যে ব্যক্তি নিরুপায় হয়ে যায়, কিন্তু লালায়িত হয় না বা সীমা লঙ্ঘনকারী হয় না তাহলে ওর জন্যে কোন পাপ নেই। নিঃসন্দেহে ঈশ্বর ক্ষমাশীল পরম দয়ালু। (১৭৪) ঈশ্বর গ্রন্থের যে বিধান অবতীর্ণ করেছেন তা যারা গোপন করে এবং এর বিনিময়ে

সামান্য বৈষয়িক মূল্য গ্রহণ করে তারা শুধু আগুন খেয়ে নিজেদের উদর পূর্ণ করেছে। উত্থান দিবসে ঈশ্বর তাদের সাথে কথা বলবেন না এবং পবিত্র করবেন না। আর তাদের জন্য যন্ত্রণাদায়ক শাস্তি আছে। (১৭৫) এরাই সেই লোক যারা সুপথের বদলে পথভ্রষ্টতা আর ক্ষমার বদলে শাস্তি ক্রয় করেছে। তারা নরকের অগ্নিকেও কত অল্প ভয় করে। (১৭৬) এই জন্যই ঈশ্বর যথার্থ গ্রন্থ অবতীর্ণ করেছেন। যারা এই গ্রন্থের ব্যাপারে মতভেদ সৃষ্টি করেছে, তারা গভীর বিরোধের মধ্যে লিপ্ত হয়ে আছে।

(১৭৭) তোমরা তোমাদের মুখ পূর্বদিকে বা পশ্চিম দিকে করার মধ্যে কোন পুণ্য নেহ; বরং ঈশ্বর, পরলোক, দেবদূত, ঐশীগ্রন্থ ও তাঁর পয়গম্বরদের প্রতি বিশ্বাস স্থাপন করা, ঈশ্বরের সন্তুষ্টি লাভের জন্য নিকট আত্মীয়, অনাথ, সাহায্য প্রার্থী এবং পথিকদের সম্পদ দান করা, দাসমুক্ত করা, প্রার্থনা করা, উদ্বৃত্ত সম্পদ থেকে আবশ্যিক দান প্রদান করা, প্রতিশ্রুতি রক্ষা করা, বিপদে ও দুঃখ কষ্টের সময় ধৈর্য ধারণ করার মধ্যে পুণ্য আছে। এই লোকেরাই সত্যশ্রয়ী এবং ঈশ্বর ভীরু।

(১৭৮) হে বিশ্বাসীগণ! তোমাদের জন্য হত্যার প্রতিশোধ অনিবার্য করা হচ্ছে। স্বাধীন ব্যক্তির বদলে স্বাধীন ব্যক্তি, দাসের বদলে দাস, মহিলার বদলে মহিলা, তবে মৃত ব্যক্তির পরিবারের পক্ষ থেকে কিছু ক্ষমা করা হলে সেক্ষেত্রে তার উচিৎ ন্যায় সঙ্গত ব্যবস্থা গ্রহণ করা এবং সহৃদয়তার সাথে তার অনুকূলে রক্তমূল্য পরিশোধ করা। এটা তোমাদের প্রভুর পক্ষ থেকে এক সুবিধা এবং দয়া। এর পরেও যদি কোন ব্যক্তি সীমালঙ্ঘন করে তার জন্য কষ্টদায়ক শাস্তি নির্ধারিত। (১৭৯) হে বুদ্ধি সম্পন্ন মানুষেরা! কিসাসের (প্রতিশোধের) মধ্যে তোমাদের জন্য জীবন নিহিত আছে যাতে তোমরা ঈশ্বরভীরু হতে পারো। (১৮০) তোমাদের জন্য এটা বিধিবদ্ধ করা হয়েছে,

যখন তোমাদের কারো মৃত্যু নিকটবর্তী বলে মনে হয়, যদি সে কোন সম্পদ রেখে যায়, তবে তার পিতামাতা-আত্মীয়স্বজনদের জন্য সে যেন মৃত্যুকালীন জবানবন্দী করে যায়। এটা ঈশ্বর ভীরুদের জন্য কর্তব্য। (১৮১) অতঃপর অসিয়ৎ বা জবানবন্দী শোনার পর যদি কেউ তা বদলে দেয় তাহলে তার পাপ তারই উপরে বর্তাবে যে অসিয়ৎ বদলালো। নিশ্চয়ই ঈশ্বর সব কিছুই শোনে সব কিছুই জানেন। (১৮২) হ্যাঁ, তবে কেউ যদি কোন অসিয়ৎকারীর কোন রকম পক্ষপাত বা অন্যায়ের আশঙ্কা করে বা কারো অধিকার হতে বঞ্চিত করা হয়েছে বলে মনে করে এবং সে আপোষ মীমাংসা করে দেয় তাহলে তার কোন পাপ নেই। ঈশ্বর ক্ষমাশীল, দয়ালু।

(১৮৩) হে বিশ্বাসীগণ! তোমাদের উপর রোযা (উপবাস) আবশ্যিক (অপরিহার্য) করা হয়েছে, যেমন তোমাদের পূর্বের লোকদের উপর রোযা অপরিহার্য করা হয়েছিল যাতে তোমরা সংযমী হও। (১৮৪) এই উপবাস নির্দিষ্ট কয়েক দিনের জন্য; তবে তোমাদের মধ্যে যদি কেউ অসুস্থ হয় অথবা ভ্রমণে থাকে তাহলে অন্য দিনে তারা সংখ্যা পূর্ণ করে নেবে। আর যার শক্তি নেই তাকে একদিন উপবাসের পরিবর্তে একজন গরীবকে একদিনের খাদ্য দিতে হবে। যে অতিরিক্ত পুণ্য করবে তা তার জন্য উত্তম। আর যদি তুমি রোযা কর তাহলে তা তোমাদের জন্য মঙ্গল। যদি তোমরা বুঝতে পারো। (১৮৫) রমযান হল সেই মাস যে মাসে কুরআন অবতীর্ণ হয়েছে, যা মানুষের জন্য দিক-নির্দেশনা, সৎপথের প্রত্যক্ষ নিদর্শন এবং সত্য-অসত্যের মধ্যে পার্থক্য নির্ণয়কারী। অতএব তোমাদের মধ্যে যে এই মাস পাবে সে যেন তাতে উপবাস পালন করে। আর যারা অসুস্থ অথবা ভ্রমণরত অবস্থায় থাকে তারা অন্যদিনে এই সংখ্যা পূর্ণ করে নেবে। ঈশ্বর তোমাদের জন্য সহজ চান, কঠিন চান না। তিনি চান তোমরা পুরো মাস

উপবাসপালন করো, যাতে করে তোমাদেরকে সুপথ দেখানোর জন্য তোমরা তাঁর মহিমা প্রকাশ করতে পারো এবং কৃতজ্ঞতা প্রকাশ করো ।

(১৮৬) আর যখন আমার বান্দাগণ তোমাকে আমার সম্বন্ধে প্রশ্ন করে তখন তাদেরকে বলে দাওঃ আমি তো কাছেই আছি । কেউ যখন আমাকে ডাকে তখন আমি তার ডাকে সাড়া দিই । অতএব তারাও আমার আদেশ মান্যকরুক এবং আমার উপরে বিশ্বাস রাখুক যাতে তারা সঠিক পথ পায় । (১৮৭) তোমাদের জন্য উপবাসের রাত্রিতে আপন পত্নীদের নিকটে গমন করা বৈধ করা হল । তারা তোমাদের বস্ত্র স্বরূপ আর তোমরাও তাদের বস্ত্র স্বরূপ । ঈশ্বর জানেন তোমরা ইতিপূর্বে প্রতিজ্ঞা ভঙ্গ করেছিলে, তবে তিনি তোমাদের উপর কৃপা করেছেন এবং তোমাদের ক্ষমা করেছেন । এখন তোমরা তোমাদের স্ত্রীদের সংস্পর্শে যেতে পার এবং ঈশ্বর তোমাদের জন্য যা বরাদ্দ করে রেখেছেন তা কামনা করতে পার । আর আহার কর পান কর যতক্ষণ না কালো রেখা থেকে প্রভাতের শুভ্র রেখা স্পষ্ট হয় । অতঃপর উপবাস পূর্ণ কর রাত পর্যন্ত । আর যখন তোমরা মসজিদে এতেকাফরত (উপাসনার জন্য নির্জন বাস) অবস্থায় থাকবে তখন স্ত্রী-সহবাস করবে না । এটাই ঈশ্বরের তৈরী সীমারেখা, অতএব তোমরা ওদের নিকট যাবে না । এভাবে ঈশ্বর আপন নিদর্শন মানুষের নিকট বর্ণনা করেন যাতে তারা সংযত হতে পারে । (১৮৮) তোমরা অন্যায়ভাবে একে অপরের সম্পদ ভোগ করো না এবং জ্ঞাতসারে অন্যায়ভাবে মানুষের সম্পদের একটা অংশ ভোগ করার উদ্দেশ্যে তা শাসকদের নিকটে পেশ করো না । তোমরা এটা ভালভাবেই জানো ।

(১৮৯) তারা তোমার নিকটে চাঁদের বিভিন্ন আকার সম্পর্কে প্রশ্ন করে । বলে দাওঃ এগুলো মানুষের জন্য এবং হজ্বের জন্য সময় নির্দেশক । তোমরা যে পিছন দিক দিয়ে ঘরে প্রবেশ করো, এটা পুণ্য নয়; বরং ঈশ্বর ভীষণতর

জন্য যে সংযমশীলতা অবলম্বন করে, সেই পূণ্যবান। তোমরা সামনের দরজা দিয়েই ঘরে প্রবেশ কর ও ঈশ্বরকে ভয় কর যাতে তোমরা সফল হতে পার। (১৯০) এবং ঈশ্বরের পথে ওদের সঙ্গে যুদ্ধ কর যারা তোমাদের সঙ্গে যুদ্ধ করে।^১ আর অত্যাচার করো না ঈশ্বর অত্যাচারীদেরকে পছন্দ করেন না। (১৯১) আর মারো ওদের যেখানে পাও (যারা তোমাদের সঙ্গে যুদ্ধ করে)^২ আর বার করে দাও ওদের যেখান থেকে তারা তোমাদের বার করে দিয়েছে। আর ফিতনা (উপদ্রব) হত্যার চেয়েও গুরুতর। আর তাদের সাথে মসজিদে হারামের নিকট যুদ্ধ করো না। যতক্ষণ না তারা তোমাদের সাথে সেখানে যুদ্ধ না করে। অতএব যদি তারা তোমাদের সাথে যুদ্ধ করে তাহলে তাদের বধ করো। এটাই অবজ্ঞাকারীদের শাস্তি। (১৯২) আর যদি তারা মেনে নেয় তাহলে ঈশ্বর ক্ষমাশীল, দয়াবান। (১৯৩) আর ওদের সাথে যুদ্ধ কর যতক্ষণ পর্যন্ত না ফিতনা (ধর্মীয় অত্যাচার) অবসান হয়^৩ এবং ঈশ্বরের ধর্ম প্রতিষ্ঠিত হয়। আর যদি তারা বিরত হয় তাহলে অত্যাচারী ব্যতীত কারো বিরুদ্ধে কোন বৈরিতা নেই।

(১৯৪) পবিত্র মাসের পরিবর্তে পবিত্র মাস এবং পবিত্রতার অবমাননার ক্ষেত্রে কিসাস (প্রতিশোধ) প্রযোজ্য।^১ অতএব যারা তোমাদের উপরে অত্যাচার করেছে তোমরাও তাদের উপর অত্যাচার করো যেমন তারা তোমাদের উপর অত্যাচার করেছে। আর ঈশ্বরকে ভয় কর এবং জেনে নাও ঈশ্বর ঈশ্বরভীরুদের সঙ্গে আছেন। (১৯৫) এবং ঈশ্বরের রাস্তায় খরচ করো আর নিজেদেরকে ধ্বংসের দিকে ঠেলে দিওনা। আর ভাল কাজ কর। নিশ্চয় যারা ভাল কাজ করে ঈশ্বর তাদেরকে ভালবাসেন।

^১ বিঃ দ্রঃ (২ঃ ১৯০-১৯৪) পরিচয় অংশে ১৩ থেকে ১৫ পৃষ্ঠা দ্রষ্টব্য।

(১৯৬) তোমরা ঈশ্বরের জন্য হজ্ব আর উমরাহ (সংক্ষিপ্ত হজ্ব) যথাযথ ভাবে সম্পন্ন কর। তবে যদি বাধাপ্রাপ্ত হও যেমনটি পাওয়া যায় একটি পশু কোরবানী কর। কোরবানীর পশুটি তার জায়গায় না পৌঁছানো পর্যন্ত মাথা মুণ্ডন করো না। আর তোমাদের মধ্যে যদি কেউ অসুস্থ হয় কিম্বা কারো মাথায় কোন সমস্যা থাকে তাহলে সে ক্ষতিপূরণ (ফিদিয়া) দেবে উপবাস, দান অথবা কোরবানী দ্বারা। তারপর নিরাপত্তা ফিরে এলে কেউ হজ্জের সাথে উমরাহ (সংক্ষিপ্ত হজ্ব) পালন করতে চাইলে, যেমন পাওয়া যায় একটি পশু কোরবানী করবে। আর যদি পশু না পাওয়া যায় তাহলে হজ্জের সময় তিন দিন রোযা (উপবাস) করবে আর ঘরে ফিরে সাত দিন উপবাস পালন করবে, এই ভাবে দশদিন পূর্ণ হবে। এটা তাদের জন্য যাদের পরিবার মসজিদে হারামের নিকট বাস করে না। ঈশ্বরকে ভয় কর আর মনে রেখো ঈশ্বর কঠোর শাস্তি প্রদানকারী। (১৯৭) হজ্জের জন্য নির্ধারিত মাস আছে। অতএব যিনি এই নির্ধারিত মাসে হজ্ব করার ইচ্ছা করেছেন তিনি হজ্জের মধ্যে কোনো অশ্লীলতা, অন্যায় কাজ বা ঝগড়া-বিবাদ করতে পারবেন না এবং যে ভাল কাজ তোমরা করবে ঈশ্বর তা জানতে পারবেন। সঙ্গে পাথেয় নিও, সবচেয়ে ভাল পাথেয় হল ঈশ্বরভীরুতা। হে বুদ্ধিমানেরা! আমাকে ভয় কর।

(১৯৮) এতে কোন পাপ নেই যদি তোমরা আপন প্রভুর অনুকম্পা অন্বেষণ কর। আর ঈশ্বরকে স্মরণ কর যেভাবে তিনি তোমাদের বলেছেন। ইতিপূর্বে অবশ্যই তোমরা পথভ্রষ্টদের মধ্যে ছিলে। (১৯৯) অতঃপর পরিক্রমায় চলো যেখান দিয়ে সব লোক চলে এবং ঈশ্বরের নিকট ক্ষমা প্রার্থনা কর। বাস্তবিক ঈশ্বর ক্ষমা প্রদানকারী, দয়াবান। (২০০) অতঃপর যখন তুমি হজ্জের প্রক্রিয়া সম্পন্ন করে নাও তখন ঈশ্বরকে স্মরণ কর যেভাবে তোমরা এর পূর্বে আপন পূর্বপুরুষদেরকে স্মরণ করতে বরণ তার

চেয়েও অধিক। কিছু মানুষ আছে যারা বলেঃ হে আমাদের প্রতিপালক! আমাদেরকে এই জগতেই সবকিছু দিয়ে দিন তাদের জন্য পরলোকে কোন অংশ নেই। (২০১) আর কিছু লোক বলেঃ হে আমাদের প্রভু! আমাদেরকে এই জগতে কল্যাণ দান করুন আর পরলোকেও কল্যাণ দান করুন এবং আমাদেরকে আগুনের যন্ত্রণা হতে বাঁচান। (২০২) তাদের জন্যই আছে প্রতিফল তাদের কৃতকর্মের (এই জগতে ও পরলোকে) আর ঈশ্বর অতি সত্ত্বর হিসাব নেবেন। (২০৩) আর ঈশ্বরকে স্মরণ কর নির্ধারিত দিনে। আর যে তাড়াতাড়ি করে দুদিনেই (মক্কায়ে) চলে আসে তার কোন পাপ নেই, আর যে ব্যক্তি থেকে যাবে তারও কোন পাপ নেই। এ তাদের জন্য যে, ঈশ্বরকে ভয় করে। আর তুমি ঈশ্বরকে ভয় করতে থাকো এবং ভাল ভাবেই জেনে নাও যে, আমাদেরকে তাঁরই নিকটে একত্রিত করা হবে।

(২০৪) মানুষের মধ্যে এমন লোকও আছে যার পার্থিব জীবন সম্পর্কিত কথা তোমাকে মুগ্ধ করে। তার অন্তরে যা আছে সে সম্পর্কে সে ঈশ্বরকে সাক্ষী রাখে। আসলে সে সর্বাধিক কলহপ্রিয় প্রতিপক্ষ। (২০৫) এবং যখন সে চলে যায় তখন পৃথিবীতে অশান্তি সৃষ্টি করে এবং শস্যক্ষেত ও জীবজন্তু ধ্বংস করার প্রয়াস চালায়। ঈশ্বর অশান্তি পছন্দ করেন না। (২০৬) আর যখন তাকে বলা হয় ঈশ্বরকে ভয় কর তখন অহমিকা তাকে অপরাধের দিকে টেনে ধরে। অতএব এমন ব্যক্তির জন্য নরক নিশ্চিত, আর তা অত্যন্ত নিকৃষ্ট ঠিকানা। (২০৭) এবং মানুষের মধ্যে এমন কিছু লোকও আছে যে ঈশ্বরের সন্তুষ্টির জন্য নিজেকে উৎসর্গ করে আর ঈশ্বর আপন বান্দার উপর পরম স্নেহপ্রায়ণ।

(২০৮) হে বিশ্বাসীগণ! পরিপূর্ণভাবে ইসলামের মধ্যে প্রবেশ কর আর শয়তানের পদাঙ্ক অনুসরণ করো না, সে তোমাদের প্রত্যক্ষ শত্রু।

(২০৯) তোমাদের কাছে স্পষ্ট নিদর্শন আসা সত্ত্বেও যদি তোমাদের পদস্থলন ঘটে তাহলে জেনে রেখো, ঈশ্বর অত্যন্ত পরাক্রমশালী, প্রজ্ঞাবান। (২১০) তবে কি মানুষ এই প্রতিক্ষায় আছে যে, ঈশ্বর (স্বয়ং) মেঘের ছায়ার মধ্য দিয়ে তাদের কাছে চলে আসুক এবং দেবদূতরাও (আসুক) আর বিষয়টির মিমাংসা করে দিক। বস্তুতঃ সকল বিষয় ঈশ্বরেরই নিকট প্রত্যাবর্তিত হয়ে থাকে। (২১১) ইসরাঈলের সন্তানদের জিজ্ঞাসা কর, আমি ওদের কি পরিমান স্পষ্ট নিদর্শন দিয়েছি। আর যে ব্যক্তি ঈশ্বরের অনুগ্রহ তার কাছে আসার পর তা পরিবর্তন করে, সে জেনে বাখুক, ঈশ্বর নিশ্চিতরূপে কঠোর দণ্ডদাতা। (২১২) অবজ্ঞাকারীদের জন্য এই সাংসারিক জীবন আকর্ষণীয় করে দেওয়া হয়েছে। আর তারা বিশ্বাসীদের উপহাস করে। তবে যারা ঈশ্বরভীরুতা অবলম্বন করেছে তারা পুনরুত্থান দিবসে ওদের তুলনায় অনেক উচ্চ মর্যাদা পাবে এবং ঈশ্বর যাকে চান অপরিমিত জীবিকা দান করেন।

(২১৩) সকল মানুষ একই জাতিসত্ত্বার অন্তর্ভুক্ত ছিল। অতঃপর ঈশ্বর সুসংবাদদাতা ও সাবধানকারী হিসাবে পয়গম্বর পাঠালেন এবং তাদের সঙ্গে সত্য গ্রন্থ অবতীর্ণ করলেন, যাতে তারা তাদের মতভেদের মিমাংসা করে নিতে পারে। শুধু পারস্পারিক বিদ্বেষবশতঃ তাদের নিকট স্পষ্ট নিদর্শন আসার পরও যাদেরকে গ্রন্থ দেওয়া হয়েছিল তারা বিরোধিতা করলো। অতঃপর ঈশ্বর নিজ অনুগ্রহে বিশ্বাসীদের সঠিক পথ দেখালেন যে বিষয়ে তারা মতবিরোধ করছিল এবং ঈশ্বর যাকে ইচ্ছা সরল পথ প্রদর্শন করেন। (২১৪) তোমরা কি মনে করছো যে, তোমরা স্বর্গে প্রবেশ করতে পারবে? এখনও তোমাদের উপর সেই পরিস্থিতি অতিক্রান্তই হয় নি যা তোমাদের পূর্ববর্তী লোকদের উপরে হয়ে গেছে। তারা অভাব-অনটন ও দুঃখ কষ্টের মধ্যে পড়েছিল এবং এমনভাবে কম্পিত হয়েছিল যে, বার্তাবাহক ও তাঁর

সঙ্গী বিশ্বাসীগণ চিৎকার করে উঠেছিল যে, কখন ঈশ্বরের সাহায্য আসবে? মনে রেখো ঈশ্বরের সাহায্য খুবই নিকটে।

(২১৫) মানুষ তোমার নিকট জানতে চায় যে, তারা কিরূপে খরচ করবে। বলে দাও, যে ধন-সম্পত্তি তোমরা খরচ করো তাতে অধিকার আছে তোমাদের পিতা-মাতার, আত্মীয়-স্বজনের, অনাথদের, গরীব মানুষদের এবং ভ্রমণকারীদের। আর যে উত্তম কাজ তোমরা করবে তা ঈশ্বর জানেন। (২১৬) তোমাদের উপর যুদ্ধের আদেশ এসেছে অথচ তা তোমাদের নিকটে কঠিন মনে হচ্ছে। হতে পারে তোমরা কোন একটা জিনিষ পছন্দ করো না অথচ ওটাই তোমাদের জন্য মঙ্গল। এবং এটাও হতে পারে তোমরা যে জিনিষ পছন্দ করো, সেটাই তোমাদের জন্য অমঙ্গল। আর ঈশ্বর জানেন, তোমরা জানো না।

(২১৭) পবিত্র মাসে যুদ্ধ করা সম্পর্কে তোমাকে তারা জিজ্ঞাসা করছে। বলঃ ঐ মাসে যুদ্ধ করা খুবই খারাপ; কিন্তু ঈশ্বরের পথে বাধা দেওয়া এবং তা অস্বীকার করা এবং মসজিদে হারাম থেকে তার অধিবাসীদের বহিস্কার করা ঈশ্বরের দৃষ্টিতে এর চেয়েও খারাপ। আর বিশৃঙ্খলা হত্যার চেয়েও আরও বড় খারাপ কাজ। আর এরা তোমাদের সাথে নিরন্তর যুদ্ধ চালিয়ে যাবে, এমনকি এরা তোমাদের দ্বীন (ধর্ম) থেকে ফিরিয়ে নেবে যদি তারা সক্ষম হয়। আর তোমাদের মধ্যে যারা নিজ ধর্ম থেকে বিচ্যুত হয়ে অবিশ্বাসী অবস্থায় মৃত্যুবরণ করবে তাদের কর্মসমূহ ইহজগতে এবং পরজগতে বিনষ্ট হবে। আর তারা আগুনে (নরকে) নিক্ষিপ্ত হবে এবং সেখানে চিরকাল থাকবে। (২১৮) যারা বিশ্বাস এনেছে আর যারা হিজরত (ঈশ্বরের পথে নিজেদের ঘরবাড়ী ছেড়ে দিয়েছে) করেছে এবং ঈশ্বরের পথে লড়াই করেছে, তারাই ঈশ্বরের অনুগ্রহ প্রত্যাশী। আর ঈশ্বর ক্ষমাশীল ও অতি দয়ালু।

(২১৯) লোকেরা তোমাকে মদ ও জুয়া সম্পর্কে জিজ্ঞাসা করে। বলঃ এদুটি জিনিষেই বড় পাপ রয়েছে আর লোকদের জন্য কিছু উপকার ও রয়েছে। আর এ দুটোর উপকারের চেয়ে বেশী পাপ বিদ্যমান। আর তারা তোমাকে জিজ্ঞাসা করে তারা কি ব্যয় করবে? বলো - যা প্রয়োজনের অতিরিক্ত। এভাবে ঈশ্বর তোমাদের জন্য বিধান সমূহ বর্ণনা করেন যাতে তোমরা চিন্তা কর (২২০) এই জগৎ এবং পরলোক সম্বন্ধে, আর তারা তোমাকে অনাথদের সম্পর্কে জিজ্ঞাসা করে, বলঃ যাতে তাদের ভাল হয় সেটাই উপযুক্ত, আর যদি তোমরা তাদেরকে নিজেদের সাথে মিলিয়ে নাও তাহলে তারা তোমাদের ভাই, আর ঈশ্বর জানেন কে অকল্যাণকারী আর কে কল্যাণকারী, আর যদি ঈশ্বর চাইতেন তাহলে তোমাদের বিপত্তিতে ফেলতে পারতেন, ঈশ্বর পরাক্রমশীল, প্রজ্ঞাময়।

(২২১) আর বহুদেববাদী নারীদের বিবাহ করো না যতক্ষণ না তারা বিশ্বাসী হয়ে যায়, আর একজন বিশ্বাসী দাসী একজন বহুদেববাদী নারী অপেক্ষা উত্তম, যদিও তাকে তোমার ভাল লাগে। নিজেদের মেয়েদের বহুদেববাদী পুরুষের সাথে বিবাহ দিও না যতক্ষণ না তারা বিশ্বাসী হয়ে যায়। বিশ্বাসী দাস একজন স্বাধীন বহুদেববাদী পুরুষের চেয়ে উত্তম যদিও তাকে তোমাদের ভাল লাগে। এরা নরকের দিকে আহ্বান করে, আর ঈশ্বর স্বর্গ ও তাঁর ক্ষমার দিকে আহ্বান করেন। তিনি তাঁর নিদর্শনাবলী স্পষ্ট রূপে বর্ণনা করেন যাতে তারা শিক্ষা গ্রহণ করে। (২২২) আর তারা তোমাকে মাসিক ঋতুস্রাব সম্পর্কে জিজ্ঞাসা করে। বলঃ এটা অশুচি। ঐ সময় তোমরা নারীদের থেকে আলাদা থাক আর যতক্ষণ না তারা পবিত্র হচ্ছে তার নিকটে যেও না। অতঃপর যখন সে ভালভাবে পবিত্র হয়ে যায় তখন ঈশ্বর যেভাবে তোমাদের নির্দেশ দিয়েছেন। নিশ্চয়ই ঈশ্বর অনুশোচনা কারীদের

ভালবাসেন আর যারা পবিত্র থাকে তাদের ভালবাসেন। (২২৩) তোমাদের নারীরা তোমাদের ক্ষেত্র স্বরূপ, অতএব তোমরা যেভাবেই ইচ্ছা কর, গমন কর আর নিজের জন্য কিছু পাথেয় আগে পাঠাও এবং ঈশ্বরকে ভয় কর এবং জেনে রেখো তোমাদেরকে অবশ্যই তাঁর সাথে মিলতে হবে এবং বিশ্বাসীগণকে শুভ সংবাদ দাও।

(২২৪) তোমরা সংকাজ, ঈশ্বরভীরুতা অবলম্বন এবং মানুষের মাঝে মিমাংসা করে দেওয়া থেকে বিরত থাকার জন্য ঈশ্বরকে শপথের অজুহাত বানিয়ে নিও না। ঈশ্বর সব কিছু শোনেন, সবকিছু জানেন। (২২৫) ঈশ্বর তোমাদের অর্থহীন শপথের জন্য তোমাদের ধরবেন না; বরং তিনি তোমাদের অন্তরের অভিপ্রায়ের জন্য পাকড়াও করবেন। ঈশ্বর ক্ষমাপরায়ণ, ধৈর্যশীল। (২২৬) যারা নিজ স্ত্রীদের সংস্রব থেকে দূরে থাকার শপথ করে, তারা চার মাস অপেক্ষা করবে। পুনরায় যদি তারা (নিজ পত্নীর কাছে) ফিরে আসে তাহলে ঈশ্বর ক্ষমাশীল, দয়াবান। (২২৭) আর যদি তারা বিবাহ বিচ্ছেদের সিদ্ধান্ত নেয় তাহলে নিশ্চিতরূপে ঈশ্বর সবকিছু শোনেন, সব কিছু জানেন। (২২৮) আর বিচ্ছেদ প্রাপ্তা স্ত্রীরা নিজেদেরকে তিন ঋতুস্রাব কাল পর্যন্ত অপেক্ষায় রাখবে, আর যদি সে ঈশ্বরকে এবং পরলোকের দিনে বিশ্বাস রাখে তাহলে তার জন্য এটা বৈধ নয় যে, ঐ জিনিষকে গোপন করবে যা ঈশ্বর তার জরায়ুতে সৃষ্টি করেছেন। এবং এই সময়ের মধ্যে তার স্বামী তাকে আবার ফিরিয়ে নেওয়ার অধিকার রাখে, যদি সে সম্পর্ক ঠিক করে নিতে চায়। নারীদের ও ন্যায়সঙ্গত অধিকার আছে ঠিক যেমন তাদের পুরুষদের অধিকার আছে। তবে নারীর উপর পুরুষের মর্যাদা রয়েছে। ঈশ্বর হচ্ছেন পরাক্রমশালী, প্রজ্ঞাময়।

(২২৯) বিচ্ছেদ (তালাক) দুইবার; অতঃপর হয় যথোচিতভাবে

পুনঃগ্রহণ অথবা সদব্যবহার সহকারে বিদায় দান। আর তোমাদের জন্য এটা বৈধ নয় যে তুমি যা কিছু ঐ মহিলাকে দিয়েছ তার মধ্যে কিছু ফিরিয়ে নাও, তবে দুজনেই যদি আশঙ্কা করে যে, ঈশ্বরের সীমারেখা ঠিক রাখতে পারবে না তাহলে ভিন্ন কথা। আর যদি তোমার এই আশঙ্কা হয় যে, দুজনেই ঈশ্বরের সীমারেখা ঠিক রাখতে পারবে না, তাহলে স্ত্রী নিজেকে মুক্ত করতে কিছু বিনিময় দিলে তাতে দুজনের কারো পাপ হবে না। এগুলো ঈশ্বরের সীমারেখা; তোমরা এগুলো লঙ্ঘন করো না। আর যে ব্যক্তি ঈশ্বরের সীমা লঙ্ঘন করে তারা অত্যাচারী। (২৩০) অতঃপর যদি সে তাকে তালাক (বিচ্ছেদ) দিয়ে দেয় তাহলে তারপর ঐ স্ত্রী তার জন্য বৈধ নয়, যতক্ষণ না সে অন্য কোন পুরুষকে বিবাহ করে। অতঃপর যদি সেই পুরুষ তাকে তালাক (বিচ্ছেদ) দেয় তখন কোন পাপ নেই ওদের দুজনের ক্ষেত্রে যদি তারা আবার মিলে যায়। শর্ত এটাই যে তাদের ঈশ্বরের সীমারেখায় দৃঢ় থাকার আশা থাকতে হবে। এটাই ঈশ্বরের বিধান যেটা তিনি বর্ণনা করছেন ঐ লোকদের জন্য যারা বুদ্ধিমান। (২৩১) আর যখন নারীদের তালাক দাও আর তারা তাদের প্রতিক্ষাকাল (তিন মাস দশ দিন বা প্রসবের সময় পর্যন্ত) পূরণ করে, তখন হয় তাদেরকে যথোচিতভাবে রেখে দাও নতুবা যথোচিতভাবে বিদায় দাও। তাদেরকে কষ্ট দেওয়ার উদ্দেশ্যে আটকে রেখো না, তাদের উপর অত্যাচার করো না। আর যে এমন করবে সে নিজেরই প্রতি অন্যায় করবে। আর ঈশ্বরের বাণীসমূহকে তুচ্ছ-তাচ্ছিল্য করো না। আর স্মরণ কর ঈশ্বরের অনুগ্রহ, তাঁর গ্রন্থ ও প্রজ্ঞাকে যা তিনি তোমাদের উপদেশ দেওয়ার জন্য অবতীর্ণ করেছেন। আর ঈশ্বরকে ভয় কর এবং জেনে রেখো ঈশ্বর সবকিছুই জানেন।

(২৩২) আর যখন তোমরা নিজ স্ত্রীদের তালাক দিয়ে দাও আর তারা

তাদের প্রতিক্ষাকাল সমাপ্ত করে নেয় তখন তারা যদি তাদের (পূর্ববর্তী) স্বামীদের সাথে পুনর্বিবাহ করতে চায় তাহলে তোমরা বাধা দিও না, যখন তারা বিধিসম্মত ভাবে আপোষে সম্মত হয়ে যায়। এই উপদেশ দেওয়া হচ্ছে ঐ ব্যক্তিকে যে তোমাদের মধ্যে ঈশ্বর ও পরলোকে বিশ্বাসী, এটা তোমাদের জন্য অধিকতর পরিচ্ছন্ন ও পবিত্র বিধান। ঈশ্বরই জানেন তোমরা জান না। (২৩৩) আর মা তার সন্তানদের পুরো দুই বৎসর দুধ পান করাবে, তাদের জন্য যারা পুরো মেয়াদ দুধ পান করাতে চায়। এক্ষেত্রে সন্তানের পিতাকে যথোচিত ভাবে মায়েদের খাওয়া পরার ব্যবস্থা করতে হবে। কাউকে তার সাধ্যের অতিরিক্ত কষ্ট দেওয়া যাবে না। নিজ সন্তানের কারণে মাকে কষ্ট দেওয়া যাবে না এবং পিতাকে ও কষ্ট দেওয়া যাবে না। (পিতার মৃত্যু জনিত কারনে) পিতার উত্তরাধিকারীকেও এই দায়িত্ব পালন করতে হবে। আর যদি পিতা মাতা পারস্পরিক সহমত ও পরামর্শে দুধ ছাড়াতে চায় তাহলে দুজনের কোন পাপ নেই, যদি তোমরা চাও তাহলে আপন সন্তানকে অন্যের দুধ পান করাও, তাহলেও তোমাদের উপর কোন পাপ নেই। শর্ত এই যে, বিধি অনুসারে তুমি তাঁকে (দুধমাতাকে) যে মূল্য দিতে সম্মত হয়েছিলে, তা পরিশোধ করে দেবে। আর ঈশ্বরকে ভয় কর আর জেনে রেখো যা কিছু তুমি করছো ঈশ্বর সেটা দেখছেন।

(২৩৪) আর তোমাদের মধ্যে যারা স্ত্রীদের রেখে মারা যাবে তাদের স্ত্রীরা (বিধবাগণ) চার মাস দশদিন নিজেদের অপেক্ষায় রাখবে। তাদের এই সময়কাল পূর্ণ হলে তারা নিজেদের ব্যাপারে রীতি অনুযায়ী যা করবে তাতে তোমাদের কোন দোষ নেই। আর ঈশ্বর তোমাদের কর্ম সম্পর্কে অবগত। (২৩৫) আর যদি তোমরা আকার ইঙ্গিতে (বিবাহ বিচ্ছিন্না বা বিধবা) নারীদের (বিবাহের) প্রস্তাব দাও কিম্বা নিজেদের মনে গোপন রাখো, তাতে তোমাদের

কোনপাপ নেই। ঈশ্বর জানেন যে, তাদের কথা তোমাদের মনে আসবে; কিন্তু লুকিয়ে তাদের সাথে অঙ্গীকার করবে না, তোমরা তাদের সাথে স্বাভাবিক রীতি অনুযায়ী কথা বলতে পার। আর ঐ সময় পর্যন্ত বিবাহের ইচ্ছা করো না যতক্ষণ নির্ধারিত মেয়াদ (ইদ্দত) পূর্ণ না হয়। আর জেনে রেখো ঈশ্বর জানেন যা কিছু তোমাদের অন্তরে আছে। অতএব তাঁকে ভয় কর এবং জেনে রেখো ঈশ্বর ক্ষমাশীল ও সহনশীল। (২৩৬) যদি স্ত্রীদের স্পর্শ করার আগে এবং কোন মোহর নির্ধারণ করার আগে তোমরা তাদের তালাক দাও, তবে (মোহর পরিশোধ না করার জন্য) তোমাদের কোন দোষ হবে না। তবে রীতি অনুযায়ী কিছু সামগ্রী তাদের দিয়ে দাও। ধনী তার সাধ্যানুসারে, গরীব তার সাধ্যানুসারে। এটা সৎকর্মশীলদের জন্য অনিবার্য। (২৩৭) আর যদি তোমরা স্ত্রীদের স্পর্শ করার পূর্বেই তালাক দাও আর তাদের জন্য কিছু মোহরও নির্ধারণ করে থাকো, তাহলে যত মোহর নির্ধারণ করেছিলে তার অর্ধেক পরিশোধ করো, তবে যদি তারা ছেড়ে দেয় অথবা সে ছেড়ে দেয় যার হাতে বিবাহের বন্ধন, তাহলে ভিন্নকথা। আর তোমরা ছেড়ে দিলে সেটাই হবে ন্যায় পরায়ণতার নিকটবর্তী। আর তোমরা পারস্পারিক সহায়তা থেকে বিমুখ হয়ো না। যা কিছু তোমরা করো তা ঈশ্বর প্রত্যক্ষকারী।

(২৩৮) প্রার্থনার প্রতি যত্নবান হও, বিশেষ করে মধ্যবর্তী প্রার্থনার। (২৩৯) ঈশ্বরের সামনে বিনম্র অবস্থায় দাঁড়াও। আর যদি তোমাদের ভয়ের আশঙ্কা থাকে তাহলে চলতে চলতে বা যানবাহনে চলন্ত অবস্থায় প্রার্থনা করে নাও। আর যখন অবস্থা স্বাভাবিক হয়ে যাবে তখন ঈশ্বরকে ঐ ভাবে স্মরণ করো যেভাবে তিনি তোমাদের শিখিয়েছেন, যা তোমরা ইতিপূর্বে জানতে না। (২৪০) তোমাদের মধ্যে যারা স্ত্রীদের রেখে মারা যায়, তারা যেন স্ত্রীদের জন্য মৃত্যুকালীন জবানবন্দী (ওসিয়ৎ) করে যায় যে, এক বৎসর পর্যন্ত তাদের

বাড়ীতে রেখে যেন খরচ দেওয়া হয়। তবে সে যদি নিজেই ঘর ছেড়ে দিয়ে বিধান অনুযায়ী নিজের সম্পর্কে সিদ্ধান্ত নেয় তাতে তোমাদের কোন দোষ নেই। ঈশ্বর পরাক্রমশালী, প্রজ্ঞাময়। (২৪১) আর তালুক দেওয়া মহিলাদেরও বিধান অনুযায়ী খরচ দিতে হবে। এটা অনিবার্য ঈশ্বরভীরুদের জন্য। (২৪২) এভাবে ঈশ্বর তোমাদের জন্য তাঁর আদেশ স্পষ্ট রূপে বর্ণনা করেন যাতে তোমরা বুঝতে পারো।

(২৪৩) তুমি কি ঐ লোকদের দেখনি যারা মৃত্যুর ভয়ে নিজেদের ঘর-বাড়ী থেকে বের হয়েছিল? আর তাদের সংখ্যা ছিল হাজার হাজার। তখন ঈশ্বর তাদের বলেছিলেন মৃত্যুবরণ কর। তারপর ঈশ্বর তাদের জীবিত করেছিলেন। নিশ্চয়ই ঈশ্বর মানুষের প্রতি অনুগ্রহশীল; কিন্তু অধিকাংশ মানুষ কৃতজ্ঞতা প্রকাশ করে না। (২৪৪) তোমরা ঈশ্বরের পথে লড়াই করো আর জেনে রেখো ঈশ্বর সবকিছু শোনেন, সবকিছু জানেন। (২৪৫) কে আছে যে, ঈশ্বরকে একটি উত্তম ঋণ দিতে পারে? ঈশ্বর তা তার জন্য অনেকগুণ বৃদ্ধি করে দেবেন। ঈশ্বর কমাতে ও পারেন, বাড়াতেও পারেন। আর তোমাদেরকে তারই দিকে প্রত্যাবর্তন করতে হবে।

(২৪৬) তুমি কি মুসার পরে ইস্রায়েলের সন্তানদের নেতাদের দেখনি? যখন তারা তাদের দূতকে বলেছিল আমাদের জন্য একজন রাজা নিযুক্ত করে দিন, আমরা ঈশ্বরের পথে যুদ্ধ করবো। দূত বলেছিলেন এমন হবে না তো যে, তোমাদের উপর যুদ্ধ ধার্য করা হলে তখন তোমরা যুদ্ধ করবে না। তারা বলেছিল এ কিভাবে সম্ভব যে, আমরা লড়াই না ঈশ্বরের পথে। যখন আমাদের ঘর-বাড়ী থেকে বের করে দেওয়া হয়েছে, সন্তান সন্ততিদের নিকট থেকে বিচ্ছিন্ন করা হয়েছে। অতঃপর যখন তাদের প্রতি যুদ্ধের আদেশ হল তখন অল্প কয়েকজন ব্যতীত তারা প্রত্যাখ্যান

করল আর অত্যাচারীদের সম্পর্কে ঈশ্বর সম্যকরূপে অবগত আছেন। (২৪৭) আর তাদের দূত তাদেরকে বললেন ঈশ্বর তালুতকে তোমাদের রাজা নিযুক্ত করেছেন। তারা বললঃ সে আমাদের রাজা হয় কিভাবে? রাজা হওয়ার জন্য তো তার চেয়ে আমরাই বেশী যোগ্য, তার তো পর্যাপ্ত ধন-সম্পদ ও নেই। দূত বললেনঃ ঈশ্বর তোমাদের জন্য তাকেই মনোনিত করেছেন এবং তিনি তাকে পর্যাপ্ত জ্ঞান ও শারীরিক শক্তি প্রদান করেছেন আর ঈশ্বর যাকে ইচ্ছা রাজত্ব দান করেন, ঈশ্বর সর্বব্যাপী মহাজ্ঞানী। (২৪৮) তাদের পয়গম্বর তাদেরকে আরো বলেছিলেনঃ তালুতের রাজা হওয়ার লক্ষণ এই যে, তোমাদের কাছে একটি সিন্দুক আসবে যাতে থাকবে তোমাদের প্রভুর নিকট থেকে আসা প্রশান্তির উপকরণ এবং মূসা (মোজেস) ও হারুনের বংশধরদের রেখে যাওয়া কিছু জিনিষপত্রের অবশিষ্টাংশ। দেবদূতেরা সেটি বহন করে আনবে। এতে তোমাদের জন্য বড় নিদর্শন থাকবে যদি তোমরা বিশ্বাসী হও।

(২৪৯) পরে তালুত যখন সেনা দল নিয়ে বার হলেন তখন তিনি বলেছিলেন ঈশ্বর তোমাদেরকে একটি নদী দ্বারা পরীক্ষা নেবেন। যে ঐ নদীর জল পান করবে সে আমার দলভুক্ত নয়, আর যে তার স্বাদ গ্রহণ করবে না সে আমার দলভুক্ত, অবশ্য যে নিজের হাতের এক অঞ্জলী পরিমাণ নেবে তার কথা আলাদা; কিন্তু অল্প কয়েকজন ছাড়া সবাই জল পান করল। তারপর যখন তালুত ও তাঁর সঙ্গী বিশ্বাসীগণ নদী পার হয়ে গেল তখন তারা বললঃ আজ জালুত (গোলিয়াত) ও তার সেনাদের মোকাবিলা করার ক্ষমতা আমাদের নেই। তবে যারা এ জানতো যে, তাদের ঈশ্বরের সাথে সাক্ষাৎ হবে তারা বললঃ ঈশ্বরের হুকুমে কত ছোট দল বড় দলকে পরাজিত করেছে, ঈশ্বর ধৈর্যশীলদের সঙ্গে আছেন। (২৫০) আর যখন তারা জালুত (গোলিয়াত)

ও তার সেনাদলের মুখোমুখি হল তখন তারা বললঃ হে আমাদের প্রভু ! আমাদের পর্যাণ্ড ধৈর্যদান করুন, আমাদের পা অবিচল রাখুন এবং অবিশ্বাসী লোকদের বিরুদ্ধে আমাদের বিজয়ী করুন। (২৫১) তারপর তারা ঈশ্বরের হুকুমে ওদেরকে পরাজিত করল এবং দাউদ (ডেভিড) জালুত (গোলিয়াত) কে হত্যা করল। আর ঈশ্বর দাউদ (ডেভিড) কে রাজত্ব এবং বিচক্ষণতা প্রদান করেন আর সে যা চাইছিল তা তাকে শিখিয়ে দিলেন। ঈশ্বর যদি কতিপয় মানুষকে কতিপয় মানুষ দ্বারা দমনের ব্যবস্থা না রাখতেন তাহলে পৃথিবীর ভারসাম্য নষ্ট হয়ে যেত; কিন্তু ঈশ্বর জগৎবাসীর প্রতি অত্যন্ত অনুগ্রহশীল।

(২৫২) এগুলো ঈশ্বরের নিদর্শন, আমি তোমার কাছে যথাযথ ভাবে শোনাচ্ছি আর নিঃসন্দেহে তুমি দূতগণের অন্তর্ভুক্ত। (২৫৩) ঐ পয়গম্বরদের মধ্যে আমি কতককে কতকদের উপর শ্রেষ্ঠত্ব দান করেছি। তাদের মধ্যে কিছু আছে যাদের সাথে ঈশ্বর কথা বলেছেন, আবার কতককে উচ্চ মর্যাদা দান করেছেন আর আমি মারইয়ামের পুত্র ঈসাকে প্রকাশ্য নিদর্শনাবলী দান করেছি এবং তাকে সাহায্য করেছি পবিত্র আত্মা দ্বারা। ঈশ্বর যদি চাইতেন তাহলে তার পরবর্তীরা স্পষ্ট আদেশ আসার পরেও হানাহানি করত না। কিন্তু তারা মতভেদ করেছে, অতঃপর তাদের মধ্যে কিছু লোক বিশ্বাস করেছে আর কিছু লোক অবিশ্বাস করেছে, আর যদি ঈশ্বর চাইতেন তাহলে তারা হানাহানি করত না; কিন্তু ঈশ্বর যা চান তাই করেন।

(২৫৪) হে বিশ্বাসীগণ! খরচ কর ঐ জিনিষ হতে যা আমি তোমাদের দিয়েছি, আর সেদিন আসার পূর্বেই যে দিন না কোন লেনদেন থাকবে, না কোন বন্ধুত্ব থাকবে আর না কোন সুপারিশ, আর অবিশ্বাসীরাই অত্যাচারী। (২৫৫) ঈশ্বর ব্যতীত কোনই উপাস্য নেই। তিনি চিরঞ্জীব, সমস্ত জগতের প্রতিপালক। তিনি তন্দ্রা বা নিদ্রায় আচ্ছন্ন হন না। আসমান ও পৃথিবীতে

যা কিছু সবই তাঁর। কে আছে যে তাঁর নিকটে তাঁর অনুমতি ছাড়া সুপারিশ করতে পারে? তিনি সবই জানেন যা কিছু তাঁর সামনে আছে আর যা কিছু তাঁর পিছনে। তিনি যতটুকু চান তাছাড়া তাঁর অনন্ত জ্ঞানের কোন বিষয়ই কেউ আয়ত্ত্ব করতে পারে না। তাঁর সিংহাসন আকাশ ও পৃথিবী পরিব্যাপ্ত করে আছে। এই দুইয়ের সংরক্ষণে তিনি ক্লান্ত হন না। তিনিই সর্বোচ্চ, মহামহিম। (২৫৬) ধর্মের ব্যাপারে কোন জবরদস্তি নেই। ভ্রান্তপথ হতে সঠিক পথ সুস্পষ্ট হয়ে গেছে। অতএব যে ব্যক্তি শয়তানের নেতৃত্ব অমান্য করে এবং ঈশ্বরের প্রতি বিশ্বাস স্থাপন করে সে দৃঢ়তর রজ্জু ধারণ করলো যা ছিন্ন হওয়ার নয় এবং ঈশ্বর শ্রবণকারী ও মহাজ্ঞানী। (২৫৭) ঈশ্বর বিশ্বাসীদের অভিভাবক। তিনি তাদের অন্ধকার থেকে আলোর দিকে নিয়ে আসেন, আর যারা অবিশ্বাসী তাদের বন্ধু শয়তান, সে তাদের আলো থেকে অন্ধকারে নিয়ে যায়। এরা নরকের অধিবাসী সেখানে তারা চিরকাল থাকবে।

(২৫৮) তুমি কি তাকে দেখনি যে ইবরাহীমের (আব্রাহামের) সঙ্গে তার প্রতিপালকের সম্মুখে তর্ক-বিতর্ক করেছিল, কেননা ঈশ্বর তাকে রাজত্ব প্রদান করেছিলেন। যখন ইবরাহীম (আব্রাহাম) বলেছিল আমার প্রভু তিনি যিনি জীবিত করেন ও মৃত্যু দান করেন। সে বলেছিল আমিও জীবন দান করি এবং মৃত্যু ঘটাই। ইবরাহীম (আব্রাহাম) বলেছিল ঈশ্বর সূর্যকে পূর্ব দিকে উদিত করান। তুমি ওটাকে পশ্চিম দিকে উদিত করাও। তখন সেই অস্বীকারকারী স্তব্ধ (হতবাক) হয়ে গেল। আর ঈশ্বর অত্যাচারীদের পথ দেখান না।

(২৫৯) অথবা ঐ ব্যক্তির মতো, যে একটি গ্রামে গিয়েছিল আর সেই গ্রামের বাড়ীঘরগুলি বিধ্বস্ত অবস্থায় ছিল, সে বলেছিলঃ এই গ্রামটিকে মৃত্যুর পর ঈশ্বর পুনরায় কিভাবে জীবিত করবেন? এরপর ঈশ্বর তাকে একশত বৎসরের জন্য মৃত্যু দিলেন। অতঃপর তাকে পুনরায় জীবিত করলেন। ঈশ্বর

জিজ্ঞাসা করলেন তুমি এই অবস্থায় কতক্ষণ ছিলে? সে বলল একদিন বা তার চেয়ে কিছু কম। ঈশ্বর বললেন : না, বরং তুমি একশত বৎসর এই অবস্থায় অতিবাহিত করেছো। এখন তুমি তোমার খাদ্য সামগ্রী ও পানীয় দ্রব্যের দিকে তাকাও ওগুলি নষ্ট হয় নি, আর তোমার গাথাটির দিকে তাকাও। আমি তোমাকে মানুষের জন্য একটি নিদর্শন বানাতে চাই। আর হাড়গুলির দিকে তাকিয়ে দেখ আমি কিভাবে ওগুলি দিয়ে আমি একটি কাঠমো তৈরী করি, তারপর ওতে মাংস দিয়ে ঢেকে দিই। যখন ব্যাপারটি তার কাছে স্পষ্ট হয়ে গেল তখন সে বলল আমি জানি নিঃসন্দেহে ঈশ্বর সবকিছুই করতে সক্ষম। (২৬০) যখন ইবরাহীম (আব্রাহাম) বলেছিলঃ হে আমার প্রভু! আমাকে দেখান আপনি কিভাবে মৃতকে জীবিত করবেন? ঈশ্বর বললেন কেন তুমি কি বিশ্বাস কর না? সে বললঃ হ্যাঁ তবে মনের প্রশান্তির জন্য, তিনি বললেন আচ্ছা তাহলে চারটি পাখি নাও এবং তাদেরকে তোমার পোষ মানাও। এবং তাদের প্রত্যেককে টুকরো করে পাহাড়ের উপর রেখে দাও অতঃপর তাদের ডাক দাও, তারা তোমার কাছে ছুটে আসবে। আর জেনে রেখো, ঈশ্বর পরাক্রমশালী, প্রজ্ঞাময়।

(২৬১) যারা তাদের সম্পত্তি ঈশ্বরের পথে খরচ করে, তাদের উপমা এমন একটি বীজের মতো যা থেকে সাতটি শিশু উৎপন্ন হল আর প্রত্যেক শিশু একশটি করে বীজ হল। ঈশ্বর যাকে চান তার সম্পদ বহুগুণ বৃদ্ধিকরে দেন। আর ঈশ্বর পরম দাতা, মহাজ্ঞানী। (২৬২) যারা তাদের পুঁজী ঈশ্বরের পথে খরচ করে এবং ব্যায় করার পরে খোঁটা দেয় না বা কষ্ট দেয়না তার জন্য তার প্রভুর নিকটে বিনিময় রয়েছে। তাদের কোন ভয় নেই, আর তারা দুঃখিত হবে না। (২৬৩) সঠিককথা বলে দেওয়া এবং ক্ষমা প্রদর্শন করা ঐ দান অপেক্ষা উত্তম যারপরে কষ্ট দেওয়া হয় আর ঈশ্বর সম্পদশালী, সহনশীল।

(২৬৪) হে বিশ্বাসীগণ! খোঁটা কিংবা কষ্ট দিয়ে নিজের দানকে নষ্ট করো না, যেভাবে ঐ ব্যক্তি লোক দেখানোর জন্য সম্পদ ব্যয় করে এবং ঈশ্বর ও পরলোকে বিশ্বাস করে না। অতএব ওদের উপমা এমন একটি পাথরের মতো যার উপর কিছু মাটি আছে অতঃপর তার উপরে মুষলধারে বৃষ্টি হল আর পাথরটি সম্পূর্ণ ভাবে পরিষ্কার হয়ে গেল। এমন লোকেরা স্বীয় কৃতকার্যের ফল কিছুই পাবে না। আর ঈশ্বর অস্বীকারকারীদের পথ দেখান না।

(২৬৫) বরং যারা নিজেদের সম্পদ ঈশ্বরের সম্ভৃতি লাভের জন্য এবং নিজেদের আস্থা সুদৃঢ় করার জন্য ঈশ্বরের পথে খরচ করে তাদের উপমা একটি টিলার উপর অবস্থিত বাগানের মতো, তার উপরে মুষলধারে বৃষ্টি হলে তার ফসলও দ্বিগুণ হয়ে যায়। আর যদি অধিক বৃষ্টিপাত না হয় তাহলে হালকা বৃষ্টিপাতই যথেষ্ট। আর যা কিছু তোমরা কর ঈশ্বর তা দেখছেন। (২৬৬) তোমাদের মধ্যে কেউ কি এ পছন্দ করবে যে তার কাছে খেজুর ও আঙুরের একটি বাগান থাক, যার নীচে নদী প্রবাহিত হচ্ছে, তাতে তার জন্য সমস্ত প্রকার ফল থাক, তার সন্তান-সন্ততি দুর্বল থাকতেই সে বৃদ্ধ হয়ে যাক, এ অবস্থায় তার বাগানে হঠাৎই এক অগ্নিময় ঘূর্ণিবায়ু সব কিছু জ্বালিয়ে দিক? ঈশ্বর এভাবেই তোমাদের জন্য নির্দশন সমূহ স্পষ্ট রূপে বর্ণনা করেন যাতে তোমরা চিন্তা কর।

(২৬৭) হে বিশ্বাসীগণ! তোমরা স্বীয় উপার্জন থেকে এবং যা আমি তোমাদের জন্য ভূমি থেকে উৎপন্ন করেছি, তা থেকে উৎকৃষ্ট বস্তু ব্যয় করো এবং তা থেকে নিকৃষ্ট বস্তু ব্যয় করতে মনস্থ করো না। কেননা তোমরা নিজেরাই চোখ বন্ধ না করে তা নিতে চাইবে না। জেনে রেখো ঈশ্বর অবশ্যই অভাবমুক্ত ও প্রশংসিত। (২৬৮) শয়তান তোমাদেরকে দারিদ্রের ভয় দেখায় আর অশ্লীল কাজের আদেশ দেয়। আর ঈশ্বর তোমাদিগকে তাঁর পক্ষ হতে

ক্ষমা ও অনুগ্রহের প্রতিশ্রুতি দেন। ঈশ্বর সর্বব্যাপী, সুবিজ্ঞ। (২৬৯) তিনি যাকে ইচ্ছা হিকমত বা প্রজ্ঞা দান করেন এবং যে ব্যক্তি প্রজ্ঞা প্রাপ্ত হয়, নিঃসন্দেহে সে মহাসম্পদ প্রাপ্ত হয়। বস্তুত প্রজ্ঞাবান ব্যক্তি ব্যতীত কেইই উপলব্ধি করতে পারে না।

(২৭০) তোমরা যা খরচ কর বা যা কিছু মানত কর তা ঈশ্বর জানেন আর অত্যাচারীদের কোন সাহায্যকারী নেই। (২৭১) যদি তোমরা প্রকাশ্যে দান কর তাহলে তা উত্তম; যদি গোপনে দান কর এবং তা অভাবগ্রস্তদের দিয়ে দাও তা তোমাদের জন্য অতি উত্তম এবং এর দ্বারা তোমাদের কিছু দুষ্কর্ম বিদূরিত হবে। বস্তুত তোমরা যা করো ঈশ্বর তার খবর রাখেন। (২৭২) তাদেরকে সুপথে আনার দায় তোমায় নয়; বরং ঈশ্বর যাকে চান সুপথ দেখান। আর তোমরা যে সম্পদ ব্যয় কর তা নিজেদের জন্য এবং একমাত্র ঈশ্বরের সন্তুষ্টির উদ্দেশ্যে ব্যয় কর। আর তোমরা যে সম্পদ ব্যয় করবে তার পুরস্কার পরিপূর্ণরূপে পেয়ে যাবে। আর ওতে তোমাদের জন্য কোন অন্যায় করা হবে না। (২৭৩) দান সেই অভাবগ্রস্তদের জন্য যারা ঈশ্বরের পথে এমনভাবে ব্যপ্ত হয়ে আছে যে ব্যক্তিগত জীবিকার জন্য পৃথিবীতে দৌড়-ঝাঁপ করতে পারে না। যারা জানে না, তারা তাদেরকে ধনবান মনে করে, কারন তারা মানুষের কাছে কিছু চায়না। তাদের দেখে তুমি তাদের চিনতে পারবে না। তোমরা যে সম্পদ ব্যয় কর ঈশ্বর তা ভাল করেই জানেন। (২৭৪) যারা রাতে ও দিনে গোপনে ও প্রকাশ্যে নিজেদের সম্পদ ব্যয় করে, তাদের জন্য তাদের প্রভুর নিকট প্রতিফল আছে। আর তাদের কোন ভয় নেই, তারা দুঃখিত হবে না।

(২৭৫) যারা সুদ খায় তারা কিয়ামতের দিনে শয়তানের স্পর্শে উন্মত্ত মানুষের মত উঠবে। কারণ, তারা বলে, কেনা-বেচা তো এক প্রকার সুদ

খাওয়ার মতোই। কিন্তু ঈশ্বর ব্যবসাকে বৈধ করেছেন আর সুদকে অবৈধ করেছেন। অতএব প্রভুর কাছে থেকে উপদেশ আসার পর যে সুদ গ্রহণ বন্ধ করেছে তাহলে পূর্বে যা কিছু গৃহীত হয়েছে তা তারই থাকবে। এ বিষয়টির নিষ্পত্তি ঈশ্বরের উপরই ন্যস্ত থাকবে। আর যে ব্যক্তি পুনরায় সুদ গ্রহণ করবে, তারা অগ্নিকুণ্ডের বাসিন্দা হবে, তারা সেখানে চিরকাল বাস করবে। (২৭৬) ঈশ্বর সুদকে বিলুপ্ত করেন আর দানকে বর্ধিত করেন। আর ঈশ্বর কৃতঘ্নদের ও পাপীদের পছন্দ করেন না। (২৭৭) নিঃসন্দেহে যারা বিশ্বাস স্থাপন করে ও সৎকর্ম করে এবং যথাযথ প্রার্থনা করে, উদ্বৃত্ত সম্পদ থেকে আবশ্যিক দান প্রদান করে তাদের জন্য তাদের প্রভুর নিকট প্রতিফল আছে। তাদের কোন ভয় নেই এবং তারা দুঃখিত হবে না।

(২৭৮) হে বিশ্বাসীগণ! ঈশ্বরকে ভয় কর, এবং যে সুদ বকেয়া আছে তা ছেড়ে দাও, যদি তোমরা ঈশ্বরের উপর আস্থাবান হও। (২৭৯) যদি তোমরা এরকম না কর তাহলে সাবধান হও ঈশ্বর ও তার বার্তাবাহকের তরফ থেকে যুদ্ধ ঘোষণার জন্য। আর যদি তোমরা ক্ষমা প্রার্থনা করো তাহলে তোমাদের মূলধন তোমাদের থাকবে। তোমরা কারো প্রতি অন্যায় করো না তোমাদের প্রতি ও অন্যায় করা হবে না। (২৮০) আর যদি কোন ব্যক্তি অভাবগ্রস্ত হয় তাহলে তার সচ্ছলতা আসা পর্যন্ত অবকাশ দাও। আর যদি মাফ করে দাও তাহলে এটাই তোমাদের জন্য অধিক উত্তম। যদি তোমরা বোঝ। (২৮১) আর ঐ দিনকে ভয় কর যে দিন তোমাদেরকে ঈশ্বরের কাছে ফিরিয়ে আনা হবে। অতঃপর প্রত্যেক ব্যক্তি কৃতকর্মের পূর্ণ প্রতিফল পেয়ে যাবে, তাদের প্রতি কোন অবিচার হবে না।

(২৮২) হে বিশ্বাসীগণ! যদি তোমরা কোন নির্দিষ্ট মেয়াদ অবধি ঋণের লেনদেন কর তাহলে সেটা লিখে রাখবে। তোমাদের মধ্যে থেকে

কেউ সেটা যেন ন্যায় সঙ্গত ভাবে লেখে। লেখক যেন লিখতে অস্বীকার না করে, যেমন ঈশ্বর তাকে শিখিয়েছেন তেমনই সে যেন লিখে দেয়। ঋণ গ্রহীতা লেখাবে। আর সে ভয় করুক ঈশ্বরকে যিনি তার প্রভু, আর সে যেন এতে এতটুকু কম না লেখায়। ঋণ গ্রহীতা যদি মুর্থ হয় বা দুর্বল হয় অথবা নিজে লেখাতে অক্ষম হয় তাহলে তার অভিভাবক যেন ন্যায় সঙ্গত ভাবে লিখিয়ে দেয় এবং নিজেদের মধ্যে হতে দুজন পুরুষ ব্যক্তিকে সাক্ষী বানিয়ে নেয়। যদি দুজন পুরুষ না পাওয়া যায়, তাহলে একজন পুরুষ ও দুই জন মহিলাকে বেছে নাও যাদেরকে তুমি সাক্ষি হিসাবে অনুমোদন দিতে চাও। যদি একজন মহিলা ভুলে যায় তাহলে দ্বিতীয়জন যাতে স্মরণ করিয়ে দিতে পারে। আর সাক্ষীদের ডাকা হলে তারা যেন অস্বীকার না করে। আর লেন-দেন ছোট হোক বা বড়, মেয়াদ উল্লেখ করে তা লিখতে অলসতা করো না, আর এই লিখে নেওয়া ঈশ্বরের নিকট অধিক ন্যায় সঙ্গত এবং সাক্ষকে অধিক সুসংহত রাখে এবং এটা তোমাদের মধ্যে সন্দেহের উদ্বেক না হওয়ার পক্ষে অধিক অনুকূল হয়। কিন্তু যদি কোন লেনদেন হাতে হাতে হয় যেমন তোমরা পরস্পর করে থাকো, তাহলে তোমাদের উপর কোন দোষ নেই যদি তোমরা না লেখ; কিন্তু যখন সওদা করবে তখন সাক্ষী রাখবে। আর কোন লেখককে বা কোন সাক্ষীকে কষ্ট দিও না, আর যদি এমন কর তাহলে এটা তোমাদের জন্য বড় অপরাধ হবে। আর ঈশ্বরকে ভয় কর। ঈশ্বর তোমাদের শেখান, তিনি সর্ব বিষয়ে জানেন। (২৮৩) আর যদি তোমরা ভ্রমণরত অবস্থায় থাকো আর লেখার লোক না পাও তাহলে কোন জিনিষ বন্ধক রেখে সমস্যা মেটাও। আর যদি একে অপরকে বিশ্বাস করে, তাহলে যার প্রতি বিশ্বাস করা হয়েছে সে যেন বিশ্বাসের পূর্ণ মর্যাদা রাখে। আর ঈশ্বরকে ভয় কর যিনি তোমাদের প্রভু। আর সাক্ষ্য গোপন

করো না, আর যে গোপন করবে তার অন্তর অপরাধী হয়ে যাবে, আর যা কিছু তোমরা কর ঈশ্বর সবই জানেন।

(২৮৪) আকাশ ও পৃথিবীতে যা কিছু আছে সবই ঈশ্বরের। তোমরা নিজের মনের কথা প্রকাশ কর অথবা গোপন কর, ঈশ্বর তোমাদের নিকট তার হিসাব নেবেন। অতঃপর তিনি যাকে খুশি ক্ষমা করবেন যাকে খুশি শাস্তি দেবেন। আর ঈশ্বর সবকিছু করতে সক্ষম। (২৮৫) বার্তাবাহক তার প্রভুর নিকট হতে তার প্রতি যা অবতীর্ণ হয়েছে তা বিশ্বাস করে এবং বিশ্বাসীরাও (তা বিশ্বাস করে)। সবাই বিশ্বাস রাখে ঈশ্বরের প্রতি, তাঁর দেবদূতগণের প্রতি, তাঁর গ্রন্থ সমূহের প্রতি, তাঁর বার্তাবাহকগণের প্রতি। আমরা তাঁর বার্তাবাহকগণের কারো মধ্যে পার্থক্য করি না। আর তারা বলে আমরা শুনলাম আর মেনে নিলাম। হে আমাদের প্রভু! আমরা আপনার কাছে ক্ষমা প্রার্থনা করি, আর আপনারই দিকে আমাদের ফিরতে হবে। (২৮৬) ঈশ্বর কারো উপর সাধ্যের অধিক দায়িত্ব দেন না। সে যা উপার্জন করে সে তার ফল প্রাপ্ত হয়। আর সে যা অন্যায় করে তার ও ফল সে ভোগ করবে। হে আমাদের প্রতিপালক! যদি আমরা ভুলে যাই বা ভুল করি তবে আমাদের অপরাধী করবেন না। হে আমাদের প্রতিপালক! আমাদের উপর বোঝা চাপাবেন না যেমন আপনি আমাদের পূর্ববর্তীদের উপর বোঝা চাপিয়েছিলেন। হে আমাদের প্রভু! আমাদের এমন দায়িত্ব দেবেন না যা পালন করার ক্ষমতা আমাদের নেই। আর আমাদের ক্ষমা করে দিন, আমাদের উপর দয়া করুন। আপনিই আমাদের অভিভাবক। অতএব অবিশ্বাসীদের মোকাবিলায় আমাদের সাহায্য করুন।

অধ্যায় ৩ : আল ইমরান (ইমরান পরিবার)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-মীম, (২) ঈশ্বর ছাড়া কোন উপাস্য নেই, তিনি চিরঞ্জীব, অবিনশ্বর, জগতের সংরক্ষক। (৩) তিনি তোমার উপর মহাসত্যসহ মহাগ্রন্থ অবতীর্ণ করেছেন, ঐ গ্রন্থের সমর্থক হিসাবে যা ইতিপূর্বে অবতীর্ণ হয়েছে। আর তিনি তৌরাত (তোরাহ) এবং ইঞ্জিল (বাইবেল) অবতীর্ণ করেছেন। (৪) ইতিপূর্বে মানুষের পথ-নির্দেশের জন্য, আর ঈশ্বর ফুরকান (সত্য-মিথ্যার পার্থক্যকারী গ্রন্থ) অবতীর্ণ করেছেন। নিঃসন্দেহে যারা ঈশ্বরের নিদর্শন সমূহ অবিশ্বাস করে তাদের জন্য কঠোর শাস্তি রয়েছে। আর ঈশ্বর পরাক্রমশালী, প্রতিশোধ গ্রহণকারী। (৫) নিঃসন্দেহে ঈশ্বরের নিকটে পৃথিবীর বা আকাশের কোন কিছুই গোপন নেই। (৬) তিনিই তোমাদের মাতৃগর্ভে স্বীয় ইচ্ছানুযায়ী আকৃতি গঠন করেন। তিনি ছাড়া কোন উপাস্য নেই, তিনি পরাক্রমশালী, পরম প্রাজ্ঞ।

(৭) তিনিই তোমার উপর গ্রন্থ অবতীর্ণ করেছেন। তাতে কিছু বাণী স্পষ্ট, এগুলোই গ্রন্থের মূল অংশ এবং অন্য অংশ রূপকধর্মী। অতএব যাদের অন্তরে কুটিলতা আছে তারা মতানৈক্য ও অপব্যখ্যার উদ্দেশ্যে রূপকধর্মী অংশগুলো অনুসরণ করে। অথচ এর অন্তর্নিহিত অর্থ ঈশ্বর ছাড়া কেউ জানে না। আর যারা সুগভীর জ্ঞানের অধিকারী তারা বলে আমরা এগুলো বিশ্বাস করেছি। সবই আমাদের প্রভুর তরফ হতে এসেছে। আর উপদেশ ঐ লোকেরাই গ্রহণ করে যারা বুদ্ধিমান। (৮) হে আমাদের প্রতিপালক! আমাদের অন্তরকে বিপথগামী করবেন না, যখন আপনি আমাদেরকে পথ

দেখিয়েছেন। আর আপনার পক্ষ হতে আমাদের উপর দয়া করুন। নিঃসন্দেহে আপনিই সবকিছু প্রদানকারী। (৯) হে আমাদের প্রভু! আপনি একদিন সবাইকে একত্রিত করবেন, সেদিন সম্পর্কে কোন সন্দেহ নেই। নিশ্চয়ই ঈশ্বর প্রতিশ্রুতি ভঙ্গ করেন না।

(১০) নিঃসন্দেহে যারা অবিশ্বাসের নীতি অবলম্বন করেছে তাদের ধন-সম্পদ, তাদের সন্তান-সন্ততি ঈশ্বরের নিকট তাদের কোনই কাজে আসবে না আর এরাই হবে নরকের ইন্ধন। (১১) এদের পরিণাম ঐ রকমই হবে যেমন ফিরাউন সম্প্রদায় এবং তাদের পূর্ববর্তীদের হয়েছিল। তারা আমার নিদর্শন সমূহ অস্বীকার করেছিল, এজন্য ঈশ্বর তাদের পাপের কারণে পাকড়াও করেছিলেন। আর ঈশ্বর কঠোর শাস্তি দাতা। (১২) অস্বীকারকারীদের বলে দাও, অচিরেই তোমরা পরাভূত হবে এবং তোমাদেরকে নরকের দিকে নিয়ে যাওয়া হবে আর ওটা নিকৃষ্টতর স্থান। (১৩) নিঃসন্দেহে তোমাদের জন্য শিক্ষণীয় ঐ দুই দলের যাদের মধ্যে (বদরের ময়দানে) যুদ্ধ হয়েছিল। একটি দল ঈশ্বরের রাস্তায় যুদ্ধ করেছিল আর অন্যদল অবিশ্বাসী ছিল। এই অবিশ্বাসীরা খোলা চোখে তাদেরকে দ্বিগুণ দেখছিল। আর ঈশ্বর যাকে চান স্বীয় সাহায্য দ্বারা শক্তিদান করেন। এতে দৃষ্টি সম্পন্নদের জন্য শিক্ষা রয়েছে।

(১৪) মানুষের জন্য পার্থিব চাহিদগুলি নারী, সন্তান, স্বর্ণ-রৌপ্য, ছাপযুক্ত ঘোড়া, গবাদী পশু এবং ক্ষেত-খামারের মাধ্যমে আকর্ষণীয় করা হয়েছে। এসব হল পার্থিব জীবনের ভোগ্য সামগ্রী। আর ঈশ্বরের নিকটে উত্তম ঠিকানা রয়েছে। (১৫) বলঃ আমি কি তোমাদের এর চেয়েও ভাল কিছুর কথা বলবো? ঐ লোকদের জন্য যারা ঈশ্বরভীরু, তাদের প্রতিপালকের নিকট এমন উদ্যান আছে যার পাদদেশ দিয়ে নদী প্রবাহিত হবে। তারা

সেখানে চিরকাল থাকবে। আরও রয়েছে পবিত্র সঙ্গিনীরা (অঙ্গরা) ও ঈশ্বরের সন্তুষ্টি। ঈশ্বর বান্দাদের সবকিছু প্রত্যক্ষ করছেন। (১৬) যারা বলেঃ হে আমাদের প্রভু! আমরা বিশ্বাস স্থাপন করেছি, অতএব আপনি আমাদের পাপ সমূহ ক্ষমা করুন আর আমাদের নরকের যন্ত্রণা হতে রক্ষা করুন। (১৭) তারা ধৈর্যশীল, সত্যবাদী, অনুগত এবং দানশীল ও শেষ রাতে ক্ষমা প্রার্থনাকারী।

(১৮) ঈশ্বর স্বয়ং সাক্ষী আর দেবদূতও জ্ঞানীগণ সাক্ষী যে, ঈশ্বর ছাড়া কোন উপাস্য নাই। তিনি পরাক্রমশালী প্রজ্ঞাময়। (১৯) নিশ্চয় ঈশ্বরের নিকট পরিপূর্ণ আত্মসমর্পণই একমাত্র মনোনিত ধর্ম। আর যাদের গ্রন্থ দেওয়া হয়েছে তারা পরস্পর বিদ্রোহবশতঃ মতভেদ করেছে তাদের নিকট সত্য জ্ঞান আসার পরেও। যারা ঈশ্বরের নিদর্শন সমূহ অস্বীকার করে, নিশ্চয়ই ঈশ্বর অতি শীঘ্র তাদের হিসাব নেবেন। (২০) পুনরায় যদি তারা এ সম্বন্ধে তোমার সাথে বিতর্ক করে তাহলে ওদের বলে দাও যে, আমি নিজেকে ঈশ্বরের কাছে সমর্পণ করেছি আর আমার অনুসারীরাও। যারা গ্রন্থধারী ও যারা নিরক্ষর তাদের জিজ্ঞাসা কর তোমরাও কি এভাবে আত্মসমর্পণ করেছে? যদি তারাও আত্মসমর্পণ করে তাহলে তারা পথ পেয়ে গেল। আর যদি তারা মুখ ফিরিয়ে চলে যায় তাহলে তোমার দায়িত্ব কেবল পৌঁছে দেওয়া। আর ঈশ্বর বান্দাদের সবকিছু দেখেন। (২১) যারা ঈশ্বরের নিদর্শন সমূহ অবিশ্বাস করে, পয়গম্বরদের অন্যায়ভাবে হত্যা করে এবং ন্যায়ের আদেশদানকারী লোকদের হত্যা করে তাদেরকে এক কষ্টদায়ক শাস্তির কথা জানিয়ে দাও। (২২) এরাই সেই লোক যাদের কর্ম ইহলোক ও পরলোকে নিষ্ফল হয়ে গেছে আর তাদের কোন সাহায্যকারী নেই।

(২৩) তুমি কি ওদের দেখনি? যাদেরকে গ্রন্থের একটি অংশ

দেওয়া হয়েছিল। যখন ওদেরকে প্রভুর গ্রন্থের দিকে আহ্বান করা হলো, অতঃপর ওদের একদল বিমুখ হয়ে চলে গেল এবং তারা বিমুখতা অবলম্বনকারী। (২৪) তার কারণ, তারা বলে, “মাত্র সীমিত কয়েকদিন ছাড়া নরকের আগুন আমাদের স্পর্শ করবে না।” নিজেদের ধর্ম সম্পর্কে তাদের বানানো কথা তাদের ধোঁকায় ফেলে দিয়েছে। (২৫) তখন কি হবে? যখন আমি তাদেরকে সমবেত করবো, যাতে কোন সন্দেহ নেই। আর প্রত্যেক ব্যক্তিকে তার কৃতকর্মের প্রতিদান পূর্ণভাবে দেওয়া হবে। কারো প্রতি অবিচার করা হবে না। (২৬) তুমি বলঃ হে ঈশ্বর! সম্রাজ্যের স্বামী, আপনি যাকে ইচ্ছা রাজত্ব দান করেন। আর যার নিকট থেকে ইচ্ছা রাজত্ব ছিনিয়ে নেন। আর আপনি যাকে ইচ্ছা সম্মান প্রদান করেন আর যাকে ইচ্ছা অপমানিত করেন, আপনার হাতেই কল্যাণ, নিঃসন্দেহে আপনি সবকিছু করতে সক্ষম। (২৭) আপনি দিনের মধ্যে রাত আর রাতের মধ্যে দিন প্রবেশ করান। আর আপনি প্রাণহীন হতে প্রাণবানকে বার করেন এবং আপনিই প্রাণবান হতে প্রাণহীনকে বার করেন। আপনি যাকে ইচ্ছা অটল জীবিকা দান করেন।

(২৮) বিশ্বাসীগণের উচিত বিশ্বাসীগণের পরিবর্তে অবিশ্বাসীগণকে বন্ধুরূপে গ্রহণ না করা। এবং তাদের অনিষ্ট হতে আত্মরক্ষা ব্যতীত যে এরূপ করে ঈশ্বরের সঙ্গে তাদের কোন সম্পর্ক নাই; আর ঈশ্বর তোমাদেরকে তাঁর ব্যাপারে সতর্ক করেছেন। ঈশ্বরের দিকেই প্রত্যাবর্তন করতে হবে।^১

^১ বিঃ দ্রঃ - (৩ঃ২৮) একজন বিশ্বাসী, মুসলমান ও অমুসলমান নির্বিশেষে সকলের সঙ্গে নিরপেক্ষতা ও সততাপূর্ণ সম্পর্ক বজায় রাখে। কিন্তু যে সমস্ত অমুসলমান ইসলামের সঙ্গে সংঘর্ষে লিপ্ত তাদের সঙ্গে বন্ধুত্ব করা বিধিসম্মত নয়।

(২৯) তুমি বলঃ যা কিছু তোমাদের মনে আছে তা গোপন কর বা প্রকাশ কর, ঈশ্বর সবই জানেন। এবং আকাশ ও পৃথিবীতে যা কিছু আছে তাও জানেন। সর্ব বস্তুতেই ঈশ্বরের প্রভুত্ব। (৩০) যে দিন প্রত্যেক ব্যক্তি তার উপার্জিত পুণ্য তার সামনে দেখতে পাবে এবং যা কিছু মন্দ করেছে তাও। তখন সে ইচ্ছা করবে - যদি তার মধ্যে আর ওই দিনের মধ্যে সুদূর ব্যবধান হতো ! আর ঈশ্বর নিজের সম্পর্কে তোমাদেরকে সতর্ক করেন। ঈশ্বর আপন বান্দার প্রতি অত্যন্ত স্নেহশীল। (৩১) বলঃ যদি তোমরা ঈশ্বরকে ভালবাস তাহলে আমার অনুসরণ কর, ঈশ্বর তোমাদের ভালবাসবেন। আর তোমাদের পাপসমূহ ক্ষমা করবেন। ঈশ্বর পরম ক্ষমাশীল ও অতি দয়ালু। (৩২) বলঃ তোমরা ঈশ্বর আর বার্তাবাহকের অনুসরণ কর; কিন্তু এর পরেও যদি তারা মুখ ফিরিয়ে নেয় তাহলে ঈশ্বর সত্য অস্বীকারকারীদের ভালোবাসেন না।

(৩৩) নিঃসন্দেহে ঈশ্বর আদমকে, নূহকে (নোয়াহ), ইবরাহীমের (আব্রাহামের) পরিবার পরিজনদের এবং ইমরানের পরিবার পরিজনদের সমগ্র বিশ্বে মনোনীত করেছেন। (৩৪) এরা একে অপরের বংশধর। ঈশ্বর সবই শোনেন, সবই জানেন। (৩৫) যখন ইমরানের স্ত্রী বললঃ হে আমার প্রভু! আমার গর্ভে যে সন্তান রয়েছে তা আমি একান্তভাবে আপনার জন্য উৎসর্গ করলাম। আমার পক্ষ হতে আপনি তা গ্রহণ করুন। নিঃসন্দেহে আপনি মহাশ্রোতা, মহাজ্ঞানী। (৩৬) তারপর সে যখন তাকে প্রসব করল তখন বললঃ হে আমার প্রভু! আমি তো কন্যা সন্তান প্রসব করেছি। সে যা প্রসব করেছে তাতো ঈশ্বরই ভাল জানেন, আর পুরুষ তো নারীর মত নয়। আমি তার নাম রেখেছিলাম মারইয়াম (মেরী) আর আমি তাকে ও তার সন্তান-সন্ততিকে প্রত্যাখ্যাত শয়তানের প্রভাব থেকে রক্ষার জন্য আপনার আশ্রয়ে সমর্পণ করছি। (৩৭) অতঃপর তার প্রভু তাকে ভালভাবে গ্রহন

করেন এবং উত্তমরূপে লালনপালন করেন এবং যাকারিয়াকে তার অভিভাবক করেন। যাকারিয়া যখনই তাকে দেখতে কক্ষ প্রবেশ করত তখনই তার কাছে খাদ্য সামগ্রী দেখতে পেত। সে জিজ্ঞাসা করল হে মারইয়াম (মেরী)! এসব জিনিস তুমি কোথা থেকে পাও? মারইয়াম (মেরী) বলেছিলঃ এসব ঈশ্বরের নিকট হতে। নিঃসন্দেহে ঈশ্বর যাকে চান অটল জীবিকা দান করেন। (৩৮) ঐ সময় যাকারিয়া আপন প্রভু কে আহ্বান করল। সে বললঃ হে আমার প্রভু! আমাকে আপনার নিকট হতে পবিত্র সন্তান দান করুন। নিঃসন্দেহে আপনি প্রার্থনা শ্রবণকারী। (৩৯) অতঃপর সে যখন কক্ষের মধ্যে প্রার্থনায় দণ্ডায়মান হল তখন দেবদূতেরা তাকে সম্বোধন করে বলেছিলঃ ঈশ্বর তোমাকে ইয়াহইয়া (জন) সম্বন্ধে সু-সংবাদ দিচ্ছেন যে, তিনি ঈশ্বরের বাণীর সমর্থক হবেন। নেতা হবেন, স্বীয় প্রবৃত্তিকে উত্তমরূপে দমনকারী হবেন এবং বার্তাবাহক (পয়গম্বর) ও সৎমানুষ হবেন। (৪০) যাকারিয়া বললঃ হে প্রভু! আমার পুত্র কিভাবে হবে? আমার যে বার্ষিক্য এসে গেছে আর আমার স্ত্রীও বন্ধ্যা। বললঃ এভাবেই ঈশ্বর করে থাকেন তিনি যা ইচ্ছা করেন। (৪১) যাকারিয়া বলেছিলঃ হে প্রভু! আমার জন্য কোন নিদর্শন নির্ধারিত করে দিন। তিনি বললেনঃ তোমার জন্য নিদর্শন হবে এই যে, তুমি তিন দিন পর্যন্ত মানুষের সাথে ইশরায় ছাড়া কথা বলতে পারবে না। বেশী করে তোমার প্রভুকে স্মরণ কর এবং সকাল সন্ধ্যা তাঁরই স্তুতি কর। (৪২) আর যখন দেবদূতগণ বলেছিলঃ মারইয়াম (মেরী)! ঈশ্বর তোমাকে মনোনীত করেছেন এবং তোমাকে পবিত্র করেছেন, আর পৃথিবীর নারীদের মধ্যে তোমাকেই বেছে নিয়েছেন। (৪৩) হে মারইয়াম (মেরী)! তোমার প্রভুর অনুগত হও এবং সিজদা (প্রণতি জ্ঞাপন) কর, আর মস্তক অবণতকারীদের সাথে মস্তক অবনত কর। (৪৪) এটা একটা অদৃশ্যের সংবাদ যা আমি তোমাকে অবহিত

করছি। তাদের মধ্যে কে মারইয়ামের (মেরী) লালন-পালনের দায়িত্ব নেবে তা ঠিক করার জন্য প্রতিযোগীতা করছিল। আর তখনও তুমি তাদের কাছে ছিলে না, যখন তারা (এ বিষয়ে) কলহ করছিল।

(৪৫) যখন দেবদূতেরা বলেছিল, হে মারইয়াম (মেরী)! ঈশ্বর তোমাকে সুসংবাদ দিচ্ছেন তাঁর একটি নিদর্শনের যার নাম মারইয়াম (মেরী) পুত্র মসীহ (যিশু)। সে এই জগতে ও পরলোকে মর্যদাবান এবং ঈশ্বরের ঘনিষ্ঠ বান্দাদের অন্তর্ভুক্ত হবে। (৪৬) সে যখন মায়ের কোলে থাকবে মানুষের সঙ্গে কথা বলবে এবং প্রাপ্ত বয়সেও এবং সে সৎলোকদের অন্তর্ভুক্ত হবে। (৪৭) মারইয়াম (মেরী) বললঃ হে আমার প্রভু! আমার পুত্র কিভাবে হবে? যখন কোন পুরুষ আমাকে স্পর্শই করেনি। তিনি বললেন, এভাবেই ঈশ্বর সৃষ্টি করেন তিনি যা ইচ্ছা করেন। যখন তিনি কোন কাজ করতে ইচ্ছা করেন তখন বলেন ‘হয়ে যাও’ আর তা হয়ে যায়। (৪৮) আর ঈশ্বর তাকে গ্রন্থ, প্রজ্ঞা, তৌরাত (তোরাহ) ও ইঞ্জিল (বাইবেল) শিক্ষা দেবেন। (৪৯) আর তিনি তাকে ইস্রায়েল বংশীয়দের জন্য পয়গম্বর করবেন। সে বলবে, “নিশ্চই আমি তোমাদের জন্য তোমাদের প্রতিপালকের নিদর্শন নিয়ে এসেছি। আমি তোমাদের জন্য মাটি দ্বারা পাখির আকৃতি তৈরী করি আর তাতে ফুঁক দিই তখন তা ঈশ্বরের আদেশে সত্যিকার পাখিতে পরিণত হয়ে যায়। আমি ঈশ্বরের আদেশে জন্মান্ন ও কুষ্ঠ রোগীকে সুস্থ করি আর আমি ঈশ্বরের আদেশে মৃতকে জীবিত করি। আর আমি তোমাদের বলে দিই তোমরা কি আহার কর আর ঘরে কি সংরক্ষণ কর। নিঃসন্দেহে এতে তোমাদের জন্য নিদর্শন আছে যদি তোমরা বিশ্বাস কর। (৫০) আর আমি পূর্ববর্তী গ্রন্থ তৌরাতের সমর্থনকারী, আর আমি এসেছি এমন কিছু বস্তু তোমাদের জন্য বৈধ করতে যা তোমাদের জন্য অবৈধ করা হয়েছিল।

আর আমি তোমাদের নিকটে তোমাদের প্রভুর তরফ থেকে নিদর্শন নিয়ে এসেছি। অতএব তোমরা ঈশ্বরকে ভয় কর আর আমার আনুগত্য কর। (৫১) নিঃসন্দেহে ঈশ্বর আমার প্রতিপালক আর তোমাদেরও। অতএব তাঁরই উপাসনা কর, এটাই সোজা পথ।

(৫২) কিন্তু যখন ঈসা (যীশু) তাদের মধ্যে অবিশ্বাস লক্ষ্য করলো তখন বলল, ঈশ্বরের পথে আমার সাহায্যকারী কে আছে? অনুসারীরা বলল, আমরা আছি ঈশ্বরের সাহায্যকারী। আমরা ঈশ্বরের প্রতি বিশ্বাস করেছি, তুমি সাক্ষ্য থাক যে, আমরা অুনগত। (৫৩) হে আমাদের প্রতিপালক! আপনি যা অবতীর্ণ করেছেন আমরা তাতে বিশ্বাস করেছি এবং বার্তাবাহকের অনুসরণ করছি। অতএব আমাদেরকে সাক্ষী হিসাবে তালিকাভুক্ত করুন। (৫৪) তারা গোপন কৌশল করেছিল, আর ঈশ্বর ও গোপন কৌশল করেছিলেন। আর ঈশ্বর সবচেয়ে উত্তম কৌশলকারী। (৫৫) যখন ঈশ্বর বলেছিলেন : হে ঈসা (যীশু)! আমি তোমাকে ফিরিয়ে নেব এবং তোমাকে আমার কাছে উঠিয়ে নেব, তোমাকে অবিশ্বাসীদের থেকে পবিত্র করবো। আর যারা তোমার আনুগত্য করেছে, তাদেরকে শেষ বিচার দিবস পর্যন্ত অবিশ্বাসীদের উপর প্রাধান্য দেব। তখন আমি তোমাদের মধ্যে মতানৈক্যের বিষয়ে মীমাংসা করবো। (৫৬) আর যারা অস্বীকারকারী তাদের দুনিয়ায় আর পরলোকে কঠিন শাস্তি দেব আর তাদের কোন সাহায্যকারী থাকবে না। (৫৭) আর যারা বিশ্বাস করেছে ও সৎকর্ম করেছে তাদেরকে ঈশ্বর পূর্ণ প্রতিদান প্রদান করবেন। আর ঈশ্বর অত্যাচারীদেরকে ভালবাসেন না। (৫৮) এই বাক্যসমূহ ও প্রজ্ঞাপূর্ণ বাণীসমূহ আমি তোমাদেরকে পড়ে শোনাই।

(৫৯) নিঃসন্দেহে ঈসার (যীশু) দৃষ্টান্ত ঈশ্বরের নিকটে আদমের মত। ঈশ্বর তাকে মাটি থেকে সৃষ্টি করেছিলেন। তারপর বলেছিলেন হয়ে

যাও তখন সে হয়ে যায়। (৬০) এ বাস্তব ঘটনা তোমার প্রতিপালকের পক্ষ থেকে। অতএব তুমি সংশয়ীদের অন্তর্ভুক্ত হয়ো না। (৬১) আর তোমার নিকট সত্য জ্ঞান এসে যাওয়ার পরেও যদি এ ব্যাপারে কেউ বিতর্ক করে, তবে তাকে বলো, এসো আমরা আমাদের সন্তানদের ও তোমাদের সন্তানদের এবং আমাদের স্ত্রীগণকে ও তোমাদের স্ত্রীগণকে একত্রে ডাকি এবং আমরা ও তোমরা সবাই একত্রিত হই, অতঃপর সবাই মিলে প্রার্থনা করি যে, যারা মিথ্যাবাদী তাদের উপর ঈশ্বরের অভিসম্পাত হোক। (৬২) নিঃসন্দেহে এটাই সত্য বর্ণনা, আর ঈশ্বর ছাড়া কোনই উপাস্য নেই এবং ঈশ্বরই পরম পরাক্রমশালী, পরম প্রাজ্ঞ। (৬৩) আর যদি তারা না মানে তাহলে ঈশ্বর গোলযোগ সৃষ্টিকারীদের সম্পর্কে সম্যক অবগত আছেন।

(৬৪) বলঃ হে গ্রন্থধারীগণ! এসো এমন একটি কথার দিকে যা আক্ষু মাদেরও তোমাদের মধ্যে সাদৃশ্যপূর্ণ যে, আমরা ঈশ্বর ছাড়া অন্য কারো উপাসনা করবো না, ঈশ্বরের সাথে কাউকে অংশীদার স্থাপন করবো না, আর আমাদের মধ্যে কেউই অন্য কাউকে ঈশ্বর ছাড়া অতিরিক্ত প্রভু বানাব না। যদি তারা এথেকে ফিরে যায় তাহলে বলে দাও যে তোমরা সাক্ষী থেকে আমরা অনুগত। (৬৫) হে গ্রন্থধারী গণ! তোমরা ইবরাহীম (আব্রাহাম) সম্পর্কে কেন বিতর্ক করছো? অথচ তৌরাত (তোরাহ) ও ইনজীল (বাইবেল) তার পরেই অবতীর্ণ হয়েছে। তোমরা কি বোঝনা? (৬৬) তোমরা সেই লোক, যারা এমন কথায় বাদানুবাদ করছো যাতে তোমাদের কিছু জ্ঞান ছিল, এখন তোমরা এমন কথায় বাদানুবাদ করছো যে বিষয়ে তোমাদের কোন জ্ঞান নেই, আর ঈশ্বর জানেন তোমরা জান না। (৬৭) ইবরাহীম (আব্রাহাম) ইহুদীও ছিল না খৃষ্টান ও ছিল না বরং সে ছিল ন্যায়নিষ্ঠ, ঈশ্বরের কাছে পরিপূর্ণ আত্ম সমর্পনকারী। আর সে অংশীবাদীদের দলভুক্ত ছিল না।

(৬৮) অবশ্যই ইবরাহীমের (আব্রাহামের) ঘনিষ্ঠ মানুষ তারাই যারা তার অনুসরণ করেছে, আর এই পয়গম্বর, আর বিশ্বাসীগণ। আর ঈশ্বর বিশ্বাসীগণের অভিভাবক। (৬৯) গ্রন্থধারীদের একটি দল তোমাদেরকে বিভ্রান্ত করতে চায়। আসলে তারা কেবল নিজেদেরকেই বিভ্রান্ত করছে; কিন্তু তারা বুঝতে পারে না। (৭০) হে গ্রন্থধারীগণ! তোমরা ঈশ্বরের নিদর্শনকে কেন অমান্য করছো? অথচ তোমরাই তো সাক্ষী। (৭১) হে গ্রন্থধারীগণ! কেন তোমরা সত্যকে মিথ্যার সাথে মিশ্রিত করছো? আর সত্যকে গোপন করছো কেন? অথচ তোমরা জানো।

(৭২) আর গ্রন্থধারীদের একদল বলল যে: বিশ্বাসীদের প্রতি যা অবতীর্ণ হয়েছে তার উপর সকালে বিশ্বাস স্থাপন কর এবং সন্ধ্যায় তা প্রত্যাহ্বান কর। তাহলে তারা (বিশ্বাসীরা) হয়তো (সন্দেহ পরায়ণ হয়ে) তাদের বিশ্বাস পরিত্যাগ করবে। (৭৩) আর তোমাদের ধর্মের অনুসরণ করে এমন লোক ছাড়া অন্য কাউকে বিশ্বাস করো না। বলঃ ঈশ্বরের নির্দেশিত পথই সঠিক পথ - যা তোমাদেরকে প্রদান করা হয়েছে, তদ্রূপ অন্যকেও প্রদান করা হতে পারে; অথবা যদি তোমার প্রভুর সম্বন্ধে তোমার সাথে বিতর্ক করে তবে তুমি বলঃ অনুগ্রহ তো ঈশ্বরের হাতে, তিনি যাকে ইচ্ছা তা দান করেন, আর ঈশ্বর বড় প্রাচুর্যময়, মহাজ্ঞানী। (৭৪) তিনি যাকে খুশী স্বীয় অনুগ্রহের জন্য বেছে নেন, আর ঈশ্বর পরম অনুগ্রহকারী। (৭৫) আর গ্রন্থধারীদের মধ্যে এমন লোকও আছে যে যদি তুমি তার কাছে বিপুল সম্পদ গচ্ছিত রাখো সে তা তোমাকে ফেরৎ দেবে। আর তাদের মধ্যে কিছু এমনও লোক আছে যে, যদি তুমি তার নিকটে এক দিনারও গচ্ছিত রাখো তাও সে তা তোমাকে ফেরৎ দেবে না, যদি তুমি বারবার তার কাছে তাগাদা না দাও। এটা এজন্যে যে, তারা বলে ঐ অশিক্ষিতদের সম্পর্কে আমাদের কোন দায়

দায়িত্ব নেই। তারা ঈশ্বর সম্পর্কে জেনে শুনে মিথ্যা বলে। (৭৬) হ্যাঁ, যারা নিজ অঙ্গীকার পালন করে ও সংযত হয়, ঈশ্বরভীরু হয় তবে নিশ্চয় ঈশ্বর ঈশ্বরভীরুগনকে ভালবাসেন।

(৭৭) যারা ঈশ্বরের প্রতি অঙ্গীকার ও নিজেদের শপথ সামান্য মূল্যে বিক্রয় করে তাদের জন্য পরলোকে কোন অংশ নেই, ঈশ্বর তাদের সাথে কথাও বলবেন না, শেষ বিচারের দিনে তাদের দিকে ফিরেও তাকাবেন না। তাদেরকে পবিত্রও করবেন না। তাদের জন্য রয়েছে যন্ত্রণাদায়ক শাস্তি।

(৭৮) আর তাদের মধ্যে কিছু লোক এমন আছে যারা গ্রন্থ পড়ার সময় (উচ্চারণ বিকৃতি ঘটাতে) জিহ্বা বাঁকা করে, যাতে তোমরা ওটাকে গ্রন্থের অংশ মনে কর, অথচ তা ঈশ্বরের নিকট হতে নয়, আর তারা জেনে শুনেই ঈশ্বর সম্পর্কে মিথ্যা বলে। (৭৯) ঈশ্বর যাদেরকে গ্রন্থ, প্রজ্ঞা, পয়গম্বরত্ব দান করেছেন তাদের কেহই বলবে না যে, “তোমরা ঈশ্বরকে পরিত্যাগ করে আমার উপাসক হও।” বরং সে বলবে - তোমরা প্রভু পরায়ণ হও, কেননা তোমরাই তো অন্যকে গ্রন্থের শিক্ষা দাও আর নিজেও তা পাঠ কর।

(৮০) আর সে তোমাদের এই আদেশ দেবে না যে, তোমরা দেবদূতদের এবং পয়গম্বরদের প্রতিপালক বানাও। তোমরা প্রভুতে আত্মসমর্পণকারী হওয়ার পর কিভাবে সে তোমাদেরকে অবিশ্বাসী হওয়ার আদেশ দেবে?

(৮১) যখন ঈশ্বর পয়গম্বরদের কাছে অঙ্গীকার নিয়েছিলেন, তিনি বলেছিলেন - আমি তোমাদেরকে গ্রন্থ ও প্রজ্ঞা দান করার পর যখন তোমাদের কাছে (গ্রন্থে বর্ণিত যে ভবিষ্যৎবাণী আছে তার) সত্যায়নকারী রূপে কোন পয়গম্বর আসবে, তখন তোমরা তার উপর বিশ্বাস স্থাপন করবে এবং তাকে সাহায্য করবে। তিনি আরও বলেছিলেন : তোমরা কি এটা সুনিশ্চিত করছো এবং আমার দেওয়া দায়িত্ব গ্রহণ করছো?

তারা বলেছিল : আমরা সুনিশ্চিত করলাম। ঈশ্বর বললেন : তবে তোমরা সাক্ষী থাকো আর আমিও তোমাদের সাথে সাক্ষী রইলাম। (৮২) অতঃপর এর পরে যারা বিমুখ হবে তারাই কৃতঘ্ন। (৮৩) এরা কি ঈশ্বরের ধর্মের পরিবর্তে অন্য কোন ধর্ম চাইছে? অথচ যা কিছু আকাশ ও পৃথিবীতে আছে সবই স্বেচ্ছায় হোক বা অনিচ্ছায় হোক তাঁরই অনুগত হয়েছে এবং তারা তাঁরই দিকে প্রত্যাবর্তিত হবে। (৮৪) বলঃ আমরা ঈশ্বরের উপর বিশ্বাস স্থাপন করলাম আর যা আমাদের প্রতি অবতীর্ণ হয়েছে, আর যা অবতীর্ণ হয়েছে ইবরাহীম (আব্রাহাম), ইসমাইল, ইসহাক (আইজ্যক), ইয়াকুব (জ্যাকব) ও তাঁর বংশধরদের প্রতি; আর যা দেওয়া হয়েছে মূসা (মোজেস), ইসা (যিশু) এবং অন্য পয়গম্বরগণকে তাদের প্রতিপালক কর্তৃক। আমরা তাদের মধ্যে কোন পার্থক্য করি না, আর আমরা তাঁরই প্রতি আত্মসমর্পণকারী। (৮৫) আর যে ব্যক্তি ইসলাম (ঈশ্বরের কাছে আত্মসমর্পিত) ছাড়া অন্য ধর্ম চাইবে তা কখনও গ্রহণ করা হবে না, আর পরলোকে সে ক্ষতিগ্রস্তদের অন্তর্ভুক্ত হবে। (৮৬) ঈশ্বর কেন এমন লোকদের পথ দেখাবেন যারা বিশ্বাস স্থাপন করার পর অস্বীকারকারী হয়ে গেছে। যখন সে সাক্ষী দিয়ে দিয়েছে যে, এই বার্তাবাহক সত্য আর তার নিকট স্পষ্ট নিদর্শন এসে গেছে। আর ঈশ্বর অত্যাচারীদের পথ দেখান না। (৮৭) এমন লোকদের প্রতিফল হলো এই যে, এদের উপর ঈশ্বরের, তাঁর দেবদূতগণের ও মানবকুলের প্রত্যাখ্যান। (৮৮) তারা ওখানে চিরকাল থাকবে। তাদের শাস্তি লঘু করা হবে না বা তাদের কোন অবকাশ দেওয়া হবে না। (৮৯) হ্যাঁ, যারা এর পরেও ক্ষমা-প্রার্থনা করে নিজেকে শুধরে নেয়, তাহলে নিঃসন্দেহে ঈশ্বর অনুশোচনা গ্রহণকারী ও অতি দয়ালু। (৯০) নিঃসন্দেহে যারা বিশ্বাস স্থাপন করার পরে অবিশ্বাস করেছে এবং তার অবিশ্বাস বেড়েই চলেছে তাদের ক্ষমা প্রার্থনা কখনই গৃহীত হবে না, এরাই পথভ্রষ্ট। (৯১) নিঃসন্দেহে যারা অস্বীকার করে এবং অস্বীকারকারী অবস্থায় মৃত্যু প্রাপ্ত

হয় তারা মুক্তিপণ স্বরূপ যদি পৃথিবী পরিমাণ স্বর্ণও দেয় তাহলেও তা কখনই গ্রহণ করা হবে না; তাদের জন্য যন্ত্রণাদায়ক শাস্তি রয়েছে, আর তাদের কোন সাহায্যকারী নেই।

(৯২) তোমরা কখনই পুণ্য অর্জন করতে পারবে না যতক্ষণ না তোমরা তোমাদের পছন্দের বস্তু হতে ব্যয় না করবে; আর তোমরা যা কিছু ব্যয় করবে ঈশ্বর তা ভালভাবেই জানেন। (৯৩) তৌরাত (তোরাহ) অবতীর্ণ হওয়ার পূর্বে ইসরাঈল নিজের জন্য যে খাবার নিষিদ্ধ করে নিয়েছিল, তা ছাড়া সমস্ত খাবার ইসরাঈলের সন্তানদের জন্য বৈধ ছিল। বলঃ তোমরা যদি সত্যবাদী হও তৌরাত (তোরাহ) নিয়ে এস এবং তা পাঠ কর। (৯৪) এর পরেও যারা ঈশ্বর সম্পর্কে মিথ্যা বানিয়ে বলে তারাই অত্যাচারী। (৯৫) বলঃ ঈশ্বর সত্য বলেছেন; এখন ইবরাহীমের (আব্রাহামের) ধর্ম অনুসরণ কর যে একাগ্রচিত্ত ছিল এবং সে অংশীবাদীদের অন্তর্ভুক্ত ছিল না। (৯৬) নিঃসন্দেহে প্রথম ঘর যা মানবমণ্ডলীর জন্য তৈরী হয়েছিল সেটা ঐ ঘর যা মক্কায় অবস্থিত। সৌভাগ্যযুক্ত ও সমগ্র বিশ্বের জন্য পথনির্দেশ কেন্দ্র। (৯৭) এতে স্পষ্ট নিদর্শন আছে। মকামে-ইবরাহীম (আব্রাহামের দাঁড়বার স্থান) আছে, এই ঘরে যে প্রবেশ করবে সে নিরাপদ। সমর্থবান মানুষের জন্য ঈশ্বরের উদ্দেশ্যে যেখানে তীর্থ (হজ্জ) করতে যাওয়া অবশ্য কর্তব্য। যে অস্বীকার করে তার জানা উচিত ঈশ্বর সৃষ্টিকূল থেকে অমুখাপেক্ষী। (৯৮) বলঃ হে গ্রন্থধারীগণ কেন তোমরা ঈশ্বরের নিদর্শন সমূহ অবিশ্বাস করছো? অথচ ঈশ্বর দেখছেন যা তোমরা করছো। (৯৯) বলঃ হে গ্রন্থধারীগণ! যারা বিশ্বাস স্থাপন করেছে তোমরা কেন তাদেরকে ঈশ্বরের পথে বাধা দিচ্ছে? তোমরা সেখানে কুটিলতা তৈরী করছো, অথচ তোমাদেরকেই তো সাক্ষী বানানো হয়েছে; আর ঈশ্বর তোমাদের কর্ম সম্পর্কে বেখবর নন।

(১০০) হে বিশ্বাসীগণ! যদি তোমরা গ্রন্থধারীগণের মধ্যে কোন এক সম্প্রদায়ের কথা মেনে নাও তাহলে তারা তোমাদের বিশ্বাসী থেকে আবার অবিশ্বাসী করে দেবে। (১০১) আর তোমরা কিভাবে অবিশ্বাস করবে, যখন তোমাদের ঈশ্বরের বাণী পাঠ করে শোনান হচ্ছে, আর তোমাদের মধ্যে তাঁর বার্তাবাহক বর্তমান আছে, আর যে ব্যক্তি ঈশ্বরকে দৃঢ়তার সঙ্গে আঁকড়ে ধরবে সে সঠিক পথে পৌঁছে গেল। (১০২) হে বিশ্বাসীগণ! ঈশ্বরকে ভয় কর যেমন ভয় করা উচিত আর পরিপূর্ণভাবে ঈশ্বরের অনুগত না হয়ে মৃত্যু বরণ করো না। (১০৩) আর সবাই মিলে ঈশ্বরের রশিকে শক্ত করে ধরো, এবং মতভেদ করো না, আর ঈশ্বরের সেই অনুগ্রহ স্মরণ কর, যখন তোমরা একে অপরের শত্রু ছিলে; অতঃপর তিনি তোমাদের অন্তরে প্রীতির আবেগ সঞ্চার করেছিলেন। অতএব তাঁর অনুগ্রহে তোমরা পরস্পরের ভাই হলে। আর তোমরা নরকের খাদের কিনারায় দাঁড়িয়েছিলে। ঈশ্বরই তোমাদের তা থেকে রক্ষা করলেন। এভাবেই ঈশ্বর তোমাদের জন্য তাঁর নিদর্শন সমূহ প্রকাশ করেন যাতে তোমরা দিক-নির্দেশনা পাও।

(১০৪) তোমাদের মধ্যে যেন এমন একটি সম্প্রদায় থাকে যারা কল্যাণের দিকে আহ্বান জানাবে, সৎকাজের আদেশ দেবে এবং মন্দ কাজ হতে বিরত রাখবে, এধরনের লোকেরাই সফল হবে। (১০৫) আর ঐ লোকদের মত হয়ে যেওনা যারা বিভিন্ন সম্প্রদায়ে বিভক্ত হয়ে গেছে আর নিজেদের মধ্যে মতভেদ করেছে স্পষ্ট নির্দেশ আসার পরেও। আর এদের জন্য রয়েছে বড় শাস্তি। (১০৬) সে দিন কিছু চেহারা উজ্জ্বল হবে আর কিছু চেহারা মলিন হবে। যাদের চেহারা মলিন হবে তাদের জিজ্ঞাসা করা হবে যে, তোমরা কি বিশ্বাস করার পরে আবার অবিশ্বাসী হয়ে গিয়েছিলে? তাহলে এখন অবিশ্বাস করার শাস্তি ভোগ কর। (১০৭) আর যাদের চেহারা উজ্জ্বল হবে

তারা ঈশ্বরের করুণাভুক্ত থাকবে এবং অনন্তকাল সেখানেই অবস্থান করবে। (১০৮) এগুলো ঈশ্বরের নিদর্শন যা আমি তোমাদের সততার সাথে শোনাচ্ছি, আর ঈশ্বর জগৎবাসীর উপর অত্যাচার চান না। (১০৯) আর আকাশ ও পৃথিবীতে যা কিছু আছে সবই ঈশ্বরের জন্য। আর ঈশ্বরের কাছেই সবকিছু প্রত্যাবর্তনশীল।

(১১০) এখন তোমরাই সর্বোত্তম (গুণ সম্পন্ন) সম্প্রদায় যাদেরকে মানুষের জন্য আবির্ভূত করা হয়েছে। তোমরা সৎকাজের আদেশ দাও, মন্দ কর্ম নিষেধ কর এবং ঈশ্বরকে বিশ্বাস কর। আর যদি গ্রন্থধারীগণও (ইহুদী ও খৃষ্টান) বিশ্বাস করত তাহলে তাদের জন্য মঙ্গলজনক হত। তাদের মধ্যে কিছু বিশ্বাসী আছে আর অধিকাংশই অবিশ্বাসী। (১১১) কিছুটা কষ্ট দেওয়া ছাড়া তারা তোমাদের কোন ক্ষতি করতে পারবে না। আর যদি তারা তোমাদের সাথে সম্মুখ সমরে অবতীর্ণ হয় তাহলে তারা পলায়ন করবে। অতঃপর তারা কোন সহায়তা পাবে না। (১১২) ঈশ্বরের অনুকম্পা ও মানুষের আশ্রয় ছাড়া যেখানেই তারা অবস্থান করুক না কেন, সেখানেই তারা লাঞ্চিত হবে। আর তারা ঈশ্বরের ক্রোধের পাত্র হয়ে গেছে। আর তাদের উপর চাপিয়ে দেওয়া হয়েছে দূরাবস্থা, এজন্য যে, তারা ঈশ্বরের নিদর্শনগুলো অমান্য করেছিল আর আপন পয়গম্বরদের অন্যায়ভাবে হত্যা করেছিল। এটা এজন্য যে, তারা অবাধ্য হয়েছিল এবং সীমা লঙ্ঘন করেছিল।

(১১৩) সমস্ত গ্রন্থধারী সমান নয়। তাদের মধ্যে একদল নিজ প্রতিজ্ঞায় অটল। তারা রাতে ঈশ্বরের বাণী পাঠ করে এবং সিজদাবনত (প্রণত) অবস্থায় থাকে। (১১৪) তারা ঈশ্বর ও পরলোক বিশ্বাস করে। সৎকর্মের আদেশ দেয় এবং মন্দ কর্ম হতে বিরত রাখে ও সৎকর্মের দিকে ছুটে যায়। এরাই সৎলোক।

(১১৫) যে ভাল কাজই তারা করবে ফল থেকে তাদের বঞ্চিত বা উপেক্ষা করা হবে না আর ঈশ্বর পরহেজগার (সাত্ত্বিক) দেব ভালভাবেই জানেন। (১১৬) নিঃসন্দেহে যারা অবিশ্বাস করেছে ঈশ্বরের সামনে তাদের ধন সম্পত্তি ও সম্ভানসম্পত্তি কোন কাজেই আসবে না; আর এরাই নরকবাসী, তারা সেখানে চিরকাল থাকবে। (১১৭) এই পার্থিব জীবনে তারা যা ব্যয় করে তার দৃষ্টান্ত এমন একটি বাতাসের মত, যাতে আছে তুষার কণা। যারা নিজেদের উপর অত্যাচার করেছে তাদের শস্যক্ষেতের উপর দিয়ে এই বাতাস প্রবাহিত হয় এবং তাকে ধ্বংস করে দেয়। ঈশ্বর তাদের উপর অত্যাচার করেন নি; বরং এরা নিজেরাই নিজেদের উপর অত্যাচার করেছে।

(১১৮) হে বিশ্বাসীগণ! তোমরা নিজেদের ব্যতিরেকে অন্যদের সঙ্গে ঘনিষ্ঠতা করো না, তারা তোমাদের ক্ষতি করতে কোন ভ্রুটি করে না। তুমি কষ্ট পেলে তারা খুশী হয়। তাদের শত্রুতা মুখের কথায় প্রকাশ পেয়েছে, আর তাদের মনে যা লুকিয়ে আছে তা গুরুতর। আমি তোমাদের জন্য নিদর্শন সমূহ স্পষ্ট করে প্রকাশ করেছি যেন তোমরা বুঝতে পারো। (১১৯) তোমরা ওদের ভালবাস কিন্তু তারা তোমাদের ভালবাসে না। যদিও তোমরা সব আসমানী গ্রন্থ বিশ্বাস কর। তারা যখন তোমাদের সাথে সাক্ষাৎ করে তখন বলে আমরাও বিশ্বাস করেছি; কিন্তু যখন তারা নিজেরা পরস্পর মিলিত হয় তখন তোমাদের প্রতি তাদের ক্রোধ ও আক্রোশ এত বেশী বেড়ে যায় যে, তারা নিজেদের আঙুল কামড়াতে থাকে। বলঃ তোমরা আপন ক্রোধে মরে যাও। নিঃসন্দেহে ঈশ্বর অন্তরের কথা জানেন। (১২০) তোমাদের ভাল হলে তাদের কষ্ট হয় এবং যখন তোমাদের উপর কোন বিপদ আসে তখন তারা খুশী হয়। তোমরা যদি ধৈর্য ধরো ও ঈশ্বরকে ভয় কর তাহলে তাদের কোন কৌশল তোমাদের ক্ষতি করতে পারবে না। তারা যা কিছু করেছে তা সবই ঈশ্বরের আয়ত্বাধীন।

(১২১) যখন তুমি অতি প্রত্যুষে নিজের ঘর থেকে বের হয়েছিলে আর বিশ্বাসীদের যুদ্ধের স্থানে নিযুক্ত করেছিলে। ঈশ্বর সব শোনে ও জানেন। (১২২) যখন তোমাদের দুটি দল হতোদ্যম হওয়ার উপক্রম করেছিল আর ঈশ্বর তাদেরকে সহায়তা করার জন্য বর্তমান ছিলেন। আর বিশ্বাসীগণের উচিত ঈশ্বরের উপর নির্ভর হওয়া। (১২৩) আর ঈশ্বর তোমাদের সহায়তা করেছেন বদর যুদ্ধে যখন তোমরা দুর্বল ছিলে। অতএব ঈশ্বরকে ভয় কর যাতে তোমরা কৃতজ্ঞ হতে পার। (১২৪) যখন তুমি বিশ্বাসীদের বলছিলে যে, তোমাদের প্রভু তিন হাজার দেবদূত অবতীর্ণ করে তোমাদের সাহায্য করলে সেটা কি তোমাদের জন্য যথেষ্ট হবে না? (১২৫) যদি তোমরা ধৈর্য ধারণ কর (অটল থাকো) আর ঈশ্বরকে ভয় কর আর শত্রুরা যদি আচমকা আক্রমণ করে তাহলে তোমাদের প্রভু পাঁচ হাজার চিহ্নিত দেবদূত দ্বারা তোমাদের সাহায্য করবেন। (১২৬) আর ঈশ্বর এটা এজন্যে করেছেন যাতে তোমাদের জন্য সুসংবাদ হয় এবং তোমাদের অন্তর এতে সন্তুষ্ট হয়। আর সাহায্য কেবল ঈশ্বরের তরফ হতেই হয়, যিনি পরাক্রমশালী ও প্রজ্ঞাময়। (১২৭) অবিশ্বাসীদের একটি অংশকে বিচ্ছিন্ন করার জন্য কিংবা তাদেরকে দমন করার জন্য যাতে তারা নিরাশ হয়ে ফিরে যায়। (১২৮) এই ব্যাপারে তোমার করণীয় কিছু নেই। হয়তো ঈশ্বর তাদের ক্ষমা প্রার্থনা গ্রহণ করবেন নতুবা তাদের শাস্তি প্রদান করবেন, কেননা নিশ্চয় তারা অত্যাচারী। (১২৯) আকাশ ও পৃথিবীতে যা কিছু আছে তা ঈশ্বরের; তিনি যাকে চান ক্ষমা করেন যাকে চান শাস্তি দেন, আর ঈশ্বর ক্ষমাশীল, দয়ালু। (১৩০) হে বিশ্বাসীগণ! কয়েকগুণ বাড়িয়ে সুদ খেও না, আর ঈশ্বরকে ভয় কর যাতে তোমরা সফল হও। (১৩১) আর সেই নরককে ভয় কর যা অবিশ্বাসীদের জন্য তৈরী করে রাখা হয়েছে।

(১৩২) ঈশ্বর ও রাসুলের আনুগত্য কর যাতে তোমরা অনুগ্রহ লাভ করতে পার।
 (১৩৩) আর ছুটে যাও আপন প্রভুর ক্ষমার দিকে এবং সেই স্বর্গের দিকে যার
 বিশালতা আকাশ ও পৃথিবীর মত। ওটা প্রস্তুত করা হয়েছে ঈশ্বরভীরুদের জন্য।
 (১৩৪) যারা সুদিন ও দুর্দিনে ব্যায় করে, যারা ক্রোধ সংবরনকারী ও
 মানুষের প্রতি ক্ষমাশীল; আর ঈশ্বর সৎকর্মশীলদের ভালবাসেন। (১৩৫)
 আর এমন লোক যারা প্রকাশ্যে কোন মন্দ কাজ করে ফেলে অথবা নিজের
 উপর কোন অত্যাচার করে ফেলে তখন ঈশ্বরকে স্মরণ করে নিজেদের
 পাপের জন্য ক্ষমা চায়। ঈশ্বর ছাড়া কে আছেন যে পাপ ক্ষমা করে? আর
 তারা জেনে শুনে নিজেদের (অসৎ) কৃতকর্মের উপর অটল থাকে না।
 (১৩৬) তাদের প্রতিদান হল তাদের প্রভুর পক্ষ থেকে ক্ষমা এবং এমন
 বাগান যার পাদদেশ দিয়ে নদী প্রবাহিত হয়। সেখানে তারা চিরকাল বাস
 করবে। কত সুন্দর প্রতিদান সৎকর্মশীলদের জন্য। (১৩৭) তোমার পূর্বে
 অনেক উদাহরণ অতিক্রান্ত হয়েছে। অতএব, পৃথিবীতে পরিভ্রমণ করে
 দেখ যে, অবিশ্বাসীদের পরিণাম কি হয়েছিল। (১৩৮) এই বিবরণ মানুষের
 জন্য এবং পথ নির্দেশ ও উপদেশ ঈশ্বরভীরুদের জন্য।

(১৩৯) হিন্মত হারিয়ে না এবং বিষন্ন হয়ো না, তোমরাই বিজয়ী
 হবে যদি তোমরা আস্ত্রাবান হও। (১৪০) যদি তোমাদের কোন আঘাত
 লাগে তাহলে শত্রুদের তো এমনই আঘাত লেগেছে আর এই দিনগুলি
 (পরিস্থিতি) আমি মানুষের মধ্যে পালাক্রমে আবর্তন করাই, যাতে ঈশ্বর
 বিশ্বাসীদের যাচাই করতে পারেন এবং তোমাদের মধ্যে কিছু লোককে সাক্ষী
 বানাতে পারেন আর ঈশ্বর অত্যাচারীদের ভালবাসেন না। (১৪১) যাতে
 তিনি বিশ্বাসীদের শোধন আর অস্বীকারকারীদের নির্মূল করতে পারেন।
 (১৪২) তোমরা কি মনে কর যে, তোমরা স্বর্গে চলে যাবে? অথচ ঈশ্বর

এখনও যাচাই করেন নি কারা কঠোর সংগ্রাম করছে এবং কারা ধৈর্যশীল। (১৪৩) আর তোমরা মৃত্যু কামনা করছিলে মৃত্যুর সম্মুখীন হওয়ার পূর্বেই, এখন তোমরা খোলা চোখে তা দেখে নিলে।

(১৪৪) মুহাম্মাদ কেবল একজন বার্তাবাহক। তার পূর্বে অনেক বার্তাবাহক বিগত হয়েছে। তিনি যদি মারা যান অথবা নিহত হন তাহলে কি তোমরা পিছন ফিরে চলে যাবে? আর যে ব্যক্তি ফিরে যাবে সে ঈশ্বরের কিছুই ক্ষতি করতে পারবে না। আর ঈশ্বর কৃতজ্ঞদের পুরস্কার দেবেন। (১৪৫) ঈশ্বরের অনুমতি ছাড়া কোন প্রাণী মরতে পারে না, ঈশ্বরের নির্ধারিত সময় ব্যতীত। যে দুনিয়ার মঙ্গল চায় তাকে আমি দুনিয়ায় দিয়ে দিই। আর যে পরলোকে মঙ্গল চায় তাকে আমি পরলোকে দিয়ে দিই। আর কৃতজ্ঞ লোকদের প্রতিদান অবশ্যই আমি দেব। (১৪৬) আর কত পয়গম্বর আছে যাদের সপক্ষে অনেক নিষ্ঠাবান ব্যক্তি যুদ্ধ করেছে। ঈশ্বরের পথে তাদের অনেক বাধার সম্মুখীন হতে হয়েছে তাতে তারা মনোবল হারায়নি আর দুর্বলতাও দেখায়নি এবং নতি স্বীকারও করেনি। আর ঈশ্বর ধৈর্যশীলদের ভালবাসেন। (১৪৭) তাদের মুখ থেকে এর অতিরিক্ত আর কিছু বের হয়নি যে, হে আমাদের প্রভু! আমাদের পাপ ক্ষমা করুন, আর আমাদের কাজে আমাদের যে অন্যায় হয়েছে তাও ক্ষমা করে দিন, আমাদের পদক্ষেপ দৃঢ় করুন আর অস্বীকারকারীদের বিরুদ্ধে আমাদের সাহায্য করুন। (১৪৮) অতঃপর ঈশ্বর তাদেরকে পার্থিব প্রতিদান ও পরলোকে উত্তম প্রতিফল ও দিয়েছেন। ঈশ্বর পুণ্যবানদের ভাল বাসেন।

(১৪৯) হে বিশ্বাসীগণ! তোমরা যদি অবিশ্বাসীদের কথা মত চলো তাহলে তারা তোমাদের পিছনে ফিরিয়ে দেবে এবং তোমরা ক্ষতিগ্রস্ত হবে।

(১৫০) বরং ঈশ্বর তোমাদের সহায়ক এবং তিনি সর্বোত্তম সাহায্যকারী।
 (১৫১) আমি অস্বীকারকারীদের অন্তরে তোমাদের ভয় সঞ্চার করবো, কারণ তারা ঈশ্বরের সাথে এমন জিনিষের শরিক করেছে যার জন্য ঈশ্বর কোন সনদ (প্রমাণ) অবতীর্ণ করেন নি। তাদের আশ্রয়স্থল হলো আগুন। অত্যাচারীদের ঠিকানা কতই না নিকৃষ্ট! (১৫২) আর ঈশ্বর তোমাদের সাথে তাঁর প্রতিশ্রুতি পূরণ করে দেখিয়েছেন, যখন তোমরা ঈশ্বরের আদেশে ওদেরকে হত্যা করেছিলে। এমনকি যখন তোমরা স্বয়ং দুর্বল হয়ে গিয়েছিলে এবং পরস্পর বিতর্কে লিপ্ত হয়ে পড়েছিলে, আর তোমরা পরগম্বরের কথাও শোননি। অতঃপর ঈশ্বর তোমাদের সেই জিনিষ দেখিয়েছিলেন যা তোমরা চাইছিলে। তোমাদের মধ্যে কিছু লোক সাংসারিক বৈভব চাইছিল। আর কিছু লোক পরলোক চাইছিল। অতঃপর পরীক্ষা করার জন্য তিনি তোমাদেরকে তাদের কাছ থেকে সরিয়ে রেখেছিলেন। আর ঈশ্বর তোমাদেরকে ক্ষমা করে দিয়েছেন। ঈশ্বর বিশ্বাসীগণের উপর বড়ই অনুগ্রহশীল। (১৫৩) স্মরণ কর, যখন তোমরা পালিয়ে যাচ্ছিলে এমনকি পিছনে ফিরেও দেখছিলে না আর বার্তাবাহক তোমাদের ডাকছিলেন। অতঃপর ঈশ্বর তোমাদের কষ্টের উপর কষ্ট দিয়েছিলেন (তোমাদের ব্যবহারের জন্য) যাতে তোমরা নিরাশ না হও। যা হাত ছাড়া হয়ে গেছে এবং যে বিপদ তোমাদের উপর এসেছে তার জন্য দুঃখ কর না। আর তোমরা যা কর ঈশ্বর তার খবর রাখেন।

(১৫৪) অতঃপর ঈশ্বর তোমাদেরকে কষ্টের পর শান্তিময় তন্দ্রা দান করেন যা তোমাদের একদলকে আচ্ছন্ন করেছিল আর একদল নিজের জীবনের জন্যে চিন্তা করছিল। এরা ঈশ্বর সম্পর্কে অজ্ঞানতাবশতঃ বাস্তবিকতার বিপরীত ধারণা পোষণ করছিল। তারা বলছিল, বিষয়টিই ঈশ্বরের

অধিকারে। তারা তাদের মনে এমন কথা লুকিয়ে রেখেছে যা তোমার কাছে প্রকাশ করছিল না। তারা বলছিল, বিষয়টিতে যদি আমাদের কিছু করার থাকত তাহলে এখানে আমরা নিহত হতাম না। বলঃ যদি তোমরা নিজের ঘরেও থাকতে তবুও যাদের নিহত হওয়া নির্ধারিত থাকত তারা তাদের মৃত্যুর জায়গায় বেরিয়ে পড়ত। আসলে ঈশ্বর চেয়েছেন তোমাদের মনে যা আছে তা পরীক্ষা করতে এবং তোমাদের অন্তরে যা আছে তা শোধন করতে। আর ঈশ্বর মনের গোপন কথা ভালভাবেই জানেন। (১৫৫) যে দিন দুটো দল সামনা-সামনি যুদ্ধে অবতীর্ণ হয়েছিল এবং তোমাদের মধ্যে একটি দল পশ্চাদপসরণ করেছিল। তাদেরকে শয়তান তাদের কিছু কর্মের জন্য পদস্বলিত করেছিল। ঈশ্বর তাদের ক্ষমা করেছেন। নিশ্চয়ই ঈশ্বর ক্ষমাশীল, সহিষ্ণু।

(১৫৬) হে বিশ্বাসীগণ! তোমরা অস্বীকারকারীদের মত হয়ো না। তাদের ভাইয়েরা যখন সফরে যায় বা যুদ্ধ যাত্রা করে এবং ওদের মৃত্যু হয়, তখন তারা বলে যদি ওরা আমাদের কাছে থাকত তাহলে মরত না বা নিহত হত না। যাতে ঈশ্বর এটাকে তাদের অন্তরে পরিতাপের বিষয়ে পরিণত করতে পারেন। আর ঈশ্বরই জীবনদান করেন এবং মৃত্যু দান করেন; আর যা কিছু তোমরা কর ঈশ্বর তা দেখেন। (১৫৭) আর যদি তোমরা ঈশ্বরের পথে মারা যাও বা নিহত হও তাহলে যা কিছু তোমরা জমা করো তার চেয়ে ঈশ্বরের ক্ষমা ও অনুগ্রহ উত্তম। (১৫৮) যদি তোমরা মারা যাও বা নিহত হও সবরকম পরিস্থিতিতে তোমাদেরকে ঈশ্বরের কাছে একত্রিত করা হবে। (১৫৯) এটা ঈশ্বরের অত্যন্ত অনুগ্রহ যে, তুমি তাদের প্রতি কোমল আচরণ করেছিলে। যদি তুমি কঠোর স্বভাব ও কঠোর হৃদয় হতে তাহলে এরা তোমার নিকট হতে পালাত। অতএব ওদের ক্ষমা

করে দাও এবং ওদের জন্য ক্ষমা প্রার্থনা কর এবং কাজে কর্মে তাদের সাথে পরামর্শ কর। আর যখন সিদ্ধান্ত নেবে তখন ঈশ্বরের উপর ভরসা কর। নিশ্চয়ই ঈশ্বর তাদের ভালবাসেন যারা ঈশ্বরের উপর ভরসা করে। (১৬০) ঈশ্বর যদি তোমাদের সাথে থাকেন তাহলে তোমাদের উপর কেউই বিজয়ী হতে পারবে না, আর যদি তিনি তোমাদের সঙ্গ ছেড়ে দেন তাহলে তিনি ছাড়া এমন কে আছে যে তোমাদের সাহায্য করতে পারে? আর বিশ্বাসীগণের ঈশ্বরের উপরই নির্ভর হওয়া উচিত।

(১৬১) আর এটা পয়গম্বরের কাজ নয় যে, তিনি কিছু গোপন করেন। যারাই গোপন করবে তারা নিজের গোপন জিনিস পরলোকে নিয়ে আসবে। অতঃপর প্রত্যেক ব্যক্তির তার কৃতকর্মের পূর্ণ প্রতিফল দেওয়া হবে, কারো প্রতি অবিচার করা হবে না। (১৬২) যে ব্যক্তি ঈশ্বরের ইচ্ছার অনুসরণকারী সে কি ঐ ব্যক্তির মত হবে যে ঈশ্বরের ক্রোধ নিয়ে ফিরে এসেছে? এবং ওর ঠিকানা নরকে, আর তা কতই নিকৃষ্ট ঠিকানা! (১৬৩) ঈশ্বরের নিকটে তাদের স্তর ভিন্ন-ভিন্ন হবে। আর ঈশ্বর দেখছেন তারা যা করছে। (১৬৪) ঈশ্বর বিশ্বাসীগণের প্রতি অনুগ্রহ করেছেন যে, তাদের মধ্যে হতেই তাদের (বার্তাবহ) পাঠিয়েছেন যিনি তাদেরকে ঈশ্বরের বাণী শোনান এবং তাদের পরিশোধন করেন, কিতাবও জ্ঞান শিক্ষা দেন (কুরআন ও বিবেক শিক্ষা দেন) নিঃসন্দেহে এরা ইতিপূর্বে পথভ্রষ্ট ছিল।

(১৬৫) আর যখন তোমাদের উপর এমন বিপর্যয় এল যার দ্বিগুণ বিপর্যয় ইতিপূর্বে তোমরা ঘটিয়েছিলে, তখন তোমরা বললে এটা কোথা থেকে এল? বলঃ এটা তোমাদের নিজেদের কাছ থেকেই এসেছে। নিশ্চয়ই ঈশ্বর সবকিছু করতে সক্ষম। (১৬৬) আর দুপক্ষের যুদ্ধের দিনে তোমাদের যে বিপর্যয় হল তা ঈশ্বরের আদেশেই হয়েছিল, এজন্যে যে, ঈশ্বর বিশ্বাসীদের

যাচাই করেন। (১৬৭) আর তাদেরকেও যাচাই করেন যারা কপটচারী ছিল যাদেরকে বলা হল এস ঈশ্বরের পথে লড়াই কর অথবা শত্রুদের বাধা দাও (রক্ষা কর) তারা বলল যদি আমরা জানতাম যে, যুদ্ধ হবে তাহলে অবশ্যই আমরা তোমাদের সাথে যেতাম। সেদিন তারা বিশ্বাসের চেয়ে অবিশ্বাসের অধিক নিকটে ছিল। তারা নিজের মুখে সেকথাই বলে যা তাদের অন্তরে নেই, তারা যেটা গোপন করে অবশ্যই তা ঈশ্বর ভালভাবেই জানেন। (১৬৮) এরা সেই সব লোক যারা ঘরে বসে তাদের ভাইদের সম্পর্কে বলছিল যে, যদি তারা আমাদের কথা শুনত তাহলে মারা যেত না। বলঃ তোমরা নিজের মৃত্যু আটকাও যদি তোমাদের কথা সত্যি হয়।

(১৬৯) আর যারা ঈশ্বরের রাস্তায় নিহত হয়েছে তাদের মৃত মনে করো না; বরং তারা তাদের প্রভুর নিকটে জীবিত, তারা জীবিকা পাচ্ছে। (১৭০) ঈশ্বর তাদেরকে যে অনুগ্রহ দান করেছেন তাতে তারা আনন্দিত এবং তারা সুসংবাদ দিচ্ছে তাদের জন্যও যারা তাদের পিছনে থেকে গেছে, এখনও তাদের সাথে মিলিত হয় নি। এজন্যে যে তাদের কোন ভয় নেই আর তাদের দুঃখও করতে হবে না। (১৭১) তারা ঈশ্বরের দান ও অনুগ্রহে আনন্দ প্রকাশ করে; আর এই জন্য যে, নিশ্চয় ঈশ্বর বিশ্বাসীগণের প্রতিদান বিনষ্ট করেন না। (১৭২) যারা আহত হওয়ার পরেও ঈশ্বর ও বার্তাবাহকের ডাকে সাড়া দিয়েছে, তাদের মধ্যে যারা সৎ ও সংযত, তাদের জন্য আছে মহান প্রতিদান। (১৭৩) যাদেরকে লোকেরা বলেছিল যে, শত্রুরা তোমাদের বিরুদ্ধে বড় শক্তি একত্রিত করেছে তাদেরকে ভয় কর; কিন্তু একথায় তাদের বিশ্বাস আরো বেড়ে গিয়েছিল এবং তারা বলেছিল ঈশ্বর আমাদের জন্য যথেষ্ট আর তিনি সর্বোত্তম সহায়ক। (১৭৪) অতঃপর তারা ঈশ্বরের অনুকম্পা এবং কৃপা নিয়ে ফিরে এসেছিল। কোন অনিষ্ট তাদের

স্পর্শ করে নি। তারা ঈশ্বরের সন্তুষ্টির পথেই চলেছিল এবং ঈশ্বর বড়ই দয়ালু। (১৭৫) বস্তুতঃ ওই হলো শয়তান যে তোমাদেরকে তার বন্ধুদের দিয়ে ভয় দেখায়। তোমরা ওদের ভয় করো না বরং আমাকে ভয় কর, যদি তোমরা বিশ্বাসী হও।

(১৭৬) আর তারা যেন তোমার জন্য দুঃখের কারণ না হয় যারা অবিশ্বাসের দিকে ধাবিত হচ্ছে। তারা ঈশ্বরকে কখনই কোন ক্ষতি করতে পারবে না। ঈশ্বর চাইছেন ওদের জন্য পরলোকে কোন প্রতিদান না রাখতে। ওদের জন্য রয়েছে মস্তবড় শাস্তি। (১৭৭) যারা বিশ্বাসের মূল্যে বা বিনিময়ে অবিশ্বাস ক্রয় করে তারা ঈশ্বরের কোন ক্ষতি করতে পারবে না। তাদের জন্য রয়েছে বেদনাদায়ক শাস্তি। (১৭৮) আর যারা অবিশ্বাস করছে তারা যেন মনে না করে যে, আমি যে অবকাশ দিচ্ছি তা তাদের জন্য ভাল। আমি কেবল এজন্য অবকাশ দিচ্ছি যাতে তারা অপরাধের দিকে আরো অগ্রসর হয়, আর তাদের জন্য রয়েছে অপমানজনক শাস্তি। (১৭৯) ঈশ্বর কখনও বিশ্বাসীগণকে ঐ অবস্থায় ছেড়ে দেবেন না, তারা যে অবস্থায় আছে- যতক্ষণ তিনি মন্দকে ভালো থেকে পৃথক না করেন। তিনি তোমাদেরকে অদৃশ্য সম্পর্কে ও জানাবেন না। বরং তিনি তাঁর বার্তাবাহকদের মধ্য থেকে যাকে ইচ্ছা বেছে নেন। অতএব তোমরা বিশ্বাস করো ঈশ্বরকে আর তাঁর বার্তাবাহকগণকে। আর যদি তোমরা বিশ্বাস করো এবং ঈশ্বরকে ভয় কর তাহলে তোমাদের জন্য বড় প্রতিদান রয়েছে।

(১৮০) ঈশ্বরের দেওয়া সম্পদ নিয়ে যারা কার্পণ্য করে তারা যেন মনে না করে যে এটা তাদের জন্য ভাল; বরং এটা তাদের জন্য খারাপ। যে জিনিস নিয়ে তারা কার্পণ্য করছে পুনরুত্থানের দিন ওটাই তাদের জন্য বেড়ীতে পরিণত হবে। আর আসমান ও পৃথিবীর সত্ত্বাধিকারী ঈশ্বরই। আর

যা কিছু তোমরা কর ঈশ্বর জানেন। (১৮১) ঈশ্বর সেই সব লোকদের কথা শুনেছেন যারা বলেছে ঈশ্বর নির্ধন আর আমরা ধনবান। আমি তাদের এই কথা লিখে নেব। আর তাদের পয়গম্বরদের অন্যায়ভাবে হত্যা করার কথাও লিখে নেব। আর আমি বলবো তোমরা আগুনে পোড়ার কষ্ট আশ্বাদন কর। (১৮২) এটা তোমাদের কৃতকর্মেরই ফল, আর ঈশ্বর বান্দাদের প্রতি অন্যায়কারী নন। (১৮৩) যারা বলে যে, ঈশ্বর আমাদের আদেশ দিয়েছেন যে, আমরা যেন কোন বার্তাবাহককে স্বীকার না করি যতক্ষণ না তিনি আমাদের কাছে এমন কুরবানী (উৎসর্গ) উপস্থিত করেন যাকে আগুন গ্রাস করে নেয়। ওদের বলঃ আমার পূর্বেও তো তোমাদের কাছে অনেক বার্তাবাহক এসেছিল স্পষ্ট নিদর্শন নিয়ে, তোমরা যে নিদর্শনের কথা বলছ, তা নিয়েও। তাহলে তোমরা যদি সত্যবাদী হও কেন তাদেরকে হত্যা করেছিলে? (১৮৪) অতএব এরা যদি তোমাকে অস্বীকার করে তাহলে তোমার আগেও তো অনেক বার্তাবাহককে অস্বীকার করা হয়েছিল যারা স্পষ্ট নিদর্শন এবং সহীফা (ধর্মগ্রন্থ) এবং আলোকদানকারী গ্রন্থ নিয়ে এসেছিল। (১৮৫) প্রত্যেক বক্তিকেই মৃত্যুর স্বাদ গ্রহণ করতে হবে। আর কিয়ামতের (পুনরুত্থানের) দিনে তোমাদেরকে তোমাদের কর্মফল পরিপূর্ণরূপে দেওয়া হবে; তখন যাকে নরক থেকে সরিয়ে নিয়ে স্বর্গে প্রবেশ করানো হবে সেই সফলকাম হবে, আর পার্থিব জীবন তো শুধু প্রতারণার সামগ্রী।

(১৮৬) নিশ্চয়ই তোমাদের জীবন ও সম্পদের ব্যাপারে তোমাদেরকে পরীক্ষা করা হবে। এবং তুমি অনেক কষ্টপ্রদ কথা শুনবে ওদের নিকট থেকে যারা তোমাদের পূর্বে গ্রন্থ প্রাপ্ত হয়েছে আর তাদের থেকেও যারা শির্ক (অংশীদার স্থাপন) করেছে। আর যদি তুমি ধৈর্য ধারণ কর এবং (খোদাভীতি) সংযম অবলম্বন কর তাহলে সেটা হবে দৃঢ় প্রত্যয়ের কাজ।

(১৮৭) আর যখন ঈশ্বর গ্রন্থধারীদের (ইহুদী ও খৃষ্টান) নিকট থেকে অঙ্গীকার নিয়েছিলেন যে, তোমরা ঈশ্বরের গ্রন্থ পূর্ণরূপে মানুষের কাছে উপস্থাপন করবে এবং কোনকিছু গোপন করবে না; কিন্তু তারা একথা তাদের পশ্চাতে নিক্ষেপ করেছিল এবং এটাকে অল্প মূল্যে বিক্রি করে দিয়েছিল। কত খারাপ যা তারা ক্রয় করেছিল। (১৮৮) যারা তাদের এই কর্মের জন্য প্রসন্ন এবং তারা চায়, যে কাজ তারা করেনি তার জন্য তাদের প্রশংসা হোক, এমন লোকদেরকে শাস্তি থেকে রেহাই প্রাপ্ত মনে করো না। তাদের জন্য বেদনাদায়ক শাস্তি রয়েছে। (১৮৯) আকাশ ও পৃথিবীর রাজত্ব ঈশ্বরের, আর ঈশ্বর সবকিছু করতে সক্ষম।

(১৯০) আকাশ ও পৃথিবী সৃষ্টিতে এবং রাত দিনের আবর্তনে অবশ্যই বুদ্ধিমান লোকদের জন্য নিদর্শন রয়েছে। (১৯১) যারা দাঁড়ানো অবস্থায়, বসা অবস্থায় ও শোয়া অবস্থায় ঈশ্বরকে স্মরণ করে এবং আকাশ ও পৃথিবীর সৃষ্টি সম্পর্কে চিন্তা করতে থাকে আর বলে - হে আমাদের প্রভু! আপনি এসব কোন উদ্দেশ্য ছাড়া সৃষ্টি করেন নি, আপনি পবিত্র, অতএব আপনি আমাদেরকে নরকের শাস্তি হতে রক্ষা করুন। (১৯২) হে আমাদের প্রভু! আপনি যাকে নরকে নিক্ষেপ করলেন বাস্তবে তাকে লাঞ্ছিত করলেন এবং অত্যাচারীদের জন্যে কেউই সাহায্যকারী নেই। (১৯৩) হে আমাদের প্রভু! নিশ্চই আমরা এক আহ্বানকারীকে বলতে শুনেছি যিনি ঈমানের (বিশ্বাসের) দিকে আহ্বান করছিলেন, ‘আপন প্রভুকে বিশ্বাস কর।’ অতএব আমরা বিশ্বাস করলাম, হে আমাদের প্রভু! আমাদের পাপসমূহ ক্ষমা করুন, আমাদের মন্দগুলি দূর করুন এবং পুণ্যবাণদের সাথে আমাদেরকে মৃত্যু দান করুন। (১৯৪) হে আমাদের প্রভু! আপনি আপনার বার্তাবাহকের মাধ্যমে যে প্রতিশ্রুতি আমাদের সাথে করেছেন তা পূর্ণ করুন।

আর পুনরুত্থানের দিনে আমাদের অপমানিত করবেন না। নিঃসন্দেহে আপনি তো প্রতিশ্রুতি ভঙ্গ করেন না।

(১৯৫) তাদের প্রভু তাদের প্রার্থনা গ্রহণ করলেন (এই বলে) যে তোমাদের কর্ম আমি নষ্ট করি না সে পুরুষ হোক অথবা নারী, তোমরা একে অপরের অংশ; অতঃপর যারা হিজরত (খোদার পথে দেশত্যাগ) করেছে আর যারা নিজের ঘর থেকে বেরিয়ে গেছে এবং আমার পথে অত্যাচারিত হয়েছে আর আমার পথে যুদ্ধে নিহত হয়েছে আমি অবশ্যই তাদের পাপসমূহ দূর করে দেব, এবং তাদের এমন উদ্যানে প্রবেশ করাব যার পাদদেশ দিয়ে নদী প্রবাহিত। ঈশ্বরের নিকটে এটাই তাদের পুরস্কার, আর সর্বোত্তম পুরস্কার ঈশ্বরের নিকটেই রয়েছে। (১৯৬) আর দেশের মধ্যে অবিশ্বাসীদের পদচারণা যেন তোমাদের বিভ্রান্তির মধ্যে না ফেলে। (১৯৭) এটা স্বল্পকালীন উপভোগ মাত্র; অতঃপর তাদের ঠিকানা হবে নরক, তা কতই নিকৃষ্ট ঠিকানা। (১৯৮) তবে যারা, আপন প্রভুকে ভয় করে তাদের জন্য হবে এমন উদ্যান যার পাদদেশ দিয়ে নদী প্রবাহিত, তারা সেখানেই চিরকাল থাকবে, এটা ঈশ্বরের তরফে অতিথি আপ্যায়ন হবে; আর যা কিছু ঈশ্বরের নিকটে পুণ্যবানদের জন্য প্রস্তুত আছে তা সর্বোত্তম। (১৯৯) আর অবশ্যই গ্রন্থধারীদের মধ্যে এমন কিছু লোক আছে যারা ঈশ্বরকে বিশ্বাস করে আর ঐ গ্রন্থকেও মানে যা ইতিপূর্বে ওদের নিকটে পাঠানো হয়েছে তারা ঈশ্বরের প্রতি ঝুঁকে আছে আর তারা ঈশ্বরের বাণী সমূহ অল্পমূল্যে বিক্রি করে না; এমন লোকদের জন্য তাদের প্রভুর কাছে পুরস্কার আছে, আর ঈশ্বর অতি সত্ত্বর হিসাব নেবেন। (২০০) হে বিশ্বাসীগণ! ধৈর্য ধারণ কর, আর মোকাবিলা করার জন্য দৃঢ় থাক আর নিজেরা ঐক্যবদ্ধ থাকো এবং ঈশ্বরকে ভয় কর যেন তোমরা সুফলপ্রাপ্ত হও।

অধ্যায় ৪ : আন-নিসা (নারী)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে মানুষ! আপন প্রভুকে ভয় কর, যিনি তোমাদেরকে একই ব্যক্তি হতে সৃষ্টি করেছেন, আর তা থেকে তার সঙ্গীণীকে সৃষ্টি করেছেন। আর এই দুজন থেকেই অসংখ্য নারী-পুরুষ (পৃথিবীতে) ছড়িয়ে দিয়েছেন। ঈশ্বরকে ভয় কর যাঁর নাম করে তোমরা একেওপরের কাছে নিবেদন কর এবং অত্মীয়তার দায় সম্পর্কে সচেতন থাকো। ঈশ্বর সর্বদা তোমাদের নিরীক্ষণ করছেন।^১ (২) আর অনাথদের সম্পদ তাদের কাছে ফিরিয়ে দাও। ভাল সম্পদের সাথে মন্দ সম্পদ বদল কোরো না, আর তোমাদের সম্পদের সাথে মিশিয়ে তাদের সম্পদ ভোগ করো না, এটা মহাপাপ। (৩) আর যদি তোমরা অনাথ নারীদের ক্ষেত্রে সুবিচার না করার আশঙ্কা কর, তাহলে তোমার পছন্দের নারীদের মধ্যে দুই, তিন বা চার জনকে বিবাহ করতে পারো। আর যদি তোমরা আশঙ্কা করো যে, তুমি সুবিচার করতে পারবে না, তাহলে একটিই বিবাহ কর অথবা তোমার অধিকারভুক্ত দাসীদের মধ্যে। এটাই তোমাকে অবিচার করা থেকে বিরত রাখার জন্য যথেষ্ট। (৪) নারীদেরকে সানন্দে তাদের মোহরানা (যৌতুক) দিয়ে দাও। তবে তারা যদি খুশী মনে তোমাদেরকে তার কিছু অংশ ছেড়ে দেয় তাহলে তোমরা তা স্বাচ্ছন্দে উপভোগ কর।

^১ বিঃ দ্রঃ (৪ঃ০১) প্রত্যেক মানুষ জন্মগতভাবে এক এবং অভিন্ন। ফলে, প্রত্যেকেই একই মানব মানবীর মধ্যে তাদের মৌলিক উৎসের সন্ধান পেতে পারে। সেই জন্য প্রত্যেক মানুষের উচিত একটি বৃহত্তর পরিবারের সদস্য হিসাবে পারস্পারিক সম্ভাব বজায় রাখা এবং জীবনধারণের ক্ষেত্রে সহানুভূতিপূর্ণ অবস্থান গ্রহণ করা।

(৫) যে সম্পদকে ঈশ্বর তোমাদের জীবনযাত্রার জন্য নির্ধারিত করেছেন তা অবোধদেরকে প্রদান কোর না, তবে তার মধ্যে তাদের অন্ন বস্ত্রের ব্যবস্থা করবে এবং তাদের সাথে ভালভাবে কথা বলবে। (৬) আর অনাথদের পর্যবেক্ষণে রাখ যতদিন না তারা বিবাহের বয়সে পৌঁছে যায়। যদি তাদের মধ্যে বুদ্ধিমত্তা দেখতে পাও তাহলে তাদের সম্পদ তাদেরকে সমর্পণ করো এবং তারা বড় হয়ে যাবে এই ভয়ে তাড়াতাড়ি অপচয় করে অনাথদের সম্পদ শেষ করে ফেলো না। আর যার আবশ্যিকতা নেই সে যেন অনাথের সম্পদ হতে বিরত থাকে। আর যে ব্যক্তি নির্ধন সে সামান্য পরিমাণে ন্যায় সঙ্গত উপায়ে নিতে পারে। আর যখন তোমরা তাদের পুঁজি তাদের দিয়ে দেবে তখন তাদের সামনে সাক্ষী রেখো। হিসাব গ্রহণের জন্য ঈশ্বরই যথেষ্ট। (৭) পিতা-মাতা ও নিকটাত্মীয়রা যা রেখে যায় তাতে পুরুষদের অংশ আছে। পিতা-মাতা ও নিকটাত্মীয়ের ছেড়ে যাওয়া সম্পত্তিতে নারীদেরও অংশ আছে। কম হোক বা বেশী এক নির্ধারিত অংশ। (৮) বন্টনকালে অনাথ গরীবরা উপস্থিত থাকলে তা থেকে তাদেরকেও কিছু দাও এবং তাদের সাথে সন্তোষে কথা বল। (৯) নিজের মৃত্যুর পর রেখে যাওয়া অসহায় সন্তানদের দূরবস্থা আন্দাজ করে কোনো মানুষ যতটা উদ্বিগ্ন হয়, অনাথদের প্রতি ততটা উদ্বেগ থাকা উচিত। অতএব তারা যেন ঈশ্বরকে ভয় করে এবং ন্যায্য কথা বলে। (১০) যারা অন্যায়ভাবে অনাথদের সম্পদ গ্রাস করে তারা আগুন দ্বারা নিজের উদর পূর্ণ করছে। আর শিঘ্রই তারা জ্বলন্ত আগুনে নিক্ষিপ্ত হবে।

(১১) ঈশ্বর তোমাদেরকে তোমাদের সন্তানদের ব্যাপারে আদেশ দিচ্ছেন যে, পুরুষ পাবে দুই নারীর অংশের সমান; কিন্তু যদি নারী দুই এর অধিক হয় তাহলে তারা তিনভাগের দুভাগ অংশের উত্তরাধিকারী হবে। আর যদি

একজন হয় তাহলে সে পাবে অর্ধেক। মৃতের পিতা-মাতার প্রত্যেকে পাবে তার রেখে যাওয়া সম্পত্তির ছয় ভাগের এক ভাগ যদি তার সন্তান থাকে। আর যদি মৃতের সন্তান না থাকে আর তার পিতা মাতা তার উত্তরাধিকারী হয় তাহলে তার মা পাবে তিনভাগের একভাগ, আর যদি তার ভাই বোন থাকে তাহলে মা পাবে ছয়ভাগের একভাগ, আর কোন অসিয়তনামা (ইচ্ছাপত্র) বা কোন ঋণ থাকলে তা পূর্বেই পরিশোধ করতে হবে। তোমাদের পিতা মাতা ও সন্তাদের মধ্যে উপকারের দিক থেকে কে তোমাদের নিকটতর তা তোমরা জান না। এসব অংশ ঈশ্বরের পক্ষ থেকে নির্ধারিত। নিশ্চয়ই ঈশ্বর মহাজ্ঞানী ও প্রজ্ঞাময়। (১২) তোমরা তোমাদের স্ত্রীদের রেখে যাওয়া সম্পত্তির অর্ধেক পাবে যদি তার কোন সন্তান না থাকে। আর যদি তার কোন সন্তান থাকে তাহলে তোমরা তার রেখে যাওয়া সম্পত্তির চারভাগের একভাগ পাবে, তাদের কোন অসিয়তনামা (ইচ্ছাপত্র) বা কোন ঋণ থাকলে তা পূর্বেই পরিশোধ করতে হবে। আর তোমাদের স্ত্রীরা তোমাদের রেখে যাওয়া সম্পত্তির চার ভাগের এক ভাগ পাবে যদি তোমাদের কোন সন্তান না থাকে, আর তোমাদের সন্তান থাকলে তারা তোমাদের রেখে যাওয়া সম্পত্তির আট ভাগের এক ভাগ পাবে। তোমাদের কোন অসিয়তনামা থাকলে তা পূরণ কিংবা ঋণ থাকলে তা পরিশোধের পরে। আর যদি কোন নিঃসন্তান ও পিতৃ-মাতৃহীন পুরুষ বা স্ত্রী মারা যায় এবং তার একজন ভাই বা একজন বোন থাকে তাহলে তাদের প্রত্যেকে ছয়ভাগের একভাগ পাবে। আর যদি তাদের সংখ্যা দুইয়ের অধিক হয় তাহলে তারা তিন ভাগের এক ভাগে অংশীদার হবে, কোন অসিয়তনামা (ইচ্ছাপত্র) বা কোন ঋণ থাকলে তা পূর্বেই পরিশোধ করতে হবে, যাতে কারো কোন ক্ষতি না হয়। এটা ঈশ্বরের নির্দেশ; ঈশ্বর মহাজ্ঞানী, সহিষু। (১৩) এগুলো ঈশ্বরের নির্ধারিত সীমারেখা আর যে ঈশ্বর ও তার বার্তাবাহকের

আনুগত্য করবে ঈশ্বর তাকে এমন উদ্যানে প্রবেশ করাবেন যার পাদদেশ দিয়ে নদী প্রবাহিত। সে সেখানে চিরকাল থাকবে আর এটাই বড় সফলতা। (১৪) আর যে ঈশ্বর ও তার বার্তাবাহকের অবাধ্য হবে এবং তার নির্ধারণ করা নিয়মের বাইরে বেরিয়ে যাবে তাকে নরকে নিক্ষেপ করবেন। যেখানে সে চিরকাল থাকবে, তার জন্য রয়েছে লাঞ্ছনাদায়ক শাস্তি।

(১৫) আর তোমাদের নারীদের মধ্যে যারা ব্যাভিচার করে, তোমরা তাদের বিরুদ্ধে নিজেদের মধ্য থেকে চারজন পুরুষ সাক্ষী উপস্থিত করো। তারা যদি সাক্ষ্য দেয় তাহলে ঐ নারীদের ঘরের মধ্যে আবদ্ধ রাখবে যতক্ষণ না তাদের মৃত্যু হয় বা ঈশ্বর তাদের জন্য কোন পথ বার করেন। (১৬) আর তোমাদের মধ্যে যদি কোন পুরুষ ব্যাভিচার করে তাহলে তাদের শাস্তি দাও। আর যদি তারা দুজনেই অনুশোচনা করে এবং নিজেদেরকে সংশোধন করে নেয় তাহলে তাদের ব্যাপারে নিবৃত্ত হও। নিশ্চয়ই ঈশ্বর অনুশোচনা গ্রহণকারী পরম দয়ালু। (১৭) অনুশোচনা, যা গ্রহণ করার দায়িত্ব ঈশ্বরের, তা ঐ লোকদের জন্য যারা অজ্ঞতাবশতঃ খারাপ কাজ করে তারপর অবিলম্বে অনুশোচনা করে। এমন লোকদের অনুশোচনা ঈশ্বর স্বীকার করে নেবেন। ঈশ্বর সবই জানেন, তিনি বিবেকবান। (১৮) আর এমন লোকদের অনুশোচনার সুযোগ নেই যারা নিরন্তর মন্দ কাজ করতেই থাকে। এমনকি যখন মৃত্যু উপস্থিত হয় তখন সে বলে এখন আমি অনুতাপ করছি। তাদেরও অনুশোচনার সুযোগ নেই। যারা অবিশ্বাসী অবস্থায় মৃত্যুবরণ করে। তাদের জন্য আমি যন্ত্রণাদায়ক শাস্তি প্রস্তুত রেখেছি।

(১৯) হে বিশ্বাসীগণ! জোর পূর্বক নারীদের উত্তরাধিকারী হওয়া তোমাদের জন্য বৈধ নয়। তোমরা তাদেরকে যা দিয়েছ তার কিছু অংশ নিয়ে নেওয়ার জন্য তাদেরকে আটকে রেখো না, তবে তারা প্রকাশ্য অশ্লীলতা করলে অন্য

কথা। তাদের সাথে সম্মানজনক ভাবে বসবাস করো। আর হয়তো তোমরা এমন কিছু অপছন্দ করছো যাতে ঈশ্বর তোমাদের জন্য অনেক বড় কল্যাণ রেখেছেন। (২০) আর যদি তোমরা এক স্ত্রীর বদলে অন্য স্ত্রী নিয়ে আসার সংকল্প করেই থাকো, তাহলে তোমরা তাকে স্তুপীকৃত সম্পদ দিয়ে থাকলেও তা থেকে কিছুই ফিরিয়ে নিও না। তোমরা কি মিথ্যা অপবাদ দিয়ে ও সুস্পষ্ট অত্যাচার করে তা ফিরিয়ে নেবে? (২১) আর তোমরা তা কিভাবে নেবে? যখন তোমরা একে অপরের সাথে ঘনিষ্ঠ সম্পর্ক তৈরী করেছ এবং তারা তোমাদের নিকট থেকে পাকাপোক্ত অঙ্গীকার নিয়েছে। (২২) আর তোমরা ঐ নারীকে বিবাহ করবে না যাকে তোমার পিতা বিবাহ করেছে, তবে পূর্বে যা হয়ে গেছে তা হয়ে গেছে। নিঃসন্দেহে এটা অশোভনীয় ও জঘন্য এবং অত্যন্ত নিকৃষ্ট প্রচলন।

(২৩) তোমাদের জন্য অবৈধ করা হয়েছে তোমাদের মায়েরা, কন্যারা, বোনেরা, পিসিরা, মাসিরা, ভাই-বিরি, ভাগ্নিরা, দুধ মায়েরা, শাশুড়ীরা, দুধ বোনেরা এবং তোমাদের যে স্ত্রীদের সাথে তোমরা সহবাস করেছ তাদের কন্যারা যারা তোমাদের তত্ত্বাবধানে আছে, তোমরা ঐ স্ত্রীদের সাথে সহবাস না করে থাকলে তোমাদের কোন পাপ নেই। এছাড়া তোমাদের ঔরসজাত পুত্রদের স্ত্রীদেরকে এবং একত্রে দুই বোনকে বিবাহ করাও তোমাদের জন্য নিষিদ্ধ করা হয়েছে; কিন্তু পূর্বে যা হয়ে গেছে তা হয়ে গেছে। নিঃসন্দেহে ঈশ্বর ক্ষমশীল, দয়ালু। (২৪) আর ঐ নারীকেও তোমাদের জন্য নিষিদ্ধ করা হয়েছে যে অন্যের বিবাহীতা স্ত্রী; কিন্তু যদি সে যুদ্ধ বন্দী হিসাবে তোমার হাতে আসে, তাহলে ভিন্ন কথা। এটা ঈশ্বরের আদেশ তোমাদের উপর। এছাড়া অন্য নারীরা তোমাদের জন্য বৈধ তবে শর্ত এই যে, তোমরা তোমাদের সম্পদের মাধ্যমে তাদেরকে বৈবাহিক সম্পর্কে আবদ্ধ কর;

ব্যভিচার করার জন্য নয়। অতঃপর ঐ নারীদের মধ্যে যার সাথে তোমরা দাম্পত্য সম্পর্ক স্থাপন করেছ তার পরিবর্তে তার নির্ধারিত মোহরানা (যৌতুক) দিয়ে দাও। মোহরানা নির্ধারণের পর পারস্পরিক সম্মতিতে কোন হ্রাস বৃদ্ধি করলে তোমাদের কোন পাপ হবে না। নিঃসন্দেহে ঈশ্বর মহাজ্ঞানী, পরম প্রাজ্ঞ। (২৫) তোমাদের মধ্যে যাদের স্বাধীন নারীদেরকে বিবাহ করার আর্থিক সামর্থ নেই, তারা তোমাদের অধিকারভুক্ত বিশ্বাসী দাসীদেরকে বিবাহ করবে। তোমাদের বিশ্বাস সম্পর্কে ঈশ্বর ভালই জানেন, তোমরাতো সবাই এক। অতএব তাদের মালিকের অনুমতি নিয়ে তাদেরকে বিবাহ করবে, এবং যথাযথভাবে তাদের মোহর পরিশোধ করবে। এভাবেই তাদের বিবাহ বন্ধনে আবদ্ধ করবে, যদি তারা সচ্চরিত্রা হয় এবং ব্যভিচারিনী কিংবা উপ-পতি গ্রহণকারীনি না হয়। আর বিবাহ বন্ধনে আবদ্ধ হওয়ার পর তারা যদি ব্যভিচার করে তাহলে তাদের শাস্তি স্বাধীন মহিলাদের জন্য যা নির্ধারিত তার অর্ধেক। এই ব্যবস্থা তোমাদের মধ্যে তাদের জন্য যারা খারাপ কাজে লিপ্ত হয়ে পড়ার আশঙ্কা করে। আর ধৈর্য ধারণ করতে পারলে তা তোমাদের জন্য আরও উত্তম। ঈশ্বর ক্ষমাশীল, দয়ালু।

(২৬) ঈশ্বর তোমাদের বুঝিয়ে দিতে চান, তোমাদেরকে তোমাদের পূর্ববর্তীদের পথ দেখিয়ে দিতে চান এবং তোমাদেরকে ক্ষমা করে দিতে চান। ঈশ্বর মহাজ্ঞানী, পরম প্রাজ্ঞ। (২৭) আর ঈশ্বর তোমাদের অনুশোচনা গ্রহণ করতে ইচ্ছা করেন, আর যে লোকেরা নিজের প্রবৃত্তির অনুসরণ করছে তারা চায় তোমরা সঠিক পথ হতে বহুদূরে চলে যাও। (২৮) ঈশ্বর চাইছেন তোমাদের বোঝা হাক্কা করতে, কারণ মানুষকে দুর্বল করে সৃষ্টি করা হয়েছে।

(২৯) হে বিশ্বাসীগণ! তোমরা পরস্পরের ধনসম্পদ অন্যায়ভাবে গ্রাস করো না, তবে পারস্পরিক সম্মতিতে ব্যবসা করতে পার। আর আপোষে খুনোখুনি করো না। নিঃসন্দেহে ঈশ্বর তোমাদের প্রতি অত্যন্ত দয়াবান।

(৩০) আর যে ব্যক্তি সীমালঙ্ঘন আর অত্যাচার করে তাকে অবশ্যই আমি আগুনে নিক্ষেপ করবো। আর ঈশ্বরের পক্ষে এটা করা খুবই সহজ। (৩১) যদি তোমরা এই বড় পাপ হতে বিরত হও যা তোমাদের নিষেধ করা হয়েছে তাহলে আমি তোমাদের ছোট পাপগুলো ক্ষমা করে দেব এবং তোমাদেরকে একটি মহৎ জায়গায় স্থান দেব। (৩২) যেসব জিনিস দ্বারা ঈশ্বর তোমাদের একজনকে আরেকজনের উপর শ্রেষ্ঠত্ব দিয়েছেন তোমরা সেরকম জিনিস পেতে চেয়ো না। পুরুষ যা উপার্জন করে সে তার প্রতিদান পাবে এবং নারী যা উপার্জন করে সেও তার প্রতিদান পাবে। তোমরা ঈশ্বরের কাছে তাঁর কৃপা প্রার্থনা কর। নিশ্চয়ই ঈশ্বর সবকিছু অবগত আছেন। (৩৩) আমি পিতা-মাতা ও আত্মীয়দের রেখে যাওয়া সম্পত্তিতে প্রত্যেকের জন্য উত্তরাধিকারী নির্ধারণ করেছি, আর যাদের সাথে তোমাদের অঙ্গীকার রয়েছে তাদেরকে তাদের অংশ দিয়ে দাও। নিঃসন্দেহে ঈশ্বর সর্ব বিষয় প্রত্যক্ষ করেন।

(৩৪) পুরুষেরা নারীদের তত্ত্বাবধায়ক, কারণ ঈশ্বর তাদের একজনকে আরেকজনের উপর শ্রেষ্ঠত্ব দিয়েছেন এবং পুরুষেরা তাদের নিজস্ব সম্পদ থেকে তাদের জন্য ব্যয় করে। অতএব যারা সৎ নারী তারা অনুগত হয় এবং তাদের স্বামীদের অনুপস্থিতিতেও ঈশ্বর যা রক্ষা করতে বলেছেন তা রক্ষা করে। আর যে নারীদের মধ্যে তোমরা অবাধ্যতার আশঙ্কা কর তাদেরকে বোঝাও, তাদেরকে শয্যা থেকে পৃথক করো এবং তাদেরকে (মৃদু) প্রহার করো।^১ এতে যদি তারা তোমাদের অনুগত হয় তাহলে তাদের বিরুদ্ধে

^১ বিঃদ্রঃ-(৪ঃ ৩৪) এখানে একটি প্রতিকী ক্রিয়ার কথা বলা হয়েছে, কারণ পয়গম্বর নারীদের প্রহার করতে নিষেধ করেছেন, তিনি বলেছেন-কখনও ঈশ্বরের সৃষ্টিকে প্রহার করো না।

দোষারোপের পথ অন্বেষণ করো না। নিঃসন্দেহে ঈশ্বর সুউচ্চ অতি মহান। (৩৫) তোমরা যদি স্বামী-স্ত্রীর মধ্যে বিরোধের আশঙ্কা কর, তাহলে স্বামীর পরিবারের মধ্য হতে একজন সালিসী এবং স্ত্রীর পরিবার থেকে একজন সালিসী নিযুক্ত কর। যদি তারা মীমাংসা চায় তাহলে ঈশ্বর তাদের সহমত করে দেবেন। নিঃসন্দেহে ঈশ্বর সবকিছুই জানেন এবং সবই অবগত আছেন।

(৩৬) আর ঈশ্বরেরই উপাসনা কর, তাঁর সাথে কোন কিছু অংশীদার স্থাপন করো না। পিতা-মাতার সাথে সদ্যবহার কর, এবং আত্মীয়, অনাথ, গরীব, কাছের প্রতিবেশী দূরের প্রতিবেশী, ঘনিষ্ঠ সহচর, পথিকজন ও তোমাদের দাস দাসীদের সাথেও। নিঃসন্দেহে ঈশ্বর কখনও দান্তিক ও অহংকারীকে পছন্দ করেন না। (৩৭) যারা কাৰ্পণ্য করে এবং লোকদেরও কাৰ্পণ্য শেখায় এবং যা কিছু ঈশ্বর কৃপা করে তাদের দিয়েছেন তা গোপন করে। আর আমি সত্য অস্বীকারকারীদের জন্য লাঞ্ছনাকর শাস্তি প্রস্তুত রেখেছি। (৩৮) আর যারা লোক দেখানোর জন্য নিজেদের সম্পদ ব্যয় করে এবং ঈশ্বর ও পরলোকে বিশ্বাস করে না, আর শয়তান (চির অভিশপ্ত) যার সঙ্গী হয়, সে খুব খারাপ সঙ্গী। (৩৯) তারা যদি ঈশ্বর ও পরলোকে বিশ্বাস করত তাহলে তাদের কি ক্ষতি হত? আর ঈশ্বর তাদের যা কিছু দিয়েছেন তা হতে ব্যয় করত। আর ঈশ্বর তাদের সম্পর্কে সম্যক অবগত। (৪০) নিঃসন্দেহে ঈশ্বর কারও উপর অনুপরিমাণও অত্যাচার করেন না। আর যদি কারো কোন পুণ্য থাকে তাহলে তাকে দ্বিগুণ বৃদ্ধি করে দেন, এবং নিজের থেকে অশেষ পুণ্য দান করেন।

(৪১) ঐ সময় কি হবে যখন আমি প্রত্যেক জাতি হতে একজন করে

সাক্ষী নিয়ে আসবো এবং তোমাকেও এদের বিরুদ্ধে সাক্ষী করে আনব। (৪২) যারা সত্য অস্বীকার করেছে এবং পয়গম্বরকে অবিশ্বাস করেছে সেদিন তারা কামনা করবে যদি (এমন সম্ভব হত) মাটি দিয়ে তাদেরকে সমান করে দেওয়া হত, তারা ঈশ্বরের কাছে কোন কথাই গোপন করতে পারবে না। (৪৩) হে বিশ্বাসীগণ! তোমরা নেশাগ্রস্ত অবস্থায় প্রার্থনার নিকটবর্তী হয়ো না, যে পর্যন্ত না স্বীয় বাক্য বুঝতে পার এবং আবশ্যিক স্নান না করে অপবিত্র অবস্থায় ও না। তবে সফরে থাকলে ভিন্ন কথা। এবং যদি তোমরা অসুস্থ হও অথবা সফরে থাক অথবা তোমাদের কেউ শৌচাগার থেকে আসো অথবা নারীদের নিকট গমন করে থাক এবং স্নান করার জন্য জল না পাও তাহলে তোমরা পবিত্র মাটি দ্বারা পবিত্র হয়ে নাও এবং নিজের মুখমণ্ডল ও হাত মুছে নাও। নিশ্চয়ই ঈশ্বর মার্জনাকারী, ক্ষমাশীল।

(৪৪) তুমি কি তাদের দেখনি যাদেরকে গ্রন্থের অংশ দেওয়া হয়েছিল? তারা পথভ্রষ্টতা ক্রয় করেছে এবং তারা চাইছে তুমিও সঠিক পথ হতে বিচ্যুত হও। (৪৫) ঈশ্বর তোমাদের শত্রুদেরকে ভালভাবে জানেন। আর অভিভাবক হিসাবে ঈশ্বরই যথেষ্ট এবং সাহায্যকারী হিসাবেও ঈশ্বরই যথেষ্ট। (৪৬) ইহুদীদের মধ্যে একদল অপ্রাসঙ্গিকভাবে শব্দ বিকৃত করে এবং বলে “আমরা শুনলাম ও অমান্য করলাম বা মনেনিবেশ না করে শুনলাম।” এবং ধর্মের প্রতি তাচ্ছিল্য প্রদর্শনের উদ্দেশ্যে তারা নিজের জিহ্বা বিকৃত করে ভাষার প্রকাশ ভঙ্গী পরিবর্তন করে বলে, “আমাদের দিকে দেখুন।” যদি তারা বলতো, “শুনলাম এবং মান্য করলাম এবং আমাদের প্রতি কৃপা দৃষ্টি দান করুন”, তাহলে তাদের জন্য অধিক উত্তম ও উপযুক্ত হত। তাদের প্রকাশ্য অবাধ্যতার কারণে ঈশ্বর তাদেরকে প্রত্যাখ্যান করেছেন, সেইজন্য তাদের মধ্যে অল্প কয়েকজন ছাড়া কেউই বিশ্বাস স্থাপন করবে না।

(৪৭) হে গ্রন্থধারীগন! তোমাদের সঙ্গে যা আছে তার সত্যতা প্রতিপাদনকারী যা আমি অবতীর্ণ করেছি তৎপ্রতিবিশ্বাস স্থাপন করো; এর পূর্বে যখন আমি বহু মুখমণ্ডল বিকৃত করে দেব। অতঃপর তাকে উল্টে দিয়ে পিছনের দিকে করে দেব। অথবা তাদের বিনষ্ট করবো যেমন আমি বিনষ্ট করেছিলাম শনিবার ওয়ালাদের। আর ঈশ্বরের আদেশ কার্যকর হয়েই থাকে। (৪৮) ঈশ্বর তার সাথে অংশী স্থাপনকারীকে ক্ষমা করবেন না এবং তদ্ব্যতীত যাকে ইচ্ছা ক্ষমা করেন। আর যে ঈশ্বরের সাথে অংশী স্থাপন করে, সে মহাপাপ করে। (৪৯) তুমি কি তাদের দেখেছ যারা নিজেদেরকে পুত-পবিত্র বলে? বরং ঈশ্বর যাকে চান পবিত্র করেন। আর তাদের প্রতি অনু পরিমাণও অবিচার হবে না। (৫০) লক্ষ্য করো, তারা কিভাবে ঈশ্বর সম্পর্কে মিথ্যা বানিয়ে বলে! স্পষ্ট পাপ হিসাবে এটাই যথেষ্ট।

(৫১) তুমি কি ঐ লোকদের দেখনি যাদের গ্রন্থের অংশ দেওয়া হয়েছিল? তারা প্রতিমা ও শয়তানের উপর বিশ্বাস স্থাপন করেছে। তারা সত্য অস্বীকারকারীদের সম্পর্কে বলে - তারা বিশ্বাসীদের অপেক্ষা অধিকতর সুপথগামী। (৫২) এরাই তারা যাদেরকে ঈশ্বর প্রত্যাখ্যান করেছেন। আর ঈশ্বর যাকে প্রত্যাখ্যান করেন তার জন্য তুমি কোন সাহায্যকারী পাবে না। (৫৩) তবে কি ঈশ্বরের রাজত্বে এদের কোন অংশ আছে? তাহলে তো তারা মানুষকে তিল পরিমাণ ও কিছু দেবে না। (৫৪) না কি ঈশ্বর মানুষকে যা দান করেছেন তার জন্যে তারা তাদের ঈর্ষা করছে? আমি তো ইবরাহীমের (আব্রাহামের) বংশধরকে গ্রন্থ ও প্রজ্ঞা দান করেছিলাম এবং তাদেরকে বিশাল রাজ্য ও দিয়েছিলাম। (৫৫) এদের মধ্যে কেউ তাকে মানল আবার কেউ তাঁর থেকে মুখ ফিরিয়ে নিল, এদের জন্য নরকের জলন্ত আগুনই যথেষ্ট। (৫৬) নিঃসন্দেহে যারা আমার নিদর্শন সমূহ অবিশ্বাস করবে তাদেরকে আমি

জলন্ত আগুনে নিক্ষেপ করবো। যতবার তাদের চর্ম দগ্ধ হবে ততবার আমি তাদের নতুন চর্ম দিয়ে তা বদল করে দেব, যাতে তারা যন্ত্রণা ভোগ করতেই থাকে। নিশ্চয়ই ঈশ্বর পরাক্রমশালী, প্রজ্ঞাময়। (৫৭) আর যারা বিশ্বাসী ও সৎকাজ করে তাদেরকে আমি এমন উদ্যানে প্রবেশ করাব যার পাদদেশ দিয়ে নদী প্রবাহিত হবে, সেখানে তারা চিরকাল থাকবে। সেখানে তাদের জন্যে থাকবে শুদ্ধ সহধর্মিণীগণ, আমি তাদেরকে নিবিড় ছায়ায় রাখব।

(৫৮) ঈশ্বর তোমাদের নির্দেশ দিচ্ছেন যেন তোমরা আমানত সমূহ তার প্রাপকদের ফিরিয়ে দাও এবং তোমরা যখন লোকদের মধ্যে বিচার কর তখন যেন ন্যায় এর সাথে বিচার কর। ঈশ্বর তোমাদেরকে সদুপদেশ দেন। নিশ্চয়ই ঈশ্বর সবকিছু শোনেন, সবকিছু দেখেন। (৫৯) হে বিশ্বাসীগণ! ঈশ্বর ও তাঁর বার্তাবাহকের আনুগত্য কর এবং তোমাদের মধ্যে কত্বস্থানীয় ব্যক্তির আনুগত্য কর। আর যদি কোন ব্যাপারে তোমাদের মধ্যে মতভেদ হয় তাহলে তার মীমাংসার ভার ঈশ্বর ও তাঁর বার্তাবাহকের উপর ছেড়ে দাও, যদি তোমরা ঈশ্বর ও পরলোকে বিশ্বাসী হও, একথাই উত্তম আর এর পরিণামও শ্রেষ্ঠতর। (৬০) তুমি কি তাদেরকে দেখনি যারা দাবী করে যে, তারা তোমার উপর অবতীর্ণ গ্রন্থ এবং তোমার পূর্বে যা অবতীর্ণ হয়েছে, তার উপর বিশ্বাস স্থাপন করে। তারা মন্দলোকের কাছে বিচার প্রার্থী হয়, যদিও তাকে প্রত্যাখ্যান করার জন্য তাদেরকে নির্দেশ দেওয়া হয়েছে। আর শয়তান (অভিশপ্ত আত্মা) তাকে ঘোরতর ভাবে পথভ্রষ্ট করতে চায়। (৬১) যখন তাদেরকে বলা হয় - ঈশ্বর যা অবতীর্ণ করেছেন এবং তার বার্তাবাহকের দিকে এসে তুমি দেখবে কপটচারীরা তোমার থেকে বিমুখ হচ্ছে। (৬২) তাদের কৃতকর্মের ফলে যখন তাদের উপর বিপদ আসবে, তখন কেমন হবে? তখন তারা ঈশ্বরের নামে শপথ করতে করতে

তোমার কাছে এসে বলবে - আমরা সম্ভাব ও সম্প্রীতি ছাড়া কিছুই চাইনি । (৬৩) তাদের অন্তরে যা আছে ঈশ্বর তা ভালভাবেই জানেন, তাই তুমি তাদেরকে উপেক্ষা কর, এবং তাদের উপদেশ দাও, আর তাদের এমন কথা বলো যা তাদের হৃদয়ে প্রভাব ফেলতে পারে ।

(৬৪) আর আমি যেসব বার্তাবাহক পাঠিয়েছি তা এজন্য পাঠিয়েছি যে, মানুষ ঈশ্বরের নির্দেশমত তার আনুগত্য করবে এবং যখন তারা নিজেদের উপরে অত্যাচার করেছিল তখন যদি তারা তোমার কাছে আসত আর ঈশ্বরের কাছে ক্ষমা চাইত এবং পয়গম্বর তাদের জন্য ক্ষমা চাইতো তাহলে অবশ্যই তারা ঈশ্বরকে ক্ষমাশীল ও দয়ালু হিসাবে পেত । (৬৫) অতএব তোমার প্রভুর শপথ, তারা কখনই বিশ্বাসী হবে না, যতক্ষণ না তারা নিজেদের সকল বিরোধে তোমাকে নির্ণায়ক বিচারক হিসাবে মেনে নেয় । তারপর তুমি যে মিমাংসা করবে তা তারা দ্বিধাহীন অন্তরে এবং সর্বান্তঃকরণে গ্রহণ করবে । (৬৬) আর যদি আমি তাদের নির্দেশ দিতাম নিজেরা নিজেদেরকে হত্যা কর অথবা আপন ঘর থেকে বেরিয়ে যাও তাহলে অল্প কিছু লোকই এই নির্দেশ কার্যকর করত । তবে তাদের যে উপদেশ দেওয়া হয়েছিল, তা যদি তারা পালন করতো, তাহলে নিশ্চয় ওটা তাদের জন্য কল্যাণকর হতো । (৬৭) আর তখন আমি তাদেরকে আমার পক্ষ হতে মহাপুরস্কার প্রদান করতাম । (৬৮) আর তাদের সোজা পথ দেখাতাম । (৬৯) যারা ঈশ্বর ও তার বার্তাবাহকের আনুগত্য করবে, তারা ঐ লোকদের সঙ্গী হবে যাদেরকে ঈশ্বর পুরস্কৃত করেছেন অর্থাৎ পয়গম্বর, সত্যনিষ্ঠ ব্যক্তি, সাক্ষ্যদাতা এবং সৎকর্মশীল ব্যক্তি আর সঙ্গী হিসাবে তারা কতই উত্তম । (৭০) এই অনুগ্রহ ঈশ্বরের পক্ষ হতে এবং ঈশ্বরের জ্ঞানই পর্যাণ্ড ।

(৭১) হে বিশ্বাসীগণ! তোমরা সাবধানতা অবলম্বন

কর এবং বেরিয়ে পড় আলাদা আলাদা অথবা একসঙ্গে। (৭২) আর তোমাদের মধ্যে এমন লোকও আছে যারা বিলম্ব করে, তারপর যদি তোমাদের কোন বিপদ আসে তখন তারা বলে ঈশ্বর আমাকে কৃপা করেছেন কারণ আমি ওদের সাথে ছিলাম না। (৭৩) আর যদি তোমরা ঈশ্বরের পক্ষ হতে কোন অনুগ্রহ লাভ কর, তারা এমনভাবে বলতে শুরু করবে যেন তোমাদের ও তার মধ্যে কোন মিত্রতা ছিল না। তারা বলবে - আমিও যদি ওদের সঙ্গে থাকতাম তাহলে দারুণ ভাবে সফল হতাম। (৭৪) অতএব ঈশ্বরের রাস্তায় ঐ লোকেরা যুদ্ধ করবে যারা পরলোকের বদলে ইহলোকের জীবন বিক্রি করে দেয়। আর যে ব্যক্তি ঈশ্বরের পথে লড়াই করে এবং নিহত হয় কিম্বা বিজয় লাভ করে, আমি তাকে মহা পুরস্কার দেব। (৭৫) তোমাদের কী হয়েছে যে তোমরা ঈশ্বরের পথে যুদ্ধ করছো না?। আর ঐ সব দুর্বল মানুষ ও শিশুদের জন্য যারা বলছে - হে আমাদের প্রভু! অত্যাচারী অধিবাসী অধ্যুষিত এই জনপদ থেকে আমাদের নিষ্কৃতিদান করুন, আর আপনার পক্ষ থেকে আমাদের জন্য একজন অভিভাবক প্রেরণ করুন এবং আপনার পক্ষ থেকে আমাদের জন্য একজন সাহায্যকারী প্রেরণ করুন। (৭৬) বিশ্বাসীরা ঈশ্বরের পথে লড়াই করে। আর যারা অস্বীকার করে তারা শয়তানের পথে লড়াই করে। অতএব তোমরা শয়তানের সঙ্গীদের বিরুদ্ধে লড়াই করো। নিঃসন্দেহে শয়তানের কৌশল খুবই দুর্বল।

(৭৭) তুমি কি ঐ লোকদের দেখনি? যাদেরকে বলা হয়েছিল - তোমরা তোমাদের হাত সংযত কর, প্রার্থনা কর ও উদ্বৃত্ত সম্পদ থেকে আবশ্যিক দান প্রদান কর। তারপর যখন তাদের যুদ্ধের নির্দেশ দেওয়া হল তখন তাদের মধ্যে একটি দল মানুষকে এমন ভয় করতে লাগল যেমন ঈশ্বরকে ভয় করা দরকার, বরং তার চেয়েও বেশী, তারা বলতে লাগল - হে আমাদের প্রভু! তুমি কেন আমাদের জন্য যুদ্ধ অনিবার্য করে দিলে? আমাদের কিছু সময়ের জন্য অবকাশ

দিলে না কেন? বলে দাও - এ জগতের ভোগ তো সামান্য, ঈশ্বরভীরুদের জন্য পরলোকই উত্তম। আর তোমাদের উপর বিন্দু পরিমাণও অত্যাচার করা হবে না। (৭৮) তোমরা যেখানেই থাক না কেন মৃত্যু তোমাদেরকে ধরে ফেলবে; সুরক্ষিত দুর্গে থাকলেও। যদি তাদের ভাল কিছু হয় তাহলে তারা বলে, এটা ঈশ্বরের পক্ষ থেকে, আর যদি খারাপ কিছু হয় তাহলে বলে, এটা তোমার জন্যে হয়েছে। বলে দাওঃ সবকিছুই ঈশ্বরের পক্ষ থেকে হয়। ঐ লোকগুলোর হয়েছে কি? মনে হয় তারা কোন কথাই বুঝতে পারবে না। (৭৯) তোমার কাছে ভাল যা আসে তা ঈশ্বরের পক্ষ থেকে, আর তোমার সাথে খারাপ যা কিছু ঘটে তা তোমার নিজের কারণে। আর আমি তোমাকে মানুষের কাছে পয়গম্বর করে পাঠিয়েছি। আর সাক্ষী হিসাবে ঈশ্বরই যথেষ্ট।

(৮০) যে বার্তাবাহকের আনুগত্য করে সে ঈশ্বরেরই আনুগত্য করল, আর যারা বিমুখ, তাদের জন্য আমি তোমাকে রক্ষক করে পাঠাইনি। (৮১) আর এরা বলে আমরা রাজী আছি। আর যখন তোমার নিকট থেকে বেরিয়ে যায় তখন রাতের বেলায় এদের মধ্যে একটি দল তুমি যাবলো তার বিপরীত পরিকল্পনা করে, তারা যা পরিকল্পনা করে ঈশ্বর তা লিখে রাখেন। আর ঈশ্বর তাদের কানাঘুষো লিখছেন। অতএব তুমি ওদের উপেক্ষা কর আর ঈশ্বরের উপরে ভরসা রাখো, আর ভরসার জন্য ঈশ্বরই যথেষ্ট। (৮২) এরা কি কুরআন সম্পর্কে চিন্তা করে না, যদি এ ঈশ্বর ছাড়া অন্য কারো কাছ থেকে আসত তাহলে তারা এতে অনেক বৈপরীত্য দেখতে পেত। (৮৩) যখন তাদের কাছে নিরাপত্তা বা ভয়ের কোন বিষয় উপস্থিত হয় তখন তারা সেটা প্রচার করে দেয়। তারা যদি বিষয়টাপয়গম্বর ও তাদের মধ্যে দায়িত্বশীলদের গোচরে আনতো, তাহলে তাদের মধ্যকার তথ্যানুসন্ধানীগন সঠিক তথ্য পেয়ে যেত। তোমাদের উপর যদি ঈশ্বরের অনুগ্রহ ও দয়া না থাকত তাহলে অল্প কয়েকজন ছাড়া তোমরা সবাই শয়তানদের অনুসরণ করতে।

(৮৪) অতএব ঈশ্বরের পথে লড়াই কর^১ তোমার উপর নিজের ছাড়া অন্য কারো দায়িত্ব নেই, আর বিশ্বাসীদের উদ্বুদ্ধ কর। আশা করা যায় ঈশ্বর অস্বীকারকারীদের শক্তি সামর্থ্য খর্ব করে দেবেন। আর ঈশ্বর পরম শক্তিশালী এবং তাঁর শক্তি সবচেয়ে কঠোর। (৮৫) যে ব্যক্তি ভাল কাজের সুপারিশ করবে তার জন্য তার একটি অংশ থাকবে এবং যে মন্দ কাজের সুপারিশ করবে তার জন্য তার একটি অংশ থাকবে। আর ঈশ্বর সবকিছু করার ক্ষমতা রাখেন। (৮৬) আর যখন কেউ তোমাকে অভিবাদন করবে তখন তুমিও অভিবাদন জানাবে তার চেয়েও ভালভাবে অথবা একই অভিবাদন ফিরিয়ে দেবে। নিঃসন্দেহে ঈশ্বর সবকিছুরই হিসাব গ্রহণকারী। (৮৭) ঈশ্বরই উপাস্য, তিনি ছাড়া কোনই উপাস্য নেই। তিনি তোমাদের সবাইকে শেষবিচারের দিনে একত্রিত করবেন, এতে কোন সন্দেহ নেই আর ঈশ্বরের চেয়ে অধিক সত্যবাদী আর কে হতে পারে?

(৮৮) তোমাদের কি হল যে, তোমরা কপটচারীদের ব্যাপারে দু'দলে বিভক্ত হয়ে যাচ্ছে? অথচ ঈশ্বর তাদের কৃতকর্মের কারণে তাদেরকে পশ্চাদমুখী করে দিয়েছেন। তুমি কি চাও যে, তাদের সুপথে আনবে যাদের ঈশ্বরই পথ ভ্রষ্ট করেছেন? আর ঈশ্বর যাকে পথভ্রষ্ট করেছেন তুমি কখনই তাদের সুপথে আনতে পারবে না। (৮৯) তারা চায় যে, যেভাবে তারা অস্বীকার করেছে তোমরাও সেভাবে অস্বীকার কর, যাতে তোমরা সবাই সমান হয়ে যাও। অতএব তুমি ওদের মধ্যে কাউকেও বন্ধু করো না, যতক্ষণ না তারা ঈশ্বরের পথে হিজরত (দেশত্যাগ) করে। যদি তারা রাজি না হয় তাহলে ওদের ধর এবং যেখানে ওদের পাবে হত্যা কর। আর ওদের মধ্যে তাহলে তাদেরকে আটক কর এবং যেখানে পাবে তাদেরকে হত্যা কর^২ আর তাদের মধ্যে কাউকে বন্ধুরূপে অথবা সহায়করূপে গ্রহণ করো না।

^১ বিঃ দ্রঃ - (৪ : ৮৪ এবং ৪ : ৮৯) পরিচয় অংশে ১৩ থেকে ১৫ পৃষ্ঠা দ্রষ্টব্য)।

(৯০) কিন্তু ব্যতিক্রম তাদের জন্য যারা এমন কোন দলের শরণাপন্ন হয় যাদের সঙ্গে তোমাদের শান্তি-চুক্তি আছে, অথবা যারা তোমাদের কাছে এমন ভাবে আসে যে, তারা অন্তরে তোমাদের বিরুদ্ধে বা তাদের নিজেদের লোকদের বিরুদ্ধে যুদ্ধ করতে সংকোচ বোধ করে। আর যদি ঈশ্বর ইচ্ছা করতেন তাহলে তোমাদের চেয়ে তাদের অধিক শক্তিশালী করতেন, তখন তারা অবশ্যই তোমাদের বিরুদ্ধে যুদ্ধ করতো। অতএব তারা যদি তোমাদের থেকে সরে যায় এবং তোমাদের বিরুদ্ধে যুদ্ধ না করে সন্ধি করতে চায় তাহলে ঈশ্বর তোমাদেরকেও তাদের বিরুদ্ধে অনাক্রমণের নির্দেশ দিচ্ছেন। (৯১) আবার অন্য এমন শ্রেনীকে তোমরা পাবে যারা চায় যে, তোমাদের সাথেও শান্তিপূর্ণভাবে থাকতে এবং নিজেদের গোত্রের সঙ্গেও শান্তিপূর্ণ ভাবে থাকতে। যখনই তারা উপদ্রব করার সুযোগ পায় তখনই তাতে ঝাঁপিয়ে পড়ে। অনন্তর যদি তারা তোমাদের থেকে নিবৃত্ত না হয় বা সন্ধি না করে বা তাদের হাতগুলো সংযত না রাখে তাহলে তাদেরকে যেখানে পাও ধরো এবং সংহার করো।^১ আমি তোমাদেরকে এদের বিরুদ্ধে স্পষ্ট কর্তৃত্ব দিলাম।

(৯২) আর বিশ্বাসীদের কাজ এ নয় যে, কোন বিশ্বাসীকে হত্যা করে; তবে ভুলক্রমে হয়ে গেলে অন্য কথা। আর যদি কেউ কোন বিশ্বাসীকে ভুলবশতঃ হত্যা করে তাহলে সে একজন বিশ্বাসী দাস মুক্ত করবে এবং নিহতের পরিবারকে রক্তমূল্য পরিশোধ করবে। তবে তারা ক্ষমা করলে ভিন্ন কথা। যদি নিহত ব্যক্তি তোমাদের শত্রুপক্ষের লোক হয় এবং বিশ্বাসী হয় তাহলে একজন বিশ্বাসী দাস মুক্ত করতে হবে। আর যদি এমন কোন গোষ্ঠীর লোক হয় যাদের সাথে তোমাদের শান্তিচুক্তি আছে তাহলে

^১ বিঃ দ্রঃ - (৪ : ৯১) পরিচয় অংশে ১৩ থেকে ১৫ পৃষ্ঠা দ্রষ্টব্য)।

তার পরিবারকে রক্তমূল্য পরিশোধ করতে হবে এবং একজন বিশ্বাসী দাস মুক্ত করতে হবে। আর যে (দাস মুক্ত করার) ক্ষমতা প্রাপ্ত নয় সে অবিরাম দুমাস রোযা রাখবে এটা ঈশ্বরের তরফ থেকে প্রায়শ্চিত্য। ঈশ্বর মহাজ্ঞানী, প্রজ্ঞাময়। (৯৩) আর যে ব্যক্তি কোন বিশ্বাসীকে জেনেগুনে হত্যা করে তাহলে তার শাস্তি নরক, যাতে সে চিরকাল থাকবে, তার উপর ঈশ্বরের ক্রোধ এবং প্রত্যাখ্যান, আর ঈশ্বর তার জন্য বড় শাস্তি প্রস্তুত করে রেখেছেন।

(৯৪) হে বিশ্বাসীগণ! তোমরা যখন ঈশ্বরের পথে যাত্রা করবে তখন ভালভাবে যাচাই করে নেবে এবং যে তোমার শাস্তি কামনা করবে তাকে বলো না যে, তুমি বিশ্বাসী নও কারণ তোমরা পার্থিব জীবনের সম্পদ অশ্বেষন করো, বস্তুতঃ ঈশ্বরের কাছে প্রচুর সম্পদ রয়েছে। তোমরাও তো পূর্বে এমন ছিলে, তারপর ঈশ্বর তোমাদের প্রতি অনুগ্রহ করেছেন, অতএব যাচাই করে নাও। যা কিছু তোমরা কর ঈশ্বর সে সম্পর্কে অবহিত আছেন। (৯৫) বিনাকারণে বসে থাকা বিশ্বাসী আর ঈশ্বরের পথে সম্পদ ও জীবন দিয়ে সংগ্রামকারী বিশ্বাসী সমান নয়। সম্পদ ও জীবন দিয়ে সংগ্রামকারীর মর্যাদা বসে থাকা লোকদের চেয়ে অনেক বেশি। আর প্রত্যেকের সঙ্গে ঈশ্বর কল্যাণের প্রতিশ্রুতি করেছেন। আর ঈশ্বর সংগ্রামকারী সৈনিকদের ঘরে বসে থাকা লোকদের চেয়ে শ্রেষ্ঠত্ব দিয়েছেন। (৯৬) তাদের জন্য ঈশ্বরের তরফ হতে বড় মর্যাদা, ক্ষমা ও অনুগ্রহ আছে। আর ঈশ্বর ক্ষমাশীল, দয়ালু।

(৯৭) আর যারা নিজের মন্দ করছিল, যখন দেবদূত তাদের প্রাণ হরণ করবেন তখন সে তাকে প্রশ্ন করবে তুমি কি অবস্থায় ছিলে? উত্তরে সে বলবে পৃথিবীতে আমরা দুর্বল ছিলাম। দেবদূত বলবেন ঈশ্বরের যমীন কি প্রশস্ত ছিল না যে, তুমি স্থানত্যাগ করে প্রবাসে চলে যেতে? এরাই সেই লোক যাদের ঠিকানা নরক, আর তা খুবই খারাপ ঠিকানা।

(৯৮) তবে দুর্বল নর-নারী ও শিশুরা ব্যতীত যারা কোন উপায় অবলম্বন করতে পারে না এবং কোন পথেরও সন্ধান পায় না। (৯৯) আশা করা যায় ঈশ্বর এদের ক্ষমা করবেন; ঈশ্বর মার্জনাকারী, ক্ষমাশীল। (১০০) আর যে ঈশ্বরের পথে দেশত্যাগ করবে সে পৃথিবীতে অনেক আশ্রয় স্থল ও প্রাচুর্য্য লাভ করবে। আর যে ব্যক্তি ঈশ্বর ও তার বার্তাবাহকের উদ্দেশ্যে ঘর থেকে বের হয়, তারপরে মারা যায়, তাকে পুরস্কৃত করা ঈশ্বরের দায়িত্ব হয়ে যায়। ঈশ্বর ক্ষমাশীল, দয়াময়।

(১০১) আর যখন তোমরা ভ্রমণ করো তখন প্রার্থনা সংক্ষিপ্ত করলে তোমাদের কোন পাপ নেই, যদি তোমাদের আশংকা হয় যে সত্য অস্বীকারকারীরা তোমাদের অত্যাচার করবে। নিঃসন্দেহে সত্য অস্বীকারকারীরা তোমাদের প্রকাশ্য শত্রু। (১০২) যখন তুমি বিশ্বাসীদের মধ্যে থাক (যুদ্ধের সময়) এবং প্রার্থনায় নেতৃত্ব দাও, তখন তাদের একদল সশস্ত্র অবস্থায় তোমার সঙ্গে প্রার্থনায় দাঁড়াবে। তাদের প্রার্থনা সম্পন্ন হলে, তারা তোমাদের পিছনের সারিতে দাড়িয়ে পাহারা দেবে এবং অন্য একটি দল যাদের প্রার্থনা করা হয়নি, সামনের দিকে এগিয়ে আসবে এবং তোমার সঙ্গে প্রার্থনায় যোগ দেবে। তারা তাদের আত্মরক্ষার হাতিয়ার সঙ্গে রাখবে। সত্য অস্বীকারকারীরা চায় তোমরা তোমাদের অস্ত্র-সস্ত্র ও মালপত্র সম্পর্কে অসাবধান হয়ে পড়। যাতে তারা একবারে তোমাদের উপর ঝাঁপিয়ে পড়তে পারে। আর বৃষ্টির কারণে যদি তোমাদের কষ্ট হয় কিংবা তোমরা অসুস্থ থাক তাহলে অস্ত্র নামিয়ে রাখলে তোমাদের কোন পাপ হবে না, তবে তোমরা সতর্ক থাকবে। নিঃসন্দেহে ঈশ্বর সত্য অস্বীকারকারীদের জন্য লাঞ্ছনাকর শাস্তি প্রস্তুত করে রেখেছেন। (১০৩) অতএব যখন তুমি প্রার্থনা সম্পন্ন করবে তখন দাঁড়িয়ে, বসে এবং শুয়ে ঈশ্বরকে স্মরণ করবে; তারপর যখন

নিশ্চিত হবে তখন নিয়মানুযায়ী প্রার্থনা করবে। নির্ধারিত সময়ে প্রার্থনা করা বিশ্বাসীদের জন্য অপরিহার্য। (১০৪) শত্রুদের পশ্চাদ্ধাবনে শৈথিল্য করো না। যদি তোমরা কষ্ট পেয়ে থাকো, তারাও তোমাদের অনুরূপ কষ্ট পেয়ে থাকে। কিন্তু তোমরা ঈশ্বরের কাছে যা আশা করো, তারা সেই আশা করতে পারে না, আর ঈশ্বর মহাজ্ঞানী, প্রজ্ঞাময়।

(১০৫) নিঃসন্দেহে আমি এই গ্রন্থ তোমার কাছে তথ্য সহকারে পাঠিয়েছি যাতে তুমি লোকদের মধ্যে এই অনুসারে মীমাংসা করতে পার যা ঈশ্বর তোমাকে দেখিয়েছেন। আর বিশ্বাসঘাতকদের পক্ষে বিতর্ককারী হয়ো না। (১০৬) আর ঈশ্বরের কাছে ক্ষমা প্রার্থনা কর, নিশ্চয়ই ঈশ্বর ক্ষমাশীল ও অতি দয়ালু। (১০৭) আর তুমি ঐ লোকদের পক্ষে বিতর্ক করো না যারা নিজেদের সাথে বিশ্বাসঘাতকতা করে। ঈশ্বর এমন ব্যক্তিকে পছন্দ করেন না যারা বিশ্বাসঘাতক এবং পাপী। (১০৮) তারা মানুষের কাছে লজ্জিত হয় আর ঈশ্বরের কাছে লজ্জিত হয় না যদিও ঈশ্বর তাদের সঙ্গে থাকেন যখন তারা রাগিত্রে এমন বিষয়ে পরামর্শ করে এবং কথা বলে যে বিষয়ে তিনি সম্মত নন। বস্তুত তারা যা কিছু করে ঈশ্বর সে বিষয়ে অবহিত।

(১০৯) তোমরা তো পার্থিব জীবনে ওদের পক্ষ থেকে বিতর্ক করে নিয়েছ; কিন্তু পরলোকে কে তাদের পক্ষে ঈশ্বরের সাথে বিতর্ক করবে আর কে তাদের রক্ষাকর্তা হবে? (১১০) যে লোক কোন খারাপ কাজ করে কিংবা নিজের প্রতি অন্যায় করে, তারপর ঈশ্বরের কাছে ক্ষমা চায় সে ঈশ্বরকে ক্ষমাশীল ও দয়ালু দেখতে পাবে। (১১১) আর যে ব্যক্তি কোন অপরাধ করে, সে স্বীয় আত্মারই ক্ষতি করে, ঈশ্বর মহাজ্ঞানী, পরম প্রাজ্ঞ। (১১২) আর যে ব্যক্তি কোন ভুল বা অপরাধ করে অতঃপর কোন নিরপরাধ ব্যক্তির উপর তা আরোপ করে, তাহলে সে একটি বড় অপবাদ এবং স্পষ্ট অপরাধ

নিজের মাথায় নিল। (১১৩) আর যদি তোমার উপর ঈশ্বরের কৃপা ও দয়া না হত তাহলে তাদের একটি দল সংকল্প করেই নিয়েছিল যে, তোমাকে বিভ্রান্ত করেই ছাড়বে। যদিও তারা নিজেদেরকেই বিভ্রান্ত করছিল। তারা তোমার কোনই ক্ষতি করতে পারবে না। আর ঈশ্বর তোমার উপর গ্রন্থ ও প্রজ্ঞা অবতীর্ণ করেছেন আর তোমাকে ঐ জিনিষ শিখিয়েছেন যা তুমি জানতে না আর তোমার প্রতি ঈশ্বরের অনুগ্রহ অনেক বড়।

(১১৪) তাদের অধিকাংশ গোপন পরামর্শে কোন মঙ্গল নিহিত থাকে না, হ্যাঁ, তবে যে ব্যক্তি পরামর্শ দান করার, ভাল কাজ করার অথবা মানুষের মধ্যে শান্তি প্রতিষ্ঠা করার কথা বলে, তার কথা আলাদা। যে ব্যক্তি ঈশ্বরের সন্তুষ্টি লাভের জন্য এরকম করে আমি তাকে বড় পুরস্কার দেব। (১১৫) কিন্তু যে ব্যক্তি পয়গম্বরের বিরোধীতা করবে, বিশ্বাসীদের পথ ছেড়ে অন্য কোন পথে চলবে, যদিও তাদের কাছে সঠিক পথ স্পষ্ট হয়েছে, তাহলে তাকে আমি ঐ পথেই ফেরাব যেদিক সে ফিরতে চেয়েছে। তাকে নরকে প্রবেশ করাব আর তা কত খারাপ গন্তব্য!

(১১৬) নিঃসন্দেহে ঈশ্বরের সাথে অংশীদার করা হলে ঈশ্বর তা ক্ষমা করবেন না, এছাড়া অন্য অপরাধ তিনি ক্ষমা করবেন যাকে ইচ্ছা। আর যে ঈশ্বরের অংশীদার করল সে সুদূর বিভ্রান্তিতে পড়ল। (১১৭) তারা (অংশীবাদীরা) ঈশ্বরকে ছেড়ে দেবীগণকে আহ্বান করে এবং তারা বিদ্রোহী শয়তানকেই আহ্বান করে। (১১৮) ঈশ্বর তাকে প্রত্যাখ্যান করেছেন। আর শয়তান বলেছিল যে আমি তোমার বান্দাদের মধ্যে থেকে একটি নির্দিষ্ট অংশকে নিয়েই ছাড়ব। (১১৯) আমি অবশ্যই তাদেরকে বিপথগামী করবো, তাদের মনে মিথ্যা আশা জাগাব, আমি অবশ্যই তাদের আদেশ দেব আর তারা পশুর কান কাটবে, আমারই

আদেশে তারা ঈশ্বরের সৃষ্টি বিকৃত করবেই। আর যে ব্যক্তি ঈশ্বর ছাড়া শয়তানকে বন্ধু ও পথ প্রদর্শক বানিয়ে নেবে সে স্পষ্টই ক্ষতিগ্রস্ত হবে। (১২০) সে তাদেরকে প্রতিশ্রুতি দেয় আর তাদেরকে আশাব্যস্ত করে, আর শয়তানের সব আশাই ধোঁকা ছাড়া আর কিছু নয়। (১২১) এসব লোকের ঠিকানা নরক আর তারা এর থেকে পরিত্রানের কোন পথ খুঁজে পাবে না। (১২২) আর যারা বিশ্বাস করে, সৎকর্ম করে তাদেরকে আমি এমন উদ্যানে প্রবেশ করাব যার পাদদেশ দিয়ে নদী প্রবাহিত হতে থাকবে, সেখানে তারা চিরকাল থাকবে। ঈশ্বরের প্রতিশ্রুতি সত্য; এবং কে ঈশ্বর অপেক্ষা কথায় অধিকতর সত্যবাদী?

(১২৩) তোমাদের আশানুযায়ী কিম্বা গ্রন্থধারীদের আশানুযায়ী কিছু হবে না। যে খারাপ কাজ করবে সে তার প্রতিফল পাবে এবং ঈশ্বর ছাড়া নিজের জন্য সে কোন অভিভাবক বা সাহায্যকারী পাবে না। (১২৪) আর যে ভাল কাজ করবে সে পুরুষ হোক বা নারী শর্ত এই যে, তাকে বিশ্বাসী হতে হবে। তাহলে সে স্বর্গে প্রবেশ করবে, আর তাদের প্রতি সামান্য পরিমাণও অত্যাচার করা হবে না। (১২৫) আর ওর চেয়ে উত্তম কার ধর্ম? যে নিজেকে ঈশ্বরের নিকট সমর্পন করে এবং সৎকর্মশীল, আর ইবরাহীমের (আব্রাহামের) মতানুসারী, যিনি একনিষ্ঠ বিশ্বাসী ছিলেন। ঈশ্বর ইবরাহীমকে (আব্রাহাম) পরম বন্ধুরূপে গ্রহণ করেছিলেন। (১২৬) আকাশ ও পৃথিবীতে যা কিছু আছে তা সবই ঈশ্বরের। ঈশ্বর সব কিছু পরিবেষ্টন করে আছেন।

(১২৭) তারা তোমার কাছে নারীদের সম্পর্কে জানতে চায়। বলে দাও, ঈশ্বর তোমাদেরকে তাদের সম্বন্ধে নির্দেশ দিচ্ছেন। গ্রন্থে তোমাদেরকে ওই অনাথাদের সম্বন্ধে বলা হয়েছে, তোমরা তাদের নির্ধারিত প্রাপ্য দাও না; অথচ তাদের বিবাহ করতে চাও। আর যে নির্দেশ দুর্বল শিশুদের জন্য

আছে তা এই যে, অনাথদের প্রতি ন্যায় বিচার কর। তোমরা ভাল যা কিছু কর তা ঈশ্বর ভালভাবেই অবগত আছেন। (১২৮) যদি কোন নারী তার স্বামীর কাছ থেকে দুর্ব্যবহার কিংবা উপেক্ষার আশঙ্কা করে তাহলে তারা নিজেদের মধ্যে আপোষ মীমাংসা করে নিলে কারো কোন দোষ হবে না। আপোষ মীমাংসা ভাল। আর লোভতো মানুষের মনেই শিকড় গেড়ে আছে। আর যদি তোমরা ভাল ব্যবহার কর এবং সংযমী হও তাহলে যা কিছু তোমরা করছো সে বিষয়ে ঈশ্বর সম্যক অবগত। (১২৯) আর তোমরা কখনই নারীদের মধ্যে সমতা রক্ষা করতে পারবে না, যদিও তোমরা তা কামনা কর। অতএব একজনের প্রতি পুরোপুরি ঝুঁকে পড়ে আরেকজনকে বুলন্ত অবস্থায় ফেলে রেখো না। আর যদি তোমরা শুধরে নাও আর ভয় কর তাহলে ঈশ্বর ক্ষমাশীল, দয়ালু। (১৩০) আর যদি দুজনেই বিচ্ছিন্ন হয়ে যায় তাহলে ঈশ্বর তাঁর প্রাচুর্য দ্বারা প্রত্যেককে অভাবমুক্ত করবেন। আর ঈশ্বর বড়ই প্রাচুর্যময়, প্রজ্ঞাবান।

(১৩১) আকাশ ও পৃথিবীতে যা কিছু আছে সবই ঈশ্বরের আর আমি নির্দেশ দিয়েছি ঐ লোকদের যাদের তোমাদের পূর্বে গ্রন্থ দিয়েছি এবং তোমাদেরকেও। ঈশ্বরকে ভয় কর, যদি তোমরা অমান্য কর তাহলেও আকাশ ও পৃথিবীতে যা কিছু আছে তা সবই ঈশ্বরের। ঈশ্বর অভাবমুক্ত, সর্বগুণ সম্পন্ন। (১৩২) আর আকাশ ও পৃথিবীর সব কিছুই ঈশ্বরের, আর ভরসা করার জন্য ঈশ্বরই যথেষ্ট। (১৩৩) যদি তিনি ইচ্ছা করেন, হে মানবমণ্ডলী! তোমাদের সবাইকে অপসারণ করে অন্যদেরকে তোমাদের স্থানে নিয়ে আসতে পারেন। আর ঈশ্বর এরূপ করতে সম্পূর্ণ সক্ষম। (১৩৪) যে ব্যক্তি জগতের কল্যাণ চায় তার জানা উচিত ঈশ্বরের নিকট হইকাল ও পরকালের কল্যাণ আছে। ঈশ্বর সবই শোনে সবই দেখেন।

(১৩৫) হে বিশ্বাসীগণ! ন্যায়ের উপর ভালভাবেই দৃঢ় থাকো এবং ঈশ্বরের জন্য সাক্ষীদাতা হও। যদিও তা তোমাদের পিতা-মাতা বা আত্মীয় স্বজনের বিরুদ্ধেও হয়। ধনবান হোক বা নির্ধন ঈশ্বরই তোমাদের চেয়ে ওদের প্রতি বেশী হিতৈষী। অতএব তোমরা ইচ্ছার অনুসরণ করে ন্যায় থেকে সরে যেও না। আর যদি তোমরা ঘুরিয়ে পৌঁচিয়ে কথা বল বা এড়িয়ে যাও তাহলে তোমরা যা কিছু করছো ঈশ্বর তা অবগত আছেন।

(১৩৬) হে বিশ্বাসীগণ! ঈশ্বর ও বার্তাবাহককে বিশ্বাস কর আর ঐ গ্রন্থে যা তিনি আপন বার্তাবাহকের উপর অবতীর্ণ করেছেন আর ঐ গ্রন্থেও যা তিনি পূর্বে অবতীর্ণ করেছেন। আর যে ব্যক্তি অস্বীকার করে ঈশ্বরকে, তাঁর দেবদূতগণকে, তাঁর গ্রন্থ সমূহকে, তাঁর বার্তাবাহকগণকে এবং শেষ দিবসকে, সে সুদূর বিভ্রান্তিতে পতিত হয়েছে। (১৩৭) নিঃসন্দেহে যে লোক বিশ্বাস করল তারপর অস্বীকার করল, আবার বিশ্বাস করল তারপর আবার অস্বীকার করল, অতঃপর অস্বীকার করতেই থাকল, ঈশ্বর তাকে কখনও ক্ষমা করবেন না, আর কোন পথ ও দেখাবেন না। (১৩৮) কপটচারীদের জানিয়ে দাও যে, ওদের জন্য এক যন্ত্রণাদায়ক শাস্তি নির্ধারিত আছে। (১৩৯) ঐ লোকেরা যারা বিশ্বাসীদের ছেড়ে অস্বীকারকারীদের সাথে মিত্রতা করে তারা কি ওদের কাছে সম্মান অন্বেষণ করছে? সম্মান তো সবই ঈশ্বরের জন্যেই।

(১৪০) আর ঈশ্বর নিজ গ্রন্থে তোমাদের উপর এই নির্দেশ অবতীর্ণ করেছেন যে, যখন তোমরা শুনবে যে, ঈশ্বরের নিদর্শন সমূহকে অস্বীকার করা হচ্ছে আর উপহাস করা হচ্ছে তখন তোমরা তাদের কাছে বসবে না, যতক্ষণ না তারা অন্য কথায় লিপ্ত হয়ে যায়। তাহলে তোমরাও ওদের মত হয়ে যাবে। ঈশ্বর কপটচারীদের ও সত্য অস্বীকারকারীদের নরকের এক জায়গায় একত্রিত করবেন। (১৪১) ঐ কপটচারীরা তোমাদের প্রতিক্ষায় থাকে। যদি তোমাদের

জন্য ঈশ্বরের পক্ষ হতে বিজয় আসে তাহলে তারা বলে ‘আমরা কি তোমাদের সাথে ছিলাম না?’ আর ওটা যদি অস্বীকারকারীদের ভাগ্যে ঘটে তখন তারা বলেঃ ‘আমরা কি তোমাদের বিজয়ে সাহায্য করি নি এবং বিশ্বাসীদের থেকে তোমাদের রক্ষা করি নি?’ পরলোকে ঈশ্বরই তোমাদের মধ্যে মীমাংসা করবেন, আর ঈশ্বর সত্য অস্বীকারকারীদের জন্য বিশ্বাসীদের বিরুদ্ধে কোন পথ দেখাবেন না।

(১৪২) কপটচারীরা ঈশ্বরের সাথে ধোঁকাবাজী করছে, অথচ ঈশ্বরই ওদেরকে ধোঁকায় ফেলে রেখেছেন। তারা যখন প্রার্থনার জন্য দাঁড়ায় তখন তারা অলসভাবে লোক দেখানোর জন্য দাঁড়ায়। ঈশ্বরকে অল্লই স্মরণ করে। (১৪৩) তারা (বিশ্বাস-অবিশ্বাসের) দুটোর মধ্যে দোদুল্যমান, না এদিকে না ওদিকে। আর ঈশ্বর যাকে পথভ্রষ্ট করেন তার জন্য তুমি কোন পথ পাবে না। (১৪৪) হে বিশ্বাসীগণ! বিশ্বাসীদের ছেড়ে সত্য অস্বীকারকারীদের সাথে (যারা তোমাদের বিরুদ্ধে যুদ্ধরত) বন্ধুত্ব করো না। তোমরা কি ঈশ্বরের জন্য নিজেদের বিরুদ্ধে একটি স্পষ্ট প্রমাণ পেশ করতে চাও? (১৪৫) কপটচারীদের স্থান হল নরকের সর্বনিম্ন স্তরে, আর তুমি তাদের জন্য কোন সাহায্যকারী পাবে না। (১৪৬) অবশ্য যারা অনুশোচনা করে নিজেকে শুধরে নেয় এবং ঈশ্বরকে দৃঢ়রূপে ধারণ করে, ঈশ্বরের জন্য নিজেদের ধর্মে একনিষ্ঠ থাকে, তারা বিশ্বাসীদের সাথে থাকবে। আর ঈশ্বর বিশ্বাসীগণকে এক মহান প্রতিদান দেবেন। (১৪৭) তোমরা যদি কৃতজ্ঞতা প্রকাশ কর আর বিশ্বাসী হও তাহলে ঈশ্বর তোমাদের কেন শাস্তি দেবেন? ঈশ্বর তো গুণগ্রাহী, (সম্মানদাতা) সব কিছুই জানেন।

(১৪৮) ঈশ্বর মন্দ কথা পছন্দ করেন না, তবে কারো প্রতি অত্যাচার হয়ে থাকলে তার কথা আলাদা। ঈশ্বর সব কিছু জানেন সবকিছু শোনেন। (১৪৯) তোমরা যদি ভাল কিছু প্রকাশ কর কিংবা তা গোপন কর অথবা মন্দ কিছু ক্ষমা কর তাহলে (জানবে) ঈশ্বরও ক্ষমাশীল, সর্ব শক্তিমান।

(১৫০) যারা ঈশ্বর ও তাঁর বার্তাবাহকদের অবিশ্বাস করে; ঈশ্বর ও তাঁর বার্তাবাহকদের মধ্যে পার্থক্য করতে চায় আর বলে-আমরা কতককে বিশ্বাস করি আর কতককে বিশ্বাস করি না। আর তারা এর মধ্যবর্তী কোন পথ অবলম্বন করতে চায়। (১৫১) নিঃসন্দেহে এরাই প্রকৃত সত্য অস্বীকারকারী, আর আমি সত্য অস্বীকারকারীদের জন্য অপমানজনক শাস্তি প্রস্তুত রেখেছি। (১৫২) আর যারা ঈশ্বর ও তাঁর বার্তাবাহকদেরকে মেনে নিয়েছে তাদের মধ্যে পার্থক্য করে না, তিনি তাদেরকে অবশ্যই তাদের প্রতিদান দেবেন। ঈশ্বর তো ক্ষমাশীল ও অতি দয়ালু।

(১৫৩) গ্রন্থধারীগণ তোমার কাছে দাবী করে যে, তুমি তাদের জন্য আকাশ থেকে একটি গ্রন্থ আনয়ন কর। মূসার (মোজেসের) নিকটেও তারা এরচেয়েও বড় অপরাধজনক দাবী করেছিল। তারা বলেছিল-প্রকাশ্যে আমাদের ঈশ্বরকে দেখাও। তখন তাদের এই অত্যাচারের জন্যেই তাদের উপর বজ্রপাত হয়েছিল। অতঃপর স্পষ্ট প্রমাণ আসার পরেও তারা বাছুরকে নিজেদের উপাস্য বানিয়ে নিয়েছিল। আমি তাও ক্ষমা করেছিলাম। আর মূসাকে (মোজেসকে) স্পষ্ট কর্তৃত্ব দিয়েছিলাম। (১৫৪) আর আমি ওদের উপরে তুর পাহাড়কে তুলে ধরেছিলাম ওদের নিকট থেকে অঙ্গীকার নেওয়ার জন্য। আর ওদেরকে বলেছিলাম অবনত মস্তকে দরজায় প্রবেশ কর, আরো বলেছিলাম ‘সবত’ (শনিবার) এর ব্যাপারে বাড়াবাড়ি করো না। আর আমি ওদের নিকট থেকে দৃঢ় অঙ্গীকার নিয়েছিলাম।

(১৫৫) তারা যে শাস্তি পেল তা এই জন্য যে, তারা অঙ্গীকার ভঙ্গ করেছে, ঈশ্বরের নিদর্শন সমূহ অমান্য করেছে, অন্যায়ভাবে বার্তাবাহকদের হত্যা করেছে, এবং “আমাদের অন্তর সমূহ আচ্ছাদিত” একথা বলার কারণে, বরং ঈশ্বর তাদের অস্বীকার করার কারণে তাদের অন্তর সমূহ সীল করে দিয়েছেন,

তাই তারা অল্লই বিশ্বাস করে। (১৫৬) আর তাদের অস্বীকার করার কারণে এবং মারইয়ামের (মেরীর) উপর গুরুতর অপবাদ আরোপ করার কারণে। (১৫৭) আর তাদের একথা বলার কারণে যে, আমরা মারইয়ামের (মেরীর) পুত্র ঈসা মসীহকে (যিশু) হত্যা করেছি যিনি ছিলেন ঈশ্বরের বার্তাবাহক; অথচ তারা না তাঁকে হত্যা করেছে আর না দ্রুশবিদ্ধ বরং ব্যাপারটা তাদের জন্য সন্দিদ্ধ করে দেওয়া হয়েছে। আর যারা এতে মতভেদ করেছে তারা এসম্বন্ধে সন্দিহান হয়ে পড়েছে। তাদের এই ব্যাপারে কোন জ্ঞান নেই, তারা কেবল অনুমান এর উপর ভিত্তি করে চলছে। আর নিঃসন্দেহে তারা তাকে হত্যা করেনি। (১৫৮) বরং ঈশ্বর তাকে নিজের কাছে উঠিয়ে নিয়েছেন। ঈশ্বর পরাক্রমশালী, প্রজ্ঞাময়।

(১৫৯) আর গ্রন্থধারীগণের মধ্যে এমন কেউ নেই যে, মৃত্যুর পূর্বে তার উপর বিশ্বাস আনবে না। আর পুনরুত্থানের দিনে তিনি তাদের উপর সাক্ষী হবেন। (১৬০) অতএব ইহুদীদের অত্যাচারের কারণে আমি ঐ সমস্ত পবিত্র জিনিষ ওদের জন্য অবৈধ করে দিয়েছি যা তাদের জন্য বৈধ ছিল। আর এ কারণে যে, তারা ঈশ্বরের পথে অনেককে বাধা দিত। (১৬১) আর একারণে যে, তারা সুদ গ্রহণ করত অথচ তা থেকে তাদের নিষেধ করা হয়েছিল। আর একারণে যে, তারা অন্যায়ভাবে মানুষের সম্পদ গ্রাস করতো। আর আমি ওদের মধ্যে অস্বীকারকারীদের জন্য যন্ত্রণাদায়ক শাস্তি প্রস্তুত করে রেখেছি। (১৬২) কিন্তু তাদের মধ্যে যারা প্রাজ্ঞ এবং সত্যপরায়ণ, তারা বিশ্বাস করে যা তোমার উপর অবতীর্ণ হয়েছে, আর তোমার পূর্বেও যা অবতীর্ণ হয়েছিল। আর তারা প্রার্থনা করে, উদ্ধৃত্ত সম্পদ থেকে আবশ্যিক দান প্রদান করে, ঈশ্বর ও পরলোকে বিশ্বাস করে। এধরনের লোকদের আমি অবশ্যই বড় প্রতিদান দেব।

(১৬৩) আমি তোমার (পয়গম্বরের) কাছে প্রত্যাদেশ পাঠিয়েছি যেমনভাবে আমি নূহ (নোয়াহ) এবং তার পরবর্তী বার্তাবাহকদের নিকট প্রত্যাদেশ পাঠিয়েছিলাম, আর আমি ইবরাহীম (আব্রাহাম) ও ইসমাইল, ইসহাক (আইজ্যাক) ও ইয়াকুব (জ্যাকব), ইয়াকুবের জাতি ও ঈসা (যিশু) এবং আইয়ুব (জব), ইউনুস (জোনাহ) ও হারুন (অ্যারন) এবং সোলায়মান (সলোমন) এর উপর প্রত্যাদেশ পাঠিয়েছিলাম। আর আমি দাউদকে (ডেভিড) যাবুর (গ্রন্থ) দিয়েছিলাম। (১৬৪) আর আমি এমন বার্তাবাহকদের পাঠিয়েছিলাম যাদের বিবরণ তোমাকে আগেই শুনিয়েছি আর এমন অনেক বার্তাবাহক যাদের বিবরণ তোমাকে শোনাইনি। আর মুসার (মোজেসের) সাথে ঈশ্বর কথা বলেছেন। (১৬৫) ঈশ্বর তাঁর বার্তাবাহকদের সুসংবাদ দাতা ও সর্কর্তকারীরূপে পাঠিয়েছেন যাতে বার্তাবাহকদের পরে ঈশ্বরের বিষয়ে মানুষের কাছে কোন অজুহাত না থাকে। আর ঈশ্বর হলেন পরাক্রমশালী, পরম প্রাজ্ঞ।^১ (১৬৬) তবে ঈশ্বর তোমার কাছে যা অবতীর্ণ করেছেন সে সম্পর্কে তিনি সাক্ষ্য দিচ্ছেন যে, তিনি তা নিজ জ্ঞানে অবতীর্ণ করেছেন আর দেবদূতগণ ও সাক্ষ্য দিচ্ছে, যদিও সাক্ষী হিসাবে ঈশ্বরই যথেষ্ট।

^১ বিঃ দ্রঃ - (৪ঃ ১৬৫) ঈশ্বর সর্ব প্রথম মানুষ সৃষ্টি করলেন, তারপর স্বর্গ ও নরক সৃষ্টি করলেন। মানুষকে পরবর্তীকালে পৃথিবীতে পাঠালেন। এখানে মানুষের ইচ্ছা অনুযায়ী কাজ করার স্বাধীনতা আছে। কিন্তু এই স্বাধীনতা চিরকালীন নয়। এটা সাময়িক ও পরীক্ষার জন্য। ভালো ও মন্দকে পরস্পর থেকে পৃথক করার জন্য। ঈশ্বর লক্ষ্য করেন স্বাধীনতা থাকা সত্ত্বেও কারা বাস্তবসম্মত দৃষ্টিভঙ্গী গ্রহণ করে এবং ঈশ্বরের ইচ্ছার কাছে আত্মসমর্পণ করে।

(১৬৭) যারা অবিশ্বাস করেছে এবং ঈশ্বরের পথে বাধা দিচ্ছে তারা দারুণভাবে বিপথগামী হয়েছে। (১৬৮) যারা অবিশ্বাস করেছে আর অত্যাচার করেছে তাদেরকে ঈশ্বর কখনই ক্ষমা করবেন না, আর তাদেরকে কোন পথ দেখাবেন না, (১৬৯) নরকের পথ ব্যতীত যেখানে তারা চিরদিন থাকবে। আর ঈশ্বরের জন্য তা খুবই সহজ। (১৭০) হে মানুষেরা! তোমাদের কাছে বার্তাবাহক এসেছেন তোমাদের প্রভুর নিকট হতে স্পষ্ট বার্তা নিয়ে। অতএব মেনে নাও এতে তোমাদেরই মঙ্গল হবে। আর যদি না মানো তাহলে আকাশ ও পৃথিবীতে যা কিছু আছে সবই ঈশ্বরের এবং ঈশ্বর মহাজ্ঞানী ও পরম প্রাজ্ঞ।

(১৭১) হে গ্রন্থধারীগণ! তোমাদের ধর্মের ব্যাপারে অতিশয়োক্তি করো না, আর ঈশ্বরের সম্পর্কে সত্যি ছাড়া কোন কথা বলো না। নিশ্চয় মারইয়ামের (মেরীর) পুত্র ঈসা (যিশু) ঈশ্বরের বার্তাবাহক, আর তাঁরই একটি কলেমা (বাণী) যা তিনি মারইয়ামের (মেরীর) কাছে পাঠিয়েছেন আর তাঁরই নিকট হতে আগত একটি আত্মা। অতএব ঈশ্বর ও তাঁর বার্তাবাহকদেরকে বিশ্বাস কর আর একথা বলো না যে - তিনজন (ঈশ্বর) আছেন। বিরত হও, এতে তোমাদের মঙ্গল। উপাস্য তো কেবল মাত্র ঈশ্বরই। তার কোন সন্তান হওয়া থেকে তিনি পবিত্র। আকাশ ও পৃথিবীতে যা কিছু আছে সবই তাঁর। আর অভিভাবক হিসাবে ঈশ্বরই যথেষ্ট। (১৭২) মসীহ কখনই ঈশ্বরের বান্দা (সেবক) হতে সঙ্কোচ করবেন না আর খুব কাছের দেবদূতগণ ও কোন সঙ্কোচ করবেন না, আর যারা ঈশ্বরের উপাসনা করতে লজ্জা করবে এবং অহঙ্কার করবে ঈশ্বর অচিরেই তাদের সবাইকে নিজের কাছে একত্রিত করবেন। (১৭৩) আর যারা মেনে নিয়েছে এবং যারা সৎকর্ম করেছে তাদেরকে তিনি পূর্ণ প্রতিফল দেবেন আর নিজ অনুগ্রহে আরো বেশী দেবেন। আর যারা তাচ্ছিল্য ও অহঙ্কার করেছে তাদের কষ্টদায়ক শাস্তি দেবেন। আর তারা ঈশ্বর ছাড়া কোন বন্ধু বা সাহায্যকারী পাবে না।

(১৭৪) হে মানুষেরা! তোমাদের কাছে তোমাদের প্রভুর নিকট থেকে প্রমাণ এসেছে আর আমি তোমাদের উপর স্পষ্ট আলো অবতরণ করেছি। (১৭৫) অতএব যারা ঈশ্বরকে মেনে নেবে আর দৃঢ়তা পূর্বক তাঁকে ধারন করবে তাদেরকে অবশ্যই ঈশ্বর আপন দয়া ও অনুগ্রহে প্রবেশ করিয়ে নেবেন আর তাদেরকে নিজের দিকের সোজা পথ দেখাবেন। (১৭৬) লোকেরা তোমার কাছে বিধান জানতে চায়। বলঃ ঈশ্বর তোমাদেরকে পরোক্ষ উত্তরাধিকারীদের সম্পর্কে বিধান দেন যে যদি কোন ব্যক্তি মারা যায় আর তার কোন সন্তান না থাকে এবং তার একটি বোন থাকে তাহলে তার পরিত্যক্ত সম্পত্তির অর্ধেক সে পাবে। আবার বোনের কোন সন্তান না থাকলে ভাই তার উত্তরাধিকারী হবে, যদি দুই বোন থাকে তাহলে তারা পাবে পরিত্যক্ত সম্পত্তির দুই তৃতীয়াংশ। আর যদি ভাই ও বোন উভয়েই থাকে তাহলে একজন পুরুষ পাবে দুজন নারীর অংশের সমান। তোমরা বিভ্রান্ত হতে পার বলে ঈশ্বর তোমাদেরকে স্পষ্ট ভাবে বুঝিয়ে দিচ্ছেন। আর ঈশ্বর সবকিছুই সম্যক অবগত।

অধ্যায় ৫ : আল-মায়িদাহ (খাদ্য)

ঈশ্বরের নামে শুরু যিনি পরম করুণাময় ও অতি দয়ালু।

(১) হে বিশ্বাসীগণ! অঙ্গীকার পূর্ণ কর। তোমাদের জন্য চতুষ্পদ প্রজাতির সকল জন্তু বৈধ করা হল। কেবল ঐ সমস্ত জন্তু ছাড়া যাদের উল্লেখ পরবর্তিতে করা হচ্ছে; কিন্তু তীর্থের বিশেষ পোষাক পরিহিত অবস্থায় শিকার বৈধ মনে করবে না। ঈশ্বর যা করতে চান তার নির্দেশ দেন। (২) হে বিশ্বাসীগণ! তোমরা ঈশ্বরের নিদর্শনসমূহের, পবিত্র মাস সমূহের, উৎসর্গের পশুর, গলায় মালা পরানো চিহ্নিত পশুর এবং প্রভুর অনুগ্রহ লাভের আশায় পবিত্র গৃহের উদ্দেশ্যে গমনকারীদের অসম্মান করো না। আর যখন তোমরা

তীর্থের শুভ্র পোষাক খুলে ফেলবে তখন শিকার করতে পার। তোমাদেরকে পবিত্র মসজিদে যেতে বাধা দিয়েছিল বলে কোন সম্প্রদায়ের শত্রুতা যেন তোমাদেরকে সীমালঙ্ঘন করতে প্ররোচিত না করে। তোমরা সৎকাজ ও ধার্মিকতায় একে অপরের সহায়তা কর, পাপ ও অন্যায়ে একে অপরকে সহায়তা করো না। ঈশ্বরকে ভয় কর; নিশ্চয়ই ঈশ্বর কঠোর দণ্ডদাতা।

(৩) তোমাদের জন্য মৃত প্রাণী, রক্ত, শূকরের মাংস, ঈশ্বর ব্যতীত অন্যের নামে উৎসর্গ করা হয়েছে এবং শ্বাসরোধ করে মারা হয়েছে এমন প্রাণী, আঘাত করে মারা হয়েছে এমন প্রাণী, পড়ে গিয়ে মারা গেছে এমন প্রাণী, শিং এর আঘাতে মারা গেছে এমন প্রাণী, হিংস্র জন্তুতে খাওয়া প্রাণী নিষিদ্ধ করা হয়েছে। তবে যা তোমরা বিধি সম্মতভাবে বধ করেছো তা ব্যতীত। এবং যজ্ঞ বেদীতে উৎসর্গকৃত প্রাণী এবং ভাগ্যনির্ধারণ তীর দ্বারা ভাগ্য নির্ণয় করা তোমাদের জন্য নিষিদ্ধ করা হয়েছে। এসব পাপ কাজ। আজ সত্য অস্বীকারকারীরা তোমাদের ধর্মের অনিষ্ট করা থেকে নিরাশ হয়ে গেছে। অতএব তোমরা ওদের ভয় করো না। আজ আমি তোমাদের জন্য তোমাদের ধর্মকে পূর্ণ করে দিলাম। তোমাদের জন্য আমার অনুগ্রহ সম্পন্ন করলাম এবং ধর্ম হিসাবে ইসলামকে তোমাদের জন্য পছন্দ করলাম। তবে ক্ষুধায় কাতর হয়ে পড়লে, পাপ প্রবণ না হলে যদি কেউ নিষিদ্ধ খাবার খেতে বাধ্য হয় তাহলে ঈশ্বরতো ক্ষমাশীল, দয়ালু।

(৪) তারা জিজ্ঞাসা করে যে, ওদের জন্য কি কি জিনিষ বৈধ করা হয়েছে? বলঃ তোমাদের জন্য পবিত্র জিনিষ বৈধ করা হয়েছে। আর তোমরা শিকারী পশুদের মধ্যে যাদের প্রশিক্ষণ দিয়েছ এবং ঈশ্বর তোমাদের যেভাবে শিখিয়েছেন তাদেরকে তোমরা সেভাবেই শিক্ষা দিয়েছ, এরা তোমাদের জন্য যে শিকার ধরে আনে তা তোমরা আহার কর। তবে তার উপরে তোমরা ঈশ্বরের

নাম নেবে, আর ঈশ্বরকে ভয় কর। নিশ্চয়ই ঈশ্বর দ্রুত হিসাব গ্রহণকারী। (৫) আজ তোমাদের জন্য সমস্ত পবিত্র বস্তু সমূহ বৈধ করা হল এবং গ্রন্থধারীদের খাবার ও তোমাদের জন্য বৈধ, আর তোমাদের খাদ্য তাদের জন্য বৈধ। আর তোমাদের জন্য বৈধ করা হল সতী-সাধ্বী বিশ্বাসী নারী ও তোমাদের পূর্বে যাদের গ্রন্থ দেওয়া হয়েছে তাদের সতী-সাধ্বী নারীও যখন তোমরা তাদের যৌতুক দিয়ে বিবাহ করবে, অবৈধ কামবাসনা বা গোপন প্রণয় চরিতার্থ করার জন্য নয়। যারা সত্যকে অবিশ্বাস করেছে তাদের কর্ম নিষ্ফল হয়ে যাবে। পরলোকে সে ক্ষতিগ্রস্তদের অন্তর্ভুক্ত হবে।

(৬) হে বিশ্বাসীগণ! যখন তোমরা প্রার্থনার জন্য উঠবে তখন নিজের মুখমণ্ডল এবং হাতের কনুই পর্যন্ত ধুয়ে নাও আর মস্তক মসাহ (হাত ভিজিয়ে মাথা স্পর্শ) কর এবং গোড়ালির উপরের গাঁঠ পর্যন্ত পা ধুয়ে ফেল। আর যদি তোমরা অপবিত্র অবস্থায় থাকো তাহলে স্নান করে নাও। আর যদি তোমরা রোগাক্রান্ত অথবা ভ্রমণরত অবস্থায় থাকো অথবা তোমাদের কেউ শৌচালয় থেকে (মল-মূত্র ত্যাগ করে) আসে বা তোমাদের মধ্যে কেউ স্ত্রী-মিলন করে আসে এবং তোমরা জল না পাও তাহলে পবিত্র মাটি দ্বারা তায়াম্মুম (বিকল্প বিধিবদ্ধ পদ্ধতিতে পবিত্রতা অর্জন) করে নাও, নিজের মুখমণ্ডল ও হাত মুছে নাও। ঈশ্বর চান না তোমাদের কোন অসুবিধায় ফেলতে; বরং তিনি চান তোমাদের পবিত্র করতে এবং তাঁর কৃপাধন্য করতে যাতে তোমরা কৃতজ্ঞতা প্রকাশকারী হও।

(৭) আর তোমাদের প্রতি ঈশ্বরের অনুগ্রহ ও তোমাদের কাছ থেকে নেওয়া অঙ্গীকারের কথা স্মরণ কর, যখন তোমরা বলেছিলে, আমরা শুনেছি এবং মেনে নিয়েছি। আর ঈশ্বরকে ভয় কর, নিঃসন্দেহে ঈশ্বর মনের কথাও জানেন। (৮) হে বিশ্বাসীগণ! ঈশ্বরের উদ্দেশ্যে ন্যায়ের সাক্ষীরূপে তোমরা

অবিচল থাকো। কোন সম্প্রদায়ের শত্রুতা যেন তোমাকে প্ররোচিত না করে অন্যায় করতে। ন্যায়বিচার কর এটা ঈশ্বরভীরু হওয়ার ঘনিষ্ঠ উপায়। আর ঈশ্বরকে ভয় কর। নিঃসন্দেহে ঈশ্বর জানেন যা তোমরা কর। (৯) যারা বিশ্বাস এনেছে এবং সংকাজ করেছে তাদের প্রতি ঈশ্বরের প্রতিশ্রুতি ক্ষমা, এবং মহা পুরস্কার। (১০) আর যারা অস্বীকার করেছে এবং আমার নিদর্শন সমূহকে মিথ্যা বলেছে, এধরনের লোকেরাই নরকবাসী। (১১) হে বিশ্বাসীগণ! তোমাদের প্রতি ঈশ্বরের অনুগ্রহের কথা স্মরণ কর যখন একটি সম্প্রদায় সিদ্ধান্ত নিয়েছিল যে, তোমাদের উপর হাত ওঠাবে; কিন্তু ঈশ্বর তোমাদের প্রতি তাদের হাত নিবৃত্ত করেছিলেন। আর ঈশ্বরকে ভয় কর। বিশ্বাসীগণের উচিৎ ঈশ্বরের উপরেই নির্ভর করা।

(১২) ঈশ্বর ইসরায়েলীর সন্তানদের নিকট থেকে অঙ্গীকার নিয়েছিলেন এবং আমি ওদের মধ্য থেকে ১২ জন নেতা নিযুক্ত করেছিলাম। ঈশ্বর বলেছিলেন আমি তোমাদের সঙ্গে আছি। যদি তোমরা প্রার্থনা সুসম্পন্ন কর, যথাবিহিত দান প্রদান কর, আর আমার পয়গম্বরের উপর বিশ্বাস স্থাপন কর ও তাদেরকে সহায়তা কর এবং ঈশ্বরকে উত্তম ঋণ দাও তাহলে আমি তোমাদের পাপসমূহ অবশ্যই মোচন করে দেব এবং অবশ্যই তোমাদের এমন উদ্যান সমূহে স্থান দেব যার পাদদেশ দিয়ে নদী প্রবাহিত হয়; কিন্তু এরপরও তোমাদের মধ্যে হতে যে ব্যক্তি অঙ্গীকার করবে সে অবশ্যই সরল পথ হতে বিচ্যুত হবে। (১৩) অতএব তাদের দ্বারা বার বার অঙ্গীকার ভঙ্গের কারণে আমি তাদেরকে প্রত্যাখ্যান করেছি এবং তাদের হৃদয় কঠিন করে দিয়েছি। তারা বাক্যের সঠিক অর্থ বিকৃত করে এবং তাদেরকে যে উপদেশ দেওয়া হয়েছিল তার একটা বড় অংশ তারা ভুলে বসে আছে। তাদের অল্প কয়েকজন ছাড়া, তুমি নিরন্তর তাদের কোন না কোন বিশ্বাসঘাতকতা

করতে দেখতে পারে। তাদেরকে ক্ষমা কর আর উপেক্ষা কর, ঈশ্বর সংকর্মশীলদের ভালবাসেন।

(১৪) আর যারা বলে ‘আমরা খৃষ্টান’ ওদের থেকেও আমি অঙ্গীকার নিয়েছিলাম; কিন্তু তাদেরকে যে উপদেশ দিয়েছিলাম তার একটা বড় অংশ তারাও ভুলে বসেছে। অতঃপর আমি শেষ বিচারের দিন পর্যন্ত তাদের মধ্যে ঈর্ষা ও শত্রুতা সঞ্চার করে দিয়েছি। অচিরেই ঈশ্বর তাদেরকে তাদের কৃতকর্ম সম্পর্কে অবহিত করবেন !

(১৫) হে গ্রন্থধারীরা! তোমাদের নিকট আমার বার্তাবাহক এসেছে, সে ঈশ্বরের গ্রন্থের ঐ সমস্ত কথা তোমাদের সামনে প্রকাশ করেছে যা তোমরা গোপন কর। আর তিনি অনেক কিছুই মার্জনা করেছেন। নিঃসন্দেহে তোমাদের কাছে ঈশ্বরের তরফ হতে এক বিশেষ আলো ও একটি স্পষ্ট গ্রন্থ এসেছে। (১৬) এর মাধ্যমে ঈশ্বর ঐ লোকদের শান্তির পথ দেখান যারা তাঁর সন্তুষ্টি লাভ করতে চায় এবং তিনি নিজ কৃপায় তাদেরকে অন্ধকার থেকে আলোতে নিয়ে আসেন আর সোজা পথে তাদের পরিচালিত করেন। (১৭) নিঃসন্দেহে ঐ লোকেরাই তো অস্বীকার করে যারা বলে মারইয়ামের (মেরী)পুত্র মসীহ (যিশু) ঈশ্বর। বলঃ ঈশ্বরের ইচ্ছার বিরুদ্ধে যাওয়ার সাধ্য কার আছে? তিনি যদি চান মসীহকে, আর তার মাকে আর পৃথিবীর সমস্ত লোককে মৃত্যু প্রদান করবেন। আকাশ, পৃথিবী ও তার মধ্যবর্তী সবকিছুই তাঁর সম্রাজ্য। তিনি যা চান সৃষ্টি করেন। ঈশ্বর সবকিছু করতে সক্ষম।

(১৮) ইহুদী ও খৃষ্টানরা বলে ‘আমরা ঈশ্বরের সন্তান ও তাঁর প্রিয়জন।’ তুমি বলে দাওঃ তাহলে তিনি তোমাদের পাপের কারণে শাস্তি দেন কেন? বস্তুতঃ তোমরাও তাঁর সৃষ্টির মধ্যে এক মানুষ। তিনি যাকে ইচ্ছা ক্ষমা

করবেন আর যাকে ইচ্ছা শাস্তি দেবেন। আকাশ, পৃথিবী, ও তার মধ্যবর্তী সব কিছুই ঈশ্বরেরই এবং তাঁর কাছেই সবাইকে ফিরে যেতে হবে। (১৯) হে গ্রন্থাধারীগণ! তোমাদের নিকটে আমার বার্তাবাহক এসেছে, সে তোমাদেরকে স্পষ্টভাবে বুঝিয়ে দিচ্ছে, বার্তাবাহকদের আগমন ধারায় একটি বিরতির পর, যাতে তোমরা একথা না বলো যে, আমাদের কাছে কোন সুসংবাদদাতা কিংবা সতর্ককারী আসেনি। অতএব এখন তোমাদের কাছে সুসংবাদদাতা ও সতর্ককারী এসে গেছে। আর ঈশ্বর সবকিছু করতে সক্ষম।

(২০) আর যখন মুসা (মোজেস) তার লোকদের বলেছিলঃ হে আমার সম্প্রদায়! তোমাদের উপর ঈশ্বরের অনুগ্রহ স্মরণ কর যে, তিনি তোমাদের মধ্যে বহু বার্তাবাহক পাঠিয়েছেন এবং তোমাদেরকে রাজাধিপতি করেছেন। আর তোমাদেরকে এমন জিনিষ নির্ধারিত করে দিয়েছেন যা পৃথিবীর কাউকে দেননি। (২১) হে আমার সম্প্রদায়! ঐ পবিত্র ভূমিতে প্রবেশ কর, যা ঈশ্বর তোমাদের জন্য নির্ধারিত করে দিয়েছেন। আর পশ্চাদপদসরণ করো না তাহলে ক্ষতিগ্রস্ত হবে। (২২) তারা বললঃ হে মুসা (মোজেস)! ওখানে তো একদল মহাশক্তির লোক আছে। আমরা কখনই ওখানে যাব না যতক্ষণ না তারা ওখান থেকে বের হয়ে যায়। যদি তারা বেরিয়ে যায় তাহলে আমরা প্রবেশ করবো। (২৩) ওদের মধ্যে দুই ঈশ্বরভীরু ব্যক্তি, যাদের প্রতি ঈশ্বর অনুগ্রহ করেছিলেন, তারা বললঃ তোমরা ওদের উপর (আক্রমণ করে নগরের) ফটকে প্রবেশ কর। যখন তোমরা ওখানে প্রবেশ করবে তখন তোমরাই বিজয় লাভ করবে আর ঈশ্বরের উপরই ভরসা কর যদি তোমরা বিশ্বাসী হও। (২৪) তারা বললঃ হে মুসা (মোজেস)! আমরা কখনই ওখানে প্রবেশ করবো না যতক্ষণ ঐ লোকেরা থাকবে। অতএব তুমি আর তোমার প্রতিপালক দুজনে লড়াই কর, আমরা এখানে বসে আছি।

(২৫) মুসা (মোজেস) বললঃ হে আমার প্রভু! আমি ও আমার ভাই ছাড়া অন্যদের উপর আমার অধিকার নেই। অতএব তুমি আমাদের উভয়কে এই কৃতঘ্ন সম্প্রদায়ের থেকে আলাদা করে দাও। (২৬) ঈশ্বর বললেন : তাহলে ঐ পবিত্র ভূমি ওদের জন্য চল্লিশ বৎসর পর্যন্ত নিষিদ্ধ করে দেওয়া হল। এরা পৃথিবীতে দিকভ্রান্ত হয়ে ঘুরতে থাকবে। অতএব তুমি এই অবাধ্য সম্প্রদায়ের জন্য দুঃখিত হয়েও না।

(২৭) আর ওদেরকে আদমের (অ্যাডামের) দুই পুত্রের (হাবীল, কাবীল) ঘটনা ঠিকঠাক ভাবে শোনাও। যখন তারা দুজনে নৈবেদ্য সাজিয়ে ছিল তখন একজনের নৈবেদ্য গৃহিত হয়েছিল আর অপরজনের নৈবেদ্য গৃহিত হয়নি। তখন দ্বিতীয়জন বলল আমি তোমাকে খুন করে ফেলব তখন প্রথমজন বলল ঈশ্বর কেবল ন্যায়নিষ্ঠ ব্যক্তির নৈবেদ্য গ্রহণ করেন। (২৮) তুমি যদি আমাকে হত্যা করার জন্য হাত ওঠাও তাহলে আমি তোমাকে হত্যা করার জন্য তোমার উপরে হাত ওঠাবো না। আমি ঈশ্বরকে ভয় করি যিনি বিশ্বজগতের প্রভু। (২৯) আমি চাই তুমি আমার ও তোমার দুজনের পাপ মাথায় নিয়ে নরকের অধিবাসীদের অন্তর্ভুক্ত হও। আর এটাই অত্যাচারীদের শাস্তি।

(৩০) অতঃপর তার কু-প্রবৃত্তি তাকে নিজের ভাইকে হত্যা করার জন্য প্ররোচিত করল এবং সে তাকে হত্যা করেই ফেললো। আর সে ক্ষতি গ্রস্তদের অন্তর্ভুক্ত হয়ে পড়ল। (৩১) তখন ঈশ্বর একটি কাক পাঠালেন যে মাটি খুঁড়ছিল যাতে সে তাকে শেখাতে পারে কিভাবে সে তার ভাই এর লাশকে ঢাকবে। সে বললঃ ধিক্ আমাকে ! আমি ঐ কাকের মতও হতে পারলাম না যে আমার ভাইয়ের লাশকে ঢাকতে পারতাম। অতঃপর সে খুবই অনুতপ্ত হল।

(৩২) এজন্যেই আমি ইসরাঈলের সন্তানদের জন্য বিধান দিয়েছি যে, যে ব্যক্তি কোন মানুষ হত্যার প্রতিশোধ ছাড়া কিংবা পৃথিবীতে অশান্তি সৃষ্টির অভিযোগ ছাড়া কাউকে হত্যা করল সে যেন সব মানুষকেই হত্যা করল, আবার কেউ যদি কারো জীবন রক্ষা করল সে যেন সব মানুষেরই জীবন রক্ষা করল। আমার বার্তাবাহকগণ তো তাদের নিকট স্পষ্ট নির্দেশ নিয়ে এসেছিল। তা সত্ত্বেও তাদের অনেকেই পৃথিবীতে সীমালঙ্ঘন করে চলেছে। (৩৩) যারা ঈশ্বর ও তার বার্তাবাহকের বিরুদ্ধে যুদ্ধ করে আর পৃথিবীতে অশান্তি করে বেড়ায় তাদের শাস্তি এটাই যে, তাদেরকে হত্যা করা হবে অথবা ক্রুশ বিদ্ধ করা হবে অথবা বিপরীত দিক থেকে তাদের হাত পা কেটে দেওয়া হবে অথবা তাদের দেশ থেকে বহিষ্কার করা হবে। এটা হল তাদের জন্য দুনিয়ার লাঞ্ছনা আর পরলোকেও তাদের জন্য রয়েছে বড় শাস্তি। (৩৪) তারা ব্যতীত যারা গ্রেফতার হওয়ার পূর্বে অনুশোচনা করে নিজেকে শুধরে নেয়, জেনে রেখে ঈশ্বর ক্ষমাশীল ও অতি দয়ালু।

(৩৫) হে বিশ্বাসীগণ! তোমরা ঈশ্বরকে ভয় কর আর তাঁর নৈকট্য অন্বেষণ কর আর তাঁর পথে সংগ্রাম কর যাতে তোমরা সফল হতে পার। (৩৬) নিঃসন্দেহে যারা অস্বীকার করেছে যদি তাদের কাছে পৃথিবীর সবকিছুই থাকে এবং তার সাথে আরো সমপরিমাণ সম্পদ থাকে এবং তারা শেষ বিচারের দিনের শাস্তি হতে নিষ্কৃতি পাওয়ার জন্য অর্থ-দণ্ড হিসাবে সমস্ত কিছু দিতে চায় তবুও তাদের নিকট থেকে তা গ্রহণ করা হবে না, তাদের জন্য যন্ত্রণাদায়ক শাস্তি অবধারিত আছে। (৩৭) তারা চাইবে আগুন থেকে বের হয়ে যেতে; কিন্তু তারা সেখান থেকে বেরোতে পারবে না, তাদের জন্য স্থায়ী শাস্তি রয়েছে। (৩৮) পুরুষ চোর এবং নারী চোর উভয়ের হাত কেটে দাও। এটা তাদের কৃতকর্মের প্রতিফল এবং ঈশ্বরের পক্ষ হতে এক

দৃষ্টান্তমূলক শাস্তি। আর ঈশ্বর পরাক্রমশালী, প্রজ্ঞাময়। (৩৯) তবে কেউ যদি অন্যায় করার পর অনুশোচনা করে আর নিজেকে শুধরে নেয় তবে নিঃসন্দেহে ঈশ্বর তাদের ক্ষমা করবেন। ঈশ্বরতো ক্ষমাশীল, দয়ালু। (৪০) তুমি কি জান না যে, আকাশ ও পৃথিবীর আধিপত্য শুধু ঈশ্বরেরই? তিনি যাকে চান শাস্তি দেন আর যাকে চান ক্ষমা করেন। ঈশ্বর সবকিছুই করতে সক্ষম।

(৪১) হে পয়গম্বর! যারা সত্য অস্বীকার করার জন্য পরস্পরের মধ্যে প্রতিযোগীতা করে তাদের জন্য দুঃখিত হয়ো না। তারা মুখে বলে - আমরা বিশ্বাস করলাম কিন্তু তাদের অন্তরে কোন বিশ্বাস নেই। ইহুদীদের মধ্যে একদল আছে যারা মিথ্যা শুনতে আগ্রহী, তারা অন্য একদল লোকের কথাও শুনছে যারা তোমার কাছে আসেনি। তারা শব্দ সমূহের সঠিক অর্থ বিকৃত করে। তারা লোকদের বলে যে, যদি তোমাদের এই নির্দেশ আসে তাহলে মেনে নেবে আর এই নির্দেশ না আসলে তা থেকে দূরে থাকবে। আসলে যাকে ঈশ্বর পরীক্ষার মধ্যে নিক্ষেপ করতে চান তার জন্য তুমি ঈশ্বরের ইচ্ছার বিরুদ্ধে কিছুই করতে পারবে না। এরাই সেই সমস্ত লোক যাদের অন্তর ঈশ্বর পবিত্র করতে চান না। তাদের জন্য পৃথিবীতে আছে লাঞ্ছনা আর পরলোকে রয়েছে ভয়ানক শাস্তি।

(৪২) তারা মিথ্যা শুনতে খুবই আগ্রহী, হারাম (অবৈধ ভাবে উপার্জিত সম্পদ) খেতে অভ্যস্ত। যদি তারা তোমার কাছে (বিচারের জন্য) আসে তাহলে চাইলে ওদের মধ্যে ফয়সালা করে দাও অথবা উপেক্ষা কর। যদি তুমি তাদের উপেক্ষা কর তাহলে তারা তোমার কোনই ক্ষতি করতে পারবে না। আর যদি তুমি ফয়সালা কর তাহলে সুবিচার কর। নিশ্চয়ই ঈশ্বর সুবিচারকারীদের ভালবাসেন। (৪৩) তারা কিভাবে তোমাকে সালিশী মানবে? যখন ওদের কাছে তৌরাত (তোরাহ) আছে যাতে ঈশ্বরের বিধান বিদ্যমান আছে। এর পরেও তারা এথেকে বিমুখ হচ্ছে। আর এরা কখনই সত্য বিশ্বাস স্থাপনকারী নয়।

(৪৪) নিশ্চয়ই আমি তৌরাত (তোরাহ) অবতীর্ণ করেছি যাতে জ্যোতি সন্মিলিত পথ নির্দেশ আছে। ঐ তৌরাত (তোরাহ) অনুযায়ী ঈশ্বরের কৃতজ্ঞ বার্তা-বাহকেরা ইহুদীদের মধ্যে বিচার কাজ সম্পন্ন করত, আর তাদের ধর্ম-যাজকেরা ও শাস্ত্রবিদগণও। এজন্য যে, তাদেরকে ঈশ্বরের গ্রন্থের সংরক্ষক নিযুক্ত করা হয়েছিল আর তারা এর সাক্ষীও ছিল। অতএব তুমি মানুষকে ভয় করো না আমাকে ভয় কর, আর নগণ্য মূল্যে আমার বাণী সমূহ বিক্রি করো না। আর যারা ঈশ্বরের অবতীর্ণ বিধান অনুযায়ী বিচার না করে তারাই সত্য প্রত্যাখ্যানকারী। (৪৫) আর আমি ঐ গ্রন্থে (তৌরাতে) তাদের জন্য বিধিবদ্ধ করেছিলাম যে, প্রাণের বদলে প্রাণ, চোখের বদলে চোখ, নাকের বদলে নাক, কানের বদলে কান, দাঁতের বদলে দাঁত এবং আঘাতের বদলে সমান আঘাত। তবে কেউ ক্ষমা করে দিলে তা তার জন্য পাপের প্রায়শ্চিত্ত হবে। আর যারা ঈশ্বরের অবতীর্ণ বিধান অনুযায়ী ফয়সালা না করে তারাই অত্যাচারী। (৪৬) আর তাদের পরপরই আমি মারইয়ামের (মেরী) পুত্র ঈসাকে (যিশু) পাঠিয়েছি। সে ছিল তার পূর্ববর্তী গ্রন্থের অর্থাৎ তৌরাতের (তোরাহ) সত্যায়নকারী। আর আমি তাকে ইনজীল (বাইবেল) গ্রন্থ দিয়েছি, যাতে আছে পথ-নির্দেশ ও আলো এবং যা তার পূর্ববর্তী গ্রন্থ তৌরাতের (তোরাহ) সত্যায়নকারী আর ঈশ্বর-ভীরুদের জন্য পথ-নির্দেশ ও উপদেশ। (৪৭) ইনজীলে (বাইবেল) ঈশ্বর যে বিধান অবতীর্ণ করেছেন ইনজীল (বাইবেল) ধারীরা যেন সেই অনুসারে বিচার করে। আর যারা ঈশ্বরের অবতীর্ণ বিধান অনুসারে ফয়সালা করে না, তারা অকৃতজ্ঞ।

(৪৮) আর আমি তোমার উপরেও যথার্থই গ্রন্থ অবতীর্ণ করেছি যা তার পূর্ববর্তী গ্রন্থের সত্যায়নকারী আর তার বিষয়সমূহের সংরক্ষক। অতএব ঈশ্বরের বিধান অনুসারে তাদের মধ্যে বিচার মীমাংসা কর আর তোমার কাছে

আগত সত্য ছেড়ে তাদের ইচ্ছাকে প্রশ্রয় দিও না। আমি তোমাদের প্রত্যেকের জন্য একটি ধর্ম-বিধান ও একটি কর্ম-পথ নির্ধারণ করেছি। আর যদি ঈশ্বর চাইতেন তবে তোমাদেরকে একই সম্প্রদায় করে দিতেন; কিন্তু ঈশ্বর চাইলেন তাঁর দেওয়া নির্দেশে তোমাদের পরীক্ষা নিতে। অতএব তোমরা ভালর দিকে দৌড়াও। অবশেষে ঈশ্বরের কাছেই সবার প্রত্যাবর্তন। অতঃপর তিনিই ঠিক করে দেবেন যে বিষয়ে তোমরা মতভেদ করছিলে।

(৪৯) আর তুমি ঈশ্বরের অবতীর্ণ বিধান অনুসারে ওদের মধ্যে বিচার-মীমাংসা কর, ওদের ইচ্ছাকে প্রশ্রয় দিও না এবং তুমি ওদের থেকে সাবধান থেকো যাতে তারা তোমাকে ঈশ্বরের অবতীর্ণ কতিপয় বিধান থেকে দূরে সরিয়ে না দিতে পারে। অনন্তর তারা যদি মুখ ফিরিয়ে নেয় তাহলে জানবে যে, ঈশ্বর ওদের কিছু পাপের শাস্তি দিতে চান। আর আসল কথা এই যে, মানুষের মধ্যে অনেকেই অবাধ্য। (৫০) এরা কি অন্ধকার যুগের বিচার-মীমাংসা কামনা করে? আর দৃঢ় বিশ্বাসীদের কাছে মীমাংসা কার্যে ঈশ্বরের চেয়ে কে উত্তম হবে?

(৫১) হে বিশ্বাসীগণ! ইহুদী আর খৃষ্টানদের বন্ধু হিসাবে গ্রহণ করো না। তারা পরস্পর পরস্পরের বন্ধু। আর তোমাদের মধ্যে যে ব্যক্তি ওদের সাথে বন্ধুত্ব করবে সে ওদেরই দলভুক্ত হবে। ঈশ্বর অত্যাচারী লোকদের পথ দেখান না। (৫২) তুমি দেখতে পাচ্ছ যে, যাদের অন্তরে ব্যাধি আছে তারা ওদের দিকেই ধাবিত হচ্ছে। তারা বলে “আমাদের এই আশঙ্কা হয় যে, আমরা কোন বিপদে না পড়ে যাই”। তবে অচিরেই ঈশ্বর বিজয় দান করবেন তখন তারা ওদের মনে যা লুকিয়ে রাখত সেজন্য অনুতপ্ত হবে। (৫৩) আর তখন বিশ্বাসীরা বলবেঃ এরাই কি তারা যারা ঈশ্বরের নামে জোরাল শপথ করে বলেছিল আমরা তোমাদের সাথেই আছি। ওদের কর্মসমূহ নিষ্ফল হয়ে গেছে এবং তারা ক্ষতিগ্রস্ত হয়েছে।

(৫৪) হে বিশ্বাসীগণ! তোমাদের মধ্যে যারা স্বীয় ধর্ম ত্যাগ করবে তাদের স্থলে ঈশ্বর এমন একদল লোক নিয়ে আসবেন যারা ঈশ্বরের প্রিয় হবেন এবং ঈশ্বরও ওদের প্রিয় হবেন। তারা বিশ্বাসীদের প্রতি কোমল আর অবিশ্বাসীদের প্রতি কঠোর হবেন। তারা ঈশ্বরের পথে সংগ্রাম (ধর্ম পথে কঠোর সাধনা) করবে এবং কোন নিন্দুকের নিন্দায় ভীত হবে না। এটা ঈশ্বরের অনুগ্রহ, তিনি যাকে ইচ্ছা তাকে দান করেন। ঈশ্বর প্রাচুর্যদানকারী ও মহাজ্ঞানী। (৫৫) বস্তুত তোমাদের বন্ধুতো ঈশ্বর, তাঁর বার্তাবাহক আর বিশ্বাসীগণ, যারা বিনয়ান্বিত হয়ে প্রার্থনা সুসম্পন্ন করে ও সম্পদের উদ্বৃত্ত যথানিয়মে দান করে। (৫৬) আর যে ব্যক্তি ঈশ্বর, তাঁর বার্তাবাহক ও বিশ্বাসীদেরকে বন্ধু রূপে গ্রহণ করে, তার জন্য উচিতঃ নিঃসন্দেহে ঈশ্বরের দলই বিজয় প্রাপ্ত হবে।

(৫৭) হে বিশ্বাসীগণ! তোমাদের পূর্ববর্তী গ্রন্থধারীদের মধ্যে যারা তোমাদের ধর্মকে উপহাস ও খেলার বস্তু মনে করে তাদেরকে ও সত্য অস্বীকারকারীদেরকে বন্ধুরূপে গ্রহণ করো না। আর ঈশ্বরকে ভয় কর, যদি তোমরা যথার্থই বিশ্বাসী হয়ে থাক। (৫৮) তোমরা যখন প্রার্থনার জন্য আহ্বান কর তখন তারা এটাকে উপহাস করে আর খেলার বস্তু মনে করে। এর কারণ তারা নির্বোধ। (৫৯) বলঃ হে গ্রন্থধারীরা! তোমরা আমাদের সাথে কেবল এজন্যই বৈরী-আচরণ করছো যে, আমরা ঈশ্বরের প্রতি এবং আমাদের প্রতি যা অবতীর্ণ হয়েছে এবং আমাদের পূর্বে যা অবতীর্ণ হয়েছে তার প্রতি বিশ্বাস স্থাপন করেছি। আর তোমাদের মধ্যে অধিকাংশ লোকই সত্য - অস্বীকারকারী। (৬০) বলঃ আমি কি তোমাদের বলবো ওকথা যা ঈশ্বরের নিকট পরিণাম অনুসারে এর চেয়েও খারাপ? ঈশ্বর যাদের অভিশাপ দিয়েছেন এবং যাদের উপর ক্রুদ্ধ হয়েছেন, এবং যাদের কতককে বানর ও শূকরে পরিণত করে দিয়েছেন ও যারা শয়তানের পূজা করেছে, এধরনের লোকেরাই পরিস্থিতি

অনুযায়ী সবচেয়ে নিকৃষ্ট এবং সৎপথ থেকে অনেক দূরে।^১

(৬১) আর তারা যখন তোমাদের কাছে আসে তখন বলে আমরা বিশ্বাস করেছি, অথচ তারা অবিশ্বাস (করার সিদ্ধান্ত) নিয়ে এসেছিল এবং অবিশ্বাস নিয়েই বেরিয়ে গেছে। তারা যা গোপন করে ঈশ্বর তা ভালভাবেই জানেন। (৬২) তুমি তাদের অনেককে পাপ, অন্যায় ও নিষিদ্ধ খাদ্য বিষয়ে তৎপর দেখবে। তারা যা করছে আসলে তা খুবই খারাপ। (৬৩) ওদের ধর্মযাজকেরা ও পণ্ডিতরা ওদের পাপের কথা বলতে ও নিষিদ্ধ বিষয় থেকে বিরত থাকতে নিষেধ করছে না কেন ? তারা যা করছে তা আসলে খুবই খারাপ।

(৬৪) আর ইহুদীরা বলে ঈশ্বরের হাত বাঁধা। এই কথা বলার জন্য তাদের হাত বাঁধা হোক এবং তারা অভিশপ্ত হোক ! বরং তাঁর (ঈশ্বরের) দুই হাত মুক্ত। তিনি যেভাবে চান ব্যয় করেন। আর তোমার উপর তোমার প্রভুর তরফ হতে যা কিছু অবতীর্ণ হয়েছে নিশ্চয়ই তা অনেকের অবাধ্যতা ও অবিশ্বাস বাড়িয়ে দেবে। আর আমি ওদের মধ্যে শত্রুতা এবং ঈর্ষা অস্তিম দিবস পর্যন্ত স্থায়ী করে দিয়েছি। তারা যখনই যুদ্ধের আগুন প্রজ্জ্বলিত করে ঈশ্বর তা নিভিয়ে দেন। তারা পৃথিবীতে অশান্তি ছড়িয়ে বেড়ায়। ঈশ্বর অশান্তি সৃষ্টিকারীদের পছন্দ করেন না।

(৬৫) গ্রন্থধারীরা যদি বিশ্বাস করত আর ঈশ্বরকে ভয় করত তাহলে আমি অবশ্যই তাদের মন্দগুলো তাদের থেকে দূর করে দিতাম আর তাদেরকে

^১ বিঃদ্রঃ- (৫ঃ৬০) এখানে শাব্দিক অর্থে নয় বরং প্রতীকী অর্থে তাদের নৈতিক অধঃপতনের কথা বলা হয়েছে। শারিরীকভাবে তারা ঐ সমস্ত প্রানীতে রূপান্তরিত হয় নি বরং তাদের চরিত্র ও আচরণ বানর ও শুকরের মতো হয়ে গিয়েছিল।

সুখের উদ্যানে প্রবেশ করাতাম। (৬৬) তারা যদি তৌরাত (তোরাহ), ইঞ্জিল (বাইবেল) এবং তাদের প্রভুর নিকট থেকে তাদের উপর যা অবতীর্ণ হয়েছে তা সঠিক ভাবে মেনে চলত তাহলে তারা উপর থেকে এবং তাদের পায়ের নিচ থেকে খাদ্যের যোগান পেত। তাদের মধ্যে কিছু লোক সোজা পথে আছে; কিন্তু তাদের মধ্যে অধিকাংশ লোক খারাপ করছে।

(৬৭) হে পয়গম্বর! তোমার কাছে তোমার প্রভুর পক্ষ থেকে যা অবতীর্ণ হয়েছে তা তুমি পৌঁছে দাও। আর যদি তুমি এমন না কর তাহলে তো তুমি ঈশ্বরের বার্তা পৌঁছে দিলে না। আর ঈশ্বর তোমাকে মানুষের থেকে রক্ষা করবেন। অবশ্যই ঈশ্বর অস্বীকারকারীদের পথ দেখান না।

(৬৮) বলে দাও : হে গ্রন্থধারীরা! যতক্ষণ তোমরা তৌরাত (তোরাহ), ইঞ্জিল (বাইবেল) এবং তোমাদের কাছে তোমাদের প্রভুর পক্ষ থেকে যা অবতীর্ণ হয়েছে তা সঠিকভাবে না মেনে চলবে ততক্ষণ তোমরা কোন পথেই নেই। আর যা কিছু তোমাদের প্রভুর পক্ষ থেকে তোমাদের উপর অবতীর্ণ হয়েছে নিশ্চিতভাবে তা অনেকের অবাধ্যতা ও অবিশ্বাস বাড়িয়ে দেবে। অতএব অবিশ্বাসীদের জন্য দুঃখ করো না। (৬৯) নিঃসন্দেহে যারা বিশ্বাস স্থাপন করেছে, এবং ইহুদী, অগ্নি উপাসক এবং খৃষ্টানদের মধ্যে যারা ঈশ্বর ও পরলোকের উপর বিশ্বাস স্থাপন করবে এবং ভাল কাজ করবে, তাদের কোন ভয় নেই আর তারা দুঃখিত হবে না।

(৭০) আমি ইসরাইলের সন্তানদের নিকট থেকে প্রতিজ্ঞা নিয়েছিলাম এবং তাদের নিকট অনেক বার্তাবাহক পাঠিয়েছিলাম। যখন কোন বার্তাবাহক তাদের কাছে এমন বিষয় নিয়ে আসতে। যা তাদের মনঃপুত হত না তখনই তারা কতককে মিথ্যুক বলত আবার কতককে হত্যা করে দিত।

(৭১) আর তারা মনে করেছিল যে তাদের কোন ক্ষতি হবে না। অতএব তারা অন্ধ ও বধির হয়ে গেল। তারপর ঈশ্বর তাদের প্রতি করুণার দৃষ্টিতে তাকালেন। এরপর ও তাদের মধ্যে অনেকে অন্ধ ও বধির হয়ে রইল। আর তারা যা কিছু করছে ঈশ্বর দেখছেন।

(৭২) যারা বলে- ঈশ্বর হলেন মারইয়ামের (মেরী) পুত্র মসীহ (যিশু), তারা নিশ্চয়ই অস্বীকারকারী হয়ে গেছে। অথচ মসীহ বলেছিলেন হে ইসরাইলের সন্তান! ঈশ্বরের উপাসনা কর যিনি আমার প্রভু এবং তোমাদেরও প্রভু। যে ঈশ্বরের সাথে অংশীদার স্থির করে, ঈশ্বর তার জন্য স্বর্গ অবৈধ করে দিয়েছেন এবং তার বাসস্থান নরক। আর এরূপ অত্যাচারীদের কোন সাহায্যকারী নেই। (৭৩) যারা বলে ঈশ্বর তিনজনের মধ্যে একজন তারা নিশ্চয়ই অস্বীকারকারী হয়ে গেছে, অথচ এক উপাস্য ছাড়া কোনই উপাস্য নেই। তারা যদি এ ধরনের কথা বলা থেকে বিরত না হয় এবং অস্বীকার করার উপর অটল থাকে, তাহলে তাদেরকে যন্ত্রনাদায়ক শাস্তি গ্রাস করবে। (৭৪) এরা ঈশ্বরের সামনে অনুশোচনা করছে না কেন, আর তাঁর নিকট ক্ষমা চাইছে না কেন? আর ঈশ্বর তো ক্ষমাশীল ও অতি দয়ালু। (৭৫) মারইয়ামের (মেরী) পুত্র মসীহ (যিশু) তো কেবল একজন বার্তাবাহক, তার পূর্বেও বহু বার্তাবাহক চলে গেছে। আর তার মা একজন সত্যনিষ্ঠা মহিলা ছিল, তারা উভয়ে (অন্যান্য মানুষের মতো) খাবার খেত। দেখ আমি পরিস্কারভাবে ওদের সামনে প্রমাণসমূহ বর্ণনা করছি। আবার দেখ কিভাবে তারা বিপরীত দিকে চলে যাচ্ছে। (৭৬) বলঃ তোমরা কি ঈশ্বরকে ছেড়ে এমন জিনিষের উপাসনা করছো যা তোমাদের ক্ষতি করতে ও পারে না, বা উপকার করতে ও পারে না। আর ঈশ্বরই সবকিছু শোনেন আর সবকিছুই জানেন।

(৭৭) বলঃ হে গ্রন্থধারীরা! নিজ ধর্মে অনুচিত অতিশয়োক্তি করো না আর ওদের ইচ্ছানুসারে কাজ করো না, যারা ইতিপূর্বে বিপথগামী হয়েছে এবং যারা অনেককে বিপথগামী করেছে তারা সঠিক পথ থেকে বিচ্যুত হয়েছে।

(৭৮) ইসরাইলের সন্তানদের মধ্যে যারা অস্বীকার করেছিল তারা দাউদ (ডেভিড) ও মারইয়ামের (মরী) পুত্র ঈসা (যিশু) কর্তৃক অভিশপ্ত হয়েছিল। কারণ তারা অস্বীকার করত আর সীমালঙ্ঘন করত। (৭৯) তারা যে নিকৃষ্ট কাজ করত তা থেকে একে অপরকে নিষেধ করত না। তারা যা যা করত তা অবশ্যই খারাপ। (৮০) তুমি ওদের মধ্যে অনেককে দেখবে যে, তারা অবিশ্বাসীদের সাথে বন্ধুত্ব করে। তারা নিজেদের জন্য যা সঞ্চয় করেছে তা কতই নিকৃষ্ট। যে কারণে ঈশ্বর তাদের উপর ক্রুদ্ধ হয়েছেন তারা চিরকাল যন্ত্রণার মধ্যে থাকবে। (৮১) যদি তারা ঈশ্বর ও বার্তাবাহককে বিশ্বাস করত এবং যা তাদের উপর অবতীর্ণ হয়েছে তার উপর, তাহলে তারা অবিশ্বাসীদের সাথে বন্ধুত্ব রাখত না; কিন্তু তাদের মধ্যে অনেকেই অবিশ্বাসী।

(৮২) বিশ্বাসীগণের কঠোর শত্রু হিসাবে ইহুদী ও বহু ঈশ্বরবাদীদের দেখতে পাবে। আর বিশ্বাসীদের সঙ্গে ঘনিষ্ঠ হৃদয়তা পোষণকারী হিসাবে তুমি ওদের দেখবে যারা বলে আমরা খৃষ্টান। এর কারণ এদের মধ্যে পুরোহীত ও পাদ্রীরা রয়েছে এবং তারা অহংকার করে না। (৮৩) আর তারা যখন বার্তাবাহকের নিকট অবতীর্ণ বাণী শোনে তখন দেখবে যে, তাদের চোখ দিয়ে অশ্রু ঝরে পড়ছে এজন্য যে, তারা সত্যকে চিনতে পেরেছে। তারা বলে হে আমাদের প্রভু! আমরা বিশ্বাস করি। অতএব আপনি আমাদেরকে সাক্ষ্য দাতাদের তালিকাভুক্ত করে নিন। (৮৪) আর কেন আমরা ঈশ্বরকে ও আমাদের কাছে আগত সত্যকে বিশ্বাস করবো না যখন আমরা এই আশা রাখি যে, আমাদের প্রভু আমাদের সৎ লোকদের অন্তর্ভুক্ত করবেন?

(৮৫) তাদের এই কথার প্রতিদান স্বরূপ ঈশ্বর তাদেরকে এমন উদ্যান প্রদান করবেন যার পাদদেশ দিয়ে নদী প্রবাহিত হবে। সেখানে তারা চিরকাল থাকবে। আর এটাই সৎকর্মশীল ব্যক্তিদের প্রতিদান। (৮৬) আর যারা অবিশ্বাস করে এবং আমার বাণীকে মিথ্যা বলে তারাই নরকবাসী।

(৮৭) হে বিশ্বাসীগণ! ঐ সমস্ত বিশুদ্ধ জিনিষকে অবৈধ করো না যা ঈশ্বর তোমাদের জন্য বৈধ করেছেন আর সীমালঙ্ঘন করো না, সীমালঙ্ঘনকারীদের ঈশ্বর পছন্দ করেন না। (৮৮) আর ঈশ্বর তোমাদের যে সমস্ত বৈধ জিনিষ দিয়েছেন তা আহার কর, আর ঈশ্বরকে ভয় কর যাঁর উপর তোমরা বিশ্বাস আনয়ন করেছ। (৮৯) তোমাদের নিরর্থক শপথের জন্য ঈশ্বর তোমাদের ধরবেন না, তবে যে শপথ তোমরা দৃঢ়তার সাথে নিয়েছ তার জন্য তিনি অবশ্যই তোমাদের ধরবেন। এমন শপথের প্রায়শ্চিত্য হল দশজন গরীবকে মধ্যম মানের খাবার খাওয়ানো যা তোমরা তোমাদের পরিবারকে খাওয়াও অথবা তাদের বস্ত্র দান করা অথবা একটি দাস মুক্ত করা। যার সামর্থ্য নেই সে তিন দিন রোযা (উপবাস) রাখবে। এটাই তোমাদের শপথের প্রায়শ্চিত্য যখন তোমরা শপথ ভঙ্গ করবে। আর তোমরা তোমাদের শপথ রক্ষা করবে। এভাবেই ঈশ্বর তোমাদের জন্য আপন নির্দেশ বর্ণনা করেন যাতে তোমরা কৃতজ্ঞ হও।

(৯০) হে বিশ্বাসীগণ! মদ, জুয়া, প্রতিমা-বেদী এবং ভাগ্য নির্ধারক তীর এসব শয়তানের ঘৃণ্য কাজ, অতএব এসব থেকে দূরে থাক যাতে তোমরা সফল হও। (৯১) শয়তান তো চায় যে, মদ ও জুয়ার মাধ্যমে তোমাদের মধ্যে শত্রুতা ও বিদ্বেষ সৃষ্টি করতে এবং তোমাদেরকে ঈশ্বরের স্মরণ ও প্রার্থনা থেকে বিরত রাখতে। তাহলে তোমরা কি এ থেকে বাঁচবে না? (৯২) তোমরা ঈশ্বর ও বার্তাবাহকের অনুগত হও আর সাবধান থাক। যদি তোমরা বিমুখ

হও তাহলে জেনে রেখো আমার বার্তাবাহকের কাজ সুস্পষ্ট ভাবে বাণীসমূহ পৌঁছে দেওয়া। (৯৩) যারা বিশ্বাস স্থাপন করেছে এবং ভাল কাজ করেছে তারা পূর্বে যা ভোজন করেছে তাতে তাদের কোন পাপ নেই, যদি তারা ভয় করে, বিশ্বাস করে এবং সৎকাজ করে, পুনঃ ঈশ্বরকে ভয় করে ও বিশ্বাস করে, পুনঃ ঈশ্বরকে ভয় করে ও সৎকাজ করে। ঈশ্বর এরূপ সৎকর্মশীলদের ভালবাসেন।

(৯৪) হে বিশ্বাসীগণ! ঈশ্বর তোমাদেরকে এমন কিছু শিকারের মাধ্যমে তোমাদেরকে পরীক্ষা করবেন যে শিকার পর্যন্ত তোমাদের হাত ও বর্শা সহজে পৌঁছাতে পারে যাতে তিনি বুঝতে পারেন কে তাঁকে না দেখেও ভয় করে। এরপর যে অত্যাচার করবে তার জন্য রয়েছে যন্ত্রণাদায়ক শাস্তি। (৯৫) হে বিশ্বাসীগণ! তীর্থের বিশেষ পোষাক পরিহিত অবস্থায় শিকার করো না। তোমাদের মধ্যে যে ইচ্ছাকৃতভাবে পশু শিকার করবে, তার ক্ষতি পূরণ স্বরূপ বধকৃত পশুর অনুরূপ একটি পশু যা তোমাদের দুজন ন্যায়বান ব্যক্তি ঠিক করে দেবে, কাবায় উৎসর্গ হিসাবে পৌঁছাতে হবে; অথবা এর প্রায়শ্চিত্যের জন্য কয়েকজনের খাবার খাওয়াতে হবে কিংবা সমপরিমাণ রোযা রাখতে হবে, যাতে সে তার কৃতকর্মের শাস্তি আত্মদান করে। যা পূর্বে হয়ে গিয়েছে, ঈশ্বর তা ক্ষমা করেছেন; কিন্তু যে আবার একাজ করবে ঈশ্বর তাকে শাস্তি দেবেন; ঈশ্বর পরাক্রান্ত, প্রতিশোধ গ্রহণকারী।

(৯৬) তোমাদের জন্য সামুদ্রিক প্রাণী শিকার এবং তা আশ্রয় হার করা বৈধ করেছেন তোমাদের ও পর্যটকদের সুবিধার জন্য, এবং যতক্ষণ তোমরা তীর্থের বিশেষ পোষাক পরিহিত অবস্থায় থাকবে ততক্ষণ তোমাদের জন্য স্থলের শিকার অবৈধ করা হয়েছে। আর ঈশ্বরকে ভয় কর যাঁর কাছে তোমাদের একত্রিত করা হবে।

(৯৭) ঈশ্বর পবিত্র ঘর কাবাকে মানুষের স্থিতি শীলতার কারণ করেছেন এবং সম্মানিত মাসসমূহকে, উৎসর্গের পশু ও গলায় মালা পরানো পশুকে তাদের কল্যাণের জন্য নির্ধারিত করেছেন, তা এজন্যে যে, তোমরা যেন জানতে পার, আকাশ ও পৃথিবীতে যা কিছু আছে ঈশ্বর তা জানেন এবং তিনি সবকিছুই ভালভাবে অবগত আছেন। (৯৮) জেনে রাখ, ঈশ্বরের শাস্তি খুবই কঠোর এবং নিঃসন্দেহে ঈশ্বর ক্ষমাশীল ও অতি দয়ালু। (৯৯) বার্তাবাহকের দায়িত্ব তো কেবল বানীসমূহ পৌঁছে দেওয়া আর ঈশ্বর জানেন যা কিছু তোমরা প্রকাশ কর আর যা কিছু তোমরা গোপন কর। (১০০) বলঃ পবিত্র আর অপবিত্র সমান নয়, যদিও অপবিত্রের আধিক্য তোমাকে আকৃষ্ট করে। অতএব হে বুদ্ধিমানেরা! তোমরা ঈশ্বরকে ভয় কর, যাতে তোমরা সফল হতে পারো।

(১০১) হে বিশ্বাসীগণ! তোমরা এমন সব জিনিষ সম্বন্ধে প্রশ্ন করো না, যা প্রকাশিত হলে, তোমাদের কাছে গুরুভার হয়ে যাবে। আর যদি ও সম্বন্ধে প্রশ্ন কর এমন সময় যখন কুরআন অবতীর্ণ হচ্ছে তাহলে তা তোমাদের কাছে প্রকাশ করে দেওয়া হবে। ঈশ্বর ঐ ব্যাপারে মৌন আছেন। ঈশ্বর ক্ষমাপরায়ণ, সহনশীল। (১০২) এরকম প্রশ্ন তোমাদের পূর্বেও একদল করেছিল। তারপর একারণেই তারা অবিশ্বাসী হয়েছিল। (১০৩) বাহীরা, সাযিবা, অয়াসীলা এবং হাম (এগুলো বিভিন্ন শ্রেনীর গৃহপালিত পশু যেগুলো প্রাক ইসলামী যুগে আরবীয়রা তাদের দেবদেবীর নামে উৎসর্গ করতো) এর কোনটাই ঈশ্বর ঠিক করে দেননি বরং অবিশ্বাসীরা ঈশ্বরের উপর মিথ্যা আরোপ করে, আর তাদের অধিকাংশই বোঝে না। (১০৪) যখন তাদেরকে বলা হয়, ঈশ্বর যা কিছু অবতীর্ণ করেছেন তোমরা তার দিকে এবং পয়গম্বরের দিকে এস, তখন তারা বলে-আমাদের

পূর্বপুরুষদের কাছ থেকে উত্তরাধিকার হিসাবে যা পেয়েছি তাই যথেষ্ট। যদিও তাদের পূর্বপুরুষরা কিছুই জানতো না এবং সত্য পথ প্রাপ্ত ছিল না। (১০৫) হে বিশ্বাসীগণ! তোমরা নিজেদের চিন্তা কর। যদি কেউ বিপথগামী হয় তাতে তোমাদের কোন ক্ষতি নেই যদি তোমরা সঠিক পথে থাক। তোমাদের সবাইকে ঈশ্বরের নিকটে ফিরে যেতে হবে। তখন তোমরা যা করতে, তিনি তা তোমাদের অবহিত করাবেন।

(১০৬) হে বিশ্বাসীগণ! যখন তোমাদের মধ্যে কারো মৃত্যু উপস্থিত হয় তখন মৃত্যুকালীন জবানবন্দীর সময়ে তোমাদের মধ্য থেকে দুজন ন্যায়পরায়ণ লোককে সাক্ষী রাখবে। অথবা তোমরা সফরে থাকলে এবং সে অবস্থায় তোমাদের মৃত্যু এসে পড়লে তোমাদের ছাড়া অন্যদের মধ্য থেকে দুজন সাক্ষী রাখবে। যদি তোমাদের সন্দেহ হয় তাহলে সাক্ষীদ্বয়কে প্রার্থনার পরে থাকতে বলবে এবং তারা ঈশ্বরের নামে শপথ করে বলবে “আত্মীয় হলেও আমরা এর বিনিময়ে কোন মূল্য নেব না এবং ঈশ্বরের সাক্ষী গোপন করবো না। যদি আমরা এরকম করি তাহলে অবশ্যই আমরা পাপীদের অন্তর্ভুক্ত হব। (১০৭) অতঃপর যদি ঐ দুইজন অসৎ বলে পরিগণিত হয়, যাদের স্বার্থ বিঘ্নিত হয়েছে তাদের মধ্য থেকে দুইজন পূর্ববর্তী দুজনের স্থলাভিষিক্ত হবে এবং তারা ঈশ্বরের নামে শপথ করে বলবে - আমাদের সাক্ষ্য ঐ দুজন পূর্ববর্তী সাক্ষীর চেয়ে অধিকতর সত্য। আমরা কোন ভুল বিবৃতি দেওয়ার মত অন্যায় করিনি যার জন্য আমরা অত্যাচারীদের অন্তর্ভুক্ত হয়ে যাবো। (১০৮) এতেই অধিকতর সম্ভাবনা আছে যে তারা সঠিক ভাবে সাক্ষ্য দেবে এবং এই ভয় করবে যে, আমাদের শপথ ওদের শপথের সঙ্গে সাংঘর্ষিক হয়ে যাবে। ঈশ্বরকে ভয় কর এবং শোন, ঈশ্বর অবাধ্যদের সঠিক পথে পরিচালিত করেন না।

(১০৯) যে দিন ঈশ্বর বার্তাবাহকদের একত্রিত করে বলবেন তোমরা কি উত্তর পেয়েছিলে? তারা বলবে আমাদের কিছু জানা নেই, আপনিই তো অদৃশ্য বিষয়ে মহাজ্ঞানী। (১১০) যখন ঈশ্বর বলবেনঃ হে মারইয়ামের (মেরী)পুত্র ঈসা (যিশু)! আমার সেই অনুগ্রহের কথা স্মরণ কর যা আমি তোমার ও তোমার মায়ের প্রতি করেছি যখন আমি পবিত্র আত্মা দ্বারা তোমাদের সাহায্য করেছিলাম। তুমি মানুষের সাথে কথা বলতে মায়ের কোলে থাকা অবস্থায় এবং বড় হয়েও। যখন তোমাকে গ্রন্থ, প্রজ্ঞা, তৌরাত (তোরাহ) ও ইঞ্জীল (বাইবেল) শিক্ষা দিয়েছিলাম, যখন তুমি আমার আদেশে কাদামাটি দ্বারা পাখীর আকৃতি বানিয়ে তাতে ফুঁ দিতে ফলে তা আমার আদেশে পাখী হয়ে যেত, আর তুমি আমার আদেশে অন্ধ ও কুষ্ঠ রোগীকে সুস্থ করে দিতে। আর যখন তুমি আমার আদেশে মৃতদেরকে জীবিত করতে। যখন আমি তোমার প্রতিকোন অনিষ্ঠ করা থেকে ইসরাইলের সন্তানদের বিরত করে রেখেছিলাম, তারপর যখন তুমি তাদের কাছে স্পষ্ট নিদর্শন নিয়ে আসলে তখন তাদের মধ্যে অবিশ্বাসীরা বলেছিল এতো স্পষ্ট জাদু ছাড়া আর কিছু নয়।

(১১১) (সেই সময়ের কথা মনে করো) যখন আমি শিষ্যদেরকে উৎসাহিত করলাম যে - আমার ও আমার বার্তাবাহকের উপর বিশ্বাস স্থাপন কর, তারা বলেছিল - আমরা বিশ্বাস করলাম এবং তুমি সাক্ষী থাক যে, আমরা বিশ্বাসী। (১১২) যখন সাথীরা বলেছিলঃ হে মারইয়ামের (মেরী) পুত্র ঈসা (যিশু)! তোমার প্রভু কি আমাদের জন্য আকাশ থেকে খাদ্য ভর্তি থালা পাঠাতে পারেন (ঐ থালা যাতে সুস্বাদু ব্যঞ্জনে সাজানো)? ঈসা বললঃ ঈশ্বরকে ভয় কর যদি তোমরা বিশ্বাসী হও। (১১৩) তারা বললঃ আমরা চাই আমাদের অন্তরের প্রশান্তির জন্য কিছু খাবার খাব

আর জানব যে, তুমি আমাদের কাছে সত্য বলেছ এবং আমরা তার সাক্ষী হব। (১১৪) মারইয়ামের (মেরী) পুত্র ঈসা (যিশু) প্রার্থনা করল : হে ঈশ্বর! আমাদের প্রভু! তুমি আকাশ থেকে আমাদের জন্য খাদ্য ভর্তি থালা পাঠাও যা আমাদের জন্য এক উৎসব হয়ে যায়। আমাদের আগের ও পরের সবার জন্য তোমার পক্ষ থেকে এক নিদর্শন হোক। আর আমাদের জন্য জীবিকা প্রদান করো, তুমিই সর্বশ্রেষ্ঠ জীবিকা প্রদানকারী। (১১৫) ঈশ্বর বললেন : “আমি অবশ্যই এই খাদ্য তোমাদের পাঠাব; কিন্তু তারপর তোমাদের মধ্যে যে অবিশ্বাস করবে তাকে আমি এমন ভয়ানক শাস্তি দেব যা সারা পৃথিবীর আর কাউকে দেব না।

(১১৬) আর যখন ঈশ্বর বলবেনঃ হে মারইয়ামের (মেরী) পুত্র ঈসা (যিশু)! তুমি কি মানুষকে বলেছিলে যে, তোমরা ঈশ্বরকে ছেড়ে আমাকে ও আমার মাকে উপাস্য বানাও? সে বলবে আপনি পবিত্র, আমার যা বলার অধিকার নেই আমি তো তা বলতে পারি না। আমি যদি অমন কথা বলতাম তাহলে আপনি তা অবশ্যই জানতেন। আপনিই জানেন যা আমার মনে আছে আর আমি জানি না আপনার মনে কি আছে, নিশ্চয়ই আপনি গোপন বিষয় সম্যক অবগত। (১১৭) আমি ওদের ওই কথাই বলেছি যা আপনি আমাকে নির্দেশ দিয়েছিলেন যে ঈশ্বরের উপাসনা কর, তিনি আমার প্রভু এবং তোমাদের প্রভু। আর আমি যতদিন ওদের মধ্যে ছিলাম ততদিন ওদের উপরে সাক্ষী ছিলাম। অতঃপর যখন আপনি আমাকে মৃত্যু দান করলেন তখন থেকে আপনিই তো ওদের পর্যবেক্ষক ছিলেন, আর আপনি সকল বস্তুর উপর সাক্ষী। (১১৮) যদি আপনি ওদের শাস্তি প্রদান করেন তারা তো আপনার বান্দা, আর যদি আপনি ওদের ক্ষমা করেন তাহলে আপনিই তো পরাক্রমশালী, পরম প্রাজ্ঞ।

(১১৯) ঈশ্বর বলবেন আজ ঐ দিন যে দিন সত্যবাদীরা তাদের সত্যের উপকার লাভ করবে। তাদের জন্য উদ্যান রয়েছে যার পাদদেশ দিয়ে নদী প্রবাহিত, তাতে তারা চিরকাল থাকবে। ঈশ্বর তাদের প্রতি সন্তুষ্ট, আর তারাও ঈশ্বরের প্রতি সন্তুষ্ট; এটাই বড় সফলতা। (১২০) আকাশ ও পৃথিবীতে যা কিছু আছে তার আধিপত্য ঈশ্বরেরই, তিনি সবকিছু করতে সক্ষম।

অধ্যায় ৬ : আল - আনআম (গৃহপালিত পশু)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) সকল প্রশংসা ঈশ্বরের যিনি আকাশ ও পৃথিবী সৃষ্টি করেছেন এবং অন্ধকার ও আলোর উদ্ভব ঘটিয়েছেন। তবুও অবিশ্বাসীরা তাদের প্রভুর সাথে সমকক্ষ স্থাপন করে। (২) তিনিই সেই সত্ত্বা যিনি তোমাদেরকে মাটি থেকে সৃষ্টি করেছেন তারপর একটি সময় নির্ধারণ করেছেন। আরেকটি নির্ধারিত সময় তাঁর কাছে আছে। তারপর ও তোমরা সন্দেহ কর। (৩) আর তিনিই ঈশ্বর যিনি আকাশেও আছেন এবং পৃথিবীতে। তিনি তোমাদের গোপন ও প্রাকাশ্য বিষয় জানেন, আর তিনি জানেন যা কিছু তোমরা কর।

(৪) আর ওদের প্রভুর নিদর্শন সমূহের মধ্যে যে নিদর্শনই তাদের কাছে আসে তারা তা হতে বিমুখ হয়। (৫) অতঃপর যে সত্য ওদের কাছে এসেছে তারা তাকে মিথ্যা বলেছে। তবে তারা যা নিয়ে উপহাস করত ওদের কাছে অচিরেই তার সংবাদ আসবে। (৬) তারা কি দেখেনি যে, আমি ওদের পূর্বে কত প্রজন্মকে ধ্বংস করে দিয়েছি, ওদেরকে আমি এই পৃথিবীতে এমনভাবে প্রতিষ্ঠিত করে দিয়েছিলাম যেমনটি তোমাদেরকেও করিনি আর আমি ওদের উপর আকাশ থেকে প্রচুর বৃষ্টি বর্ষণ করেছিলাম

এবং আমি নদী প্রবাহিত করেছিলাম নিচে দিয়ে। অতঃপর ওদের পাপের কারণে ধ্বংস করে দিয়েছি এবং ওদের পরে অন্যান্য প্রজন্মকে উঠিয়েছি।

(৭) আর আমি যদি তোমার কাছে এমন গ্রন্থ অবতীর্ণ করতাম যা কাগজের উপর লেখা থাকত এবং তারা তা নিজের হাতে স্পর্শ করে দেখত তবুও অবিশ্বাসীরা বলত এটা প্রকাশ্য জাদু ছাড়া আর কিছুই নয়। (৮) তারা এও বলত তাঁর কাছে কোন দেবদূত পাঠানো হল না কেন? আর আমি যদি কোন দেবদূতই পাঠাতাম তাহলে ব্যাপারটি তখনই নিষ্পত্তি হয়ে যেত এবং তাদেরকে কোন অবকাশ দেওয়া হত না। (৯) আর আমি যদি কোন দেবদূতকে বার্তাবাহক করে পাঠাতাম তাহলেও তাকে মানুষের আকৃতিতে পাঠাতাম এবং তাদের সেই সন্দেহেই ফেলতাম যে সন্দেহে এখন তারা ভুগছে। (১০) তোমার পূর্বেও বার্তাবাহকদেরকে উপহাস করা হয়েছে। তবে যারা তাদেরকে উপহাস করেছে তাদের উপহাসের পরিনতি তাদের উপরেই আপতিত হয়েছে। (১১) বলঃ তোমরা পৃথিবীতে ভ্রমণ করো এবং লক্ষ্য করো যারা সত্যকে প্রত্যাখ্যান করেছিল তাদের পরিণতি কি হয়েছে।

(১২) জিজ্ঞাসা কর যে, আকাশ ও পৃথিবীতে যা কিছু আছে তা কার? বলঃ সব কিছুই ঈশ্বরের। তিনি অনুগ্রহকে নিজের উপর অনিবার্য করে নিয়েছেন। তিনি অবশ্যই তোমাদের একত্রিত করবেন শেষ বিচারের দিনে, এতে কোন সন্দেহ নেই। যারা নিজেরা নিজেদের ক্ষতি করেছে তারাই বিশ্বাস করবে না। (১৩) আর সব কিছুই ঈশ্বরেরই যা রাতে ও দিনে থাকে আর তিনি সবই শোনে সবই জানেন। (১৪) বলঃ আমি কি ঈশ্বর ছাড়া অন্য কাউকে অভিভাবক বানাবো? যিনি আকাশ ও পৃথিবী তৈরী করেছেন। অথচ তিনিই সবাইকে খাওয়ান, তাঁকে কেউই খাওয়ায় না। বলঃ আমার প্রতি নির্দেশ এসেছে যে, আমি সবার পূর্বে

আত্মসমর্পণকারী হই আর তুমি কখনই মূর্তি পূজকদের অন্তর্ভুক্ত হয়ো না। (১৫) বলঃ যদি আমি আমার প্রভুকে অবিশ্বাস করি তাহলে আমি এক ভয়ানক দিনের শাস্তির ভয় করছি। (১৬) সেদিন যাকে শাস্তি থেকে দূরে রাখা হবে তাকে অবশ্যই তিনি অনুগ্রহ করলেন আর সেটাই হবে স্পষ্ট সফলতা।

(১৭) আর ঈশ্বর যদি তোমাদের কোন কষ্ট দেন তাহলে তিনি ছাড়া কেউ তা দূর করতে পারে না। আর যদি ঈশ্বর তোমাদের কোন কল্যাণ দান করেন তাহলে তিনি সব কিছই করতে সক্ষম। (১৮) তাঁরই কতৃত্ব চলে তাঁর বান্দাদের উপর, আর তিনিই মহাজ্ঞানী, সর্ব বিষয়ে ওয়াকিফ হাল। (১৯) তুমি জিজ্ঞাসা কর যে, সবচেয়ে বড় সাক্ষী কে? বলঃ ঈশ্বর, তিনিই আমার ও তোমাদের মাঝে সাক্ষী। আমার কাছে এই কুরআন পাঠানো হয়েছে যাতে আমি তোমাদেরকে এবং যাদের কাছে এটা পৌঁছাবে তাদের সকলকে এর সম্পর্কে অবগত করি। তোমরা কি এই সাক্ষ্য দিচ্ছো যে, ঈশ্বরের সাথে অন্যান্য উপাস্য ও আছে? বলঃ আমি এর সাক্ষী দিই না। বলঃ তিনিই একমাত্র উপাস্য। আর তোমরা তাঁর সঙ্গে যাকেই অংশীদার বানাও, আমি তা বর্জন করি।

(২০) আমি যাদের গ্রন্থ দিয়েছি তারা তাকে (বার্তাবাহককে) ওভাবেই চেনে যে ভাবে তারা আপনপুত্রদেরকে চেনে। যারা নিজেদের ক্ষতি করেছে তারা এটাকে মানে না। (২১) আর ঐ ব্যক্তির চেয়ে বড় অত্যাচারী আর কে হতে পারে যে ঈশ্বরকে দোষ দেয় আর ঈশ্বরের নিদর্শন সমূহকে মিথ্যা বলে। বাস্তবে অত্যাচারীরা কখনও সফল হয় না। (২২) আর যে দিন আমি তাদের সকলকে একত্রিত করবো অতঃপর যারা আমার সাথে অংশীদার বানিয়েছে তাদেরকে আমি বলবো কোথায় তোমাদের সেই সব অংশীদাররা যাদের দাবী তোমরা করতে? (২৩) অতঃপর তাদের কোন অজুহাত থাকবে

না। শুধু বলবেঃ হে আমাদের প্রভু! ঈশ্বরের শপথ, আমরা অংশীবাদী ছিলাম না। (২৪) লক্ষ্য কর, কিভাবে তারা নিজেদের জন্য ক্ষতিকর মিথ্যা বলছে, আর তারা বানিয়ে বানিয়ে যা বলত তা তাদের থেকে উধাও হয়ে গিয়েছে।

(২৫) তাদের মধ্যে কিছু লোক এমনও আছে যারা তোমার কথা কান পেতে শোনে, আর আমি ওদের অন্তরে আবরণ দিয়ে রেখেছি যেজন্য তারা তা বুঝতে পারে না, আর তাদের কানে দিয়েছি বধিরতা। যদি তারা সমস্ত নিদর্শন সমূহ দেখেও নেয় তথাপি তারা বিশ্বাস করবে না। এমনকি তারা যখন বিতর্ক করার জন্য তোমার কাছে আসে তখন এই অবিশ্বাসীরা বলে এতো দেখছি আগের দিনের মানুষের কেচ্ছা-কাহিনী ছাড়া আর কিছুই নয়। (২৬) তারা লোকদের বাধা দেয় এবং নিজেরাও এর থেকে দূরে থাকে। তারা নিজেদেরই ধ্বংস ডেকে আনে; কিন্তু তারা তা উপলব্ধি করে না। (২৭) যখন তাদের নরকের আগুনের সামনে দাঁড় করানো হবে তখন তুমি যদি দেখতে! তারা তখন বলবে, হায়রে, যদি আবার আমাদের পাঠানো হত তাহলে আমরা আমাদের প্রভুর নিদর্শন সমূহ অস্বীকার করতাম না এবং আমরা বিশ্বাসীদের অন্তর্ভুক্ত হয়ে যেতাম। (২৮) এখন ওদের সেই সব গোপন কথা প্রকাশ হয়ে পড়েছে যা তারা আগে গোপন করত। আর তাদেরকে যদি আবার পাঠিয়ে দেওয়া হয় তাহলে পুনরায় তারা তাই করবে যা তাদেরকে নিষেধ করা হয়েছিল। নিশ্চয়ই তারা মিথ্যাবাদী।

(২৯) তারা বলেঃ এই পার্থিব জীবন ছাড়া আর কোনো জীবন নেই। আর আমাদের পুনরায় ওঠানো হবে না। (৩০) আর যদি তুমি তাদের ঐ সময় দেখতে যখন তাদেরকে আপন প্রভুর সামনে দাঁড় করান হবে, তিনি জিজ্ঞাসা করবেন, এটা কি সত্যি নয়? তারা বলবে, হ্যাঁ, আমাদের প্রভুর শপথ, এ সত্য। ঈশ্বর বলবেন, তোমরা অস্বীকার করেছিলে, তার জন্য এখন শাস্তি ভোগ।

(৩১) বাস্তবে এরা ক্ষতিগ্রস্ত যারা ঈশ্বরের সাথে সাক্ষাৎকে মিথ্যা বলেছিল। অবশেষে যখন তাদের কাছে ঐ সময় অকস্মাৎ এসে যাবে তখন তারা বলবে, হায় আফশোস! এই ব্যাপারটায় আমরা কিভাবে অবহেলা করেছিলাম! তখন তারা তাদের বোঝা নিজেদের পিঠে বহন করবে। দেখ, তারা যে বোঝা বহন করবে তা কতই না খারাপ। (৩২) আর জাগতিক জীবন তো খেল তামাশা ছাড়া কিছুই নয়, আর পরলোকের আবাস তো ঈশ্বরভীরুদের জন্য শ্রেষ্ঠতর। তবুও কি তোমাদের বোধদয় হবে না?

(৩৩) আমি জানি, তাদের কথায় তুমি দুঃখ পাও; তবে তারা শুধুমাত্র তোমাকেই অবিশ্বাস করছে না বরং অত্যাচারীরা ঈশ্বরের নিদর্শনাবলীকেই অস্বীকার করছে। (৩৪) আর তোমার পূর্বেও বার্তাবাহকদের অবিশ্বাস করা হয়েছে। তাদেরকে অবিশ্বাস করা ও কষ্ট দেওয়া সত্ত্বেও তারা ধৈর্য ধারণ করেছে। এমনকি তাদের নিকটে আমার সাহায্য পৌঁছে গেছে। আর ঈশ্বরের সিদ্ধান্ত কেউ পরিবর্তন করতে পারে না। আর বার্তাবাহকদের কিছু সংবাদ তোমার কাছেও পৌঁছে গেছে। (৩৫) আর যদি ওদের বিমুখতা তোমার কাছে কষ্টকর মনে হয় তাহলে তোমার যদি সামর্থ্য থাকে তাহলে তুমি ভূগর্ভে যাওয়ার একটি সুড়ঙ্গ অথবা আকাশে যাওয়ার একটি সিঁড়ি লাগিয়ে ওদের জন্য কোন নিদর্শন নিয়ে এস। আর ঈশ্বর যদি ইচ্ছা করতেন তাহলে ওদের সবাইকে সঠিক পথে একত্রিত করে দিতেন। অতএব তুমি মুর্খদের অন্তর্ভুক্ত হয়ো না। (৩৬) বস্তুত যারা মন দিয়ে শোনে তারাই স্বীকার করে। আর যারা মৃত তাদেরকে ঈশ্বর পুনর্জীবিত করবেন। তারপর তারা সকলেই তাঁর কাছে ফিরে যাবে।

(৩৭) আর তারা বলে বার্তাবাহকের নিকটে তার প্রভুর পক্ষ থেকে কোন নিদর্শন পাঠানো হয় নি কেন? বলঃ কেবলমাত্র ঈশ্বরই কোন নিদর্শন

পাঠাতে সক্ষম, তবে তাদের অধিকাংশই জানে না। (৩৮) পৃথিবীতে চলমান প্রতিটি প্রাণী এবং নিজের দুই ডানা দিয়ে উড্ডয়মান প্রতিটি পাখী, তোমাদের মতই এক একটি প্রজাতি। আমি এই গ্রন্থে কোন কিছু লিপিবদ্ধ করতে বাদ রাখিনি। পরে তাদের সকলকে আপন প্রভুর কাছে একত্রিত করা হবে। (৩৯) আর যারা আমার নিদর্শন সমূহ অবিশ্বাস করে তারা বধির ও বোবা, তারা অন্ধকারে নিমজ্জিত। ঈশ্বর যাকে চান বিপথগামী করেন এবং যাকে চান সঠিক পথে চালনা করেন।

(৪০) বলঃ তোমরা বল দেখি যদি তোমাদের উপর ঈশ্বরের শাস্তি নেমে আসে অথবা প্রলয় আসে, তাহলে কি তোমরা ঈশ্বর ছাড়া অন্য কাউকে আহ্বান করবে? বলো, যদি তোমরা সত্যবাদী হও। (৪১) বরং (বিপদের কারণে) তোমরা তাঁকেই ডেকে থাকো। তিনি যদি চান, যে (বিপদের) জন্য তুমি তাঁকে ডাকছো তা তিনি দূর করে দেবেন। তখন তাঁর সঙ্গে যাদেরকে (মিথ্যা দেবদেবী) অংশীদার করেছিলে, তাদেরকে ভুলে যাবে।

(৪২) আর তোমাদের পূর্বেও অনেক জাতির কাছে আমি বার্তাবাহক পাঠিয়েছিলাম এবং যাতে তারা বিনয়াবনত হয় সেজন্য তাদেরকে দুঃখ দূর্দশায় নিপতিত করেছিলাম। (৪৩) যখন আমার পক্ষ থেকে তাদের উপর কঠিন পরিস্থিতি এসেছিল তখন তারা কেন বিনয়াবত হয় নি, বরং তাদের অন্তর আরও কঠোর হয়ে গেল। আর শয়তান তাদের কর্মকে তাদের দৃষ্টিতে মনোহর বানিয়ে দেখাতে থাকল। (৪৪) অতঃপর যখন তারা সেই উপদেশ ভুলে গেল যা তাদের দেওয়া হয়েছিল তখন আমি তাদের সামনে সব জিনিষের দ্বার খুলে দিলাম। এমনকি যখন তারা ঐ সব জিনিষে প্রসন্ন হয়ে পড়ল যা তাদের দেওয়া হয়েছিল তখন হঠাৎ একদিন আমি তাদেরকে পাকড়াও করলাম, আর তারা সেই অবস্থায় নিরাশ হয়ে পড়লো।

(৪৫) এইভাবে অনিষ্টকারীরা নির্মূল হয়ে গেল। আর সমস্ত প্রশংসা ঈশ্বরের যিনি নিখিল জগতের প্রভু।

(৪৬) তাদেরকে জিজ্ঞাসা করো - ঈশ্বর যদি তোমাদের শ্রবণশক্তি ও দৃষ্টিশক্তি কেড়ে নেন আর তোমাদের অন্তরে মোহর করে দেন তাহলে ঈশ্বর ছাড়া কে এমন উপাস্য আছে যে এগুলো ফিরিয়ে আনতে পারে? দেখ আমি কিভাবে প্রমাণসমূহ বিভিন্নভাবে বর্ণনা করি, তারপরও তারা বিমুখ হয়ে যায়। (৪৭) তাদেরকে আরও জিজ্ঞাসা করো - যদি তোমাদের উপরে ঈশ্বরের শাস্তি অকস্মাৎ বা ঘোষিত রূপে এসে যায় তাহলে অত্যাচারীরা ছাড়া আর কে ধ্বংস হবে? (৪৮) আর আমি বার্তাবাহকদের পাঠাই সুসংবাদ দাতা রূপে অথবা সতর্ককারী হিসাবে। অতঃপর যারা বিশ্বাস করল এবং নিজেকে শুধরে নিল, তার কোন ভয় নেই, আর তারা দুঃখিত হবে না। (৪৯) আর যারা আমার নিদর্শন সমূহকে মিথ্যা মনে করল তাদের অবাধ্যতার কারণেই তাদের উপর শাস্তি আসবে। (৫০) বলঃ আমি তোমাদের একথা বলি না যে, আমার কাছে ঈশ্বরের ধনভাণ্ডার আছে এবং আমি অদৃশ্য (পরোক্ষ) বিষয়ও জানি। আমি একথাও বলি না যে আমি দেবদূত। আমি তো কেবল ঐ ঈশ্বরের বাণী অনুসরণ করি যা আমার কাছে এসেছে। বলঃ অন্ধ আর দৃষ্টি সম্পন্ন মানুষ কি সমান হয়? সুতরাং তোমরা কেন চিন্তা-ভাবনা কর না?

(৫১) আর তোমরা এই প্রত্যাদেশের মাধ্যমে তাদেরকে সতর্ক করো, যারা ভয় করে যে, তাদেরকে আপন প্রভুর সমীপে একত্রিত করা হবে যখন ঈশ্বর ছাড়া না ওদের কোন সাহায্যকারী থাকবে আর না সুপারিশকারী, হয়ত তারা এই কারণে ঈশ্বরভীরু হয়ে যাবে। (৫২) আর তুমি ঐ সমস্ত লোকদের নিজের কাছ থেকে দূরে সরিয়ে দিও না যারা সকাল সন্ধ্যায় নিজ প্রভুকে আহ্বান করে আর তাঁর সন্তুষ্টি কামনা করে। তোমার উপর তাদের

জবাবদিহির কোন দায়ভার নেই আর তাদের উপর তোমারও জবাবদিহির কোন দায়ভার নেই, যদি তুমি তাদেরকে দূরে সরিয়ে দাও, তহলে তুমি অবিচারকারীদের অন্তর্ভুক্ত হয়ে যাবে। (৫৩) আর এভাবেই আমি একজনকে অন্যজন দ্বারা পরীক্ষা নিয়েছি যাতে তারা বলে ঈশ্বর কি আমাদের মধ্যে থেকে এদেরকেই অনুগ্রহ করলেন? কৃতজ্ঞদের সম্পর্কে ঈশ্বরই কি অধিক অবগত নন?

(৫৪) আর যখন তোমার কাছে ঐ লোকেরা আসে যারা আমার নিদর্শন এর উপরে বিশ্বাস আনয়ন করেছে তখন ওদের বলো যে, তোমাদের উপর শাস্তি বর্ষিত হোক। তোমাদের প্রভু করুণা করা নিজ দায়িত্বে লিখে নিয়েছেন। নিঃসন্দেহে তোমাদের মধ্যে যে কেহ ভুলবশতঃ কোন খারাপ কাজ করে ফেলে আর তারপরে তারজন্য অনুশোচনা করে এবং নিজেকে শুধরে নেয়, তাহলে ঈশ্বর ক্ষমাশীল, দয়াবান। (৫৫) আর এভাবেই আমি নিদর্শন সমূহ স্পষ্টরূপে বর্ণনা করি যাতে অপরাধীদের নীতিও স্পষ্ট হয়ে যায়।

(৫৬) বলঃ ঈশ্বর ছাড়া যাদেরকে তোমরা আহ্বান করো তাদের উপাসনা করতে আমাকে নিষেধ করা হয়েছে। বলঃ আমি তোমাদের ইচ্ছা অনুসরণ করতে পারি না। যদি আমি এরকম করি তাহলে আমি পথভ্রষ্ট হয়ে যাব আর সৎপথ প্রাপ্তদের অন্তর্ভুক্ত থাকব না। (৫৭) বলঃ আমার কাছে আমার প্রভুর পক্ষ থেকে আসা একটি স্পষ্ট প্রমাণ আছে আর তোমরা তাকে মিথ্যা বলছো। আর যে জিনিষ নিয়ে তোমরা তাড়াছড়া করছো তা আমার কাছে নেই। নির্ণয় করার ক্ষমতা একমাত্র ঈশ্বরেরই আছে। তিনি সত্য বর্ণনা করেন আর তিনিই সর্বশ্রেষ্ঠ নির্ণয়কারী। (৫৮) বলঃ আমার কাছে যদি ঐ জিনিষ থাকত যার জন্য তোমরা তাড়াতাড়ি করছো তাহলে আমার আর তোমাদের মাঝে ব্যাপারটাতো মিটেই যেত। ঈশ্বর অত্যাচারীদের সম্পর্কে ভালভাবেই অবহিত।

(৫৯) যাবতীয় অদৃশ্য বিষয়ের চাবি তাঁর কাছে। তিনি ছাড়া কেউ তা জানে না। জলে, স্থলে ও সমুদ্রে যা কিছু আছে তা সবই ঈশ্বর জানেন। গাছের থেকে যে পাতাটি খসে পড়ে তাও তিনি জানেন। আবার ভূমির অন্ধকারে যে শস্য দানাটি কিংবা আদ্র বা শুষ্ক বস্তুটি আছে তাও সব একটি স্পষ্ট গ্রন্থে লিখিত আছে।

(৬০) আর তিনিই রাত্রিকালে তোমাদের মৃত্যু (নিদ্রা) দান করেন। আর দিনের বেলায় তোমরা যা কিছু করো তা জানেন। অতঃপর তিনি তোমাদের জাগ্রত করেন যাতে একটি নির্দিষ্ট মেয়াদ পূর্ণ হয়। তারপর তাঁরই কাছে তোমাদের প্রত্যাবর্তন। অতঃপর তিনিই তোমাদের অবহিত করবেন যা তোমরা পৃথিবীতে করছিলে। (৬১) তিনি তার বান্দাদের উপর পরাক্রমশালী, আর তিনি তোমাদের উপর সংরক্ষক পাঠান; এমনকি যখন তোমাদের মধ্যে কারো মৃত্যুর সময় উপস্থিত হয় তখন আমার পাঠানো দেবদূত তার প্রাণ বার করে নেয়, আর তারা কোন ভ্রুটি করে না। (৬২) তারপর সকলকে তাদের প্রকৃত প্রভু ঈশ্বরের নিকট প্রত্যাবর্তিত করানো হয়; শুনে রাখ, বিচার-ক্ষমতা তাঁরই এবং তিনিই খুব ত্বরিত হিসাব গ্রহণকারী।

(৬৩) বলঃ কে তোমাদের জল ও স্থলের বিপদ হতে বাঁচায়? তোমরাই তো তাকে বিনম্রভাবে ও গোপনে ডেকে বল যে, যদি ঈশ্বর আমাদের এই বিপত্তি থেকে উদ্ধার করেন তাহলে আমরা অবশ্যই চিরকৃতজ্ঞ থাকব। (৬৪) বলঃ ঈশ্বরই তোমাদেরকে সে বিপদ থেকে এবং সকল দুঃখকষ্ট থেকে উদ্ধার করেন। তার পরেও তোমরা তার সাথে অংশী কর। (৬৫) বলঃ তোমাদের উপর দিক থেকে অথবা পদতল থেকে শাস্তি প্রেরন করতে কিম্বা তোমাদেরকে বিভিন্ন দলে উপদলে বিভক্ত করে এক দলের দ্বারা অন্য দলের উপর হিংস্রতার স্বাদ গ্রহণ করাতে তিনিই সক্ষম। দেখ,

কিভাবে আমি আমার বাণীসমূহ নানা ভাবে বুঝিয়ে দিচ্ছি, যাতে তারা বুঝতে পারে। (৬৬) আর তোমার সম্প্রদায় তো তোমার উপর প্রেরিত বাণীসমূহকে মিথ্যা বলছে; যদিও তা সত্য। বল - আমি তোমাদের তত্ত্বাবধায়ক নই। (৬৭) প্রত্যেক ভবিষ্যৎ বাণীর জন্য নির্ধারিত সময় রয়েছে এবং শিঘ্রই তোমরা জানতে পারবে।

(৬৮) আর যখন তুমি ওদের দেখবে আমার বাণীর দোষ-ত্রুটি অনুসন্ধান করছে তখন ওদের নিকট হতে দূরে সরে যাও। যতক্ষণ না তারা অন্য বিষয়ের আলোচনায় নিমগ্ন হয়। আর যদি শয়তান তোমাকে বিস্মৃত করে দেয় তাহলে স্মরণ হওয়ার পর এই অপকর্মকারী লোকদের সাথে বসবে না। (৬৯) অপকর্মকারীদের কাজের হিসাব দেওয়ার দায়-দায়িত্ব ঈশ্বরভীরুদের উপর নেই। তাদের একমাত্র দায়িত্ব হলো ওদেরকে স্মরণ করিয়ে দেওয়া যাতে তারাও ঈশ্বরভীরু হতে পারে। (৭০) ওদেরকে পরিহার কর, যারা নিজেদের ধর্মকে খেল-তামাশা বানিয়ে রেখেছে এবং পার্থিব জীবন যাদেরকে সন্মোহিত করে রেখেছে। কিন্তু তুমি কুরআনের মাধ্যমে তাদেরকে শিক্ষা দিতে থাকো যাতে করে তাদের কৃতকর্মের জন্য তারা এমন অবস্থায় পতিত না হয় যখন ঈশ্বর ছাড়া তাদের আর কোন সাহায্যকারী ও সুপারিশকারী থাকবে না এবং মুক্তিপণ হিসাবে কিছুই গ্রহণ করা হবে না। তারা তাদের নিজকর্ম দোষে দুষ্ট হয়ে আছে। সত্য অস্বীকার করার জন্য তাদেরকে ফুটন্ত জল পান করতে দেওয়া হবে এবং যন্ত্রণাদায়ক শাস্তি দেওয়া হবে।

(৭১) বলঃ আমরা কি ঈশ্বরকে ছেড়ে ওদের ডাকব যারা আমাদের কোন উপকার করতে পারবে না বা ক্ষতি করতেও পারবে না। আর আমরা কি আবার উল্টো পথে ফিরে যাব যখন ঈশ্বর আমাদের সঠিক পথ দেখিয়ে দিয়েছেন, ঐ ব্যক্তির মত যাকে শয়তান অনুর্বর ভূমিতে

পথভ্রষ্ট করে দিয়েছে আর সে দিশাহারা হয়ে ঘুরে বেড়াচ্ছে। তার সঙ্গীরা তাকে সোজাপথের দিকে ডেকে বলছে - আমাদের কাছে এসো, বলঃ ঈশ্বরের পথই একমাত্র পথ, আর আমার উপর নির্দেশ এসেছে যে, আমরা নিজেদেরকে জগতের প্রভুর নিকট সমর্পণ করি। (৭২) আর প্রার্থনা কর আর ঈশ্বরকে ভয় করে চল আর তাঁর কাছেই তোমাদেরকে একত্রিত করা হবে। (৭৩) তিনি যথাযথ ভাবে আকাশ ও পৃথিবী তৈরী করেছেন আর যে দিন তিনি বলবেন হয়ে যাও তখনই তা হয়ে যাবে। তাঁর কথা সত্য আর সেদিন রাজত্ব তাঁরই হবে যে দিন (প্রলয় শঙ্কে) ফুঁক দেওয়া হবে। তিনিই পরোক্ষ ও প্রত্যক্ষ সবই জানেন, তিনি পরম বিবেকবান ও সর্বজ্ঞ। (৭৪) আর যখন ইবরাহীম (আব্রাহাম) তার পিতা আযরকে বলেছিল তুমি কি মূর্তিগুলোকে নিজের উপাস্য মনে কর? আমি তোমাকে ও তোমার সম্প্রদায়কে স্পষ্ট পথভ্রষ্টতার মধ্যে দেখছি।

(৭৫) আর এভাবেই আমি ইবরাহীমকে আকাশ ও পৃথিবীর সাম্রাজ্য দেখিয়ে দিই যাতে তার বিশ্বাস দৃঢ় হয়। (৭৬) একবার রাতের অন্ধকার নেমে এলে সে একটি তারকা দেখতে পায়। তখন সে বলে এইতো আমার প্রতি পালক। অতঃপর যখন সেটি অস্ত যায় তখন সে বলল “আমি অস্ত যাওয়া বস্তুর সাথে বন্ধুত্ব করি না। (৭৭) তারপর যখন সে আলোকজ্জ্বল চন্দ্র দেখতে পায় তখন বলে “এই তো আমার প্রভু; কিন্তু যখন তাও অস্ত যায় তখন বলে আমার প্রভু যদি আমাকে পথ না দেখায় তাহলে অবশ্যই আমি পথভ্রষ্ট সম্প্রদায়ের অন্তর্ভুক্ত হয়ে যাব। (৭৮) অতঃপর যখন সে কিরণোজ্জ্বল সূর্যকে দেখল তখন বলল এটাই আমার প্রভু; এটাই সবচেয়ে বড়। তারপর যখন সূর্য ও অস্ত গেল তখন সে তার সম্প্রদায়কে বলল হে মানবমণ্ডলী! তোমরা যাকে অংশীদার বানাচ্ছে তার সাথে আমার কোন সম্পর্ক নেই। (৭৯) আমি

একনিষ্ঠ হয়ে সেই মহান সত্ত্বার দিকে আমার মুখ ফিরলাম যিনি আকাশ ও পৃথিবী সৃষ্টি করেছেন আর আমি শির্ককারীদের (অংশীবাদী) সাথে নই। (৮০) আর ইবরাহীমের (আব্রাহামের) সম্প্রদায় তার সাথে বিতর্ক করতে লাগল। সে বলেছিল, “তোমরা কি ঈশ্বরের ব্যাপারে আমার সাথে বিতর্ক করছো? অথচ তিনিই তো আমাকে সঠিক পথ দেখিয়েছেন। তোমরা তাঁর সাথে যাদের অংশীদার বানাচ্ছে আমি তাদের ভয় করি না, তবে আমার প্রভু কিছু চাইলে তা ভিন্ন কথা। আমার প্রভুর জ্ঞান সর্বব্যাপী। তোমরা কি চিন্তা করবে না?

(৮১) আর তোমরা যাদেরকে অংশীদার স্থাপন কর আমি তাদেরকে কেন ভয় করবো? তোমরা যেখানে ঈশ্বরের সাথে এমন সব বস্তুকে অংশীদার স্থাপন করতে ভয় কর না, যাদের সম্পর্কে তিনি তোমাদের কাছে কোন প্রমাণ পাঠাননি। যদি তোমরা জান তবে বলো উভয় দলের মধ্যে কোন দলটি নিরাপত্তা লাভের জন্য অধিকতর যোগ্য? (৮২) যারা বিশ্বাস স্থাপন করেছে এবং নিজেদের বিশ্বাসের সাথে অনুচিৎ কোন বস্তুকে মিশ্রিত করেনি, তারাই নিরাপদ এবং তারাই সঠিক পথে আছে। (৮৩) এটাই আমার যুক্তি প্রমাণ যা আমি ইবরাহীমকে (আব্রাহামকে) তার সম্প্রদায়ের সাথে মোকাবিলার জন্য দিয়েছিলাম। আমি যাকে চাই তাকে মর্যাদায় সমুন্নত করি। নিশ্চয়ই তোমার প্রভু পরম প্রাজ্ঞ, মহাজ্ঞানী। (৮৪) আর আমি তাকে (আব্রাহামকে), ইসহাক (আইজ্যাক) ও ইয়াকুবকে (জ্যাকবকে) পথ প্রদর্শন করেছি এবং প্রত্যেককে আমি সুপথগামী করেছিলাম আর নূহ (নোয়াহ) কেও আমি সুপথগামী করেছিলাম এর পূর্বে। আর তার বংশধরদের মধ্যে থেকে দাউদ (ডেভিড), সোলায়মান (সলোমন), আইউব (জব), ইউসুফ (জোসেফ), মূসা (মোজেস) ও হারুনকে (এরনকে) সুপথগামী করেছিলাম। এভাবেই আমি সৎকর্মশীলদের পুরস্কার দিয়ে থাকি।

(৮৫) আর যাকারিয়া, ইয়াহইয়া (জন), ঈসা (যিশু) ও ইলিয়াসকে (এলিজাকে) ও সুপথগামী করেছিলাম এরা প্রত্যেকেই সদাচারী ছিলেন। (৮৬) আর ইসমাইল, ইল-ইয়াসা (এলিশা), ইউনুস (জোনাহ) ও লূতকে (লট কে) ও এদের প্রত্যেককে আমি বিশ্ববাসীর উপর শ্রেষ্ঠত্ব দান করেছিলাম। (৮৭) আর তাদের কিছু সংখ্যক পূর্ব-পুরুষ, বংশধর এবং ভাইদেরকে ও। তাদেরকে আমি মনোনিত করেছিলাম এবং সঠিক পথ প্রদর্শন করেছিলাম। (৮৮) এটাই ঈশ্বর প্রদত্ত পথ। তিনি তাঁর বান্দাদের মধ্যে যাকে চান এ পথ প্রদর্শন করেন। আর যদি তারা ঈশ্বরের সাথে কাউকে অংশীদার স্থাপন করত তাহলে তাদের কর্মসমূহ অবশ্যই নিষ্ফল হয়ে যেত। (৮৯) এরাই সেই লোক যাদেরকে আমি গ্রন্থ, কর্তৃত্ব ও পয়গম্বরত্ব দান করেছিলাম। অতএব যদি এরা (মক্কাবাসীরা) এটা অস্বীকার করে তাহলে আমি এর জন্য এমন সম্প্রদায়কে প্রতিস্থাপন করব যারা কখনও এই গুলোর অস্বীকারকারী হবে না। (৯০) এই লোকদেরই ঈশ্বর সুপথগামী করেছেন। অতএব তুমি তাদের পথই অনুসরণ কর। বলঃ আমি এর জন্য তোমাদের কাছে কোন প্রতিদান চাই না। এ তো সমগ্র বিশ্ববাসীর জন্য এক অমূল্য স্মারক। (৯১) আর তারা ঈশ্বরকে যথাযথ মূল্যায়ন করতে পারেনি, যখন তারা বলেছে যে, ঈশ্বর কোন মানুষের কাছে কোন কিছুই অবতীর্ণ করেন নি। বলঃ মানুষের জন্য আলো ও পথ-নির্দেশ স্বরূপ যে গ্রন্থ মূসা (মোজেস) নিয়ে এসেছিল তা কে অবতীর্ণ করেছিল? যাকে তোমরা খণ্ড খণ্ড করে রেখেছ তার কিছু প্রকাশ করছো আর অনেক কিছুই গোপন করছো। আর তোমাদের এমন কিছু শেখান হয়েছে যা তোমরা জানতে না আর তোমাদের পূর্ব-পুরুষরাও জানত না। বলঃ ঈশ্বরই অবতীর্ণ করেছেন। অতঃপর ওদেরকে নিরর্থক কল্পকথায় মত্ত থাকতে দাও।

(৯২) এই মহিমান্বিত গ্রন্থটি আমি পূর্বে তোমাদের কাছে প্রকাশিত গ্রন্থসমূহের সত্যায়নকারী রূপে অবতীর্ণ করেছি, যাতে তুমি মক্কাবাসী ও তার পার্শ্ববর্তী জনপদের লোক জনকে সতর্ক করতে পার। আর যারা পরকালে বিশ্বাস করে, তারা এর প্রতি বিশ্বাস স্থাপন করবে এবং তারা তাদের প্রার্থনার প্রতি যত্নবান থাকে। (৯৩) তার চেয়ে বড় অত্যাচারী কে হতে পারে যে ঈশ্বরের বিরুদ্ধে মিথ্যা আরোপ করে অথবা বলে আমার উপরে ঈশ্বরের বাণী এসেছে অথচ তার কাছে কিছুই পাঠানো হয় নি। এবং যে বলে ঈশ্বর যা অবতীর্ণ করেছেন তার মত আমিও শীঘ্রই কিছু একটা অবতীর্ণ করবো। যদি তুমি ঐ সময়ের অবস্থা দেখতে পেতে যখন ঐ অত্যাচারী মৃত্যু যন্ত্রণায় ভুগবে আর দেবদূত হাত প্রসারিত করে বলবে তোমাদের প্রাণগুলো বার করে দাও আজ তোমাদেরকে অপমানজনক শাস্তি দেওয়া হবে, কারণ তোমরা ঈশ্বরের বিরুদ্ধে অসত্য কথা বলতে এবং তাঁর নিদর্শনাবলী সম্বন্ধে ঔদ্ধত্য প্রকাশ করতে।

(৯৪) আর তোমরাতো আমার কাছে নিঃসঙ্গ হয়ে এসেছ যেমন ভাবে আমি তোমাদের প্রথম বার সৃষ্টি করেছিলাম। আর যা কিছু আমি তোমাদের দিয়েছিলাম সবকিছুই পশ্চাতেই রেখে এসেছ। আমি তো তোমাদের সাথে তোমাদের সুপারিশকারীদের দেখছি না যাদের সম্পর্কে তোমাদের দাবি ছিল যে, তারা তোমাদের ব্যাপারে অংশীদার। তোমাদের মধ্যকার সম্পর্ক বাস্তবিকই ছিন্ন হয়ে গেছে আর তোমরা যা যা দাবী করতে সব উধাও হয়ে গেছে। (৯৫) নিঃসন্দেহে ঈশ্বর শস্যদানা ও ফলের বীজ থেকে অঙ্কুর সৃষ্টি কারী। তিনি মৃত থেকে জীবিতকে আর জীবিত থেকে মৃতকে নির্গতকরান। তিনিই তোমাদের ঈশ্বর অতএব তোমরা পথ ভুলে কোথায় যাচ্ছ?

(৯৬) তিনিই প্রভাত উন্মেষকারী। তিনি রাতকে বিশ্রামের জন্য এবং সূর্যচন্দ্রকে

হিসাবের জন্য নির্ধারিত করেছেন। এটা মহা পরাক্রমশালী, মহাজ্ঞানীর নির্ধারণ। (৯৭) তিনিই তোমাদের জন্য তারকারাজী সৃষ্টি করেছেন যাতে তোমরা স্থলে ও সমুদ্রে অন্ধকারে পথের দিশা পাও। নিঃসন্দেহে আমি নিদর্শন সমূহ স্পষ্ট রূপে বর্ণনা করেছি তাদের জন্য, যারা জানতে চায়। ১ (৯৮) আর তিনিই তোমাদের সৃষ্টি করেছেন একটি প্রাণ থেকে; তারপর তোমাদের প্রত্যেকের জন্য একটি আবাসস্থল এবং একটি বিশ্রামাগার রয়েছে। আমি নিদর্শন সমূহ স্পষ্ট রূপে বর্ণনা করেছি তাদের জন্য যারা বুঝবে।

(৯৯) আর তিনিই আকাশ থেকে বৃষ্টি বর্ষণ করেন তারপর এর মাধ্যমে আমি সব রকম গাছপালা উৎপন্ন করি। তা থেকে আমি সবুজ বৃন্ত উদ্ভাত করি, যা থেকে ঘন থোকা শস্য দানা বের করি। খেজুর গাছের শিষ থেকে নির্গত হয় নিচে নুয়ে পড়া কাঁদি। আঙুরের বাগান, জলপাই ও ডালিম উৎপন্ন করি। এগুলোর মধ্যে কোন কোনটি অন্য যে কোনটি থেকে ভিন্ন। গাছে যখন ফল ধরে তখন এর ফল ও তার পরিপক্বতার দিকে লক্ষ্য কর। নিশ্চয়ই এসবের মধ্যে বিশ্বাসী লোকদের জন্য অনেক নিদর্শন রয়েছে। (১০০) তারা জ্বীনদেরকে ঈশ্বরের সাথে অংশীদার স্থাপন করেছে, অথচ ঈশ্বরই তাদের সৃষ্টি করেছেন। আর তারা না জেনে বুঝে তাঁর জন্য ছেলে মেয়েও সাব্যস্ত করেছে। তাদের এইসব আরোপিত বিশেষণ থেকে তিনি পবিত্র ও সমুন্নত। (১০১) তিনিই আকাশ ও পৃথিবীর আদি স্রষ্টা, তাঁর সন্তান হবে কি করে? তাঁর তো কোন স্ত্রী নেই। আর তিনিই সবকিছু সৃষ্টি করেছেন আর তিনি সবকিছুই জানেন। (১০২) তিনিই ঈশ্বর, তোমাদের প্রভু। তিনি ছাড়া কোনই উপাস্য নেই।

১ বিঃদ্র-(৬:৯৭) এই মহাবিশ্ব সৃষ্টির লক্ষ লক্ষ বছর পরেও এমন সূক্ষ্ম নিয়মনিষ্ঠ ভাবে চলছে যে এর মধ্যে কোন প্রকার অসামঞ্জস্য দেখা যায় না। এটা এমন একটা সার্বভৌম সত্ত্বার নিদর্শন, যিনি অসীম মহোত্তম ক্ষমতার অধিকারী।

আর তিনিই সবকিছুর আদি স্রষ্টা অতএব তোমরা তাঁকেই উপাসনা কর। তিনিই সবকিছুরই কার্যনির্বাহী। (১০৩) কোনো দৃষ্টি তার নাগাল পায় না; অথচ তিনি সবকিছু দেখেন। তিনি অত্যন্ত সুক্ষদর্শী ও সবকিছুর খরব রাখেন। (১০৪) এখন তোমাদের কাছে তোমাদের প্রভুর পক্ষ থেকে চাম্ফুস প্রমাণাদি এসে গেছে। অতএব এখন যে প্রত্যক্ষ করবে, সে নিজের কল্যাণ সাধন করবে আর যে অন্ধ থাকবে সে নিজেই ক্ষতিগ্রস্ত হবে। আর আমি তোমাদের উপর তো প্রহরী নই। (১০৫) আর এভাবেই আমি নিদর্শনাবলী নানান ভাবে বর্ণনা করি তা না হলে তারা বলতে পারে তুমি (আগে কোথাও) পড়ে নিয়েছ, আর যাতে আমি যারা জানতে চায় তাদের কাছে তা পরিষ্কার করে ব্যক্ত করতে পারি।

(১০৬) তুমি কেবল ওটাই অনুসরণ কর যা তোমার প্রভুর পক্ষ থেকে তোমার উপর অবতীর্ণ হয়েছে। তিনি ছাড়া কোন উপাস্য নেই। আর অংশীদার স্থাপনকারীদের দিকে দৃষ্টি দিও না। (১০৭) যদি ঈশ্বর চাইতেন তবে তারা তাঁর সঙ্গে অংশীদার স্থাপন করতে পারত না। আর আমি তোমাকে ওদের প্রহরী বানাইনি, তুমি তাদের কার্যনির্বাহীও নও। (১০৮) ঈশ্বরকে বাদ দিয়ে তারা যাদেরকে ডাকে তাদের গালাগালি করো না, তাহলে তারা অজ্ঞানবশতঃ অন্যায়ভাবে ঈশ্বরকে গালাগালি করবে। এমনিভাবে আমি প্রত্যেক সম্প্রদায়ের দৃষ্টিতে তাদের নিজেদের কাজকর্ম মোহময় বানিয়ে দিয়েছি। অতঃপর ওদের সবাইকে আপন প্রভুর নিকট ফিরে আসতে হবে। তখন তিনি ওদের বলবেন যা তারা করত। (১০৯) তারা ঈশ্বরের নামে জোরাল শপথ করে বলে যদি তাদের কাছে কোন নিদর্শন আসে তাহলে তারা অবশ্যই তা বিশ্বাস করবে। বলে দাওঃ নিদর্শন তো ঈশ্বরের কাছে, তোমরা কি করে বলতে পারো যে, নিদর্শন ওদের কাছে এসে গেলে তারা বিশ্বাস করবে ?

(১১০) আর আমি ওদের অন্তর এবং দৃষ্টি ঘুরিয়ে দেব যেমন ভাবে এরা প্রথম বার এটাকে বিশ্বাস করেনি। আর আমি ওদেরকে অবাধ্যতার মধ্যেই বিভ্রান্ত থাক তে দেব। (১১১) আর যদি আমি ওদের কাছে দেবদূত পাঠাতাম আর মৃত ব্যক্তির তাদের সাথে কথা বলত এবং সবকিছুই তাদের সামনে একত্রিত করে দিতাম তবুও তারা বিশ্বাস করতো না। অবশ্য ঈশ্বর ইচ্ছা করলে ভিন্ন কথা; কিন্তু তাদের অধিকাংশই মুখের মত কাজ করে। (১১২) আর এই ভাবেই আমি প্রত্যেক পয়গম্বরদের জন্য কিছু প্রতিপক্ষনির্ধারণ করেছি, তারা হলো মানুষ এবং জ্বীনদের মধ্যকার শয়তানেরা। তারা প্রতারণার উদ্দেশ্যে মনোমুগ্ধকর কথাবার্তার মাধ্যমে একেও পরকে মন্দ পরামর্শ দেয়। যদি তোমার প্রভু চাইতেন তাহলে তারা এরকম করতে পারত না। অতএব তুমি তাদেরকে এবং তারা যা বানিয়ে বলে তা উপেক্ষা করো।

(১১৩) আর এটা এজন্য যাতে এদের প্রতি তাদের মন আকৃষ্ট হয় যারা পরকালে বিশ্বাস করে না, এবং তারা এতে সন্তুষ্ট থাকতে পারে এবং যেসব অপকর্ম করেছে তা করে যেতে পারে। (১১৪) আমি কি তবে ঈশ্বর ব্যতীত অন্য কোন বিচারক খুঁজব? অথচ তিনিই তোমাদের কাছে বিস্তারিত গ্রন্থ অবতীর্ণ করেছেন। আর আমি যাদেরকে পূর্বে গ্রন্থ দিয়েছিলাম তারা জানে যে, এ তোমার প্রভুর নিকট হতে সত্যিই অবতীর্ণ। অতএব তুমি কিছুতেই সন্দেহ পোষণকারীদের অন্তর্ভুক্ত হয়ো না।

(১১৫) তোমার প্রভুর বাণী সত্য ও ন্যায়পূর্ণ। কেউ তার বাণী পরিবর্তন করতে পারে না। তিনি সর্বশ্রোতা, মহাজ্ঞানী। (১১৬) তুমি যদি পৃথিবীর অধিকাংশ মানুষের কথামতো চলো তাহলে তারা তোমাকে ঈশ্বরের পথ থেকে বিচ্যুত করবে। তারা কেবল কল্পনার অনুসরণ করে আর অনুমান

করে বলে। (১১৭) তোমার প্রভু ভালো ভাবেই জানেন কারা পথভ্রষ্ট হয়েছে এবং এটাও জানেন কারা সঠিক পথের অনুসারী। (১১৮) ঈশ্বরের নাম নিয়ে বধ করা প্রাণীর মাংস আহার কর, যদি তোমরা তাঁর বিধান সমুহে বিশ্বাসী হও।

(১১৯) কেন তোমরা ঈশ্বরের নাম নিয়ে বধ করা প্রাণীর মাংস খাবে না? অথচ ঈশ্বর তোমাদের জন্য যা যা অবৈধ করেছেন তার বিস্তারিত বিবরণ দিয়েছেন, অবশ্য নিরুপায় হয়ে তোমরা কিছু খেতে বাধ্য হলে তার কথা আলাদা আর অনেকে তো না জেনে নিজেদের খেয়াল খুশিমত মানুষকে বিভ্রান্ত করে। অবশ্যই তোমার প্রভু সীমালঙ্ঘনকারীদের সম্পর্কে ভালভাবে অবগত আছেন। (১২০) আর তোমরা প্রকাশ্য ও গোপনীয় পাপ কার্য পরিত্যাগ করো। নিশ্চয় যারা পাপ কার্য সম্পাদন করে তারা শীঘ্রই তাদের কৃতকর্মের শাস্তি পাবে। (১২১) আর তোমরা ঐ প্রাণীর মাংস খেয়ো না যার উপর ঈশ্বরের নাম নেওয়া হয় নি, অবশ্যই তা পাপ। আর শয়তান তার বন্ধুদেরকে তোমার সাথে বিতর্ক করতে প্ররোচনা দেয়। যদি তোমরা তাদের কথামত চলো তাহলে অংশীবাদী হয়ে যাবে। (১২২) যে ব্যক্তি মৃত ছিল, তারপর আমি তাকে জীবিত করেছি এবং একটি আলো দান করেছি যার সাহায্যে সে মানুষের মধ্যে চলতে পারে, সে কি ঐ ব্যক্তির মত হতে পারে, যে অন্ধকারের মধ্যে আছে এবং সেখান থেকে বের হচ্ছে না। এভাবেই অবিশ্বাসীদের দৃষ্টিতে তাদের নিজেদের কাজকর্মকে চাকচিক্যময় করে দেওয়া হয়েছে।

(১২৩) আর এভাবেই আমি প্রত্যেক জনপদে বড় বড় পাপীদের সরদার রেখে দিয়েছি যারা সেখানে ষড়যন্ত্র করে। যদিও তারা যে ষড়যন্ত্র করে তা নিজেদের বিরুদ্ধেই করে; কিন্তু তারা তা অনুভব করে না।

(১২৪) আর যখন তাদের কাছে কোন নিদর্শন আসে তখন তারা বলে আমরা কখনও বিশ্বাস করবো না যতক্ষণ পর্যন্ত ঈশ্বরের বার্তাবাহক দের যা দেওয়া হয়েছে আমাদেরকেও অনুরূপ জিনিষ না দেওয়া হয়। ঈশ্বরই ভাল জানেন তিনি পয়গম্বরত্ব কাকে প্রদান করবেন। অবশ্যই যারা অপরাধী ঈশ্বরের পক্ষ থেকে তারা অপমানিত হবে এবং তাদের ষড়যন্ত্রের কারণে শাস্তি পাবে। (১২৫) অতএব ঈশ্বর যাকে সুপথ দেখাতে চান ইসলামের জন্য তার অন্তর দুয়ার খুলে দেন। আর যাকে বিপথে নিতে চান তার অন্তর সঙ্কুচিত করে দেন, যেন তাকে আকাশে আরোহণ করতে হচ্ছে। এভাবেই ঈশ্বর অবিশ্বাসীদের উপর অবমাননা আনয়ন করেন।

(১২৬) আর এটাই হল তোমার প্রভুর সঠিক পথ। আমি নিদর্শন সমূহ বিস্তারিত ভাবে বর্ণনা করেছি চিন্তাশীলদের জন্য। (১২৭) তাদের জন্য তাদের প্রভুর কাছে শান্তির আবাস রয়েছে। তাদের কৃতকর্মের কারণে তিনিই হচ্ছেন তাদের অভিভাবক। (১২৮) আর যে দিন ঈশ্বর ওদের সবাইকে একত্রিত করবেন এবং বলবেন : হে জ্বীন সম্প্রদায়! তোমরা তো মানুষের মধ্যে থেকে অনেককে তোমাদের অনুগামী করে নিয়েছিলে। তাদের মানুষ অনুগামীরা বলবে - হে আমাদের প্রভু! আমরা একে অপরের দ্বারা উপকৃত হয়েছি, তবে এখন আমরা সেই সময়ে উপনীত হয়েছি যা আপনি আমাদের জন্য নির্ধারণ করে রেখেছিলেন। তখন তিনি বলবেন - এখন তোমাদের ঠিকানা নরক। সেখানে তোমরা চিরকাল বাস করবে। তবে ঈশ্বর অন্য কিছু চাইলে সে কথা ভিন্ন। নিশ্চয়ই তোমাদের প্রভু বিবেকবান, মহাজ্ঞানী।

(১২৯) আর এভাবেই আমি অন্যায্যকারীদের একে অপরের নিকটবর্তী করে দেব তাদের কৃতকর্মের কারণে। (১৩০) হে জ্বীন ও মানুষ সম্প্রদায়! তোমাদের কাছে কি তোমাদের মধ্যে কোন বার্তাবাহক আসেনি? যে

তোমাদেরকে আমার বাণী শোনাত আর তোমাদেরকে এই দিনের মুখোমুখি হওয়ার ব্যাপারে সতর্ক করত? তারা বলবে আমরা আমাদের নিজেদের বিরুদ্ধেই সাক্ষ্য দিচ্ছি। পার্থিব জীবন তাদেরকে প্রতারিত করেছে (তাই) তারা নিজেদের বিরুদ্ধেই সাক্ষ্য দেবে যে তারা সত্য অস্বীকারকারী ছিল। (১৩১) এটা এজন্যে যে, তোমাদের প্রভু কোন অন্যায়ের কারণে অধিবাসীদেরকে অনবহিত রেখে জনপদ সমূহ ধ্বংস করেন না। (১৩২) আর প্রত্যেক ব্যক্তির জন্য কর্ম অনুসারে মর্যাদা আছে। আর তোমাদের প্রভু লোকদের কর্ম সম্পর্কে অনবহিত নন।

(১৩৩) আর তোমার প্রভু অমুখাপেক্ষী ও দয়াশীল। তিনি যদি ইচ্ছা করেন তাহলে তোমাদেরকে অপসারিত করে যাকে ইচ্ছা তোমাদের স্থলাভিষিক্ত করতে পারেন। যেমন ভাবে তিনি তোমাদেরকে অন্য লোকদের বংশধর থেকে সৃষ্টি করেছেন। (১৩৪) যে জিনিষের অঙ্গীকার তোমাদের সাথে করা হচ্ছে তা আসবেই আর তোমরা ঈশ্বরকে অক্ষম করতে পারবে না। (১৩৫) বলঃ হে আমার সম্প্রদায়! তোমরা তোমাদের অবস্থানে থেকে কাজ কর, আমিও আমার কাজ করছি। অতি শীঘ্র তোমরা জানতে পারবে পরিণাম কার ভাল হয়। নিঃসন্দেহে অত্যাচারী কখনও সফল হবে না। (১৩৬) আর ঈশ্বর যে সব শস্যক্ষেত্র ও গবাদী পশু সৃষ্টি করেছেন তার একটি অংশ তারা ঈশ্বরের জন্য নির্ধারণ করে, আর নিজেদের ধারণা অনুযায়ী বলে - এটা ঈশ্বরের জন্য আর এটা আমাদের অংশীদার দেব-দেবীদের জন্য। আর যে অংশ তাদের অংশীদার দেব-দেবীদের জন্য নির্ধারণ করে তা ঈশ্বরের কাছে পৌঁছায় না, আর যে অংশ ঈশ্বরের জন্য নির্ধারণ করে তা তাদের অংশীদার দেব-দেবীদের কাছে পৌঁছে যায়। তাদের নির্ণয় কতই না মন্দ।

(১৩৭) আর এভাবেই তাদের অংশীদার দেব-দেবীরা, কিছু বহুশ্বরবাদীদের দৃষ্টিতে তাদের সন্তান হত্যাকে শোভনীয় করে দিয়েছে, যাতে তারা তাদের সর্বনাশ করতে পারে এবং তাদের মনে ধর্ম সম্পর্কে বিভ্রান্তি সৃষ্টি করতে পারে। আর যদি ঈশ্বর চাইতেন তাহলে তারা একাজ করত না। অতএব ওদেরকে ওদের বানানো মিথ্যা নিয়েই থাকতে দাও। (১৩৮) তারা তাদের ধারণা অনুসারে বলে - এই পশু আর এই শস্য নিষিদ্ধ। আমরা যাদেরকে চাইব তারা ব্যতীত কেউ এগুলি খেতে পারবে না। আর অমুক পশুর পিঠে আরোহন করাও নিষিদ্ধ। আবার কিছু পশুর উপর তারা ঈশ্বরের নাম নেয় না। তাদের এসব মনগড়া মিথ্যাচারের জন্য তিনি শীঘ্রই তাদেরকে শাস্তি দেবেন।

(১৩৯) তারা আরো বলে অমুক পশুগুলোর গর্ভে যা আছে তা আমাদের পুরুষদের জন্য নির্দিষ্ট এবং আমাদের নারীদের জন্য নিষিদ্ধ। আর যদি তা মৃত হয় তাহলে সবাই তাতে অংশীদার। ঈশ্বর শীঘ্রই তাদের এই কথার জন্য শাস্তি দেবেন। নিশ্চয়ই ঈশ্বর প্রজ্ঞাবান, মহাজ্ঞানী। (১৪০) যারা বোকার মত না জেনে নিজেদের সন্তানদের হত্যা করেছে এবং ঈশ্বর তাদেরকে যে জীবিকা দান করেছেন ঈশ্বরের প্রতি ভ্রান্ত ধারণাবশতঃ তা নিষিদ্ধ করেছে তারা অবশ্যই ক্ষতিগ্রস্ত হয়েছে। নিশ্চয়ই তারা বিপথগামী হয়েছে এবং তারা সৎপথে ছিল না। (১৪১) আর তিনিই মাচাযুক্ত ও মাচাবিহীন বাগান তৈরী করেছেন, আর খেজুর গাছ, বিভিন্ন স্বাদের শস্য, জলপাই আর ডালিম উৎপন্ন করেন যাদের কিছু কিছু সাদৃশ্যপূর্ণ আবার কিছু কিছু সাদৃশ্যহীন। এসব গাছপালায় যখন ফল হয় তোমরা তার ফল খাবে, তবে ফসল সংগ্রহের দিনে তার নায্য অংশ দান করবে। আর অপচয় করবে না, নিশ্চয়ই ঈশ্বর অপচয়কারীদের পছন্দ করেন না।

(১৪২) আর তিনি গবাদীপশু সৃষ্টি করেছেন কিছু ভারবাহনের জন্য এবং কিছু খাদ্যের জন্য। ঈশ্বর তোমাদেরকে যে জীবিকা দান করেছেন তা

থেকে আহার কর। এবং শয়তানের অনুসরণ করো না সে তোমাদের প্রকাশ্য শত্রু। (১৪৩) সৃষ্টি করেছেন আটটি নর ও মাদী। ভেড়ার মধ্যে দুই প্রকার ও ছাগলের মধ্যে দুই প্রকার। বলো তিনি কি পুরুষ দুটো অবৈধ করেছেন না স্ত্রী দুটো, না কি স্ত্রী দুটোর গর্ভে যে বাচ্চা রয়েছে তা? তোমরা জেনে আমাকে বল যদি তোমরা সত্যবাদী হও।

(১৪৪) আর এমনি ভাবে উটের মধ্যে দুই প্রকার আর গরুর মধ্যে দুই প্রকার। জিজ্ঞেস করো, তিনি কি পুরুষ দুটো অবৈধ করেছেন না কি স্ত্রী দুটো না কি স্ত্রী দুটোর গর্ভে যে বাচ্চা রয়েছে তা? তুমি কি উপস্থিত ছিলে যখন ঈশ্বর আদেশ দিয়েছিলেন? অতএব মানুষকে বিপথগামী করার জন্য না জেনে যে ঈশ্বরের নামে মিথ্যা বানিয়ে বলে তার চেয়ে বড় অন্যায়কারী আর কে আছে? নিঃসন্দেহে ঈশ্বর অন্যায়কারীদের সুপথ দেখান না। (১৪৫) বলঃ আমার কাছে যে বাণী এসেছে তাতে এমন কোন খাদ্য পাই না, যা আহার করা অবৈধ করা হয়েছে। কেবল মৃতপ্রাণী, প্রবাহিত রক্ত, শূকরের মাংস এগুলো অপবিত্র, অথবা অবৈধ রূপে বধ করা পশু যা ঈশ্বরের নাম ছাড়া অন্য কারো নামে উৎসর্গ করা হয়েছে। তবে কেউ যদি ইচ্ছাকৃত অবাধ্যতা কিন্মা সীমালঙ্ঘন ব্যতীত কেবল নিরুপায় হয়ে বাধ্য হয়, তাহলে তোমার প্রভু নিশ্চয় ক্ষমাশীল ও দয়ালু। (১৪৬) আর ইহুদীদের জন্য আমি সর্বকম নখওয়ালা প্রাণী অবৈধ করেছিলাম। আর গরু ও ছাগলের চর্বি অবৈধ করেছিলাম, তবে এদের পীঠ ও অস্ত্রের সাথে সংলগ্ন অথবা হাড়ের সাথে মিশ্রিত চর্বি নয়। তাদের অবাধ্যতার জন্য আমি তাদেরকে এ শাস্তি দিয়েছিলাম, আর নিশ্চিতভাবে আমি সত্যবাদী।

(১৪৭) অতঃপর তারা যদি তোমাকে মিথ্যাবাদী বলে তাহলে তুমি বলবে, তোমাদের প্রভু অসীম দয়াবান এবং অপরাধীদের থেকে তাঁর শাস্তি প্রত্যাহার করা হয় না। (১৪৮) যারা অংশীদার স্থাপন করেছে তারা বলবে যে, যদি ঈশ্বর

চাইতেন তাহলে আমরা অংশীদার স্থাপন করতাম না, আর আমাদের পূর্বপুরুষেরা অংশীদার স্থাপন করত না বা আমরা কোন বস্তুকে অবৈধ করে নিতাম না। এভাবেই তাদের পূর্ববর্তীরা আমার শাস্তি আশ্বাদন না করা পর্যন্ত অবিশ্বাস করেছিল। বলঃ তোমাদের কাছে কি কোন জ্ঞান আছে যা আমার সামনে পেশ করতে পার? তোমরা তো শুধু ধারণার বশবর্তী হও আর মনগড়া কথা বল।

(১৪৯) বলঃ সমস্ত নির্ণায়ক তর্কতো ঈশ্বরের অতএব তিনি যদি চাইতেন তাহলে অবশ্যই তোমাদের সকলকে সঠিক পথ দেখিয়ে দিতেন। (১৫০) বলঃ তোমাদের সেই সাক্ষীদেরকে নিয়ে এস যারা সাক্ষী দেয় যে, ঈশ্বর এই বস্তুগুলো হারাম (অবৈধ) করেছেন। যদি তারা সাক্ষী দিয়েও দেয় তবে তুমি তাদের সাথে সাক্ষী দিবে না। আর তুমি ঐ লোকদের ইচ্ছানুসারে কাজ করো না যারা আমার নিদর্শন সমূহকে মিথ্যা বলে এবং পরলোক বিশ্বাস করে না এবং অন্যকে আপন প্রভুর সমকক্ষ মনে করে। (১৫১) বলঃ এসো আমি শুনিয়ে দিই ঐ বিষয় যা তোমাদের প্রভু তোমাদের জন্য নিষিদ্ধ করে দিয়েছেন। তোমরা ঈশ্বরের সাথে কোন কিছু অংশীদার স্থাপন করো না, এছাড়া পিতা মাতার সাথে সদ্ব্যবহার করবে, দারিদ্রের ভয়ে নিজেদের সন্তানদের হত্যা করবে না। আমি তোমাদেরকে জীবিকা দান করি সেই সাথে ওদেরকেও। আর অশ্লীল কাজের কাছেও যাবে না, প্রত্যক্ষরূপে হোক বা পরোক্ষরূপে। আর যে প্রাণ হত্যা করা ঈশ্বর নিষিদ্ধ করেছেন, ন্যায় সঙ্গত কারণ ছাড়া, তাকে হত্যা করো না। ঈশ্বর তোমাদেরকে এই আদেশ দিয়েছেন যাতে তোমরা বুদ্ধির সঙ্গে কাজ কর।

(১৫২) এতিমদের সম্পদের কাছেও যাবে না, সদুদ্দেশ্য ব্যতীত, যে পর্যন্ত সে বয়োপ্রাপ্ত না হয়। মাপ ওজন ন্যায় সঙ্গতভাবে করবে। কাউকে আমি তার সাধের অতীত বোঝা চাপাই না। আর যখন কথা বলবে নায্য বলবে, সংশ্লিষ্ট ব্যক্তি নিকটাত্মীয় হলেও। আর ঈশ্বরের অঙ্গীকার পূরণ কর। তিনি তোমাদিগকে এই আদেশ দিয়েছেন যাতে তোমরা মনে রাখ।

(১৫৩) আর ঈশ্বর আদেশ দিয়েছেন এটাই আমার সোজাপথ। অতএব এই পথেই চলো অন্যপথে যেও না কারণ অন্যপথ তোমাদের ঈশ্বর হতে বিচ্ছিন্ন করে দেবে। ঈশ্বর তোমাদের এই নির্দেশ দিয়েছেন যাতে তোমরা সংযত হও। (১৫৪) অতঃপর আমি সৎকর্মশীলদের জন্য পরিপূর্ণতা, সবকিছুর বিস্তারিত বিবরণ, পথ-নির্দেশ এবং অনুগ্রহস্বরূপ মুসাকে (মোজেসকে) গ্রন্থ দিয়েছিলাম, যাতে তারা তাদের প্রভুর সাথে সাক্ষাতে বিশ্বাস করে।

(১৫৫) আর এভাবেই আমি এই কৃপাপূর্ণ গ্রন্থ অবতীর্ণ করেছি। অতএব তোমরা এটি মেনে চলো আর ঈশ্বরকে ভয় কর যাতে তোমরা অনুগ্রহপ্রাপ্ত হও। (১৫৬) যাতে তোমরা একথা না বলতে পার যে, আমাদের পূর্বে দুই সম্প্রদায়কে গ্রন্থ দেওয়া হয়েছিল, যার অনুশাসন সম্পর্কে আমরা অনবহিত ছিলাম। (১৫৭) অথবা তোমরা যেন একথাও না বলতে পার যে, যদি আক্ষম্মাদের উপর গ্রন্থ অবতীর্ণ করা হত তাহলে আমরা তার শ্রেষ্ঠ পথে চলতাম। অতঃপর তোমাদের কাছে তোমাদের প্রভুর তরফ হতে এসে গেছে স্পষ্ট প্রমাণ, পথ ও অনুগ্রহ। অতএব যে ঈশ্বরের বাণী সমূহকে মিথ্যা বলে এবং তার দিক থেকে মুখ ফিরিয়ে নেয় তার চেয়ে বড় অন্যায়কারী আর কে আছে? যারা আমার নিদর্শন হতে বিমুখ হয় আমি ওদের বিমুখতার ফল স্বরূপ খুবই নিকৃষ্ট শাস্তি দেব। (১৫৮) এই লোকেরা কি এই প্রতীক্ষায় আছে যে, তাদের নিকটে দেবদূত আসবে অথবা তোমাদের প্রভু আসবে অথবা তোমাদের প্রভুর নিদর্শন সমূহের মধ্যে কোন নিদর্শন আসবে? যে দিন তোমার প্রভুর পক্ষ থেকে কোন নিদর্শন এসে পৌঁছাবে সেদিন এমন কারো বিশ্বাস স্থাপন কোন কাজে আসবে না, যে আগে বিশ্বাস স্থাপন করেনি, বা বিশ্বাস অনুসারে কোন সৎকাজ করেনি। বলঃ তোমরাও প্রতীক্ষা কর আমিও প্রতীক্ষা করছি।

(১৫৯) যারা নিজেদের ধর্মকে খণ্ড-বিখণ্ড করেছে এবং বিভিন্ন দলে বিভক্ত হয়েছে ওদের সাথে তোমার কোন সম্পর্ক নেই। ওদের বিষয়টি ঈশ্বরের উপর ন্যাস্ত রয়েছে। তিনিই তাদের কৃতকর্ম সম্পর্কে তাদেরকে অবহিত করবেন।

(১৬০) যে ব্যক্তি ভাল কর্ম নিয়ে আসবে সে তার দশগুন ফল পাবে। আর যে খারাপ কর্ম নিয়ে আসবে তাকে শুধু সেটিরই ফল দেওয়া হবে এবং তাদের প্রতি অন্যায় করা হবে না। (১৬১) বলঃ আমার প্রভু আমাকে সঠিক পথ বলে দিয়েছেন। সঠিক ধর্ম ইবরাহীম (আব্রাহাম) পন্থীর যিনি একনিষ্ঠ ছিলেন আর তিনি অংশীবাদীদের অন্তর্ভুক্ত ছিলেন না।

(১৬২) বলঃ আমার প্রার্থনা, আমার উৎসর্গ, আমার জীবন ও আমার মৃত্যু ঈশ্বরেরই জন্য যিনি সমগ্র বিশ্বের প্রভু। (১৬৩) কেউই তাঁর অংশীদার নয়। আর আমাকে এই আদেশই দেওয়া হয়েছে আর আমিই প্রথম অনুগত। (১৬৪) বলঃ আমি কি ঈশ্বর ছাড়া অন্য কোন প্রভু অন্বেষণ করবো? অথচ তিনিই সবকিছুর প্রভু। যে যা উপার্জন করে তার ফল তারই উপর বর্তায়। একজন আরেকজনের ভার বহন করে না। পরিশেষে তোমাদের প্রভুর কাছেই তোমাদের প্রত্যাবর্তন। অতঃপর তিনিই তোমাদেরকে অবহিত করবেন যা নিয়ে তোমরা মতভেদ করছিলে। (১৬৫) আর তিনিই তোমাদের পৃথিবীতে একে অপরের উত্তরাধিকারী করেছেন আর তোমাদের মধ্যে একে অপরের তুলনায় উচ্চ মর্যাদা দান করেছেন, যাতে ওগুলোর মাধ্যমে তিনি তোমাদের পরীক্ষা করতে পারেন। তোমাদের প্রভু দ্রুত শাস্তি প্রদানকারী। আবার নিশ্চয়ই তিনি ক্ষমাশীল ও অতি দয়ালু।

অধ্যায় ৭ : আল-আরাফ (শিখর)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-মীম সোয়াদ। (২) এই গ্রন্থ তোমার নিকট অবতীর্ণ হয়েছে। অতএব এর ব্যাপারে তোমার মনে যেন কোন কুন্ঠারোধ না থাকে। যাতে এর দ্বারা তুমি লোকদের সচেতন করো, আর এটা বিশ্বাসীদের (ধর্মে আস্থাবানদের) জন্য একটি স্মারক। (৩) তোমাদের প্রভুর পক্ষ হতে তোমাদের কাছে যা অবতীর্ণ হয়েছে তোমরা তার অনুসরণ কর এবং তিনি ছাড়া অন্য কোন অভিভাবকদের অনুসরণ করো না। তোমরা খুব কমই উপদেশ গ্রহণ করো। (৪) আমি অনেক জনপদ ধ্বংস করে দিয়েছি। তাদের উপরে আমার শাস্তি এসেছিল রাতে অথবা দুপুরে তারা যখন বিশ্রামরত ছিল। (৫) তাদের উপর যখন আমার শাস্তি এসেছিল, তখন তাদের মুখে এই কথা ছাড়া আর কিছুই ছিল না যে, “বাস্তবিকই আমরা অত্যাচারী ছিলাম।” (৬) অতএব যাদের কাছে বার্তাবাহক পাঠানো হয়েছিল অবশ্যই আমি তাদের প্রশ্ন করবো এবং অবশ্যই আমি বার্তাবাহকদেরকেও প্রশ্ন করবো। (৭) অতঃপর আমি তাদের সামনে সবকিছুই বর্ণনা করবো জ্ঞাতসারে। আমিতো অনুপস্থিত ছিলাম না। (৮) সেদিন ওজন হবে যথাযথ। অতএব যাদের (পুণ্যের) পাল্লা ভারী হবে তারাই সফল ঘোষিত হবে। (৯) আর যাদের (পুণ্যের) পাল্লা হালকা হবে, তারা নিজেরাই নিজেদেরকে ক্ষতিগ্রস্ত করেছে, কারণ তারা ভুল করে আমার নিদর্শন সমূহ প্রত্যাখ্যান করেছে।

(১০) আর আমিই তোমাদেরকে পৃথিবীতে স্থান দিয়েছি আর আমিই এতে তোমাদের জন্য জীবন-সামগ্রী রেখেছি; কিন্তু তোমরা খুবই কম কৃতজ্ঞতা প্রকাশ কর। (১১) আর আমি তোমাদের সৃষ্টি করেছি অতঃপর আমিই তোমাদের

রূপদান করেছি। অতঃপর দেবদূতদের বলেছি যে, আদমকে (অ্যাডামকে) প্রনতিনিবেদন কর। অতঃপর তারা প্রনতি নিবেদন করেছে; কিন্তু ইবলীস প্রনতি নিবেদন কারীদের দলে शामिल হয় নি। (১২) ঈশ্বর বললেনঃ তোকে কিসে প্রনতি নিবেদন করতে বাধা দিল? যখন আমি তোকে নির্দেশ দিলাম প্রনতি নিবেদন করতে। ইবলীস বললঃ আমি এর চেয়ে উত্তম। তুমি আমাকে আগুন হতে সৃষ্টি করেছ আর আদমকে মাটি থেকে। (১৩) ঈশ্বর বললেন, তুই এখান থেকে বেরিয়ে যা, তোর এই অধিকার নেই যে এখানে তুই অহংকার করিস। অতএব বেরিয়ে যা নিশ্চিতরূপে তুই লাঞ্ছিতদের দলভুক্ত। (১৪) ইবলীস বললঃ সেইদিন পর্যন্ত তুমি আমাকে অবকাশ দাও যখন সব লোককে পুনরুত্থান করা হবে। (১৫) ঈশ্বর বললেনঃ তোকে অবকাশ দেওয়া হল। (১৬) ইবলিস বললঃ যখন তুমি আমাকে বিপথে ঠেলে দিলে, আমিও লোকদের জন্য তোমার সরলপথে ওৎ পেতে বসে থাকব। (১৭) তার পর আমি তাদের কাছে আসবো তাদের পিছন থেকে, তাদের সামনে থেকে, তাদের ডানদিক দিয়ে আর তাদের বাম দিক দিয়ে, ফলে তুমি তাদের অধিকাংশকে কৃতজ্ঞ হিসাবে পাবে না। (১৮) ঈশ্বর বললেনঃ বেরিয়ে যা এখান থেকে অপমানিত ও তিরস্কৃত হয়ে। এদের মধ্যে যে তোর পথে চলবে অবশ্যই আমি তাদের সকলের দ্বারা নরক পূর্ণ করবো।

(১৯) আর হে আদম (অ্যাডাম)ঃ তুমি ও তোমার স্ত্রী স্বর্গে থাক যেখান থেকে খুশী আহার কর; কিন্তু ঐ বৃক্ষের নিকটে যেও না, তাহলে তুমি ক্ষতিগ্রস্তদের অন্তর্ভুক্ত হয়ে যাবে। (২০) তখন শয়তান তাদের আবৃত লজ্জা স্থান অনাবৃত করার মতলবে তাদের কুমন্ত্রণা দেয় আর বলে, তোমাদের প্রভু তোমাদেরকে গাছটির কাছে যেতে নিষেধ করেছেন কেবল এই কারণে যে, পাছে তোমরা দেবদূত বা এখানকার স্থায়ী বাসিন্দা হয়ে যাও। (২১) সে তাদের কাছে শপথ করে বললঃ আমি অবশ্যই তোমাদের হিতাকাঙ্ক্ষী।

(২২) এভাবে সে প্রতারণা করে তাদেরকে বিভ্রান্ত করল। অতঃপর যখন তারা দুজনে বৃক্ষের ফলের স্বাদ গ্রহণ করল তখন তাদের লজ্জা স্থান অনাবৃত হয়ে গেল এবং তারা স্বর্গের পাতা দিয়ে নিজেদেরকে আবৃত করতে লাগল, আর তাদের প্রভু তাদেরকে সন্মোদন করে বললেন আমি কি তোমাদের ঐ গাছটির কাছে যেতে নিষেধ করিনি এবং বলিনি যে, শয়তান তোমাদের প্রকাশ্য শত্রু? (২৩) তারা বলল হে আমাদের প্রভু! আমরা নিজেদের প্রতি অত্যাচার করেছি আর যদি আপনি আমাদের ক্ষমা না করেন আর আমাদের দয়া না করেন তাহলে আমরা ক্ষতিগ্রস্ত হব। (২৪) ঈশ্বর বললেন : নেমে যাও, তোমরা একে অপরের শত্রু থাকবে আর তোমাদের জন্য পৃথিবীতে কিছুকালের নিবাস ও জীবনযাত্রার ব্যবস্থা রয়েছে। (২৫) ঈশ্বর বললেন : ওখানেই তোমরা বাঁচবে আর ওখানেই তোমরা মরবে আর ওখান থেকেই তোমাদের বের করা হবে।

(২৬) হে আদম (অ্যাডাম) সন্তানেরা! আমি তোমাদেরকে লজ্জা নিবারণ ও সাজ-সজ্জার জন্য বস্ত্র দিয়েছি। আর সতর্কপূর্ণ ধর্মপরায়ণতার পোষাক এর চেয়েও উত্তম। এটা ঈশ্বরের নিদর্শনসমূহের মধ্য অন্যতম নিদর্শন, যাতে লোক চিন্তা করে। (২৭) হে আদমের সন্তানেরা! শয়তান যেন তোমাদের পথ ভ্রষ্ট না করে দেয় যেভাবে সে তোমাদের পিতা-মাতাকে স্বর্গ থেকে বের করে দিয়েছিল, সে তাদেরকে বিবস্ত্র করেছিল যাতে তাদের নগ্নতা প্রকাশিত হয়। সে ও তার দলবল এমন স্থান থেকে তোমাদের দেখে যেখানে তোমরা তাদেরকে দেখতে পাও না। আমি শয়তানকে ঐ লোকদের বন্ধু করে দিয়েছি যারা আস্তাবান নয়।

(২৮) যখন তারা কোন অশ্লীল কাজ করে তখন বলে আমরা আক্ষু মাদের পূর্বপুরুষদেরকে এসব কাজ করতে দেখেছি আর ঈশ্বর আমাদের এটা করতে আদেশ দিয়েছেন। বলঃ ঈশ্বর কখনও অশ্লীল কাজের আদেশ দেন না। তোমরা কি ঈশ্বর সম্পর্কে এমন কথা বলছ যা তোমরা জান না?

(২৯) বলঃ আমার প্রভুন্যায় বিচারের আদেশ দিয়েছেন, আর তোমরা প্রত্যেক প্রার্থনার সময় নিজেদের মুখমণ্ডল তাঁর দিকে নিবদ্ধ কর; আনুগত্যপূর্ণ আন্তরিকতার সঙ্গে তাঁকে ডাক। যেভাবে তিনি তোমাদেরকে প্রথমবার সৃষ্টি করেছেন, সেভাবেই তোমরা ফিরে আসবে। (৩০) এক দলকে তিনি সুপথ দেখিয়ে দিয়েছেন এবং আরেক দলের পথ ভ্রষ্টতা অবধারিত হয়েছে। তারা ঈশ্বরের পরিবর্তে শয়তানকে বন্ধু বানিয়েছে আর মনে করেছে তারা সঠিক পথেই আছে।

(৩১) হে আদম (অ্যাডাম) সন্তানেরা! প্রত্যেক প্রার্থনার সময় যথযথভাবে বস্ত্র পরিধান কর, আর পানাহার কর, আর অপব্যয় করো না, নিঃসন্দেহে ঈশ্বর অপব্যয়কারীদের পছন্দ করেন না। (৩২) বলঃ ঈশ্বর তার বান্দাদের জন্য যেসব শোভনীয় বস্তু ও বিশুদ্ধ জীবিকা (খাদ্য) সৃষ্টি করেছেন তা কে নিষিদ্ধ করেছে? বলঃ পার্থিব জীবনে সেগুলি আস্থাবানদের জন্য বৈধ এবং পরকালেও তা বিশেষভাবে তাদের জন্যই হবে। এভাবে আমি আপন বাণী (নিদর্শনসমূহ) বিস্তারিত ভাবে বর্ণনা করি তাদের জন্য যারা বোঝে। (৩৩) বলঃ আমার প্রভু অশ্লীল কাজকর্ম তা প্রকাশ্যই হোক বা গোপনে, আর পাপকে, অসঙ্গত নিপীড়নকে, আর ঈশ্বরের সাথে কাউকে অংশীদার স্থাপন করাকে যার কোন প্রমাণ তিনি পাঠাননি এবং ঈশ্বর সম্পর্কে অজ্ঞতাপূর্ণ মন্তব্যকে অবৈধ করেছেন।

(৩৪) প্রত্যেক জাতির জন্য একটি সময় নির্ধারিত আছে। যখন তাদের সেই সময় এসে যায় তখন তারা এক মুহূর্ত পিছোতেও পারে না বা এক মুহূর্ত এগোতেও পারে না। (৩৫) হে আদমের সন্তানেরা! যদি (সৃষ্টির আদিতে ঈশ্বর বলে দিয়েছিলেন) তোমাদের কাছে তোমাদের মধ্যে থেকে একজন বার্তাবাহক আসে যে তোমাদেরকে আমার বাণী শোনায়ে তখন যে ব্যক্তি সচেতন হবে এবং যে শুধরে যাবে তার জন্য কোন ভয় থাকবে না আর সে দুঃখী ও হবে না। (৩৬) আর যারা আমার নিদর্শন সমূহকে মিথ্যা বলবে এবং সেগুলোর ব্যাপারে ঔদ্ধত্য

দেখাবে তারাই নরকবাসী, তারা সেখানে চিরকাল থাকবে। (৩৭) যে ঈশ্বরের বিরুদ্ধে মিথ্যা বানিয়ে বলে অথবা তাঁর নিদর্শন সমূহকে অবিশ্বাস করে তার চেয়ে বড় অন্যায়কারী আর কে আছে? তাদের ভাগ্যে যা লেখা আছে তা তাদের কাছে পৌঁছতে থাকবে। এমনকি যখন আমার দেবদূত তার প্রাণ নেওয়ার জন্য তার কাছে পৌঁছাবে তখন সে তাকে জিজ্ঞাসা করবে যে, ঈশ্বর ছাড়া যাদেরকে তুমি ডাকতে তারা কোথায়? সে বলবে তারা সব হারিয়ে গেছে। আর তারা নিজেদের বিরুদ্ধেই সাক্ষ্য দেবে যে তারা অস্বীকারকারী ছিল।

(৩৮) ঈশ্বর বলবেনঃ তোমাদের পূর্বে যে সব জ্বীন ও মানুষের দল চলে গেছে তাদের সাথে তোমরাও নরকে প্রবেশ কর। যখনই কোন দল নরকে প্রবেশ করবে সে তার সাথী দলকে অভিশাপ দেবে। অবশেষে সবাই যখন সেখানে একত্রিত হবে তখন পরবর্তী দল পূর্ববর্তী দল সম্পর্কে বলবে হে আমাদের প্রভু! এরা আমাদেরকে বিপথগামী করেছে অতএব এদেরকে নরকের দ্বিগুণ শাস্তি দাও। ঈশ্বর বলবেনঃ সবার জন্যেই দ্বিগুণ আছে; কিন্তু তোমরা জান না। (৩৯) আর তাদের পূর্ববর্তীরা পরবর্তীদের বলবে আমাদের উপর তোমাদের কোন শ্রেষ্ঠত্ব নেই। অতএব আপন কৃত্তকর্মের পরিণাম স্বরূপ শাস্তির স্বাদ আস্বাদন কর।

(৪০) নিঃসন্দেহে যারা আমার নিদর্শন সমূহ অবিশ্বাস করে আর সেগুলো সম্পর্কে ঔদ্ধত্য প্রকাশ করে তাদের জন্য আকাশের দ্বার খোলা হবে না এবং তারা স্বর্গে প্রবেশ করবে না, যতক্ষণ না সূচের ছিদ্রে উট প্রবেশ করে। আর আমি অপরাধীদেরকে এমনই শাস্তি দিয়ে থাকি। (৪১) ওদের জন্য থাকবে নরকের শয্যা এবং তার উপরে ওরই আচ্ছাদন। আর আমি অত্যাচারীদের এভাবেই শাস্তি দিই। (৪২) আর যারা আস্থাভাবন হয়েছে এবং সৎকর্ম করেছে, আমি কোন ব্যক্তির উপর তার সাধ্যের অতীত বোঝা চাপাই না।

এরাই স্বর্গবাসী, তারা ওখানে চিরকাল থাকবে। (৪৩) আর ওদের অন্তর থেকে যাবতীয় ঈর্ষা আমি দূর করে দেব। তাদের পাদদেশ দিয়ে নদী প্রবাহিত হবে আর তারা বলবে সমস্ত প্রশংসা ঈশ্বরের যিনি আমাদেরকে এই পর্যন্ত আসার পথ দেখিয়েছেন, তিনি আমাদের পথ না দেখালে আমরা পথের সন্ধান পেতাম না। আমাদের প্রভুর প্রেরিত বার্তাবাহকগণ সত্য নিয়ে এসেছিলেন। এবং তাদেরকে ডেকে বলা হবে - এই হল স্বর্গ; তোমাদের কৃতকর্মের বিনিময়ে তোমাদেরকে এর উত্তরাধিকারী বানানো হয়েছে।

(৪৪) আর স্বর্গের অধিবাসীরা নরকের অধিবাসীদের ডেকে বলবে : আমাদের প্রভু আমাদেরকে যে অঙ্গীকার করেছিলেন আমরা তা ঠিকমতো পেয়েছি। তোমরাও কি আপন প্রভুর অঙ্গীকার ঠিকমতো পেয়েছ? তারা বলবে : হ্যাঁ তখন একজন ঘোষণাকারী তাদের মধ্যে ঘোষণা করবে অত্যাচারীদের উপর ঈশ্বরের অভিশাপ। (৪৫) যারা ঈশ্বরের পথে বাধা দিত এবং তাতে বক্রতা অন্বেষণ করত, তারা পরকালকেও অস্বীকার করতো।

(৪৬) উভয়ের মাঝে একটা পর্দা থাকবে আর উচ্চস্থানে কিছু লোক থাকবে যারা সকলকে তাদের লক্ষণ দেখে চিনতে পারবে আর তারা স্বর্গবাসীদের ডেকে বলবে তোমাদের উপর শাস্তি বর্ষিত হোক, তারা তখনও স্বর্গে প্রবেশ করেনি তবে প্রত্যাশা করছে। (৪৭) এরপর যখন তারা নরকবাসীদের দিকে দেখবে তখন বলবে হে আমাদের প্রভু! আমাদেরকে এই অত্যাচারী লোকদের সঙ্গী করো না। (৪৮) আর উচ্চস্থানের লোকেরা ওই লোকেদের লক্ষণ দেখে চিনে নেয়ে বলবে - তোমাদের দলবল ও অহংকার তোমাদের কোন কাজে আসেনি। (৪৯) এরা কি তারা যাদের সম্পর্কে তোমরা শপথ নিয়ে বলতে যে, এদের উপর ঈশ্বর কখনও কৃপাদৃষ্টি করবেন না। “স্বর্গে প্রবেশ কর, এখন আর তোমাদের কোন ভয় নেই আর তোমরা দুঃখিত ও হবে না।”

(৫০) আর নরকের অধিবাসীরা স্বর্গের অধিবাসীদের ডেকে বলবেঃ আমাদের উপর কিছু জল ঢেলে দাও অথবা ঈশ্বর তোমাদের যা খেতে দিয়েছে তার কিছু অংশ আমাদের দাও। তারা বলবেঃ ঈশ্বর এই দুটোই অস্বীকারকারীদের জন্য নিষিদ্ধ করেছেন। (৫১) যারা তাদের ধর্মকে ক্রীড়া কৌতুক বানিয়ে নিয়েছিল এবং দুনিয়ার জীবন যাদেরকে প্রতারিত করেছিল, তাদেরকে আজ আমি ভুলে যাব যেভাবে তারা তাদের আজকের দিনটির সাক্ষাৎকে ভুলে গিয়েছিল, এবং যেভাবে তারা আমার নিদর্শন সমূহকে মিথ্যা মনে করত।

(৫২) আর আমি এই লোকদের কাছে এমন একটি গ্রন্থ পৌঁছিয়েছি যা আমি জেনে বুঝে বর্ণনা করেছি, এতে আস্থাবানদের জন্য পথ নির্দেশ ও অনুগ্রহ রয়েছে। (৫৩) তারা কি কেবল এর পরিনামের অপেক্ষা করছে? যে দিন তার পরিণাম প্রকাশিত হবে সেদিন যারা তাকে আগে ভুলে গিয়েছিল তারা বলবে, আমাদের প্রভুর বার্তাবাহক গণ তো সত্য নিয়ে এসেছিলেন। আমাদের জন্য কি সুপারিশকারী পাওয়া যাবে, যারা আমাদের জন্য একটু সুপারিশ করবে? যাতে আমরা আগে যা করতাম তার চেয়ে ভিন্নতর কর্ম কিছু করতে পারি। তারা নিজেরাই নিজেদেরকে ক্ষতিগ্রস্ত করেছে এবং তারা যে মিথ্যা রচনা করেছিল তা অন্তর্হিত হয়ে গেছে।

(৫৪) নিশ্চয়ই তোমাদের প্রভু ঈশ্বর, যিনি ছয় দিনে (সময়ে) আকাশ ও পৃথিবী সৃষ্টি করেছেন। অতঃপর আরশে (সিংহাসনে) অধিষ্ঠিত হয়েছেন। তিনি রাত দিয়ে দিনকে ঢেকে দেন, প্রত্যেকে অন্যের পিছনে দ্রুত ছুটে আসছে। তিনি আরো সৃষ্টি করেছেন সূর্য, চন্দ্র, আর তারকারাজী। সবাই তাঁর আদেশ পালনকারী। মনে রেখো, তাঁরই কাজ সৃষ্টি করা আর আদেশ করা। ঈশ্বর মহিমান্বিত যিনি সারা বিশ্বের প্রভু। (৫৫) তোমরা নিজের প্রভুকে ডাক (মিনতি করে) বিনীত ভাবে ও সংগোপনে। নিশ্চয়ই তিনি সীমালঙ্ঘনকারীদের পছন্দ করেন না।

(৫৬) শান্তি প্রতিষ্ঠার পর তোমরা পৃথিবীতে অশান্তি সৃষ্টি করো না এবং ভয় ও প্রত্যাশা নিয়ে তাকে ডাক। নিশ্চয়ই ঈশ্বরের কৃপা সংকমশীলদের অতি নিকটে।

(৫৭) আর তিনিই ঈশ্বর যিনি তাঁর কৃপার (বৃষ্টির) পূর্বে বাতাসকে সুসংবাদরূপে পাঠান। এই বাতাস যখন ভারী মেঘ উঠিয়ে আনে তখন আমি তাকে কোন নির্জীব ভূমির দিকে চালিয়ে দিই। তারপর তা থেকে বৃষ্টি বর্ষণ করি। তারপর তার মাধ্যমে আমি সবরকম ফল উৎপন্ন করি। এভাবেই আমি মৃতদের জীবিত করবো, যাতে তোমরা চিন্তা কর। (৫৮) উৎকৃষ্ট ভূমির ফসল তার প্রভুর আদেশে প্রয়োজনাধিক উৎপন্ন হয়। আর যে ভূমি নিকৃষ্ট তার ফসল কমই উৎপন্ন হয়। এভাবেই আমি আপন নিদর্শন সমূহ নানাভাবে দেখাই কৃতজ্ঞতা প্রকাশকারীদেরকে।

(৫৯) নিশ্চয় আমি নূহকে (নোয়াহ) তার সম্প্রদায়ের কাছে পাঠিয়েছিলাম। নূহ (নোয়াহ) বলেছিল : হে আমার সম্প্রদায়! ঈশ্বরের উপাসনা কর। তিনি ছাড়া তোমাদের কোন উপাস্য নেই। আমি তোমাদের জন্য এক ভয়ানক দিনের শাস্তির আশঙ্কা করছি। (৬০) তার সম্প্রদায়ের প্রধান নেতারা বলেছিলঃ আমরা তো দেখতে পাচ্ছি যে, তুমি স্পষ্ট পথভ্রষ্টতার মধ্যে লিপ্ত আছ। (৬১) নূহ (নোয়াহ) বলেছিল : হে আমার সম্প্রদায়! আমার মধ্যে কোনই পথভ্রষ্টতা নেই। তবে আমি বিশ্ব প্রভুর পক্ষ থেকে পাঠানো এক বার্তাবাহক। (৬২) আমি আমার প্রভুর বার্তাসমূহ তোমাদের কাছে প্রচার করি এবং তোমাদেরকে সদুপদেশ দিই। আমি ঈশ্বরের পক্ষ থেকে এমন সব বিষয় জানতে পাই যা তোমরা জানো না। (৬৩) তোমরা কি এতে বিস্মিত হয়েছে যে, তোমাদেরই একজনের মাধ্যমে তোমাদের কাছে তোমাদের প্রভুর পক্ষ থেকে উপদেশ এসেছে। যাতে সে তোমাদেরকে সতর্ক করে যাতে তোমরা ঈশ্বরভীরু হতে পার এবং তোমাদের উপর দয়া করা হয়। (৬৪) অতঃপর তারা তাকে

মিথ্যাবাদী বলল। তারপর আমি নূহকে (নোয়াহ) রক্ষা করলাম আর যারা তার সঙ্গে নৌকায় ছিল তাদেরও। আর আমি ঐ লোকদের ডুবিয়ে দিলাম যারা আমার নিদর্শন সমূহ অবিশ্বাস করেছিল। নিশ্চয়ই ঐ লোকেরা অন্ধ ছিল।

(৬৫) আর আদ জাতির নিকট আমি ওদের ভাই হুদকে পাঠিয়েছিলাম। সে বলেছিল : হে আমার সম্প্রদায় : ঈশ্বরের উপাসনা কর। তিনি ছাড়া কেউই তোমাদের উপাস্য নেই। তবে কি তোমরা ধর্মভীরুতা অবলম্বন করবে না? (৬৬) তার সম্প্রদায়ের নেতৃবৃন্দ যারা সত্য স্বীকার করতে পরাজুখ ছিল বলল - আমরা তোমাকে মুখ্যতায় লিপ্ত দেখতে পাচ্ছি আর আমরা মনে করি তুমি মিথ্যাবাদী। (৬৭) হুদ বললঃ হে আমার সম্প্রদায়! আমি মুখ্য নই বরং আমি বিশ্ব প্রভুর বার্তাবাহক। (৬৮) তোমাদেরকে আপন প্রভুর বার্তাসমূহ পৌঁছে দিচ্ছি আর আমি তোমাদের একজন হিতাকাঙ্ক্ষী ও বিশ্বস্থ। (৬৯) তোমরা কি আশ্চর্য্য হয়ে যাচ্ছ যে, তোমাদের কাছে তোমাদের মধ্যে হতে একজনের মাধ্যমে তোমাদের প্রভুর উপদেশ এসেছে যাতে সে তোমাদেরকে সতর্ক করে। আর স্মরণ কর যখন তিনি নূহের (নোয়াহ) সম্প্রদায়ের পর তোমাদেরকে উত্তরাধিকারী মনোনীত করেছেন এবং তোমাদেরকে দৈহিক গঠনে সমৃদ্ধ করেছেন। অতএব ঈশ্বরের অনুগ্রহ স্মরণ কর যাতে তোমরা সফলকাম হও।

(৭০) হুদের সম্প্রদায় বললঃ তুমি কি আমাদের কাছে শুধু এজন্যেই এসেছ যে, আমরা কেবল এক ঈশ্বরেরই উপাসনা করি এবং তাদের পরিত্যাগ করি যাদের উপাসনা আমাদের পূর্বপুরুষেরা করে আসছে। তাহলে তুমি যে শাস্তির হুমকি আমাদের দিচ্ছো তা নিয়ে এস, যদি তুমি সত্য হও। (৭১) হুদ বললঃ তোমাদের উপর তোমাদের প্রভুর পক্ষ থেকে শাস্তি ও ক্রোধ অবধারিত হয়ে গেছে। তোমরা কি তোমাদের ও তোমাদের পূর্বজনদের রাখা কতগুলো নাম নিয়ে আমার সাথে বিতর্ক করতে চাও যার কোন প্রমাণ ঈশ্বর অবতীর্ণ করেন নি।

তাহলে প্রতীক্ষা কর, আমিও তোমাদের সাথে প্রতীক্ষায় থাকলাম। (৭২) অতঃপর আমি তাকে ও তার সঙ্গীদের আমার বিশেষ অনুগ্রহে রক্ষা করেছিলাম। আর ওই লোকদের নির্মূল করে দিয়েছিলাম যারা আমার নিদর্শন সমূহ মিথ্যা মনে করত এবং বিশ্বাস করত না।

(৭৩) আর সামুদ জাতির কাছে আমি তাদের ভাই সালেহকে পাঠিয়েছিলাম। সে বলেছিলঃ হে আমার সম্প্রদায়! ঈশ্বরের উপাসনা কর তিনি ছাড়া অন্য কেউ তোমাদের উপাস্য নেই। তোমাদের কাছে তোমাদের প্রভুর পক্ষ থেকে এক স্পষ্ট নিদর্শন এসে গেছে। ঈশ্বরের এই উদ্ভী তোমাদের জন্য এক নিদর্শন রূপে এসেছে। অতএব তাকে ছেড়ে দাও সে ঈশ্বরের ভূমিতে চরে খাবে। আর ওকে কোন প্রকার কষ্ট দিও না। তাহলে তোমাদের উপর কঠিন শাস্তি আসবে। (৭৪) স্মরণ কর, যখন ঈশ্বর আদ জাতির পরে তোমাদেরকে ওদের উত্তরাধিকারী মনোনীত করেছেন এবং পৃথিবীতে তোমাদের বাসিন্দা করেছেন। তোমরা তার সমতল ভূমিতে প্রাসাদ বানাচ্ছ আর পাহাড় কেটে ঘরবাড়ী তৈরী করছো। অতএব ঈশ্বরের অনুগ্রহের কথা স্মরণ কর, আর পৃথিবীতে গোলযোগ সৃষ্টি করো না।

(৭৫) তার সম্প্রদায়ের অহঙ্কারী নেতারা, দুর্বল বলে বিবেচিত আত্মস্থানদের বললঃ তোমরা কি বিশ্বাস কর যে, সালেহ আপন প্রভুর প্রেরিত ব্যক্তি? তারা উত্তর দিয়েছিল যে, সে যা নিয়ে এসেছে আমরা তো তা বিশ্বাস করি। (৭৬) ওই অহঙ্কারী লোকেরা বলতে লাগল - ‘তোমরা যা বিশ্বাস কর, আমরা তা বিশ্বাস করি না।’ (৭৭) অতঃপর তারা উদ্ভিটিকে হত্যা করল আর আপন প্রভুর আদেশ প্রত্যাখ্যান করল। আর তারা বললঃ হে সালেহ! যদি তুমি পয়গম্বর হও তাহলে আমাদের উপর সেই শাস্তি নিয়ে আসো, যে শাস্তির ভয় তুমি আমাদের দেখাচ্ছ। (৭৮) তখন ভূমিকম্প তাদেরকে আঘাত করে। ফলে

তারা নিজের নিজের ঘরে নতজানু হয়ে পড়ে রইল। (৭৯) তখন সালেহ এই বলে তাদের জনপদ থেকে বেরিয়ে গেল যে, হে আমার সম্প্রদায়! আমি তোমাদের কাছে আমার প্রভুর বার্তা পৌঁছে দিয়েছি এবং তোমাদের ভাল চেয়েছি; কিন্তু তোমরা হিতাকাঙ্ক্ষীদের পছন্দ কর না।

(৮০) আর আমি লুত কে পাঠালাম। যখন সে তার সম্প্রদায়কে বললঃ তোমরা এমন অশ্লীল কাজ করছো যা তোমাদের পূর্বে বিশ্বে আর কেউ করে নি। (৮১) তোমরা মহিলাদের পরিবর্তে পুরুষদের দ্বারা নিজেদের যৌন ইচ্ছা পূরণ করছো। তোমরা তো এক সীমালঙ্ঘনকারী সম্প্রদায়। (৮২) তার সম্প্রদায়ের কাছে কোন জবাব ছিল না, তাই তারা শুধু বলল এদেরকে আমাদের জনপদ থেকে বহিস্কার করে দাও, এরা খুবই সদাচারী সাজছে। (৮৩) অতঃপর আমি লুতকে ও তার পরিবারকে রক্ষা করলাম তবে তার স্ত্রীকে নয় সে পিছনে থেকে যাওয়া লোকদের মধ্যে ছিল। (৮৪) আমি তাদের উপর পাথর বর্ষণ করেছিলাম। অতএব দেখ, অপরাধীদের কেমন পরিণতি হয়েছে।

(৮৫) আর মাদইয়ানবাসীদের নিকট আমি তাদের ভাই শো'আইবকে পাঠিয়েছিলাম। সে বলেছিলঃ হে আমার সম্প্রদায়! ঈশ্বরের উপাসনা কর, তিনি ছাড়া তোমাদের কোন উপাস্য নেই। তোমাদের কাছে তোমাদের প্রভুর পক্ষ হতে স্পষ্ট প্রমাণ এসেছে। অতএব তোমরা মাপ ও ওজন সঠিকভাবে কর এবং লোকদেরকে তাদের জিনিষপত্র কম দিও না। আর পৃথিবীতে শান্তি স্থাপনের পর সেখানে অশান্তি সৃষ্টি করো না। এটাই তোমাদের জন্য ভাল যদি তোমরা আস্থাবান হও। (৮৬) আর রাস্তায় বসে তাদেরকে বাধা দিও না যারা বিশ্বাস স্থাপন করেছে এবং ঈশ্বরের পথে বাধা সৃষ্টি করো না, এবং এতে কোন বক্রতা অন্বেষণ করো না। আর স্মরণ কর যখন তোমরা সংখ্যায় কম ছিলে, তারপর ঈশ্বর তোমাদের সংখ্যা বাড়িয়ে দিয়েছেন। আর দেখ, অশান্তি সৃষ্টিকারীদের পরিণতি কি হয়েছে।

(৮৭) আর যদি তোমাদের একটি দল আমাকে যা দিয়ে পাঠানো হয়েছে তা বিশ্বাস করে এবং অন্য দল বিশ্বাস না করে তাহলে তোমরা ধৈর্য ধারণ কর, যতক্ষণ না ঈশ্বর আমাদের মধ্যে মীমাংসা করে দেন। তিনিই তো শ্রেষ্ঠ মীমাংসাকারী।

(৮৮) তার সম্প্রদায়ের অহঙ্কারী নেতারা বলেছিল : হে শো'আইব ! আমরা তোমাকে ও যারা তোমার উপর বিশ্বাস এনেছে তাদের কে আমাদের জনপদ থেকে বহিস্কার করে দেব যদি তুমি আমাদের দলে ফিরে না আস। শো'আইব বললঃ আমরা যদি অসন্তুষ্ট হই তবুও ? (৮৯) আমরা ঈশ্বরের উপর মিথ্যা আরোপকারী হব যদি আমরা তোমাদের ধর্মে ফিরে যাই যা থেকে ঈশ্বর আমাদের উদ্ধার করেছেন। আর আমাদের দ্বারা এটা সম্ভব নয় যে আমরা ঐ ধর্মে ফিরে যাবো, যদি আমাদের প্রভু ঈশ্বর না চান। আমাদের প্রভু প্রত্যেক বস্তুকে তাঁর জ্ঞানের আওতায় রেখেছেন। আমরা আমাদের প্রভুর উপরে ভরসা করেছি। হে আমাদের প্রভু ! আমাদের আর আমাদের সম্প্রদায়ের মাঝে যথার্থ মীমাংসা করে দিন। কারণ আপনি শ্রেষ্ঠ মীমাংসাকারী। (৯০) তার সম্প্রদায়ের অস্বীকারকারী নেতারা বলেছিলঃ যদি তোমরা শো'আইব এর অনুসরণ কর তাহলে ধ্বংস হয়ে যাবে। (৯১) অতঃপর ভূমিকম্প তাদেরকে আঘাত করল এবং তারা তাদের বাড়ীতে মুখ উপড় হয়ে পড়ে রইল। (৯২) যারা শো'আইবকে অবিশ্বাস করেছিল মনে হচ্ছিল তারা যেন কোনদিন এই জনপদে বসবাসই করে নি। যারাই শো'আইবকে অবিশ্বাস করেছিল তারাই ক্ষতিগ্রস্ত হল। (৯৩) ঐ সময় শো'আইব তাদের দিক হতে মুখ ফিরিয়ে নিল এবং বললঃ হে আমার সম্প্রদায় ! আমি তোমাদেরকে আমার প্রভুর বার্তাসমূহ পৌঁছে দিয়েছি, আর আমি তোমাদের মঙ্গল চেয়েছি। এখন আমি কি অস্বীকারকারীদের জন্য অনুতাপ করবো ?

(৯৪) আর আমি যে জনপদেই কোন পয়গম্বর (বার্তাবহ) পাঠিয়েছি তখনই তার অধিবাসীদের অভাব-অনটন ও দুঃখ-কষ্ট দ্বারা পাকড়াও করেছি, যাতে তারা নতি স্বীকার করে। (৯৫) পুনরায় আমি দুঃখকে সুখে পরিবর্তন করে দিয়েছি। এমনকি তারা প্রাচুর্যের অধিকারী হয়েছে আর বলেছে সুখ আর দুঃখ তো আমাদের পূর্বপুরুষদেরও হয়েছিল। তখন আমি তাদেরকে এমন আকস্মিক ভাবে পাকড়াও করেছি যে তারা এর কল্পনাও করতে পারেনি। (৯৬) আর যদি জনপদের অধিবাসীরা বিশ্বাস করত আর ভয় করত তাহলে আমি তাদের জন্য আকাশ ও মাটির উপহার সমূহ উন্মুক্ত করে দিতাম; কিন্তু তারা অবিশ্বাস করেছে। তাই আমি তাদের কৃতকর্মের জন্য তাদেরকে পাকড়াও করলাম। (৯৭) তবে কি জনপদের অধিবাসীরা রাতে ঘুমন্ত অবস্থায় আমার শাস্তি তাদের উপর পতিত হওয়া থেকে নির্ভয় হয়ে গেছে? (৯৮) অথবা জনপদের অধিবাসীরা সকাল বেলায় খেলাধুলায় মত্ত অবস্থায় আমার শাস্তি তাদের উপর পতিত হওয়া থেকে নির্ভয় হয়ে গেছে? (৯৯) তারা কি ঈশ্বরের পরিকল্পনা থেকে নির্ভয় হয়ে গেল? বস্ত্রত ক্ষতিগ্রস্ত লোকেরা ছাড়া কেউ ঈশ্বরের পরিকল্পনা থেকে নির্ভয় হতে পারে না।

(১০০) যারা উত্তরাধিকার লাভ করেছে তারা কি তাদের পিতৃপুরুষদের কাছ থেকে শিক্ষা পায়নি যে, আমি চাইলে তাদের পাপের কারণে তাদেরকে শাস্তি দিতে পারি। আর আমি ওদের অন্তরসমূহের উপর মোহর এঁটে দিয়েছি, সেই জন্য তারা পথনির্দেশনার বাণী শুনতে পায় না। (১০১) ঐ জনপদগুলির কিছু ঘটনা আমি তোমার নিকট বর্ণনা করছি। ওদের কাছে আমার বার্তাবহ নিদর্শন নিয়ে এসেছিল; কিন্তু তারা আগেই যা অবিশ্বাস করেছিল তা আর বিশ্বাস করতে প্রস্তুত ছিল না। এভাবেই ঈশ্বর অবিশ্বাসীদের অন্তরসমূহে মোহর এঁটে দেন। (১০২) আর আমি তাদের অধিকাংশকে প্রতিজ্ঞা পালনকারীরূপে পাইনি, বরং তাদের অধিকাংশকে অবাধ্যরূপে পেয়েছি।

(১০৩) অতঃপর তাদের পরে আমি মূসাকে (মোজেসকে) আপন নিদর্শন দিয়ে ফ্যারাও ও তার সম্প্রদায়ের সর্দারদের কাছে পাঠিয়েছিলাম; কিন্তু তারা অন্যায়ভাবে আমার নিদর্শনগুলো প্রত্যাখ্যান করে। সুতরাং চেয়ে দেখ, অনাচারীদের কেমন পরিণতি হয়েছিল। (১০৪) আর মূসা (মোজেস) বলেছিলঃ হে ফ্যারাও! আমাকে বিশ্ব প্রভুর পক্ষ থেকে পাঠানো হয়েছে। (১০৫) ঈশ্বর সম্পর্কে সত্য ছাড়া কিছু না বলাই আমার জন্য সমীচীন। আমি তোমাদের কাছে তোমাদের প্রভুর পক্ষ থেকে স্পষ্ট প্রমাণ নিয়ে এসেছি। অতএব ইসরাইলের সন্তানদের আমার সাথে যেতে দাও। (১০৬) ফ্যারাও বললঃ যদি তুমি কোন নিদর্শন নিয়ে এসে থাক তাহলে তা পেশ কর, যদি তুমি সত্যবাদী হও। (১০৭) তখন মূসা (মোজেস) তার লাঠিখানা নিষ্ক্ষেপ করল, আর অমনি তা একটি জলজ্যাস্ত অজগরে পরিণত হল। (১০৮) তারপর সে তার হাত বের করল, আর অমনি তা দর্শকদের জন্য শুভোজ্জ্বল হয়ে গেল। (১০৯) ফ্যারাও এর সম্প্রদায়ের নেতারা বললঃ এ ব্যক্তি একজন বিজ্ঞ জাদুকর। (১১০) যে তোমাদেরকে তোমাদের দেশ থেকে বের করে দিতে চায়। এখন তোমাদের পরামর্শ কি? (১১১) তারা বললঃ মূসা (মোজেস) আর ওর ভাইকে কিছুটা সময় দেওয়া হোক, আর নগরে নগরে খবর দেওয়া হোক। (১১২) তারা আপনার নিকট সমস্ত বিজ্ঞ জাদুকর নিয়ে আসুক।

(১১৩) আর জাদুকরেরা ফ্যারাও এর কাছে উপস্থিত হল। তারা বললঃ আমরা যদি সফল হই তাহলে তো অবশ্যই আমরা পুরস্কার পাব। (১১৪) ফ্যারাও বলল অবশ্যই, আর তোমরা আমার কাছের মানুষে গণ্য হবে। (১১৫) জাদুকরেরা বললঃ হে মূসা (মোজেস)! হয় তুমি নিষ্ক্ষেপ কর না হয় আমরাই নিষ্ক্ষেপ করবো। (১১৬) মূসা (মোজেস) বললঃ তোমরাই নিষ্ক্ষেপ কর। তারপর তারা যখন নিষ্ক্ষেপ করল তখন তারা লোকদের

চোখগুলিকে সম্মোহিত করল, তাদেরকে আতঙ্কগ্রস্ত করল এবং একটা বড় জাদু প্রদর্শন করল। (১১৭) তখন আমি মূসাকে (মোজেসকে) আদেশ দিলাম যে, তুমি তোমার লাঠিখানা নিষ্ক্ষেপ কর। আর অমনি তা তাদের তৈরী করা বস্তুগুলোকে গিলে ফেলতে লাগল। (১১৮) ফলে সত্য প্রমাণিত হয়ে গেল আর যা কিছু তারা বানিয়েছিল মিথ্যা হয়েই রইল। (১১৯) আর এভাবে তারা সেখানে হেরে গেল এবং অপমাণিত হল। (১২০) আর জাদুকরেরা প্রণত হয়ে গেল। (১২১) তারা বললঃ আমরা বিশ্বপ্রভুর প্রতি বিশ্বাস স্থাপন করলাম। (১২২) যিনি মূসা (মোজেস) ও হারুনের (অ্যারনের) প্রভু।

(১২৩) ফ্যারাও বললঃ আমি তোমাদেরকে অনুমতি দেওয়ার আগেই তোমরা মূসাকে (মোজেসকে) বিশ্বাস করলে? নিশ্চয়ই এটা একটা চক্রান্ত। তোমরা নগরীর বাসিন্দাদের সেখান থেকে বহিস্কৃত করার উদ্দেশ্যে নগরীতে বসেই এই চক্রান্ত করেছে। তোমরা খুব শীঘ্রই জানতে পারবে। (১২৪) আমি বিপরীত দিক থেকে তোমাদের হাত-পা কেটে দেব। তারপর তোমাদের সকলকে ক্রুশ বিদ্ধ করবো। (১২৫) তারা বললঃ আমাদেরকে তো আমাদের প্রভুর কাছে ফিরে যেতেই হবে। (১২৬) তুমি তো কেবল এজন্যেই আমাদের শাস্তি দিচ্ছো যে, আমাদের কাছে যখন আমাদের প্রভুর নিদর্শন সমূহ এসে গেছে তখন আমরা তা বিশ্বাস করেছি তাই। হে আমাদের প্রভু! আমাদের ধৈর্য দান কর, আর আত্মসমর্পণকারীর মত আমাদের মৃত্যু প্রদান কর।

(১২৭) ফ্যারাও এর লোকদের মধ্যে নেতৃস্থানীয়রা বললঃ আপনি কি মূসা (মোজেস) ও তার লোকদেরকে দেশে অশান্তি সৃষ্টি করার জন্য এবং আপনাকে ও আপনার দেবতাদেরকে বর্জন করে চলার জন্য অনুমতি দেবেন? সে বললঃ আমি ওদের পুত্র সন্তানদের হত্যা করবো আর ওদের নারীদের জীবিত রাখবো। আমরা তো ওদের উপর পরাক্রমশালী।

(১২৮) মুসা (মোজেস) তার সম্প্রদায়কে বললঃ ঈশ্বরের কাছে সাহায্য প্রার্থনা কর আর ধৈর্য ধর। পৃথিবী ঈশ্বরের, তিনি আপন বান্দাদের মধ্যে যাকে খুশী এর উত্তরাধিকারী বানান। আর অন্তিম সফলতা ঈশ্বরভীরুদের জন্যই। (১২৯) মুসার (মোজেসের) সম্প্রদায় বললঃ আমরা তোমার আসার পূর্বেও নির্যাতিত হয়েছি এবং তোমার আসার পরেও। মুসা (মোজেস) বললঃ হতে পারে তোমাদের প্রভু তোমাদের শত্রুকে ধ্বংস করে দেবেন এবং তার স্থলে তোমাদেরকে এই ভূ-খণ্ডের প্রতিনিধি বানিয়ে দেবেন। তারপর দেখবেন তোমরা কেমন কাজ কর।

(১৩০) আর আমি ফেরাউনের (ফ্যারাও) অনুসারীদেরকে দুর্ভিক্ষ এবং ফলফলাদীর ঘাটতি দ্বারা নিগৃহীত করেছিলাম, যাতে তারা শিক্ষা গ্রহণ করে। (১৩১) কিন্তু যখন তাদের উপর কল্যাণ আসত তখন তারা বলত এটা আমাদের জন্য, আর যদি ওদের উপর কোন অকল্যাণ আসত তাহলে বলত এটা মুসা (মোজেস) ও তার সঙ্গীদের দুর্ভাগ্য। শোন, ওদের দুর্ভাগ্য তো ঈশ্বরের কাছে আছে, তবে তাদের অধিকাংশই তা জানে না। (১৩২) আর তারা মুসাকে (মোজেসকে) বললঃ আমাদের উপর জাদু করার জন্য তুমি যে নিদর্শনই নিয়ে আস না কেন, আমরা তোমার কথায় বিশ্বাস করবো না।

(১৩৩) তখন আমি স্পষ্ট নিদর্শন স্বরূপ তাদের উপর প্লাবন, পঙ্গপাল, উকুন, ব্যাঙ ও রক্তের উপসর্গ প্রেরণ করি। তবুও তারা অহংকার করল বস্তুতঃ তারা ছিল অপরাধপ্রবণ। (১৩৪) আর যখন তাদের উপর কোন শাস্তি ও বিপদ-আপদ আসত তখন বলত হে মুসা (মোজেস)! তোমার প্রভুর কাছে আমাদের জন্য প্রার্থনা কর। তিনি তোমার কাছে যে অঙ্গীকার করে রেখেছেন সেই অনুযায়ী তুমি যদি আমাদের উপর থেকে এই কষ্ট দূর করে দাও তাহলে অবশ্যই আমরা তোমার কথায় বিশ্বাস করবো এবং ইসরাইলের বংশধরদের তোমাদের সাথে যেতে দেব। (১৩৫) অতঃপর যখনই আমি তাদের উপর

থেকে শাস্তি ও বিপদ-আপদ অপসারিত করতাম তাদের অঙ্গীকার পূর্ণ করার সময় দেওয়ার জন্য, তারা তাদের অঙ্গীকার ভঙ্গ করত।

(১৩৬) সুতরাং আমি ওদের শাস্তি দিয়েছিলাম আর ওদেরকে সমুদ্রে ডুবিয়ে মেরেছিলাম। কেননা তারা আমার নিদর্শন সমূহ অবিশ্বাস করেছিল এবং সে সম্পর্কে উদাসীন হয়ে গিয়েছিল। (১৩৭) আর যাদেরকে দুর্বল মনে করা হত তাদেরকে আমি এই ভূ-ভাগের পূর্ব ও পশ্চিমাঞ্চলের উত্তরাধিকারী করে দিলাম। সেখানে আমি কল্যাণ নিহিত রেখেছিলাম। এবং যেহেতু ইসরায়েলের বংশধরেরা ধৈর্য ধারণ করেছিল, তাই তাদের জন্য তোমার প্রভুর অঙ্গীকার পূর্ণ হলো। আর ফ্যারাও ও তার লোকেরা যা কিছু তৈরী করেছিল এবং যে সব উচ্চ প্রাসাদসমূহ নির্মাণ করেছিল আমি তা ধ্বংস করে দিয়েছি।

(১৩৮) আর আমি ইসরায়েলের বংশধরদের সমুদ্র পার করে দিই। অতঃপর তারা এমন এক জাতির কাছে এসে পড়ে যারা তাদের কতিপয় প্রতিমার উপাসক ছিল। তারা বললঃ হে মূসা (মোজেস)! আমাদের উপাসনার জন্য একটি মূর্তি বানিয়ে দাও যেমন ওদের মূর্তি আছে। মূসা (মোজেস) বললঃ তোমরা বড়ই মুর্থ লোক। (১৩৯) এই লোকগুলো যে কাজে লিপ্ত আছে তা ধ্বংস হবে, আর এরা যা কিছু করছে তা মিথ্যা। (১৪০) সে আরো বললঃ আমি কি ঈশ্বর ছাড়া অন্য কোন উপাস্য তোমাদের জন্য অন্বেষণ করবো। অথচ তিনি তোমাদেরকে সারা বিশ্বের সকলের উপর শ্রেষ্ঠত্ব দান করেছেন। (১৪১) আমি ফ্যারাও এর লোকদের কবল থেকে তোমাদের মুক্তি দিলাম, যারা তোমাদেরকে কঠোর শাস্তি দিত। তারা তোমাদের পুত্রদেরকে মেরে ফেলত আর তোমাদের নারীদেরকে জীবিত রাখত। এর মধ্যে তোমাদের প্রভুর পক্ষ থেকে এক বিরাট পরীক্ষা ছিল।

(১৪২) আমি মূসার (মোজেসের) জন্য ত্রিশটি রাত নির্ধারণ করেছিলাম এবং পরে এর সাথে আরো দশ রাত যোগ করলাম। এভাবে তার প্রভুর নির্ধারিত

চল্লিশ রাত পূর্ণ হল। মুসা (মোজেস) তার ভাই হারুনকে (অ্যারনকে) বলল - আমার অনুপস্থিতিতে আমার লোকজনের জন্য তুমি আমার প্রতিনিধিত্ব করবে, আর অনর্থ সৃষ্টিকারীদের অনুসরণ করবে না। (১৪৩) এবং যখন মুসা (মোজেস) আমার নির্ধারিত সময়ে উপস্থিত হয়েছিল, তার প্রভু তার সাথে কথা বলেছিলেন। তখন সে বলেছিল : ‘হে আমার প্রভু ! তুমি নিজেকে দেখাও, আমি তোমাকে দেখব।’ বললেন : তুমি আমাকে দেখতে পাবে না। তুমি বরং পাহাড়ের দিকে দেখ, পাহাড় যদি নিজের জায়গায় স্থির থাকতে পারে তাহলে তুমিও আমাকে দেখতে পাবে। তারপর তার প্রভু যখন ঐ পাহাড়ের উপর নিজেকে উদ্ভাষিত করলেন, তখন তিনি তাকে খণ্ড বিখণ্ড করলেন এবং মুসা (মোজেস) মূর্ছিত হয়ে পড়লো। যখন জ্ঞান এল তখন বললঃ আপনি পবিত্র, আমি আপনার দিকেই প্রত্যাবর্তন করছি আর আমিই হলাম প্রথম বিশ্বাসী।

(১৪৪) ঈশ্বর বললেন : হে মুসা (মোজেস) ! আমার বাণী ও আমার সাথে বাক্যালাপের জন্য মানুষের মধ্য থেকে আমি তোমাকে বেছে নিয়েছি। অতএব আমি যা দিলাম তা গ্রহণ কর এবং কৃতজ্ঞ হও। (১৪৫) আর আমি তার জন্য ফলকের উপর প্রত্যেক উপদেশ আর প্রত্যেক বিষয়ের বিস্তারিতবিবরণ লিখে দিয়েছি, (অতঃপর তাকে বললাম) এগুলো দৃঢ়ভাবে ধারণ কর আর তোমার সম্প্রদায়ের লোকজনদের নির্দেশ দাও তারা যেন এগুলো উত্তম পন্থায় মান্য করে। শীঘ্রই আমি তোমাদেরকে অবাধ্য লোকদের বাসস্থান দেখাব।

(১৪৬) আমি আমার নিদর্শন সমূহ থেকে ওদের বিমুখ করবো যারা পৃথিবীতে অন্যায়ভাবে দাস্তিক আচরণ করে। আর তারা প্রতিটি নিদর্শন দেখলেও তবুও তার প্রতি বিশ্বাস স্থাপন করবে না। তারা সৎপথ দেখলেও পথ হিসাবে তাকে গ্রহণ করবে না; কিন্তু ভ্রান্ত পথ দেখলেই তাকে পথ হিসাবে গ্রহণ করবে। এটা এজন্যে যে, তারা আমার নিদর্শন সমূহকে মিথ্যা বলেছে এবং সে সম্বন্ধে তারা অমনোযোগী।

(১৪৭) আর যারা আমার নিদর্শন সমূহ আর পরলোকের সাক্ষাৎকে অবিশ্বাস করে তাদের যাবতীয় কর্ম বিনষ্ট হয়ে গিয়েছে। তারা যা করে থাকে তদানুযায়ী তাদেরকে প্রতিফল দেওয়া হবে।

(১৪৮) আর মূসার (মোজেসের) সম্প্রদায় তার অনুপস্থিতিতে তাদের অলংকার দিয়ে একটি বাছুর বানিয়েছিল। এ থেকে হান্সা-হান্সা শব্দ বার হত। তারা কি দেখেনি যে সে না তাদের সাথে কথা বলে আর না কোন পথ দেখাতে পারে। তাকেই তারা আপন উপাস্য বানিয়ে নিয়েছিল, বস্তুত তারা বড়ই অত্যাচারী ছিল। (১৪৯) যখন তারা অনুতপ্ত হল এবং বুঝতে পারল যে, তারা পথভ্রষ্ট হয়ে গিয়েছে তখন তারা বললঃ যদি আমাদের প্রভু আমাদের উপর দয়া না করেন আর আমাদের ক্ষমা না করেন তাহলে নিশ্চিতরূপে আমরা ক্ষতিগ্রস্ত হব। (১৫০) আর যখন মূসা (মোজেস) রাগস্থিত ও দুঃখভারাক্রান্ত অবস্থায় তার সম্প্রদায়ের কাছে ফিরে এল তখন সে বললঃ তোমরা আমার অনুপস্থিতিতে যে কাজটি করলে তা খুবই খারাপ। তোমরা কি তোমাদের প্রভুর আদেশের ব্যাপারে তাড়াছড়া করলে? এরপর সে ফলকগুলো ছুঁড়ে ফেলল এবং নিজের ভাই হারুনকে (অ্যারন) তার মাথার চুল ধরে নিজের দিকে টানতে লাগল। হারুন (অ্যারন) বললঃ ওরে আমার মায়ের পুত্র, লোকগুলো তো আমাকে পরাভূত করে দিয়েছিল এবং প্রায় আমাকে মেরেই ফেলেছিল। অতএব তুমি আমাকে শত্রুদের আনন্দের খোরাক বানিয়ো না এবং আমাকে অত্যাচারীদের অন্তর্ভুক্ত করো না। (১৫১) মূসা (মোজেস) বললঃ হে আমার প্রভু! আমাকে ক্ষমা করুন আর আমার ভাইকেও আর আমাদেরকে আপনার করুণাধারায় স্থান দিন। আপনিই তো বড়ই করুণাময়।

(১৫২) যারা গো-বৎসকে উপাস্য বানিয়েছিল তাদের উপর এই পার্শ্ব জীবনেই তাদের প্রভুর ক্রোধ ও লাঞ্ছনা এসে পড়বে। মিথ্যা রচনাকারীদের

আমি এভাবেই প্রতিফল দিয়ে থাকি। (১৫৩) আর যারা খারাপ কাজ করার পর অনুশোচনা করে ও আত্মবান হয়ে যায় তাহলে নিঃসন্দেহে তোমার প্রভু ক্ষমাশীল ও দয়াবান।

(১৫৪) পরে যখন মূসার রাগ প্রশমিত হয় তখন সে ফলকগুলি তুলে নেয়, ফলক সমূহের লিপিতে সেই সব লোকের জন্য পথনির্দেশ ও অনুগ্রহের কথা লেখা ছিল যারা তাদের প্রভুকে ভয় করে। (১৫৫) আমার নির্ধারিত সময় ও স্থানে সাক্ষাতের জন্য মূসা (মোজেস) তার সম্প্রদায়ের সত্তরজন লোককে বাছাই করল। অতঃপর যখন ভূমিকম্প তাদেরকে আঘাত করল তখন মূসা (মোজেস) বললঃ হে আমার প্রভু! আপনি ইচ্ছা করলে তাদেরকে ও আমাকে আগেই ধ্বংস করতে পারতেন। আমাদের মধ্যে নির্বোধ লোকদের কর্মের জন্য কি আপনি আমাদেরকে ধ্বংস করবেন? এতো আপনার পরীক্ষা ছাড়া আর কিছু নয়। এই পরীক্ষার মাধ্যমে আপনি যাকে ইচ্ছা বিপথগামী করবেন আর যাকে ইচ্ছা সুপথগামী করবেন। আপনি আমাদের অভিভাবক, তাই আমাদেরকে ক্ষমা করে দিন এবং আমাদের প্রতি অনুগ্রহ করুন। আপনিই তো শ্রেষ্ঠ ক্ষমাকারী। (১৫৬) আর আমাদের জন্য এই পৃথিবীতে ও পরলোকে কল্যাণ নির্ধারিত করুন। আমরা তো আপনার দিকেই ফিরে এসেছি। ঈশ্বর বললেনঃ আমার শাস্তি আমি যাকে চাই দিয়ে থাকি এবং আমার অনুগ্রহ সবকিছুতেই পরিব্যাপ্ত। তাই যারা পাপাচার হতে সদা সতর্ক থাকে এবং উদ্বৃত্ত সম্পদ হতে বিধিবদ্ধ দান করে থাকে আর আমার নিদর্শন সমূহে বিশ্বাস স্থাপন করে তাদের জন্য শীঘ্রই আমি আমার এই অনুগ্রহ নির্ধারণ করবো।

(১৫৭) যারা অনুসরণ করবে সেই বার্তাবাহককে, যিনি একজন নিরক্ষর পয়গম্বর, যার বর্ণনা তারা তাদের তৌরাত (তোরাহ) ও ইনজীলে (বাইবেলে) লিখিত আকারে দেখতে পাবে। সে তাদেরকে সৎকাজের আদেশ দেয় ও মন্দ

কাজ করতে নিষেধ করে এবং তাদের জন্য পবিত্র বস্তু সমূহ বৈধ ও অপবিত্র বস্তুসমূহ অবৈধ করে এবং তাদেরকে ভারমুক্ত ও শৃঙ্খলামুক্ত করে। অতএব যারা তাকে বিশ্বাস করে, সম্মান ও সাহায্য করে এবং তার সাথে প্রেরিত আলোর (কুরআন) অনুসরণ করে তারাই সফলকাম।

(১৫৮) বলঃ হে মানবমণ্ডলী! নিঃসন্দেহে আমি তোমাদের সকলের জন্যে সেই ঈশ্বরের বার্তাবাহকরূপে প্রেরিত হয়েছি যিনি আকাশ ও পৃথিবীর রাজত্বের অধিকারী, তিনি ছাড়া কোন উপাস্য নেই। তিনিই জীবন দান করেন ও মৃত্যু ঘটান। অতএব তোমরা ঈশ্বর ও তাঁর সেই বার্তাবহ নিরঙ্কর পয়গম্বরের প্রতি বিশ্বাস স্থাপন কর, যে ঈশ্বর ও তাঁর বাণীসমূহের প্রতি বিশ্বাস রাখে। এবং তোমরা তারই অনুসরণ কর, যাতে সঠিক পথের সন্ধান পাও। (১৫৯) আর মূসার (মোজেসের) সম্প্রদায়ের মধ্যে এমন একটি দল আছে যারা সত্য অনুযায়ী পথ-নির্দেশ দেয় এবং সত্য অনুযায়ী ন্যায় বিচার করে।

(১৬০) আর আমি তাদের বারটি গোত্রে বিভক্ত করে তাদের ভিন্ন ভিন্ন সম্প্রদায় বানিয়ে দিয়েছি। মূসার (মোজেসের) লোকেরা যখন তার কাছে জল চাইল তখন আমি মূসাকে (মোজেসকে) নির্দেশ দিলামঃ অমুক পাথরে তোমার লাঠি দ্বারা মারো, তখন সেখান থেকে বারটি ঝর্ণা নির্গত হল। প্রত্যেক দল তাদের জল পানের জায়গা চিনে নিল। আর আমি ওদের উপর মেঘের ছায়া প্রদান করি এবং তাদের কাছে খাদ্য হিসাবে ‘মান্না’ ও ‘সালওয়া (কোয়েল)’ প্রেরণ করি। আহার কর পবিত্র জিনিষগুলো যা আমি তোমাদের দিয়েছি। তারা আসলে আমার কোন ক্ষতি করেনি বরং নিজেদেরই ক্ষতি করতে থাকে। (১৬১) আর যখন ওদের বলা হয়েছিল ঐ জনপদে যেয়ে বসবাস কর এবং যা ইচ্ছা আহার কর এবং বলঃ আমাদের ক্ষমা করে দাও। আর মাথা নত করে দরজা দিয়ে প্রবেশ কর, আমি তোমাদের অপরাধ মার্জনা করবো। আমি সৎকর্মশীলদের আরো বেশী দেব।

(১৬২) কিন্তু তাদেরকে যে কথা বলা হয়েছিল তাদের মধ্যে অন্যায়কারীরা তা পরিবর্তন করে দিয়েছিল। তাদের এই অন্যায়ের কারণে আমি আকাশ থেকে শাস্তি পাঠিয়েছিলাম।

(১৬৩) ওদেরকে সমুদ্র তীরবর্তী ঐ জনপদটি সম্বন্ধে জিজ্ঞাসা কর : যখন সাবত (শনিবার) এর ব্যাপারে সীমা লঙ্ঘন করত, শনিবারে মাছেরা জলের উপর ভেসে তাদের কাছে আসত। কিন্তু সপ্তাহের অন্যান্য দিনে আসত না। তাদের পরীক্ষা আমি এভাবেই করেছিলাম ওদের অবাধ্যতার কারণে। (১৬৪) আর যখন ওদের মধ্যে একটি দল বলেছিল : কেন তোমরা এমন লোকদের উপদেশ দিচ্ছো যাদেরকে ঈশ্বর ধ্বংস করে দেবেন কিংবা কঠিন শাস্তি দেবেন। তারা বলেছিলঃ তোমাদের প্রভুর কাছে কৈফিয়ৎ দেওয়া থেকে মুক্ত হওয়ার জন্য, আর যাতে তারা ধর্মপরায়ণতা অবস্থলন করে।

(১৬৫) ওদেরকে যে সব উপদেশ দেওয়া হয়েছিল তারা যখন সেগুলো ভুলে গেল তখন আমি ঐ লোকদের রক্ষা করলাম যারা অন্যায় করতে বাধা দিত। আর যারা নিজেদের উপর অত্যাচার করেছিল তাদেরকে তাদের অবাধ্যতার কারণে কঠিন শাস্তি দিলাম। (১৬৬) তাদেরকে যে কাজ করতে নিষেধ করা হয়েছিল তারা যখন সেই কাজের দিকেই এগোতে থাকল তখন আমি ওদেরকে বললাম “তুচ্ছ বানর হয়ে যাও।”

(১৬৭) যখন তোমার প্রভু ঘোষণা করেছিলেন যে, তিনি ইহুদীদের উপর পরলোকের দিন পর্যন্ত এমন লোকদের পাঠাতে থাকবেন যারা তাদেরকে কঠিন শাস্তি দেবে। নিশ্চয়ই তোমার প্রভু দ্রুত শাস্তিদাতা এবং নিশ্চয়ই তিনি ক্ষমাশীল, দয়ালু। (১৬৮) আর আমি ওদেরকে বিভিন্ন দলে বিভক্ত করে দিয়েছি তাদের মধ্যে কিছু সৎকর্মশীল আবার কিছু এর ব্যতিক্রমী। আর আমি ওদের পরীক্ষা করেছিলাম কল্যাণ ও অকল্যাণ দ্বারা, যাতে তারা ফিরে আসে।

(১৬৯) অতঃপর তাদের পর তাদের স্থলাভিষিক্ত হয়েছে এমন এক প্রজন্ম, যারা এই গ্রন্থের উত্তরাধিকারী হয়েছে, এবং যারা এই পার্থিব জীবনের ক্ষনকালীন মুনাফা আঁকড়িয়ে ধরে আর বলেঃ “আমাদেরকে নিশ্চয় ক্ষমা করে দেওয়া হবে।” যদি তাদের কাছে পুনরায় একই ধরনের ক্ষনস্থায়ী মুনাফা আসত, তারা সেগুলো গ্রহণ করত। তাদের নিকট থেকে কি গ্রন্থের প্রতিশ্রুতি নেওয়া হয় নি যে, তারা ঈশ্বর সম্পর্কে সত্য ছাড়া অন্য কিছু বলবে না? তারা তো গ্রন্থে যা আছে তা পাঠও করে। যারা পাপাচার থেকে সদাসতর্ক থাকে, তাদের জন্য পরকালের আবাসই শ্রেষ্ঠ, তোমরা কি তা বোঝ না? (১৭০) আর যারা গ্রন্থকে দৃঢ়ভাবে আঁকড়ে থাকে আর সঠিক ভাবে প্রার্থনা করে, নিঃসন্দেহে আমি সংকমর্শীলদের প্রতিফল নষ্ট করবো না। (১৭১) যখন আমি তাদের উপর শামিয়ানার মত পাহাড় তুলে ধরেছিলাম, আর তারা মনে করেছিল যে, সেটা তাদের উপরেই পড়বে। আমি যা তোমাদেরকে দিয়েছি, তা দৃঢ়ভাবে ধারণ কর, এবং স্মরণ রাখ যা এতে আছে, যাতে করে তোমরা ঈশ্বরভীরু হতে পার।

(১৭২) আর যখন তোমার প্রভু আদমের (অ্যাডাম) বংশধরদের পৃষ্ঠদেশ হতে তাদের সন্তানদেরকে বের করলেন এবং তাদেরকেই তাদের উপরে সাক্ষী বানিয়ে জিজ্ঞাসা করলেনঃ আমি কি তোমাদের প্রভু নই? তারা সমস্বরে উত্তর দিল, “হ্যাঁ! আমরা সাক্ষী থাকলাম।” এটা এজন্যে যে তোমরা যেন পুনরুত্থান দিবসে বলতে না পারো যে, “আমরা এ সম্পর্কে অনবহিত ছিলাম।” (১৭৩) অথবা যেন না বল আমাদের পূর্বপুরুষেরা তো আগে অংশীদার স্থাপন করেছে, আর আমরা হলাম তাদের পরবর্তী বংশধর। অতএব আপনি কি ওদের কৃতকর্মের জন্য আমাদেরকে ধ্বংস করবেন? (১৭৪) আর এভাবেই আমি আমার নিদর্শন সমূহ স্পষ্ট ভাবে বর্ণনা করে থাকি যাতে তারা ফিরে আসে।

(১৭৫) তুমি ওদের সেই লোকটির বৃত্তান্ত পড়ে শোনাও যাকে আমি

আমার নিদর্শন সমূহ দিয়েছিলাম; কিন্তু সে পরিহার করলো। অতঃপর শয়তান তার পিছু নিল আর সে পথভ্রষ্টদের অন্তর্ভুক্ত হয়ে গেল। (১৭৬) আমি যদি ইচ্ছা করতাম তাহলে তাকে এই নিদর্শনের মাধ্যমে উচ্চ মর্যাদা দিতে পারতাম; কিন্তু সে পৃথিবীর প্রতি আকৃষ্ট হয় এবং নিজের প্রবৃত্তির অনুসরণ করে। অতএব তার উদাহরণ কুকুরের মত যদি তুমি তাকে তাড়াও, সে জিহ্বা বের করে হাঁপায় আবার যদি তাকে ছেড়ে দাও তাহলেও জিহ্বা বের করে হাঁপায়; যারা আমার নিদর্শন সমূহ অবিশ্বাস করে এই উদাহরণ তাদের জন্য। অতএব তুমি ঘটনাগুলো তাদের শোনাও যাতে তারা চিন্তা করে। (১৭৭) যারা আমার নিদর্শন সমূহ মিথ্যা মনে করে তাদের উদাহরণ কত নিকৃষ্ট। তারা নিজেদের ক্ষতি করেছে। (১৭৮) ঈশ্বর যাকে সুপথ দেখান সেই সুপথপ্রাপ্ত, আর যাকে তিনি পথভ্রষ্ট করেন সে ক্ষতিগ্রস্ত।

(১৭৯) আর আমি জ্বিন ও মানুষের মধ্যে অনেককে নরকের জন্য সৃষ্টি করেছি। তাদের হৃদয় আছে যা দ্বারা তারা উপলব্ধি করে না, যাদের চোখ আছে যা দ্বারা তারা দেখে না, আর তাদের কান রয়েছে, তার দ্বারা শোনে না, তারা পশুর মত বরং তার চেয়েও অধিক বিভ্রান্ত। এই লোকেরাই চেতনাহীন (অসতর্ক)। (১৮০) আর ঈশ্বরের অসংখ্য সুন্দর সুন্দর ভলো নাম রয়েছে, অতএব সেই সব নামেই তাকে আহ্বান কর, আর যারা তাঁর নাম সমূহ বিকৃত করে, তাদের থেকে দূরত্ব বজায় রাখ। তারা তাদের কৃত কর্মের প্রতিফল পাবেই। (১৮১) আর আমি যাদেরকে সৃষ্টি করেছি তাদের মধ্যে এমনও একদল আছে যারা সৎভাবে মানুষকে পথ দেখায় এবং সেভাবেই ন্যায়বিচার করে। (১৮২) আর যারা আমার নিদর্শন সমূহ মিথ্যা মনে করে তাদেরকে আমি তাদের অজ্ঞাতে তাদেরকে ধীরে ধীরে পাকড়াও করবো। (১৮৩) আর আমি ওদেরকে অবকাশ দিয়ে থাকি। আসলে আমার কৌশল খুব সুনিপুণ।

(১৮৪) তারা কি চিন্তা করে দেখেনি যে তাদের সাথীর (পয়গম্বরের) মধ্যে কোন পাগলামী নেই। সেতো এক স্পষ্ট সতর্ককারী। (১৮৫) তারা কি লক্ষ্য করেনি আকাশ ও পৃথিবীর ব্যবস্থাপনা এবং ঈশ্বর যা সেখানে সৃষ্টি করেছেন? এবং এটাও কি দেখেনি যে, তাদের মেয়াদকাল ফুরিয়ে আসছে? এরপর আর কোন কথায় তারা বিশ্বাস স্থাপন করবে? (১৮৬) ঈশ্বর যাদের পথ হারা করেন তাকে পথ দেখানোর কেউ নেই। আর তিনি তাদেরকে অবাধ্যতার মধ্যে দিশেহারা হয়ে ঘোরার জন্য ছেড়ে দেন। (১৮৭) তারা তোমার কাছে কিয়ামত সম্পর্কে জিজ্ঞাসা করে যে তা কখন ঘটবে? বলঃ তার জ্ঞান শুধু আমার প্রভুর কাছেই আছে। সময় হলেই তিনি তা প্রকাশ করবেন। আকাশ ও পৃথিবীতে এটি একটি গুরুত্বপূর্ণ বিষয়। সেটা যখন আসবে হঠাৎই আসবে। তারা তোমার কাছে এমন প্রশ্ন করে যেন তুমি এ বিষয়ে বিশেষভাবে জ্ঞানপ্রাপ্ত। বলঃ এর জ্ঞান কেবল ঈশ্বরের নিকটেই আছে; কিন্তু অধিকাংশ মানুষ তা জানে না। (১৮৮) বলঃ ঈশ্বরের ইচ্ছা ব্যতীত আমার নিজের কল্যাণ বা অকল্যাণ সাধনের ক্ষমতা আমার নেই। অদৃশ্যের বিষয়ে আমার যদি জ্ঞান থাকতো আমি মঙ্গল অর্জন করে নিতে পারতাম, ফলে কোন অমঙ্গল আমাকে স্পর্শ করতে পারতো না। যারা সত্যে বিশ্বাস স্থাপন করবে তাদের জন্য আমি একজন সতর্ককারী ও সুসংবাদদাতা।

(১৮৯) তিনিই সেই সত্ত্বা যিনি তোমাদেরকে একটি প্রাণ থেকে সৃষ্টি করেছেন। তার থেকেই তিনি তার জোড়া সৃষ্টি করেছেন যাতে তোমরা তার কাছে শান্তি পাও। তারপর যখন পুরুষ ও নারীর মিলন ঘটে তখন স্ত্রী গর্ভবতী হয়। প্রথমদিকে গর্ভ হালকা হওয়ায় সে পরিভ্রমণ করে; কিন্তু যখন গর্ভ ভারী হয় তখন তারা উভয়ে মিলে আপন প্রভুর কাছে প্রার্থনা করে বলে “যদি আপনি আমাদেরকে সুসন্তান দেন তাহলে আমরা আপনার কাছে কৃতজ্ঞ থাকব।

(১৯০) অতঃপর ঈশ্বর যখন তাদের সুসন্তান দিয়ে দেন তারপর তারা তাঁর দেওয়া জিনিষে অন্যকে তাঁর অংশীদার সাব্যস্ত করে, ঈশ্বর তাদের থেকে অনেক উর্দো। (১৯১) তারা কি এমন সব বস্তুকে অংশীদার করছে যারা কোন কিছুই সৃষ্টি করে না বরং তারা নিজেরাই সৃষ্ট। (১৯২) তারা তাদের কোন সাহায্য করতে পারে না বা নিজেরও কোনো সাহায্য করতে পারে না। (১৯৩) তুমি যদি ওদের সৎপথে ডাক তাহলে তারা তোমার ডাকে সাড়া দেবে না। ওদের ডাকো অথবা চূপ থাক দুইই সমান। (১৯৪) ঈশ্বর ছাড়া যাদেরকে তোমরা ডাকো তারা তোমাদেরই মত বান্দা। অতএব তাদের ডাকতে চাও ডাক, তবে তারা তোমাদের ডাকে সাড়া দিক, যদি তোমরা সত্যবাদী হও।

(১৯৫) ওদের কি পা আছে যা দ্বারা চলবে, ওদের কি হাত আছে যা দ্বারা ধরবে, ওদের কি চোখ আছে যা দ্বারা দেখবে, ওদের কি কান আছে যা দ্বারা শুনবে। বলঃ তোমাদের অংশীদারদের ডাক, তারপর আমার বিরুদ্ধে ষড়যন্ত্র কর আর আমাকে অবকাশ দিও না। (১৯৬) নিঃসন্দেহে আমার অভিভাবক তো ঈশ্বর যিনি গ্রহ অবতীর্ণ করেছেন, আর তিনিই সৎকর্মশীলদের অভিভাবকত্ব করেন। (১৯৭) আর তাঁকে ছাড়া যাদেরকে তোমরা ডাক সে না তোমাদের সাহায্য করতে পারে আর না নিজেদেরকে সাহায্য করতে পারে। (১৯৮) আর যদি তুমি ওদের সৎপথে ডাক তাহলে তারা তোমার কথা শুনবে না। অতএব তুমি মনে করছো যে, তারা তোমার দিকে দেখছে; কিন্তু তারা কিছুই দেখছে না।

(১৯৯) ক্ষমা কর, সৎকাজের আদেশ দাও এবং মুর্খদেরকে উপেক্ষা কর। (২০০) আর যদি তোমার কাছে শয়তানের কোন কুমন্ত্রনা আসে তাহলে ঈশ্বরের স্মরণপন্ন হও। নিঃসন্দেহে তিনি সবকিছু শোনেন সবকিছু জানেন। (২০১) ঈশ্বরভীরুদের যখনই শয়তানের কোন কুমন্ত্রনা স্পর্শ করে তারা তখনই সজাগ এবং সতর্ক হয়ে যায়। (২০২) এবং শয়তানদের অনুসারীরা নিরস্তরভাবে তাদের দ্বারা ভ্রান্ত পথে পরিচালিত হয়। তারা কখন ও ক্ষান্ত হয় না।

(২০৩) যখন তুমি তাদের কাছে কোন নিদর্শন (চমৎকার) না আন তখন তারা বলে, তুমি নিজে থেকে একটা কিছু বানিয়ে আনলে না কেন? বলঃ আমি তো তাই অনুসরণ করি যা আমার প্রভুর পক্ষ হতে আমার কাছে পাঠানো হয়। এটা তোমাদের প্রভুর পক্ষ থেকে আস্তাবানদের জন্য আলোকবর্তিকা, পথ নির্দেশ ও অনুগ্রহ। (২০৪) আর যখন কুরআন পাঠ করা হয় তখন তা মনোযোগ সহকারে শোন আর চুপ করে থাক যাতে তোমরা অনুগ্রহ লাভ করতে পার। (২০৫) তোমার প্রভুকে মনে মনে সকাল ও সন্ধ্যায় বিনীতভাবে এবং ভয়ের সাথে অনুচ্চস্বরে স্মরণ করবে আর অমনোযোগী হবে না। (২০৬) যারা (দেবদূত) তোমাদের প্রভুর নিকটে আছে তারা তাঁর দাসত্বে অহংকার করে না আর তারা সেই মহান সত্ত্বাকে স্মরণ করে আর তাঁর কাছেই মাথা অবনত করে।

অধ্যায় ৮ : আল - আনফাল (যুদ্ধলঙ্ক সম্পদ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তারা তোমাকে যুদ্ধলঙ্ক সম্পদ সম্পর্কে জিজ্ঞাসা করে। বলঃ যুদ্ধলঙ্ক সম্পদ ঈশ্বর ও তাঁর রসূলের। অতএব তোমরা ঈশ্বরকে ভয় কর এবং নিজেদের পারস্পরিক সম্পর্ক শুধরে নাও আর ঈশ্বর ও তাঁর বার্তাবাহকের আনুগত্য কর, যদি তোমরা আস্তাবান হও। (২) আস্তাবান তো তারাই, ঈশ্বরের কথা আলোচিত হলে যাদের অন্তরে ভীতির সঞ্চার হয় এবং তাঁর বাণীসমূহ পাঠ করা হলে যাদের আস্তা বৃদ্ধি পায়, আর তারা তাদের প্রভুর উপর ভরসা করে। (৩) তারা প্রার্থনা প্রতিষ্ঠা করে, আর যা কিছু তিনি তাদের দিয়েছেন, তা থেকে খরচ করে। (৪) তারাই বাস্তবে মোমিন (আস্তাবান)। ওদের জন্য ওদের প্রভুর নিকট উচ্চ মর্যাদা, ক্ষমা এবং সম্মানজনক জীবিকা রয়েছে।

(৫) যেমন তোমার প্রভু তোমাকে ঘর থেকে (বদরের দিকে) বের করেছেন ন্যায় ও যৌক্তিক কারণে। আর আস্থাবানদের মধ্যে থেকে কিছু মানুষের এটা পছন্দ ছিল না। (৬) তারা এর যৌক্তিকতা সম্পর্কে তোমার সাথে বিতর্ক করছিল সত্য স্পষ্ট হওয়ার পরও, যেন তাদের মৃত্যুর দিকে নিয়ে যাওয়া হচ্ছে আর তারা তাকিয়ে দেখছে। (৭) আর যখন ঈশ্বর তোমাদের সাথে অঙ্গীকার করছিলেন যে, দুটি দলের মধ্যে যে কোন একটিতে তোমরা থাকবে। আর তোমরা চাইছিলে কন্টকমুক্ত দলটি তোমাদের হোক। আর ঈশ্বর চাইছিলেন তার বাণী দ্বারা সত্যকে প্রতিষ্ঠিত করতে এবং অস্বীকারকারীদের নির্মূল করে দিতে। (৮) যাতে সত্য সত্য হয়েই থাকে আর মিথ্যা মিথ্যা হয়েই থাকে; যদিও অপরাধীরা তা অপছন্দ করেছিল।

(৯) যখন তোমরা তোমাদের প্রভুর কাছে প্রার্থনা করছিলে তখন তিনি তোমাদের প্রার্থনা শুনে বলেছিলেন “আমি তোমাদের সাহায্য করার জন্য এক হাজার দেবদূত নিরন্তর পাঠাচ্ছি। (১০) আর ঈশ্বর কেবল সুসংবাদ দেওয়ার জন্য এটা করলেন যাতে তোমাদের মন প্রশান্ত হয়। আর সাহায্য কেবল ঈশ্বরের পক্ষ থেকেই আসে। নিশ্চয়ই ঈশ্বর পরাক্রমশালী, প্রজ্ঞাময়। (১১) যখন ঈশ্বর তোমাদের প্রশান্তি দেওয়ার জন্য তোমাদেরকে তন্দ্রাচ্ছন্ন করেছিলেন, আর আকাশ থেকে তোমাদের উপর বৃষ্টি বর্ষণ করেছিলেন, তোমাদেরকে পবিত্র করার জন্য এবং তোমাদের উপর থেকে শয়তানের অপবিত্রতা অপসারণের জন্য, তোমাদের মন শক্ত করার জন্য, আর তোমাদের পা সুদৃঢ় করার জন্য। (১২) যখন তোমার প্রভু দেবদূতদের নিকট বার্তা পাঠানো যে, “আমি তোমাদের সাথে আছি”, অতএব তোমরা আস্থাবানদের অবিচল রাখো। আমি অবিশ্বাসীদের মনে ভীতি সঞ্চার করে দেব। তখন তোমরা ওদের ঘাড়ে আঘাত হানো। এবং

আঘাত হানো ওদের প্রত্যেক আঙুলের গিঁটে গিঁটে।^১ (১৩) যেহেতু তারা ঈশ্বর ও তাঁর বার্তাবাহকে র বিরুদ্ধাচারণ করেছে। আর যে ব্যক্তি ঈশ্বর ও তাঁর বার্তাবাহকের বিরুদ্ধাচারণ করে, ঈশ্বর তাকে কঠোর শাস্তি দেন। (১৪) অতএব এই শাস্তি আস্বাদন কর এবং জেনে রেখো অস্বীকারকারীদের জন্য রয়েছে নরকের শাস্তি।

(১৫) হে বিশ্বাসীগণ! যুদ্ধক্ষেত্রে যখন তোমরা অস্বীকারকারীদের মুখোমুখি হবে, তখন পশ্চাদপসরণ করবে না। (১৬) যুদ্ধের কৌশলগত কারণ অথবা (বিশ্বাসীদের) অন্য দলে যোগদানের অভিপ্রায় ব্যতীত যদি কেহ পশ্চাদপসরণ করে, সে ঈশ্বরের বিরাগভাজন হবে। আর তার আশ্রয়স্থল হবে নরক এবং তা বড়ই নিকৃষ্ট গন্তব্য।

(১৭) অতএব তাদেরকে তোমরা হত্যা করনি বরং ঈশ্বরই হত্যা করেছেন। আর তোমরা যখন তাদের উপর কক্ষর নিক্ষেপ করেছিলে তখন তা তোমরা নিক্ষেপ করনি বরং ঈশ্বরই নিক্ষেপ করেছেন। যাতে তিনি আস্থাবানদের নিজের তরফ হতে পুরোপুরি সহায়তা করতে পারেন। নিঃসন্দেহে ঈশ্বর সবই শোনে, সবই জানেন। (১৮) এই ঘটনাটাই তো ঘটেছিল - নিশ্চয়ই ঈশ্বর অস্বীকারকারীদের সমস্ত কৌশল নিক্রিয় করে দেবেন। (১৯) যদি তোমরা সত্যের বিজয় চাও, বিজয় তো তোমাদের সামনে এসে গেছে। আর যদি তোমরা (আস্থাবানদের অনিষ্ঠসাধন হতে) বিরত থাকো, তবে তা তোমাদের পক্ষেই কল্যাণকর, আর যদি তোমরা পুনরাবৃত্তি কর তাহলে আমিও পুনরাবৃত্তি করবো, আর তোমাদের সেনা তোমাদের কোন কাজে আসবে না, তারা সংখ্যায় যতই বেশী হোক, আর নিঃসন্দেহে ঈশ্বর আস্থাবানদের সাথে আছেন।

^১ বিঃ দ্রঃ-(৮ঃ১২) পরিচয় অংশে ১৩ থেকে ১৫ পৃষ্ঠা দ্রষ্টব্য)

(২০) হে বিশ্বাসীগণ! তোমরা ঈশ্বর ও তাঁর বার্তাবাহকের আজ্ঞাপালন কর এবং শোনার পর তার থেকে বিমুখ হয়ো না। (২১) আর ওদের মত হয়ে যেওনা যারা বলে আমরা শুনেছি বস্তুত তারা শোনে না। (২২) নিশ্চয়ই ঈশ্বরের নিকট নিকৃষ্টতম প্রাণী হল ঐ সব মূক ও বধির যারা কিছু বোঝে না। (২৩) আর যদি ওদের মধ্যে ভাল কিছুর জ্ঞান থাকত তাহলে ঈশ্বর অবশ্যই ওদের শোনার সামর্থ্য দিতেন। আর তিনি যদি তাদেরকে শোনাতেন তবুও তারা উপেক্ষা ভরে মুখ ফিরিয়ে নিত।

(২৪) হে বিশ্বাসীগণ! ঈশ্বর ও তাঁর বার্তাবাহকের আহ্বানে সাড়া দাও যখন বার্তাবাহক তোমাদেরকে তোমাদের জীবন সঞ্চারক বস্তুর দিকে আহ্বান করে আর জেনে রেখো যে, মানুষ ও তার অন্তরের মাঝে ঈশ্বর প্রতিবন্ধক হন, পরিশেষে তাঁর কাছেই তোমাদের একত্রিত করা হবে। (২৫) আর ভয় কর সেই ফিৎনাকে (নৈরাজ্য) যা তোমাদের মধ্যকার যুলুমকারী ও পাপিষ্ঠদেরকেই বিশেষ ভাবে আক্রান্ত করবে না (বরং সবারই মধ্যে এটা সংক্রমিত হয়ে পড়বে এবং সবাইকে বিপদগ্রস্ত করবে), তোমরা জেনে রেখো যে, ঈশ্বর কঠোর শাস্তি দাতা।

(২৬) আর স্মরণ কর যখন তোমরা সংখ্যায় স্বল্প ছিলে এবং পৃথিবীতে তোমাদেরকে দুর্বল ভাবা হত। ভয় করতে যে, হঠাৎ মানুষ তোমাদের আক্রমণ না করে। অতঃপর ঈশ্বর তোমাদেরকে আশ্রয় দিয়েছেন, নিজের সাহায্য দ্বারা তোমাদেরকে শক্তিশালী করেছেন এবং তোমাদের পবিত্র জীবিকা দিয়েছেন যাতে তোমরা কৃতজ্ঞ হও। (২৭) হে বিশ্বাসীগণ! ঈশ্বর ও বার্তাবাহকের সাথে বিশ্বাস-ঘাতকতা করবে না এবং জেনে শুনে তোমাদের পরস্পরের গচ্ছিত ধন তছরূপ করবে না। (২৮) আর জেনে রেখো যে, তোমাদের ধন-সম্পত্তি ও সম্ভান-সম্পত্তি এক পরীক্ষা এবং ঈশ্বরের কাছেই রয়েছে বড় পুরস্কার।

(২৯) হে বিশ্বাসীগণ! যদি তোমরা ঈশ্বরকে ভয় কর তাহলে তোমাদের জন্য ফুরকান (সত্য অসত্যের পার্থক্যকারী একটি মানদণ্ড ও শক্তি) প্রদান করবেন, আর তোমাদের পাপ সমূহ মোচন করে দেবেন এবং তোমাদেরকে ক্ষমা করে দেবেন আর ঈশ্বর তো বড় অনুগ্রহশীল ও মঙ্গলময়। (৩০) আর যখন অবিশ্বাসীরা তোমার সম্বন্ধে ষড়যন্ত্র করছিল যে, তারা তোমাকে বন্দী করবে অথবা তোমাকে হত্যা করবে অথবা তোমাকে নির্বাসিত করবে। তারা ষড়যন্ত্র করছিল আর ঈশ্বরও পরিকল্পনা করছিলেন। আর ঈশ্বর হচ্ছেন সর্বোত্তম পরিকল্পনাকারী।

(৩১) যখন তাদের কাছে আমার বাণী সমূহ পাঠ করা হয় তখন তারা বলে আমরা শুনেছি। ইচ্ছা করলে আমরাও এরকম বলতে পারি। এতো আগেকার মানুষের গল্প কাহিনী ছাড়া আর কিছু নয়। (৩২) আর যখন তারা বলেছিল হে ঈশ্বর! এটা যদি সত্য হয় তাহলে তুমি আমাদের উপর আকাশ থেকে পাথর বর্ষণ কর অথবা অন্য কোন বেদনাদায়ক শাস্তি আনো। (৩৩) তুমি তাদের মাঝে উপস্থিত থাকাকালীন সময়ে ঈশ্বর তাদেরকে শাস্তি দেবেন না, কিম্বা তারা যখন ক্ষমা প্রার্থনা করবে সেই সময় তিনি তাদের শাস্তি দেবেন না। (৩৪) আর ঈশ্বর তাদের শাস্তি দেবেন না কেন, যখন তারা পবিত্র মসজিদে যেতে লোকজনদের বাধা দেয় যদিও তারা এর সংরক্ষক নয়? এর সংরক্ষক তো তারাই যারা ঈশ্বরকে ভয় করে। তবে তাদের অধিকাংশই তা জানে না। (৩৫) আর পবিত্র ঘরের কাছে তাদের প্রার্থনা বলতে শিস দেওয়া ও করতালি ছাড়া আর কিছু ছিল না। অতএব এখন অস্বীকারের শাস্তি আশ্বাদন কর।

(৩৬) যারা অস্বীকার করে তারা লোকদেরকে ঈশ্বরের পথ থেকে বিরত রাখতে নিজেদের ধনসম্পদ ব্যয় করে থাকে। অতএব তারা তা খরচ করতে

থাকবে, তবে অবশেষে এই সম্পদ তাদের জন্য আক্ষেপের কারণ হবে। তারপর তাদের নরকের দিকে একত্রিত করা হবে। (৩৭) যাতে ঈশ্বর ভালকে মন্দ হতে পৃথক করতে পারেন আর মন্দকে একটার উপর আরেকটা সাজিয়ে তারপর সেই স্তূপকে নরকে নিক্ষেপ করতে পারেন। এই লোকগুলোই ক্ষতিগ্রস্ত।

(৩৮) অস্বীকারকারীদের বলঃ যদি তারা মেনে নেয় তাহলে যা কিছু হয়ে গেছে তা ক্ষমা করা হবে। আর যদি তারা পুনরাবৃত্তি করে তাহলে হিসেব-নিকেশ পূর্ববর্তীদের সাথে তো হয়েই গেছে। (৩৯) আর তাদের সাথে যুদ্ধ কর ধর্মীয় উৎপীড়ন শেষ না হওয়া পর্যন্ত এবং ধর্ম সম্পূর্ণরূপে ঈশ্বরের জন্যেই হয়ে যায়।^১ অতঃপর যদি তারা বিরত হয় তাহলে ঈশ্বর তাদের কর্মসমূহ নিরীক্ষণ করছেন। (৪০) আর যদি তারা বিমুখ হয় তাহলে জেনে রেখো, ঈশ্বর তোমাদের অভিভাবক; আর তিনি কতইনা উত্তম অভিভাবক ও কতইনা উত্তম সাহায্যকারী।

(৪১) আরও জেনে রেখো, তোমরা যে যুদ্ধলব্ধ সম্পদ প্রাপ্ত হও তার পাঁচ ভাগের একভাগ ঈশ্বর ও তাঁর বার্তাবাহকের জন্য, তার আত্মীয় স্বজনের, অনাথদের, গরীবদের ও পথিকদের জন্য; যদি তোমরা বিশ্বাস কর ঈশ্বরকে আর ঐ জিনিষকে যা আমি নিজ বান্দার (মুহাম্মাদ) কাছে নির্ণায়ক দিনে (বদর যুদ্ধের দিন) পাঠিয়েছিলাম, যে দিন দুই বাহিনী পরস্পরের সম্মুখীন হয়েছিল, আর ঈশ্বর সবকিছু করতে সক্ষম।

^১ বিঃ দ্রঃ- (৮ : ৩৯) পরিচয় অংশে ১৩ থেকে ১৫ পৃষ্ঠা দ্রষ্টব্য।

(৪২) আর যখন তোমরা ছিলে উপত্যকার নিকটবর্তী প্রান্তে আর তারা ছিল দূরের প্রান্তে। আর কাফেলাটি ছিল তোমাদের থেকে নিচু স্থানে। যদি তোমরা ও তারা পারস্পারিক বোঝাপাড়ার মাধ্যমে সময় নির্ধারণ করতে চাইতে, তাহলে অবশ্যই নির্ধারিত সময় নিয়ে তোমাদের মধ্যে মতভেদ হয়ে যেত। তবে ঈশ্বর চেয়েছিলেন এমন একটা কাজ সম্পন্ন করতে যা আগে থেকেই নির্ধারিত হয়ে গিয়েছিল। যাতে যারা ধ্বংস হওয়ার তারা এক স্পষ্ট প্রমাণের পর ধ্বংস হয়, আর যারা বেঁচে থাকার তারা এক স্পষ্ট প্রমাণের পর বেঁচে থাকে। আর নিশ্চয়ই ঈশ্বর সবকিছু শোনেন, সবকিছু জানেন। (৪৩) যখন ঈশ্বর তোমাকে স্বপ্নের মাধ্যমে ওদের সংখ্যা কম দেখিয়েছিলেন। তিনি যদি তোমাকে ওদের সংখ্যা বেশী দেখাতেন তাহলে তোমরা সাহস হারিয়ে ফেলতে এবং আপোষ বিতর্কে জড়িয়ে পড়তে; কিন্তু ঈশ্বর তোমাদের রক্ষা করেছেন। নিশ্চয়ই তিনি অন্তরের বিষয় ভাল করেই জানেন। (৪৪) আর যখন ঈশ্বর ওদেরকে তোমাদের দৃষ্টিতে কম করে দেখিয়ে ছিলেন আর তোমাদেরকেও ওদের দৃষ্টিতে কম করে দেখিয়েছিলেন যাতে ঈশ্বর এই ব্যাপারটির মীমাংসা করে দেন যা পূর্ব নির্ধারিত ছিল। আর সকল বিষয় ঈশ্বরের কাছে ফিরিয়ে নেওয়া হবে।

(৪৫) হে বিশ্বাসীগণ! তোমরা যখন কোন বাহিনীর মুখোমুখি হবে তখন অবিচল থাকবে আর ঈশ্বরকে বেশী করে স্মরণ করবে, যাতে তোমরা সফল হতে পার। (৪৬) আর ঈশ্বর ও তাঁর বার্তাবাহকের আনুগত্য করবে, নিজেদের মধ্যে বিবাদ করবে না। অন্যথা তোমাদের মধ্যে দুর্বলতা এসে যাবে এবং তোমাদের শক্তি চলে যাবে। আর ধৈর্য ধারণ কর। নিঃসন্দেহে ঈশ্বর ধৈর্য ধারণকারীদের সঙ্গে আছেন। (৪৭) আর তোমরা ওদের মত হয়ে যেও না যারা দস্তভরে ও লোক দেখানোর জন্য নিজেদের ঘর থেকে বের হয়েছে, আর যারা ঈশ্বরের

পথে বাধা দিচ্ছে। ওদের যাবতীয় কর্মকাণ্ড সম্পর্কে ঈশ্বর অবহিত আছেন।

(৪৮) আর যখন শয়তান ওদেরকে ওদের কর্ম আকর্ষণীয় করে উপস্থাপন করল আর বলল আজকের দিনে কোন মানুষ তোমাদের পরাস্ত করতে পারবে না, আর আমি তোমাদের সাথেই আছি। কিন্তু যখন উভয় বাহিনী পরস্পরের সামনা-সামনি হল তখন সে পিছনের দিকে ছুটে পালাল আর বললঃ আমি তোমাদের উপর বিরক্ত হয়েছি, আমি এমন কিছু দেখতে পাচ্ছি যা তোমরা দেখতে পাচ্ছ না। আমি ঈশ্বরকে ভয় করি। আর ঈশ্বর কঠোর শাস্তি দাতা। (৪৯) যখন কপটচারীরা ও যাদের অন্তরে ব্যাধি আছে তারা বলছিলঃ এদের ধর্ম এদের ধোঁকায় ফেলেছে। তবে যারা ঈশ্বরের উপর ভরসা করে তারা নিশ্চিত; কারণ ঈশ্বর পরাক্রমশালী, পরম প্রাজ্ঞ।

(৫০) যদি তুমি দেখতে যখন দেবদূতরা অস্বীকারকারীদের প্রাণ হরণ করে, তারা ওদের মুখমণ্ডল ও পৃষ্ঠদেশে আঘাত করে বলে “জ্বলন্ত আগুনের শাস্তি আন্বাদন কর।” (৫১) এটা তোমাদের কৃতকর্মের ফল। ঈশ্বর তাঁর বান্দাদের প্রতি অত্যাচার করেন না। (৫২) ফ্যারাও এর লোকজন ও তাদের পূর্ববতীদের আচরণের ন্যায়, তারা ঈশ্বরের নিদর্শন সমূহ অস্বীকার করেছিল। তাই ঈশ্বর তাদের পাপের কারণে পাকড়াও করেছিলেন। নিশ্চয়ই ঈশ্বর শক্তিশালী ও কঠোর শাস্তিদাতা। (৫৩) এর কারণ এই যে, ঈশ্বর যখন কোন জাতিকে অনুগ্রহ করেন তা পরিবর্তন করেন না, যতক্ষণ না তারা তাদের নিজেদের অবস্থা পরিবর্তন করে। আর ঈশ্বর সবকিছু শোনে, সবকিছু জানেন। (৫৪) ফ্যারাও এর লোকজনও তাদের পূর্ববতীদের মতো, তারা তাদের প্রভুর নিদর্শন সমূহ অবিশ্বাস করেছিল। তাই আমি তাদেরকে তাদের পাপের কারণে ধ্বংস করে দিয়েছি আর আমি ফ্যারাও ও তার লোকদেরকে ডুবিয়ে দিয়েছি। আর এরা অত্যাচারী ছিল।

(৫৫) নিঃসন্দেহে সকল প্রাণীর মধ্যে সবচেয়ে নিকৃষ্ট, ঈশ্বরের দৃষ্টিতে ঐ লোকেরা যারা অঙ্গীকার করে আর আস্থাবান নয়। (৫৬) যাদের কাছ থেকে তুমি অঙ্গীকার নিয়েছ, অতঃপর তারা প্রতিটি ক্ষেত্রে তাদের অঙ্গীকার ভঙ্গ করে আর তারা (ঈশ্বরকে) ভয় করে না। (৫৭) অতএব যদি তুমি যুদ্ধে তাদের নাগালে পাও তাহলে তাদেরকে এমন শাস্তি দাও যে, তাদের পশ্চাতে অবস্থানকারীরাও যেন তা দেখে ছত্রভঙ্গ হয়ে যায়, যাতে তারা শিক্ষা পায়। (৫৮) আর যদি তোমার কোন সম্প্রদায় হতে বিশ্বাসঘাতকতার সন্দেহ হয় তাহলে তাদের সন্ধি তাদের দিকে ছুঁড়ে ফেলে দাও। এভাবে তোমরা আর তারা সমান হয়ে যাবে। নিঃসন্দেহে ঈশ্বর বিশ্বাসঘাতকদের পছন্দ করেন না।

(৫৯) আর অবিশ্বাসীরা যেন মনে না করে যে, তারা পালিয়ে বাঁচবে, তারা কখনই ঈশ্বরকে পরিশ্রান্ত করতে পারে না। (৬০) তোমরা তাদের বিরুদ্ধে যতটা পার শক্তি ও অশ্ববাহিনী প্রস্তুত রাখবে যার দ্বারা ঈশ্বরের শত্রুকে এবং তোমাদের শত্রুকে আতঙ্কিত রাখবে, এছাড়া অন্যন্যদেরকেও যাদেরকে তোমরা জান না; কিন্তু ঈশ্বর জানেন। তোমরা ঈশ্বরের পথে যা কিছু ব্যয় করবে তা পুরোটাই তোমাদের ফিরিয়ে দেওয়া হবে। আর তোমাদের সাথে কোন অবিচার করা হবে না। (৬১) আর যদি তারা সন্ধির দিকে ঝুঁকে তাহলে তুমিও তার দিকে ঝুঁকবে। আর ঈশ্বরের উপর ভরসা রাখবে। নিশ্চয়ই তিনি সবকিছু শোনে, সবকিছু জানেন। (৬২) আর যদি তারা তোমাকে প্রতারণা করতে চায় তাহলে তোমার জন্য ঈশ্বরই যথেষ্ট। তিনিই তাঁর সাহায্য ও আস্থাবানদের দ্বারা তোমার শক্তি যুগিয়েছেন। (৬৩) আর তাদের অন্তরে প্রীতি উৎপন্ন করে দিয়েছেন। তুমি যদি পৃথিবীর যাবতীয় সম্পদও ব্যয় করতে তবুও তাদের অন্তরে সম্প্রীতি সৃষ্টি করতে পারতে না; কিন্তু ঈশ্বর তাদের মধ্যে প্রীতি উৎপন্ন করে দিয়েছেন। নিশ্চয়ই তিনি পরাক্রমশালী, প্রজ্ঞাময়।

(৬৪) হে পয়গম্বর! তোমার জন্য ঈশ্বরই যথেষ্ট আর ঐ আস্থাবানেরা যারা তোমার সঙ্গে আছে। (৬৫) হে পয়গম্বর! আস্থাবানদের যুদ্ধের জন্য পাঠাও। যদি তোমাদের বিশ জন ধৈর্যশীল অবিচল লোক হয় তাহলে তারা দুশো জনের উপরও জয়ী হবে, আর যদি তোমাদের একশত জন হয় তাহলে তারা এক হাজার অবিশ্বাসীদের উপর বিজয় লাভ করবে। কারণ ঐ লোকগুলো বোঝে না। ১ (৬৬) এখন ঈশ্বর তোমাদের উপর থেকে বোঝা হাক্কা করে দিয়েছেন কারণ তিনি জানতে পেরেছেন যে, তোমাদের মধ্যেও কিছুটা দুর্বলতা আছে। অতএব তোমাদের একশত জন অটল ধৈর্যশীল হলে তারা দুশো জনকে পরাভূত করবে। আর এক হাজার জন হলে তারা ঈশ্বরের ইচ্ছায় দুই হাজার জনকে পরাভূত করবে। ঈশ্বর ধৈর্যশীলদের সাথে আছেন।

(৬৭) ভূ-পৃষ্ঠে শত্রু বাহিনী নির্মূল না হওয়া পর্যন্ত কোন যুদ্ধবন্দী রাখা কোন পয়গম্বরের উচিত নয়। তোমরা দুনিয়ার সম্পদ চাও আর ঈশ্বর পরলোক চান। আর ঈশ্বর পরাক্রমশালী, পরম প্রাজ্ঞ। (৬৮) যদি বিষয়টি ঈশ্বরের পক্ষ থেকে পূর্ব-নির্ধারিত না হত তাহলে তোমরা যা গ্রহণ করেছ তার জন্যে তোমাদের অবশ্যই একটা বড় শাস্তি হত। (৬৯) অতএব যে সম্পদ তোমরা লাভ করেছ তা খাও, তা তোমাদের জন্য বৈধ এবং পবিত্র। আর ঈশ্বরকে ভয় কর। নিঃসন্দেহে ঈশ্বর ক্ষমশীল ও দয়াবান।

(৭০) হে পয়গম্বর! তোমাদের অধীনে যে বন্দী আছে তাদেরকে বলঃ যদি ঈশ্বর তোমাদের অন্তরে কোন ভাল কিছু সন্ধান পান তাহলে তোমাদের

^১ বিঃ দ্রঃ- (৮ : ৬৫) পরিচয় অংশে ১৩ থেকে ১৫ পৃষ্ঠা দ্রষ্টব্য।

কাছ থেকে যা নেওয়া হয়েছে তার চেয়ে ভাল কোন কিছু তিনি তোমাদের দেবেন, আর তোমাদেরকে ক্ষমা করবেন। ঈশ্বর ক্ষমাশীল ও অতি দয়ালু। (৭১) আর যদি তারা তোমার সাথে বিশ্বাসঘাতকতা করে তাহলে এর আগেও তো তারা ঈশ্বরের সাথে বিশ্বাসঘাতকতা করেছে। সেজন্য ঈশ্বর তাদের উপর তোমাদের নিয়ন্ত্রণ দিয়েছেন। ঈশ্বর মহাজ্ঞানী, বিবেকবান।

(৭২) যারা বিশ্বাস স্থাপন করেছে আর যারা দেশত্যাগ করেছে আর ঈশ্বরের পথে নিজেদের প্রাণ ও সম্পত্তি দ্বারা সংগ্রাম করেছে এবং যারা তাদেরকে আশ্রয় দিয়েছে ও সাহায্য করেছে তারা সবাই একে অপরের মিত্র। আর যারা আস্থা প্রকাশ করেছে কিন্তু দেশত্যাগ করেনি তাদের সাথে তোমাদের মিত্রতার কোন সম্বন্ধ নেই যতক্ষণ না তারা দেশত্যাগ করে না আসে। আর যদি তারা ধর্মের ব্যাপারে তোমাদের কাছে সাহায্য চায় তাহলে তাদের সাহায্য করা তোমাদের জন্য অনিবার্য। তবে তা এমন কোন সম্প্রদায়ের বিরুদ্ধে নয়, যাদের সাথে তোমাদের মৈত্রীচুক্তি রয়েছে। আর তোমরা যা কিছু করো ঈশ্বর তা দেখছেন। (৭৩) আর যারা অস্বীকারকারী তারা একে অপরের মিত্র। তোমরা যদি এমন ব্যবস্থা না করো তাহলে পৃথিবীতে অশান্তি ছড়িয়ে পড়বে আর বড় বিশৃঙ্খলা সৃষ্টি হবে।

(৭৪) আর যারা বিশ্বাস স্থাপন করেছে আর দেশত্যাগ করেছে আর ঈশ্বরের পথে যুদ্ধ করেছে এবং যারা আশ্রয় দিয়েছে ও সাহায্য করেছে এরাই খাঁটি সত্যের প্রতিআস্থাবান। তাদের জন্য ক্ষমা এবং সবচেয়ে ভাল জীবিকা রয়েছে। (৭৫) আর যারা পরে বিশ্বাস স্থাপন করেছে (আস্থা প্রকাশ করেছে) এবং তোমাদের সাথে মিলে যুদ্ধ করেছে তারাও তোমাদের অন্তর্ভুক্ত। আর রক্ত সম্পর্কীয় আত্মীয়রা ঈশ্বরের গ্রন্থ অনুযায়ী অধিকতর নিকটাত্মীয়। নিঃসন্দেহে ঈশ্বর সবকিছুই জানেন।

অধ্যায় ৯ : আত-তাওবা (অনুতাপ)

(১) ঈশ্বর ও তাঁর বার্তাবাহকের পক্ষ হতে অব্যাহতি ঘোষণা করা হচ্ছে ঐ বহুশ্বরবাদীদের প্রতি যাদের সাথে তোমরা চুক্তি করেছিলে। (২) অতএব তোমরা পৃথিবীতে চারমাস ঘুরে বেড়াতে পার। আর জেনে রেখো তোমরা ঈশ্বরের পরিকল্পনা ব্যর্থ করতে পারবে না এবং ঈশ্বর সত্য অস্বীকারকারীদের অপমানিত করবেন। (৩) আর মহান তীর্থের (হজ্জের) দিনে ঈশ্বর ও তাঁর বার্তাবাহকের পক্ষ থেকে মানুষের প্রতি একটি ঘোষণা এই যে, ঈশ্বর আর তাঁর বার্তাবাহক বহুশ্বরবাদীদের ব্যাপারে সবরকম দায় থেকে মুক্ত। এখন যদি তোমরা ক্ষমা প্রার্থনা কর তাহলে তোমাদের জন্য ভাল। আর যদি বিমুখ হও তাহলে জেনে রেখো তোমরা ঈশ্বরের পরিকল্পনা ব্যর্থ করতে পারবে না, আর অস্বীকারকারীদের কঠিন শাস্তির সংবাদ দিয়ে দাও। (৪) কিন্তু অংশীবাদীদের মধ্যে যাদের সাথে তোমাদের চুক্তি হয়েছে এবং যারা তোমাদের সে চুক্তি রক্ষায় কোন ভ্রুটি করেনি আর তোমাদের বিরুদ্ধে কাউকে সাহায্য ও করেনি তাদের ব্যাপারটি আলাদা। মেয়াদ পূরণ হওয়া পর্যন্ত তোমরা তাদের সাথে চুক্তি মেনে চলবে। নিঃসন্দেহে ঈশ্বর সদাচারীদের পছন্দ করেন।

(৫) অতঃপর হারাম মাস (নিষিদ্ধ মাস) অতিবাহিত হলে বহুশ্বরবাদীদের যেখানে পাবে হত্যা করবে, পাকাড়াও করবে, অবরোধ করবে এবং তাদের জন্য প্রত্যেক ঘাঁটিতে বসে থাকবে।^১ তবে যদি তারা অনুতাপ করে এবং ঠিকভাবে প্রার্থনা করে আর উদ্ধৃত সম্পদ থেকে নির্ধারিত দান করে তাহলে তাদের ছেড়ে দেবে। ঈশ্বর ক্ষমাশীল, দয়ালু। (৬) আর যদি অংশীবাদীদের

^১ বিঃ দ্রঃ-(৯ : ০৫) পরিচয় অংশে ১৩ থেকে ১৫ পৃষ্ঠা দ্রষ্টব্য।

কেউ তোমার কাছে আশ্রয় চায় তাহলে তাকে আশ্রয় দেবে, যাতে সে ঈশ্বরের বাণী শোনে। তারপর তাকে তার নিরাপদ স্থানে পৌঁছে দেবে। এটা এজন্যে যে, তাদের জ্ঞান নেই।

(৭) ঈশ্বর ও তাঁর বার্তাবাহকের সাথে অংশীবাদীদের চুক্তি কিভাবে (বলবৎ) হতে পারে? তবে যাদের সাথে তোমরা (কাবার) পবিত্র মসজিদের কাছে সমঝোতা করেছিলে, তারা ব্যতীত। অতএব তারা যতক্ষণ তোমাদের সাথে ঠিক থাকবে তোমরাও তাদের সাথে ঠিক থাকবে। নিঃসন্দেহে ঈশ্বর সদাচারীদের পছন্দ করেন। (৮) কিভাবে তাদের সাথে সমঝোতা হতে পারে, যখন তারা তোমাদের উপর জয়ী হয়, তখন তোমাদের আত্মীয়তা কিম্বা অঙ্গীকারের মর্যাদা রাখে না? মুখের কথায় তোমাদের সন্তুষ্ট করতে চায়; কিন্তু তাদের অন্তর বিরূপ থাকে। আর তাদের অধিকাংশই বিশ্বাসঘাতক। (৯) তারা ঈশ্বরের বাণী সমূহ নগন্য মূল্যে বিক্রি করেছে এবং ঈশ্বরের পথে বাধা সৃষ্টি করেছে। তারা যা করেছে তা খুবই জঘন্য। (১০) কোন বিশ্বাসীর ক্ষেত্রে তারা আত্মীয়তা কিম্বা অঙ্গীকারের মর্যাদা রাখে না। আর তারাই সীমানাঙ্কনকারী। (১১) তবে তারা যদি অনুতাপ করে এবং ঠিকমত প্রার্থনা প্রতিষ্ঠা করে আর উদ্ধৃত সম্পদ থেকে নির্ধারিতদান প্রদান করে তাহলে সে তোমাদের ধর্মের ভাই। আর আমি বাণী সমূহ জ্ঞান পিপাসুদের জন্য স্পষ্টভাবে বর্ণনা করি।

(১২) আর চুক্তির পর যদি তারা চুক্তি ভঙ্গ করে এবং তোমাদের ধর্মের প্রতি কটাক্ষ করে তাহলে অবজ্ঞাকারী নেতাদের বিরুদ্ধে যুদ্ধ কর; কারণ তাদের জন্য কোন চুক্তি নেই, যাতে তারা বিরত হয়। (১৩) তোমরা কি এমন লোকদের সাথে যুদ্ধ করবে না যারা নিজেদের শপথ ভঙ্গ করেছে আর বার্তাবাহককে বহিষ্কারের দুঃসাহস দেখিয়েছে? এরাই তো প্রথম তোমাদের সাথে যুদ্ধের সূচনা করেছে। তোমরা কি এদের ভয় করবে? ভয় আদায় করার অধিক দাবীদার তো ঈশ্বর, যদি তোমরা আস্তাবান হও। (১৪) ওদের সাথে যুদ্ধ কর; ঈশ্বর তোমাদের হাত দিয়েই

ওদের শাস্তি দেবেন আর ওদের অপমান করবেন; আর তোমাদের ওদের উপরে প্রভুত্ব দান করবেন, আর আস্থাবান লোকদের অন্তরসমূহকে প্রশান্ত ও ঠাণ্ডা করবেন, আর ওদের অন্তরের ঈর্ষা দূর করবেন। (১৫) আর তাদের অন্তরসমূহের ক্ষোভ দূর করে দেবেন আর ঈশ্বর যাকে চাইবেন ক্ষমা করবেন। ঈশ্বর সর্বজ্ঞ ও প্রজ্ঞাময়।

(১৬) তোমরা কি মনে করছো যে, তোমাদের ছেড়ে দেওয়া হবে? অথচ ঈশ্বর এখনও তোমাদের মধ্যে তাদেরকে চিহ্নিত করেন নি যারা সংগ্রাম করেছে এবং ঈশ্বর, তাঁর বার্তাবাহক ও আস্থাবানদের ছাড়া অন্য কাউকে ও অন্তরঙ্গ বন্ধুরূপে গ্রহণ করেন নি, আর তোমরা যা কর ঈশ্বর তার খবর রাখেন।

(১৭) ঈশ্বরের মসজিদ সমূহকে রক্ষণাবেক্ষণ করা বহুশ্বরবাদীদের কাজ নয়, যখন তারা স্বয়ং নিজেদের বিরুদ্ধেই অবজ্ঞা করার সাক্ষ্য দেয়, এদের কর্ম ব্যর্থ হয়ে গেছে আর এরা চিরকাল নরকেই থাকবে। (১৮) ঈশ্বরের মসজিদ সমূহের রক্ষণাবেক্ষণ তো তারাই করবে যারা ঈশ্বর ও পরলোকে বিশ্বাসী, প্রার্থনা প্রতিষ্ঠা করে, সম্পদের উদ্ধৃত্ত যথা নিয়মে দান করে এবং শুধু ঈশ্বরকেই ভয় করে; আশা করা যায় এধরনের লোকেরাই সঠিক পথে রয়েছে। (১৯) তোমরা কি তীর্থযাত্রীদের জল সরবরাহ এবং (কাবা)পবিত্র উপসনালয় এর রক্ষণাবেক্ষণকে সেই ব্যক্তির সমান মনে কর যে ঈশ্বর ও পরলোকে বিশ্বাস করে এবং ঈশ্বরের পথে সংগ্রাম করে? ঈশ্বরের নিকটে এরা উভয়েই সমান হতে পারে না; আর ঈশ্বর সীমালঙ্ঘনকারীদের পথ দেখান না। (২০) যারা আস্থাবান হয়েছে এবং দেশ ত্যাগ করেছে আর ঈশ্বরের পথে জীবন ও সম্পদ দ্বারা সংগ্রাম করেছে, ঈশ্বরের কাছে তাদের মর্যাদা অনেক বড় আর এরাই সফলকাম। (২১) তাদের প্রভু তাদেরকে

সুসংবাদ দিচ্ছেন আপন দয়া ও সন্তুষ্টির এবং এমন উদ্যানের যেখানে তাদের জন্য স্থায়ী সুখের ব্যবস্থা রয়েছে। (২২) সেখানে তারা চিরকাল বাস করবে; নিঃসন্দেহে ঈশ্বরের কাছে রয়েছে বড় প্রতিফল।

(২৩) হে বিশ্বাসীগণ! তোমাদের পিতা ও ভ্রাতাগণ যদি সত্যে বিশ্বাস স্থাপনের বদলে সত্য প্রত্যাখ্যানকে অধিক গুরুত্ব দেয় তাহলে তোমরা তাদেরকে অভিভাবক হিসাবে গ্রহণ করো না। তোমাদের মধ্যে যারা তাদেরকে অভিভাবকরূপে গ্রহণ করে তারাই অত্যাচারী। (২৪) বলঃ যদি তোমাদের পিতা, তোমাদের সন্তান, তোমাদের ভাই, তোমাদের পত্নীরা আর তোমাদের পরিবার আর যে সম্পত্তি তোমরা উপার্জন করেছ আর ঐ ব্যবসা যা বন্ধ হওয়ার ভয় করছো আর ঐ ঘর যা তোমাদের পছন্দ এ সমস্ত যদি ঈশ্বর আর তাঁর বার্তাবাহকের পথে সংগ্রাম করার চেয়ে অধিক প্রিয় হয় তাহলে প্রতিক্ষা কর যতক্ষণ না ঈশ্বর কোন বিধান পাঠান। আর ঈশ্বর অবজ্ঞাকারীদের পথ দেখান না।

(২৫) নিঃসন্দেহে অনেক ক্ষেত্রে ঈশ্বর তোমাদের সাহায্য করেছেন; ছনাইনের দিনেও, যখন তোমরা নিজেদের সংখ্যা বেশী দেখে অহংকারী হয়ে পড়েছিলে; কিন্তু তা তোমাদের কোনই কাজে আসেনি। আর পৃথিবী বিশাল হওয়া সত্ত্বেও তোমাদের কাছে সঙ্কীর্ণ মনে হয়েছিল এবং পরে তোমরা পশ্চাদপসারন করেছিলে। (২৬) তারপর ঈশ্বর তাঁর বার্তাবাহক ও আস্থাবানদের প্রশান্তি দান করেছিলেন এবং এমন সেনাদল নামিয়েছিলেন যাদেরকে তোমরা দেখনি আর ঈশ্বর অবজ্ঞাকারীদের শাস্তি দিয়েছিলেন, ওটাই অবজ্ঞাকারীদের কর্মফল। (২৭) তারপরও ঈশ্বর যাকে ইচ্ছা করেন ক্ষমা প্রার্থনা করার সৌভাগ্য দান করেন; আর ঈশ্বর ক্ষমাশীল পরম দয়ালু। (২৮) হে বিশ্বাসীগণ! অংশীবাদীরা আসলে অপবিত্র। অতএব তারা যেন এ

বছরের পর আর পবিত্র উপাসনালয়ে (কাবা) এর নিকটে না আসে আর যদি তোমরা দারিদ্রতার আশঙ্কা কর তাহলে ঈশ্বর চাইলে স্বীয় অনুগ্রহে তোমাদেরকে সম্পন্ন করে দেবেন। ঈশ্বর মহাজ্ঞানী, বিবেকবান।

(২৯) ওই গ্রন্থধারীদের বিরুদ্ধে যুদ্ধ কর যারা ঈশ্বরকে বিশ্বাস করে না, অন্তিম দিবসকে বিশ্বাস করে না, আর ঈশ্বর ও তাঁর বার্তাবাহকের অবৈধ ঘোষণাকে অবৈধ মনে করে না বা সত্য ধর্ম পালন করে না। ততক্ষণ যুদ্ধকর যতক্ষণ না তারা স্বেচ্ছায় কর দেয় এবং আত্মসমর্পণ করে। (৩০) আর ইহুদীরা বলে উযায়ের (এজরা) ঈশ্বরের পুত্র, আর খৃষ্টানরা বলে মসীহ ঈশ্বরের পুত্র, এটা তাদের মুখের কথা। তারা সেই লোকদের অনুকরণ করছে যারা ইতিপূর্বে অবজ্ঞাকারী ছিল, ঈশ্বর তাদের ধ্বংস করুক! তারা কিভাবে বিচ্যুত হয়ে যাচ্ছে! (৩১) তারা ঈশ্বর ছাড়াও তাদের যাজক ও পাদ্রীদের এবং মারইয়ামের (মেরী) পুত্র মসীহ কে প্রভু বানিয়েছে; অথচ তাদের মাত্র একজন উপাস্যের উপাসনা করার আদেশ দেওয়া হয়েছিল। তিনি ছাড়া কোন উপাস্য নেই। তারা যে অংশীদার স্থাপন করছে তিনি তা হতে পবিত্র।

(৩২) তারা চাইছে যে, ফাঁক দিয়ে ঈশ্বরের জ্যোতি নিভিয়ে দেবে; কিন্তু ঈশ্বর চান তাঁর জ্যোতির পূর্ণতাদান ছাড়া আর কিছু হতে দেবেন না, অবজ্ঞাকারীদের যতই অপরিমিত মনে হোক। (৩৩) তিনিই তাঁর বার্তাবাহককে পথ-নির্দেশ ও সত্যধর্মসহ পাঠিয়েছেন সব ধর্মের উপর এই ধর্মকে বিজয়ী করার জন্য, বহুশ্বরবাদীদের কাছে তা যতই অপরিমিত হোক।

(৩৪) হে বিশ্বাসীগণ! অনেক যাজক ও পাদ্রী অন্যায়াভাবে মানুষের সম্পদ ভক্ষণ করে এবং মানুষদের ঈশ্বরের পথে যেতে বাধার সৃষ্টি করে, ওদেরকে বলঃ যারা সোনা ও রূপা জমা করে রাখে আর তা ঈশ্বরের পথে খরচ করে না, তাদের জন্য রয়েছে এক কষ্টদায়ক যন্ত্রণা। (৩৫) সেদিন ঐ সম্পত্তিকে নরকের আগুনে উত্তপ্ত করা হবে এবং তার দ্বারা তাদের ললাট, পাঁজর ও পিঠ দগ্ধ করা হবে। এই

হল সেই সম্পদ যা তোমরা নিজেদের জন্য জমা করে রেখেছিলে, এখন তার স্বাদ গ্রহণ কর যা তোমরা জমা করতে।

(৩৬) ঈশ্বর যে দিন আকাশ ও পৃথিবী সৃষ্টি করেছেন সে দিনের ঠিক করা নিয়মে ঈশ্বরের কাছে মাসের সংখ্যা বারটি। এর মধ্যে চারটি নিষিদ্ধ মাস। এটাই সঠিক পন্থা। এই মাসগুলোতে নিজেদের উপর অত্যাচার করো না। আর অংশীবাদীদের বিরুদ্ধে সবাই একসঙ্গে যুদ্ধ কর, যেভাবে তারা সবাই এক সঙ্গে মিলে তোমাদের বিরুদ্ধে যুদ্ধ করে।^১ আর মনে রেখো যারা ঈশ্বরকে ভয় করে তিনি তাদের সঙ্গেই আছেন। (৩৭) তাদের সত্য প্রত্যাখ্যানের আরও একটি উদাহরণ হলো (পবিত্র মাসসমূহকে) স্থগিত করা। এর দ্বারা সত্য প্রত্যাখ্যানকারীরা পথভ্রষ্টতায় নিমজ্জিত হয়। তারা কোন বৎসরে নিষিদ্ধ মাসকে বৈধ করে নেয় আর কোন বৎসরে তা অবৈধ করে নেয়। যাতে ঈশ্বর কর্তৃক নির্ধারিত মাসের সংখ্যা ঠিক রেখে ঈশ্বর যা অবৈধ করেছেন তারা তা বৈধ করতে পারে। তাদের এসব খারাপ কাজ তাদের কাছে যৌক্তিক বলে উপস্থাপন করা হয়েছে। ঈশ্বর অবজ্ঞাকারীদের পথ দেখান না।

(৩৮) হে বিশ্বাসীগণ! তোমাদের কী হয়েছে? যখন তোমাদের বলা হচ্ছে “ঈশ্বরের পথে বের হও” তখন তোমরা অলসভাবে মাটি আঁকড়ে ধরছো। তোমরা কি পরলোকের তুলনায় পার্থিব জীবন নিয়েই সন্তুষ্ট? পরলোকের তুলনায় তো পার্থিব জীবনের বস্তু অতি নগন্য। (৩৯) যদি তোমরা বের না হও তাহলে ঈশ্বর তোমাদেরকে যন্ত্রণাদায়ক শাস্তি দেবেন, আর তোমাদের পরিবর্তে তিনি অন্য জাতিকে তোমাদের স্থলাভিষিক্ত করবেন; আর তোমরা ঈশ্বরের কোন ক্ষতি করতে পারবে না, ঈশ্বর সবকিছু করতে সক্ষম। (৪০) যদি তোমরা পয়গম্বরের সহায়তা না কর তাহলে ঈশ্বর (তার সাহায্য করবেন যেমন তিনি) স্বয়ং তাকে সাহায্য করেছিলেন

^১ বিঃ দ্রঃ-(৯ : ৩৬) পরিচয় অংশে ১৩ থেকে ১৫ পৃষ্ঠা দ্রষ্টব্য।

যখন অবজ্ঞাকারীরা তাকে বহিস্কার করেছিল, যখন সে ছিল দুজনের দ্বিতীয়জন, যখন তারা দুজনে গুহায় ছিল, যখন সে তার সঙ্গীকে বলেছিল, চিন্তা করো না ঈশ্বর আমাদের সাথে আছেন। অতঃপর ঈশ্বর তার উপর শান্তি বর্ষণ করেছেন, আর তাকে আপন সেনা দ্বারা সহায়তা করেছিলেন যা তোমরা দেখতে পাওনি। এবং অবজ্ঞাকারীদের কথা হয়ে করে দিয়েছেন। আর ঈশ্বরের কথাই সম্মুখত, ঈশ্বর পরম পরাক্রমশালী, পরম প্রাজ্ঞ।

(৪১) হাক্কা অথবা ভারী সরঞ্জাম নিয়ে নিজেদের সম্পদ ও জীবন দিয়ে ঈশ্বরের পথে সংগ্রাম কর, এটাই তোমাদের জন্য মঙ্গল, যদি তোমরা জানতে। (৪২) যদি আশু লাভ ও গন্তব্য নিকটবর্তী হত তাহলে অবশ্যই তারা তোমাদের সহযাত্রী হত; কিন্তু এই গন্তব্য (দূরবর্তী হওয়ার কারণে) তাদের কাছে কঠিন হয়ে পড়ল। এখন তারা শপথ করে বলবে, আমরা যদি পারতাম তাহলে অবশ্যই তোমাদের সাথে বের হতাম। তারা নিজেদের ধ্বংস ডেকে আনছে। আর ঈশ্বর জানেন যে, তারা নিশ্চিতরূপে মিথ্যাবাদী।

(৪৩) ঈশ্বর তোমাকে ক্ষমা করুন! তুমি কেন ওদের অনুমতি দিলে? যে পর্যন্ত না তোমার কাছে স্পষ্ট হয়ে যেত যে, কারা সত্যবাদী আর মিথ্যাবাদীদেরও তুমি জেনে নিতে। (৪৪) যারা ঈশ্বর ও পরলোকে বিশ্বাসী তারা কখনও তোমার কাছে এই প্রার্থনা করবে না যে, তারা নিজেদের সম্পদ ও প্রাণ দিয়ে সংগ্রাম করবে না। ঈশ্বর সদা সতর্ক লোকদের ভালভাবেই জানেন। (৪৫) তোমার কাছে তো ঐ লোকেরাই অনুমতি চাইছে যারা ঈশ্বরের উপরে ও পরলোকে বিশ্বাস করে না আর ওদের অন্তরে সন্দেহের সৃষ্টি হয়েছে। অতএব তারা ওদের সন্দেহের মধ্যে দ্বিধাগ্রস্ত। (৪৬) তাদের যদি বের হওয়ার ইচ্ছাই থাকত তাহলে তারা সেজন্যে কিছু সরঞ্জাম প্রস্তুত করত; কিন্তু ঈশ্বর তাদের অভিযাত্রা অপছন্দ করেছেন; তাই তিনি তাদেরকে হতোদ্যম করেছেন

এবং বলে দিয়েছেন, যারা বসে আছে তোমরা তাদের সাথেই বসে থাক।

(৪৭) তারা যদি তোমার সাথে বের হত তাহলে তোমাদের শুধু অনিষ্ঠাই বাড়াত, আর তারা তোমাদের মধ্যে উপদ্রব করার জন্য দৌড় ঝাঁপ করত। আর তোমাদের মধ্যে ওদের কথা শোনার লোকও রয়েছে। ঈশ্বর অত্যাচারীদের সম্পর্কে ভালভাবেই অবগত। (৪৮) এর পূর্বেও এরা উপদ্রব সৃষ্টি করার প্রয়াস করেছে এবং তোমাদের বিরুদ্ধে অভিসন্ধি করেছে। অবশেষে সত্য এসেছে, এবং ঈশ্বরের আদেশ প্রকট হয়েছে যদিও তারা অপ্রসন্ন থেকেই গেছে।

(৪৯) তাদের মধ্যে এমনও আছে যে বলে, আমাকে অব্যাহতি দাও আর আমাকে পরীক্ষার মধ্যে ফেল না। শুনে রেখোঃ তারা তো পরীক্ষার মধ্যে পড়ে গেছে। আর নিঃসন্দেহে নরক অবজ্ঞাকারীদের বেষ্টন করে আছে। (৫০) তোমার কোন কল্যাণ হলে তাদের তা খারাপ লাগে। আর যদি তোমার কোন কষ্ট হয় তখন তারা বলে, আমরা আগেই আমাদের সামলে নিয়েছিলাম এবং তারা প্রসন্নচিত্তে সরে পড়ে। (৫১) বলঃ ঈশ্বর আমাদের জন্য যা নির্ধারিত করে রেখেছেন তাছাড়া অন্য কিছু আমাদের হবে না; তিনিই আমাদের কার্য সম্পন্নকারী, আর ঈশ্বরের উপরেই আস্তাবানদের ভরসা করা উচিত। (৫২) বলঃ তোমরা কি আমাদের জন্য দুটো কল্যাণের (পৃথিবীতে বিজয় অথবা পরবর্তীতে স্বর্গ) যে কোন একটির প্রতিক্ষায় আছ? কিন্তু আমরা তোমাদের জন্য যে প্রতিক্ষা করছি তা হল, ঈশ্বর তাঁর পক্ষ হতে তোমাদের শাস্তি দিন অথবা আমাদের পক্ষ হতে। অতএব তোমরা প্রতিক্ষা কর আমরাও তোমাদের সাথে প্রতিক্ষা করছি।

(৫৩) বলঃ তোমরা স্বেচ্ছায় ব্যয় করো কিংবা অনিচ্ছায় তোমাদের সে ব্যয় কখন ও গ্রহণ করা হবে না, নিঃসন্দেহে তোমরা অবজ্ঞাকারী লোক।

(৫৪) তাদের ব্যয় সমূহ গৃহীত হতে বাধা শুধু এটাই যে, তারা ঈশ্বর ও তাঁর বার্তাবাহককে অবিশ্বাস করেছে আর এরা প্রার্থনার জন্য আসে অলসভাবে এবং খরচ করার সময় অনিচ্ছার সাথে খরচ করে। (৫৫) তুমি ওদের সম্পত্তি ও সম্ভানদের কোন গুরুত্ব দিও না। ঈশ্বর তো চান এর দ্বারা ওদের পার্থিব জীবনে শাস্তি দেবেন আর অবজ্ঞাকারী অবস্থায় ওদের প্রাণ বিয়োগ হবে। (৫৬) তারা ঈশ্বরের শপথ করে বলে যে, তারা তোমাদের সাথে আছে অথচ তারা তোমাদের সাথে নেই। বরং এরা এমন লোক যারা তোমাদেরকে ভয় করে। (৫৭) তারা যদি কোন আশ্রয়স্থল পায় বা কোন গুহা অথবা লুকিয়ে থাকার স্থান তাহলে তারা সেদিকেই ছুটে পালাবে।

(৫৮) আর ওদের মধ্যে এমনও আছে যারা দান বন্টনের ব্যাপারে তোমাকে দোষারোপ করে। যদি ওদেরকে এর কিছু অংশ দিয়ে দেওয়া হয় তাহলে খুশী হয়, আর যদি না দেওয়া হয় অমনি তারা ব্রুদ্ধ হয়। (৫৯) কতই না ভাল হত, যদি ঈশ্বর ও তাঁর বার্তাবাহক তাদেরকে যা দিয়েছেন তাতে তারা সন্তুষ্ট হত আর বলত, “ঈশ্বর আমাদের জন্য যথেষ্ট। ঈশ্বর তাঁর অনুগ্রহ থেকে আমাদেরকে দান করবেন আর তাঁর বার্তাবাহকও। আমরা তো ঈশ্বরকেই পেতে চাই।” (৬০) উদ্ধৃত সম্পদ থেকে বিধি মাফিক দান তো কেবল গরীবদের জন্য এবং দুর্বলদের জন্য, তার সাথে সংশ্লিষ্ট কর্মচারীদের জন্য, যাদের মন রক্ষা করতে (অভিপ্রায়) হয় (তাদের) জন্য, দাসমুক্তির জন্য, ঋণগ্রস্তদের জন্য, ঈশ্বরের পথে সংগ্রামকারীদের জন্য এবং বন্দীমুক্তির জন্য, জরিমানা আদায় করার জন্য আর অভাবী পথিকদের সহায়তার জন্য। এটা ঈশ্বরের এক আদেশ। ঈশ্বর মহাজ্ঞানী এবং বিবেকবান।

(৬১) তাদের মধ্যে এমন লোক ও আছে যারা পয়গম্বরকে কষ্ট দেয় আর বলে, এই ব্যক্তি তো কানসর্বস্ব (সব কথায় কান দেয়)। বলঃ সে তোমাদের

মঙ্গলের কানসর্বস্ব, সে তো ঈশ্বরকে বিশ্বাস করে এবং আস্থাবানদের উপর ভরসা করে। আর তোমাদের মধ্যে যারা আস্থাবান তাদের জন্য দয়া স্বরূপ; আর যারা ঈশ্বরের বার্তাবাহককে কষ্ট দেয় তাদের জন্য রয়েছে কষ্টদায়ক শাস্তি। (৬২) তারা তোমাদের সামনে ঈশ্বরের শপথ নেয় যাতে তোমাদেরকে সন্তুষ্ট করতে পারে; অথচ ঈশ্বর ও তাঁর বার্তাবাহককে সন্তুষ্ট করাই তাদের কর্তব্য, যদি তারা আস্থাবান হয়। (৬৩) তারা কি জানতে পারেনি যে, ঈশ্বর ও তাঁর বার্তাবাহকের বিরোধিতাকারীর জন্য রয়েছে নরকের অগ্নি যাতে তারা চিরকাল থাকবে, এটাই তো চরম লাঞ্ছনা।

(৬৪) কপটচারীরা ভয় করে যে, পাছে আস্থাবানদের উপর এমন কোন অনুচ্ছেদ (কুরআনের অংশ) অবতীর্ণ হয় বা তাদের অন্তরের রহস্য ওদেরকে অবগত করে দেয়। বলঃ উপহাস করে নাও, ঈশ্বর নিশ্চিতরূপে তা প্রকাশ করে দেবেন যা তোমরা ভয় করছো। (৬৫) যদি তুমি ওদের জিজ্ঞাসা কর তাহলে তারা বলবেঃ আমরাতো হাসিঠাট্টা করছিলাম। বলঃ তোমরা কি ঈশ্বর আর তাঁর বাণীসমূহ এবং তাঁর বার্তাবাহকে নিয়ে হাসি তামাশা করছিলে? (৬৬) অজুহাত দেখিও না। তোমরা বিশ্বাস স্থাপন করার পর অস্বীকার করেছ। আর আমি তোমাদের মধ্যে একদলকে ক্ষমা করে দেব তবে অন্য দলকে অবশ্যই শাস্তি দেব, কেননা তারা অপরাধী।

(৬৭) কপটচারী পুরুষ ও কপটচারী মহিলা সবাই একই রকম। তারা খারাপ কাজের আদেশ দেয় আর ভাল কাজ থেকে বিরত রাখে, আর (ঈশ্বরের পথে খরচ করা থেকে) নিজেদের হাত গুটিয়ে রাখে। তারা ঈশ্বরকে ভুলে গেছে, তাই তিনিও তাদেরকে ভুলে গেছেন; নিঃসন্দেহে কপটচারীরা বড় অবজ্ঞাকারী। (৬৮) কপটচারী পুরুষ আর কপটচারী মহিলা এবং অস্বীকারকারীদের ঈশ্বর নরকের আগুনের

অঙ্গীকার করেছেন যাতে তারা স্থায়ীভাবে থাকবে, এটাই ওদের জন্য পর্যাপ্ত। ওদের উপর ঈশ্বরের অভিশাপ ও ওদের জন্য রয়েছে স্থায়ী শাস্তি। (৬৯) তোমরা তোমাদের পূর্ববর্তীদের মতই। তারা শক্তিতে তোমাদের চেয়ে প্রবল ছিল এবং তাদের ধনসম্পদ ও সম্ভান-সম্ভৃতিও তোমাদের চেয়ে বেশী ছিল। তারা তাদের অংশ ভোগ করেছিল, তোমরাও তোমাদের অংশ ভোগ করেছ, যেমন তোমাদের পূর্ববর্তীরা তাদের অংশ ভোগ করেছিল এবং তারা যেমন অনর্থক কথাবার্তা বলেছিল তোমরাও তেমন অনর্থক কথাবার্তা বলছ। তারাই সেই লোক যাদের কর্ম পৃথিবীতে এবং পরলোকে নষ্ট হয়ে গেছে আর তারাই ক্ষতিগ্রস্ত। (৭০) ওদের কাছে কি ঐ লোকদের সংবাদ পৌঁছায়নি যারা ওদের পূর্বে চলে গেছে? (যেমন) নূহ (নোয়াহ), আদ, সামুদ এবং ইবরাহীমের (আব্রাহামের) সম্প্রদায়, মাদায়েনের (মিদিয়ানের) ও ধ্বংসপ্রাপ্ত শহরের বাসিন্দারা। ওদের কাছে ওদের বার্তাবহ প্রমাণসহ এসেছিল। ঈশ্বর তাদের উপর অত্যাচার করেন নি; বরং তারা স্বয়ং নিজেরা নিজেদের উপর অত্যাচার করেছিল।

(৭১) আর আস্থাবান পুরুষ ও আস্থাবান মহিলা একে অপরের সহায়ক। তারা ভাল কাজের নির্দেশ দেয় আর খারাপ কাজ থেকে বিরত রাখে আর প্রার্থনা প্রতিষ্ঠা করে আর উদ্বৃত্ত সম্পদ থেকে বিধিমাফিক দান প্রদান করে ঈশ্বর ও তাঁর বার্তাবাহকের আদেশ পালন করে; এরাই সেই লোক যাদেরকে ঈশ্বর দয়া করবেন, নিঃসন্দেহে ঈশ্বর পরাক্রমশালী, প্রজ্ঞাময়। (৭২) আস্থাবান পুরুষ ও আস্থাবান মহিলাদের জন্য ঈশ্বর প্রতিশ্রুতি দিয়েছেন এমন উদ্যানের যার পাদদেশ দিয়ে নদী প্রবাহিত হবে। সেখানে তারা চিরদিন থাকবে। আরো প্রতিশ্রুতি সুন্দর সুন্দর বাসস্থানের, স্থায়ী থাকার উদ্যানের আর ঈশ্বরের সমৃদ্ধিই হলো সবচেয়ে বড় (নিয়ামত বা অনুগ্রহ), এটাই মহান সাফল্য।

(৭৩) হে পয়গম্বর! অস্বীকারকারী ও কপটচারীদের বিরুদ্ধে সংগ্রাম কর ওদের প্রতি কঠোরতা অবলম্বন কর। আর ওদের নিবাস হল নরক আর তা বড়ই নিকৃষ্ট ঠিকানা। (৭৪) তারা ঈশ্বরের নামে শপথ করে বলে যে, তারা বলেনি; কিন্তু তারা ইসলাম গ্রহণ করার পরেও সত্যপ্রত্যখ্যানের কথা বলে। তারা একটি ষড়যন্ত্র করেছিল যা তারা কার্যকর করতে পারেনি। ঈশ্বরের প্রতি বিদ্বেষ পোষণ করাই তাদের একমাত্র কাজ, তিনি তাঁর অসীম কৃপায় তাদেরকে ও তাঁর বার্তাবাহককে সমৃদ্ধ করেছেন। যদি তারা অনুতপ্ত হয়, যদি তারা বিমুখ হয়, তাহলে ঈশ্বর ওদেরকে ইহলোক ও পরলোকে কষ্টদায়ক শাস্তি দেবেন এবং পৃথিবীতে তাদের রক্ষা করার বা সাহায্য করার মতো কেউই থাকবে না।

(৭৫) আর ওদের মধ্যে এমনও আছে যারা ঈশ্বরের কাছে অঙ্গীকারবদ্ধ হয়েছিল যে, যদি তিনি আমাদের আপন কৃপা দান করেন তাহলে অবশ্যই আমরা ব্যয় করবো আর আমরা সদাচারী হয়ে থাকব। (৭৬) অতঃপর ঈশ্বর যখন ওদের স্বীয় অনুগ্রহ থেকে দান করলেন তখন তারা কৃপণতা করতে থাকল এবং অঙ্গীকার থেকে মুখ ফিরিয়ে নিল। (৭৭) অতএব ঈশ্বর তাদের অন্তরে কঠোরতা সঞ্চার করলেন সেই দিন পর্যন্ত যে দিন তারা তাঁর সাথে সাক্ষাত করবে। কারণ তারা ঈশ্বরের সাথে কৃত অঙ্গীকার ভঙ্গ করেছিল এবং মিথ্যা বলেছিল। (৭৮) তারা কি জানতে পারেনি যে, ঈশ্বর ওদের গোপন কথা ও গোপন শলা-পরামর্শ অবগত আছেন, এবং ঈশ্বর সবই গোপন কথা ভাল করেই জানেন। (৭৯) যে বিশ্বাসীগণ স্বেচ্ছায় তাদের উদ্বৃত্ত সম্পত্তি থেকে বিধিবদ্ধ দান করে, তাদেরকে যারা উপহাস করে এবং যাদের কাছে তাদের কষ্টার্জিত মজুরি ছাড়া দান করার কিছুই থাকে না, তাদেরকে ও যারা উপহাস করে, ঈশ্বর ঐ সমস্ত

উপহাসকারীদের উপহাস করেন। আর তাদের জন্য রয়েছে যন্ত্রণাদায়ক শাস্তি। (৮০) তুমি ওদের জন্য ক্ষমা প্রার্থনা কর আর নাই কর (উভয়ই সমান), যদি তুমি সত্তর বার ওদের জন্য ক্ষমা প্রার্থনা কর তাহলেও ঈশ্বর ওদের ক্ষমা করবেন না। কারণ তারা ঈশ্বর ও তার বার্তাবাহককে অবিশ্বাস করেছে। আর ঈশ্বর অবজ্ঞাকারীদের পথ দেখান না।

(৮১) ঈশ্বরের বার্তাবাহকের পিছনে থেকে যাওয়া লোকগুলো ঘরে বসে আনন্দ করেছে এবং নিজেদের সম্পদ ও জীবন দিয়ে ঈশ্বরের পথে সংগ্রাম করা ওদের অপছন্দ হয়েছে। আর তারা বলেছে গরমের মধ্যে অভিযানে যেও না। বলে দাওঃ নরকের আগুন এর চেয়ে অধিক গরম, “যদি তারা বুঝত।” (৮২) অতএব তাদেরকে অল্প একটু হাসতে দাও এবং নিজেদের কৃতকর্মের বিনিময়ে (পরে) অনেক কাঁদবে। (৮৩) অতঃপর ঈশ্বর যদি তোমাকে ওদের কোন দলের কাছে ফিরিয়ে আনেন এবং তারা যুদ্ধে যাওয়ার অনুমতি চায় তাহলে তুমি বলবে, তোমরা আমার সাথে কখনও যাবে না এবং আমার সাথে শত্রুর বিরুদ্ধে যুদ্ধও করবে না, প্রথম বারেও তো তোমরা বসে থাকতেই পছন্দ করেছিলে, অতএব পিছনে থেকে যাওয়া লোকদের সাথে বসে থাক। (৮৪) ওদের মধ্যে কেউ মারা গেলে তার জন্য কখনও প্রার্থনা করো না আর তার সমাধির পাশেও দাঁড়াবে না। নিঃসন্দেহে তারা ঈশ্বর ও তাঁর বার্তাবাহককে অবিশ্বাস করেছে আর তারা অবাধ্য অবস্থায় মারা গিয়েছে।

(৮৫) ওদের ধন-সম্পদ আর সম্ভান-সমৃদ্ধি যেন তোমাকে বিস্মিত না করে। বস্তুত ঈশ্বর চান, ওসব দিয়ে ওদেরকে পৃথিবীতে শাস্তি দেবেন আর ওদের প্রাণ অবিশ্বাসী অবস্থায় চলে যাক। (৮৬) আর যখন কোন অনুচ্ছেদ অবতীর্ণ হয় যে, ঈশ্বরের উপর বিশ্বাস স্থাপন কর আর তাঁর পয়গম্বরের

সঙ্গে থেকে সংগ্রাম কর, তখন ওদের সামর্থ্যবানেরা তোমার কাছে অব্যহতি চাইতে থাকে আর বলে যে, আমাদের ছেড়ে দিন আমরা এখানকার লোকদের সাথে থাকি। (৮৭) তারা পিছনে থাকা মহিলাদের সঙ্গে থাকতেই পছন্দ করেছে। আর ওদের অন্তরে মোহর লাগিয়ে দেওয়া হয়েছে যার ফলে তারা বুঝতে পারে না। (৮৮) কিন্তু পয়গম্বর ও তার সাথে আস্থাবানগণ তাদের জীবন ও সম্পদ দিয়ে সংগ্রাম করেছে। তাদের জন্যেই কল্যাণ রয়েছে আর তারাই সফলকাম। (৮৯) ওদের জন্য ঈশ্বর এমন উদ্যান তৈরী করে রেখেছেন যার পাদদেশ দিয়ে নদী প্রবাহিত সেখানে তারা চিরদিন থাকবে। ওটাই বড় সফলতা।

(৯০) গ্রাম্য আরববাসীদের মধ্যে একদল অজুহাত দেখাতে এল, যাতে তাদের অব্যহতি মেলে। তারা ঈশ্বর ও তাঁর বার্তাবাহকের নামে মিথ্যা বলে ঘরে বসে রইল। তাদের মধ্যে যারা সত্য অস্বীকারকারী, তাদের জন্য রয়েছে এক যন্ত্রণাদায়ক শাস্তি। (৯১) দুর্বল, রুগ্ন, ব্যয়ভার বহনে অসমর্থ লোকদের বিরুদ্ধে কোনো অভিযোগ নেই যদি তারা ঈশ্বর ও তাঁর বার্তাবাহকের প্রতি আন্তরিক থাকে। সৎকর্মশীলদের বিরুদ্ধে কোন অভিযোগ নেই, আর ঈশ্বর ক্ষমাশীল, দয়াবান। (৯২) আর তাদের বিরুদ্ধে কোনো অভিযোগ নেই, যারা তোমার কাছে বাহনের জন্য এলে, তুমি বলেছিলে - “আমার কাছে তোমাদেরকে দেওয়ার মত কোন বাহন নেই।” তখন তারা ফিরে গেল এবং তারা কোন কাজে লাগতে না পারার জন্য তাদের চোখ দিয়ে অশ্রুধারা নির্গত হচ্ছিল। (৯৩) যারা সম্পন্ন হওয়া সত্ত্বেও তোমার কাছে অব্যহতি চাইছিল, তারা পিছনে থাকা মহিলাদের সাথে থাকতে পছন্দ করল। আর ঈশ্বর তাদের অন্তরে মোহর লাগিয়ে দিলেন, তাই তারা জানতে পারছে না।

(৯৪) তুমি যখন ওদের কাছে ফিরে আসবে তখন তারা তোমাদের

সামনে অজুহাত পেশ করবে। বলে দাওঃ অজুহাত পেশ করো না, আমরা তোমাদের কথা বিশ্বাস করবো না। নিঃসন্দেহে ঈশ্বর আমাদেরকে তোমাদের পরিস্থিতি জানিয়ে দিয়েছেন। এখন ঈশ্বর ও বার্তাবাহক তোমাদের কর্মকাণ্ড পর্যবেক্ষণ করবেন। অতঃপর তোমাদেরকে তাঁর দিকেই ফিরিয়ে আনা হবে যিনি প্রকাশ্য ও গোপন বিষয় সমূহ অবগত আছেন। তিনিই তোমাদের জানিয়ে দেবেন যা তোমরা করছিলে। (৯৫) তোমরা তাদের কাছে ফিরে এলে তারা তোমাদের কাছে ঈশ্বরের নামে শপথ করবে যাতে তোমরা বিষয়টি উপেক্ষা কর এবং তাদের ছেড়ে দাও, নিঃসন্দেহে তারা অপবিত্র আর ওদের কৃতকর্মের জন্য ওদের আবাসস্থল নরক। (৯৬) তারা তোমাদের সামনে শপথ করবে যাতে তোমরা তাদের প্রতি সন্তুষ্ট হও। যদি তোমরা তাদের প্রতি সন্তুষ্ট হয়েও যাও তাহলে ঈশ্বর ঐ অবাধ্য লোকদের প্রতি কিছুতেই সন্তুষ্ট হবেন না।

(৯৭) বেদুঈন লোকেরা অবাধ্যতা ও কপটাচারীতায় অধিক পারঙ্গম এবং ঈশ্বর তাঁর বার্তাবাহকের উপর যা অবতীর্ণ করেছেন তার সীমারেখা সম্বন্ধে তারা অনবহিত। আর ঈশ্বর সবকিছু শুনেন, সবকিছু জানেন। (৯৮) আর এই বেদুঈন লোকদের মধ্যে এমনও আছে যারা ঈশ্বরের পথে ব্যয় করাকে এক জরিমানা মনে করে আর তোমাদের জন্য মন্দ সময় আসুক এই প্রতীক্ষায় থাকে। তাদের উপরই দুর্বিপাক নেমে আসুক! ঈশ্বর সবকিছু শোনেন, সবকিছু জানেন। (৯৯) আর বেদুঈন লোকদের মধ্যে এমনও আছে যারা ঈশ্বরের উপর এবং পরলোকের দিনকে বিশ্বাস করে আর যা কিছু খরচ করে তা ঈশ্বরের নৈকট্য লাভ ও পয়গম্বরের আশীর্বাদ পাওয়ার মাধ্যম মনে করে। হ্যাঁ, নিঃসন্দেহে ওটা ওদের জন্য নৈকট্য লাভের মাধ্যম। ঈশ্বর ওদের স্বীয় অনুগ্রহের মাঝে প্রবেশ করাবেন। নিঃসন্দেহে ঈশ্বর ক্ষমাশীল, দয়াবান।

(১০০) যারা প্রথমে প্রবাসী হয়েছিল এবং তাদেরকে যারা সাহায্য করেছিল সেই সাথে যারা তাদেরকে যথার্থভাবে অনুসরণ করেছিল, তাদের সকলের প্রতি ঈশ্বর খুবই সন্তুষ্ট এবং তারাও ঈশ্বরের প্রতি অতি সন্তুষ্ট। আর ঈশ্বর তাদের জন্য এমন উদ্যান প্রস্তুত করে রেখেছেন যার পাদদেশ দিয়ে নদী প্রবাহিত। তারা সেখানে চিরকাল থাকবে, এটাই তো বড় সাফল্য। (১০১) আর তোমাদের আশে পাশে যেসব বেদুঈন লোক আছে ওদের মধ্যে কিছু কপট লোক আছে আর মদীনাবাসীদের মধ্যেও কিছু কপট লোক আছে। তারা জিদ করে কপটতা করছে। তুমি ওদের চেনো না; তবে আমি ওদেরকে চিনি। ওদেরকে আমি দ্বিগুণ শাস্তি দেব, তারপর ওদেরকে এক ভয়ানক শাস্তির দিকে পাঠানো হবে।

(১০২) আর একদল লোক আছে যারা নিজেদের ভুল স্বীকার করে নিয়েছে তারা ভাল-মন্দ মিশিয়ে কাজ করেছিল। আশা করা যায় যে, ঈশ্বর তাদের প্রতি করুণা দৃষ্টি করবেন। নিঃসন্দেহে ঈশ্বর ক্ষমাশীল, দয়ালু। (১০৩) তুমি তাদেরকে পবিত্র ও পরিশোধন করার জন্য তাদের সম্পদ থেকে দান গ্রহণ কর এবং তাদের জন্য প্রার্থনা কর। নিঃসন্দেহে তোমার প্রার্থনা তাদের জন্য শাস্তির কারণ হবে। ঈশ্বর সবকিছু শোনে, সবকিছুই জানেন। (১০৪) তারা কি জানে না যে, ঈশ্বরই তাঁর বান্দাদের অনুতাপ গ্রহণ করেন ও তাদের দান গ্রহণ করেন এবং ঈশ্বরই অনুতাপ গ্রহণকারী ও অতি দয়ালু। (১০৫) বলঃ তোমরা কাজ কর, অতঃপর ঈশ্বর ও তাঁর বার্তাবাহক এবং সত্যে বিশ্বাসীগণ তোমাদের কাজ পর্যবেক্ষণ করবেন। আর অতি সত্ত্বর তোমাদেরকে সেই সত্ত্বার দিকে ফিরিয়ে নেওয়া হবে যিনি প্রকাশ্য ও গোপন বিষয় সমূহ জানেন। তিনি তোমাদের বলে দেবেন যা কিছু তোমরা করতে। (১০৬) আর কিছু লোক আছে যাদের ব্যাপারে সিদ্ধান্ত ঈশ্বরের

নির্দেশ না আসা পর্যন্ত স্থগিত হয়ে আছে। তাদেরকে হয় তিনি শাস্তি দেবেন না হয় ক্ষমা করবেন। আর ঈশ্বর মহাজ্ঞানী, পরম প্রাজ্ঞ।

(১০৭) আর তাদের মধ্যে কেউ কেউ এমনও আছে যারা একটি উপাসনালয় বানিয়েছে ক্ষতি করার জন্যে, অস্বীকার করার জন্যে আর আস্থাবানদের মধ্যে বিভেদ সৃষ্টির জন্যে, আর এজন্যে যে, ইতিপূর্বে ঈশ্বর ও তাঁর বার্তাবাহকের বিরুদ্ধে যুদ্ধকারীদের ঘাঁটি হিসাবে ব্যবহারের জন্যে। আর এরা শপথ করে বলবে আমাদের উদ্দেশ্য তো ভাল; তবে ঈশ্বর সাক্ষ্য দিচ্ছেন যে, এরা মিথ্যুক। (১০৮) তুমি এই ভবনে কখনও দাঁড়াবে না, অবশ্য যে উপাসনালয়টি প্রথম দিন থেকেই খোদা ভীরুতার উপর ভিত্তি করে প্রতিষ্ঠিত হয়েছে সেটাই তোমার দাঁড়াবার জন্য অধিক যোগ্য। সেখানে এমন লোক আছে যারা পবিত্র থাকতে ভালবাসে। আর ঈশ্বর পবিত্রতা অর্জনকারীদের পছন্দ করেন। (১০৯) ঐ ব্যক্তিই কি শ্রেষ্ঠ যে তার ভবনের ভিত্তি প্রস্তর ঈশ্বরের ভয়ে ও ঈশ্বরের সন্তুষ্টির জন্য স্থাপন করেছে, না ঐ ব্যক্তি শ্রেষ্ঠ যে স্বীয় ভবনের ভিত্তি প্রস্তর এক ভাঙনের কিনারায় স্থাপন করে যা যেকোন মুহূর্তে ভেঙে পড়বে, অতঃপর ঐ ভবন তাকে নিয়ে নরকের আগুনে গিয়ে পড়ে? আর ঈশ্বর অত্যাচারী লোকদের পথ দেখান না। (১১০) আর যে ভবনটি তারা নির্মাণ করেছে তা তাদের অন্তরে সর্বদা এক সন্দেহের বস্তু হয়েই থাকবে, যে পর্যন্ত না তাদের অন্তর সমূহ টুকরো টুকরো হয়ে যায়। আর ঈশ্বর মহাজ্ঞানী, প্রজ্ঞাময়।

(১১১) নিঃসন্দেহে ঈশ্বর আস্থাবানদের কাছ থেকে তাদের জীবন ও সম্পদ কিনে নিয়েছেন স্বর্গের বিনিময়ে। তারা ঈশ্বরের পথে যুদ্ধ করে, মারে এবং মরে।^১ এটা ঈশ্বরের এক প্রতিশ্রুতি তৌরাত (তোরাহ), ইনজীলে

^১ বিঃ দ্রঃ- (৯ : ১১১) পরিচয় অংশে ১৩ থেকে ১৫ পৃষ্ঠা দ্রষ্টব্য।

(বাইবেল) ও কুরআনে এই সত্য প্রতিশ্রুতিতে তিনি অবিচল। আর ঈশ্বরের চেয়ে প্রতিশ্রুতি রক্ষাকারী আর কে আছে? অতএব তোমরা আনন্দ করতে থাকো তোমাদের এই ক্রয়-বিক্রয়ের উপর, যা তোমরা সম্পাদন করেছ। আর এটা হচ্ছে বড় সফলতা। (১১২) তারা ক্ষমা প্রার্থনাকারী, উপাসনাকারী, ঈশ্বরের প্রশংসাকারী, ভালকাজের আদেশ প্রদানকারী, মন্দকাজে বাধাদানকারী, ঈশ্বরের সীমাসমূহ রক্ষাকারী আর আস্থাবানদের সুসংবাদ দিয়ে দাও।

(১১৩) বার্তাবাহক ও আস্থাবানদের উচিত নয় যে, অংশীবাদীদের জন্য ক্ষমা প্রার্থনা করে, তারা আত্মীয়-স্বজন হলেও, যখন এটা স্পষ্ট হয়ে গেছে যে, তারা নরকের অধিবাসী। (১১৪) আর ইবরাহীমের (আব্রাহামের) নিজ পিতার জন্য তার ক্ষমা প্রার্থনা তো ছিল কেবল তার সাথে কৃত একটি প্রতিজ্ঞার কারণে; কিন্তু যখন তার কাছে পরিষ্কার হয়ে গেল যে সে (পিতা) ঈশ্বরের শত্রু, তখন সে সম্পর্ক ছিন্ন করে। নিঃসন্দেহে ইবরাহীম (আব্রাহাম) খুব কোমলপ্রাণ ও সহনশীল ছিল। (১১৫) আর ঈশ্বর কোন সম্প্রদায়কে পথ দেখানোর পর পথভ্রষ্ট করেন না; যতক্ষণ না পর্যন্ত তাদেরকে সুস্পষ্টভাবে ঐ বিষয় বলে দেন যা থেকে তাদের সাবধান হতে হবে। নিঃসন্দেহে ঈশ্বর সবকিছু জানেন। (১১৬) আকাশ ও পৃথিবীর রাজত্ব ঈশ্বরেরই, তিনিই জীবনদান করেন এবং তিনিই মৃত্যুদান করেন। আর ঈশ্বর ছাড়া তোমাদের কোন বন্ধু নেই আর কোন সহায়ক ও নেই।

(১১৭) ঈশ্বর বার্তাবাহকে র প্রতি, প্রবাসী ও তাদের সহায়্য কারীগণের প্রতি অনুগ্রহের দৃষ্টি দিলেন, যারা কঠিন সময়ে বার্তাবাহকের অনুসারী হয়েছিল, যখন ইতিমধ্যেই তাদের একটি দলের মনে বিভ্রান্তি সৃষ্টির উপক্রম হয়েছিল। অতঃপর ঈশ্বর তাদের প্রতি দয়াও

করেছিলেন। নিঃসন্দেহে ঈশ্বর তাদের প্রতি কৃপাশীল ও অতি দয়ালু। (১১৮) আর সেই তিনজনের প্রতিও ঈশ্বর অনুগ্রহের দৃষ্টি দিলেন, যাদের সম্পর্কে সিদ্ধান্ত স্থগিত রাখা হয়েছিল। এমনকি যখন বিশাল পৃথিবী তাদের কাছে সঙ্কুচিত হয়ে পড়েছিল আর তারা নিজেরা নিজেদের কাছে বীতশ্রদ্ধ হয়ে পড়েছিল আর তারা মনে করেছিল ঈশ্বরের থেকে বাঁচার জন্য স্বয়ং ঈশ্বর ছাড়া আর কোন আশ্রয়স্থল নেই। অতঃপর তিনি ওদের প্রতি অনুগ্রহশীল হলেন যাতে তারা ক্ষমাপ্রার্থনা করে। নিঃসন্দেহে ঈশ্বর ক্ষমাশীল, দয়ালব।

(১১৯) হে বিশ্বাসীগণ! ঈশ্বরকে ভয় কর এবং সত্যবাদীদের সঙ্গে থাক। (১২০) মদীনার অধিবাসী ও তার আশেপাশের গ্রাম্য মানুষদের উচিত হয়নি যে তারা ঈশ্বরের বার্তাবাহকের সঙ্গে ত্যাগ করে পেছনে থেকে যাওয়া এবং বার্তাবাহকের জীবন অপেক্ষা নিজেদের জীবনকে ভালবাসা। কারণ যখনই তারা ঈশ্বরের পথে কোন তৃষ্ণা, ক্লান্তি বা ক্ষুধা অনুভব করে এবং যখনই তারা এমন পদক্ষেপ গ্রহণ করে যার ফলে অবিশ্বাসীদের ক্রোধের কারণ হয় বা তাদের ক্ষতিসাধন হয়, তখনই তা তাদের জন্য সৎকর্ম হিসাবে লিপিবদ্ধ হয়। ঈশ্বর সৎকর্মশীলদের প্রতিফল নষ্ট করেন না। (১২১) আর তারা অল্প-বিস্তর যা কিছুই ব্যয় করে (ঈশ্বরের জন্য) অথবা যে কোন উপত্যকা অতিক্রম করে তা সব তাদের জন্য লিপিবদ্ধ করা হয়েছে যাতে ঈশ্বর তাদের কর্মের শ্রেষ্ঠতম প্রতিফল দিতে পারেন।

(১২২) এটা সঙ্গত নয় যে, (যুদ্ধের জন্য) বিশ্বাসীরা সকলে একসঙ্গে বেরিয়ে যাক। তাহলে কেন প্রতিটি দল থেকে একটা অংশ (পয়গম্বরের কাছে) এল না ধর্ম সংক্রান্ত গভীর জ্ঞান অর্জনের জন্য এবং আপন সম্প্রদায়কে সচেতন করার জন্য যাতে তারা মন্দ থেকে নিজেদেরকে রক্ষা করতে পারে?

(১২৩) হে বিশ্বাসীগণ! তোমাদের আশপাশে যে সব অস্বীকারকারীরা রয়েছে তাদের সাথে যুদ্ধ কর তারা যেন তোমাদের মধ্যে কঠোরতা দেখতে পায়।^১ আর জেনে রেখো যে, ঈশ্বরকে যারা ভয় করে ঈশ্বর তাদের সাথেই আছেন। (১২৪) আর যখন কোন অনুচ্ছেদ অবতীর্ণ হয় তখন তাদের মধ্যে কেউ কেউ বলে, এটা তোমাদের মধ্যে কার কার বিশ্বাস বৃদ্ধি করেছে? অতএব যারা সত্যে বিশ্বাস স্থাপনকারী এই অনুচ্ছেদ তাদের বিশ্বাস বৃদ্ধি করে আর তারা খুশী হয়। (১২৫) আর যাদের অন্তরে ব্যাধি আছে এই অনুচ্ছেদ তাদের পক্ষিলতার সাথে আরো পক্ষিলতা বৃদ্ধি করে। আর তারা আমৃত্যু অস্বীকারকারী হয়েই থাকে। (১২৬) তারা কি দেখেনা যে, তাদেরকে প্রতি বছর দু-একবার করে পরীক্ষায় ফেলা হয়, তারপরও তারা অনুশোচনা করে না বা শিক্ষা গ্রহণ করে না। (১২৭) আর যখনই কোন অনুচ্ছেদ অবতীর্ণ হয় তখন এরা একে অপরের দিকে তাকায় আর বলে - কেউ দেখছে না তো? তারপর চলে যায়। ঈশ্বর তাদের অন্তর সমূহ সত্য বিমুখ করে রেখেছেন, কারণ তারা হচ্ছে নির্বোধ জনগোষ্ঠী মাত্র।

(১২৮) তোমাদের কাছে তোমাদের মধ্য থেকেই একজন বার্তাবাহক এসেছে। তোমাদের ক্ষতি তার নিকট কষ্টপ্রদ। সে তোমাদের কল্যাণ চায় এবং আস্থাবানদের প্রতি অত্যন্ত স্নেহশীল ও দয়ালু। (১২৯) তথাপি যদি তারা মুখ ফিরিয়ে নেয় তবে তাদের বলবে যে, আমার জন্য ঈশ্বরই যথেষ্ট। তিনি ছাড়া কোন উপাস্য নেই। আমি তাঁরই উপর নির্ভর করি, আর তিনিই মহান আরশের (সিংহাসনের) মালিক।

^১ বিঃ দ্রঃ-(৯ঃ ১২৩) পরিচয় অংশে ১৩ থেকে ১৫ পৃষ্ঠা দ্রষ্টব্য।

অধ্যায় ১০ : ইউনুস (যোনাহ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ- লাম-রা, এগুলো প্রজ্ঞাপূর্ণ গ্রন্থের বাণী (২) মানুষের জন্য এটা কি বিস্ময়ের ব্যাপার যে, আমি তাদের মধ্যে থেকেই একজনের উপর প্রত্যাদেশ পাঠিয়েছি এই বলে যে, লোকদেরকে সতর্ক কর আর যারা বিশ্বাস করবে তাদেরকে সুসংবাদ দাও যে, তাদের জন্য তাদের প্রভুর কাছে উচ্চ মর্যাদা রয়েছে। অবজ্ঞাকারীরা বলতে লাগল এতো এক প্রকাশ্য জাদুকর।

(৩) নিঃসন্দেহে তোমাদের প্রভু তো সেই ঈশ্বর যিনি ছয় দিনে (সময়ে) আকাশ ও পৃথিবী সৃষ্টি করেছেন, তার পরে সিংহাসনে অধিষ্ঠিত হলেন। তিনিই সবকিছু পরিচালনা করেন। তাঁর বিনা অনুমতিতে কেউই সুপারিশকারী নেই। এই হচ্ছে তোমাদের প্রভু ঈশ্বর। অতএব তোমরা তাঁরই উপাসনা কর। তোমরা কি চিন্তা কর না? (৪) তাঁরই কাছে তোমাদের সকলের প্রত্যাবর্তন, ঈশ্বরের অঙ্গীকার সত্য। নিঃসন্দেহে তিনিই প্রথম সৃষ্টি করেন, অতঃপর তিনিই পুনর্বারও সৃষ্টি করবেন, যাতে যারা বিশ্বাস স্থাপন করেছে আর সংকর্ম করেছে তাদের ন্যায্য প্রতিফল দিতে পারেন। আর যারা অবজ্ঞা করেছে তাদের অবজ্ঞার বিনিময়ে তাদের জন্য ফুটন্ত জল আর যন্ত্রনাদায়ক শাস্তি রয়েছে।

(৫) তিনিই (ঈশ্বরই) প্রখর কিরণের জন্য সূর্য আর স্নিগ্ধ আলোর জন্য চন্দ্র সৃষ্টি করেছেন এবং এদের গন্তব্য নির্ধারিত করেছেন যাতে তোমরা বছরের গণনা ও হিসাব জানতে পার। ঈশ্বর কোন কিছুই উদ্দেশ্যহীন ভাবে তৈরী করেন নি, তিনি নিদর্শন সমূহ স্পষ্ট ভাবে বর্ণনা করেছেন তাদের জন্য যারা বুদ্ধিমান। (৬) নিশ্চয়ই রাত ও দিনের আবর্তনে, আকাশ ও পৃথিবীতে ঈশ্বর যা কিছু সৃষ্টি করেছেন তার মধ্যে ঈশ্বরভীরু মানুষদের জন্য নিদর্শন রয়েছে।

(৭) নিঃসন্দেহে যারা আমার সাথে সাক্ষাতের আশা রাখে না এবং পার্থিব জীবনেই সন্তুষ্ট এবং তাতেই প্রসন্ন রয়েছে, আর যারা আমার নিদর্শন সমূহ সম্পর্কে অসাবধান হয়ে আছে, (৮) তাদের কৃতকর্মের কারণেই তাদের ঠিকানা হবে নরকে। (৯) নিঃসন্দেহে যারা আস্থাবান হয়েছে আর সংকর্ম করেছে, ঈশ্বর তাদের আস্থার কারণে তাদেরকে স্বর্গে পৌঁছে দেবেন, শান্তির উদ্যানসমূহে তাদের (বাসস্থানের) তলদেশ দিয়ে নদী প্রবাহিত হবে। (১০) গভীর প্রসন্নতায় সেখানে তারা বলবে, ‘হে ঈশ্বর! তুমি পবিত্র!’ তাদের পারস্পারিক অভিবাদন হবে - ‘শান্তি’। তারা কথা শেষ করবে এই বলে - সকল প্রশংসা ঈশ্বরের, যিনি নিখিল জগতের প্রভু।

(১১) ঈশ্বর যেমন দ্রুত মানুষের কল্যাণ করেন, তেমন দ্রুত যদি তাদের অকল্যাণ করতেন, তাহলে অবশ্যই তাদের নির্ধারিত জীবনকাল ফুরিয়ে আসতো। যারা আমার সাথে সাক্ষাতের আশা রাখে না, তাদেরকে অবাধ্যতার মাঝে দিকভ্রান্ত হয়ে ঘোরার জন্য ছেড়ে দিই। (১২) আর মানুষ যখন দুঃখ ক্লেশে পড়ে তখন সে শুয়ে, বসে, দাঁড়িয়ে আমাকে ডাকে, তারপর আমি যখন তার দুঃখ ক্লেশ দূর করে দিই তখন সে এমন হয়ে যায় যেন সে কখনও তার দুঃখ ক্লেশের সময়ে আমাকে ডাকেইনি। এই সীমালঙ্ঘন কারীদের কার্যকলাপ তাদের কাছে এমনই চাকচিক্যময় মনে হয়।

১ বিঃ দ্রঃ (১০ঃ ৬, পৃষ্ঠা নং ২২৬) নভোমণ্ডল ও ভূমণ্ডলে অসংখ্য নিদর্শন আছে যা ঈশ্বরভীরু মানুষদের মনে গভীর উপলব্ধি সঞ্চার করে। ভয় বা চেতনা মানুষের মধ্যে ঐকান্তিকতা নিয়ে আসে। যদি মানুষ ঐকান্তিক না হয়, কোন গুরুত্বপূর্ণ বিষয়ে মনোযোগ দিতে পারে না এবং তাদের বিভিন্ন ক্ষেত্র সম্পর্কে বোধ জন্মায় না।

(১৩) আর আমি তোমাদের পূর্বের অনেক জাতিকে ধ্বংস করে দিয়েছি যখন তারা অন্যায় করেছিল। তাদের পয়গম্বরগণ তাদের কাছে স্পষ্ট প্রমাণাদী নিয়ে এসেছিল; কিন্তু তারা বিশ্বাস করতে প্রস্তুত ছিল না। এভাবেই আমি পাপীদেরকে শাস্তি দিয়ে থাকি। (১৪) অতঃপর আমি তোমাদেরকে ওদের পরে দেশের উত্তরাধিকারী বানিয়েছি যাতে আমি দেখি তোমরা কিভাবে কাজ কর।

(১৫) যখন তাদেরকে আমার স্পষ্টবাণী পড়ে শোনানো হয় তখন যাদের আমার কাছে আসার ভয় নেই তারা বলে তুমি এটা ছাড়া অন্য কোন কুরআন নিয়ে এস অথবা এটাকে পরিবর্তন কর। বল : আমি তো এটা নিজের ইচ্ছায় পরিবর্তন করতে পারি না। আমি তো কেবল এই প্রত্যাদেশের অনুসরণ করি যা আমার কাছে আসে। যদি আমি আমার প্রভুকে অবজ্ঞা করি তাহলে আমি এক ভয়ানক দিনের শাস্তির ভয় করছি। (১৬) বলঃ ঈশ্বর যদি ইচ্ছা করতেন তাহলে আমি এটা তোমাদের শুনাতাম না আর ঈশ্বরও এর দ্বারা তোমাদের সাবধান করতেন না। এর পূর্বেও আমি তোমাদের মধ্যে এক দীর্ঘ সময় অতিবাহিত করেছি। তোমরা কি তবুও বুঝতে পারনা? (১৭) তার চেয়ে বড় যুলুমকারী আর কে হতে পারে যে ঈশ্বরের উপর মিথ্যা আরোপ করে অথবা তাঁর নিদর্শন সমূহ মিথ্যা মনে করে। নিশ্চিত ভাবে অত্যাচারীদের কোন কল্যাণ হয় না।

(১৮) তারা ঈশ্বর ছাড়া এমন কিছুর উপাসনা করে যা তাদের না ক্ষতি করতে পারে না উপকার, আর তারা বলে যে, এরা ঈশ্বরের কাছে আমাদের সুপারিশকারী। তোমরা কি ঈশ্বরকে এমন কিছু জানাতে চাইছো যা আকাশ ও পৃথিবীতে আছে অথচ তিনি জানেন না। তিনি পবিত্র মহান, তারা যে অংশীদার স্থাপন করে, তার থেকে তিনি অনেক উর্দে। (১৯) সব

মানুষতো একই সম্প্রদায় ছিল, পরে তারা মতভেদ করে; যদি তোমার প্রভুর পক্ষ থেকে একটি কথা আগেই নির্ধারিত না থাকত তাহলে যা নিয়ে তারা মতভেদ করছে তাদের মধ্যে তা মীমাংসা করে দেওয়া হত।

(২০) আর তারা বলে যে, পয়গম্বরের কাছে তাঁর প্রভুর পক্ষ থেকে কোন নিদর্শন কেন আসেনি? বলঃ অদৃশ্য বিষয় কেবল ঈশ্বরেরই কাছে থাকে, সুতরাং প্রতীক্ষা কর, আমিও তোমাদের সাথে প্রতীক্ষায় রইলাম। (২১) কষ্ট ভোগের পর মানুষকে আমি যখন অনুগ্রহের আশ্বাদন করাই, তখনই আমার নিদর্শন সমূহ নিয়ে তারা দূরভিসন্ধি করে। বলঃ ঈশ্বর সবচেয়ে দ্রুত কৌশল গ্রহণ করতে পারেন। নিশ্চয়ই আমার দেবদূতগণ তোমাদের দূরভিসন্ধি গুলি লিপিবদ্ধ করছে।

(২২) তিনিই ঈশ্বর যিনি তোমাদেরকে জলে ও স্থলে চলাচল করান। এমনকি তোমরা যখন নৌযানে থাক আর নাবিকরা আরোহীদের নিয়ে অনুকূল বাতাসে চলে আবার যখন চারদিক দিয়ে উত্তাল তরঙ্গ আছড়ে পড়তে থাকে আর তারা মনে করে তারা এর মধ্যে পরিবেষ্টিত হয়ে গেছে, তখন তারা খুব নিষ্ঠার সাথে ঈশ্বরকে ডাকতে থাকে আর বলে - যদি তুমি আমাদেরকে এথেকে উদ্ধার কর আমরা নিশ্চিতরূপে কৃতজ্ঞতা প্রকাশকারী বান্দা হব। (২৩) অতঃপর তিনি যখন তাদের উদ্ধার করেন তৎক্ষণাৎ তারা অন্যায়ভাবে বিদ্রোহ করতে থাকে। হে মানুষ! তোমাদের বিদ্রোহ তোমাদের নিজেরই বিরুদ্ধে যাবে, বর্তমান জীবনে ভোগ করে নাও, আবার তোমাদের আমার কাছে ফিরে আসতে হবে। তখন আমি তোমাদের বলবো যা কিছু তোমরা করছিলে।

(২৪) পার্থিব জীবনের উদাহরণ এরকম যেমন আমি আকাশ থেকে বৃষ্টি বর্ষণ করলাম তবেই পৃথিবীতে ভরপুর বনস্পতি জন্মাল যা থেকে মানুষ ও

পশু আহার করে থাকে। অবশেষে ভূমি যখন শোভিত আর সুসজ্জিত হল তখন এর অধিবাসীরা মনে করল এখন এ আমাদের নিয়ন্ত্রণে তখন হঠাৎই সেখানে দিনে বা রাতে আমার নির্দেশ পৌঁছে গেল, আর আমি ওটাকে ফসল কাটা জমির মত করে দিলাম। যেন গতকাল ওখানে কিছুই ছিল না। এভাবেই আমি নিদর্শন গুলি স্পষ্টরূপে বর্ণনা করে থাকি ঐ লোকদের জন্য যারা চিন্তাশীল।

(২৫) আর ঈশ্বর শান্তির নিবাসের দিকে ডাকেন আর তিনি যাকে ইচ্ছা সঠিক পথে পরিচালিত করেন। (২৬) যারা ভাল কাজ করে তাদের জন্য রয়েছে কল্যাণ এবং আরো অতিরিক্ত পুরস্কার। কোন কালিমা বা লাঞ্ছনা তাদের চেহারা আচ্ছন্ন করে না। এরাই স্বর্গের অধিবাসী তারা সেখানে চিরকাল থাকবে। (২৭) আর যারা খারাপ কাজ করে তারা খারাপ কাজের অনুরূপ প্রতিফলই পাবে তারা অপমানে আচ্ছন্ন হয়ে থাকবে। ঈশ্বরের (শাস্তি) থেকে তাদের কোন রক্ষাকারী নেই। তাদের চেহারা যেন অন্ধকার রাতের টুকরো দিয়ে আচ্ছন্ন করা হয়েছে। এরাই নরকের অধিবাসী এরা সেখানে চিরকাল থাকবে।

(২৮) আর যে দিন আমি ওদের সবাইকে একত্রিত করবো, তারপর বহুশ্বরবাদীদের বলবো, তোমরা ও তোমাদের অংশীদাররা তোমাদের জায়গায় দাঁড়িয়ে থাকো, তারপর আমি তাদেরকে পৃথক করে দেব আর তাদের অংশীদাররা বলবে, তোমরা তো আমাদের উপাসনা করতে না। (২৯) ঈশ্বরই আমাদের ও তোমাদের মধ্যে সাক্ষী হিসেবে যথেষ্ট। তোমাদের উপাসনা সম্পর্কে আমরা তো কিছুই জানতাম না। (৩০) ঐ সময় প্রত্যেকে তাদের সেই কর্মের মুখোমুখী হবে যা তারা পূর্বে করেছিল। আর তাদেরকে তাদের প্রকৃত প্রভুর কাছে ফিরিয়ে নেওয়া হবে। আর তারা যে মিথ্যা উদ্ভাবন করেছিল তা তাদের থেকে উধাও হয়ে যাবে।

(৩১) বলঃ কে তোমাদের আকাশ ও পৃথিবীতে জীবিকা প্রদান করে অথবা কে আছে যিনি কান ও চোখের উপর নিয়ন্ত্রণ রাখে। আর কে প্রাণহীন থেকে প্রাণ আর প্রাণ থেকে প্রাণহীনকে বাহির করে, আর কে সবকিছু সম্পন্ন করে? তারা বলবে ঈশ্বর। বলঃ তবুও কি তোমরা ঈশ্বরকে ভয় করবে না? (৩২) অতএব তিনিই হলেন ঈশ্বর যিনি তোমাদের প্রকৃত প্রভু। অতএব সত্যের পরে বিভ্রান্তি ছাড়া আর কি থাকতে পারে? অতএব তোমরা কিভাবে বিচ্যুত হচ্ছে? (৩৩) এভাবে আবাদ্য লোকদের সম্পর্কে তোমার প্রভুর কথা সত্য বলে প্রমাণিত হল - তারা বিশ্বাস স্থাপন করবে না।

(৩৪) বলঃ তোমাদের অংশীদারদের মধ্যে এমন কেউ আছে কি যে সৃষ্টির সূচনা ও তার পুনরাবৃত্তি করে? বলঃ ঈশ্বরই সৃষ্টির সূচনা ও তার পুনরাবৃত্তি করেন। অতএব তোমরা কিভাবে বিচ্যুত হচ্ছে? (৩৫) বলঃ তোমাদের অংশীদারদের মধ্যে এমন কেউ আছে কি যে সত্যের পথ দেখায়? বলঃ ঈশ্বরই সত্যের পথ দেখান। অতএব যিনি সত্যের পথ দেখান তিনি অনুসরণযোগ্য, না কি পথ না দেখালে যে নিজেরই পথ খুঁজে পায় না, সে অনুসরণযোগ্য? তবে তোমাদের কি হয়েছে? তোমরা কিভাবে নির্ণয় কর? (৩৬) তাদের অধিকাংশই কেবল অনুমানের উপর চলে, আর অনুমান সত্যের সন্মুখে ফলপ্রসূ হয় না। আর ঈশ্বর ভালই জানেন তারা যা করে।

(৩৭) এই কুরআন ঈশ্বর ব্যতীত অন্য কারো দ্বারা রচিত হতে পারে এমন নয়, বরং ইহা পূর্ববর্তীতে অবতীর্ণ গ্রন্থসমূহের সত্যায়নকারী এবং বিস্তারিত ব্যাখ্যা সমন্বিত গ্রন্থ। এর মধ্যে কোন সন্দেহ নেই এবং ইহা বিশ্ব নিখিলের প্রভুর পক্ষ থেকে আগত (৩৮) তারা কি এরূপ বলে যে, 'এটা তার সুরচিত?' বলঃ তোমরাও এর মত কোন অনুচ্ছেদ বানিয়ে আনো, আর ঈশ্বর ছাড়া যাকে পার ডাক, যদি তোমরা সঠিক হও।

(৩৯) বরং এমন জিনিষকে তারা মিথ্যা বলে অভিহিত করেছে যা তাদের জ্ঞানের পরিধিতে আসেনা এবং যার বাস্তবিকতা এখনও তাদের কাছে স্পষ্ট হয় নি। এমনভাবে ওদের পূর্ববতীরাও মিথ্যা বলে অভিহিত করেছিল। অতএব দেখ, যুলুমকারীদের কি পরিণতি হয়েছিল।

(৪০) আর তাদের মধ্যে কিছু সংখ্যক (কুরআনের প্রতি) বিশ্বাস স্থাপন করবে, আর কিছু সংখ্যক বিশ্বাস স্থাপন করবে না। আর তোমার প্রভু অনর্থ সৃষ্টিকারীদের ভালভাবেই জানেন। (৪১) আর তারা যদি তোমাকে মিথ্যাবাদী বলে তাহলে তুমি বলবে “আমার কাজের দায় আমার এবং তোমাদের কাজের দায় তোমাদের। আমি যা করি তা থেকে তোমরা দায়মুক্ত আর তোমরা যা কর তা থেকে আমি দায়মুক্ত”। (৪২) আর তাদের কিছু সংখ্যক তোমার কথা শ্রবণ করার ভান করে, তাহলে তুমি কি বধিরদেরকে শোনাতে যদি তাদের বোধ শক্তি না থাকে? (৪৩) আর ওদের অনেকে তোমার দিকে তাকায়; কিন্তু তারা না দেখলে তুমি কি অন্ধদের পথ দেখাতে পার? (৪৪) ঈশ্বর মানুষের উপর আদৌ অত্যাচার করেন না; কিন্তু মানুষ নিজেই নিজের উপর অত্যাচার করে।

(৪৫) আর যে দিন ঈশ্বর এদের একত্রিত করবেন সেদিন মনে হবে জগতে তাদের অবস্থান ছিল দিনের কিছুটা সময় মাত্র। তারা একে অপরকে চিনতে পারবে। আর যারা ঈশ্বরের সাথে সাক্ষাৎ হওয়াকে অবিশ্বাস করেছিল এবং যারা পথভ্রষ্ট ছিল তারা অবশ্যই ক্ষতিগ্রস্ত হবে। (৪৬) আর আমি তাদেরকে যে প্রতিশ্রুতি করেছি তোমাকে তার কিছুটা দেখাই কিংবা তোমার মৃত্যু ঘটাই, প্রত্যেক পরিস্থিতিতেই তাদেরকে আমার কাছে ফিরতেই হবে। আর তারা যা করেছে ঈশ্বর সাক্ষী থাকছেন। (৪৭) আর প্রত্যেক উন্মত্তের (সম্প্রদায়) জন্য একজন বার্তাবহ থাকে। যখন তাদের বার্তাবহ আসে তখন তাদের মধ্যে সবকিছু ন্যায়ে সাথে নিষ্পন্ন করে দেওয়া হয় আর তাদের

উপর কোন অত্যাচার হয় না।

(৪৮) আর তারা বলে যে, ঐ প্রতিশ্রুতি কবে পূরণ হবে? যদি তোমরা সত্যবাদী হও। (৪৯) বলঃ ঈশ্বরের ইচ্ছা ছাড়া আমি তো আমার নিজেরও কোন ক্ষতি কিংবা উপকার করতে পারি না। প্রত্যেক সম্প্রদায়ের একটি নির্ধারিত সময় আছে। যখন তাদের সময় উপস্থিত হয় তখন তারা তা এক মুহূর্তও বিলম্বিত কিংবা দ্রুততর করতে পারে না। (৫০) তুমি বলঃ যদি তোমাদের উপর তাঁর শাস্তি রাতের অন্ধকারে কিংবা দিনের আলোয় এসে পড়ে তবে এর আগে অপরাধীরা কি করে নেবে? (৫১) অতঃপর শাস্তি যখন এসেই পড়বে তখন তোমরা তা বিশ্বাস করবে? এখন স্বীকার করছো, আর তোমরা তো এটাই চাইছিলে। (৫২) তারপর অত্যাচারীদের বলা হবে, চিরন্তন শাস্তি আশ্বাদন কর। এটা তোমাদের কৃতকর্মের ফল।

(৫৩) আর তারা তোমার কাছে জানতে চায় যে, একথা কি সত্য? বলঃ হ্যাঁ, আমার প্রভুর শপথ এ সত্য আর তোমরা তাঁর নাগালের বাইরে যেতে পারবে না। (৫৪) আর যদি প্রত্যেক যুলুমকারী এই ভূমণ্ডলে যা কিছু আছে তার মালিক হতো তাহলে তারা যখন নিজেদের শাস্তি অবলোকন করতো তখন তারা ঐ সমস্ত কিছু মুক্তিপণ হিসাবে উপস্থাপন করত। কিন্তু বিচার ন্যায্য ভাবে নিষ্পন্ন করা হবে। তাদের প্রতি কোন প্রকার অবিচার করা হবে না। (৫৫) জেনে রেখো, আকাশ ও পৃথিবীতে যা কিছু আছে সবই ঈশ্বরের, জেনে রেখো, নিশ্চয়ই ঈশ্বরের প্রতিশ্রুতি সত্য তবে অধিকাংশই তা জানে না। (৫৬) তিনিই জীবন দান করেন তিনিই মৃত্যু ঘটান আর তাঁর কাছেই তোমাদের ফিরিয়ে নেওয়া হবে।

(৫৭) হে মানুষ! তোমাদের কাছে তোমাদের প্রভুর পক্ষ থেকে উপদেশ এসে গেছে যা অন্তরের ব্যাধি নিরাময় করে এবং বিশ্বাসীদের পথ নির্দেশ ও অনুগ্রহ দান করে।

(৫৮) বলঃ এটা ঈশ্বরের দয়া ও অনুগ্রহ, অতএব তারা যেন এতে প্রসন্ন হয়। তারা যা সঞ্চয় করেছে তার চেয়ে তা উত্তম। (৫৯) বলঃ আমাকে বলো তো, ঈশ্বর তোমাদের জন্য যে জীবিকা দান করেছেন তোমরা নিজেরাই তার মধ্যে কিছু অবৈধ আর কিছু বৈধ সাব্যস্ত করেছে। বলঃ ঈশ্বর কি তোমাদের অনুমতি দিয়েছেন? না কি তোমরা ঈশ্বরের উপর মিথ্যা আরোপ করছো? (৬০) আর মহাপ্রলয় দিন সম্পর্কে তাদের ধারণা কি যারা ঈশ্বরের উপর মিথ্যা আরোপ করেছে? নিঃসন্দেহে ঈশ্বর মানুষের প্রতি খুবই কৃপাশীল; কিন্তু বেশীর ভাগ লোক কৃতজ্ঞতা প্রকাশ করে না।

(৬১) আর তুমি যে অবস্থায়ই থাকো কিংবা কুরআনের যে অংশ থেকেই পাঠ কর আর তোমরা যা কিছুই কর, আমি তোমাদের উপর সাক্ষী থাকি যখন তোমরা ওতে মগ্ন হও। আর তোমার প্রভুর অনুপরিমাণ জিনিষও অগোচর নয়, না আকাশে আর না পৃথিবীতে, এর থেকেও ছোট কিংবা বড় সব জিনিষই এক স্পষ্ট পুস্তকে লিপিবদ্ধ আছে। (৬২) শোন, ঈশ্বরের বন্ধুদের জন্য কোন ভয় নেই আর তারা দুঃখিতও হবে না। (৬৩) এরা সেই লোক যারা বিশ্বাস স্থাপন করেছে এবং তাঁকে ভয় করে থাকে। (৬৪) ওদের জন্য সুসংবাদ পার্থিব জীবনে আর পরলোকেও। ঈশ্বরের কথার কোন নড়চড় হয় না। এটাই বড় সাফল্য। (৬৫) তাদের কথায় তুমি কোন চিন্তা করো না। আসলে সকল প্রভুত্ব ঈশ্বরের জন্য, তিনি সবকিছু শোনেন সবকিছু জানেন।

(৬৬) শোনঃ আকাশ ও পৃথিবীতে যা কিছু আছে সবই ঈশ্বরের। আর যারা ঈশ্বর ব্যতীত অন্য কিছুকে অংশীদার রূপে ডাকে তারা কিসের অনুসরণ করে? তারা কেবল কল্পনার অনুসরণ করেছে, আর তারা কেবল মিথ্যা বানিয়ে বলে। (৬৭) তিনিই ঈশ্বর যিনি তোমাদের জন্য রাত বানিয়েছেন যাতে তোমরা শান্তি পao। আর দিনকে আলোকময় বানিয়েছেন। নিঃসন্দেহে এতে নিদর্শন আছে ঐ লোকদের জন্য যারা শুনতে পায়।

(৬৮) তারা বলে - ঈশ্বর সন্তান গ্রহণ করেছেন, তিনি নিতান্তই পবিত্র! আকাশ ও পৃথিবীর সবকিছুই তাঁর। তোমাদের কাছে এর কোন প্রমাণ নেই। তোমরা কি ঈশ্বর সম্পর্কে যা জানো না তাই বলছ? (৬৯) বলঃ যারা ঈশ্বর সম্পর্কে মিথ্যা বানিয়ে বলে তারা কখনও সফল হবে না। (৭০) ওদের জন্য পার্থিব জীবনে ক্ষনিকের ভোগবিলাস। তারপর আমার কাছেই ওদের ফিরতে হবে। তখন আমি ওদেরকে এই অবজ্ঞার কারণে কঠোর শাস্তি আশ্বাদন করাব।

(৭১) আর এদেরকে নূহের বৃত্তান্ত শোনাও। যখন সে তার নিজের সম্প্রদায়কে বললঃ হে আমার সম্প্রদায়! যদি তোমাদের মাঝে আমার উপস্থিতি আর ঈশ্বরের বাণী সমূহ (শ্রুতি) দ্বারা উপদেশ দেওয়া তোমাদের কাছে কষ্টকর হয়ে থাকে তাহলে আমি ঈশ্বরের উপরেই নির্ভর করলাম। তোমরা সর্বসম্মত ভাবে সিদ্ধান্ত কর আর তোমাদের অংশীদারদেরও সঙ্গে নিয়ে নাও, যাতে তোমাদের সিদ্ধান্তে সন্দেহের কোন অবকাশ না থাকে। তারপর তোমরা আমার সাথে যা করতে চাও করে ফেল, আমাকে কোন অবকাশ দিওনা। (৭২) আর যদি তোমরা মুখ ফিরিয়ে নাও তাহলে মনে রেখো, আমি তোমাদের কাছে কোন বিনিময় চাই না। আমার বিনিময় তো ঈশ্বরের কাছে। আর আমাকে নির্দেশ দেওয়া হয়েছে যে, আমি যেন তাঁর অনুগত হই। (৭৩) অতঃপর তারা তাকে অবিশ্বাস করলো। তখন আমি নূহ (নোয়াহ) ও তার সঙ্গে নৌকায় যারা ছিল তাদেরকে উদ্ধার করি এবং উত্তরাধিকারী বানাই। আর যারা আমার নিদর্শনগুলো অবিশ্বাস করেছিল তাদেরকে নিমজ্জিত করি। সুতরাং লক্ষ্য কর; যাদেরকে সতর্ক করা হয়েছিল তাদের কেমন পরিণতি হয়েছিল।

(৭৪) তারপর আমি নূহের (নোয়াহ) পরে কত বার্তাবহ পাঠিয়েছি, ওদের সম্প্রদায়ের কাছে। তারা ওদের কাছে স্পষ্ট প্রমাণ নিয়ে এসেছে; কিন্তু তারা তাদের উপর বিশ্বাস স্থাপন করে নি, কারণ তারা পূর্বেই তাদেরকে অবিশ্বাস করেছিল। এভাবেই আমি সীমা লঙ্ঘনকারীদের অন্তরসমূহ মোহর করে দিই।

(৭৫) তারপর আমি মূসা (মোজেস) ও হারুনকে (অ্যারনকে) ফারাও ও তার প্রধানদের নিকটে আপন নিদর্শন সহ পাঠিয়েছি; কিন্তু তারা উদ্ধত আচরণ করে, আর তারা ছিল অপরাধী লোক।। (৭৬) যখন ওদের কাছে আমার পক্ষ হতে সত্য এল তখন তারা বললঃ এতো প্রকাশ্য জাদু। (৭৭) মূসা (মোজেস) বললঃ তোমরা কি সত্যকে জাদু বলছ? যখন তা তোমাদের কাছে এসে গেছে। এটা কি জাদু? জাদুকরেরা তো কখনও সফল হয় না। (৭৮) তারা বললঃ তুমি কি আমাদের কাছে এজন্য এসেছ যে, আমরা আমাদের পূর্বপুরুষদেরকে যে বিশ্বাসের উপর প্রতিষ্ঠিত দেখেছি তা থেকে আমাদেরকে ফিরিয়ে আনবে এবং এই দেশে তোমাদের দুজনের শ্রেষ্ঠত্ব স্থাপিত হবে? আমরা কখনই তোমাদের দুজনের কথা মানব না।

(৭৯) আর ফারাও বললঃ তোমরা প্রত্যেক বিজ্ঞ জাদুকরকে আমার কাছে নিয়ে এস। (৮০) জাদুকরগণ যখন এল তখন মূসা (মোজেস) বললঃ তোমরা যা নিক্ষেপ করতে চাও নিক্ষেপ কর। (৮১) অতঃপর যখন তারা নিক্ষেপ করল তখন মূসা (মোজেস) বললঃ তোমরা যা এনেছ তা জাদু। অচিরেই ঈশ্বর তা নস্যাত (খণ্ডন) করে দেবেন। ঈশ্বরতো নিশ্চিতরূপে উপদ্রবকারীদের কর্ম শোধরাতে দেন না। (৮২) আর ঈশ্বর নিজ নির্দেশে সত্যকে প্রতিষ্ঠিত করে দেখান, অপরাধীদের কাছে তা যতই অপ্রিয় হোক না কেন।

(৮৩) অতঃপর মুসাকে (মোজেসকে) তার সম্প্রদায়ের কিছু যুবক ছাড়া অন্য কেউ মানল না। ফ্যারাও ও তার দলের পাণ্ডাদের ভয়ে, পাছে তাদের কোন কঠিন পরীক্ষায় ফেলে দেওয়া হয়। নিঃসন্দেহে ফ্যারাও পৃথিবীতে এক প্রতাপশালী ব্যক্তি আর সে ছিল সীমালঙ্ঘনকারীদের একজন। (৮৪) আর মুসা বললঃ হে আমার সম্প্রদায়! যদি তোমরা ঈশ্বরের প্রতি বিশ্বাস রাখো তাহলে তাঁর উপরেই ভরসা কর, যদি বাস্তবিক তোমরা আত্মসমর্পণকারী হও। (৮৫) তারা বললঃ আমরা ঈশ্বরের উপর ভরসা করলাম। হে আমাদের প্রভু! আমাদেরকে অত্যাচারী লোকদের শিকার বানিওনা। (৮৬) এবং তোমার কৃপায় আমাদেরকে অবিশ্বাসী লোকদের হাত থেকে রক্ষা কর।

(৮৭) আর আমি মুসা (মোজেস) ও তার ভাই এর কাছে নির্দেশ পাঠাই, তোমরা তোমাদের লোকদের জন্য মিশরে কিছু ঘর বাড়ীর ব্যবস্থা কর, তোমাদের ঘরগুলি উপসনালয় বানাও আর প্রার্থনা প্রতিষ্ঠা কর। আর আস্থাবানদের সুসংবাদ দাও।

(৮৮) আর মুসা (মোজেস) বললঃ হে আমাদের প্রভু! তুমি তো ফ্যারাও ও তার পাণ্ডাদের পার্থিব জীবনে জাঁকজমক ও ধনসম্পদ দিয়েছ। হে আমাদের প্রভু! এজন্যে তারা তোমার পথ থেকে মানুষকে বিভ্রান্ত করবে। হে আমাদের প্রভু! ওদের ধনসম্পদ ধ্বংস করে দাও এবং ওদের অন্তর কঠোর করে দাও যাতে তারা কষ্টদায়ক শাস্তি না দেখা পর্যন্ত বিশ্বাস স্থাপন না করে। (৮৯) ঈশ্বর বললেন, তোমাদের দুজনের প্রার্থনা গ্রহন করা হল। এখন তোমরা দুজন ধৈর্য ধর আর ওদের পথ অনুসরণ করো না যাদের জ্ঞান নেই।

(৯০) আর আমি ইসরাইলের সন্তানদের সমুদ্র পার করে দিলাম। তখন ফ্যারাও ও তার সৈন্যরা তাদের ধাওয়া করল, বিদ্রোহ ও অত্যাচার করার উদ্দেশ্যে। অবশেষে ফ্যারাও যখন ডুবতে থাকল তখন সে বললঃ

আমি বিশ্বাস স্থাপন করেছি, যাঁর প্রতি ইসরাইলের সন্তানরা বিশ্বাস স্থাপন করেছে, তিনি ছাড়া কোন উপাস্য নেই। আর আমি বিশ্বাসীদেরই একজন। (৯১) এখন? অথচ পূর্বে তুমি বিরুদ্ধাচারণ করছিলে আর তুমি ছিলে অনর্থ সৃষ্টিকারী। (৯২) আজ আমি তোমার দেহটি রক্ষা করবো যাতে তুমি তোমার পরবর্তীদের জন্য একটি নিদর্শন হয়ে থাক, আর অনেক মানুষই আমার নিদর্শন সম্পর্কে উদাসীন রয়েছে।

(৯৩) আর আমি ইসরাইলের সন্তানদের ভাল ঠিকানা দিলাম, তাদের আহ্বার করার জন্য উৎকৃষ্ট বস্তু দিলাম; অতঃপর তারা মতভেদ করল ঐ সময় যখন তাদের কাছে জ্ঞান এসে পৌঁছে গেছে। বাস্তবে তোমার প্রভু পুনরুত্থানের দিনে ওদের মধ্যে মীমাংসা করে দেবেন যা নিয়ে তারা মতভেদ করছিল।

(৯৪) আমি তোমার কাছে যা অবতীর্ণ করেছি সে সম্পর্কে তোমার মনে যদি কোন সন্দেহ থাকে তাহলে ওদের জিজ্ঞাসা কর যারা তোমাদের পূর্বে এই গ্রন্থ পাঠ করেছে। নিঃসন্দেহে তোমার উপর এই সত্য এসেছে তোমার প্রভুর পক্ষ থেকে অতএব তুমি কিছুতেই সন্দিহান হয়ো না। (৯৫) আর তোমরা ওদের সাথে সম্মিলিত হয়ো না যারা ঈশ্বরের নিদর্শন সমূহে অবিশ্বাস করেছে, তাহলে তোমরা ক্ষতিগ্রস্ত হয়ে পড়বে।

(৯৬) নিঃসন্দেহে যাদের উপরে তোমার প্রভুর কথা চূড়ান্ত হয়ে গেছে, তারা বিশ্বাস স্থাপন করবে না। (৯৭) তাদের কাছে সব নিদর্শন এলেও যতক্ষণ না তারা কষ্টদায়ক শাস্তি চান্সুস দেখবে। (৯৮) ইউনুসের (যোনাহর) সম্প্রদায় ছাড়া আর কোন জনপদের দৃষ্টান্ত আছে কি যারা বিশ্বাস স্থাপন করল এবং তাদের বিশ্বাস তাদের উপকারে এল? যখন তারা বিশ্বাস স্থাপন করলো তখন আমি পার্থিব জীবনে তাদের থেকে লাঞ্ছনার শাস্তি তুলে নিলাম এবং একটি নির্দিষ্ট সময় পর্যন্ত তাদেরকে সুখভোগ করতে দিলাম।

(৯৯) যদি তোমার প্রভু চাইতেন তাহলে পৃথিবীতে যত লোক আছে সবাই বিশ্বাস স্থাপন করতো। তুমি কি লোকদের বাধ্য করবে আস্থাবান হয়ে যেতে? (১০০) আর ঈশ্বরের অনুমতি ছাড়া কোন ব্যক্তির পক্ষে বিশ্বাস স্থাপন করা অসম্ভব; আর ঈশ্বর ঐ লোকদের প্রতি অপবিত্রতা নিক্ষেপ করেন যারা বুদ্ধি দ্বারা কাজ করে না।

(১০১) বলঃ আকাশ ও পৃথিবীতে যা কিছু আছে তা দেখ। তবে নিদর্শন সমূহ ও ভীতি প্রদর্শন অবিশ্বাসীদের কোন উপকারে আসে না। (১০২) তারা তো কেবল এমন (শাস্তির) দিনের প্রতীক্ষা করছে যেমন দিন ওদের পূর্ববর্তী লোকদের সামনে এসেছে। বলঃ প্রতীক্ষা কর, আমিও তোমাদের সাথে প্রতীক্ষা করছি। (১০৩) তবে আমি আমার পয়গম্বরদের রক্ষা করি আর ঐ লোকদের যারা আস্থাবান। এভাবেই আমি এটাকে আপন দ্বায়িত্ব হিসাবেই নিয়েছি যে, আমি আস্থাবানদের রক্ষা করবো।

(১০৪) বলঃ হে লোক সকল! যদি আমার ধর্ম সম্বন্ধে তোমাদের কোন সন্দেহ থাকে, তাহলে (জেনে রাখো) আমি তাদের উপাসনা করি না যাদের উপাসনা তোমরা কর। বরং আমি সেই ঈশ্বরের উপাসনা করি যিনি তোমাদের মৃত্যু ঘটান। আর আমাকে নির্দেশ দেওয়া হয়েছে আস্থাবান হতে। (১০৫) তোমার মুখমণ্ডল একাগ্র চিত্তে সত্য বিশ্বাসের দিকে নিবিষ্ট কর আর অংশীবাদীদের দলভুক্ত হয়ো না। (১০৬) আর ঈশ্বর ছাড়া এমন কিছুকে ডেকো না যা তোমার কোন উপকার বা ক্ষতি করতে পারে না। তবে যদি তুমি এমন কর তাহলে নিশ্চয়ই তুমি অত্যাচারীদের দলভুক্ত হয়ে যাবে। (১০৭) ঈশ্বর যদি তোমাকে কোন কষ্টে ফেলেন তাহলে তিনি ছাড়া কেউ তা দূর করতে পারে না। আর যদি তিনি তোমার কোন ভাল করতে চান তাহলে তাঁর অনুগ্রহ কেউ ঠেকাতে পারে

না। তিনি নিজ অনুগ্রহ তাঁর বান্দাদের যাকে ইচ্ছা প্রদান করেন, তিনি ক্ষমাশীল, দয়াবান।

(১০৮) বলঃ হে মানুষ! তোমাদের প্রভুর পক্ষ থেকে তোমাদের কাছে সত্য এসে গেছে। এখন যে সঠিক পথে চলবে, সে তার নিজের জন্যেই চলবে আর যে বিপথগামী হবে সে তার নিজেরই ক্ষতি করবে। আর আমাকে তোমাদের উপর দায়বদ্ধ করা হয় নি। (১০৯) তোমার প্রতি যে নির্দেশ পাঠানো হয় তুমি তার অনুসরণ কর এবং ধৈর্য ধারণ কর ঈশ্বরের বিচার না আসা পর্যন্ত আর তিনিই সর্বোত্তম বিচারক।

অধ্যায় ১১ : হুদ (হুদ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-রা। এটি এমন একটি গ্রন্থ যার বাণী সমূহ (প্রকৃতিগত ভাবে) মৌলিক। অতঃপর এক প্রজ্ঞাময় এবং সবিশেষ অবহিত সত্ত্বার পক্ষ থেকে সবিস্তারে বর্ণিত হয়েছে। (২) যাতে তোমরা ঈশ্বর ছাড়া অন্য কারো উপাসনা না কর। আমি তাঁর পক্ষ থেকে তোমাদের সতর্ককারী এবং সুসংবাদদাতা। (৩) আর তোমরা তোমাদের প্রভুর কাছে ক্ষমা প্রার্থনা কর ও তাঁর দিকে ফিরে এস, তিনি তোমাদেরকে এক নির্দিষ্ট সময় পর্যন্ত সুন্দর জীবনযাপন করাবেন এবং প্রত্যেক মর্যাদাবানকে তার যথার্থ মর্যাদা প্রদান করবেন। আর যদি তোমরা মুখ ফিরিয়ে নাও তাহলে অবশ্যই আমি তোমাদের জন্য এক ভয়ানক দিনের শাস্তির আশংকা করি। (৪) তোমাদের সবাইকে ঈশ্বরের কাছে প্রত্যাবর্তন করতে হবে। আর তিনি সব কিছু করতে সক্ষম।

(৫) লক্ষ্য কর - কিভাবে তারা নিজেদের (অভিপ্রায়) গোপন করার জন্য নিজেদেরকে আবৃত করে। সচেতন থাকো, তারা যখন বস্ত্রাবৃত হয়

তখন তারা যা গোপন করে আর যা প্রকাশ করে তা সব ঈশ্বর জানেন। তিনি অন্তরের গোপন বিষয়ও ভালভাবে অবগত রয়েছেন। (৬) পৃথিবীতে চলমান সকল প্রাণীর জীবিকার দ্বায়িত্ব ঈশ্বরের। তিনি তাদের অবস্থানস্থল ও সংরক্ষনস্থল জানেন। সবকিছুই এক স্পষ্ট গ্রন্থে লিপিবদ্ধ আছে।

(৭) আর তিনিই সেই সত্ত্বা যিনি ছয় দিনে (সময়ে) আকাশ ও পৃথিবী সৃষ্টি করেছেন, আর তখন তাঁর সিংহাসন ছিল জলের উপরে, যাতে তোমাদের মধ্যে কাজে কে শ্রেষ্ঠ তিনি তা পরীক্ষা করতে পারেন। আর তুমি যদি বল “মৃত্যুর পর তোমাদিগকে উঠানো হবে” তাহলে অবিশ্বাসীরা বলবে এটা তো স্পষ্ট জাদু ছাড়া আর কিছু নয়। (৮) আর যদি আমি কিছু সময় পর্যন্ত তাদের শাস্তি স্থগিত রাখি তাহলে বলবে, শাস্তিটা আটকে রাখছে কিসে? সচেতন থাক, যে দিন ওটা এসে পড়বে সেদিন তাদের থেকে আর ফিরিয়ে নেওয়া হবে না আর যে জিনিষ নিয়ে তারা উপহাস করছিল তা তাদেরকে ঘিরে ধরবে।

(৯) আর যদি আমি মানুষকে নিজ অনুগ্রহের স্বাদ গ্রহণ করাই এবং পরে তা প্রত্যাহার করে নিই তাহলে সে হতাশ ও অকৃতজ্ঞ হয়ে যায়। (১০) আর যদি দুঃখ কষ্ট স্পর্শ করার পর তাকে আমি সুখ আশ্বাদন করাই তাহলে সে বলে আমার দুরাবস্থা কেটে গেছে তখন সে খুব খুশী ও অহংকারী হয়। (১১) তবে যারা ধৈর্য ধারণ ও সৎকাজ করে তাদের জন্য রয়েছে ক্ষমা আর অসামান্য পুরস্কার।

(১২) তোমার কাছে যা প্রকাশিত হয়েছে তার কিয়দাংশ বর্জন করার মনোবৃত্তি তোমার মধ্যে জাগ্রত হতে পারে এবং তোমার মনোঃপীড়া আসতে পারে, কারণ তারা বলে - কেন তার উপর কোন ধনভাণ্ডার অবতীর্ণ হয় নি? অথবা কেন তার সাথে কোন দেবদূত আসে নি? তুমি তো কেবল

একজন সতর্ককারী আর সবকিছুর দায়ভার তো ঈশ্বরের। (১৩) তবে তারা কি বলে যে, বার্তাবাহক এই গ্রন্থ নিজে বানিয়েছে? বলঃ তোমরা এই রকম দশটি অধ্যায় বানিয়ে আনো, আর ঈশ্বর ছাড়া যাকে খুশী ডেকে নাও, যদি তোমরা সত্যবাদী হও। (১৪) অতএব তারা যদি তোমাদের কথায় সাড়া না দেয়, তাহলে তোমরা জানবে, যা অবতীর্ণ করা হয়েছে তা ঈশ্বরের জ্ঞানে রয়েছে এবং এটাও জানবে যে, তিনি ছাড়া কোন উপাস্য নেই। অতএব তোমরা কি তার কাছে আত্মসমর্পণ করবে?

(১৫) যারা পার্থিব জীবন ও তার চাকচিক্য চায়, আমি তাদের কর্মের প্রতিফল পৃথিবীতেই দিয়ে দিই। আর সেখানে তাদের সাথে কোন কম দেওয়া হয় না। (১৬) এরাই সেই লোক যাদের জন্য পরলোকে নরক ছাড়া কিছুই নেই। এখানে তারা যা কিছু করেছে তা নিষ্ফল হয়ে গেছে এবং ব্যর্থ হয়ে গেছে যা তারা অর্জন করেছে।

(১৭) তারা কি এমন ব্যক্তিদের সমান হতে পারে যাদের কাছে তাদের প্রভুর নিকট হতে প্রাপ্ত স্পষ্ট প্রমাণ আছে এবং তার সাক্ষী আছে এবং তার পূর্বে পথ প্রদর্শক ও অনুগ্রহ স্বরূপ মুসার (মোজসের) গ্রন্থ আছে? এরাই তার প্রতি বিশ্বাস স্থাপন করে। আর যারা অস্বীকার করে নরকই হবে তাদের প্রতিশ্রুত স্থান। কাজেই এ সম্পর্কে তুমি কোন সন্দেহে নিপতিত হয়ো না। এটা তোমার প্রভুর পক্ষ থেকে আগত সত্য গ্রন্থ, কিন্তু অধিকাংশ মানুষ তা বিশ্বাস করে না।

(১৮) যারা ঈশ্বরের নামে মিথ্যা বানিয়ে বলে তাদের চেয়ে বড় অত্যাচারী আর কে আছে? এধরনের লোকদের তাদের প্রভুর সামনে হাজির করা হবে, আর সাক্ষীরা বলবে, এরাই সেই লোক যারা এদের প্রভুর নামে মিথ্যা বলেছিল। জেনে রেখো, অত্যাচারীদের উপর ঈশ্বরের প্রত্যাখ্যান রয়েছে। (১৯) ওদের উপর যারা মানুষকে ঈশ্বরের পথে বাধা দেয় এবং ওতে বক্রতা

খুঁজে বেড়ায়। আর এরাই পরলোকে অবিশ্বাসী। (২০) তারা পৃথিবীতে ঈশ্বরকে অক্ষম করতে পারবে না আর ঈশ্বর ছাড়া ওদের কোন সাহায্যকারীও নেই, ওদের উপর দ্বিগুণ শাস্তি হবে। ওরা শুনতেও পেত না আর দেখতেও পেত না। (২১) এরাই তারা যারা নিজেরা নিজেদের ক্ষতি করেছে। তারা যা উদ্ভাবন করত তা তাদের থেকে উধাও হয়ে যাবে। (২২) এতে কোন সন্দেহ নেই যে, এরাই পরলোকে সবচেয়ে বেশী ক্ষতিগ্রস্ত হবে।

(২৩) যারা বিশ্বাস স্থাপন করেছে আর যারা সৎকাজ করেছে এবং নিজের প্রভুর প্রতি বিনয়ী, তারাই স্বর্গের অধিবাসী, তারা সেখানে চিরকাল থাকবে। (২৪) ঐ দুপক্ষের উদাহরণ এই যে, যেমন একজন অন্ধ ও বধির ব্যক্তি আর অপরজন দৃষ্টিসম্পন্ন ও শ্রবণশক্তি সম্পন্ন। এরা উভয়েই কি সমান হবে? তোমরা কি ভেবে দেখ না?*

(২৫) আর আমি নূহকে (নোয়াহ) তার সম্প্রদায়ের কাছে পাঠিয়েছিলাম, সে বলেছিল - ‘আমি তোমাদের জন্য স্পষ্ট সতর্ককারী’। (২৬) তোমরা ঈশ্বর ছাড়া কাউকে উপাসনা করো না। আমি তোমাদের জন্য এক ভয়ঙ্কর শাস্তির আশংকা করছি। (২৭) ঐ সম্প্রদায়ের নেতারা যারা সত্য গ্রহণ করতে অস্বীকৃত ছিল, তারা বলল - আমরা তো তোমাকে আমাদেরই মত একজন মানুষ দেখছি। তাছাড়া আমাদের মধ্যে হীন, অধম ও বিবেচনাহীন লোক ছাড়া কাউকে তোমার অনুসরণ করতে দেখছি না। আর আমরা এও দেখছি না যে,

* বিঃ দ্রঃ-(১১ : ২৪) বিশ্বাস, নিরহঙ্করতা এবং সৎকর্মশীলতা- এই তিনটি বিষয় একই বাস্তবতার বিভিন্ন রূপ। বিশ্বাস হল ঈশ্বর ও তাঁর বিশুদ্ধ গুণাবলীর সজ্ঞান আবিষ্কার। নিরহঙ্করতা হল এমন একটি ভাব যা ঈশ্বর চেতনা লাভ করলে অবশ্যস্তাবী ভাবে মানব হৃদয়ে জাগ্রত হয়।

আমাদের উপর তোমার কোন শ্রেষ্ঠত্ব আছে; বরং আমরা তো তোমাকে মিথ্যাবাদী মনে করি।

(২৮) নূহ (নোয়াহ) বলল - হে আমার সম্প্রদায়! বলো দেখি আমার কাছে যদি আমার প্রভুর পক্ষ থেকে কোন স্পষ্ট প্রমাণ থাকে এবং তিনি যদি আমাকে তাঁর পক্ষ থেকে এক বিশেষ অনুগ্রহ দান করে থাকেন আর তা যদি তোমাদের দৃষ্টিগোচর না হয়ে থাকে তাহলে আমি কি তা তোমাদের ইচ্ছার বিরুদ্ধে তোমাদের উপর চাপিয়ে দিতে পারি? (২৯) হে আমার সম্প্রদায়! এর বিনিময়ে আমি তোমাদের কাছে কোন সম্পদ চাই না। আমার পুরস্কার তো ঈশ্বরের কাছেই আছে, আর আমি কখনই ওদের আমার কাছ থেকে দূর করে দেব না যারা বিশ্বাস স্থাপন করেছে। তারা অবশ্যই তাদের প্রভুর সাক্ষাৎ লাভ করবে; বরং আমি তো দেখছি তোমরাই এক অজ্ঞ জনগোষ্ঠী। (৩০) হে আমার সম্প্রদায়! যদি আমি ঐ লোকদের আমার কাছ থেকে তাড়িয়ে দিই তাহলে ঈশ্বরের পাকড়াও হতে কে আমাকে সাহায্য করবে? তোমরা কি চিন্তা করো না? (৩১) আর আমি তোমাদেরকে বলি না যে, আমার কাছে ঈশ্বরের ধনভাণ্ডার আছে, আর আমি অদৃশ্যের সংবাদও জানি। আর আমি এও বলি না যে, আমি দেবদূত। আর আমি একথাও বলতে পারি না যে, তোমাদের দৃষ্টিতে যারা নিকৃষ্ট তাদেরকে ঈশ্বর কোন কল্যাণ দান করবেন না। ঈশ্বর ভালভাবেই জানেন তাদের অন্তরে কি আছে। এমন কথা বললে অবশ্যই আমি অত্যাচারী হব।

(৩২) তারা বললঃ হে নূহ (নোয়াহ)! তুমি আমাদের সাথে বিতর্ক করেছ এবং বেশী করেই বিতর্ক করেছ। সুতরাং আমাদের যে শাস্তির ভয় দেখাচ্ছ, তোমার কথা সত্য হলে এখন তা আমাদের কাছে নিয়ে এস। (৩৩) নূহ (নোয়াহ) বললঃ ওটা তো আমাদের উপর ঈশ্বরই নিয়ে আসবেন যদি তিনি

ইচ্ছা করেন। আর তোমরা তাঁর নিয়ন্ত্রনের বাইরে যেতে পারবে না। (৩৪) ঈশ্বর যদি তোমাদেরকে বিপথগামী করতে চান তাহলে আমি তোমাদের উপদেশ দিতে চাইলেও আমার উপদেশ তোমাদের কোন কাজে আসবে না। তিনিই তোমাদের প্রভু আর তাঁর কাছেই তোমাদের ফিরে যেতে হবে।

(৩৫) তবে কি তারা বলে, সে (পয়গম্বর) এটাকে উদ্ভাবন করেছে? বলো, যদি আমি এটা উদ্ভাবন করে থাকি তাহলে সে অপরাধ আমার। আর তোমরা যে অপরাধ করছো তার সাথে আমার কোন সম্পর্ক নেই।

(৩৬) নূহের (নোয়াহ) কাছে বাণী পাঠিয়ে বলা হল, তোমার সম্প্রদায়ের যারা ইতিমধ্যেই বিশ্বাস স্থাপন করেছে তারা ছাড়া আর কেউ বিশ্বাস স্থাপন করবে না। অতএব তারা যা করছে তাতে তুমি বিষন্ন হয়ো না। (৩৭) আর আমার নজরদারীতে ও আমার প্রত্যাদেশ অনুসারে নৌকা তৈরী কর। আর অত্যাচারীদের জন্য আমার কাছে কোন অনুরোধ করো না। নিঃসন্দেহে তারা নিমজ্জিত হবে। (৩৮) আর নূহ (নোয়াহ) নৌকা তৈরী করতে লাগল। যখনই তার সম্প্রদায়ের প্রধান ব্যাক্তিরা তার কাছ দিয়ে যেত তখনই তারা তাকে উপহাস করত। সে বললঃ যদি তোমরা আমাদেরকে উপহাস করো তবে আমরাই (একদিন) তোমাদের উপহাস করবো, যেমন তোমরা আমাদেরকে উপহাস করছো। (৩৯) তোমরা অচিরেই জানতে পারবে কাদের উপর লাঞ্ছনাকর শাস্তি আসে এবং কাদের উপর স্থায়ী শাস্তি আপতিত হয়।

(৪০) অবশেষে যখন আমার নির্দেশ এসে গেল এবং ভূপৃষ্ঠ জল প্লাবনে উচ্ছ্বাসিত হল। তখন আমি নূহকে (নোয়াহ) বললাম, সব রকমের প্রাণীর এক-এক জোড়া নৌকায় উঠিয়ে নাও এবং তোমার পরিবার পরিজনকেও, ওরা ব্যতীত যাদের সম্বন্ধে পূর্বে নির্দেশ দেওয়া হয়েছে এবং যারা বিশ্বাস স্থাপন করেছে তাদেরকেও (উঠিয়ে নাও)। বস্তুত অল্প কয়েকজনই তার

সঙ্গে বিশ্বাস স্থাপন করেছিল। (৪১) আর নূহ (নোয়াহ) বললঃ নৌকায় আরোহন কর, ঈশ্বরের নামেই এটা চলবে আর থামবে। নিঃসন্দেহে আমার প্রভু ক্ষমাশীল, দয়াবান। (৪২) আর নৌকাটি পাহাড়ের মত ঢেউয়ের মধ্যে চলতে লাগল। আর নূহ (নোয়াহ) তার পুত্রকে ডাকদিল যে দূরে সরে ছিল। হে আমার পুত্র! আমাদের সাথে আরোহন কর, অবিশ্বাসীদের সাথে থেকো না। (৪৩) সে বললঃ আমি কোন পাহাড়ে আশ্রয় নেব যা আমাকে জল থেকে রক্ষা করবে। নূহ (নোয়াহ) বললঃ আজ ঈশ্বরের নির্দেশ থেকে রক্ষা করার কেউ নেই, কেবলমাত্র ঈশ্বর যাকে দয়া করবেন সে ব্যতীত। ঢেউ এসে দুজনের মধ্যে যোগাযোগ বিচ্ছিন্ন করে দিল এবং সে অন্যদের সাথে ডুবে গেল। (৪৪) এরপর বলা হল যে, হে পৃথিবী! তোমার জল গিলে ফেল, আর হে আকাশ! বন্ধ কর। এবং জল শুকিয়ে দেওয়া হল। কাজ সম্পন্ন হল আর নৌকা জুদী পাহাড়ে দাঁড়িয়ে গেল, আর বলে দেওয়া হল অত্যাচারী সম্প্রদায় দূর হও।

(৪৫) নূহ (নোয়াহ) তার প্রভুকে ডাকল আর বললঃ হে আমার প্রভু! আমার পুত্র আমার পরিবারেরই অন্তর্ভুক্ত, আর নিঃসন্দেহে আপনার প্রতিশ্রুতি সত্য এবং আপনিই সবচেয়ে বড় শাসক। (৪৬) ঈশ্বর বললেন, হে নূহ (নোয়াহ)! সে তোমার পরিবারের অন্তর্ভুক্ত নয়। ওর কর্ম মন্দ। অতএব তুমি আমার কাছে এমন কিছু প্রার্থনা করো না যে বিষয়ে তোমার জ্ঞান নেই। আমি তোমাকে অঙ্গদের অন্তর্ভুক্ত না হতে উপদেশ দিচ্ছি। (৪৭) নূহ (নোয়াহ) বললঃ হে প্রভু! আপনার কাছে এমন কিছু চাওয়া থেকে আমি আপনার আশ্রয় প্রার্থনা করছি যে বিষয়ে আমার কোন জ্ঞান নেই। আর যদি আপনি আমাকে ক্ষমা না করেন আর আমার উপর দয়া না করেন তাহলে আমি ক্ষতিগ্রস্ত হয়ে যাব।

(৪৮) আদেশ হল, হে নূহ (নোয়াহ)! শান্তির সঙ্গে অবতরন কর। তোমার প্রতি, তোমার সঙ্গে যারা আছে তাদের প্রতি এবং তোমার সঙ্গে যারা আছে তাদের কিছু বংশধরদের প্রতি আমার অনুগ্রহ বিরাজ করবে। (ন্যায় পরায়ণহীনদের) আমি কিছুকাল সময় দেব, অতঃপর ওদেরকে আমার পক্ষ হতে যত্ননাদায়ক শাস্তি ভোগ করতে হবে। (৪৯) এসব অদৃশ্যলোকের সংবাদ যা আমি তোমার কাছে পাঠাচ্ছি। এর আগে তুমিও এসব জানতে না, তোমার সম্প্রদায়ও জানতো না। অতএব ধৈর্য ধারণ কর, অস্তিম পরিণতি ঈশ্বরভীরুদের জন্যই।

(৫০) আর আদ জাতির কাছে আমি তাদের ভাই হৃদকে পাঠালাম। যে বললঃ হে আমার সম্প্রদায়! ঈশ্বরের উপাসনা কর। তিনি ছাড়া তোমাদের কোনই উপাস্য নেই। তোমরা কেবল মিথ্যা উদ্ভাবন কর। (৫১) হে আমার সম্প্রদায়! আমি এর জন্য তোমাদের কাছে বিনিময় চাইনা। আমার বিনিময় তো তাঁর কাছে যিনি আমাকে সৃষ্টি করেছেন। তবুও তোমরা কি বুঝবে না? (৫২) আর হে আমার সম্প্রদায়! আপন প্রভুর নিকট ক্ষমা প্রার্থনা কর, তারপর তাঁর দিকে ফিরে আস, তিনি তোমাদের উপর প্রচুর বৃষ্টি বর্ষণ করবেন। তিনি তোমাদের শক্তির সাথে আরও শক্তি বৃদ্ধি করবেন। আর তোমরা অপরাধী হয়ে মুখ ফিরিয়ে নিওনা।

(৫৩) তারা বললঃ ওহে হৃদ! তুমি তো আমাদের কাছে কোন স্পষ্ট নিদর্শন নিয়ে আসোনি। তোমার কথায় আমরা আমাদের দেবতাদের ত্যাগ করবো না, আমরা তোমাকে বিশ্বাস করি না। (৫৪) আমরা তো বলবো, আমাদের উপাস্য দেবতাদের মধ্য হতে কেউ তোমাকে কোন অশুভ প্রভাবে আবিষ্ট করেছে। হৃদ বললঃ আমি ঈশ্বরকে সাক্ষী রাখছি আর তোমরাও সাক্ষী থাকো, ওসবের সাথে আমার কোন সম্পর্ক নেই যাদেরকে তোমরা অংশীদার

স্থাপন কর। (৫৫) তাঁকে (ঈশ্বরকে) ছেড়ে, অনন্তর তোমরা সবাই মিলে আমার বিরুদ্ধে ষড়যন্ত্র কর আর আমাকে কোন অবকাশ দিও না। (৫৬) আমি ঈশ্বরের উপর ভরসা করেছি যিনি আমার প্রভু আর তোমাদেরও প্রভু। এমন কোন প্রাণী নেই যে তাঁর নিয়ন্ত্রনাধীন নয়। নিঃসন্দেহে আমার প্রভু সঠিক পথেই আছেন

(৫৭) যদি তোমরা মুখ ফিরিয়ে নাও তাহলে (জেনে রাখ) আমাকে যা দিয়ে তোমাদের কাছে পাঠানো হয়েছে আমি তা তোমাদের কাছে পৌঁছে দিয়েছি। আর আমার প্রভু অন্য একদল লোককে তোমাদের স্থলাভিষিক্ত করবেন। তোমরা তাঁর কোনই ক্ষতি করতে পারবে না। নিঃসন্দেহে আমার প্রভু সবকিছুরই সংরক্ষক। (৫৮) অতঃপর যখন আমার নির্দেশ এসে গেল তখন আমি আপন অনুগ্রহে হুদকে রক্ষা করলাম, আর হুদের সাথে যারা বিশ্বাস স্থাপন করেছিল তাদেরও। আর আমি ওদেরকে এক কঠিন যন্ত্রনা থেকে বাঁচিয়েছিলাম। (৫৯) এ ছিল আদ জাতি যারা তাদের প্রভুর নিদর্শন সমূহ অস্বীকার করেছিল। আর তাঁর পয়গম্বরদের অমান্য করেছিল, আর প্রত্যেক বিদ্রোহী ও বিরোধীদের কথা অনুসরণ করেছিল। (৬০) এই পৃথিবীতে তারা যেমন অভিশাপ দ্বারা তাড়িত হচ্ছে, তেমনই পুনরুত্থানের দিনেও তাড়িত হবে। নিশ্চয়, আদ তাদের প্রভুকে প্রত্যাখ্যান করেছিল। দূর্ভাগ্য আদ জাতির জন্য যারা ছিল হুদের সম্প্রদায়।

(৬১) আর সামুদ জাতির কাছে আমি ওদের ভাই সালেহকে পাঠালাম। সে বললঃ হে আমার সম্প্রদায়! ঈশ্বরের উপাসনা কর। তিনি ছাড়া তোমাদের কোন উপাস্য নেই। তিনিই তোমাদের মাটি থেকে তৈরী করেছেন এবং তাতেই তোমাদের বসতি দান করেছেন। অতএব ক্ষমা প্রার্থনা কর তারপর তাঁর দিকে ফিরে এসো। নিঃসন্দেহে আমার প্রভু নিকটেই আছেন, ডাকলে সাড়া দেন। (৬২) তারা বললঃ হে সালেহ! ইতিপূর্বে তোমার কাছে আমাদের

বড় আশা ছিল, তুমি কি আমাদের ওদের উপাসনা করতে নিষেধ করছো যাদের উপাসনা আমাদের পূর্বপুরুষেরা করত। আর যে জিনিষের দিকে তুমি আমাদের ডাকছো, সে সম্পর্কে আমরা এক বিশ্বাস্তিকর সন্দেহের মধ্যে রয়েছি। (৬৩) সে বললঃ হে আমার সম্প্রদায়! বল দেখি। আমার কাছে যদি আমার প্রভুর কোন স্পষ্ট প্রমাণ থাকে এবং তিনি যদি নিজের পক্ষ থেকে কোন অনুগ্রহ দান করে থাকেন, এমতাবস্থায় আমি যদি তাঁর অবাধ্যতা করি তাহলে আমাকে ঈশ্বর থেকে কে বাঁচাবে? তোমরা তো আমার ক্ষতি ছাড়া আর কিছুই বৃদ্ধি করতে পারবে না।

(৬৪) আর হে আমার সম্প্রদায়! এটি ঈশ্বরের উদ্ভী, তোমাদের জন্য একটি নিদর্শন। অতএব একে ঈশ্বরের ভূমিতে বিচরণ করতে দাও। একে কোন রকম কষ্ট দিওনা, তাহলে তোমাদের উপর আকস্মিক শাস্তি নেমে আসবে। (৬৫) অনন্তর তারা তার পা কেটে দিল। তখন সালেহ বললঃ তিনদিন তোমরা তোমাদের ঘরে ভোগ বিলাস করে নাও। এটা একটি প্রতিশ্রুতি যা মিথ্যা হবে না। (৬৬) তারপর যখন আমার নির্দেশ এসে গেল তখন আমি নিজ অনুগ্রহে সালেহ ও যারা তার সাথে বিশ্বাস স্থাপন করেছিল তাদের রক্ষা করলাম। আর সেদিনের লাঞ্ছনা থেকে (সুরক্ষিত রাখলাম)। নিঃসন্দেহে তোমার প্রভুই মহা শক্তিধর, পরাক্রমশালী। (৬৭) আর যারা অত্যাচার করেছিল এক বিকট শব্দ তাদেরকে পাকড়াও করল। ফলে সকালবেলা যে যার ঘরে মৃত অবস্থায় পড়ে রইল। (৬৮) যেন তারা সেখানে কখনই বাস করত না। জেনে রেখো, সামুদ জাতি তাদের প্রভুকে অস্বীকার করেছিল, সামুদ জাতির প্রতি অভিসম্পাত!

(৬৯) আর ইবরাহীমের (আব্রাহামের) কাছে আমার দেবদূতরা সুসংবাদ নিয়ে এসেছিল, তারা অভিবাদন জানিয়ে বলল-‘শাস্তি’। সেও বলল -‘তোমাদের উপর শাস্তি বর্ষিত হোক’। অতঃপর অনতিবিলম্বে ইবরাহীম

(আব্রাহাম) একটি ভূনাকৃত গো-বৎস নিয়ে এল। (৭০) কিন্তু সে যখন দেখল তাদের হাত খাবারের দিকে অগ্রসর হচ্ছে না তখন সে সন্ধিগ্ধ হল আর অন্তরে ভীতির সঞ্চার হল। তারা বললঃ ভয় পেওনা, আমাদেরকে লূতের সম্প্রদায়ের কাছে পাঠানো হয়েছে। (৭১) সেখানে ইবরাহীমের (আব্রাহামের) স্ত্রী দাঁড়িয়ে ছিল। সে হেসে ফেলল যখন আমি তাকে ইসহাকের (আইজ্যকের) শুভ সংবাদ দিলাম এবং ইসহাকের (আইজ্যকের) পরে ইয়াকূবের (জ্যকবের)। (৭২) সে বললঃ হায় হতভাগা! আমি সন্তানের জন্ম দেব; আমি এক বুড়ী আর আমার এই বৃদ্ধ স্বামী! এতো অবাক কাণ্ড! (৭৩) দেবদূতেরা বললঃ তুমি ঈশ্বরের আদেশের ব্যাপারে অবাক হচ্ছে? হে ইবরাহীমের (আব্রাহামের) পত্নী, তোমার উপর ঈশ্বরের অনুগ্রহ ও আশীর্বাদ রয়েছে। নিঃসন্দেহে ঈশ্বর অত্যন্ত প্রশংসনীয়, বৈভবশালী।

(৭৪) অতঃপর যখন ইবরাহীমের (আব্রাহামের) ভয় দূর হল আর তার কাছে সুসংবাদ এল তখন সে লূতের সম্প্রদায়ের ব্যাপারে আমার সাথে বাদানুবাদ করতে লাগল। (৭৫) আসলে ইবরাহীম (আব্রাহাম) ছিল একজন ধৈর্যশীল, কোমলপ্রাণ ও ঈশ্বরমুখী মানুষ। (৭৬) হে ইবরাহীম (আব্রাহাম)! এ বিষয়টি ছাড়ে। তোমার প্রভুর নির্দেশ এসে গেছে। ওদের জন্য এমন এক শাস্তি আসছে যা ফেরানো যাবে না।

(৭৭) আর যখন আমার দেবদূতগণ (দেবদূত) লূতের কাছে এল তখন সে ঘাবড়ে গেল তার অন্তর সঙ্কুচিত হয়ে গেল। সে বললঃ আজ এক সঙ্কটময় দিন। (৭৮) আর তার সম্প্রদায়ের লোকেরা, যারা পূর্ব থেকেই অপকর্ম করতে অভ্যস্ত ছিল, দৌড়ে তার কাছে এল। লূত বললঃ হে আমার সম্প্রদায়! এই আমার মেয়েরা আছে। এরা তোমাদের

জন্য অধিকতর পবিত্র। অতএব তোমরা ঈশ্বরকে ভয় কর আর আমাকে আমার অতিথিদের সামনে লজ্জিত করো না। তোমাদের মধ্যে কি কোন ভাল লোক নেই? (৭৯) তারা বললঃ তুমি তো জান যে, তোমার মেয়েদের ব্যাপারে আমাদের কোন আগ্রহ নেই, আর তুমি এও জানো, আমরা কি চাই।

(৮০) লুত বললঃ যদি আমার কাছে তোমাদের সাথে লড়ার ক্ষমতা থাকত। কিংবা আমি যদি কোন শত্রু অবলম্বনের কাছে আশ্রয় নিতে পারতাম। (৮১) দেবদূতগণ বললঃ হে লুত! আমরা তোমার প্রভুর দূত। এরা তোমার কাছে পৌঁছাতে পারবে না। তুমি তোমার পরিবার - পরিজন নিয়ে রাতের কিছু অংশ অবশিষ্ট থাকতে অন্যত্র বেরিয়ে যাও। আর তোমাদের মধ্যে কেউ যেন পিছনে ফিরে না তাকায়। তোমার স্ত্রীর কথা আলাদা। ওদের যা ঘটবে তারও তাই ঘটবে। ওদের নির্ধারিত সময় হচ্ছে সকাল, সকাল কি নিকটবর্তী নয়? (৮২) অতঃপর যখন আমার নির্দেশ এল, তখন জনপদটি একেবারে উল্টে দিলাম এবং তার উপর অবিরাম পাথর বর্ষণ করলাম। (৮৩) যা তাদের জন্য তোমার প্রভুর কাছে চিহ্নিত করা ছিল। যুলুমকারীদের এই শাস্তি বেশি দূরের ব্যাপার ছিল না।

(৮৪) আর মাদিয়ান সম্প্রদায়ের নিকট তাদের ভাই শো'আইবকে পাঠালাম। সে বললঃ হে আমার সম্প্রদায়! ঈশ্বরের উপাসনা কর, তিনি ছাড়া তোমাদের কোনই উপাস্য নেই। আর মাপে ও ওজনে কম দিও না। আমি তোমাদেরকে সমৃদ্ধশালী দেখতে পাচ্ছি, আর আমি তোমাদের প্রতি এক পরিবেষ্টনকারী দিবসের শাস্তির ভয় করছি। (৮৫) আর হে আমার সম্প্রদায়! ন্যায়ে সাথে মাপ ও ওজন পরিপূর্ণভাবে দিও এবং মানুষকে তাদের জিনিষপত্র কম দিওনা আর পৃথিবীতে অনাচার করে বেড়িও না।

(৮৬) ঈশ্বরের অনুমোদিত উদ্ভূত তোমাদের জন্য উত্তম, যদি তোমরা আস্থাবান হও। আর আমি তোমাদের প্রহরী নই।

(৮৭) তারা বললঃ হে শো'আইব! তোমার প্রার্থনা কি তোমাকে এই শেখায় যে, আমরা তাদের বর্জন করি যাদের উপাসনা আমাদের পূর্বপুরুষরা করত, অথবা আমরা আমাদের সম্পত্তি আমাদের ইচ্ছামত ভোগ করা বর্জন করি? বাস্তবিক তুমি হচ্ছেো বড় সত্যবাদী ও সদাচারী ব্যক্তি!

(৮৮) শো'আইব বললঃ হে আমার সম্প্রদায়! বলো, আমার কাছে যদি আমার প্রভুর কোন স্পষ্ট প্রমাণ থাকে এবং তিনি যদি তাঁর পক্ষ থেকে আমাকে উত্তম জীবিকা দান করে থাকেন, (তাহলে আমি কি তোমাদের সঠিক নির্দেশনা দেব না?) আর আমি চাই না যে, আমি স্বয়ং ঐ কাজ করি যা করতে তোমাদের বাধা দিচ্ছি। আমি আমার সাধ্যমত সংস্কার করতে চাইছি। আর আমার সামর্থ্য তো ঈশ্বরই দান করবেন। তাঁর উপরেই আমি ভরসা করেছি, এবং তাঁর দিকেই মনোনিবেশ করছি। (৮৯) আর হে আমার সম্প্রদায়! এমন না হয় যে, আমার বিরুদ্ধে তোমাদের হঠকারী কার্য তোমাদের উপর যেন এমন বিপত্তি না আনে যেমন নূহের সম্প্রদায়, হুদের সম্প্রদায়, সালেহর সম্প্রদায় এর উপর এসেছিল। আর লুতের সম্প্রদায় তো তোমাদের থেকে দূরের নয়। (৯০) আর আপন প্রভুর কাছে ক্ষমা প্রার্থনা কর আর তাঁর দিকেই ফিরে এস। নিঃসন্দেহে আমার প্রভু দয়াবান ও স্নেহপরায়ণ।

(৯১) তারা বললঃ হে শো'আইব! তুমি যা বল তার অনেকটাই আমরা বুঝি না। আর আমরা দেখতে পাচ্ছি তুমি আমাদের মধ্যে দুর্বল। যদি তোমার গোত্রের লোকজন না থাকত তাহলে আমরা তোমাকে পাথর নিক্ষেপ করে মেরে ফেলতাম। আর আমাদের মধ্যে তোমার তো কোন শ্রেষ্ঠত্ব নেই।

(৯২) শোঁআইব বললঃ হে আমার সম্প্রদায় ! আমার গোত্রের লোকজন কি তোমাদের কাছে ঈশ্বরের চেয়ে অধিক শক্তিশালী ? আর ঈশ্বরকে তোমরা পিছনে ফেলে রেখেছ। নিঃসন্দেহে তোমরা যা কর তা সবই আমার প্রভুর নিয়ন্ত্রনে। (৯৩) আর হে আমার সম্প্রদায় ! তোমরা তোমাদের রীতি অনুযায়ী কাজ করে যাও আমি আমার রীতি অনুযায়ী কাজ করতে থাকবো। শিঘ্রই তোমরা জানতে পারবে যে, কার উপর লাঞ্ছনাকর শাস্তি আসে আর কে মিথ্যাবাদী। প্রতীক্ষা কর, আমিও তোমাদের সাথে প্রতীক্ষা করছি।

(৯৪) যখন আমার নির্দেশ এল আমি শোঁআইব এবং যারা তার সাথে বিশ্বাস স্থাপন করেছিল নিজ অনুগ্রহে রক্ষা করলাম আর যারা অত্যাচার করেছিল তাদের এক বিকট শব্দ পাকড়াও করল। অতএব তারা নিজেদের ঘরে মৃত অবস্থায় পড়ে রইল। (৯৫) যেন তারা কখনই ওখানে বসবাসই করেনি। জেনে রেখো, অভিসম্পাত রয়েছে মাদইয়ানদের জন্য যেমন অভিসম্পাত হয়েছিল সামুদদের !

(৯৬) আর আমি মুসাকে (মোজেসকে) নির্দশন ও স্পষ্ট প্রমাণ সহ পাঠালাম। (৯৭) ফ্যারাও ও তার পারিষদবর্গের কাছে কিন্তু তারা ফ্যারাও এর আদেশমত চলল, যদিও ফ্যারাও এর আদেশ সঠিক ছিল না। (৯৮) শেষ বিচারের দিনে সে তার লোকদের পুরোভাগে থাকবে এবং তাদেরকে নরকে নিয়ে যাবে। আর কত নিকৃষ্ট স্থান যেখানে তারা পৌঁছাবে। (৯৯) এই পৃথিবীতে অভিসম্পাত সদাসর্বদা তাদের অনুসরণ করছে এবং পুনরুত্থানের দিনেও অনুসরণ করবে। যে প্রতিফল তাদেরকে দেওয়া হবে তা কতই নিকৃষ্ট !

(১০০) এ হল জনপদ সমূহের কিছু বিবরণ যা আমি তোমাকে শোনাচ্ছি। এর মধ্যে কিছু জনপদ এখনও পর্যন্ত অবশিষ্ট আছে আর কিছু নিশ্চিহ্ন হয়ে গেছে। (১০১) আমি তাদের প্রতি কোন অবিচার করিনি বরং তারাই

নিজেদের প্রতি অবিচার করেছে ফলে, যখন তোমার প্রভুর নির্দেশ এসে গেল তখন ঈশ্বর ছাড়া তারা যেসব উপাস্যকে ডাকত তারা তাদের কোনই উপকার করেনি। তারা কেবল তাদের সর্বনাশই বৃদ্ধি করেছে।

(১০২) তোমার প্রভু যখন পাপিষ্ঠদের জনপদ সমূহকে পাকড়াও করেন তখন এভাবেই ধরে থাকেন। নিঃসন্দেহে তাঁর পাকড়াও বড় কষ্টদায়ক ও মারাত্মক। (১০৩) এতে এই লোকদের জন্য শিক্ষা রয়েছে যারা পরলোকের শাস্তির ভয় করে। সে এমনই একটা দিন যে দিন সবাইকে একত্রিত করা হবে। আর তা হবে হাজিরার দিন। (১০৪) কেবল একটি নির্দিষ্ট সময়ের জন্যই আমি তা বিলম্বিত করছি। (১০৫) সেই দিন যখন আসবে তখন ঈশ্বরের অনুমতি ছাড়া কেউই কথা বলতে পারবে না। তাই তাদের মধ্যে কেউ হবে হতভাগ্য আর কেউ হবে ভাগ্যবান।

(১০৬) অতএব যারা হতভাগা তারা থাকবে নরকে। সেখানে তাদের জন্য থাকবে হা-হুতাশ আর আর্তনাদ। (১০৭) তারা সেখানে থাকবে যতদিন আকাশ ও পৃথিবী থাকবে। তবে তোমার প্রভু চাইলে এর ব্যতিক্রমও হতে পারে। তোমার প্রভু তো যা ইচ্ছা করেন তাই করে থাকেন। (১০৮) আর যারা ভাগ্যবান তারা স্বর্গে থাকবে। তারা সেখানে থাকবে যতদিন আকাশ ও পৃথিবী থাকবে। তবে তোমার প্রভু চাইলে কোন ব্যতিক্রমও হতে পারে। এটা হবে এক অন্তহীন কৃপা। (১০৯) অতএব তারা যা কিছুর উপাসনা করছে সে সম্পর্কে তুমি কোন সংশয়ে থেকো না। তারা ঠিক তেমনই উপাসনা করছে যেমন ওদের পূর্বে ওদের পূর্বপুরুষেরা উপাসনা করত। আমি ওদের প্রাপ্য কিছু কম করবো না, পূর্ণমাত্রায় দেব।

(১১০) আর আমি তো মূসাকে (মোজেসকে) গ্রন্থ দিয়েছিলাম। পুনরায় তাতে মতভেদ করা হল। আর যদি তোমার প্রভুর পক্ষ হতে একটি উক্তি

পূর্বেই স্থিরীকৃত হয়ে না থাকত তাহলে তৎক্ষণাৎ তাদের মধ্যে মীমাংসা হয়ে যেত। এই ব্যাপারে তারা গভীর সংশয়ে পড়ে আছে যা ওদেরকে সন্তুষ্ট হতে দেয় না। (১১১) আর নিশ্চিতরূপে তোমার প্রভু প্রত্যেককে তার কর্মের পূর্ণ প্রতিদান দেবেন। তারা যা করছে তিনি তার খবর রাখেন।

(১১২) অতএব যেমন আদিষ্ট হয়েছে, তুমি ও তোমার সাথে যারা ক্ষমা প্রার্থনা করেছ সবাই তাতে স্থির থাকো এবং বাড়াবাড়ি কোরো না। নিঃসন্দেহে তিনি দেখছেন যা তোমরা করছো। (১১৩) আর যুলুমকারীদের দিকে ঝুঁকবে না। ঝুঁকলে আগুন তোমাদের স্পর্শ করবে। আর ঈশ্বর ব্যতীত তোমাদের কোন অভিভাবক নেই। অতএব তোমরা কারো সাহায্য পাবে না। (১১৪) দিনের দুই প্রান্তভাগে এবং রাতের কিছু অংশে প্রার্থনায় রত হও। নিঃসন্দেহে ভালকাজ খারাপ কাজ দূর করে। এটা উপদেশ গ্রহণকারীদের জন্য একটি উপদেশ। (১১৫) আর ধৈর্য ধারণ কর, ঈশ্বর সৎকর্মশীলদের প্রতিফল নষ্ট করেন না।

(১১৬) তাহলে, তোমার পূর্বের জাতি সমূহের মধ্যে এমন সৎকর্মশীল ব্যক্তিবর্গ হলো না কেন, যারা পৃথিবীতে বিপর্যয় সৃষ্টিতে বাধা দিত? তবে মুষ্টিমেয় ব্যক্তিবর্গ ছিল, যাদেরকে আমি তাদের মধ্যে হতে রক্ষা করেছিলাম। আর অনিষ্ঠকারীরা পার্থিব ভোগবিলাসে মত্ত ছিল। তারা ছিল অপরাধী। (১১৭) অধিবাসীরা সৎকর্মশীল হওয়া অবস্থায় তোমার প্রভু অন্যায়ভাবে জনপদসমূহ ধ্বংস করতে পারেন না।

(১১৮) আর যদি তোমার প্রভু চাইতেন তাহলে তিনি সব মানুষকে একই সম্প্রদায় করে দিতেন; কিন্তু তাতেও তারা মতভেদ করতে থাকবে। (১১৯) তবে যাদেরকে তোমার প্রভু অনুগ্রহ করেন তাদের কথা ভিন্ন। আর এজন্যেই তিনি তাদেরকে সৃষ্টি করেছেন। তোমার প্রভুর এই কথা বাস্তবায়িত

হবেই, আমি অবশ্যই একসঙ্গে জ্বিন ও মানুষ দিয়ে নরক ভরে দেব।

(১২০) আর পয়গম্বরদের সব ঘটনা আমি তোমার কাছে বলছি, যা তোমার অন্তর মজবুত করবে। আর এরই মাধ্যমে তোমার কাছে সত্য এসেছে, আর আস্থাবানদের জন্য এসেছে উপদেশ ও স্মারক। (১২১) আর যারা বিশ্বাস করেনি ওদের বলঃ তোমরা তোমাদের রীতি অনুযায়ী কাজ কর আর আমরা আমাদের রীতি অনুযায়ী কাজ করছি। (১২২) আর প্রতীক্ষা কর আমরাও প্রতীক্ষা করছি। (১২৩) ঈশ্বরের কাছে রয়েছে আকাশ ও পৃথিবীর গোপন কথা এবং তাঁর কাছেই সকল বিষয় প্রত্যাভর্তিত হবে। অতএব তুমি তাঁরই উপাসনা কর আর তাঁর উপরেই নির্ভর হও। তোমরা যা কর তোমার প্রভু সে সম্পর্কে অনবহিত নন।

অধ্যায় ১২ : ইউসুফ (যোসেফ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-রা। এগুলো সুস্পষ্ট গ্রন্থের বাণী। (২) আমি একে অবতীর্ণ করেছি কুরআন (রূপে) আরবী ভাষায়। যাতে তোমরা বুঝতে পার। (৩) আমি তোমাকে শ্রেষ্ঠতম ঘটনা শোনাচ্ছি এই কুরআনের মাধ্যমে যা আমি তোমার উপরে প্রত্যাদেশের মাধ্যমে পাঠিয়েছি। এর পূর্বে নিঃসন্দেহে তুমি তো কিছুই জানতে না।

(৪) যখন ইউসুফ (যোসেফ) তার পিতা (জ্যাকব) কে বললঃ পিতা আমি স্বপ্নে এগারোটি তারকা, সূর্য ও চন্দ্রকে দেখলাম। আমি দেখলাম, তারা আমার সামনে অবনত হচ্ছে। (৫) তার পিতা বললঃ হে আমার পুত্র! তুমি তোমার এই স্বপ্নের কথা তোমার ভাইদেরকে বলো না; তাহলে তারা তোমার বিরুদ্ধে ষড়যন্ত্র করবে। নিঃসন্দেহে শয়তান মানুষের প্রকাশ্য শত্রু। (৬) আর

এভাবেই তোমার প্রভু তোমাকে মনোনিত করবেন আর তোমাকে কথার (স্বপ্নের) তাৎপর্য শেখাবেন এবং তোমার প্রতি এবং ইয়াকুবের (জ্যাকুবের) সন্তানদের প্রতি তাঁর অনুগ্রহ পূর্ণ করবেন, যেভাবে তিনি ইতিপূর্বে তোমার পূর্বজ ইবরাহীম (আব্রাহাম) ও ইসহাকের (আইজ্যাকের) প্রতি নিজ অনুগ্রহ পূর্ণ করেছিলেন। নিঃসন্দেহে তোমার প্রভু মহাজ্ঞানী, পরম প্রাজ্ঞ।

(৭) অবশ্যই ইউসুফ (যোসেফ) আর তার ভাইদের ঘটনায়, জিজ্ঞাসুদের জন্য বড় নিদর্শন রয়েছে। (৮) যখন তারা বলেছিলঃ ইউসুফ (যোসেফ) ও তার ভাই (বেঞ্জামিন) আমাদের পিতার কাছে আমাদের চেয়েও অধিক প্রিয়; অথচ আমরা একটি শক্তিশালী দল, আসলে আমাদের পিতা পরিষ্কার বিভ্রান্তিতে রয়েছেন। (৯) ইউসুফ (যোসেফ) কে হত্যা কর অথবা তাকে কোথাও ফেলে এস, যাতে তোমাদের পিতার মনোযোগ শুধু তোমাদের জন্যই নিবদ্ধ হয়। এরপর তোমরা পূর্ণ সদাচারী হয়ে যাও। (১০) তাদের মধ্যে একজন বললঃ ইউসুফ (যোসেফ) কে হত্যা করো না, যদি তোমরা কিছু করতেই চাও তাহলে ওকে কোন অন্ধকূপে ফেলে দাও। কোন যাত্রীদল তাকে বের করে নিয়ে যাবে।

(১১) তারা তাদের পিতাকে বললঃ হে আমাদের পিতা! আপনি ইউসুফের (যোসেফের) ব্যাপারে আমাদেরকে বিশ্বাস করছেন না কেন? আমরা তো তার হিতাকাঙ্ক্ষী। (১২) কাল ওকে আমাদের সাথে পাঠিয়ে দিন, সে খাওয়া দাওয়া করবে, খেলা-ধূলা করবে। আমরা তো তাকে দেখে-শুনেই রাখব। (১৩) পিতা বললঃ তোমরা ওকে নিয়ে গেলে আমি চিন্তিত থাকবো। আর আমার ভয় হয়, তোমরা যখন ওর ব্যাপারে অসাবধান থাকবে তখন তাকে কোন নেকড়ে বাঘ খেয়ে ফেলবে। (১৪) তারা বললঃ আমরা একটা শক্তিশালী দল হওয়া সত্ত্বেও তাকে যদি নেকড়ে বাঘে খায় তাহলে তো আমরা ক্ষতিগ্রস্তই হব।

(১৫) এরপর তারা যখন তাকে নিয়ে গেল আর সিদ্ধান্ত নিল যে, ওকে একটি অন্ধকূপে নিক্ষেপ করবে। আর আমি ইউসুফের (যোসেফের) কাছে ওহী (বার্তা) পাঠালাম, তুমি ওদেরকে ওদের এই অপকর্ম একদিন অবহিত করবে যখন তারা তোমাকে চিনতে পারবে না। (১৬) সন্ধ্যায় তারা কাঁদতে কাঁদতে তাদের পিতার কাছে এল। (১৭) তারা বললঃ হে আমাদের পিতা! আমরা দৌড়ের প্রতিযোগীতা করছিলাম এবং ইউসুফ (যোসেফ) কে আমাদের মালপত্রের কাছে রেখে গিয়েছিলাম। তখন নেকড়ে বাঘ তাকে খেয়ে ফেলেছে। আমরা সত্য কথা বললেও আপনি তো আমাদের বিশ্বাস করবেন না। (১৮) আর তারা ইউসুফের (যোসেফের) জামায় মিথ্যা রক্ত লাগিয়ে আনল। পিতা বললঃ তোমরা নিজেরাই একটি ঘটনা সাজিয়ে এনেছ। এখন ধৈর্যই শ্রেয়। আর যে কথা তোমরা বলছ সে ব্যাপারে ঈশ্বরেরই সহায়তা চাই।

(১৯) অতঃপর এক যাত্রীদল এসে তাদের জল সংগ্রাহককে পাঠাল। সে তার বালতি ঝুলিয়ে দিল। সে বললঃ সুসংবাদ! এতো দেখছি একটি বালক! তারা বাণিজ্যিক পণ্য হিসাবে একে লুকিয়ে নিল। আর ঈশ্বর ভালভাবেই জানতেন যা কিছু এরা তখন করছিল। (২০) তারা তাকে স্বল্পমূল্যে মাত্র কয়েক দিরহামের (রৌপ্যমুদ্রায়) বিনিময়ে বিক্রি করে দিল, এব্যাপারে তারা বেশী প্রত্যাশিত ছিল না।

(২১) মিশরের যে ব্যক্তি তাকে ক্রয় করেছিল সে তার স্ত্রীকে বললঃ সম্মানজনক ভাবে এর থাকার ব্যবস্থা কর, সম্ভবতঃ সে আমাদের উপকারে আসবে; কিংবা আমরা একে পুত্র ও বানিয়ে নিতে পারি। আর এভাবেই আমি ইউসুফ (যোসেফ) কে ওই দেশে প্রতিষ্ঠা দান করলাম। যাতে আমি তাকে স্বপ্নের ব্যাখ্যা সম্পর্কিত জ্ঞান শিক্ষা দিতে পারি। সর্ব বিষয়ের প্রভুত্ব তো

ঈশ্বরেরই। যদিও অধিকাংশ মানুষ জানে না। (২২) অতঃপর সে যখন পূর্ণ যৌবনে উপনীত হল, তখন আমি তাকে প্রজ্ঞা ও জ্ঞান দান করি। এভাবেই আমি সৎকর্মশীলদের পুরস্কৃত করি।

(২৩) ইউসুফ (যোসেফ) যে মহিলার বাড়িতে ছিল, সে তাকে প্ররোচিত করতে লাগল এবং একদিন ঐ মহিলা ঘরের দরজা বন্ধ করে দিয়ে বললঃ এই দিকে এসো। ইউসুফ (যোসেফ) বললঃ আমি ঈশ্বরের আশ্রয় চাই। তিনি আমার মালিক, তিনি আমাকে ভালভাবে রেখেছেন। নিঃসন্দেহে অন্যায়কারীরা কখনই সফল হয় না। (২৪) আসলে ঐ মহিলা তাকে নিয়ে কুচিন্তা করেছিল। সেও তাতে সম্মতি দিত, যদি সে তার প্রভুর নিদর্শন না দেখত। এভাবেই (নিদর্শন দেখানো) হয়েছিল, যাতে আমি তাকে অপকর্ম ও অশ্লীলতা থেকে দূরে রাখতে পারি। নিঃসন্দেহে সে আমার মনোনিত বান্দাদেরই অন্যতম ছিল।

(২৫) আর দুজনেই দরজার দিকে দৌড়ে গেল। আর মহিলা পিছন থেকে ইউসুফের (যোসেফের) জামা ছিঁড়ে ফেলল। দুজনে দরজার কাছে মহিলার স্বামীকে দেখতে পেল। তখন মহিলা বললঃ তোমার স্ত্রীর সাথে যে অন্যায় কাজ করতে চেয়েছিল, তাকে কারারুদ্ধ করা অথবা যন্ত্রণাদায়ক কোন শাস্তি ছাড়া আর কি দণ্ড হতে পারে? (২৬) ইউসুফ (যোসেফ) বললঃ ইনিই আমাকে প্ররোচিত করার চেষ্টা করেছেন, তখন মহিলার পরিবারের জনৈক এভাবে সাক্ষ্য দিল যে, যদি তার জামা সামনের দিক থেকে ছেঁড়া থাকে তাহলে মহিলার কথা সত্য আর তার কথা মিথ্যা। (২৭) আর যদি তার জামা পিছনের দিক থেকে ছেঁড়া থাকে তাহলে মহিলা মিথ্যা বলেছে আর সে সত্য বলেছে। (২৮) অতঃপর সে (মহিলার স্বামী) যখন দেখল ইউসুফের (যোসেফের) জামা পিছন থেকে ছেঁড়া তখন সে বললঃ নিঃসন্দেহে এটা তোমাদের

মহিলাদের চক্রান্ত। আর তোমাদের চক্রান্ত তো ভয়ানক ধরনেরই হয়! (২৯) ইউসুফ (যোসেফ) এ প্রসঙ্গ ছাড়, আর হে মহিলা! তুমি নিজের অপরাধের জন্য ক্ষমা প্রার্থনা কর। নিঃসন্দেহে তুমিই তো অপরাধ করেছ।

(৩০) আর নগরের মহিলাবৃন্দ বলতে লাগল যে, আজীজের পত্নী তার যুবক ক্রীতদাসকে ভ্রষ্ট করার চেষ্টা করছে। ভালোবাসা তার হৃদয়কে আচ্ছন্ন করে ফেলেছে। নিঃসন্দেহে, আমরা দেখছি, সে স্পষ্ট ভ্রান্তিতে নিপতিত। (৩১) যখন সে তাদের ষড়যন্ত্রের কথা শুনল তখন তাদেরকে আমন্ত্রণ করল এবং তাদের জন্য এক সমারোহ সভার আয়োজন করল, আর তাদের প্রত্যেককে এক একটি ছুরি দিল এবং ইউসুফ (যোসেফ) কে বললঃ তুমি এদের সামনে এস। আর যখন মহিলারা তাকে দেখল তখন বিমোহিত হয়ে পড়ল এবং নিজেদের হাত কেটে ফেলল। আর বললঃ ঈশ্বরের মহিমা, এতো মানুষ নয়, এটা কোন মহান দেবদূত। (৩২) সম্ভ্রান্ত ব্যক্তিটির স্ত্রী বললঃ এই সেই যুবক যার ব্যাপারে তোমরা আমার নিন্দা করছিলে, আর আমি একে প্ররোচিত করার চেষ্টা করেছিলাম; কিন্তু সে বেঁচে গেছে। আর আমি তাকে যা করতে বলছি সে যদি তা না করে তাহলে তাকে কারাগারে পাঠানো হবে এবং অবশ্যই সে লাঞ্চিত হবে। (৩৩) ইউসুফ (যোসেফ) বললঃ হে আমার প্রভু! তারা আমাকে যা করতে বলছে তার চেয়ে কারাগারই আমার কাছে অধিক প্রিয়। আর যদি আপনি এদের ষড়যন্ত্র হতে আমাকে রক্ষা না করেন তাহলে আমি ওদের দিকে ঝুঁকে পড়ব এবং অঞ্জদের অন্তর্ভুক্ত হবো। (৩৪) অতঃপর তার প্রভু তার নিবেদনে সাড়া দেন এবং ওদের চক্রান্ত হতে তাকে রক্ষা করেন। নিঃসন্দেহে তিনি সবকিছু শোনেন, সবকিছু জানেন।

(৩৫) প্রমাণাদী দেখার পর তারা তাকে কিছুকালের জন্য কারাগারে রাখার মনস্থ করল। (৩৬) আর কারাগারে তার সাথে আরও দুই যুবক প্রবেশ

করল। তাদের মধ্যে একজন (একদিন) বললঃ আমি স্বপ্ন দেখলাম আমি মদ তৈরি করছি, আর অপরজন বললঃ আমি দেখলাম মাথায় রুটি বহন করছি আর পাখি তা থেকে খাচ্ছে। আমাদেরকে এর তাৎপর্য বলে দাও। আমরা দেখছি তুমি একজন ভাল লোক।

(৩৭) ইউসুফ (যোসেফ) বললঃ তোমাদেরকে যে খাবার দেওয়া হয় তা পরিবেশন করার আগেই আমি তোমাদেরকে এই স্বপ্নের তাৎপর্য বলে দেব। এই জ্ঞান আমার প্রভুই আমাকে শিক্ষা দিয়েছেন। আমি ঐ লোকদের ধর্ম পরিত্যাগ করেছি যারা ঈশ্বরের উপর বিশ্বাস স্থাপন করে না আর যারা পরলোকে বিশ্বাসী নয়। (৩৮) আর আমি আমার পূর্বপুরুষ ইবরাহীম (আব্রাহাম), ইসহাক (আইজ্যাক) আর ইয়াকুবের (জ্যাকবের) ধর্ম অনুসরণ করেছি। আমাদের এই অধিকার নেই যে, আমরা কোন বস্তুকে ঈশ্বরের অংশীদার স্থাপন করি। এটা আমাদের প্রতি ও সকল মানুষের প্রতি ঈশ্বরের অনুগ্রহ; কিন্তু অধিকাংশ লোক কৃতজ্ঞতা প্রকাশ করে না। (৩৯) হে আমার কারাগারের সাথী! পৃথক পৃথক অনেক উপাস্য ভাল, না কি পরাক্রমশালী এক ঈশ্বর ভাল? (৪০) ঈশ্বর ব্যতীত তোমরা তো কেবল কতকগুলো নামের পূজা করছো যে নামগুলো তোমরা ও তোমাদের পূর্বপুরুষেরা রেখেছো। ঈশ্বর তো ওগুলো সম্পর্কে কোন প্রমাণ পাঠান নি। সত্ত্বা তো কেবল ঈশ্বরেরই। তিনি নির্দেশ দিয়েছেন যেন তোমরা তাঁকে ছাড়া আর কিছুই উপাসনা না কর। এটাই সঠিক ধর্ম; কিন্তু অধিকাংশ মানুষ জানে না।

(৪১) হে আমার কারাগারের সাথীরা! তোমাদের মধ্যে একজন তার মনিবকে মদপান করাবে আর অন্যজনকে শূলে চড়ানো হবে এবং পাখি তার মাথা থেকে আহার করবে। তোমরা যে ব্যাপারে জানতে চাইছ তার সিদ্ধান্ত হয়ে গেছে।

(৪২) দুজনের মধ্যে যে ব্যক্তি মুক্তি পাবে বলে ইউসুফ (যোসেফ) অনুমান করেছিল তাকে বললঃ তুমি তোমার মনিবের কাছে আমার কথা বলবে; কিন্তু শয়তান তাকে মনিবের কাছে তার বিষয় বলবার কথা ভুলিয়ে দিল। সুতরাং ইউসুফকে (যোসেফ) কয়েক বৎসর কারাগারে পড়ে থাকতে হল।

(৪৩) আর রাজা বললঃ আমি স্বপ্নে দেখলাম যে, সাতটি মোটা-তাজা গাভীকে সাতটি রোগা দুর্বল গাভী খেয়ে ফেলছে, আর শস্যের সাতটি সবুজ শীষ ও অপর সাতটি শুকনো শীষ। হে পারিষদবর্গ! আমার স্বপ্নের অর্থ আমাকে বল, যদি তোমরা স্বপ্নের অর্থ জানো। (৪৪) তারা বললঃ এটা একটা কাল্পনিক স্বপ্ন। আর আমরা এরকম স্বপ্নের অর্থ জানি না। (৪৫) ঐ দুজন কয়েদির মধ্যে যে জন মুক্তি পেয়েছিল, দীর্ঘকাল পরে তার (ইউসুফের কথা) স্মরণে এল, সে বললঃ আমি আপনাদেরকে এর অর্থ জানাতে পারবো। অতএব আমাকে (ইউসুফের কাছে) যেতে দিন।

(৪৬) হে ইউসুফ (যোসেফ)! হে সত্যবাদী! আমাকে এই স্বপ্নের তাৎপর্য বলে দাও যে, সাতটি মোটা-তাজা গাভীকে সাতটি দুর্বল গাভী খেয়ে ফেলছে, আর সাতটি সবুজ শস্য শীষ আর অন্য সাতটি শুকনো শীষ। যাতে আমি ওদের কাছে ফিরে যেতে পারি এবং তারা তা জানতে পারে। (৪৭) ইউসুফ (যোসেফ) বললঃ তোমরা সাত বছর চাষাবাদ করবে। এ সময় তোমরা যে, শস্য কেটে আনবে তার মধ্যে তোমাদের খাওয়ার জন্য অল্প পরিমাণ ছাড়া বাকিটা শীষ সমেত রেখে দেবে। (৪৮) এরপরে সাতটি কঠিন বছর আসবে তখন লোকেরা ঐ খাবার খাবে যা পূর্বে জমা করে রাখবে; কেবল সামান্য পরিমাণ ব্যতীত যা তোমরা সংরক্ষণ করে রাখবে। (৪৯) এর পরে একটি বছর আসবে যখন মানুষ প্রচুর বৃষ্টিপাত পাবে এবং সেই বছর মানুষ প্রচুর ফলের রস নিষ্কাশন করবে।

(৫০) রাজা বললঃ ওকে (ইউসুফ) আমার কাছে নিয়ে এস; কিন্তু দূত যখন তার কাছে গেল তখন সে বললঃ তুমি তোমার মনিবের কাছে ফিরে যাও আর তাকে জিজ্ঞাসা কর যে, যে মহিলারা নিজেদের হাত কেটেছিল তাদের খবর কি? আমার প্রভু তো তাদের ষড়যন্ত্র সম্পর্কে ভালভাবে অবহিত আছেন। (৫১) রাজা মহিলাদেরকে বললঃ তোমাদের হাল হকিকত কি যখন তোমরা ইউসুফ কে (যোসেফ) প্ররোচিত করার চেষ্টা করেছিলে? তারা বললঃ ঈশ্বরের মহিমা! তার মধ্যে আমরা কোন দোষ পাইনি। সম্ভ্রান্ত ব্যাক্তিটির স্ত্রী বললঃ এখন সত্য প্রকাশ হয়েছে। আসলে আমিই তাকে প্ররোচিত করেছিলাম আর নিঃসন্দেহে সে সত্যবাদী।

(৫২) (যোসেফ বলল) এটা এজন্য প্রয়োজন ছিল, যাতে সে (সম্ভ্রান্ত ব্যাক্তি) জানতে পারে যে, আমি গোপনে কোন বিশ্বাসঘাতকতা করিনি। আর নিঃসন্দেহে ঈশ্বর বিশ্বাসঘাতকদের ষড়যন্ত্র সফল করেন না। (৫৩) আর আমি নিজেকে দোষমুক্ত মনে করি না। মন তো কু-মন্ত্রণা দিয়েই থাকে; তবে আমার প্রভু অনুগ্রহ করলে ভিন্ন কথা। নিঃসন্দেহে আমার প্রভু ক্ষমাশীল দয়াবান।

(৫৪) আর রাজা বললঃ তোমরা তাকে (যোসেফ) আমার কাছে নিয়ে এস। আমি তাকে বিশেষভাবে আমার জন্য রেখে দেব। তারপর ইউসুফ (যোসেফ) যখন রাজার সাথে কথা বলল, তখন রাজা বললঃ আজ থেকে তুমি আমার এখানে মর্যাদাবান ও বিশ্বস্ত হলে। (৫৫) ইউসুফ (যোসেফ) বললঃ আপনি আমাকে দেশের কোষাগারের দায়িত্ব দিন। আমি একজন ভাল সংরক্ষক ও এব্যাপারে আমার পর্যাপ্ত জ্ঞানও আছে। (৫৬) আর এভাবেই আমি ইউসুফকে (যোসেফকে) ঐ দেশে প্রতিষ্ঠা দান করেছি। সে সেখানে যে কোন কতৃদ্বপূর্ণ অবস্থান নিতে পারতো। আমি যাকে চাই আমার

অনুগ্রহ প্রদান করি। আর আমি পুণ্যবানদের প্রতিফল নষ্ট করি না। (৫৭) আর তাদের কাছে পরকালের প্রতিদানই শ্রেষ্ঠ, যারা বিশ্বাসী ও ঐশীপরায়ণ।

(৫৮) আর ইউসুফের (যোসেফের) ভাইয়েরা মিশরে এল। তারপর তার কাছে পৌঁছাল। আর ইউসুফ তাদের চিনতে পারল; কিন্তু তারা ইউসুফকে চিনতে পারল না। (৫৯) আর সে তাদের সামগ্রীর ব্যবস্থা করে দিয়ে বললঃ তোমাদের বৈমাত্রেয় ভাইকেও আমার কাছে নিয়ে আসবে। দেখছ না যে, আমি শস্য পুরো মেপে দিচ্ছি ? এবং আমিই উত্তম অতিথিপরায়ণ। (৬০) আর যদি তোমরা তাকে আমার কাছে না নিয়ে আস তাহলে আমার কাছে তোমাদের জন্য কোন শস্য বরাদ্দ থাকবে না এবং তোমরা আমার কাছে আসতেও পারবে না। (৬১) তারা বললঃ আমরা তার সম্বন্ধে তার পিতাকে রাজি করানোর চেষ্টা করবো। আর একাজ আমাদের করতেই হবে।

(৬২) আর ইউসুফ (যোসেফ) তার কর্মচারীদের বলে দিল, ওদের পণ্য মূল্য ওদের সামগ্রীর মধ্যে রেখে দিও, যাতে তারা ঘরে পৌঁছানোর পর জানতে পারে। তাহলে ওদের আবার আসার সম্ভাবনা থাকবে। (৬৩) অতঃপর যখন তারা তাদের পিতার কাছে ফিরে এল তখন বললঃ হে পিতা! আমাদের বরাদ্দ বন্ধ করে দেওয়া হয়েছে। অতএব আমাদের সাথে আমাদের ভাইকে (বেঞ্জামিন) যেতে দিন যাতে আমরা বরাদ্দ আনতে পারি। আমরা অবশ্যই তাকে হেফাজত করবো। (৬৪) সে (জ্যাকব) বললঃ পূর্বে তোমাদেরকে ওর (ইউসুফ) ব্যাপারে যেমন বিশ্বাস করেছিলাম এর ব্যাপারেও কি তোমাদের সেই রকম বিশ্বাস করবো? যাইহোক ঈশ্বরই শ্রেষ্ঠ হেফাজতকারী আর তিনিই সবচেয়ে বড় দয়ালু।

(৬৫) আর যখন তারা তাদের মালপত্র খুলল তখন দেখল যে, তাদের পণ্য মূল্যও তাদেরকে ফেরৎ দেওয়া হয়েছে। তারা বললঃ হে

আমাদের পিতা! আমরা আর কি আশা করতে পারি? আমাদের পণ্য মূল্যও আমাদেরকে ফেরৎ দেওয়া হয়েছে। এখন আমরা যাব, আর আমাদের পরিবার-পরিজনদের জন্য খাদ্য সামগ্রী নিয়ে আসবো। আর আমাদের ভাইকে হেফাজতে রাখব। আর এক উট বোঝাই খাদ্য অতিরিক্ত আনব, এতো (যা আমরা নিয়ে এসেছি) স্বল্পই। (৬৬) সে (জ্যাকব) বললঃ আমি একে তোমাদের সাথে কখনই পাঠাব না, যতক্ষণ না তোমরা আমার কাছে ঈশ্বরের নামে এই প্রতিজ্ঞা করবে যে, তোমরা একে আমার কাছে ফিরিয়ে আনবেই। তবে তোমরা নিজেরা (অসহায় পরিস্থিতিতে) পরিবেষ্টিত হলে অন্য কথা। অতঃপর তারা যখন তার কাছে দৃঢ় প্রতিজ্ঞা করল, তখন সে বললঃ আমরা যা বলছি সে ব্যাপারে ঈশ্বর সাক্ষী।

(৬৭) সে (জ্যাকব) বললঃ হে আমার পুত্রেরা! তোমরা সবাই একই দরজা দিয়ে প্রবেশ করবে না বরং ভিন্ন ভিন্ন দরজা দিয়ে প্রবেশ করবে। আমি কিন্তু ঈশ্বরের বিধানের বিরুদ্ধে তোমাদের জন্য কিছু করতে পারবো না। বিধান একমাত্র ঈশ্বরেরই। আমি তাঁর উপরেই ভরসা করি। আর তাঁর উপর সকলেরই ভরসা করা উচিত। (৬৮) আর তারা প্রবেশ করল যেভাবে তাদের পিতা তাদের নির্দেশ দিয়েছিল, সেভাবে প্রবেশ করলেও তাতে ঈশ্বরের ইচ্ছার বাইরে তাদের কোন ফল হয় নি। এতে শুধু ইয়াকুবের (জ্যাকবের) মনের একটি ইচ্ছাই পূরণ হল। নিঃসন্দেহে সে আমারই দেওয়া জ্ঞানের শিক্ষায় জ্ঞানী ছিল; কিন্তু অধিকাংশ লোক তা জানে না।

(৬৯) আর যখন তারা ইউসুফের (যোসেফের) কাছে হাজির হল তখন সে তার ভাই (বেঞ্জামিন) কে কাছে রাখল এবং বললঃ আমিই তোমার ভাই (যোসেফ)। অতএব তাদের কৃতকর্মের জন্য দুঃখ করো না। (৭০) অতঃপর যখন তাদের সামগ্রী প্রস্তুত করে দেওয়া হল তখন সে তার ভাই

এর মালপত্রের মধ্যে পানপাত্রটি রেখে দিল। তারপর একজন ঘোষক ঘোষণা করল, হে যাত্রীদল! নিশ্চয়ই তোমরা চোর। (৭১) তারা তাদেরকে সম্বোধন করে বললঃ তোমরা কি হারিয়েছো? (৭২) তারা বললঃ আমরা রাজার পানপাত্র পাচ্ছি না, আর যে এটি এনে দিতে পারবে সে এক উট বোঝাই সামগ্রী পাবে, আর আমি এই ব্যাপারে প্রতিজ্ঞা করছি। (৭৩) তারা বললঃ ঈশ্বরের শপথ, তোমরা তো জানো আমরা এদেশে অনর্থ ঘটাতে আসিনি এবং আমরা চোরও নই। (৭৪) ইউসুফের (যোসেফের) লোকেরা বললঃ যদি তোমরা মিথ্যুক প্রমাণিত হও তাহলে ঐ চোরের শাস্তি কি হবে? (৭৫) তারা বললঃ তার শাস্তি এই হবে যার মালপত্র থেকে ওটা পাওয়া যাবে সেই তার শাস্তি। আমরা অপরাধীদের এমনই শাস্তি দিয়ে থাকি। (৭৬) অতঃপর ইউসুফ (যোসেফ) তার (ছোট) ভাই এর পূর্বে ওদের থলি দিয়ে তল্লাশি শুরু করল, তারপর তার ভাই এর থলি থেকে পানপাত্রটি বের হল। এভাবে আমি ইউসুফের (যোসেফের) জন্য কৌশল অবলম্বন করি। ঈশ্বরের ইচ্ছা না হলে সে রাজার আইনে নিজের ভাইকে নিতে পারত না। আমি যাকে চাই উচ্চ মর্যাদা দান করি, আর সকল জ্ঞানীর উপরে আছেন এক মহাজ্ঞানী।

(৭৭) তারা বললঃ যদি এ চুরি করে থাকে তাহলে ইতিপূর্বে এর এক ভাই ও চুরি করেছিল। ইউসুফ (যোসেফ) তখন কথাটি নিজের মনে গোপন রেখেছিল, তাদের কাছে প্রকাশ্যে কিছু বলল না। সে নিজের মনে বলেছিলঃ তোমরা নিজেরা খুবই নিকৃষ্ট লোক, আর যা কিছু তোমরা বলছ ঈশ্বর সে সম্পর্কে ভালভাবেই অবগত আছেন। (৭৮) তারা বললঃ হে রাজা! এর এক বৃদ্ধ পিতা আছে; অতএব আপনি এর বদলে আমাদের মধ্যে হতে কাউকে রেখে দিন। আমরা মনে করি আপনি একজন মহানুভব মানুষ। (৭৯) সে উত্তর দিলঃ যার কাছে আমাদের মাল পেয়েছি তাকে ছাড়া অন্যকে ধরতে

ঈশ্বর নিষেধ করেছেন? তাহলে আমরা তো অবশ্যই অত্যাচারী বলে গণ্য হব।

(৮০) যখন তারা তার কাছ থেকে নিরাশ হয়ে গেল তখন একান্তে গোপন পরামর্শ করতে থাকল। তাদের মধ্যে যে বয়োজ্যেষ্ঠ ছিল, সে বললঃ তোমরা কি জানোনা যে, তোমাদের পিতা তোমাদের থেকে ঈশ্বরের নামে দৃঢ় প্রতিজ্ঞা নিয়েছেন আর এর আগেও তোমরা ইউসুফের (যোসেফের) ব্যাপারে অন্যায় করেছ। অতএব আমি এখান থেকে যাব না যতক্ষণ না পিতা আমাকে যাওয়ার অনুমতি দেন কিংবা ঈশ্বর আমার জন্য কোন ব্যবস্থা করে দেন। তিনিই তো শ্রেষ্ঠ ব্যবস্থাপক। (৮১) তোমরা তোমাদের পিতার কাছে ফিরে যাও আর বলঃ হে আমাদের পিতা! তোমার ছেলে চুরি করেছে। আমরা যা জেনেছি কেবল সেই কথাই বললাম। আর আমরা তো অদৃশ্য বিষয় জানি না। (৮২) যে জনপদে আমরা ছিলাম আর যে যাত্রীদের সাথে আমরা এসেছি তাদের কাছে জিজ্ঞেস করে দেখুন। আমরা অবশ্যই সত্য বলছি।

(৮৩) পিতা বললঃ না, তোমরা মনগড়া গল্প বানিয়ে এনেছ। অতএব ধৈর্য ধারণই উত্তম। হয়তো ঈশ্বর সবাইকে আমার কাছে নিয়ে আসবেন। নিশ্চয়ই তিনি মহাজ্ঞানী, প্রজ্ঞাময়। (৮৪) সে মুখ ফিরিয়ে নিল আর বললঃ হায় ইউসুফ (যোসেফ)! আর শোকে তার চোখ দুটি সাদা হয়ে গেল। সে বেদনায় কাতর হয়ে পড়ল। (৮৫) তারা বললঃ ঈশ্বরের শপথ। আপনি কি কেবল ইউসুফের (যোসেফের) স্মরণ করতেই থাকবেন যতক্ষণ না আপনি শারীরিক ভাবে বিধ্বস্ত হবেন অথবা মৃত্যুবরণ করবেন? (৮৬) সে বললঃ আমি শুধু আমার দুঃখ আর মনের কষ্ট ঈশ্বরের কাছে ব্যক্ত করছি আর আমি ঈশ্বরের নিকট হতে এমন কিছু জানি যা তোমরা জান না। (৮৭) হে আমার পুত্রগণ! যাও ইউসুফ (যোসেফ) আর তার ভাইকে অন্বেষণ কর আর ঈশ্বরের দয়া থেকে নিরাশ হয়ো না। অবিশ্বাসীরা ছাড়া কেউ ঈশ্বরের দয়া থেকে নিরাশ হয় না।

(৮৮) অতঃপর তারা যখন আবার ইউসুফের (যোসেফের) কাছে গেল, তারা বললঃ হে রাজা! আমরা ও আমাদের পরিবারবর্গ খুবই কষ্টে আছি এবং আমরা সামান্য পুঁজি নিয়ে এসেছি, আপনি আমাদের পুরো বরাদ্দ দিন আর আমাদের কিছু দানও প্রদান করুন। নিঃসন্দেহে ঈশ্বর দান প্রদানকারীদের প্রতিদান দিয়ে থাকেন। (৮৯) তিনি বললেনঃ তোমরা ইউসুফ (যোসেফ) ও তার ভাইয়ের সাথে কি আচরণ করেছিলে তা কি জান? তোমরা তো অজ্ঞ। (৯০) তারা বললঃ আসলে তুমিই কি ইউসুফ? তিনি বললেন হ্যাঁ, আমিই ইউসুফ আর এ আমার ভাই। ঈশ্বর আমার প্রতি অনুগ্রহ করেছেন। যে ভয় করে ও ধৈর্য ধারণ করে ঈশ্বর সেই সৎকর্মশীলদের প্রতিদান নষ্ট করেন না।

(৯১) ভাইয়েরা বললঃ ঈশ্বরের শপথ! অবশ্যই ঈশ্বর তোমাকে আমাদের উপর শ্রেষ্ঠত্ব দিয়েছেন এবং নিশ্চয়ই আমরা কুপথে ছিলাম। (৯২) ইউসুফ (যোসেফ) বললঃ আজ আর তোমাদের বিরুদ্ধে কোন অভিযোগ নেই, ঈশ্বর তোমাদের ক্ষমা করুন! তিনি সবচেয়ে বড় দয়ালু। (৯৩) তোমরা আমার এই জামাটি নিয়ে যাও আর এটাকে আমার পিতার মুখের উপর রাখো, তার দৃষ্টিশক্তি ফিরে আসবে। আর তোমরা তোমাদের পরিবার-পরিজনদের নিয়ে আমার কাছে এসো।

(৯৪) আর যখন যাত্রীদল (মিশর থেকে) রওয়ানা হল তখন তাদের পিতা (কেনআন থেকে) বললঃ তোমরা যদি আমাকে দিশেহারা মনে না কর তাহলে আমি ইউসুফের (যোসেফের) স্বাগণ পাচ্ছি। (৯৫) লোকেরা বললঃ ঈশ্বরের শপথ। তুমি আসলে তোমার সেই পুরানো বিভ্রান্তির মধ্যেই আছো। (৯৬) অতঃপর যখন সেই সুসংবাদ দাতা এল, সে জামাটি ইয়াকুবের (জ্যাকবের) মুখের উপর রাখল সাথে সাথেই তার দৃষ্টিশক্তি ফিরে এল। সে বললঃ আমি কি তোমাদের বলিনি যে, আমি ঈশ্বরের নিকট

হতে এমন কিছু জানি যা তোমরা জান না। (৯৭) ইউসুফের (যোসেফের) ভাইয়েরা বললঃ হে পিতা! আমাদের পাপের ক্ষমার জন্য প্রার্থনা করুন। নিঃসন্দেহে আমরা অপরাধী ছিলাম। (৯৮) ইয়াকুব (জ্যাকব) বললঃ আমি আমার প্রভুর কাছে তোমাদের জন্য ক্ষমা প্রার্থনা করবো। নিঃসন্দেহে তিনি ক্ষমাশীল ও অতি দয়ালু।

(৯৯) অতঃপর তারা সবাই যখন ইউসুফের (যোসেফের) কাছে পৌঁছাল তখন সে তার মাতা-পিতাকে নিজের কাছে বসাল, আর বললঃ তোমরা ঈশ্বরের ইচ্ছায় নিরাপদে মিশরে থাক। (১০০) আর সে তার মাতা-পিতাকে সিংহাসনের উপর বসালো, আর সকলেই সিজদায় (প্রণত হয়ে) লুটিয়ে পড়ল। আর ইউসুফ (যোসেফ) বলে উঠলঃ পিতা! এটাই আমার সেই স্বপ্নের অর্থ যা আমি অনেকদিন আগে দেখেছিলাম, আমার প্রভু সেটাকে সত্যে পরিণত করেছেন। তিনি আমাকে কারাগার থেকে মুক্ত করে এবং শয়তান আমার আর আমার ভাইদের মধ্যে বৈরিতা সৃষ্টি করার পরও আপনাদের সবাইকে মরুজীবন থেকে এখানে নিয়ে এসে তিনি আমার প্রতি অনুগ্রহ করেছেন। নিঃসন্দেহে আমার প্রভু যা চান তিনি তা নিপুনভাবে সম্পন্ন করেন। তিনিই মহাজ্ঞানী, প্রজ্ঞাময়।

(১০১) হে আমার প্রভু! তুমি আমাকে রাজ্য দান করেছ, আর স্বপ্নের অর্থ জানা শিখিয়েছ। হে আকাশ ও পৃথিবীর স্রষ্টা! ইহলোক ও পরলোকে তুমিই আমার অভিভাবক। তুমি আমাকে তোমার অনুগত অবস্থায় মৃত্যু দিও এবং সংলোকদের সাথে মিলিত করো।

(১০২) এসব হচ্ছে অদৃশ্যালোকের কিছু সংবাদ যা আমি ওহীর (প্রত্যাদেশের) দ্বারা তোমাকে জানাচ্ছি, আর তুমি তো তাদের কাছে উপস্থিত ছিলে না, যখন ইউসুফের (যোসেফের) ভাইয়েরা তাদের কর্ম পরিকল্পনা

ঠিক করছিল আর তারা ষড়যন্ত্র করছিল। (১০৩) আর তুমি যতই চাওনা কেন, অধিকাংশ লোক ঈমান (আস্থা) আনবে না। (১০৪) আর তুমি তাদের কাছে কোন প্রতিদান চাইছো না। এটা তো কেবল এক উপদেশ বিশ্ববাসীর জন্য।

(১০৫) আকাশ ও পৃথিবীতে কত নিদর্শন আছে, মানুষ এসব অতিক্রম করে চলে যায় অথচ এর উপর কোন মনোযোগ দেয় না। (১০৬) আর অধিকাংশ লোক যারা ঈশ্বরকে মানে, তারা তাঁর সাথে অন্যকেও অংশীদারও করে। (১০৭) তবে কি তারা ঈশ্বরের শাস্তি স্বরূপ তাদের উপর কোন দুর্যোগ নেমে আসা কিংবা তাদের অজ্ঞাতসারে হঠাৎ তাদের কাছে প্রলয় এসে পড়া থেকে নিজেদেরকে নিরাপদ মনে করছে? (১০৮) বলঃ এই আমার পথ, আমি জেনে বুঝে ঈশ্বরের দিকে ডাকি, আমি ও আমার অনুসারীরা। আর ঈশ্বর পবিত্র, আর আমি অংশীবাদীদের অন্তর্ভুক্ত নই।

(১০৯) আর আমি তোমার (মুহাম্মাদ) পূর্বে বিভিন্ন জনপদ বাসীর কাছে যত পয়গম্বর পাঠিয়েছি তারা সবাই মানুষই ছিল। আমি তাদের নিকটে প্রত্যাদেশ পাঠাতাম, তারা কি পৃথিবীতে ভ্রমণ করেনি এবং দেখেনি যে, তাদের পূর্ববর্তীদের পরিণতি কি হয়েছিল? পরলোকের ঘরই তো ঐ লোকদের জন্য উত্তম যারা ভয় করে। তবে কি তোমরা বোঝ না? (১১০) অবশেষে যখন পয়গম্বরগণ নিরাশ হয়ে যেত এবং মনে করত যে, তাদেরকে মিথ্যা প্রতিপন্ন করা হয়েছে তখন তাদের কাছে আমার সাহায্য আসত। অতএব আমি যাকে চাইতাম সে রক্ষা পেত। আর অপরাধীদের থেকে আমার শাস্তি রদ করা যায় না।

(১১১) এই ঘটনাবলীতে বুদ্ধিমান লোকদের জন্য বড় শিক্ষা রয়েছে। এটা (কুরআন) কোন বানানো গল্প নয় বরং পূর্ববর্তী গ্রন্থসমূহের সত্যায়নকারী এবং যাবতীয় বিষয়ের বিস্তারিত বিবরণ সমৃদ্ধ আর বিশ্বাসীদের জন্য আছে দিক-নির্দেশনা ও অনুগ্রহ।

অধ্যায় ১৩ : আর - রা'দ (বজ্রধ্বনি)

ঈশ্বরের নামে শুরু যিনি পরম করুণাময় ও অতি দয়ালু।

(১) আলিফ - লাম - মীম - রা। এটা ঈশ্বরের গ্রন্থের বাণী, আর যা কিছু তোমার প্রভুর পক্ষ থেকে তোমার উপর অবতীর্ণ হয়েছে তা সত্য; তবে অধিকাংশ মানুষ তা বিশ্বাস করে না। (২) ঈশ্বরই সেই মহান সত্ত্বা যিনি কোন দৃশ্যমান স্তম্ভ ছাড়াই আকাশ সমূহ উত্তোলন করেছেন, যা তোমরা দেখতে পাচ্ছে। অতঃপর তিনি সিংহাসনে অধিষ্ঠিত হয়েছেন এবং সূর্য ও চন্দ্রকে অনুগত করেছেন। প্রত্যেকে নির্ধারিত সময় অনুযায়ী চলছে। ঈশ্বরই সকল বিষয় পরিচালনা করেন এবং নিদর্শন সমূহ বিশদ ভাবে বর্ণনা করেন, যাতে তোমরা তোমাদের প্রভুর সাক্ষাত সম্বন্ধে নিশ্চিত বিশ্বাসী হও।

(৩) আর তিনিই সেই সত্ত্বা যিনি ভূমিকে বিস্তৃত করেছেন, আর তাতে পাহাড় ও নদ-নদী স্থাপন করেছেন, সেখানে তিনি প্রত্যেক ফলের দুটি করে জোড়া উৎপন্ন করেছেন। তিনি দিনকে রাত দ্বারা আচ্ছাদিত করেন। নিঃসন্দেহে এসব জিনিষে নিদর্শন সমূহ রয়েছে ঐ লোকদের জন্য যারা চিন্তাশীল।

(৪) আর পৃথিবীতে পরস্পর সংলগ্ন ভূখণ্ড, আঙুরের বাগান, শস্যক্ষেত্র এবং একাধিক শীষ বিশিষ্ট ও এক শীষ বিশিষ্ট খেজুর গাছ আছে যা একই জল দ্বারা সিঞ্চিত হয়, তবে ফলের স্বাদে আমি এগুলোর কতককে কতকের চেয়ে উৎকৃষ্ট করে থাকি। নিঃসন্দেহে এতে চিন্তাশীল লোকদের জন্য নিদর্শন রয়েছে।

(৫) আর যদি তুমি বিস্মিত হও তবে অবিশ্বাসীদের একথাটিও একটি বিস্ময়, আমরা যখন মাটি হয়ে যাব তখন কি আমাদেরকে নতুনভাবে সৃষ্টি করা হবে? তারাই ওদের প্রভুকে অবিশ্বাস করেছে এবং ওদেরই গলায় থাকবে লোহার শিকল। তারা নরকের অধিবাসী, তারা সেখানে চিরকাল থাকবে।

(৬) তারা মঙ্গলের পূর্বে অমঙ্গলের জন্য তাড়াতাড়ি করছে। অথচ তাদের আগে এইরূপ অনেক শাস্তির ঘটনা সংঘটিত হয়েছে। আর মানুষের অন্যায় সত্ত্বেও তোমার প্রভু তাদের প্রতি ক্ষমাপরায়ণ। আবার তোমার প্রভু শাস্তি প্রদানেও অত্যন্ত কঠোর।

(৭) আর যারা অবিশ্বাস পোষন করে তারা বলে কেন তার কাছে তার প্রভুর পক্ষ থেকে কোন নিদর্শন অবতীর্ণ হয় নি? আসলে তুমি তো একজন সতর্ককারী মাত্র। আর প্রত্যেক জনগোষ্ঠীর জন্য একজন পথপ্রদর্শক থাকে।

(৮) প্রত্যেক নারী গর্ভে যা বহন করে আর গর্ভাশয়ে যা কমে ও যা বাড়ে ঈশ্বর তা জানেন এবং প্রত্যেক বস্তু তাঁর কাছে একটি নির্দিষ্ট পরিমাণ আছে। (৯) যা অদৃশ্য ও যা দৃশ্যমান তিনি জানেন, তিনি সবচেয়ে মহান ও সর্বোচ্চ মর্যাদাবান। (১০) তোমাদের মধ্যে কোন ব্যক্তি গোপনে কথা বলুক বা প্রকাশ্যে কথা বলুক আর রাতে লুকিয়ে থাকুক বা দিনে চলাফেরা করুক ঈশ্বরের কাছে সবই সমান।

(১১) প্রত্যেক ব্যক্তির সামনে ও পিছনে তত্ত্বাবধায়ক দেবদূত রয়েছে, যে ঈশ্বরের নির্দেশে তাকে নিরীক্ষণ করে থাকে। ঈশ্বর তো কোন জনগোষ্ঠীর অবস্থা পরিবর্তন করেন না যতক্ষণ না তারা নিজেরা তাদের অন্তরে যা আছে তার পরিবর্তন না করে। আর ঈশ্বর যখন কোন জনগোষ্ঠীকে শাস্তি দিতে চান তখন তা রদ করবার কোন উপায় নেই। তিনি ছাড়া তাদের কোন সহায়ক ও নেই।

(১২) তিনিই তোমাদেরকে বিদ্যুৎ দেখান যাতে ভয়ও উৎপন্ন হয় আবার আশাও। আর তিনিই জল থেকে ভারী মেঘ সৃষ্টি করেন। (১৩) আর বজ্রের গর্জন তাঁর প্রশংসার সাথে তাঁরই পবিত্রতা বর্ণনা করে। আর দেবদূতগণও তাঁর ভয়ে (তাঁরই পবিত্রতা বর্ণনা করে) আর তিনি বজ্রপাত করেন এবং এর দ্বারা যাকে চান আঘাত করেন; তবুও তারা ঈশ্বর সম্পর্কে বিতর্ক করে অথচ তিনি প্রচণ্ড প্রতাপশালী।

(১৪) সত্যের আবেদন কেবলমাত্র ঈশ্বরের জন্য, তাঁকে ছাড়া লোক যাকে ডাকে তারা তাদের কোন কাজে আসে না। যেমন জল মুখে পৌঁছাবে এই আশায় কেউ জলের দিকে তার দুই হাত প্রসারিত করে থাকে, কিন্তু তার মুখে জল পৌঁছায় না। আর অবিশ্বাসীদের আহ্বান নিষ্ফল হয়ে থাকে।

(১৫) আকাশ ও পৃথিবীতে যা কিছু আছে সবই প্রসন্ন চিন্তে হোক বা অনিচ্ছায় ঈশ্বরের কাছে প্রণত হয়, এবং সেই সঙ্গে তাদের ছায়াও সকাল ও সন্ধ্যায়। (১৬) বলঃ আকাশ ও পৃথিবীর প্রভু কে? বলে দাও ঈশ্বর। বলঃ তবুও কি তোমরা তাকে ছাড়া এমন কতিপয় অভিভাবক নির্ধারণ করেছ যাদের নিজেদেরই কোন উপকার বা ক্ষতি করার ক্ষমতা নেই? বলঃ অন্ধ আর দৃষ্টিশক্তি সম্পন্ন কি সমান হতে পারে? অথবা অন্ধকার আর আলো কি একরকম হতে পারে? অথবা যাদেরকে তারা ঈশ্বরের সাথে অংশীদার সাব্যস্ত করেছে তারাও কি ঈশ্বরের সৃষ্টির মত সৃষ্টি করেছে যা দেখে তারা বিভ্রান্তিতে পড়েছে? বলঃ ঈশ্বরই সবকিছুর স্রষ্টা এবং তিনি একক ও মহাপরাক্রমশালী।

(১৭) ঈশ্বর আকাশ থেকে বৃষ্টি বর্ষণ করেন, যার দ্বারা নদী উপত্যকা সমূহ ভরে ওঠে এবং তাদের ক্ষমতা অনুযায়ী প্লাবিত হয়। তারপর বন্যা

অনেক ফেনা বয়ে আনে। আর মানুষেরা গহনা বা জিনিষপত্র বানানোর জন্য যে বস্তু আঙুনে ফোটায় তা থেকেও অনুরূপ এক প্রকার ফেনা তৈরী হয়। এভাবেই ঈশ্বর সত্য ও মিথ্যার উদাহরণ বর্ণনা করেন। অতএব ফেনা তো শুকিয়ে সমাপ্ত হয়ে যায়, আর যে জিনিষ মানুষের উপকারে আসে তা ভূমিতে থেকে যায়। ঈশ্বর এভাবেই উদাহরণ দিয়ে থাকেন।

(১৮) যারা তাদের প্রভুর ডাকে সাড়া দেয়, তাদের জন্য কল্যাণ রয়েছে আর যারা তার আহ্বান অমান্য করে, তাদের কাছে যদি পৃথিবীতে যা কিছু আছে তা সবই থাকত, এবং তার সাথে আরো সমপরিমাণ থাকত তাহলে অবশ্যই তারা তা মুক্তিপণ স্বরূপ (শেষ বিচারের দিনে) দিতে চাইত; তাদের জন্য রয়েছে কঠিন হিসাব, তাদের আবাস হবে নরক, আর তা কতইনা খারাপ ঠিকানা!

(১৯) অতএব যে ব্যক্তি জানে যে, তোমার কাছে তোমার প্রভুর পক্ষ থেকে যা অবতীর্ণ হয়েছে তা সত্য, সে কি ঐ ব্যক্তির সমান হতে পারে যে অন্ধ? বস্তুত বুদ্ধিমানেরাই উপদেশ গ্রহণ করে থাকে।

(২০) এরা এমন লোক, যারা ঈশ্বরের অঙ্গীকার পূরণ করে এবং প্রতিজ্ঞা ভঙ্গ করে না। (২১) আর ঈশ্বর যে সম্পর্ক অক্ষুন্ন রাখতে আদেশ করেছেন, তা অক্ষুন্ন রাখে এবং তাদের প্রভুকে ভয় করে ও কঠিন হিসাবের আশংকা করে। (২২) আর যারা তার প্রভুর সন্তুষ্টির আশায় ধৈর্য ধারণ করে, প্রার্থনা করে এবং আমার দেওয়া জিনিষ হতে গোপনে ও প্রাকাশ্যে খরচ করে, এবং ভাল দ্বারা মন্দকে প্রতিরোধ করে, পরলোকের ঘর ওদেরই জন্য। (২৩) তারা চিরস্থায়ী উদ্যানে প্রবেশ করবে এবং তাদের সঙ্গে তাদের সৎকর্মশীল পিতা, স্ত্রী ও সন্তানেরা। দেবদূতগণ প্রত্যেকটি দরজা দিয়ে তাদের কাছে আসবে।

(২৪) এবং বলবে তোমাদের উপর শান্তি বর্ষিত হোক ঐ ধৈর্যের প্রতিদান স্বরূপ যা তোমরা ধারণ করেছিলে। কতই না উত্তম এই পরলোকের আবাস!

(২৫) আর যারা ঈশ্বরের সাথে দৃঢ় অঙ্গীকার করার পর তা ভঙ্গ করে এবং ঈশ্বর যা অটুট রাখতে বলেছেন তা ছিন্ন করে, পৃথিবীতে অশান্তি সৃষ্টি করে তাদের জন্য অভিসম্পাত; আর তাদের জন্য রয়েছে নিকৃষ্ট আবাস।^১

(২৬) ঈশ্বর যাকে চান অধিক জীবিকা দান করেন আর যাকে চান সঙ্কুচিত করে দেন। তারা পার্থিব জীবন নিয়ে আনন্দ করে, অথচ ঐ পার্থিব জীবন পরলোকের তুলনায় এক তুচ্ছ সামগ্রী ব্যতীত কিছুই নয়।

(২৭) আর যারা অবিশ্বাসী তারা বলে-তার উপর তার প্রভুর পক্ষ থেকে কোন নিদর্শন আসেনি কেন? বলঃ ঈশ্বর যাকে চান বিভ্রান্ত করে দেন, আর তিনি তাঁর পথ তাকে দেখান যে তাঁর দিকে মনসংযোগ করে, (২৮) এবং যারা বিশ্বাস স্থাপন করেছে আর যাদের অন্তর ঈশ্বরের স্মরণে সন্তুষ্ট হয়। শোন, ঈশ্বরের স্মরণেই অন্তর প্রশান্ত হয়ে থাকে। (২৯) যারা আস্থাবান আর সৎকর্মশীল তাদের জন্য সুসংবাদ আর সুন্দর আবাস।

(৩০) এভাবেই আমি তোমাকে একটি মানবগোষ্ঠীর কাছে পাঠিয়েছি যার পূর্বে আরো অনেক মানবগোষ্ঠী অতিক্রান্ত হয়েছে, যাতে তুমি মানুষকে

^১ বিঃ দ্রঃ (১৩ঃ ২৫) মানুষ, ঈশ্বরের সাথে সম্পর্কিত প্রাকৃতিক বন্ধনে এবং মানুষের সঙ্গে সম্পর্কিত মানবতার বন্ধনে। এই বন্ধন ছিন্ন করার অর্থ ঈশ্বরের পৃথিবীতে ভারসাম্য বিঘ্নিত করা। ঈশ্বরের পৃথিবীতে অবস্থানকালে ঐ ভারসাম্যযুক্ত শান্তিপূর্ণ জীবনের প্রতি ভালোবাসা স্থাপনের মাধ্যমে, আমরা ঐ বন্ধনগুলির প্রতি সুবিচার করতে পারি। ঈশ্বর ও মানুষের প্রতি যথার্থ সম্পর্কসম্বন্ধে সতর্ক না হয়ে, ঐ বন্ধনগুলি থেকে যে নিজেকে মুক্ত করতে চায়, সে আসলে পৃথিবীতে অনর্থ সৃষ্টি করে।

ঐ খবর শুনিye দাও যা আমি তোমার কাছে পাঠিয়েছি। আর তারা পরম দয়ালু ঈশ্বরকে অবিশ্বাস করেছে। বলঃ তিনিই আমার প্রভু, তিনি ছাড়া কোন উপাস্য নেই, আমি তাঁরই উপর ভরসা করেছি এবং তাঁর কাছেই ফিরতে হবে।

(৩১) যদি এমন কুরআন অবতীর্ণ হত যার দ্বারা পাহাড় চলতে শুরু করতো, অথবা পৃথিবী টুকরো টুকরো হয়ে যেত অথবা মৃতেরা কথা বলত (তবু ও তারা এর প্রতি বিশ্বাস স্থাপন করতো না); বরং সব অধিকার ঈশ্বরের। আস্থাবানরা কি অবগত নয় যে, যদি ঈশ্বর ইচ্ছা করতেন তাহলে সব মানুষকে পথ দেখাতেন, আর অবিশ্বাসীদের উপর কোন না কোন বিপত্তি আসতেই থাকে, ওদের কর্মের কারণে, কিংবা এই বিপত্তি তাদের বাড়ি ঘরের কাছে নেমে আসতে থাকবে, যতক্ষণ না ঈশ্বরের প্রতিশ্রুতি পূর্ণ হয়। নিশ্চিতরূপে ঈশ্বর প্রতিশ্রুতি ভঙ্গ করেন না। (৩২) আর তোমার পূর্বেও পয়গম্বরদেরকে উপহাস করা হয়েছে, তখন আমি অবিশ্বাসীদের কিছুটা অবকাশ দিয়েছি, তারপর তাদেরকে পাকড়াও করেছি। তাহলে দেখ, কেমন ছিল আমার শাস্তি।

(৩৩) তবে কি যিনি প্রত্যেক ব্যক্তির কর্মের হিসাব নেবেন, (আর যে কিছুই করার সামর্থ রাখে না, সমান হবে?) অথচ তারা ঈশ্বরের অংশীদার স্থাপন করেছে। বলঃ তোমরা তাদের নাম বল। তোমরা কি ঈশ্বরকে পৃথিবীর এমন কোন খবর জানাতে চাও, যা তিনি জানেন না? অথবা তোমরা অসার কথা বলছ? আসলে অবিশ্বাসীদের প্রতারণা আকর্ষণীয় করে দেওয়া হয়েছে এবং তাদেরকে সৎপথ থেকে বিরত রাখা হয়েছে। আর ঈশ্বর যাকে বিভ্রান্ত করেন তার জন্য কোন পথ প্রদর্শক নেই। (৩৪) তাদের জন্য পার্থিব জীবনেও শাস্তি আছে আর পরলোকের শাস্তি তো খুবই কঠোর। ঈশ্বরের শাস্তি হতে তাদের রক্ষা করার মত কেউ নেই।

(৩৫) আর স্বর্গের উদাহরণ যা ঈশ্বরভীরুদের জন্য প্রতিশ্রুতি করা হয়েছে তা এমন যে, তার পাদদেশ দিয়ে নদী প্রবাহিত হবে, তার ফল ও ছায়া চিরদিন থাকবে, এই পরিণাম তাদের জন্য যারা ঈশ্বরকে ভয় করে, আর অবজ্ঞাকারীদের পরিণাম নরক।

(৩৬) এবং যাদেরকে আমি গ্রহণ দিয়েছিলাম, তারা তোমার প্রতি যা অবতীর্ণ হয়েছে তাতে খুশী, আর ওদের মধ্যে এমনও লোক আছে যারা এর কিছু অংশকে অবিশ্বাস করে। বলঃ আমাকে আদেশ দেওয়া হয়েছে যে, আমি ঈশ্বরের উপাসনা করি, আর কাউকে যেন তাঁর অংশীদার না বানাই। তাঁর কাছেই আমি প্রার্থনা করি এবং তাঁর কাছেই আমার প্রত্যাবর্তন। (৩৭) আর এই ভাবেই আমি একে (কুরআন) এক নির্দেশ রূপে আরবী ভাষায় অবতীর্ণ করেছি। জ্ঞানপ্রাপ্তির পর যদি তুমি তাদের খেয়ালখুশীর অনুসরণ কর, তাহলে ঈশ্বরের মোকাবিলায় তুমি কোন অভিভাবক বা কোন রক্ষক পাবে না।

(৩৮) আর আমি তোমার পূর্বেও অনেক পয়গম্বর পাঠিয়েছি আর তাদেরকে স্ত্রী ও সন্তান দিয়েছি, আর কোন পয়গম্বরের জন্য এ সম্ভব নয় যে, সে ঈশ্বরের অনুমতি ছাড়া কোন নিদর্শন নিয়ে আসে। প্রতিটি প্রতিশ্রুতি লিপিবদ্ধ আছে। (৩৯) ঈশ্বর যা ইচ্ছা নিশ্চিন্ত করে দেন এবং বহাল রাখেন। আর তাঁরই কাছে রয়েছে মূল গ্রন্থ।

(৪০) আমি ওদের সাথে যে প্রতিশ্রুতি দিয়েছি তার কিছু অংশ তোমাকে দেখাই অথবা (তার পূর্বে) তোমার মৃত্যু ঘটাই, তাহলেও তোমার কর্তব্য তো শুধু সতর্ক করা। হিসাব নেওয়ার দায়িত্ব তো আমার। (৪১) তারা কি দেখে না যে, আমি ভূমিকে চতুর্দিক থেকে সঙ্কুচিত করে আনছি? ঈশ্বর আদেশ করেন, তাঁর আদেশকে কেউ রদ করতে পারে না আর তিনি খুব

শিঘ্র হিসাব নেবেন। (৪২) এদের পূর্বে যারা ছিল তারাও কৌশল করেছিল, তবে ঈশ্বরই সবচেয়ে বড় কৌশলী। তিনি জানেন প্রত্যেকে কি করেছে। আর অবিশ্বাসীরা শিঘ্রই জানতে পারবে পরলোকের আবাস কার জন্য।

(৪৩) আর অবিশ্বাসীরা বলে, তুমি ঈশ্বর প্রেরিত নও, বলঃ আমার আর তোমাদের মধ্যে ঈশ্বরের সাক্ষীই যথেষ্ট, আর ওদের সাক্ষী যাদের গ্রন্থের জ্ঞান আছে।

অধ্যায় ১৪ : ইবরাহীম (আবরাহাম)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-রা। এই গ্রন্থ যা আমি তোমার প্রতি অবতীর্ণ করেছি, যাতে তুমি তাদের প্রভুর নির্দেশক্রমে মানুষকে অন্ধকার থেকে আলোর দিকে আনতে পার, পরাক্রমশালী ও প্রশংসিত ঈশ্বরের পথে। (২) সেই ঈশ্বরের দিকে, যিনি আকাশ ও পৃথিবীর সবকিছুর মালিক আর অবজ্ঞাকারীদের জন্য এক মহা বিনাশক শাস্তি রয়েছে। (৩) যারা পরলোকের তুলনায় পার্থিব জীবনকে পছন্দ করে, ঈশ্বরের পথে চলতে বাধা দেয় এবং তাতে বক্রতা অন্বেষণ করে, তারা সুদূরপ্রসারী বিভ্রান্তির মধ্যে রয়েছে।

(৪) আর আমি যে বার্তাবাহকই পাঠিয়েছি তার সম্প্রদায়ের ভাষায় পাঠিয়েছি, যাতে সে তাদের কাছে বুঝিয়ে বলতে পারে। ঈশ্বর যাকে চান বিপথগামী করেন আর যাকে চান সঠিক পথ প্রদান করেন। তিনি পরাক্রমশালী, প্রজ্ঞাময়।

(৫) আর আমি মুসাকে (মোজেসকে) আপন নিদর্শনসহ এই বলে পাঠিয়েছিলাম যে, তোমার লোকদের অন্ধকার থেকে বের করে আলোতে নিয়ে এসো এবং তাদেরকে ঈশ্বরের দিবসগুলির স্মরণ করিয়ে দাও,

নিঃসন্দেহে এতে বড় নিদর্শন রয়েছে তাদের জন্য যারা ধৈর্য ধারণ করে আর কৃতজ্ঞতা প্রকাশ করে।

(৬) আর যখন মুসা তার সম্প্রদায়কে বললঃ তোমাদের প্রতি ঈশ্বরের সেই অনুগ্রহ স্মরণ কর, যখন তিনি তোমাদেরকে ফ্যারাও এর লোকদের থেকে রক্ষা করেছিলেন, যারা তোমাদের কঠিন কষ্ট দিত আর যারা তোমাদের পুত্র সন্তান গুলি মেরে ফেলত আর তোমাদের নারীদেরকে বাঁচিয়ে রাখত। এতে তোমাদের প্রভুর পক্ষ থেকে বড় পরীক্ষা ছিল। (৭) যখন তোমাদের প্রভু ঘোষণা করলেন যে, যদি তোমরা কৃতজ্ঞ হও তাহলে তোমাদেরকে আরো দেব। আর যদি তোমরা কৃতঘ্ন হও তাহলে আমার শাস্তি অত্যন্ত কঠোর। (৮) আর মুসা (মোজেস) বললঃ যদি তোমরা অবজ্ঞা কর আর পৃথিবীর সব মানুষ ও যদি অবজ্ঞাকারী হয়ে যায় তাহলেও ঈশ্বর অভাবমুক্ত, প্রশংসনীয়।

(৯) তাদের সংবাদ কি তোমার কাছে আসেনি, যারা তোমার পূর্বে চলে গেছে? নূহ (নোয়াহ), আদ, সামূদের সম্প্রদায়, আর তাদের পরে যারা এসেছিল, যাদেরকে ঈশ্বর ছাড়া কেউ জানে না। তাদের বার্তাবাহক তাদের কাছে স্পষ্ট প্রমাণ নিয়ে এসেছিল; কিন্তু তারা নিজেদের হাত মুখে রেখে বলত-‘যা দিয়ে তোমাকে পাঠানো হয়েছে আমরা তা মানি না, আর যেদিকে তুমি আমাদের ডাকছ সে ব্যাপারে আমরা এক বিভ্রান্তিকর সন্দেহের মধ্যে আছি।’

(১০) তাদের পয়গম্বরগণ বলেছিল, আকাশ ও পৃথিবীর সৃষ্টিকর্তা ঈশ্বর সম্পর্কে কি কোন সন্দেহ আছে? তিনি তোমাদের ডাকছেন তোমাদের কিছু পাপ ক্ষমা করে দিতে এবং তোমাদেরকে এক নির্দিষ্ট সময় পর্যন্ত অবকাশ দিতে। তারা বলতোঃ তোমরা আমাদের মত মানুষ ছাড়া আর কিছু নও।

তোমরা আমাদেরকে তাদের উপাসনা থেকে বিরত রাখতে চাও, যাদের উপাসনা আমাদের পূর্বপুরুষরা করত। তোমরা আমাদের কাছে স্পষ্ট প্রমাণ নিয়ে এস।

(১১) তাদের পয়গম্বরগণ তাদের বলেছিল, আমরা তোমাদের মত মানুষ ছাড়া অন্য কিছুই নই ঠিকই; কিন্তু ঈশ্বর তাঁর বান্দাদের মধ্যে যাকে চান অনুগ্রহ করেন আর ঈশ্বরের অনুমতি ব্যতীত কোন চমৎকারিত্ব দেখানো আমাদের কাম্য নয়। আর আস্ত্রাবানদের ঈশ্বরের উপরেই বিশ্বাস করা উচিত। (১২) আর আমরা ঈশ্বরকে বিশ্বাস করবোই না বা কেন? যখন তিনিই আমাদেরকে পথ দেখিয়েছেন। আর যে কষ্টই তোমরা আমাদের দাও না কেন আমরা তাতে অবশ্যই ধৈর্য ধারণ করবো আর নির্ভরকারীদের ঈশ্বরের উপরেই নির্ভর করা উচিত।

(১৩) আর অবিশ্বাসীরা তাদের পয়গম্বরদের বলেছিল, হয় আমরা তোমাদেরকে আমাদের ভূমি থেকে বহিস্কার করে দেব অথবা তোমরা আমাদের দলে ফিরে আসবে। তখন পয়গম্বরদের কাছে তাদের প্রভু এই মর্মে বাণী পাঠালেন যে আমি ঐ অত্যাচারীদের ধ্বংস করে দেব। (১৪) আর তাদের পরে তোমাদেরকে পৃথিবীতে অধিষ্ঠিত করবো। এটা তাদের জন্য যে আমার সঙ্গে সাক্ষাতের ভয় করে এবং সতর্কতার প্রতি সচেতন হয়।

(১৫) যখন তারা বিজয় কামনা করেছিল তখন প্রত্যেক দান্তিক ওস্বেচ্ছাচারী হতাশ হয়েছিল। (১৬) ওদের সামনে নরক আর ওদেরকে পুঁজের মত জল পান করতে দেওয়া হবে। (১৭) যা সে অতি কষ্টে গলধঃকরণ করবে এবং তা গলধঃকরণ করা সহজ হবে না। আর সবদিক থেকে মৃত্যু তাকে ঘিরে ধরবে; কিন্তু সে কোন প্রকারেই মরবে না, তার সামনে থাকবে কঠিন শাস্তি।

(১৮) যারা তাদের প্রভুকে অবিশ্বাস করে, তাদের কর্ম ঐ ছাই এর

মত যাকে এক ঝড়ের দাপটে উড়িয়ে নিয়ে যায়। তারা তাদের উপার্জনের কিছুই পায় না। এটাই সুদূর প্রসারী বিভ্রান্তি। (১৯) তুমি কি লক্ষ্য করনি যে, ঈশ্বর আকাশ ও পৃথিবী যথাযথ ভাবে সৃষ্টি করেছেন। যদি তিনি চান তাহলে তোমাদেরকে পরিহার করে আর এক নতুন সৃষ্টি আনয়ন করতে পারেন। (২০) আর ঈশ্বরের কাছে কিছুই কঠিন নয়।

(২১) ঈশ্বরের সামনে সবাইকে দাঁড়াতে হবে। আর দুর্বলেরা ঐ লোকদের বলবে যারা বড়াই করত, আমরা তোমাদের অধীনস্ত ছিলাম। তাহলে তোমরা কি ঈশ্বরের শাস্তি হতে আমাদের রক্ষা করবে? তারা বলবে, যদি ঈশ্বর আমাদের কোন পথ দেখাতেন তাহলে আমরা তোমাদের অবশ্যই সেই পথ দেখাতাম। এখন আমরা অস্থির হই আর ধৈর্য ধারণ করি, আমাদের জন্য উভয়ই সমান। আমাদের বাঁচার কোন উপায় নেই।

(২২) আর যখন বিষয়টির ফয়সালা হয়ে যাবে তখন শয়তান বলবে, ঈশ্বর তোমাদের সাথে সত্য অঙ্গীকার করেছিলেন। আর আমিও তোমাদের সাথে অঙ্গীকার করেছিলাম; কিন্তু আমি অঙ্গীকার ভঙ্গ করেছি। আর তোমাদের উপর আমার কোন হাত ছিল না; কিন্তু আমি তোমাদের ডাকলাম আর তোমরা আমার কথা মেনে নিলে। অতএব তোমরা আমাকে দোষ দিওনা; বরং নিজেদেরই দোষ দাও। আমি তোমাদেরকে সাহায্য করতে পারবো না আর তোমরা ও আমাকে সাহায্য করতে পারবে না। তোমরা যে পূর্বে আমাকে ঈশ্বরের অংশীদার স্থাপন করেছিলে তার সাথে আমার কোনই সম্পর্ক নেই। নিঃসন্দেহে অন্যায়কারীদের জন্য যন্ত্রনাদায়ক শাস্তি রয়েছে।

(২৩) আর যারা বিশ্বাস স্থাপন করেছে এবং সৎকর্ম করেছে তারা এমন উদ্যানে প্রবেশ করবে যার পাদদেশ দিয়ে নদী প্রবাহিত হতে থাকবে। সেখানে তারা তাদের প্রভুর আদেশে চিরকাল থাকবে।

সেখানে তাদের অভিবাদন হবে ‘শান্তি’।

(২৪) তুমি কিলক্ষ্য কর না কিভাবে ঈশ্বর পবিত্র বাক্যকে তুলনা করেছেন উত্তম বৃক্ষের সাথে যার শিকড় হয় মজবুত এবং শাখা থাকে আকাশে উত্থিত। (২৫) তার প্রভুর আদেশে সবসময় তা ফল প্রদান করে। আর ঈশ্বর মানুষের জন্য উপমা দেন যাতে তারা সুপথ গ্রহণ করে। (২৬) আর অপবিত্র বাক্যের উদাহরণ একটি মন্দ বৃক্ষের মত যা মাটি থেকেই উপড়ে ফেলা হয়েছে যার কোন স্থিতি নেই।

(২৭) ঈশ্বর আস্তাবানদের একটি মজবুত বাক্য দ্বারা ইহলোক ও পরলোকে অবস্থান মজবুত করেন। আর ঈশ্বর অন্যায়কারীদেরকে বিপথে যাওয়ার জন্য ছেড়ে দেন। আর ঈশ্বর যা চান তাই করেন।

(২৮) তুমি কি তাদের দেখনি যারা ঈশ্বরের অনুগ্রহের প্রতি অকৃজ্ঞতা প্রকাশ করে এবং তাদের সম্প্রদায়কে ধ্বংসের স্থানে নামিয়ে আনে? (২৯) নরকে, যার মধ্যে তারা প্রবেশ করবে, আর এটা একটা নিকৃষ্ট আবাসস্থল। (৩০) আর তারা ঈশ্বরের সমকক্ষ স্থাপন করিয়েছিল, যাতে তারা মানুষকে ঈশ্বরের পথ থেকে বিচ্যুত করে। বলঃ কয়েকদিন ভোগ করে নাও, শেষ পর্যন্ত তোমাদের গন্তব্য তো নরক।

(৩১) আমার যে বান্দা আমার উপর বিশ্বাস স্থাপন করেছে, তাকে বলে দাও সে যেন প্রার্থনা প্রতিষ্ঠা করে আর যা কিছু আমি তাকে দিয়েছি তা থেকে প্রকাশ্যে ও গোপনে খরচ করে, এমন দিন আসার আগে যে দিন কোন ক্রয়-বিক্রয় থাকবে না আর কোন বন্ধুত্ব কাজে আসবে না।

(৩২) ঈশ্বর হচ্ছেন সেই মহান সত্ত্বা যিনি আকাশও পৃথিবী সৃষ্টি করেছেন এবং আকাশ থেকে বৃষ্টি বর্ষণ করেছেন। অতঃপর তদ্বারা তোমাদের জীবিকার জন্য বিভিন্ন প্রকারের ফল উৎপন্ন করেছেন। তিনি

নৌযানকে তোমাদের অধীনে করে দিয়েছেন তাই তাঁর আদেশেই সেগুলো সমুদ্রে চলে আর তিনি নদী সমূহকে তোমাদের কল্যাণে নিয়োজিত করেছেন। (৩৩) আর তিনি সূর্য ও চন্দ্রকে তোমাদের জন্য নিয়োজিত করেছেন তারা অবিরাম চলছে আর তিনি রাত ও দিনকে তোমাদের কাজে লাগিয়েছেন। (৩৪) তোমরা তাঁর কাছে যা যা চেয়েছো তিনি তোমাদেরকে তা সবই দিয়েছেন। যদি তোমরা ঈশ্বরের অনুগ্রহ গণনা কর তাহলে তা গুণে শেষ করতে পারবে না। নিঃসন্দেহে মানুষ বড়ই অন্যায়কারী আর কৃতঘ্ন।

(৩৫) আর যখন ইবরাহীম (আব্রাহাম) বললঃ হে আমার প্রভু! এই নগরকে (মক্কা) শান্তির নগর বানিয়ে দাও আর আমাকে ও আমার সন্তানদের মূর্তিপূজা থেকে দূরে রাখ। (৩৬) হে আমার প্রভু ! এই মূর্তিগুলো অনেক মানুষকে পথভ্রষ্ট করে দিয়েছে। অতএব যে, আমাকে অনুসরণ করে সে আমার (দলভুক্ত)। আর যে আমার কথা মানেনি তার ব্যাপারে তুমি ক্ষমাশীল, দয়ালু।

(৩৭) হে আমাদের প্রভু ! আমি আমার বংশধরদের কতককে এক বন্ধ্যভূমিতে (অকৃষিযোগ্য ভূমি) তোমার ঘরের (কাবা) নিকট বাসিন্দা করলাম। হে আমাদের প্রভু ! যাতে তারা প্রার্থনা করে। অতএব তুমি মানুষের অন্তর ওদের দিকে আকৃষ্ট করে দাও এবং ফলফলাদি দ্বারা ওদের জীবিকার ব্যবস্থা কর, যাতে তারা কৃতজ্ঞতা প্রকাশ করে।

(৩৮) হে আমাদের প্রভু ! আমরা যা গোপন করি আর যা প্রকাশ করি তা সবই তুমি জান। আকাশ ও পৃথিবীর কোন কিছুই ঈশ্বরের কাছে গোপন নয়। (৩৯) ঈশ্বরকে অশেষ ধন্যবাদ, যিনি বৃদ্ধ বয়সে আমাকে ইসমাঈল ও ইসহাক (আইজ্যক) দান করেছেন। নিঃসন্দেহে আমার প্রভু প্রার্থনা শুনে থাকেন।

(৪০) হে আমার প্রভু! আমাকে প্রার্থনাকারী করুন, আর আমার সন্তানদেরও। হে আমাদের প্রভু! আমার প্রার্থনা গ্রহণ করুন। (৪১) হে আমাদের প্রভু! যে দিন হিসাব গ্রহণ করা হবে, সেদিন আমাকে, আমার পিতা-মাতাকে এবং আস্থাবানদেরকে ক্ষমা করুন।

(৪২) আর কখনও মনে করো না যে, অত্যাচারীরা যা করছে ঈশ্বর তার খবর রাখেন না। তিনি তাদেরকে সেই দিন পর্যন্ত অবকাশ দিচ্ছেন যে দিন তাদের চক্ষু ভয়ে স্থির হয়ে যাবে। (৪৩) ভীত বিহ্বল চিত্তে তারা মাথা উঁচু করে দৌড়াতে থাকবে, ওদের দৃষ্টি ওদের দিকে ফিরবে না আর তাদের অন্তর শূন্য হবে।

(৪৪) আর সেই দিন সম্পর্কে মানুষদের সতর্ক করে দাও যে দিন ওদের উপর শাস্তি নেমে আসবে। সেই সময় অত্যাচারীরা বলবে, হে আমাদের প্রভু! আমাদের আর একটু সময় দিন, আমরা আপনার আমন্ত্রণ গ্রহণ করবো আর বার্তাবাহকদের অনুসরণ করবো। তোমরা কি ইতিপূর্বে শপথ করে বলোনি যে, তোমাদের কোন পতন নেই? (৪৫) আর তোমরা ওদের জনপদে বসবাস করেছ যারা নিজেরাই নিজেদের উপর অত্যাচার করেছিল। আর তোমরা ভালভাবেই জান আমি ওদের সাথে কিরূপ আচরণ করেছিলাম। আর আমি তোমাদেরকে উদাহরণও বর্ণনা করেছিলাম। (৪৬) তারা তাদের সর্বাঙ্গক চক্রান্ত করেছিল তবে তাদের সমস্ত চক্রান্ত ঈশ্বর ব্যর্থ করে দিয়েছিলেন। যদিও তাদের চক্রান্ত ছিল পাহাড় টলে যাওয়ার মত।

(৪৭) তুমি কখনও ঈশ্বরকে তাঁর পয়গম্বরদের সাথে প্রতিশ্রুতি ভঙ্গকারী মনে করো না। নিঃসন্দেহে ঈশ্বর মহা পরাক্রমশালী, প্রতিশোধ গ্রহণকারী। (৪৮) যে দিন এই পৃথিবী পরিবর্তিত হয়ে অন্য পৃথিবী হবে আর আকাশমণ্ডলীও এবং সবাইকে এক পরাক্রমশালী ঈশ্বরের সামনে উপস্থিত হতে হবে।

(৪৯) আর তুমি সেদিন অপরাধীদের শিকল পরানো অবস্থায় দেখতে পাবে। (৫০) ওদের পোষাক হবে আলকাতরার এবং তাদের মুখমণ্ডল আগুনে আচ্ছন্ন থাকবে। (৫১) এভাবে ঈশ্বর প্রত্যেক ব্যক্তিকে তার কর্মের প্রতিফল দেবেন। নিঃসন্দেহে ঈশ্বর দ্রুতহিসাব গ্রহণকারী। (৫২) এটা মানুষের জন্য এক ঘোষণা, যাতে এর মাধ্যমে তাদেরকে সতর্ক করে দেওয়া যায় আর যাতে তারা জানতে পারে যে, তিনিই একমাত্র উপাস্য এবং যাতে বুদ্ধিমানেরা শিক্ষা গ্রহণ করে।

অধ্যায় ১৫ : আল - হিজর (শিলাময় প্রান্তর)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ লাম রা। এগুলোবাণী মহাগ্রন্থের, সুস্পষ্ট কুরআনের। (২) এমন একটা সময় আসবে যখন অবিশ্বাসীরা কামনা করবে যদি তারা মান্যকারী হত! (৩) ওদেরকে খেতে, ভোগ করতে আর আশায় ভুলে থাকতে দাও, শীঘ্রই তারা জানতে পারবে। (৪) আর আমি যে জনপদকেই ধ্বংস করেছি তার জন্য একটি নির্দিষ্ট লিখিত সময় ছিল। (৫) কোন জাতি তার নির্দিষ্ট সময়কাল ত্বরান্বিত বা বিলম্বিত করতে পারে না।

(৬) আর তারা বলেঃ ওহে! যার উপর পথ নির্দেশ (কুরআন) অবতীর্ণ হয়েছে! তুমি তো নিঃসন্দেহে একটা পাগল। (৭) তুমি যদি সত্য হও তাহলে আমাদের কাছে দেবদূতদের নিয়ে আসো না কেন? (৮) আমি দেবদূতদের কেবলমাত্র সুবিচার করার জন্য পাঠাই আর তখন মানুষদের আর অবকাশ দেওয়া হয় না।

(৯) এই অনুস্মারক (কুরআন) আমিই অবতীর্ণ করেছি আর আমিই এর সংরক্ষক।

(১০) আর আমি তোমার পূর্ববর্তী সম্প্রদায় গুলোর মধ্যে পয়গম্বর পাঠিয়েছি। (১১) তাদের কাছে এমন কোন পয়গম্বর আসে নাই, যাকে তারা উপহাস করতো না। (১২) এভাবেই আমি তা (উপহাস) পাপীদের অন্তরে সঞ্চার করি। (১৩) তারা এটা বিশ্বাস করবে না। আর এই রীতি পূর্বের লোকদের থেকে চলে আসছে। (১৪) যদি আমি ওদের জন্য আসমানের কোন দরজা খুলে দিতাম যাতে তারা আরোহন করত। (১৫) তবুও তারা বলত আমাদের দৃষ্টিভ্রম হচ্ছে; বরং আমাদের উপর জাদু করা হয়েছে।

(১৬) আর আমি আকাশে তারামণ্ডল স্থাপন করেছি এবং পর্যবেক্ষকদের জন্য তা সুশোভিত করেছি। (১৭) আর তাকে প্রত্যেক বিতাড়িত শয়তান থেকে সুরক্ষিত করেছি। (১৮) যদি কেউ চুরি করে গোপনে কথা শুনতে চায় তাহলে এক প্রদীপ্ত অঙ্গার তার পশ্চাদ্ধাবন করে।

(১৯) আর আমিই পৃথিবীকে সুবিস্তৃত করেছি, সেখানে পর্বতমালা স্থাপন করেছি এবং তাতে প্রতিটি পরিমিত বস্তু উৎপন্ন করেছি। (২০) আর আমি তোমাদের জন্য এতে জীবিকার ব্যবস্থা করেছি, আর ঐ সব সৃষ্টিজগতের জন্য যাদের জীবিকাদাতা তোমরা নও।

(২১) আর এমন কোন জিনিষ নেই যার ভাঙার আমার কাছে নেই, আর আমি তা নির্দিষ্ট পরিমাণেই পাঠিয়ে থাকি। (২২) আর আমি বাতাসকে বৃষ্টিগর্ভ মেঘ বহনকারী করে পাঠাই; অতঃপর আমি আকাশ থেকে বৃষ্টি বর্ষণ করি, তারপর সেই জল দ্বারা তোমাদেরকে সিঞ্চিত করি, আর ওর ভাঙার তোমাদের কাছে নেই।

(২৩) নিঃসন্দেহে আমিই জীবন দান করি আর আমিই মৃত্যু প্রদান করি আর আমিই অনন্ত। (২৪) আর আমিই তোমাদের পূর্বসূরীদের জানি আর আমিই তোমাদের উত্তরসূরীদেরও জানি। (২৫) আর নিঃসন্দেহে তোমার

প্রভু ওদের সবাইকে একত্রিত করবেন; তিনি প্রজ্ঞাময়, মহাজ্ঞানী।

(২৬) আর আমি অবশ্যই মানুষকে শুকনো ঠন্ঠনে মাটির চটকানো কাদা থেকে সৃষ্টি করেছি। (২৭) এর আগে আমি জ্বিনকে প্রচণ্ড উষঃ আগুন থেকে সৃষ্টি করেছি।

(২৮) আর যখন তোমার প্রভু দেবদূতদের বললেন যে, আমি শুকনো ঠন্ঠনে মাটির চটকানো কাদা দিয়ে একটি মানুষ তৈরী করবো। (২৯) যখন আমি তার পূর্ণ আকৃতি তৈরী করবো আর তার মধ্যে আমার আত্মা হতে সঞ্চার করবো তখন তোমরা তার সামনে অবনত হবে। (৩০) সুতরাং সকল দেবদূত সমবেতভাবে তার সামনে অবনত হল। (৩১) কিন্তু ইবলিস অবনতকারীদের সঙ্গ দেওয়া থেকে বিরত থাকল। (৩২) ঈশ্বর বললেনঃ হে ইবলিস! তোমার কি হল? সবার সাথে তুমি অবনত হলে না কেন? (৩৩) ইবলিস বললঃ আমি তো একজন মানুষের সামনে অবনত হতে পারি না, যাকে তুমি শুকনো ঠন্ঠনে মাটির চটকানো কাদা থেকে সৃষ্টি করেছ।

(৩৪) ঈশ্বর বললেন, তাহলে তুই এখান থেকে বেরিয়ে যা, কারণ তুই বিতাড়িত। (৩৫) আর তোর উপরে বিচারের দিন পর্যন্ত অভিষাপ থাকবে। (৩৬) ইবলিস বললঃ হে আমার প্রভু! আপনি আমাকে ঐ দিন পর্যন্ত অবকাশ দিন যে দিন লোকদের পুনরুত্থান করা হবে। (৩৭) ঈশ্বর বললেন, তোকে অবকাশ দেওয়া হল। (৩৮) সেই নির্দিষ্ট সময়ের দিন পর্যন্ত।

(৩৯) সে বললঃ হে আমার প্রভু! আপনি আমাকে যেমন বিপথগামী করেছেন, আমি ও এদের জন্য পৃথিবীতে ভ্রান্তির পথ সুশোভিত করে রাখবো আর তাদের সবাইকে পথভ্রষ্ট করে দেব। (৪০) আপনার মনোনীত বান্দাদের ছাড়া।

(৪১) ঈশ্বর বললেনঃ এটা আমার কাছে পৌঁছানোর সোজা পথ। (৪২) নিঃসন্দেহে যে আমার প্রকৃত বান্দা, তাদের উপর তোর কোন কতৃভ্ব চলবে না; তবে যারা বিপথগামী ও তোর অনুসরণ করবে তাদের কথা আলাদা। (৪৩) আর নরকই হল তাদের প্রতিশ্রুত স্থান। (৪৪) এর সাতটি দরজা আছে, প্রতিটি দরজার জন্য তাদের এক একটি পৃথক দল রয়েছে।

(৪৫) নিঃসন্দেহে যারা ভয় করে তারা উদ্যান ও ফোয়ারা সমূহের মাঝে থাকবে। (৪৬) এতে তোমরা শান্তি ও নিরাপত্তার সাথে প্রবেশ কর। (৪৭) তাদের অন্তরের বিদ্রোহ আমি নির্মূল করে দেব। সবাই ভাই-ভাই এর মত সামনা-সামনি আসনে বসবে। (৪৮) সেখানে তাদের কোন ক্লান্তি আসবে না আর সেখান থেকে তাদেরকে বহিস্কার করাও হবে না। (৪৯) আমার বান্দাদের জানিয়ে দাও যে, আমি ক্ষমাপরায়ণ ও অতি দয়ালু। (৫০) আর আমার শান্তিও যন্ত্রনাদায়ক শান্তি।

(৫১) আর ওদেরকে ইবরাহীমের (আব্রাহামের) অতিথিদের বৃত্তান্তের মাধ্যমে সাবধান কর। (৫২) যখন তাঁরা তার কাছে এসে অভিবাদন করল। ইবরাহীম (আব্রাহাম) বললঃ তোমাদের দেখে তো আমাদের ভয় হচ্ছে। (৫৩) তাঁরা বললঃ ভয় পেওনা, আমরা তোমাকে একটি পুত্র সন্তানের সুসংবাদ দিচ্ছি। যে খুবই জ্ঞানবান হবে। (৫৪) ইবরাহীম (আব্রাহাম) বললঃ আমার বার্কক্য এসে যাওয়া সত্ত্বেও তোমরা আমাকে সন্তানের সুসংবাদ দিচ্ছে? তাহলে কি ধরনের সুসংবাদ আমাকে দিচ্ছে? (৫৫) তাঁরা বললঃ আমরা তোমাকে সঠিক সুসংবাদই দিচ্ছি। অতএব তুমি নিরাশ হয়ো না। (৫৬) ইবরাহীম (আব্রাহাম) বললঃ আমার প্রভুর কৃপা হতে পথভ্রষ্ট লোকেরা ছাড়া আর কে নিরাশ হতে পারে?

(৫৭) ইবরাহীম বললঃ হে দূতগণ! এখন তোমাদের উদ্দেশ্যটা কি?

(৫৮) তারা বললঃ আমাদের এক অপরাধী সম্প্রদায়ের কাছে পাঠানো হয়েছে। (৫৯) লুতের পরিবারবর্গ ব্যতীত আমরা ওদের সবাইকে বাঁচিয়ে নেব। (৬০) তবে তার স্ত্রীকে নয়। আমরা ঠিক করেছি সে অবশ্যই অপরাধীদের সাথে থেকে যাবে।

(৬১) অতঃপর যখন দূতগণ লুতের পরিবারের কাছে এল। (৬২) সে বললঃ তোমরা তো অপরিচিত লোক। (৬৩) তারা বলল না, বরং আমরা তোমার কাছে সেই বিষয় নিয়ে এসেছি যে সম্পর্কে তারা সন্দেহ করত। (৬৪) আর আমরা তোমার কাছে সত্য নিয়ে এসেছি এবং অবশ্যই আমরা সত্য বলছি। (৬৫) অতএব রাতের কিছু অংশ বাকি থাকতে তুমি তোমার পরিবার-পরিজনসহ বেরিয়ে পড়ো। আর তুমি সবার পিছনে পিছনে যাবে এবং তোমাদের মধ্যে কেউ যেন পিছনের দিকে ফিরে না তাকায়। আর সেখানে চলে যাও যেখানে তোমাদের যেতে নির্দেশ দেওয়া হয়েছে। (৬৬) আর আমি লুতকে জানিয়ে দিলাম যে, ভোর হলেই এদের নির্মূল করে দেওয়া হবে।

(৬৭) এদিকে নগরবাসীরা উল্লাসিত হয়ে উপস্থিত হল। (৬৮) সে বললঃ এরা আমার অতিথি। তোমরা আমাকে অপমান করো না। (৬৯) তোমরা ঈশ্বরকে ভয় কর আর আমাকে লজ্জিত করো না। (৭০) তারা বললঃ আমরা কি আগন্তুকদের আতিথেয়তা দান করতে নিষেধ করিনি? (৭১) সে বললঃ যদি তোমরা একান্তই কিছু (বিবাহ) করতে চাও তবে আমার কন্যরা উপস্থিত আছে।

(৭২) হে নবী! তোমার জীবনের শপথ। তারা তাদের নেশায় দিশাহারা ছিল। (৭৩) অতঃপর সূর্যোদয়ের সময় প্রচণ্ড এক আওয়াজ তাদেরকে পাকড়াও করল। (৭৪) সুতরাং আমি জনপদটিকে উল্টিয়ে উপর- নিচ

করে দিলাম এবং তাদের উপর পাথর বর্ষণ করলাম। (৭৫) নিঃসন্দেহে এতে চিন্তাশীলদের জন্য নিদর্শন রয়েছে। (৭৬) আর ঐ জনপদটি সকলের চলাচলের পথের উপরে এখনও বিদ্যমান। (৭৭) নিঃসন্দেহে এতে নিদর্শন আছে আস্ত্রাবানদের জন্য।

(৭৮) আর আইকাবাসীরাও নিশ্চিত রূপে অত্যাচারী ছিল। (৭৯) তাই তাদের আমি শাস্তি দিয়েছি আর এই দুটি নগরই প্রকাশ্য রাজপথে বিদ্যমান। (৮০) আর হিজরবাসীরাও তাদের পয়গম্বরদের উপর মিথ্যারোপ করেছিল। (৮১) আমি তাদেরকে নিদর্শন দিয়েছিলাম; কিন্তু তারা তা উপেক্ষা করেছিল। (৮২) তারা পাহাড় কেটে ঘর বানাত যাতে তারা শাস্তিপূর্ণভাবে সেখানে বাস করতে পারে। (৮৩) তারপর এক সকালে প্রচণ্ড এক আওয়াজ ওদের পাকড়াও করল। (৮৪) তখন ওদের উপার্জনসমূহ ওদের কোন কাজে আসেনি।

(৮৫) আর আমি আকাশ ও পৃথিবী এবং যা কিছু এর মধ্যে আছে উদ্দেশ্যহীনভাবে তৈরী করিনি। আর শেষ বিচারের দিন অবশ্যই আসবে। অতএব তুমি ক্ষমা সুন্দর দৃষ্টিতে দেখ। (৮৬) তোমার প্রভুই সুবিজ্ঞ সৃষ্টিকর্তা।

(৮৭) আমি তোমাকে দিয়েছি সাতটি বাক্য (অধ্যায়ঃ ফাতিহা) যা পুনঃ পুনঃ আবৃত্ত হয়, আর দিয়েছি মহান কুরআন। (৮৮) তুমি ঐ সাংসারিক ভোগসামগ্রীর দিকে তাকিয়ো না যা আমি তাদের জন্য দিয়েছি। আর ওতে দুঃখ করো না, আর আস্ত্রাবানদের উপর তোমার স্নেহের হাত অবনমিত কর। (৮৯) আর বলঃ আমি একজন স্পষ্ট সতর্ককারী। (৯০) একই ভাবে আমি ঐ বিভাজনকারীদের উপরেও অবতীর্ণ করেছিলাম। (৯১) যারা কুরআনকে বিভিন্নভাবে বিভক্ত করেছে। (৯২) অতএব তোমার প্রভুর শপথ। আমি ওদের সবাইকে জিজ্ঞাসা করবো। (৯৩) তারা যা কিছু করত সে সম্পর্কে।

(৯৪) অতএব তোমাকে যা নির্দেশ দেওয়া হয়েছে তা প্রকাশ্যে ঘোষণা কর এবং অংশীবাদীদের উপেক্ষা কর। (৯৫) বিদ্রূপ কারীদের বিরুদ্ধে তোমার জন্য আমিই যথেষ্ট। (৯৬) যারা ঈশ্বরের সাথে অন্য উপাস্যের অংশীদার স্থাপন করে, (৯৭) তারা শীঘ্রই এর পরিণাম জানতে পরবে। আর আমি জানি ওদের কথায় তোমার মন সংকুচিত হচ্ছে। (৯৮) অতএব তুমি তোমার প্রভুর সপ্রশংসিত পবিত্রতা বর্ণনা কর এবং সিজদা কারীদের (প্রগতি জ্ঞাপন কারীদের) অন্তর্ভুক্ত হও। (৯৯) আর তোমার প্রভুর উপাসনা কর যতক্ষণ না তোমার কাছে অবধারিত ক্ষণ (মৃত্যু) এসে যায়।

অধ্যায় ১৬ : আন - নহল (মৌমাছি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ঈশ্বরের নির্দেশ এসে গেছে, অতএব এ ব্যাপারে তাড়াহুড়া করো না, তিনি মহামহিম। আর তারা যা কিছু অংশীদার স্থাপন করে তিনি তার উর্ধ্বে। (২) তিনি তাঁর বান্দাদের মধ্যে যার প্রতি ইচ্ছা তাঁর প্রত্যাশে সহ দেবদূত প্রেরণ করেন, তুমি মানুষকে জানিয়ে দাও যে আমি ছাড়া অন্য কোন উপাস্য নেই। অতএব আমাকে ভয় কর। (৩) তিনি আকাশসমূহ ও পৃথিবীকে উদ্দেশ্য পূর্বক সৃষ্টি করেছেন। তারা যা কিছু অংশীদার স্থাপন করে তিনি তার উর্ধ্বে।

(৪) তিনি শুক্র হতে মানুষ সৃষ্টি করেছেন; অথচ এই মানুষ হঠাৎই প্রকাশ্যে ঝগড়া করতে থাকে। (৫) আর তিনিই তোমাদের জন্য গবাদিপশু সৃষ্টি করেছেন, এগুলোতে তোমাদের জন্য শীতবস্ত্রের উপকরণ ও আরো অনেক অনুগ্রহ আছে, এদের থেকে তোমরা খাদ্যও পেয়ে থাক। (৬) আর যখন বিকালে এদেরকে চারণভূমি থেকে গৃহে নিয়ে আসো এবং সকালে যখন ছাড় তখন তোমরা ওর সৌন্দর্য উপভোগ কর।

(৭) এরা তোমাদের বোঝা এমন স্থানে বয়ে নিয়ে যায় যেখানে তোমরা কঠোর পরিশ্রম বিনা পৌঁছাতে পারতে না। নিঃসন্দেহে তোমার প্রভু পরম করুণাময় দয়ালু। (৮) আর তিনিই ঘোড়া, খচ্চর ও গাধা সৃষ্টি করেছেন যাতে তোমরা তার উপরে আরোহন করতে পার এবং সৌন্দর্যের জন্যেও তিনি এমন জিনিষ তৈরী করেন যা তোমরা জান না।

(৯) সরল পথ ঈশ্বরের দিকে যায়। আর কিছু পথ বাঁকাও আছে আর যদি ঈশ্বর চাইতেন তাহলে তোমাদের সবাইকে সৎপথ দেখাতেন।

(১০) তিনিই আকাশ থেকে বৃষ্টি বর্ষণ করেন, তা হতে তোমরা পান কর, এবং এ থেকেই উদ্ভিদ জন্মায় যাতে তোমরা পশুচারণ করো। (১১) তা হতেই তিনি তোমাদের জন্য শস্য, জলপাই, খেজুর, আঙুর আর সবরকম ফল উৎপন্ন করেন। নিঃসন্দেহে চিন্তাশীলদের জন্য এতে নিদর্শন রয়েছে।

(১২) তিনিই তোমাদের জন্য রাত, দিন ও সূর্য-চন্দ্রকে কাজে লাগিয়ে দিয়েছেন। আর তারকারাজীও তাঁর আদেশে কার্যরত। নিশ্চই এতে বুদ্ধিমান লোকদের জন্য নিদর্শন রয়েছে। (১৩) আরো নানা বর্ণের যেসব বস্তু তিনি পৃথিবীতে সৃষ্টি করেছেন এসবের মধ্যেও নিদর্শন রয়েছে তাদের জন্য, যারা চিন্তাভাবনা করে।

(১৪) আর তিনিই সমুদ্রকে তোমাদের জন্য নিয়োজিত করে দিয়েছেন যাতে তোমরা এথেকে তাজা মাংস আহার কর এবং এথেকে অলংকার বার করে পরতে পার। আর তোমরা নৌযানগুলো দেখবে যে, সমুদ্র চিরে চলাচল করে। আর যাতে তোমরা তাঁর অনুগ্রহ সন্ধান করতে পার আর তাঁর কৃতজ্ঞতা প্রকাশ করতে পার।

(১৫) তিনি পৃথিবীতে পর্বত স্থাপিত করেছেন যাতে তা তোমাদেরকে নিয়ে টলমল না করে এবং তিনি নদনদী ও রাস্তা তৈরী করেছেন যাতে

তোমরা পথ পাও। (১৬) আর অন্য অনেক পথ চিহ্নও আছে, আর লোকেরা তারার সাহায্যেও পথের সন্ধান পায়।

(১৭) অতএব যিনি সৃষ্টি করেন তিনি কি তার মত হবেন যে সৃষ্টি করতে পারে না? তোমরা কি চিন্তা করো না? (১৮) যদি তোমরা ঈশ্বরের উপহারগুলো গণনা করতে চাও তাহলে তোমরা তা গুণে শেষ করতে পারবে না, নিঃসন্দেহে ঈশ্বর ক্ষমাশীল দয়াবান। (১৯) আর ঈশ্বর জানেন যা কিছু তোমরা গোপন কর আর যা কিছু প্রকাশ কর।

(২০) আর ঈশ্বর ছাড়া যাদেরকে তারা ডাকে তারা কোন বস্তুই সৃষ্টি করতে পারে না আর তারা স্বয়ংই এক সৃষ্টি। (২১) তারা মৃত, জীবিত নয়, আর তারা জানে না কবে তাদের জীবিত করা হবে (ওঠানো হবে)। (২২) তোমাদের উপাস্য একজনই; কিন্তু যারা পরলোকে বিশ্বাস করে না তাদের অন্তর অবজ্ঞাকারী আর তারা অহংকারী। (২৩) নিশ্চিত রূপেই ঈশ্বর জানেন যা কিছু তারা গোপন করে আর যা কিছু প্রকাশ করে। নিঃসন্দেহে তিনি অহংকারীদের পছন্দ করেন না।

(২৪) আর যখন তাদেরকে জিজ্ঞাসা করা হয়, তোমাদের প্রভু কি অবতীর্ণ করেছেন? তারা বলে পূর্ববতীদের কাহিনীসমূহ। (২৫) তারা পুনরুত্থান দিবসে নিজেদের বোঝাও বহন করবে এবং তাদের বোঝাও বহন করবে যাদেরকে অজ্ঞতার কারণে তারা পথভ্রষ্ট করেছিল। স্মরন রেখো, যে বোঝা তারা বহন করবে তা খুবই খারাপ।

(২৬) এদের পূর্ববতীরাও ষড়যন্ত্র করেছিল। ঈশ্বর তাদের ভবনের ভিত্তিমূলে আঘাত হেনেছিলেন। ফলে উপর থেকে তাদের মাথায় ছাদ ভেঙে পড়েছিল এবং শাস্তি এমন জায়গা থেকে এসেছিল যে জায়গা তাদের কল্পনাতে ও ছিল না। (২৭) এরপর শেষবিচারের দিনে ঈশ্বর তাদের লাঞ্চিত

করবেন আর বলবেন, কোথায় আমার সেই শরীকেরা যাদের নিয়ে তোমরা ঝগড়া করতে? যাদেরকে জ্ঞান দান করা হয়েছিল তারা বলবে, আজকের দিনে লাঞ্ছনা আর দূরাবস্থা অবজ্ঞাকারীদের জন্যই।

(২৮) আত্মনিগ্রহরত অবস্থায় দেবদূতগণ যাদের প্রাণ হরণ করবে, তাদের আত্মা আত্মসমর্পণ করে বলবেঃ আমরা তো খারাপ কিছু করতাম না। হ্যাঁ, নিঃসন্দেহে ঈশ্বর জানেন যা কিছু তোমরা করতে। (২৯) এখন নরকের দরজা দিয়ে প্রবেশ কর। এখানে যুগ-যুগান্তর ধরে বাস কর। তাহলে কত খারাপ ঠিকানা অহংকারকারীদের।

(৩০) আর যারা ঈশ্বরভীরু তাদেরকে জিজ্ঞাসা করা হবে, তোমাদের প্রভু কি অবতীর্ণ করেছিলেন? তারা বলবে, ‘কল্যাণ’। যারা সৎকর্ম করে তাদের জন্য এই পার্থিব জীবনেও মঙ্গল আর পরলোকের আবাস তো আরো মঙ্গলময়। ঈশ্বরভীরুদের আবাস কতই না সুন্দর! (৩১) তারা চিরস্থায়ী উদ্যানে প্রবেশ করবে, যার পাদদেশ দিয়ে নদী প্রবাহিত হতে থাকবে। তাদের জন্য সেখানে সবকিছুই থাকবে যা তারা চাইবে, ঈশ্বর সংযমীদের এমনই প্রতিফল দান করবেন। (৩২) পবিত্র থাকা অবস্থায় দেবদূত যাদের প্রাণ হরণ করে; দেবদূতগণ বলবে, তোমাদের প্রতি শাস্তি বর্ষিত হোক! তোমরা যে সব ভাল কাজ করতে তার প্রতিদান স্বরূপ স্বর্গে প্রবেশ কর।

(৩৩) এই লোকেরা কি এই প্রতীক্ষায় আছে যে, তাদের কাছে দেবদূত আগমন করুক অথবা তোমার প্রভুর নির্দেশ এসে যাক। তাদের পূর্ববতীরাও এমনটি করেছিল। আর ঈশ্বর ওদের উপর অত্যাচার করেন নি বরং তারা নিজেই নিজেদের উপর অত্যাচার করেছিল। (৩৪) তাই তাদের উপর নিজ অপকর্মের প্রতিফল আপতিত হল আর তারা যা নিয়ে উপহাস করছিল, তাই তাদেরকে পরিবেষ্টন করল।

(৩৫) আর যারা ঈশ্বরের অংশীদার স্থাপন করেছিল তারা বলে, যদি ঈশ্বর চাইতেন তাহলে আমরা তাঁকে ছাড়া অন্য কারোর উপাসনা করতাম না, আর তার নির্দেশ ব্যতীত কোন কিছুকেই অবৈধ করতাম না। পূর্বসূরীরাও এমনটি করেছিল। অতএব পয়গম্বরদের দায়িত্ব তো কেবল স্পষ্ট রূপে বার্তা পৌঁছে দেওয়া।

(৩৬) আর আমি প্রত্যেক উম্মতের (সম্প্রদায়ের) মধ্যে একজন বার্তাবাহক পাঠিয়েছি। “তোমরা ঈশ্বরের উপাসনা কর আর তাগুত (শয়তান) থেকে দূরে থাক”। অনন্তর ওদের মধ্যে কতককে ঈশ্বর সুপথ প্রদান করেছেন আর কতকের জন্য বিপথগামিতা অবধারিত হয়েছে। অতএব পৃথিবীতে ভ্রমণ করো এবং দেখো, মিথ্যা প্রতিপন্নকারীদের পরিণাম কি হয়েছে? (৩৭) তুমি (পয়গম্বর) তাদের সুপথ দেখাতে চাইলেও, ঈশ্বর যাদেরকে পথভ্রষ্ট করেন, তাদেরকে সুপথ দেখান না। আর তাদের কোন সাহায্যকারীও নেই।

(৩৮) আর এরা ঈশ্বরের নামে দৃঢ় শপথ করে বলে যে, যাদের মৃত্যু হয় ঈশ্বর তাদের পুনরুত্থিত করবেন না। (অবশ্যই) কেন নয়, এটা তাঁর সত্য প্রতিশ্রুতি; কিন্তু অধিকাংশ লোকই জানে না যে তিনি এই অঙ্গীকার অবশ্যই পূরণ করবেন। (৩৯) যাতে তারা যে বিষয়ে মতভেদ করেছে তিনি তা প্রকাশ করতে পারেন এবং অবিশ্বাসীরা জানতে পারে যে, তারাই মিথ্যাবাদী ছিল। (৪০) আমি যখন কোন কিছু করতে ইচ্ছা করি তখন তাকে শুধু ‘হও’ বলি, অমনি তা হয়ে যায়।

(৪১) যারা অত্যাচারিত হওয়ার পর ঈশ্বরের জন্য দেশত্যাগ করেছে, আমি তাদেরকে পৃথিবীতে উত্তম বাসস্থান দেব। আর পরলোকের পুরস্কার তো আরও মঙ্গলময়; যদি তারা জানত! (৪২) এরা তো তারাই যারা ধৈর্য ধারণ করে আর তাদের প্রভুর উপর ভরসা করে।

(৪৩) তোমার পূর্বেও আমি মানুষদেরকে বার্তাবাহক হিসাবে পাঠিয়েছিলাম, তাদের কাছে আমি বাণী পাঠাতাম, অতএব যদি তোমার জানা না থাকে তাহলে জ্ঞানীদের কাছে জিজ্ঞাসা করে নাও। (৪৪) স্পষ্ট নিদর্শন ও গ্রন্থসহ পাঠিয়েছিলাম। আর আমি তোমার কাছেও অভিজ্ঞান অবতীর্ণ করেছি, যাতে তুমি মানুষকে স্পষ্ট করে দিতে পার যা তাদের প্রতি অবতীর্ণ হয়েছে আর যাতে তারা চিন্তা করে।

(৪৫) যারা দূরভিসন্ধি করে তারা কি নিশ্চিত যে ঈশ্বর তাদেরকে ভূমিতে ধসিয়ে দেবে না কিম্বা এমন জায়গা থেকে তাদের উপর শাস্তি আসবে না যে জায়গার কথা তারা কল্পনাই করতে পারে না। (৪৬) অথবা চলাফেরা করতে থাকা অবস্থায় ঈশ্বর তাদের পাকড়াও করবেন না? তারা তো ঈশ্বরকে ব্যর্থ করতে পারে না। (৪৭) কিংবা ভীত অবস্থায় তিনি তাদেরকে পাকড়াও করবেন না? তোমাদের প্রভু অবশ্যই স্নেহপরায়ণ ও অতি দয়ালু।

(৪৮) ঈশ্বর যে সব জিনিষ সৃষ্টি করেছেন তারা কি সেগুলোকে দেখে না? তাদের ছায়া ঈশ্বরের উদ্দেশ্যে সিঁজদাবনত (প্রণত) হয়ে ডাইনে ও বামে ঝুঁকে পড়ে। (৪৯) আকাশ ও পৃথিবীর সমস্ত সৃষ্টিকূল ঈশ্বরকে সিঁজদা (প্রণতি জ্ঞাপন) করে। আর দেবদূতগণও, তারা অহংকার করে না। (৫০) তারা সবার উপর তাদের প্রভুকে ভয় করে আর যে নির্দেশ পায় তা পালন করে থাকে।

(৫১) আর ঈশ্বর আদেশ দিয়েছেন, দুজন উপাস্য গ্রহণ করো না। উপাস্য তো একজনই। অতএব আমাকেই ভয় করো। (৫২) আর আকাশ ও পৃথিবীতে যা কিছু আছে সবই তাঁর। এবং অবিরাম আনুগত্য কেবল তাঁরই প্রাপ্য। তবুও তোমরা কি ঈশ্বর ছাড়া অন্যকে ভয় করবে?

(৫৩) আর তোমাদের কাছে যে অনুগ্রহ আছে তা ঈশ্বরের পক্ষ থেকেই

আগত। আবার যখন তোমরা কোন দুঃখ-কষ্টে পড় তখন তাঁরই কাছে ফরিয়াদ কর। (৫৪) তারপর তিনি যখন তোমাদের দুঃখ-কষ্ট দূর করে দেন, তখনি তোমাদের একটি দল তাদের প্রভুর সাথে অংশীদার সাব্যস্ত করে। (৫৫) যাতে তারা অস্বীকার করে যা আমি তাদেরকে দিয়েছি। অতএব কিছুদিন ভোগ করে নাও। অচিরেই জানতে পারবে। (৫৬) তারা আমার দেওয়া জীবনোপকরন থেকে তাদের (অলীক উপাস্যদের) জন্য একটি অংশ নির্ধারণ করে, যাদের সম্পর্কে তারা কিছুই জানে না। ঈশ্বরের শপথ, তোমরা যা কিছু মিথ্যা উদ্ভাবন করো, সে সম্পর্কে অবশ্যই তোমাদেরকে জিজ্ঞাসা করা হবে।

(৫৭) আর তারা ঈশ্বরের জন্য কন্যা সন্তান নির্ধারণ করে; এ সব কিছু থেকে ঈশ্বর পবিত্র। আর তারা নিজেদের জন্য তাই স্থির করে যা তারা পছন্দ করে। (৫৮) তাদের কাউকে যখন কন্যা সন্তান জন্মের সুসংবাদ দেওয়া হয় তখন তার চেহারা মলিন হয়ে যায় আর সে বিষন্ন হয়ে পড়ে। (৫৯) তাকে যে সংবাদ দেওয়া হয়েছে তার গ্লানিতে সে লোকদের থেকে নিজেকে লুকিয়ে রাখে, আর ভাবে অপমান সহ্য করে তাকে সে রেখে দেবে, না কি মাটিতে পুতে ফেলবে? তারা যা সিদ্ধান্ত করে তা কত নিকৃষ্ট। (৬০) যারা পরলোকে বিশ্বাস করে না তারা নিকৃষ্ট অবস্থানে আছে, পক্ষান্তরে ঈশ্বরের অবস্থান সর্বোচ্চ তিনিই মহাপরাক্রমশালী, পরম প্রজ্ঞাবান।

(৬১) ঈশ্বর যদি মানুষকে তাদের অন্যায়ের জন্য পাকড়াও করতেন তাহলে পৃথিবীতে কোন প্রাণীকেই ছাড়তেন না। বস্তুত তিনি একটি নির্ধারিত সময় পর্যন্ত মানুষকে অবকাশ দেন। যখন তার নির্দিষ্ট সময় আসবে তখন তারা এক মুহূর্তকাল বিলম্ব বা ত্বরান্বিত করতে পারবে না।

(৬২) তারা ঈশ্বরের জন্য যা নির্ধারণ করে নিজেদের জন্য তা অপছন্দ করে;

তাদের জিহ্বা মিথ্যা বর্ণনা দেয় যে, তাদের জন্য শুভ পরিণাম আছে। নিশ্চিতরূপে এদের পরিণাম নরক এবং তাদের অবশ্যই সেখানে পৌঁছে দেওয়া হবে।

(৬৩) ঈশ্বরের শপথ। আমি তোমার আগে বিভিন্ন জাতির কাছে বার্তাবহ পাঠিয়েছি; কিন্তু শয়তান তাদের (অশোভন) কাজগুলি তাদের দৃষ্টিতে শোভন করেছে এবং আজ সে তাদের অভিভাবক। তাদের জন্য রয়েছে যন্ত্রণাদায়ক শাস্তি। (৬৪) তোমার কাছে গ্রন্থ অবতীর্ণ করেছি এই জন্য যে, তারা যে বিষয়ে মতভেদ করে, তুমি তা তাদের জন্য স্পষ্ট করে দেবে। আর আস্ত্রাবানদের জন্য আছে পথ নির্দেশ এবং অনুগ্রহ।

(৬৫) আর ঈশ্বর আকাশ থেকে বৃষ্টি বর্ষণ করেন এবং এর দ্বারা নিষ্প্রান ভূমিকে পুনরুজ্জীবিত করেন। যে লোকেরা শোনে তাদের জন্য এতে নিদর্শন রয়েছে।

(৬৬) গবাদি পশুর মধ্যেও তোমাদের জন্য শিক্ষা রয়েছে। আমি তোমাদেরকে তাদের পেটের ভিতরের গোবরও রক্তের মধ্য থেকে খাঁটি দুধ পান করাই, যা পানকারীদের জন্য সুস্বাদু ও তৃপ্তিদায়ক। (৬৭) খেজুর ও আঙুর ফলের মধ্যেও। তোমরা তা থেকে মাদক ও উত্তম খাবার গ্রহণ করে থাক। নিঃসন্দেহে এতে বুদ্ধিমান লোকদের জন্য নিদর্শন রয়েছে।

(৬৮) আর তোমার প্রভু মৌমাছির প্রতি ওহী-(বার্তা) করেছেন তোমরা ঘর বানাও পাহাড়ে, গাছে ও মানুষেরা যা নির্মাণ করে তাতে। (৬৯) তারপর সবরকম ফল থেকে আহার কর আর আপন প্রভুর নির্ধারিত পথে চল। এই মৌমাছির পেট থেকে বিভিন্ন রঙের পানীয় বের হয়, যাতে মানুষের জন্য আরোগ্য আছে। নিঃসন্দেহে এতে চিন্তাশীল মানুষের জন্য নিদর্শন আছে।

(৭০) ঈশ্বর তোমাদেরকে সৃষ্টি করেছেন। অতঃপর তিনি তোমাদের মৃত্যু ঘটাবেন। তোমাদের মধ্যে কাউকে অধিক বার্ষিক্য বয়সে উপনীত করা

হয় যখন তারা তাদের পূর্বের অর্জিত জ্ঞান সমূহ বিস্মৃত হয়। নিশ্চয়ই ঈশ্বর মহাজ্ঞানী, সর্ব শক্তিমান।

(৭১) জীবিকার ব্যাপারে ঈশ্বর তোমাদের কতককে কতকের চেয়ে প্রাধান্য দিয়েছেন। যাদেরকে প্রাধান্য দেওয়া হয়েছে তারা তাদের অধীনস্ত দাস-দাসীদেরকে তাদের জীবিকা থেকে কিছু দিতে চায় না, এই ভেবে যে, তারা সমান হয়ে যাবে। তবে কি তারা ঈশ্বরের অনুগ্রহ অস্বীকার করে?

(৭২) আর ঈশ্বর তোমাদের জন্য তোমাদের মধ্য থেকেই পত্নীদের তৈরী করেছেন আর পত্নীদের থেকে তোমাদের জন্য পুত্র-পৌত্রদের সৃষ্টি করেছেন এবং তোমাদেরকে উত্তম জীবিকা দান করেছেন। তারা অসত্যে বিশ্বাস স্থাপন করে আর ঈশ্বরের অনুগ্রহ অস্বীকার করে। (৭৩) তারা ঈশ্বরকে বাদ দিয়ে এমন উপাস্যদের উপাসনা করে যারা তাদের জন্য নভোমণ্ডল বা ভূমণ্ডল থেকে কোন জীবনোপকরণ দেওয়ার ক্ষমতা রাখে না। (৭৪) অতএব তোমরা ঈশ্বরের কোন উপমা দিওনা। নিঃসন্দেহে ঈশ্বর যা জানেন, তোমরা তা জান না।

(৭৫) আর ঈশ্বর এখানে উপমা পেশ করছেন, একজন অন্যের মালিকানাধীন দাস, যার নিজের কিছু করার ক্ষমতা নেই। আর একজন এমন লোক যাকে আমি আমার পক্ষ থেকে উত্তম জীবিকা দান করেছি এবং সে নিজে থেকেই গোপনে ও প্রকাশ্যে ব্যয় করে। এই দুই ধরনের মানুষ কি সমান হবে? সকল প্রশংসা ঈশ্বরের জন্য; কিন্তু অধিকাংশ লোক তা জানে না।

(৭৬) আর ঈশ্বর আরও দুই ব্যক্তির উপমা পেশ করছেন, যাদের একজন বোবা, কোন কাজ করতে পারে না আর সে তার মালিকের কাছে একটি বোঝা। সে তাকে যেখানেই পাঠায় কোন কাজ ঠিকমত করে আসতে পারে না। তাহলে সে কিওই ব্যক্তির সমান যে ন্যায়ের শিক্ষা দেয়, আর সে নিজেও সঠিক পথে আছে।

(৭৭) আকাশ ও পৃথিবীর রহস্যের জ্ঞান ঈশ্বরের কাছেই রয়েছে। আর শেষ বিচারের দিনের ব্যাপারটি তো কেবল চোখের পলকের মত কিম্বা তার চেয়ে আরও দ্রুত। নিঃসন্দেহে ঈশ্বর সবকিছু করতে সক্ষম।

(৭৮) ঈশ্বর তোমাদেরকে তোমাদের মাতৃগর্ভ থেকে নির্গত করেছেন, যখন তুমি কিছুই জানতে না। আর তিনিই তোমাদের জন্য কান, চোখ ও হৃদয় দিয়েছেন যাতে তোমরা কৃতজ্ঞতা প্রকাশ করতে পার।

(৭৯) লোকেরা কি পাখীদের দেখে না যে, তারা আকাশের বায়ুমণ্ডলে বিচরণ করছে। ঈশ্বরই তাদের ধারণ করে রাখেন। নিঃসন্দেহে এতে নিদর্শন আছে আস্থাবানদের জন্য। (৮০) আর ঈশ্বর তোমাদের জন্য তোমাদের ঘরকে শান্তির আবাস বানিয়েছেন। তিনি তোমাদের জন্য পশুর চামড়া থেকে ঘর (তাঁবু) তৈরী ব্যবস্থা করেছেন যা তোমরা ভ্রমণকালে ও কোথাও অবস্থান কালে সহজে বহন করতে পার। এবং তার পশম, লোম ও চুল থেকে আসবাবপত্র ও ব্যবহারের সামগ্রী তৈরী করেছেন এক নির্দিষ্ট সময় পর্যন্ত।

(৮১) আর ঈশ্বর তোমাদের জন্য তাঁর সৃষ্টিবস্তুর ছায়া তৈরী করেছেন এবং তোমাদের জন্য পাহাড়ে আত্মগোপনের আশ্রয়স্থল তৈরী করেছেন, আর তোমাদের জন্য এমন পোষাক তৈরী করেছেন যা তোমাদেরকে গরমের তাপ থেকে রক্ষা করে আবার এমন পোষাকও বানিয়েছেন যা তোমাদেরকে যুদ্ধের সময় রক্ষা করে। এভাবেই ঈশ্বর তোমাদের উপর তাঁর অনুগ্রহ সম্পূর্ণরূপে দান করেছেন যাতে তোমরা আত্মসমর্পণকারী হও।

(৮২) তারা যদি বিমুখ হয় তাহলে তোমার দায়িত্ব কেবল স্পষ্টরূপে (বার্তা) পৌঁছে দেওয়া। (৮৩) তারা ঈশ্বরের অনুগ্রহগুলো চিনতে পারে, তারপরও তা অস্বীকার করে, আর তাদের অধিকাংশ লোকই অকৃতজ্ঞ।

(৮৪) আর যে দিন আমি প্রত্যেক জাতি থেকে একজন সাক্ষী দাঁড় করাব

তখন অবিশ্বাসীদের পথ-নির্দেশ দেওয়া হবে না আর তাদের ক্ষমাপ্রার্থনাও গৃহীত হবে না। (৮৫) আর অত্যাচারী লোকেরা যখন শাস্তি প্রত্যক্ষ করবে তখন তা আর লঘু করা হবে না আর তাদের কোন অবকাশও দেওয়া হবে না।

(৮৬) আর যখন অংশীবাদী লোকেরা তাদের অংশীদার উপাস্যদের দেখতে পাবে তখন বলবে, হে আমাদের প্রভু! এরাই সেই আমাদের অংশীদার উপাস্যগণ যাদেরকে আমরা তোমাকে ছেড়ে আহ্বান করতাম। তখন ঐ অংশীদার উপাস্যরা একথা তাদের দিকে ছুঁড়ে দেবে আর বলবে তোমরা মিথ্যাবাদী। (৮৭) সেই দিন তারা ঈশ্বরের কাছে পরিপূর্ণ আত্মসমর্পণ করবে এবং তাদের সমস্ত কাল্পনিক উদ্ভাবনা বিস্মৃত হয়ে যাবে। (৮৮) যারা অবিশ্বাস করল ও ঈশ্বরের পথে বাধাসৃষ্টি করল, আমি তাদের শাস্তির পর শাস্তি বৃদ্ধি করবো; কারণ তারা অশাস্তি সৃষ্টি করত।

(৮৯) আর সেদিন আমি প্রত্যেক জাতির মাঝে তাদের নিজেদের মধ্য থেকেই তাদের বিপক্ষে একজন সাক্ষী দাঁড় করাব এবং তোমাকে তাদের বিষয়ে সাক্ষী করে নিয়ে আসবো। আর আমি তোমার কাছে গ্রন্থ পাঠিয়েছি যেটি এমন যে তা প্রত্যেক বস্তুর সুস্পষ্ট বর্ণনা, হেদায়েত, রহমত এবং আত্মসমর্পণকারীদের জন্য সুসংবাদ।

(৯০) নিশ্চয় ঈশ্বর ন্যায্যপরায়ণতা, সদাচরন এবং আত্মীয়স্বজনদের দান করার নির্দেশ দিচ্ছেন। আর ঈশ্বর নিষেধ করেছেন অশ্লীলতা, অসৎ কাজ ও বিদ্রোহ করতে। ঈশ্বর তোমাকে উপদেশ দান করেছেন যাতে তুমি চিন্তা ভাবনা কর।

(৯১) তোমরা যখন অঙ্গীকার কর তখন ঈশ্বরের অঙ্গীকার পূর্ণ কর। আর পাকা শপথ করার পর তা ভঙ্গ করো না। আর তোমরা তোমাদের উপর ঈশ্বরকে জামিনদারও বানিয়েছ। নিঃসন্দেহে ঈশ্বর জানেন যা তোমরা কর।

(৯২) আর তোমরা ঐ মহিলার মত হয়ো না যে নিজের ভ্রমবশতঃ তার পাকানো সুতো টুকরো টুকরো করে ছিঁড়ে ফেলে। তোমরা তোমাদের শপথকে পরস্পর অশান্তি সৃষ্টি করার মাধ্যম বানাও, শুধু এই কারণে যে, একদল অন্যদলের চেয়ে বড় হয়ে যাবে। এর মাধ্যমে ঈশ্বর তোমাদের পরীক্ষা নেন এবং তিনি পুনরুত্থান দিবসে স্পষ্ট করে দেবেন যে বিষয়ে তোমরা মতভেদ করতে।

(৯৩) ঈশ্বর যদি ইচ্ছা করতেন তাহলে তোমাদের সবাইকে একই উন্মত্ত করে দিতেন; কিন্তু তিনি যাকে চান পথভ্রষ্ট করেন এবং যাকে চান পথের সন্ধান দেন। আর তোমাদের কর্ম সম্পর্কে অবশ্যই জিজ্ঞাসা করা হবে।

(৯৪) আর তোমরা তোমাদের শপথকে, পরস্পরের প্রতারণা করার মাধ্যম বানিও না, তাতে পা স্থীর হওয়ার পর পিছলে যাবে এবং ঈশ্বরের পথে বাধা দেওয়ার কারণে তোমরা শাস্তি আন্বাদন করবে। তোমাদের জন্য ভয়ানক শাস্তি রয়েছে। (৯৫) আর তোমরা ঈশ্বরের অঙ্গীকারকে সামান্য লাভের জন্য বিকিয়ে দিও না। ঈশ্বরের কাছে যা আছে তোমাদের জন্য তা-ই উত্তম, যদি তোমরা জানতে।

(৯৬) তোমাদের কাছে যা আছে তা শেষ হয়ে যাবে আর যা কিছু ঈশ্বরের কাছে আছে তা চিরদিন থাকবে। আর যারা ধৈর্য ধারণ করবে আমি তার সৎকর্মের প্রতিফল অবশ্যই দেব। (৯৭) যে ব্যক্তি কোন ভাল কাজ করবে, সে পুরুষই হোক বা নারী যদি সে বিশ্বাসী হয় তাহলে আমি তাকে উত্তম জীবন প্রদান করবো এবং তাদেরকে তাদের কৃতকর্মের শ্রেষ্ঠ পুরস্কার দেব।

(৯৮) অতএব যখন কুরআন পাঠ করবে তখন বিতাড়িত শয়তান থেকে ঈশ্বরের আশ্রয় চাইবে। (৯৯) তার কোন আধিপত্য নেই তাদের উপর যারা বিশ্বাস স্থাপন করে এবং তাদের প্রভুর উপর ভরসা করে। (১০০) তার

আধিপত্য কেবল তাদের উপরেই যারা তার সাথে সম্পর্ক রাখে আর যারা ঈশ্বরের সাথে অংশীদার স্থাপন করে।

(১০১) আর আমি যখন একটি বাণীকে আরেকটি বাণীর দ্বারা পরিবর্তন করি, ঈশ্বর যা অবতীর্ণ করেন, তিনিই সে সম্পর্কে ভালই জানেন। তখন তারা বলেঃ তুমি তো কেবল মিথ্যা উদ্ভাবনকারী; বরং তাদের অধিকাংশই জানে না। (১০২) বলঃ পবিত্র আত্মা (জিব্রাঈল) তোমার প্রতিপালকের পক্ষ থেকে তথ্যসহ এটা অবতীর্ণ করেছে, যাতে এটা বিশ্বাস স্থাপনকারীদের সুদৃঢ় রাখে এবং আত্মসমর্পণকারীদের জন্য পথ নির্দেশ ও সুসংবাদ জ্ঞাপন করে।

(১০৩) আর আমি জানি তারা বলেঃ তাকে তো একজন মানুষ শিক্ষা দেয়। যে ব্যক্তির দিকে তারা ঈঙ্গিত করে তার ভাষা আজমী (অনারব)। আর এই কুরআন তো স্পষ্ট আরবী ভাষায়। (১০৪) নিঃসন্দেহে যারা ঈশ্বরের বাণী সমূহে আস্থা প্রকাশ করে না, ঈশ্বর ওদের কখনই পথ দেখাবেন না আর ওদের জন্য রয়েছে যন্ত্রনাদায়ক শাস্তি। (১০৫) মিথ্যাতো তারাই তৈরী করে যারা ঈশ্বরের বাণী সমূহে বিশ্বাস করে না আর এরাই মিথ্যাবাদী।

(১০৬) যাদেরকে সত্য ত্যাগ করতে বাধ্য করা হয়েছে অথচ অন্তর সত্যের উপর দৃঢ়ভাবে প্রতিষ্ঠিত তারা ব্যতীত যারা বিশ্বাস স্থাপন করার পর ঈশ্বর থেকে বিমুখ হয়ে যায় এবং মনে-প্রাণে অবিশ্বাসী হয়ে যায় তাদের উপর ঈশ্বরের প্রকোপ আপতিত হয় এবং তাদেরকে ভয়ানক শাস্তি দেওয়া হবে। (১০৭) এটা এই কারণে যে, তারা পরলোকের তুলনায় সাংসারিক জীবনকে অগ্রাধিকার দিয়েছে আর ঈশ্বর অবজ্ঞাকারীদের পথ দেখান না। (১০৮) এরাই তারা, ঈশ্বর যাদের অন্তর, কান ও চোখ মোহর করে দিয়েছেন। আর এরা পরিপূর্ণ অমনোযোগী। (১০৯) কোন সন্দেহ নেই পরলোকে এরাই ক্ষতিগ্রস্ত হবে।

(১১০) যারা নির্যাতন ভোগের পর দেশত্যাগ করেছে, অতঃপর ঈশ্বরের পথে কঠোর সংগ্রাম করেছে এবং ধৈর্য ধারণ করেছে তাদের জন্য নিশ্চয় তোমার প্রভু ক্ষমাশীল ও অতি দয়ালু। (১১১) সেদিন প্রত্যেকেই আত্মপক্ষ সমর্থন করার জন্য উপস্থিত হবে, আর প্রত্যেককে তার কৃতকর্মের পূর্ণ প্রতিফল দেওয়া হবে এবং তাদের প্রতি কোন অন্যায় করা হবে না।

(১১২) আর ঈশ্বর একটি জনপদের উদাহরণ দিচ্ছেন যা ছিল নিরাপদ ও সুচ্ছন্দপূর্ণ, যেখানে সব জায়গা থেকে পর্যাপ্ত জীবনোপকরন আসত। অতঃপর তারা ঈশ্বরের অনুগ্রহের প্রতি অকৃতজ্ঞতা প্রকাশ করল এবং ঈশ্বর তাদের কৃত-কর্মের জন্য ক্ষুধা ও ভয়ের স্বাদ আস্বাদন করালেন। (১১৩) এবং তাদের মধ্যে থেকেই তাদের জন্য একজন বার্তাবাহক এল; কিন্তু তারা তাকে বিশ্বাস করল না ফলে শাস্তি তাদেরকে পাকড়াও করল। আর তারা অত্যাচারী ছিল।

(১১৪) আর যে জিনিষ ঈশ্বর তোমাদের জন্য পবিত্র ও বৈধ করেছেন তা হতে আহার কর আর ঈশ্বরের অনুগ্রহের জন্য কৃতজ্ঞতা জ্ঞাপন কর, যদি তোমরা তাঁর উপাসক হও। (১১৫) ঈশ্বর তো তোমাদের জন্য মৃত প্রাণীর মাংস, রক্ত, শুকরের মাংস আর যে প্রাণী ঈশ্বর ছাড়া অন্য কারো নামে বধ করা হয় তার মাংস অবৈধ করেছেন; কিন্তু যদি কোন ব্যক্তি বাধ্য হয় শর্ত এটাই যে, ইচ্ছাকৃত ভাবে নয় এবং আশু প্রয়োজনাতিরিক্ত ভাবে নয়, বরং অত্যাধিক আবশ্যিকতার কারণে যদি কেউ বাধ্য হয়, তাহলে ঈশ্বর ক্ষমাশীল ও পরম দয়ালু।

(১১৬) মিথ্যাভাবে একথা বলো না - এটা বৈধ আর এটা অবৈধ আর ঈশ্বরের উপরে মিথ্যা আরোপ করো না। যারা ঈশ্বরের উপর মিথ্যা আরোপ করবে, তারা সফলকাম হয় না। (১১৭) তাদের জীবনের আনন্দ উপভোগ

স্বল্পকালের জন্য, তাদের জন্য বেদনাদায়ক শাস্তি রয়েছে।

(১১৮) আর ইহুদীদের জন্য আমি যা কিছু অবৈধ করেছিলাম তা তোমার কাছে পূর্বেই বর্ণনা করেছি। আমি তাদের প্রতি কোন অত্যাচার করি নি বরং তারা নিজেরাই নিজেদের প্রতি অত্যাচার করতে থাকে।

(১১৯) অতঃপর যারা অজ্ঞানতাবশতঃ মন্দ কাজ করে এবং তারপর অনুশোচিত হয়ে ক্ষমা প্রার্থনা করে এবং নিজেকে সংশোধন করে নেয়, তাদের প্রতি তোমার প্রভু ক্ষমাশীল ও দয়ালু।

(১২০) নিঃসন্দেহে ইবরাহীম (আব্রাহাম) নিজেই (একাই) ছিল এক সম্প্রদায় (একটিজাতির জীবন্ত প্রতিক) যে ঈশ্বরের প্রতি অনুগত ও একনিষ্ঠ ছিল, সে অংশীবাদী ছিল না। (১২১) সে ঈশ্বরের অনুগ্রহের প্রতি কৃতজ্ঞ ছিল। ঈশ্বর তাকে নির্বাচন করলেন এবং সঠিক পথে পরিচালিত করলেন। (১২২) আর আমি তাকে পৃথিবীতেও কল্যাণ দিয়েছিলাম আর পরলোকেও সে সৎকর্মশীলদের অন্তর্ভুক্ত হবে। (১২৩) অতঃপর তোমার কাছে প্রত্যাদেশ পাঠিয়েছি যে, ইবরাহীমের (আব্রাহামের) পথ অনুসরণ কর, যে একনিষ্ঠ ছিল সে অংশীবাদীদের অন্তর্ভুক্ত ছিল না।

(১২৪) শনিবারের নিয়ম যাদের উপর বিধিবদ্ধ করা হয়েছিল তারা এতে মতভেদ করেছিল। আর নিঃসন্দেহে তোমার প্রভু পুনরুত্থান দিবসে এর মীমাংসা করে দেবেন যে ব্যাপারে তারা মতভেদ করছিল।

(১২৫) প্রজ্ঞা ও সদুপদেশ দ্বারা মানুষকে তোমার প্রভুর পথে আহ্বান করো এবং তাদের সাথে ভালভাবে কথা বলো। নিঃসন্দেহে তোমার প্রভু ভালভাবেই জানেন যে, কে তাঁর পথ থেকে ভ্রষ্ট হয়ে গেছে আর তিনি তাদেরকেও ভালভাবেই জানেন যারা সঠিক পথে চলছে।

(১২৬) যদি তোমরা প্রতিশোধ নিতে চাও তাহলে এতটাই প্রতিশোধ নাও যতটা কষ্ট তোমরা পেয়েছ। আর যদি ধৈর্য ধারণ করতে পার তাহলে ধৈর্যবানেরা

অধিক উত্তম। (১২৭) ধৈর্য ধারণ কর, আর তোমাদের ধৈর্য ঈশ্বরেরই দান। আর তোমরা তাদের আচরণে দুঃখিত হয়ো না এবং তারা যে চক্রান্ত করছে তার জন্য কষ্ট পেও না। (১২৮) নিঃসন্দেহে ঈশ্বর ঐ লোকদের সাথে আছেন যারা সংযমী ও সৎকর্মশীল।

অধ্যায় ১৭ : আল - ইসরা (নৈশভ্রমণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তিনিই সেই পবিত্র সত্ত্বা যিনি তাঁর বান্দাকে (পয়গম্বরকে) এক রজনীতে (মক্কায় অবস্থিত) পবিত্র উপসনালয় থেকে ভ্রমণ করিয়েছিলেন (জেরুজালেমে অবস্থিত) দূরবর্তী উপসনালয়ে যার সংলগ্ন এলাকা সমূহ আমি কল্যাণময় করে রেখেছিলাম যাতে আমি তাকে আমার কিছু নিদর্শন দেখাতে পারি। নিঃসন্দেহে তিনি সবকিছু শোনেন, সবকিছু দেখেন।

(২) আমি মুসাকে (মোজেসকে) গ্রন্থ দিয়েছিলাম এবং তা ইসরাইলের সন্তানদের জন্য একটি দিক-নির্দেশনা করে বলেছিলামঃ তোমরা আমাকে ছাড়া অন্য কাউকে অভিভাবক বানিও না। (৩) তোমরা তাদের উত্তরপুরুষ যাদেরকে আমি নূহের (নোয়াহ'র) জাহাজে আরোহন করিয়েছিলাম। নিঃসন্দেহে সে ছিল এক কৃতজ্ঞ বান্দা।

(৪) আমি ইসরাইলের সন্তানদের গ্রন্থে পূর্বেই ঘোষণা করেছিলাম যে, তোমরা পৃথিবীতে দুবার বিপর্যয় সৃষ্টি করবে এবং বড়রকম বিদ্রোহ প্রদর্শন করবে। (৫) অতঃপর যখন সতর্কিত সেই প্রথম সময়টি এল তখন আমি তোমাদের বিরুদ্ধে আমার শক্তিশালী বান্দাদের পাঠালাম। তারা ঘরে ঘরে ধংস যজ্ঞ চলাল এবং প্রথম সতর্কতা বাস্তবায়িত হল। (৬) অতঃপর আমি তোমাদেরকে পুনরায় তাদের উপর বিজয় দান করলাম। ধন-সম্পদ ও সন্তান-সন্ততির মাধ্যমে সাহায্য

করলাম এবং তোমাদেরকে সংখ্যাগরিষ্ঠ দলে পরিণত করলাম।

(৭) তোমরা সৎকর্ম করলে সৎকর্ম নিজেদেরই জন্যে করবে, মন্দকর্ম করলে তাও নিজেদের জন্যে। তারপর যখন দ্বিতীয় সতর্কিত সময়টি এল, তখন (আমি তোমাদের বিরুদ্ধে অন্যদেরকে পাঠালাম) তোমাদেরকে চূড়ান্তভাবে অপদস্ত করবার জন্যে এবং উপসনালয়ে প্রবেশ করবার জন্যে যেভাবে তারা পূর্বে প্রবেশ করেছিল এবং যা কিছু হাতে পেয়েছিল তাদের চূড়ান্ত ধংস যজ্ঞ চালিয়েছিল। (৮) হয়ত তোমাদের প্রভু তোমাদের উপর অনুগ্রহ করবেন। আর যদি তোমরা আবার আগের আচরণ কর তাহলে আমিও আগের আচরণ করবো। আর আমি নরকে অবজ্ঞাকারীদের জন্যে কারাগার বানিয়েছি।

(৯) নিঃসন্দেহে এই কুরআন সেই পথ দেখায় যা সর্বশ্রেষ্ঠ সরল পথ, আর আস্থাবানদের সুসংবাদ দেয় যে, যারা সৎকর্মশীল তাদের জন্যে বড় প্রতিফল রয়েছে। (১০) আর যারা পরলোকে বিশ্বাসী নয় তাদের জন্যে আমি যন্ত্রনাদায়ক শাস্তি প্রস্তুত রেখেছি।

(১১) আর মানুষ অকল্যাণ কামনা করে যেভাবে তাকে কল্যাণ কামনা করা দরকার। আর মানুষ বড়ই ত্বরা প্রবণ।^১ (১২) আর আমি রাত ও দিনকে দুটি নিদর্শন বানিয়েছি। অতঃপর রাতের নিদর্শনকে নিষ্প্রভ করেছি আর দিনের নিদর্শনকে আলোকপ্রদ করেছি, যাতে তোমরা তোমাদের

^১ বিঃদ্রঃ-(১৭ঃ১১) ঈশ্বর চান পার্থিব সুখ-স্বাচ্ছন্দ অর্জনের ক্ষেত্রে মানুষ ধৈর্য ধারণ করুক যাতে সে পরকালের যাত্রাপথে সদা সর্বদা সরলপথ অনুসরণ করতে পারে। কিন্তু মানুষ তার ত্বরা প্রবণ স্বভাবের জন্য, ক্ষনস্থায়ী পার্থিব সুখ-স্বাচ্ছন্দ অর্জনের লক্ষ্যে সে শশব্যস্ত হয়ে পড়ে যা তার অগ্রগমনের পথে প্রতিবন্ধকতা সৃষ্টি করে। মানুষের তাৎক্ষণিক জাগতিক চাহিদা পরিতৃপ্তির বাসনাই পরকালের অনুগ্রহ থেকে বঞ্চিত হওয়ার মূল কারণ।

প্রভুর অনুগ্রহ সন্ধান করতে পার এবং বছরের সংখ্যা ও হিসাব জানতে পার। আমি তো সব বিষয় বিস্তারিতভাবে বর্ণনা করেছি।

(১৩) আর আমি প্রত্যেক মানুষের ভাগ্য তার গ্রীবাঙ্গ করেছি। আর উত্থান দিবসে তাদের জন্য একটি গ্রন্থ বাহির করবো যা তারা উন্মুক্ত অবস্থায় দেখতে পাবে। (১৪) (আমি বলবো) তোমার সংরক্ষিত নথিপত্র। আজ তোমার হিসাব নেওয়ার জন্য স্বয়ং তুমিই যথেষ্ট। (১৫) যে ব্যক্তি সৎপথে চলে তার নিজের জন্যেই চলে, আর যে বিপথগামী হয় সে নিজের ক্ষতির জন্যেই বিপথগামী হয়। একজন আরেকজনের বোঝা বহন করবে না। কোন পয়গম্বর না পাঠানো পর্যন্ত আমি কাউকে শাস্তি দিই না।

(১৬) যখন আমি কোন নগরকে ধ্বংস করতে চাই তখন তার বিলাস জীবন যাপনকারীদের সংকর্মের নির্দেশ দিই; কিন্তু তারা তা অবজ্ঞা করে। তখন তার বিরুদ্ধে দণ্ডাজ্ঞা অবধারিত হয়ে যায় আর আমি তাকে একেবারে ধ্বংস করে দিই। (১৭) নূহের (নোয়াহ'র) পর আমি কত প্রজন্ম ধ্বংস করে দিয়েছি। নিজের বান্দাদের পাপের খবর রাখা ও তা দেখার জন্য তোমার প্রভুই যথেষ্ট।

(১৮) কেউ পার্থিব সুখ সম্ভোগ কামনা করলে আমি যাকে যা ইচ্ছা সত্ত্বর দিয়ে থাকি। পরে আমি তার জন্য নরক নিশ্চিত করে দিই। সে তাতে প্রবেশ করবে নিন্দিত ও বিতাড়িত হয়ে। (১৯) আর যে পরলোক চায় আর তার জন্য যথাযথ চেষ্টা করে এবং যদি সে আস্থাবান হয় তাহলে এমন ব্যক্তিদের প্রয়াস প্রভুর কাছে পুরস্কৃত হয়ে থাকে।

(২০) এদের (যারা পার্থিব সুখ কামনা করে) এবং ওদের (যারা

পরলৌকিকসুখ কামনা করে) উভয়কেই আমি তোমার প্রভুর দান পৌঁছে দিই। তোমার প্রভুর দান, কারো জন্য বন্ধ নেই। (২১) লক্ষ্য কর, কিভাবে আমি তাদের একটি দলকে অপর দলের উপর শ্রেষ্ঠত্ব দিয়েছি। আর মর্যাদায় ও শ্রেষ্ঠত্বে তো পরকালই মহত্তর।

(২২) ঈশ্বরের সাথে অন্য কাউকে উপাস্য বানিও না। তাহলে তুমি নিন্দিত ও অসহায় হয়ে পড়বে। (২৩) আর তোমার প্রভু আদেশ করেছেন যে, তোমরা তাঁকে ছাড়া অন্য কারও উপাসনা করবে না এবং পিতা-মাতার সাথে সদ্ব্যবহার করবে। যদি তাদের একজন বা উভয়জন তোমার কাছে বার্ষিক্যে উপনীত হয় তাহলে তাদেরকে ‘উফ’ শব্দ পর্যন্ত বলবে না এবং তাদের সাথে ধমকের সুরে কথা বলবে না, বরং তাদের সাথে সম্মানজনক ভাবে কথা বলবে। (২৪) আর তাদের সামনে বিনম্রভাবে মমতার ডানা মেলে ধরবে আর বলবেঃ হে প্রভু ! এদের দুজনের উপর দয়া কর, যেমনভাবে তারা আমাকে শৈশবে লালন-পালন করেছে। (২৫) তোমাদের প্রভু ভালভাবেই জানেন তোমাদের অন্তরে কি আছে। যদি তোমরা সৎকর্মপরায়ণ হও তাহলে অবশ্যই তিনি ঈশ্বর-অভিযুক্তীদেরকে ক্ষমা করবেন।

(২৬) আত্মীয়-স্বজনদেরকে তাদের প্রাপ্য দিয়ে দাও, নির্ধনদের ও যাত্রীদেরকেও আর অপব্যয় করো না। (২৭) নিঃসন্দেহে অপব্যয়কারীরা শয়তানের ভাই। আর শয়তান তার প্রভুর কাছে বড়ই অকৃতজ্ঞ। (২৮) আর তোমার প্রভুর কাছ থেকে প্রত্যাশিত কোন অনুগ্রহের অপেক্ষায় থাকা কালে যদি তাদের থেকে মুখ ফিরিয়ে থাক তাহলে তাদের সাথে নম্রভাবে কথা বলবে।

(২৯) তুমি একেবারে ব্যয়-কুণ্ঠ হয়ো না, আবার পুরোপুরি মুক্ত হস্তও হয়ো না। তাহলে নিন্দিত ও অসহায় হয়ে পড়বে। (৩০) নিঃসন্দেহে তোমার প্রভু যাকে ইচ্ছা অধিক জীবিকা প্রদান করেন, আর যার ইচ্ছা তা হ্রাস করেন। নিঃসন্দেহে তিনি তাঁর বান্দাদেরকে ভালোভাবে জানেন ও দেখেন।

(৩১) অভাবের ভয়ে তোমরা তোমাদের সন্তানদের হত্যা করো না, আমিই ওদের জীবিকা দান করি আর তোমাদেরকেও। নিঃসন্দেহে ওদের হত্যা করা একটি বড় পাপ। (৩২) আর ব্যভিচারের কাছেও যেও না, এটা একটা অশ্লীল কাজ ও নিকৃষ্ট পথ।^১

(৩৩) ঈশ্বর যার হত্যা নিষিদ্ধ করেছেন যথার্থ কারণ ছাড়া তাকে হত্যা করো না। আর যাকে অন্যায়ভাবে হত্যা করা হয় তার উত্তরাধিকারীকে প্রতিশোধ দাবী করার অধিকার দিয়েছি। তবে সে যেন সীমা লঙ্ঘন না করে, নিশ্চয়ই সে সাহায্য প্রাপ্ত হয়েছে।

(৩৪) অনাথ বয়োপ্রাপ্ত না হওয়া পর্যন্ত সদুদ্দেশ্য ছাড়া তার সম্পত্তির নিকটবর্তী হয়ো না। আর প্রতিশ্রুতি পালন করবে; নিঃসন্দেহে প্রতিশ্রুতি সম্পর্কে জিজ্ঞাসা করা হবে। (৩৫) আর যখন ওজন করবে তখন পূর্ণমাত্রায় দেবে এবং পাল্লায় ওজন করে দেবে। এটাই কল্যাণকর আর এর পরিণামও উত্তম।

(৩৬) যে বিষয়ে তোমার জ্ঞান নেই সেই বিষয়ে অনুমান দ্বারা পরিচালিত

^১ বিঃ দ্রঃ-(১৭ঃ৩২) অন্যতম অনিষ্ঠকারক কুঅভ্যাস ব্যভিচার বা জিনাকে ঈশ্বর পরিপূর্ণ নির্মূল করতে চান। ব্যভিচার হল এমন একটি অনিষ্ঠকারক বিষয় এবং এমন একটি লজ্জাহীনতার পরিচায়ক যে প্রত্যেক মানুষকে এই কুঅভ্যাসের প্রাথমিক স্তর থেকেই বিরত থাকা দরকার। এখানে এই বিষয়ে একটি মৌলিক নিষেধাজ্ঞা প্রদান করা হয়েছে।

হয়ো না। নিঃসন্দেহে কান, চোখ আর অন্তর সম্পর্কে সব মানুষকেই জিজ্ঞাসা করা হবে। (৩৭) আর পৃথিবীতে দম্ভভরে চলো না। তুমি তো ভূমিকে বিদীর্ণ করতে পারো না, আর তুমি পর্বতের উচ্চতায় পৌঁছাতেও পার না। (৩৮) এই সমস্ত মন্দ কাজ তোমার প্রভুর কাছে অপছন্দনীয়।

(৩৯) তোমার প্রভু তোমার প্রতি প্রেরিত বার্তাগুলির দ্বারা তোমাকে যে প্রজ্ঞা দান করেছেন, এগুলি তার অন্তর্ভুক্ত। আর ঈশ্বরের সাথে অন্য কোন উপাস্য স্থির করো না, তাহলে অভিযুক্ত ও প্রত্যাখ্যাত অবস্থায় নরকে নিষ্কিন্তু হবে।

(৪০) তোমাদের প্রভু কি তোমাদের জন্য পুত্র সন্তান মনোনীত করেছেন আর নিজের জন্য দেবদূতদের মধ্য থেকে কন্যা সন্তান গ্রহণ করেছেন? নিঃসন্দেহে তোমরা একটি গর্হিত কথা বলছো। (৪১) আর আমি এই কুরআনে বিভিন্ন প্রকারে বর্ণনা করেছি যাতে তারা অনুসরণ করতে পারে; কিন্তু ওদের বিমুখতা বেড়েই চলেছে। (৪২) বলোঃ ঈশ্বরের সাথে যদি অন্য কোন উপাস্য থাকত যেমন লোকে দাবী করে, তাহলে তারা সিংহাসনের অধীশ্বরের কাছে পৌঁছানোর পথ অন্বেষণ করত। (৪৩) তিনি মহিমান্বিত! তারা যা বলে তা থেকে তিনি অনেক উর্দ্বৈ। (৪৪) সপ্ত আকাশ ও পৃথিবী এবং যা কিছু এর মধ্যে আছে সবই তাঁর পবিত্রতা বর্ণনা করে। এবং এমন কিছু নেই যা তাঁর পবিত্রতা ও প্রশংসা বর্ণনা করে না; কিন্তু তোমরা ওদের স্তুতি বুঝতে পার না। নিঃসন্দেহে তিনি অত্যন্ত সহনশীল, ক্ষমাপরায়ণ।

(৪৫) আর তুমি যখন কুরআন পাঠ কর তখন আমি তোমার মধ্যে ও যারা পরলোকে বিশ্বাসী নয় তাদের মধ্যে একটি গুপ্ত পর্দা (আবরণ) স্থাপন করি।

(৪৬) আর তাদের অন্তরের উপর আবরণ দিয়ে দিই যেন তারা তা বুঝতে না পারে এবং তাদের কানে দিয়ে দিই বধিরতা। আর যখন তুমি কুরআনে তোমার একক প্রভুর চর্চা কর তখন তারা ঘৃণায় পৃষ্ঠ প্রদর্শন করে।

(৪৭) তারা তোমার কথা শ্রবণকালে যা শোনে আমি তা ভাল জানি এবং সেটাও জানি গোপনে তারা কি আলোচনা করে। এই অত্যাচারীরা বলে যে, তোমরা তো এক জাদুকর ব্যক্তির অনুসরণ করছো। (৪৮) দেখ, তারা তোমার জন্য কেমন উপমা পেশ করছে। এরা পথভ্রষ্ট হয়ে গেছে, তাই কোন পথ পাচ্ছে না।

(৪৯) আর তারা বলে যে, যখন আমরা অস্থি ও ধুলায় রূপান্তরিত হব, তখন কি আমাদেরকে আবার জীবন দান করা হবে? (৫০) বলঃ তোমরা যদি পাথর কিংবা লোহাও হয়ে যাও, (৫১) অথবা অন্য কোন বস্তু যা তোমাদের কল্পনায় এর চেয়েও বেশী শক্ত। তখন ওরা বলবেঃ কে আমাদের পুনর্জীবিত করবে? তুমি বলঃ তিনিই যিনি প্রথমবার তোমাদের সৃষ্টি করেছেন। তখন তারা তোমার সামনে মাথা নাড়বে আর বলবেঃ তা কবে? বলঃ হয়ত শীঘ্রই হবে এতে আশ্চর্য হওয়ার কিছুই নেই। (৫২) যে দিন ঈশ্বর তোমাদের ডাক দেবেন আর তোমরা তাঁর প্রশংসা করতে করতে তাঁর ডাকে সাড়া দেবে এবং তোমরা মনে করবে তোমরা খুব অল্প সময়ের জন্য অবস্থান করেছিলে।

(৫৩) আর আমার বান্দাদের বলঃ তারা যেন তাই বলে যা উত্তম। শয়তান ওদের মধ্যে বিভেদ সৃষ্টি করে। নিঃসন্দেহে শয়তান মানুষের প্রত্যক্ষ শত্রু।

(৫৪) তোমাদের প্রভু তোমাদের ভালভাবেই জানেন, যদি তিনি ইচ্ছা করেন তবে তোমাদের উপর দয়া করেন, আর যদি তিনি ইচ্ছা করেন তোমাদেরকে শাস্তি প্রদান করেন। আর আমি তোমাকে তাদের অভিভাবক করে পাঠাইনি।

(৫৫) আকাশ ও পৃথিবীতে যারা আছে তোমার প্রভু তাদের সম্বন্ধে ভালভাবেই জানেন। আর আমি বার্তাবাহকদের কতককে কতকের উপর শ্রেষ্ঠত্ব প্রদান করেছি, আর আমি দাউদ (ডেভিড) কে যবুর (গ্রন্থ) প্রদান করেছি।

(৫৬) বলঃ ঈশ্বর ব্যতীত তোমরা যাদেরকে উপাস্য বলে দাবী কর, তাদেরকে ডাক, তাহলে দেখবে তোমাদের দুঃখ-দুর্দশা দূর করবার কিম্বা (তোমরা যেমন আশা কর তেমন) অবস্থার পরিবর্তন করার ক্ষমতা তাদের নেই। (৫৭) যাদেরকে এরা ডাকে তারা স্বয়ং তাদের প্রভুর সান্নিধ্য লাভের উপায় অন্বেষণ করে যে, ওদের মধ্যে কে কত নিকটতর হতে পারে। আর তারা আপন প্রভুর কৃপা প্রত্যাশী। আর তারা তাঁর শাস্তিকে ভয় করে। বাস্তবিক তোমার প্রভুর শাস্তি তো ভয়াবহ।

(৫৮) এমন কোন জনপদ নেই যাকে আমি শেষবিচারের দিবসের পূর্বে ধ্বংস করবো না কিংবা কঠোর শাস্তি দেব না। একথা গ্রহেই লিপিবদ্ধ আছে।

(৫৯) আমি কেবল এজন্যেই নিদর্শন পাঠানো থেকে বিরত থেকেছি, কারণ পূর্ববর্তীরা তা অস্বীকার করেছিল। স্পষ্ট এক নিদর্শন হিসাবে আমি সামুদ্রিক জাতিকে উদ্ভী প্রদান করেছিলাম; কিন্তু তারা তার সাথে অন্যায় আচরণ করেছিল। আমি ভয় দেখানোর জন্যেই নিদর্শন পাঠিয়ে থাকি।

(৬০) যখন আমি তোমাকে বলেছিলাম, তোমার প্রভু তো মানুষকে পরিবেষ্টন করে আছেন। আর ঐ স্বপ্ন যা আমি তোমাকে দেখিয়েছি তা কেবল মানুষকে যাচাই করার জন্য ছিল, আর ওই বৃক্ষকেও (দেখিয়েছি) কুরআনে যার নিন্দা করা হয়েছে। আমি তাদেরকে সতর্ক করি; কিন্তু তাদের অবাধ্যতা বেড়েই চলেছে।

(৬১) আর যখন আমি দেবদূতদের বলেছিলাম যে, আদমের কাছে প্রণত হও, তখন তারা প্রণত হয়েছিল; কিন্তু ইবলিস প্রণত হলো না।

সে বললঃ আমি কি এমন ব্যক্তির কাছে প্রণত হবো, যাকে আপনি মাটি দিয়ে বানিয়েছেন? (৬২) সে (আরো) বললঃ দেখুন! এই ব্যক্তি যাকে আপনি আমার উপর মর্যাদা দিয়েছেন, যদি আমাকে আপনি শেষ বিচারের দিন পর্যন্ত সময় দেন তাহলে আমি অল্প কয়েকজন ব্যতীত এর সন্তানদের সকলকে বশীভূত করে নেবো।

(৬৩) ঈশ্বর বললেনঃ চলে যা, এদের মধ্যে যারাই তোর সঙ্গী হবে নরকই হবে তাদের প্রতিফল। (৬৪) তাদের মধ্যে যাকে পারিস তোর আওয়াজ দ্বারা প্ররোচিত কর, তোর অশ্বারোহী ও পদাতিক বাহিনী নিয়ে তাদের উপর আক্রমণ কর, ধন-সম্পদ ও সন্তান-সন্তুতিতে তাদের অংশীদার হয়ে যা এবং তাদের প্রতিশ্রুতি দে। আর শয়তানের প্রতিশ্রুতি একটি ধোঁকা ছাড়া আর কিছু নয়। (৬৫) তবে যারা আমার প্রকৃত বান্দা তাদের উপর তোর কোন কর্তৃত্ব চলবে না। আর অভিভাবক হিসাবে তোর প্রভুই যথেষ্ট।

(৬৬) তোমাদের প্রভু হলেন তিনি যিনি তোমাদের জন্য সমুদ্রের বুকে নৌকা চালিত করেন যাতে তোমরা তাঁর কৃপা (জীবিকা) অন্বেষণ কর। নিঃসন্দেহে তিনি তোমাদের উপর কৃপাশীল। (৬৭) আর যখন সমুদ্রে তোমাদের উপর কোন বিপদ আসে, তখন তোমরা ঐ উপাস্যদের ভুলে যাও আল্লাহকে (ঈশ্বরকে) বাদ দিয়ে যাদেরকে তোমরা ডাকতে। অতঃপর তিনি যখন তোমাদেরকে নিরাপদে স্থলভাগে নিয়ে আসেন, তখন তোমরা আবার মুখ ফিরিয়ে নাও। আর মানুষ বড়ই অকৃতজ্ঞ।

(৬৮) তোমরা কি নির্ভয় হয়ে গেলে যে আল্লাহ (ঈশ্বর) তোমাদেরকে স্থলভাগে আনার পর ভূমি ধসিয়ে ভূগর্ভস্থ করবেন না বা তোমাদের উপর শিলাবর্ষণকারী ঝড় পাঠাবেন না? তখন তোমরা তোমাদের কাউকে রক্ষাকারী পাবে না। (৬৯) অথবা তোমরা কি এ থেকেও নির্ভয় হয়েছ

যে তিনি তোমাদেরকে পুনরায় সমুদ্রে নিয়ে যাবেন না, আর তোমাদের উপর প্রবল সমুদ্রঝড় পাঠাবেন না, এবং তোমাদের অকৃজ্ঞতার কারণে তোমাদেরকে নিমজ্জিত করবেন না? সেখানে তোমরা আমার বিরুদ্ধে কোন সাহায্যকারী পাবে না।

(৭০) আর আমি আদমের (অ্যাডামের) সন্তানদের সম্মান প্রদান করেছি আর আমি তাদের স্থলে ও সমুদ্রে চলাচলের বাহন দিয়েছি এবং তাদের পবিত্র বস্তুর জীবিকা প্রদান করেছি, আর আমি তাদেরকে আমার সৃষ্টির অনেকের উপর শ্রেষ্ঠত্ব দিয়েছি।

(৭১) সে দিন আমি প্রত্যেক দলকে তাদের দলপতি সহ ডাকব। অতঃপর যাদের কর্ম-পত্র ডানহাতে দেওয়া হবে তারা নিজেদের কর্ম-পত্র পড়বে আর তাদের প্রতি সামান্যও অবিচার করা হবে না। (৭২) আর যে ব্যক্তি পৃথিবীতে অন্ধ পরলোকেও সে অন্ধ এবং অধিকতর পথভ্রষ্ট।

(৭৩) আমি তোমার কাছে যা প্রত্যাদেশ করেছি তা থেকে তারা তোমাকে বিচ্যুত করার চূড়ান্ত চেষ্টা করেছিল, যাতে তুমি আমার সম্পর্কে কিছু মিথ্যা উদ্ভাবন কর; সফলকাম হলে তারা অবশ্যই তোমাকে বন্ধু রূপে গ্রহণ করত। (৭৪) আমি যদি তোমাকে অবিচল না রাখতাম তাহলে তুমি তাদের দিকে কিছুটা ঝুঁকেই পড়তে। (৭৫) তখন আমি তোমাকে ইহজীবনে এবং পরজীবনে দ্বিগুন শাস্তি আশ্বাদন করাতাম। তখন তুমি আমার মোকাবিলায় কোন সাহায্যকারী পেতে না।

(৭৬) তারা তো তোমাকে প্রায় উৎখাত করে দিয়েছিল যাতে করে তারা তোমাকে ঐ স্থান থেকে বহিস্কার করতে পারে। আর যদি এমন হত তাহলে তোমার পরে এরাই স্বল্প সময় অবস্থান করতে পারত। (৭৭) তোমার পূর্বে আমি যেসব বার্তাবাহ পাঠিয়েছিলাম তাদের ক্ষেত্রেও এই নিয়মই

ছিল। আমার নিয়মে কোনো পরিবর্তন পাবে না।

(৭৮) সূর্য ঢলে পড়ার সময় থেকে রাতের অন্ধকার নেমে আসা পর্যন্ত প্রার্থনায় মগ্ন হও এবং ভোরেও - নিশ্চয়ই ভোরের পাঠ সাক্ষ্য থাকে। (৭৯) এবং রাত্রে জাগ্রত হও এবং প্রার্থনা কর। এটা অতিরিক্ত প্রার্থনা। আশা করা যায় যে, তোমার প্রভু তোমাকে এক প্রশংসিত স্থানে উন্নীত করবেন।

(৮০) আর বলঃ হে আমার প্রভু! আমাকে সসম্মানে প্রবেশ করাও এবং সসম্মানে নিষ্কান্ত করাও। আর তোমার পক্ষ হতে আমাকে সহায়ক শক্তি দান কর। (৮১) আর বলঃ সত্য এসে গেছে এবং মিথ্যা অবলুপ্ত হয়েছে। মিথ্যাতো অবলুপ্ত হওয়ারই ছিল।

(৮২) আমি কুরআনে এমন বিষয় অবতীর্ণ করি যা আস্থাবানদের জন্য আরোগ্য ও অনুগ্রহ। আর অত্যাচারীদের জন্য এতে ক্ষতি ছাড়া আর কিছুই বৃদ্ধি হয় না।

(৮৩) আমি যখন মানুষকে অনুগ্রহ করি তখন সে মুখ ফিরিয়ে নেয়। তখন সে দূরে সরে যায় কিন্তু যখন সে বিপদে পড়ে তখন নিরাশ হয়ে যায়। (৮৪) বলঃ প্রত্যেকে নিজ প্রকৃতিঅনুযায়ী কাজ করে? এখন তোমার প্রভুই ভাল ভাবে জানেন যে, কে অধিক সঠিক পথে আছে।

(৮৫) আর তারা তোমাকে রুহ (আত্মা) সম্বন্ধে জিজ্ঞাসা করে। বলঃ আত্মা আমার প্রভুর আদেশের ব্যাপার। আর এ বিষয়ে তোমাদেরকে খুবই সীমিত জ্ঞান প্রদান করা হয়েছে।

(৮৬) ইচ্ছা করলে আমি তোমার উপর যা অবতীর্ণ করেছি, তা অবশ্যই প্রত্যাহার করতে পারতাম। তখন তুমি আমার বিরুদ্ধে কোন অভিভাবক পেতে না। (৮৭) কিন্তু এটা কেবলমাত্র তোমার প্রভুর অনুগ্রহ নিঃসন্দেহে তোমার উপর তার অশেষ দয়া। (৮৮) বলঃ সমস্ত মানুষ এবং

জ্বিন যদি এই কুরআনের অনুরূপ কোন গ্রন্থ তৈরী করার জন্য একত্রিত হয় এবং একে অপরকে সাহায্য করে তবুও তারা অনুরূপ গ্রন্থ তৈরী করতে পারবে না।

(৮৯) এই কুরআনে আমি মানুষের জন্য প্রতিটি দৃষ্টান্ত নানাভাবে বর্ণনা করেছি; কিন্তু অধিকাংশ মানুষ অস্বীকার করেছে, তারা শুধু অবিশ্বাসই করেছে। (৯০) আর তারা বলে যে, আমরা কখনই তোমাকে বিশ্বাস করবো না, যতক্ষণ না তুমি আমাদের জন্য ভূমি থেকে একটা ফোয়ারা প্রবাহিত করবে। (৯১) অথবা তোমার কাছে খেজুরের ও আঙুরের একটি বাগান হবে আর তার মাঝে তুমি যথার্থ ভাবে নদী-নালা প্রবাহিত করবে। (৯২) অথবা তুমি যেমনটি বলে থাক, তেমনই আকাশকে খণ্ড বিখণ্ড করে আমাদের উপর ফেলবে, অথবা ঈশ্বর ও দেবদূতদের নিয়ে এসে আমাদের সামনে উপস্থিত করবে। (৯৩) অথবা তোমার কাছে একটি সোনার ঘর হবে অথবা তুমি আকাশে উঠে যাবে, আর আমরা তোমার আকাশ আরোহণেও বিশ্বাস করবো না, যতক্ষণ না তুমি আমাদের জন্য একটি গ্রন্থ নিয়ে আসবে যা আমরা পড়ে দেখব। বলঃ আমার প্রভু পবিত্র, আমি তো কেবল একজন মানুষ, ঈশ্বরের বার্তাবহ।

(৯৪) যখন পথ-নির্দেশনা এসে গেল, তখন একটি প্রশ্ন ছাড়া কিছুই বিশ্বাস স্থাপনের পথে বাধা সৃষ্টি করে নি, প্রশ্নটি হল - ঈশ্বর কি একজন মানুষকে বার্তাবহ করে পাঠিয়েছেন? (৯৫) বলে দাও, পৃথিবীতে যদি কিছু দেবদূত থাকত এবং তারা এখানে স্বচ্ছন্দে চলাফেরা করত, তাহলে আমি আকাশ থেকে দেবদূতকেই বার্তাবহ করে পাঠাতাম। (৯৬) বলঃ আমার ও তোমাদের মাঝে সাক্ষী হিসাবে ঈশ্বরই যথেষ্ট। নিঃসন্দেহে তিনি তাঁর বান্দাদের সব খবর রাখেন, তাদের সব কিছু দেখেন।

(৯৭) ঈশ্বর যাকে পথ দেখান সে পথ প্রাপ্ত হয়। আর যাকে তিনি পথভ্রষ্ট করেন তাদের জন্য তুমি ঈশ্বর ছাড়া কাউকে সহায়ক পাবে না। আর শেষবিচারের দিনে আমি ওদের মুখে ভর দিয়ে চলা অবস্থায়, অন্ধ, বোবা ও বধির করে একত্রিত করবো। ওদের ঠিকানা নরক। যখনই ওর আগুন স্তিমিত হয়ে আসবে আমি তখনই তাদের জন্য আগুন বাড়িয়ে দেব। (৯৮) এটাই তাদের প্রতিফল; কারণ তারা আমার নিদর্শন অস্বীকার করেছিল এবং বলেছিলঃ আমরা অস্থি ও ধুলায় পরিনত হলেও কি আমাদের নতুন সৃষ্টি রূপে ওঠানো হবে?

(৯৯) তারা কি লক্ষ্য করে না যে, ঈশ্বর আকাশ ও পৃথিবী সৃষ্টি করেছেন, তিনি অনুরূপ সৃষ্টি করতে ক্ষমতাবান। আর তিনি ওদের জন্য একটি নির্দিষ্ট মেয়াদ ঠিক করে রেখেছেন, এতে কোন সন্দেহ নেই। তবুও সীমালঙ্ঘনকারীরা অবিশ্বাসই করে গেছে।

(১০০) বলঃ যদি তোমরা আমার প্রভুর কল্যাণের ভাঙারের মালিক হতে, তবুও তোমরা খরচের ভয়ে তা ধরে রাখতে। আর মানুষ বড়ই কৃপণ।

(১০১) আর আমি মূসাকে (মোজেসকে) নয়টি স্পষ্ট নিদর্শন দিয়েছিলাম। ইসরাইলের সন্তানদের জিজ্ঞাসা করে দেখ। সে যখন ওদের কাছে এসেছিল তখন ফ্যারাও তাকে বলেছিলঃ হে মূসা (মোজেস)! আমার মনে হয় তোমার উপর কেউ জাদু করেছে। (১০২) মূসা (মোজেস) বলেছিল যে, তুমি ভালোকরেই জানো আকাশ ও পৃথিবীর প্রভু এই সব কিছু অবতীর্ণ করেছেন চোখ খুলে দেওয়ার মতো একটা প্রমাণ হিসাবে। আর আমি মনে করি হে ফ্যারাও! তুমি অবশ্যই ধ্বংসের দ্বারপ্রান্তে উপনীত। (১০৩) অতঃপর ফ্যারাও চাইল

তাকে ঐ ভূমি থেকে বিতাড়িত করতে। তখন আমি তাকে ও তার সাথীদের সবাইকে ডুবিয়ে দিলাম। (১০৪) আর আমি ইসরাইলের সন্তানদের বললামঃ তোমরা এদেশেই বসবাস করো। অতঃপর যখন পরলোকের অঙ্গীকার আসন্ন হবে তখন আমি তোমাদের সবাইকে একত্রিত করে আনব।

(১০৫) আর আমি সত্যসহ কুরআন অবতীর্ণ করেছি আর এটা তথ্য সহকারে অবতীর্ণ হয়েছে আর তোমাকে শুধুমাত্র সুসংবাদদাতা ও সতর্ককারী হিসাবেই পাঠিয়েছি। (১০৬) আর আমি কুরআনকে অল্প অল্প করে অবতীর্ণ করেছি যাতে তুমি লোকের সম্মুখে বিরতি দিয়ে দিয়ে পড়তে পারো। আর আমি তা ধাপে ধাপে অবতীর্ণ করেছি।

(১০৭) বলঃ তোমরা এটাকে বিশ্বাস করো অথবা অবিশ্বাস করো, এর পূর্বে যাদেরকে জ্ঞান দেওয়া হয়েছিল, তাদের সামনে যখন এটা পাঠ করা হয় তখন তারা সিজদায় (প্রণত হয়ে) লুটিয়ে পড়ে। (১০৮) আর বলে আমাদের প্রভু পবিত্র, নিঃসন্দেহে আমাদের প্রভুর অঙ্গীকার অবশ্যই পূরণ হয়। (১০৯) তারা সিজদায় (প্রণত হয়ে) পড়ে কাঁদতে থাকে এবং কুরআন তাদের বিনয় বৃদ্ধি করে।

(১১০) বলঃ তোমরা ‘আল্লাহ’ বলে ডাক আর ‘রহমান’ বলে ডাক, যে নামেই ডাক, তার জন্য সবই সুন্দর নাম। আর তোমরা তোমাদের প্রার্থনার স্বর অতি উচ্চ বা অতি ক্ষীণ কর না, দুইয়ের মধ্যপন্থা অবলম্বন করো। (১১১) বলঃ সমস্ত প্রশংসা সেই ঈশ্বরের যিনি কোন সন্তান গ্রহণ করেন নি, তার সার্বভৌমত্বে কোন অংশীদার নেই, কোন অবস্থাতেই তার কোন সহায়কারী প্রয়োজন হয় না। তাঁর মাহাত্ম্য ঘোষণা কর।

অধ্যায় ১৮ : আল - কাহফ (গুহা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) সমস্ত প্রশংসা ঈশ্বরের জন্যই, যিনি তার বান্দা (মুহাম্মাদ) এর প্রতি গ্রন্থ অবতীর্ণ করেছেন এবং তাতে কোন অসঙ্গতি রাখেন নি। (২) যা তার পক্ষ হতে এক কঠিন শাস্তি সম্পর্কে সতর্ক করার জন্য সুস্পষ্ট নির্দেশ দেয় এবং আস্থাবানগণ যারা ভালো কাজ করে তাদের জন্য উত্তম প্রতিফল রয়েছে। (৩) তারা সেখানে চিরকাল থাকবে। (৪) এবং সতর্ক করার জন্যে, তাদেরকে যারা বলে যে, ঈশ্বর সন্তান গ্রহণ করেছেন। (৫) এ ব্যাপারে তাদের কোনো জ্ঞান নেই, তাদের পিতৃপুরুষদেরও ছিল না। এ অতি সাজ্জাতিক যা ওদের মুখ থেকে নিঃসৃত হচ্ছে, তারা মিথ্যা কথা বলছে।

(৬) সম্ভবতঃ তুমি দুঃখে আত্মবিনাশ করে ফেলবে, যদি তারা বিশ্বাস স্থাপন না করে। (৭) অনেক আকর্ষণীয় দ্রব্য সামগ্রী দিয়ে পৃথিবীকে আমি সৌন্দর্যমণ্ডিত করেছি তাদেরকে (মানুষকে) এই পরীক্ষা করবার জন্যে যে, তাদের মধ্যে কর্মে কে শ্রেষ্ঠ। (৮) আর আমি পৃথিবীর সকল বস্তুকে এক উষর সমতল ময়দান করে দেবো।

(৯) তুমি কি মনে কর যে, গুহাবাসীরা এবং ফলকটি আমার নিদর্শন সমূহের মধ্যে একটি অদ্ভুত নিদর্শন ছিল? (১০) যখন ঐ যুবকেরা গুহায় আশ্রয় নিল, অতঃপর তারা বললঃ হে আমাদের প্রভু! আমাদেরকে আপনার পক্ষ হতে অনুগ্রহ দান করুন এবং আমাদের ব্যাপারে সঠিক নির্দেশনা দিন। (১১) অতঃপর আমি গুহার মধ্যে তাদেরকে কয়েক বছরের জন্য গভীর ঘুমে আচ্ছাদিত করে দিলাম। (১২) তারপর তাদের ওঠালাম এটা জানার জন্য যে, তাদের অবস্থান কাল সম্পর্কে দুদলের মধ্যে কোনটির হিসাব সঠিকতর হয়।

(১৩) আমি তোমার কাছে তাদের যথার্থ বৃত্তান্ত শোনাচ্ছি। তারা ছিল কয়েকজন যুবক, যারা তাদের প্রভুর প্রতি বিশ্বাস স্থাপন করেছিল আর আমি তাদের অধিকতর পথ-নির্দেশনা প্রদান করেছিলাম। (১৪) আর আমি তাদের অন্তর সমূহ আরো দৃঢ় করে দিলাম যখন তারা জেগে উঠলো এবং বলল আমাদের প্রভু তিনি যিনি আকাশ ও পৃথিবীর প্রভু। আমরা তাকে ছাড়া অন্য কোন উপাস্যকে ডাকবো না, যদি ডাকি তবে তা হবে অত্যন্ত গর্হিত কাজ। (১৫) আমাদের সম্প্রদায়ের লোকেরা তাঁকে ছাড়া অন্যকে উপাস্য বানিয়ে রেখেছে। এরা তাদের সম্পর্কে স্পষ্ট প্রমাণ উপস্থিত করে না কেন? অতএব ঐ ব্যক্তির চেয়ে বড় অত্যাচারী আর কে হবে, যে ঈশ্বরের বিরুদ্ধে মিথ্যা আরোপ করে?

(১৬) আর তোমরা যখন ওই লোকদের থেকে এবং ওরা ঈশ্বর ব্যতীত যাদের উপাসনা করে তাদের থেকে বিচ্ছিন্ন হয়ে গেছো, তখন ঐ গুহায় গিয়ে আশ্রয় নাও। তোমাদের প্রভু তোমাদের উপর কৃপা করবেন। আর তোমাদের কাজকর্মকে ফলপ্রসূ করার ব্যবস্থা করবেন।

(১৭) তারা যখন গুহার একটি ফাঁকা জায়গায় অবস্থান করত তখন তুমি দেখতে, সূর্য উদয় হওয়ার সময় তাদের গুহাকে বাঁচিয়ে ডান দিকে হেলে যেত এবং যখন অস্ত যেত তখন তাদের অতিক্রম করে বাঁদিকে হেলে যেত। এও ঈশ্বরের নিদর্শন সমূহের মধ্যে একটা। ঈশ্বর যাকে পথ দেখান, সেই সঠিক পথ প্রাপ্ত হয়। এবং তিনি যাকে পথভ্রষ্ট করেন তার জন্য তুমি কোন পথ প্রদর্শনকারী ও সাহায্যকারী পাবে না।

(১৮) তুমি তাদের দেখলে মনে করতে তারা জেগে আছে, অথচ তারা ছিল নিদ্রিত। আমি তাদেরকে ডাইনে-বামে পাশ পরিবর্তন করাতাম এবং

তাদের কুকুরটি গুহার মুখে দু'পা বিছিয়ে বসে থাকত। তুমি যদি তাদেরকে উঁকি মেরে দেখতে তাহলে পিছন ফিরে তাদের থেকে পালানোর চেষ্টা করতে আর ওদের ভয়ে আতঙ্কিত হয়ে পড়তে।

(১৯) আর এভাবে আমি তাদেরকে জাগ্রত করলাম যাতে তারা পরস্পর জিজ্ঞাসাবাদ করে। তাদের মধ্যে একজন বললঃ তোমরা কতক্ষণ এখানে অবস্থান করছো? তারা বললঃ আমরা একদিন বা একদিনেরও কম সময় এখানে অবস্থান করেছি। কেউ কেউ বললঃ তোমাদের প্রভুই ভাল জানেন যে, তোমরা কতক্ষণ এখানে রয়েছ। অতঃপর তোমাদের একজনকে রৌপ্যমুদ্রা দিয়ে নগরে পাঠাও। সে যেন খোঁজ করে কোথায় পবিত্র (হালাল) খাদ্য পাওয়া যায়; আর তোমাদের জন্য যেন কিছু খাবার নিয়ে আসে, সে যেন সাবধানে যায় আর তোমাদের কথা যেন কেউ জানতে না পারে। (২০) যদি তারা তোমাদের খবর পেয়ে যায় তাহলে পাথর ছুঁড়ে তোমাদের মেরে ফেলবে অথবা তারা তাদের ধর্মে তোমাদের ফিরিয়ে নেবে আর সেক্ষেত্রে তোমরা কখনই সফলতা পাবে না।

(২১) আর এভাবে আমি মানুষকে তাদের বিষয়টি জানিয়ে দিলাম যাতে লোক জানতে পারে যে, ঈশ্বরের অঙ্গীকার সত্য। আর উত্থান দিবস সম্পর্কে কোন সন্দেহ নেই। তখন লোকেরা পরস্পর তাদের বিষয়টি নিয়ে তর্ক করছিল, আর বলছিল তাদের গুহায় একটি ভবন নির্মাণ কর। তাদের প্রতিপালকই তাদের ব্যাপারে ভাল জানেন। তাদের ব্যাপারে যাদের মত প্রাধান্য পেল তারা বললঃ আমরা তাদের উপর একটি উপাসনাস্থল তৈরী করবো।

(২২) কেউ কেউ বলবে তারা তিনজন ছিল আর চতুর্থ তাদের কুকুরটি। আবার কেউ কেউ বলবে তারা পাঁচজন ছিল আর ষষ্ঠটি তাদের কুকুর। এরা

আনুমানিক কথা বলছে, আবার কিছু লোক বলে তারা সাতজন ছিল আর অষ্টমটি ছিল তাদের কুকুর। বলঃ আমার প্রভুই ভালই জানেন যে, তারা কতজন ছিল। কম লোকই তাদের খবর জানে। অতএব তুমি তাদের ব্যাপারে বিতর্ক করো না আর তাদের ব্যাপারে এদের কাছে কিছু জিজ্ঞাসাও করো না।

(২৩) কখনই তুমি কোন বিষয়ে বলো নাঃ আমি ওটা আগামীকাল করবো; (২৪) ‘যদি ঈশ্বর চান’-এই কথা না বলে; যদি ভুলে যাও তখন ঈশ্বরকে স্মরণ করো ও বলঃ আশাকরি আমার প্রভু আমাকে এর চেয়েও সত্যের নিকটতর পথ দেখাবেন।

(২৫) (কেহ বলে) তারা গুহায় তিনশত বৎসর ছিল। কিছু লোক তার সাথে আরও নয় বছর বাড়িয়ে বলে। (২৬) বলঃ ঈশ্বর তাদের অবস্থান কাল সম্পর্কে অধিক জানেন। আকাশ ও পৃথিবীর পরোক্ষ (গোপন) জ্ঞান তাঁর কাছেই আছে। তিনি কত ভাল দেখেন এবং কত ভাল শোনেন! ঈশ্বর ছাড়া তাদের কোন সাহায্যকারী নেই, আর ঈশ্বর আপন কতৃত্বে কারও অংশীদার করেন না।

(২৭) আর তোমার প্রতিপালকের যে গ্রন্থ তোমার উপর অবতীর্ণ হচ্ছে তা শোনাও, ঈশ্বরের কথা পরিবর্তন করার কেউ নেই। আর তাঁকে ছাড়া তুমি কোন আশ্রয়স্থল পাবে না। (২৮) আর নিজেকে তাদের সংসর্গে নিমগ্ন রাখো যারা সকাল-সন্ধ্যায় তাদের প্রভুকে ডাকে তাঁর সন্তুষ্টির জন্য। আর তোমার চোখ পার্থিব জীবনের সৌন্দর্য্যের কারণে তাদের থেকে যেন বিচ্ছিন্ন না হয়ে যায়। আর তুমি এমন ব্যক্তির কথা শুনো না যার অন্তরকে আমি আমার স্মরণ থেকে অমনোযোগী করে দিয়েছি এবং যে নিজের খেয়াল খুশীর অনুসরণ করে এবং উচ্ছৃঙ্খল হয়ে গেছে।

(২৯) আর বলঃ এই সত্য তোমাদের প্রভুর পক্ষ থেকে এসেছে। অতএব

যার ইচ্ছা বিশ্বাস করুক এবং যার ইচ্ছা অবিশ্বাস করুক। আমি অত্যাচারীদের জন্য এমন আগুন তৈরী করে রেখেছি যার বেষ্টনী তাদেরকে ঘিরে রাখবে। আর যদি তারা পানীয় চায় তাহলে তাদেরকে এমন এক গলিত ধাতুর ন্যায় পানীয় দেওয়া হবে, যা তাদের সমগ্র মুখমণ্ডল জ্বালিয়ে পুড়িয়ে দেবে। কি ভীষণ পানীয় আর কত নিকৃষ্ট হবে তাদের আশ্রয়স্থল!

(৩০) আর যারা বিশ্বাস স্থাপন করে এবং সৎকাজ করে আমি তাদের প্রতিফল নষ্ট করি না। (৩১) যারা ভাল কাজ করে তাদের জন্য স্থায়ী উদ্যান রয়েছে যার পাদদেশ দিয়ে নদী প্রবাহিত হয়, তাদেরকে সেখানে সোনার কঙ্কন দিয়ে অলংকৃত করা হবে। আর তারা মিহি ও মোটা রেশমের সবুজ বস্ত্র পরিধান করে সিংহাসনে হেলান দিয়ে বসবে। কত উত্তম প্রতিদান আর কত উৎকৃষ্ট বিশ্রাম স্থল!

(৩২) তুমি ওদের সামনে এক উদাহরণ দাও। দুজন ব্যক্তি ছিল, তাদের মধ্যে একজনকে আমি দুটো আঙুরের বাগান দান করেছিলাম এবং তার চারিদিক খেজুর গাছ দিয়ে ঘিরে দিয়েছিলাম আর দুটো বাগানের মাঝখানে দিয়েছিলাম ফসলের ক্ষেত। (৩৩) দুটি বাগানই তার পরিপূর্ণ ফল উৎপন্ন করেছিল এতে কোন ত্রুটি করেনি। আর দুই বাগানের মাঝখান দিয়ে আমি একটি নদীও প্রবাহিত করেছিলাম। (৩৪) যখন সে প্রচুর ফল পেল, তখন সে তার সাথীর সঙ্গে কথা প্রসঙ্গে বলল যে, তোমার চেয়ে আমার সম্পত্তি বেশী এবং জনবলে আমি তোমার চেয়ে শক্তিশালী। (৩৫) এইভাবে নিজের অন্তরের উপর অত্যাচার চালিয়ে সে তার বাগানে প্রবেশ করল এবং বললঃ আমি মনে করি না যে, এই বাগান কখনও নষ্ট হবে। (৩৬) আর আমি মনে করি না যে, শেষ বিচারের দিন কখনও আসবে। আর যদি আমাকে আমার প্রতিপালকের নিকট ফিরিয়ে দেওয়া হয় তাহলে অবশ্যই এর চেয়ে আরো ভাল স্থান আমি পাব।

(৩৭) ওর সাথীও কথা প্রসঙ্গে বললঃ তুমি কি ঐ সত্ত্বাকে অস্বীকার করছো যিনি তোমাকে মাটি থেকে সৃষ্টি করেছেন, অতঃপর এক ফোঁটা তরল থেকে (সৃষ্টি করেছেন)। তারপর তোমাকে একজন পূর্ণাঙ্গ মানুষের আকৃতি দিয়েছেন। (৩৮) কিন্তু আমি (বলিঃ) ঈশ্বরই আমার প্রভু। আর আমি আমার প্রভুর সাথে কাউকে অংশীদার করি না। (৩৯) আর যখন তুমি তোমার বাগানে প্রবেশ করলে তখন তুমি কেন বললে না যে, ঈশ্বর যা চান তাই হয়, ঈশ্বর ছাড়া কারো কোন ক্ষমতা নেই। যদিও তুমি ধনে-জনে আমাকে তোমার চেয়ে হীনতর মনে কর। (৪০) হয়তো এজন্যেই আমার প্রভু আমাকে তোমার বাগানের চেয়ে ভাল বাগান দান করবেন। আর তোমার বাগানে আকাশ থেকে কোন বিপত্তি পাঠিয়ে দেবেন যাতে তোমার বাগান অনুর্বর ময়দানে পরিণত হবে। (৪১) অথবা ওর জল শুকিয়ে যাবে, আর তুমি তা আর খুঁজে পাবে না।

(৪২) আর তার ফলে (বাগানে) বিপর্যয় এল তখন সে তাতে যা কিছু খরচ করেছিল তার জন্য আক্ষেপ করতে লাগল। আর ঐ বাগানটি মাচাসহ ভেঙে পড়েছিল। আর সে বলতে লাগল, হায়! আমি যদি আমার প্রভুর সাথে কাউকে অংশীদার না করতাম! (৪৩) আর তার কাছে এমন কোন বাহিনী ছিল না যারা তাকে ঈশ্বরের বিরুদ্ধে সাহায্য করতে পারে, এবং সে নিজেও প্রতিকারে অসমর্থ ছিল। (৪৪) সকল সহায়তা দানের ক্ষমতা কেবল পরম সত্য ঈশ্বরেরই। তিনিই সবচেয়ে উত্তম প্রতিফল প্রদানকারী আর পরিণাম নির্ধারণেও তিনিই সবার সেরা।

(৪৫) আর ওদের পার্থিব জীবনের উদাহরণ শোনাও। যেমন জল যা আমি আকাশ থেকে বর্ষণ করি, তাতে ভূমির শ্যামল-ঘন গাছপালা

উৎপন্ন হয়, অতঃপর তা শুকনো ভগ্ন হয়ে যায় যাকে বাতাস উড়িয়ে নেয়। আর ঈশ্বর সব কিছুই করতে সক্ষম। (৪৬) সম্পত্তি ও সন্তান পার্থিব জীবনের সৌন্দর্য্য; পক্ষান্তরে স্থায়ী সৎকর্মসমূহ তোমার প্রভুর কাছে পুরস্কার প্রাপ্তির জন্য শ্রেষ্ঠ এবং কাঙ্ক্ষিত বিষয় হিসাবেও উৎকৃষ্ট।

(৪৭) যে দিন আমি পর্বতসমূহকে চলমান করবো এবং পৃথিবীকে তুমি একটি সমতল ভূমির মত দেখতে পাবে। আর তাদের সকলকে একত্রিত করবো। একজনকেও অব্যাহতি দেব না। (৪৮) আর সকলকেই তোমার প্রভুর সামনে সারিবদ্ধভাবে দাঁড় করানো হবে এবং বলা হবে: এবার তোমরা আমার কাছে এসে গেছ, যেমন তোমাদেরকে প্রথমবার সৃষ্টি করেছিলাম। তোমরা তো মনেই করেছিলে যে, তোমাদের জন্য আমি কোন প্রতিশ্রুত সময় নির্ধারণ করবো না।

(৪৯) তাদের সামনে কর্মলিপি উপস্থাপন করা হবে এবং সেখানে যা লিপিবদ্ধ করা আছে তা দেখে অপরাধীরা আতঙ্কিত হবে আর বলবে: হায়, সর্বনাশ! এ কেমন কর্মলিপি যাতে ছোট-বড় কিছুই বাদ যায় নি। আর যা কিছু তারা করেছে তা সবই সামনে দেখতে পাবে। আর তোমার প্রভু কারো প্রতি অবিচার করবেন না।

(৫০) আর যখন আমি দেবদূতদের বলেছিলাম আদমের সামনে প্রণত হও, তখন তারা প্রণত হয়েছিল; কিন্তু ইবলিস প্রণত হল না। সে জ্বিনদের অন্তর্ভুক্ত ছিল সে তার প্রভুর আদেশ অমান্য করল। তবুও কি তোমরা আমাকে ত্যাগ করে তাকে ও তার বংশধরদেরকে অভিভাবক রূপে গ্রহণ করবে? তারা তো তোমাদের শত্রু। এটা পাপীদের জন্য নিকৃষ্টতম বিকল্প।

(৫১) আমি তাদেরকে আকাশ ও পৃথিবী সৃষ্টি করার সময় বা তাদেরকে সৃষ্টি করার সময় সাক্ষী হিসাবে ডাকিনি। আর আমি এমন নই যে,

বিভ্রান্তকারীদেরকে আমার সাহায্যকারীরূপে গ্রহণ করবো।

(৫২) আর যে দিন ঈশ্বর বলবেন যে, তোমরা যাদেরকে আমার অংশীদার মনে করতে তাদেরকে ডাকো। তারা তাদেরকে ডাকবে; কিন্তু তারা কোন উত্তর দেবে না আর আমি ওদের মধ্যে (শত্রুতার) অন্তরায় স্থাপন করবো। (৫৩) আর অপরাধীরা আগুন দেখে বুঝতে পারবে যে, তারা তাতে পতিত হবে এবং তা থেকে পরিত্রাণের কোন পথ পাবে না।

(৫৪) আর আমি এই কুরআনে মানুষের পথ দেখানোর জন্য সবরকম উদাহরণ বর্ণনা করেছি আর মানুষই সবচেয়ে বিতর্ক প্রিয়। (৫৫) আর যখন মানুষের কাছে পথ নির্দেশ এসে যায় তখন বিশ্বাস স্থাপন করতে এবং তাদের প্রভুর কাছে ক্ষমা প্রার্থনা থেকে যে বিষয়টি তাদের বিরত রাখে তাহলো তাদের পূর্ববর্তীদের প্রতি যা করা হয়েছিল, তা কখন তাদের সঙ্গে করা হবে এবং কখন তারা সেই সমস্ত শাস্তি সামনা সামনি প্রত্যক্ষ করবে।

(৫৬) আমি বার্তাবাহকদেরকে কেবলমাত্র সুসংবাদ দাতা ও সতর্ককারীরূপে পাঠাই। আর অস্বীকারকারী লোকেরা মিথ্যা কথা নিয়ে মিথ্যা বগড়া করে, যাতে এর দ্বারা সত্যকে হেয় প্রতিপন্ন করতে পারে এবং আমার নিদর্শন সমূহ আর যেসব জিনিষ দ্বারা তাদেরকে সতর্ক করা হয়েছে সেগুলোকে তারা একটা বিদ্রূপের বিষয় বানিয়েছে। (৫৭) ঐ ব্যক্তির চেয়ে বড় অত্যাচারী আর কে আছে যাকে তার প্রভুর নিদর্শন সমূহ স্মরণ করিয়ে দেওয়ার পর সে তা থেকে মুখ ফিরিয়ে নেয় এবং তার কৃতকর্ম ভুলে যায়। আসলে আমি তাদের অন্তরের উপরে আবরণ দিয়ে রেখেছি, যাতে তারা এটাকে বুঝতে না পারে। আর তাদের কানে এঁটে দিয়েছি বধিরতা। তুমি তাদেরকে সৎপথে ডাকলেও তারা কখনও সৎপথে আসবে না।

(৫৮) আর তোমার প্রতিপালকই ক্ষমাশীল, দয়াময়। তিনি যদি তাদের

কৃতকর্মের জন্য তাদেরকে পাকড়াও করতেন তাহলে অবশ্যই তাদের শাস্তি ত্বরান্বিত করতেন; কিন্তু তাদের জন্য একটি নির্ধারিত সময় আছে, যা থেকে তারা পালাবার পথ পাবে না। (৫৯) আর এই জনপদকে আমি ধ্বংস করে দিয়েছি যখন এর অধিবাসীরা অত্যাচারী হয়ে গিয়েছিল। আর আমি তাদের বিনাশের একটি সময় নির্ধারিত করেছিলাম।

(৬০) আর মুসা (মোজেস) তার শিষ্যকে বলেছিল যে, আমি চলতেই থাকব, দুই নদীর মিলনস্থলে না পৌঁছানো পর্যন্ত অথবা এভাবেই বছরের পর বছর চলতে থাকব। (৬১) অতএব যখন দুই নদীর মিলনস্থলে পৌঁছে গেল তখন তারা মাছের কথা ভুলে গেল; অতঃপর মাছটি নদীতে নিজের পথ ধরল। (৬২) তারপর যখন তারা আরো কিছুদূর এগোল তখন মুসা (মোজেস) তার শিষ্যকে বললঃ আমাদের খাবার আনো, এই যাত্রায় আমি খুবই ক্লান্ত হয়ে পড়েছি।

(৬৩) শিষ্য বললঃ দেখেছেন? আমরা যখন ঐ পাথরটির কাছে দাঁড়িয়েছিলাম তখন আমি মাছের কথা ভুলে গিয়েছিলাম আর শয়তান আমাদের ভুলিয়ে দিয়েছিল ওর কথা মনে রাখতে। আর মাছটি আশ্চর্যজনক ভাবে বার হয়ে নদীতে চলে গেছে। (৬৪) মুসা (মোজেস) বললঃ ওটাই তো আমরা খুঁজছিলাম। অতএব দুজনে তাদের পায়ের চিহ্ন ধরে ফিরে চলল। (৬৫) তারা আমার বান্দাদের মধ্যে একজন বান্দাকে পেল যাকে আমি আমার পক্ষ থেকে অনুগ্রহ প্রদান করেছিলাম আর যাকে আমি আমার পক্ষ থেকে জ্ঞান দান করেছিলাম।

(৬৬) মুসা (মোজেস) তাকে বললঃ আমি কি আপনার সাথে থাকতে পারি, যাতে আপনি ঐ জ্ঞানের থেকে কিছু শিখিয়ে দেন, যা আপনাকে শেখানো হয়েছে? (৬৭) তিনি বললেনঃ তুমি আমার সাথে ধৈর্য রাখতে পারবে না।

(৬৮) আর তুমি ঐ জিনিষে কিভাবে ধৈর্য রাখবে যা তোমার জ্ঞানের বাইরে? (৬৯) মূসা (মোজেস) বললঃ ঈশ্বরের ইচ্ছা থাকলে আপনি আমাকে ধৈর্যশীল পাবেন, আর আমি আপনার কোন কথা অমান্য করবো না। (৭০) উনি বললেনঃ যদি তুমি আমার সঙ্গে যেতে চাও তাহলে আমাকে কোন কথা জিজ্ঞেস করবে না যতক্ষণ না আমি নিজেই সে সম্পর্কে কিছু বলি।

(৭১) অতঃপর উভয়ে চলতে থাকল। এক সময় তারা যখন নৌকায় আরোহন করল তখন ঐ ব্যক্তি নৌকাটি ছিদ্র করে দিলেন। মূসা (মোজেস) বললঃ আপনি এই নৌকাটি কি এজন্য ছিদ্র করে দিয়েছেন যাতে নৌকার আরোহীরা ডুবে যায়? এতো আপনি খুব খারাপ কাজ করলেন। (৭২) তিনি বললেন : আমি কি তোমাকে বলিনি যে, তুমি আমার সাথে ধৈর্য ধারণ করতে পারবে না। (৭৩) মূসা (মোজেস) বললঃ আমার ভুলের জন্য আমাকে ধরবেন না এবং আমার ব্যাপারে এত কঠোর হবেন না। (৭৪) অতঃপর তারা দুজনে আবার চলতে লাগল, এক সময়ে একটি বালকের সাথে তাদের দেখা হল তখন ঐ ব্যক্তি তাকে হত্যা করল। মূসা (মোজেস) বললঃ আপনি একজন নির্দোষকে মেরে ফেললেন? যদিও সে কাউকে হত্যা করেনি, আপনি তো খুবই অনুচিত কাজ করলেন।

(৭৫) ঐ ব্যক্তি বললেন, আমি কি তোমাকে বলিনি যে, তুমি আমার সাথে ধৈর্য ধারণ করতে পারবে না। (৭৬) মূসা (মোজেস) বললঃ আচ্ছা, এরপরে যদি আপনাকে কোনো বিষয়ে প্রশ্ন করি তাহলে আপনি আর আমাকে সঙ্গে রাখবেন না। তখন আমার ওজর-আপত্তি চূড়ান্ত সীমায় পৌঁছে যাবে। (৭৭) আবার দুজনে চলতে লাগলেন, তারা এক জনপদের অধিবাসীদের কাছে পৌঁছালেন এবং ওদের কাছে খাবার চাইলেন। তখন তারা তাদের আতিথেয়তা করতে অস্বীকার করল; অতঃপর তারা সেখানে

একটি প্রাচীর দেখতে পেলেন যা প্রায় ভেঙে পড়ার উপক্রম হয়েছিল, তখন তারা সেটিকে মেরামত করে দিলেন। মুসা (মোজেস) বললঃ আপনি চাইলে এর বদলে কিছু পারিশ্রমিক নিতে পারতেন। (৭৮) তিনি বললেনঃ এখানে আমার ও তোমার মধ্যে বিচ্ছেদ ঘটবে। আমি তোমাকে ঐ সকল বিষয়ের তাৎপর্য বলবো, যে বিষয়ে তুমি ধৈর্য ধারণ করতে পারো নি।

(৭৯) নৌকার ব্যাপারটা এই যে, ওটা কিছু গরীব মানুষের ছিল যারা সমুদ্রে জীবিকা অনুেষণ করত। আমি চেয়েছিলাম নৌকাটি ত্রুটিযুক্ত করতে, কেননা ওদের পিছনদিক থেকে এক রাজা আসছিল যে প্রত্যেকটি নৌকা বলপূর্বক ছিনিয়ে নিত।

(৮০) বালকটির ব্যাপার এই যে, তার পিতা-মাতা সত্যে বিশ্বাস স্থাপনকারী ছিল। আমার আশঙ্কা হয়েছিল যে, ও বড়ো হয়ে অবাধ্যতা ও অকৃতজ্ঞতা দ্বারা ওদের কষ্ট দেবে। (৮১) অতএব আমি চাইলাম তাদের প্রভু তাদেরকে এর পরিবর্তে এমন সন্তান প্রদান করেন যে পবিত্রতায় শ্রেয়তর এবং স্নেহময় হয়।

(৮২) আর প্রাচীরের ব্যাপারটা এই যে, সেটা এই জনপদের দুজন অনাথ বালকের ছিল। এই প্রাচীরের নীচে তাদের জন্য এক ধনভাণ্ডার পুঁতে রাখা ছিল, তাদের পিতা একজন ভালো মানুষ ছিল। অতএব তোমার প্রভু চাইলেন তারা দুজন বয়ঃপ্রাপ্ত হওয়ার পরে তাদের ধনভাণ্ডার উদ্ধার করুক। এটা তোমার প্রভুর কৃপায় হয়েছে। আর আমি এটা নিজের ইচ্ছায় করিনি। এই হল ঐ সব বিষয়গুলোর তাৎপর্য, যার উপর তুমি ধৈর্য ধারণ করতে পারো নি।

(৮৩) আর তারা তোমাকে জুলকারগাইন সম্পর্কে জিজ্ঞাসা করে। বলঃ আমি তোমাদেরকে তার কিছু বিবরণ শোনাব। (৮৪) আমি তাকে পৃথিবীতে

রাজত্ব দান করেছিলাম আর সমস্ত প্রকার উপায়-উপকরণ দিয়েছিলাম।

(৮৫) সে পথ চলতে লাগল। (৮৬) যেতে যেতে সূর্যাস্ত হওয়ার স্থানে পৌঁছালো; তখন সে দেখলো সূর্য এক কদমন্ত জলে ডুবে যাচ্ছে, আর সেখানে সে এক সম্প্রদায়কে দেখল। আমি বললামঃ হে যুল-কারণাইন! তুমি চাইলে এদের শাস্তি দিতে পারো অথবা এদের সাথে সদয় ব্যবহার করো। (৮৭) সে বললঃ এদের মধ্যে যারা অত্যাচার করবে তাদেরকে আমি শাস্তি দেবো; অতঃপর সে তার প্রভুর নিকট ফিরে যাবে। তখন তিনি তাদের ভয়ঙ্কর শাস্তি দেবেন। (৮৮) আর যে ব্যক্তি বিশ্বাস স্থাপন করবে আর ভালো কাজ করবে, ওর জন্যেই উত্তম প্রতিফল রয়েছে, আর আমিও তার সাথে সরল ব্যবহার করবো।

(৮৯) আবার সে পথ চলতে লাগল। (৯০) চলতে চলতে সে সূর্যোদয়ের স্থানে পৌঁছালো, তখন সে সূর্যকে এমন একদল লোকের কাছে উদ্ভিত হতে দেখলো, যাদের জন্য আমি সূর্যের তাপ থেকে আত্মরক্ষার মতো কোনো আশ্রয় প্রদান করিনি। (৯১) এটাই ছিল প্রকৃত অবস্থা। তার সবকিছুই আমি অবগত আছি।

(৯২) সে আবার পথ চলতে লাগল। (৯৩) যেতে যেতে যখন দুই পাহাড়ের মাঝে পৌঁছালো সেখানে সে একদল লোককে দেখতে পেল যারা কোনো কথাই বুঝতে পারছিল না। (৯৪) তারা বললঃ হে যুল-কারণাইন! ইয়াজুজ ও মাজুজ আমাদের দেশে খুবই বিশৃঙ্খলা সৃষ্টি করেছে এজন্য আমরা কিছু রাজস্ব প্রদান করছি যাতে তুমি আমাদের ও ওদের মধ্যে একটা প্রাচীর তৈরী করে দাও।

(৯৫) যুল-কারণাইন উত্তর দিল যে, আমার প্রভু আমাকে যা দিয়েছেন তা যথেষ্ট। তোমরা শ্রম দিয়ে আমাকে সাহায্য করো। আমি তোমাদের আর

ওদের মধ্যে একটা প্রাচীর তৈরী করে দেব। (৯৬) তোমরা আমাকে লৌহ-পিণ্ড এনে দাও। অতঃপর দুই পাহাড়ের মধ্যবর্তী ফাঁকা জায়গা ভরে দিয়ে সে বললঃ তোমরা হাপরে দম দিতে থাকো; এভাবে যখন আগুনে পরিণত হল তখন সে বললঃ এর উপরে ঢালার জন্য তোমরা আমাকে গলিত তামা এনে দাও। (৯৭) ফলে ইয়াজুজ ও মাজুজ তার উপরে আরোহন করতে পারলো না এবং তা ভেদ করতে ও সক্ষম হল না। (৯৮) যুল-কারণাইন বললঃ এ আমার প্রভুর কৃপা, তবে যখন আমার প্রভুর প্রতিশ্রুতি এসে যাবে তখন তিনি একে ভেঙে সমান করে দেবেন আর আমার প্রভুর প্রতিশ্রুতি সত্য।

(৯৯) আর সেইদিন আমি ওদেরকে ছেড়ে দেব। তখন তরঙ্গের ন্যায় তারা একে অন্যের উপরে আছড়ে পড়বে। আর শিজায় (মহাশঙ্খে) ফুঁক দেওয়া হবে এবং আমি সকলকেই একত্রিত করবো। (১০০) আর সেদিন আমি নরককে অস্বীকারকারীদের সামনে হাজির করবো। (১০১) যাদের চোখে আবরণ থাকায় আমার স্মারকগ্রন্থ দেখতে পায় না এবং শুনতেও পায় না।

(১০২) অস্বীকারকারীরা কি মনে করে যে, তারা আমার পরিবর্তে আমার বান্দাদেরকে অভিভাবক রূপে গ্রহণ করবে? আমি অবিশ্বাসীদের আপ্যায়নের জন্য নরক প্রস্তুত করে রেখেছি।

(১০৩) আমি কি তোমাদের বলে দেব যে, কর্ম অনুসারে কারা সবচেয়ে অধিক ক্ষতিগ্রস্ত? (১০৪) যাদের প্রচেষ্টা পার্থিব জীবনে ব্যর্থ হয়ে গেছে, আর তারা মনে করছে যে, তারা খুব ভাল কাজ করছে। (১০৫) এরাই তো তারা যারা তাদের প্রভুর নিদর্শন সমূহ এবং তাঁর সাথে সাক্ষাৎকে অস্বীকার করে। অতএব ওদের কর্মফল নষ্ট হয়ে গেছে। শেষ বিচারের দিনে (উত্থান দিবসে) আমি ওদের কোন গুরুত্ব দেব না। (১০৬) নরকই ওদের প্রতিফল, কেননা তারা অস্বীকার করেছে আর আমার নিদর্শনসমূহ ও আমার বার্তাবাহকগণকে উপহাস করেছে।

(১০৭) নিঃসন্দেহে যারা আস্ত্রাবান ও সৎকর্মশীল তাদের আতিথেয়তার জন্য রয়েছে স্বর্গের উদ্যান। (১০৮) সেখানে তারা চিরকাল থাকবে। তারা সেখান থেকে কখনই নিষ্কান্ত হতে চাইবে না।

(১০৯) বলঃ আমার প্রভুর কথাসমূহ লেখার জন্য যদি গোটা সমুদ্র কালি হয়ে যায় তাহলে সমুদ্র নিঃশেষ হয়ে যাবে আমার প্রভুর কথা শেষ হওয়ার আগেই। যদি এর সাথে এরকম আরো সমুদ্র মেলানো হয় তবুও।

(১১০) বলঃ আমি তোমাদের মতই একজন মানুষ। আমার কাছে প্রত্যাদেশ আসে যে, তোমাদের উপাস্য কেবল একমাত্র ঈশ্বরই। অতএব যে তার প্রভুর সাক্ষাৎ কামনা করে, তার উচিত সে যেন সৎ কাজ করে এবং তার প্রভুর সাথে কাউকে অংশীদার স্থাপন না করে।

অধ্যায় ১৯ : মারইয়াম (মেরী)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ক্বা-ফ-হা-ইয়া-আইন-স্বা-দ্।

(২) এ সেই অনুগ্রহের বর্ণনা যা তোমার প্রভু তাঁর বান্দা যাকারিয়ার প্রতি করেছিলেন। (৩) যখন সে তার প্রভুকে গোপনে ডেকেছিল।

(৪) যাকারিয়া বলেছিলঃ হে আমার প্রভু! আমার অস্থি দুর্বল হয়ে গেছে আর মাথার চুল সাদা হয়ে গেছে। হে আমার প্রভু! আপনার কাছে চেয়ে আমি কখনই বঞ্চিত হই নি। (৫) আর আমি আমার পরে স্বগোত্রীয়দেরকে ভয় করছি এবং আমার পত্নীও বন্ধ্যা। অতএব আমাকে আপনার পক্ষ হতে একজন উত্তরাধিকারী দান করুন। (৬) যে আমার স্থলাভিষিক্ত হবে আর ইয়াকুব (জ্যাকব) পরিবারেরও উত্তরাধিকারিত্ব করবে। হে আমার প্রভু! আপনি তাকে আপনার প্রিয় করুন।

(৭) হে যাকারিয়া! আমি তোমাকে একটি পুত্রের সুসংবাদ দিচ্ছি, যার নাম ইয়াহইয়া (জন) হবে। আমি এর পূর্বে এই নামে কারো নামকরণ করিনি। (৮) সে বললঃ হে প্রভু! আমার পুত্র কিভাবে হবে? আমার স্ত্রী তো বন্ধ্যা। আর আমিও তো একেবারে বৃদ্ধ হয়ে গেছি।

(৯) উত্তর এল, এমনই হবে। তোমার প্রভু বলেছেন যে, এটা আমার পক্ষে সহজ। এর পূর্বে আমি তোমাকে সৃষ্টি করেছি যখন তুমি কিছুই ছিলে না। (১০) যাকারিয়া বললঃ হে আমার প্রভু! আমার জন্য কোন পূর্বলক্ষণ ঠিক করে দিন। তিনি বললেনঃ তোমার পূর্ব লক্ষণ এই যে, সুস্থ থেকেও তুমি তিন রাত আর তিন দিন মানুষের সাথে কথা বলতে পারবে না। (১১) অতঃপর যাকারিয়া উপাসনাস্থল থেকে বাহির হয়ে লোকদের কাছে এল এবং ইশারায় তাদেরকে বললঃ তোমরা সকাল সন্ধ্যায় ঈশ্বরের পবিত্রতা বর্ণনা কর।

(১২) হে ইয়াহইয়া (জন)! দৃঢ়তার সাথে এই গ্রন্থ ধারণ কর। আর আমি শৈশবেই তাকে প্রজ্ঞা দান করি। (১৩) আর আমার পক্ষ থেকে তাকে (হৃদয়ে) কোমলতা ও পবিত্রতা প্রদান করি। (১৪) আর সে পরহেজগার (সংযমী) ও পিতা মাতার প্রতি সদাচারী ছিল, উদ্ধত ও অবাধ্য ছিল না। (১৫) তার উপর শান্তি বর্ষিত হোক যে দিন সে জন্মেছিল আর যে দিন তার মৃত্যু হবে আর যে দিন তাকে পুনরুজ্জীবিত করা হবে।

(১৬) (হে বার্তাবাহক) বর্ণনা কর এই গ্রন্থে উল্লেখিত মারইয়ামের (মেরীর) কথা যখন সে তার পরিবার পরিজন থেকে পৃথক হয়ে পূর্ব দিকের ঘরে চলে গেল। (১৭) তারপর তাদের থেকে আড়াল করার জন্য পর্দার অন্তরাল করে নিল; অতঃপর আমি তার কাছে আমার দেবদূত পাঠালাম, যে তার সামনে এক সুঠাম মানুষের আকারে আত্মপ্রকাশ করল। (১৮) মারইয়াম (মেরী)

বললঃ আমি করুণাময় ঈশ্বরের আশ্রয় চাই, যদি তুমি ঈশ্বরকে ভয় কর। (১৯) সে বললঃ আমি তো তোমার প্রভুর দূত। আমি তোমাকে একটি পবিত্র পুত্র দান করে পুরস্কৃত করবো। (২০) মারইয়াম (মেরী) বললঃ আমার পুত্র হবে কিভাবে? আমাকে তো কোন মানুষ স্পর্শই করেনি আর আমি নষ্ট চরিত্রেরও নই। (২১) দেবদূত বললঃ এভাবেই হবে। তোমার প্রভু বলছেনঃ এটা আমার পক্ষে সহজ। আর তাকে আমি মানুষের জন্য এক নিদর্শন ও আমার অনুগ্রহের আধার বানাতে চাই। এটা একটা স্থিরকৃত বিষয়।

(২২) এরপর মারইয়াম (মেরী) তাকে (যিশুকে) গর্ভে ধারণ করল তারপর তাকে নিয়ে দূরবর্তী একটি জায়গায় চলে গেল। (২৩) তারপর প্রসব-বেদনা তাকে এক খেজুর গাছের কাণ্ডের কাছে নিয়ে গেল। সে বললঃ হায়! আমি যদি এর আগে মরে যেতাম এবং একেবারে বিস্মৃত হয়ে যেতাম!

(২৪) এমন সময় মারইয়ামকে (মেরীকে) তার নিচ থেকে দেবদূত বললঃ দুঃখ করো না। তোমার প্রভু তোমার নিচে একটি জলধারা প্রবাহিত করেছেন। (২৫) আর তুমি খেজুর গাছের কাণ্ডটি নিজের দিকে নাড়া দাও, গাছ থেকে তোমার দিকে পাকা খেজুর পড়বে। (২৬) এখন আহার কর, পান কর, আর চক্ষু শীতল করো আর যদি কোন মানুষের দেখা পাও তাহলে বলবে যে, আমি করুণাময় (ঈশ্বর) এর ব্রত মেনে রেখেছি তাই আজ আমি কোন মানুষের সাথে কথা বলবো না।

(২৭) অতঃপর সে পুত্র কোলে নিয়ে তার সম্প্রদায়ের লোকদের কাছে এল। লোকেরা বললঃ হে মারইয়াম (মেরী)! তুমি বড়ই অনর্থ করে ফেলেছ। (২৮) হে হারুনের (অ্যারনের) বোন! তোমার বাবা খারাপ লোক ছিল না আর তোমার মাও অসতী ছিল না।

(২৯) অতঃপর মারইয়াম (মেরী) পুত্রের দিকে ইঙ্গিত করল।

লোকেরা বললঃ আমরা কোলের শিশুর সাথে কিভাবে কথা বলবো? (৩০) শিশুটি বললঃ আমি ঈশ্বরের বান্দা। তিনি আমাকে গ্রহণ দিয়েছেন, আমাকে পয়গম্বর করে পাঠিয়েছেন। (৩১) আমি যেখানেই থাকি আমাকে কল্যাণময় করেছেন। আর তিনিই আমাকে প্রার্থনা এবং উদ্বৃত্ত সম্পদ থেকে আবশ্যিক দানের আদেশ দিয়েছেন যতদিন আমি জীবিত থাকব। (৩২) তিনি আমাকে আমার মায়ের অনুগত করেছেন, আমাকে উদ্ধৃত ও হতভাগ্য করেন নি। (৩৩) আর আমার উপরে শান্তি যে দিন আমি জন্মেছিলাম আর যে দিন আমার মৃত্যু হবে, আর যে দিন আমাকে জীবিত করে ওঠানো হবে।

(৩৪) এই হল মারইয়ামের (মেরীর) পুত্র ঈসা (যিশু)। এটাই হল সত্যকথা যে ব্যাপারে লোকেরা বিতর্ক করছে। (৩৫) ঈশ্বর এমন নন যে, তিনি কোন সন্তান গ্রহণ করবেন, তিনি পবিত্র। যখন তিনি কোন কিছু করার সিদ্ধান্ত নেন তখন বলেন ‘হও’ অমনি তা হয়ে যায়।

(৩৬) নিঃসন্দেহে ঈশ্বরই আমার প্রভু এবং তোমাদেরও প্রভু। অতএব তোমরা তাঁরই উপাসনা কর, এটাই সরল পথ। (৩৭) অতঃপর তার সম্প্রদায় পরস্পর মতভেদ করল। অতএব অস্বীকার কারীদের জন্য আগামী দিনে এক বড় বিনাশ অপেক্ষা করছে। যে দিন এরা আমার কাছে আসবে। (৩৮) তারা স্পষ্ট শুনতে ও পরিষ্কার দেখতে পাবে; কিন্তু আজ ঐ সীমালঙ্ঘনকারীগণ স্পষ্ট বিভ্রান্তির মধ্যে রয়েছে।

(৩৯) আর এদেরকে সেই দুঃখের দিন সম্পর্কে সতর্ক করে দাও, যখন সব বিষয়ের মীমাংসা করে দেওয়া হবে, এখন তারা বেখবর অবস্থায় রয়েছে এবং বিশ্বাস করছে না। (৪০) নিঃসন্দেহে আমিই পৃথিবীর এবং তার উপর যারা আছে তাদের মালিক, আর তারা আমারই নিকট প্রত্যাবর্তিত হবে।

(৪১) গ্রন্থে উল্লেখিত ইবরাহীমের (আব্রাহামের) কথা বর্ণনা কর।

নিঃসন্দেহে সে ছিল সত্যনিষ্ঠ ও পয়গম্বর। (৪২) যখন সে তার পিতাকে বললঃ হে পিতা! এমন জিনিষের উপাসনা কেন কর যে না শুনতে পায় আর না দেখতে পায় আর যে না তোমার কোন কাজে আসবে। (৪৩) হে পিতা! আমার কাছে এমন জ্ঞান এসেছে যা তোমার কাছে নেই, তাই তুমি আমার কথা মেনে নাও, আমি তোমাকে সঠিক পথ দেখাব। (৪৪) হে আমার পিতা! শয়তানের উপাসনা করো না। নিঃসন্দেহে শয়তান, করুণাময় ঈশ্বরের অবাধ্য। (৪৫) হে পিতা! আমি আশংকা করছি যে, তোমার উপর দয়াময় ঈশ্বরের কোন শাস্তি আসবে আর তুমি শয়তানের সহযোগী হয়েই থাকবে।

(৪৬) পিতা বললঃ হে ইবরাহীম (আব্রাহাম)! তুমি কি আমার উপাস্যদের থেকে বিমুখ হয়ে গেলে? যদি তুমি বিরত না হও তাহলে আমি অবশ্যই তোমাকে পাথর মেরে হত্যা করবো। আর তুমি আমার কাছ থেকে চিরদিনের জন্য দূর হয়ে যাও। (৪৭) ইবরাহীম (আব্রাহাম) বললঃ তোমার উপর শাস্তি বর্ষিত হোক! আমি আমার প্রভুর কাছে তোমার জন্য ক্ষমা প্রার্থনা করবো। নিঃসন্দেহে তিনি আমার প্রতি অনুগ্রহশীল। (৪৮) আর আমি তোমাদের বর্জন করছি আর ওদেরকেও, ঈশ্বরকে বাদ দিয়ে তুমি যাদের ডাক। আমি আমার প্রভুকেই ডাকব। আশা করি আমার প্রভুকে আহ্বান করে আমি বঞ্চিত হব না।

(৪৯) অতঃপর সে যখন তাদের থেকে ও ঈশ্বর ছাড়া যাদেরকে তারা উপাসনা করত তাদের থেকে পৃথক হয়ে গেল তখন আমি তাকে ইসহাক (আইজ্যাক) ও ইয়াকুবকে (জ্যাকবকে) দান করলাম আর আমি তাদের প্রত্যেককে বার্তাবাহক করলাম। (৫০) আর তাদেরকে আমি দান করলাম আমার অনুগ্রহ এবং তাদেরকে দিলাম সমুচ্চ সুখ্যাতি।

(৫১) এই গ্রন্থে উল্লেখিত মূসার (মোজেসের) কথা বর্ণনা

কর,নিঃসন্দেহে সে ছিল বিশুদ্ধ চিত্ত এবং ছিল বার্তাবাহক ও পয়গম্বর। (৫২) আমি তাকে তুর পাহাড়ের ডান দিকে ডেকেছিলাম এবং অন্তরঙ্গ আলাপের জন্য তাকে আমি নিকটবর্তী করেছিলাম। (৫৩) এবং আপন অনুগ্রহে আমি তার ভাই হারুনকে বার্তাবাহক বানিয়ে (সহায়ক রূপে) তাকে প্রদান করলাম।

(৫৪) এই গ্রন্থে উল্লেখিত ইসমাইলের কথা কথা বর্ণনা কর, সে ছিল সত্য প্রতিশ্রুতি পালনকারী এবং পয়গম্বর। (৫৫) সে তার লোকদের প্রার্থনা ও উদ্ভূত সম্পদ থেকে আবশ্যিক দানের আদেশ দিত। সে তার প্রভুর কাছে পছন্দনীয় ছিল। (৫৬) এই গ্রন্থে উল্লেখিত ইদরীসের কথা বর্ণনা কর, নিঃসন্দেহে সে ছিল সত্য প্রতিশ্রুতি পালনকারী এবং পয়গম্বর। (৫৭) আর আমি তাকে উচ্চ অবস্থানে উন্নীত করেছিলাম।

(৫৮) এরাই তারা যাদেরকে ঈশ্বর অনুগ্রহ দান করেছিলেনঃ এরা আদমের (অ্যাডাম) বংশধর এবং যাদেরকে নূহের (নোয়াহ'র) নৌকায় আমি বহন করিয়েছিলাম; এরা ইবরাহীম (আব্রাহাম) ও ইসরাইলের উত্তরপুরুষ এবং যাদেরকে আমি মনোনীত করেছিলাম এবং সৎপথ প্রদর্শন করেছিলাম। এদের সামনে যখন দয়াময় ঈশ্বরের বাণীসমূহ শোনান হত তখন তারা সিজদায় (প্রণত হয়ে) লুটিয়ে পড়ে ক্রন্দন করত।

(৫৯) কিন্তু তাদের পরে এমন এক প্রজন্ম এল যারা প্রার্থনা বিনষ্ট করল এবং প্রবৃত্তির বশবর্তী হল। অতএব শীঘ্রই ভ্রষ্টতার পরিণতি দেখতে পাবে। (৬০) তবে যারা প্রায়শ্চিত্য করেছে এবং বিশ্বাস স্থাপন করেছে এবং সৎকর্ম করেছে তারাই স্বর্গে প্রবেশ করবে আর তাদের প্রতি বিন্দুমাাত্র অবিচার করা হবে না।

(৬১) তাদের জন্য রয়েছে চিরস্থায়ী উদ্যান, পরম করুণাময় তাঁর

বান্দাদেরকে এই অদৃশ্য বিষয়ের প্রতিশ্রুতি দিয়ে রেখেছেন। আর তাঁর প্রতিশ্রুতি অবশ্যই পূরণ হবে। (৬২) সেখানে তারা শান্তি ছাড়া আর কোন অসার বাক্য শুনবে না। আর সেখানে সকাল সন্ধ্যায় তাদের জীবিকার ব্যবস্থা থাকবে। (৬৩) এটা সেই স্বর্গ, যার উত্তরাধিকারী আমি আমার বান্দাদের মধ্যে তাদেরকে করবো যারা ঈশ্বরকে ভয় করে।

(৬৪) (দেবদূত বলে) আমরা তোমার প্রভুর আদেশ ছাড়া অবতীর্ণ হই না। আমাদের সম্মুখে, পশ্চাতে, এবং এই দুই এর অন্তবর্তী যা কিছু আছে সবই তাঁর। আর তোমাদের প্রভু কিছুই ভোলেন না। (৬৫) তিনিই প্রভু আকাশ আর পৃথিবীর এবং এই দুই এর অন্তবর্তী যা কিছু আছে তাঁর। অতএব তুমি তাঁরই উপাসনা কর এবং তাঁরই উপাসনায় অবিচল থাকো। তুমি কি তাঁর সমতুল্য কাউকে জান?

(৬৬) আর মানুষ বলেঃ আমার যখন মৃত্যু হবে তারপর কি আমাকে আবার জীবিত করে উঠানো হবে? (৬৭) তবে কি মানুষের স্মরণে নেই যে, ইতিপূর্বে যখন তাকে সৃষ্টি করেছিলাম তখন সে কিছুই ছিল না। (৬৮) সুতরাং তোমার প্রভুর শপথ। অবশ্যই আমি তাদেরকে এবং শয়তানদেরকে একত্রিত করবো, তারপর তাদেরকে নতজানু অবস্থায় নরকের কাছে উপস্থিত করবো।

(৬৯) অতঃপর আমি প্রত্যেক দল থেকে ঐ লোকদের টেনে বের করবো, যারা করুণাময়ের প্রতি সবচেয়ে অধিক অবাধ্য হয়েছিল। (৭০) তারপর আমি এমন লোকদেরও ভাল ভাবে জানি যারা নরকে দন্ধ হওয়ার অধিক যোগ্য। (৭১) আর তোমাদের প্রত্যেককেই সেখানে যেতে হবে। এটা তোমার প্রভুর অনিবার্য সিদ্ধান্ত। (৭২) অতঃপর আমি ঐ লোকদের রক্ষা করবো যারা ভয় করত, আর অত্যাচারীদের নতজানু অবস্থায় সেখানে রেখে দেব।

(৭৩) আর যখন ওদেরকে আমার স্পষ্ট বাণীসমূহ শোনান হত তখন যারা অবজ্ঞা করেছে তারা আস্থাবানদেরকে বলতঃ দুদলের মধ্যে কোনটি মর্যাদায় শ্রেষ্ঠ এবং কোন দলের সমাবেশ অধিক উত্তম? (৭৪) এদের পূর্বে আমি কত প্রজন্মকে ধ্বংস করে দিয়েছি, তারা সম্পদে ও বৈভবে এদের তুলনায় শ্রেষ্ঠতর ছিল।

(৭৫) বলঃ যারা বিভ্রান্তির মধ্যে থাকে করুণাময় তাদেরকে আরও অবকাশ দেন, অবশেষে যখন তারা সেই প্রতিশ্রুত বিষয়টি প্রত্যক্ষ করে, তা (পার্থিব) শাস্তি হোক বা প্রলয়দিবস হোক। তখন তারা জানতে পারবে কে মর্যাদায় নিকৃষ্ট এবং কার দল দুর্বল।

(৭৬) ঈশ্বর উপদেশ গ্রহণকারীদের সহায়তা আরও বৃদ্ধি করে দেন। আর স্থায়ী সৎকর্মগুলোই তোমার প্রভুর কাছে প্রতিদানের দিক থেকে উত্তম এবং পরিনামের দিক থেকেও উত্তম।

(৭৭) তুমি কি তাকে দেখেছ যে আমার নিদর্শন সমূহ অবিশ্বাস করেছে? আর বলেছে, আমাকে ধন-সম্পদ আর সন্তান-সন্ততি অবশ্যই দেওয়া হবে। (৭৮) সে কি অদৃশ্য বিষয় সম্বন্ধে অবগত হয়েছে, অথবা ঈশ্বরের কাছ থেকে কোন প্রতিশ্রুতি লাভ করেছে? (৭৯) কখনই নয়, যা কিছু সে বলে তা আমি লিপিবদ্ধ করবো আর তার শাস্তি বাড়িয়ে দেব। (৮০) আর সে যে জিনিষের দাবীদার, তার উত্তরাধিকারী আমি, আর সে আমার কাছে আসবে একা।

(৮১) আর তারা ঈশ্বর ছাড়া অন্য উপাস্য গ্রহণ করেছে যাতে তারা তার সহায়ক হয়। (৮২) কখনই নয়, তারা তাদের উপাসনা অস্বীকার করবে এবং তাদের বিরুদ্ধে অবস্থান নেবে।

(৮৩) তুমি কি দেখনি যে, আমি অস্বীকারকারীদের প্ররোচিত করার

জন্য শয়তানদের ছেড়ে দিয়েছি? (৮৪) অতএব তুমি তাদের ব্যাপারে তাড়াতাড়ি করো না। আমি তাদের নির্ধারিতকাল গণনা করছি। (৮৫) যে দিন আমি ঈশ্বরভীরুদের করুণাময়ের নিকট অতিথি রূপে একত্রিত করবো। (৮৬) আর অপরাধীদেরকে নরকের দিকে তৃষ্ণার্ত অবস্থায় তাড়িয়ে দেব। (৮৭) কারো সুপারিশের অধিকার থাকবে না, কেবল সে ছাড়া যে করুণাময়ের কাছ থেকে অনুমতি নিয়েছে।

(৮৮) আর এরা বলে যে, করুণাময় কাউকে পুত্র করেছেন। (৮৯) এটা তোমরা এক ভয়ানক মিথ্যা কথা বলেছ। (৯০) শীঘ্রই এতে আকাশ ফেটে পড়বে, আর পৃথিবী খণ্ড-বিখণ্ড হয়ে যাবে এবং পর্বতমালা ভেঙে পড়বে। (৯১) একারণে যে তারা করুণাময়ের প্রতি সন্তান আরোপ করেছে। (৯২) অথচ সন্তান গ্রহণ করা করুণাময়ের জন্য শোভনীয় নয়। (৯৩) আকাশ ও পৃথিবীতে এমন কেউ নেই, যে করুণাময়ের নিকট বান্দারূপে উপস্থিত হবে না। (৯৪) তাঁর কাছে এদের পরিসংখ্যান আছে, আর তিনিই এদের চিহ্নিত করে রেখেছেন। (৯৫) আর এদের মধ্যে প্রত্যেকে শেষ বিচারের দিনে একাকী অবস্থায় তাঁর সামনে আসবে। (৯৬) কিন্তু যারা বিশ্বাস স্থাপন করেছে আর যারা ভাল কাজ করেছে, তাদের জন্য দয়াময় দান করবেন ভালবাসা।

(৯৭) অতএব আমি এই কুরআনকে তোমার ভাষায় এজন্য সহজ করে দিয়েছি যাতে, তুমি ঈশ্বরভীরুদের সুসংবাদ শুনিয়ে দাও। আর অবাধ্য লোকদের সতর্ক কর। (৯৮) আর এর পূর্বে আমি কত প্রজন্মকে ধ্বংস করে দিয়েছি। তুমি কি তাদের কাউকে দেখতে পাও এবং তাদের ক্ষীণতম আওয়াজ শুনতে পাও?

অধ্যায় ২০ : ত্বা-হা (ত্বা-হা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ত্বা-হা। (২) তোমাকে কষ্ট দেওয়ার জন্য আমি তোমার উপর কুরআন অবতীর্ণ করি নি। (৩) বরং যারা (ঈশ্বরকে) ভয় করে তাদের জন্য রয়েছে উপদেশ। (৪) এ তাঁর কাছ থেকে অবতীর্ণ যিনি পৃথিবী ও সুউচ্চ আকাশমণ্ডলী সৃষ্টি করেছেন। (৫) তিনি দয়াময়, সিংহাসনে আসীন। (৬) আকাশ, পৃথিবী, এ দুই এর মাঝে ও মাটির নিচে যা কিছু আছে সবই তাঁর।

(৭) তুমি উচ্চস্বরে কথা বল (অথবা ক্ষীণ স্বরে বল) তিনি সব শোনে, কারণ তিনি গোপন ও অপ্রকাশিত কথাও জানেন। (৮) তিনিই ঈশ্বর, তিনি ছাড়া অন্য কোন উপাস্য নেই। সমস্ত সুন্দর নাম তাঁরই।

(৯) তোমার কাছে মুসার (মোজেসের) বৃত্তান্ত এসেছে কি? (১০) যখন সে একটি আগুন দেখল তখন সে তার পরিবারকে বললঃ দাঁড়াও, আমি একটা আগুন দেখেছি, হয়ত আমি ও থেকে তোমাদের জন্য একটু অঙ্গার নিয়ে আসতে পারবো, অথবা ঐ আগুনের কাছে কোন পথের সন্ধান পাবো।

(১১) অতঃপর সে যখন তার কাছে পৌঁছাল তখন ডাক দেওয়া হল হে মুসা (মোজেস)! (১২) আমিই তোমার প্রভু; অতএব তুমি তোমার জুতা খুলে ফেল; কেননা তুমি পবিত্র তুওয়া উপত্যকায় রয়েছ। (১৩) আর আমি তোমাকে মনোনীত করেছি। অতএব যে বাণী প্রকাশ করা হচ্ছে তা শোন। (১৪) আমিই ঈশ্বর, আমি ছাড়া কোন উপাস্য নেই। অতএব তুমি আমারই উপাসনা কর। আর আমার স্মরণের জন্য প্রার্থনা কর। (১৫) মহাপ্রলয় কবে আসবে আমি তা গোপন রাখতে চাইছি, যাতে প্রত্যেকে তার কৃতকর্মের ফল পায়। (১৬) যে এটা বিশ্বাস করে না ও নিজ প্রবৃত্তির অনুসরণ করে, সে যেন তোমাকে এতে বিশ্বাস স্থাপন করা থেকে নিবৃত্ত

করতে না পারে, তাহলে তুমি ধ্বংস হয়ে যাবে।

(১৭) হে মুসা (মোজেস)! তোমার ডানহাতে ওটা কি? (১৮) সে বললঃ এটা আমার লাঠি। আমি এটাতে ভর দিই আর এটা দিয়ে আমার মেষপালের জন্য গাছের পাতা পাড়ি। এতে আমার অন্যান্য কাজও আছে। (১৯) বললেনঃ হে মুসা (মোজেস)! এটাকে মাটিতে নিক্ষেপ কর। (২০) সে ওটাকে মাটিতে নিক্ষেপ করল, হঠাৎই সেটা একটা সাপ হয়ে দৌড়াতে লাগল। (২১) বললেনঃ ওটাকে ধরো, ভয় করো না, আমি পুনরায় এর পূর্বাবস্থায় ফিরিয়ে দেব।

(২২) আর তুমি তোমার হাত বগলে রাখো, এটা বের হয়ে আসবে উজ্জল হয়ে কোন দোষ ছাড়াই অপর এক নিদর্শন হয়ে।^১ (২৩) যাতে আমি মহা নিদর্শনগুলোর মধ্যে কিছু নিদর্শন তোমাকে দেখাতে পারি। (২৪) তুমি ফারাও এর কাছে যাও, সে সীমালঙ্ঘন করেছে।

(২৫) মুসা (মোজেস) বললঃ হে আমার প্রভু! আমার বন্ধ আমার জন্য প্রশস্ত করে দিন। (২৬) আর আমার কাজ আমার জন্য সহজ করে দিন। (২৭) এবং আমার জিহ্বার জড়তা দূর করে দিন। (২৮) যাতে লোকেরা আমার কথা বুঝতে পারে। (২৯) আর আমার পরিবার থেকে আমার জন্য একজন সহায়ক নিযুক্ত করে দিন। (৩০) হারুন (অ্যারন) যে আমার ভাই। (৩১) তার মাধ্যমে আমার শক্তি সুদৃঢ় করে দিন। (৩২) এবং তাকে আমার কাজে অংশীদার করে দিন। (৩৩) যাতে আমরা দুজনে আপনার অধিক পবিত্রতা

^১ বিঃ দ্রঃ-(২০ঃ ২২) পৃথিবীতে যা কিছু আছে বা যা কিছু ঘটছে সবই ঈশ্বরের অলৌকিকতার নমুনা, বীজ থেকে অঙ্কুর নির্গমন হোক বা দণ্ড সর্পে রূপান্তরিত হোক। পয়গম্বরদের মাধ্যমে বিস্ময়কর অলৌকিকতা প্রদর্শন করা হয়, ঈশ্বরের নিত্য নৈমিত্তিক অলৌকিকতা সম্পর্কে মানুষকে অবহিত করার জন্য।

বর্ণনা করতে পারি। (৩৪) এবং বেশী করে আপনার স্মরণ করতে পারি। (৩৫) নিঃসন্দেহে আপনি তো আমাদের দেখছেন। (৩৬) তিনি বললেনঃ দেওয়া হল তোমাকে হে মুসা (মোজেস)! যা তুমি চাইলে।

(৩৭) আর আমি তো তোমার উপর আরো একবার অনুগ্রহ করেছি। (৩৮) যখন আমি তোমার মায়ের কাছে যে প্রত্যাদেশ পাঠাবার ছিল পাঠিয়েছি। (৩৯) এই মর্মে যে, মুসাকে (মোজেসকে) সিন্দুকে রাখ, তারপর তাকে নদীতে ভাসিয়ে দাও, নদী তাকে তীরে নিক্ষেপ করবে। তাকে এক ব্যক্তি উঠিয়ে নেবে যে আমারও শত্রু আর তারও শত্রু। আর আমি তোমাকে আমার নিজের পক্ষ থেকে স্নেহ দিয়েছিলাম যাতে তুমি আমার সংরক্ষনে প্রতিপালিত হতে পার। (৪০) যখন তোমার বোন হাঁটতে হাঁটতে এসে বললঃ আমি কি তোমাদের এমন একজনের ঠিকানা বলে দেব, যে এই শিশুটিকে লালন-পালন ভালভাবে করতে পারে? অতঃপর আমি তোমাকে তোমার মায়ের কাছে ফিরিয়ে দিলাম, যাতে তার চক্ষু শীতল হয় আর তার কোন দুঃখ না থাকে। আর তুমি এক ব্যক্তিকে হত্যা করেছিলে। তারপর আমি তোমাকে এই দুশ্চিন্তা থেকে মুক্তি দিই। আমি তোমাকে অনেক পরীক্ষা করেছি। তারপর তুমি কয়েক বৎসর মাদইয়ানবাসীদের মধ্যে রইলে। হে মুসা (মোজেস)! তারপর তুমি এই পর্যায়ে (বিশেষ গুণের স্তরে) উপনীত হলে।

(৪১) আর আমি তোমাকে আমার জন্য মনোনীত করলাম। (৪২) তুমি আর তোমার ভাই আমার নিদর্শন সমূহ সহ যাত্রা শুরু করো আর তোমরা দুজনে আমার স্মরণে অলসতা করো না। (৪৩) তোমরা দুজন ফ্যারাও এর কাছে যাও, সে তো সীমালঙ্ঘন করেছে। (৪৪) অতএব ওর সাথে বিনশ্রভাবে কথা বলবে, হয়ত সে উপদেশ গ্রহণ করবে অথবা ভয় করবে।

(৪৫) দুজনেই বললঃ হে আমাদের প্রভু! আমরা আশঙ্কা করছি সে

আমাদের প্রতি অত্যাচার করবে অথবা সীমা লঙ্ঘন করবে। (৪৬) তিনি বললেনঃ ভয় করো না, আমি তোমাদের সঙ্গে আছি, শুনছি ও দেখছি। (৪৭) অতএব তোমরা ওর কাছে যাও আর বলঃ যে, আমরা দুজন তোমার প্রভুর দূত। অতএব ইসরাইলের সন্তানদের আমাদের সঙ্গে যেতে দাও এবং তাদেরকে নির্যাতন করো না। আমরা তোমার প্রভুর কাছ থেকে একটি নিদর্শনও এনেছি আর যে সৎপথে চলবে তার উপর শান্তি আসবে। (৪৮) আমাদের প্রতি প্রত্যাশে প্রেরণ করা হয়েছে যে, ঐ ব্যক্তির শান্তি হবে যে অস্বীকার করবে আর মুখ ফিরিয়ে নেবে।

(৪৯) ফ্যারাও বললঃ মুসা (মোজেস)! তাহলে তোমাদের দুজনের প্রভু কে? (৫০) মুসা (মোজেস) বললঃ আমাদের প্রভু তিনি যিনি প্রত্যেক বস্তুর আকৃতি প্রদান করেছেন, তারপর পথ দেখিয়েছেন। (৫১) ফ্যারাও বললঃ তাহলে অতীত যুগের লোকদের অবস্থা কি? (৫২) মুসা (মোজেস) বললঃ ওদের খবর আমার প্রভুর কাছে লিখিত রয়েছে। আমার প্রভু ভুল করেন না বা ভুলে যান না।

(৫৩) তিনিই তোমাদের জন্য পৃথিবীকে বিছানা বানিয়েছেন, তাতে তোমাদের জন্য পথ তৈরী করে দিয়েছেন, আর আকাশ থেকে বৃষ্টি বর্ষণ করেছেন। তারপর ওর মাধ্যমে আমি বিভিন্ন প্রকারের বনস্পতি উৎপন্ন করেছি। (৫৪) আহার কর আর তোমাদের পশুগুলো চরাও। এর মধ্যে বুদ্ধিমান লোকদের জন্য নিদর্শনাবলী রয়েছে। (৫৫) এ থেকেই তোমাদেরকে সৃষ্টি করেছি আর এতেই আমি তোমাদেরকে ফিরিয়ে আনব, আর এ থেকেই তোমাদেরকে পুনর্বীর উত্থিতকরবো।^১

^১ বিঃদ্রঃ-(২০ঃ৫৫) পৃথিবীর সৃষ্টি, বৃষ্টিপাত এবং বৃক্ষ ও সবুজ বনভূমির উদ্গমন, এবং অন্যান্য প্রাকৃতিক ঘটনাপ্রবাহ যার দ্বারা বর্তমান পৃথিবী জীবকুলের জন্য বাসযোগ্য হয়েছে, এ সবই এক অবিস্বাস্য মহান এবং চমৎকার অভিব্যক্তি।

(৫৬) আর আমি ফ্যারাও কে সব নিদর্শন দেখিয়েছি কিন্তু সে তা অবিশ্বাস ও অমান্য করেছে। (৫৭) সে বললঃ হে মুসা (মোজেস)! তুমি কি এজন্য এসেছ যে, তোমার জাদুর দ্বারা আমাদেরকে আমাদের দেশ থেকে বহিস্কার করে দেবে? (৫৮) তাহলে আমরাও তোমার জাদুর মোকাবিলায় অনুরূপ জাদু আনব; অতএব তুমি আমাদের আর তোমার মধ্যে একটা নির্দিষ্ট চুক্তি নির্ধারিত কর, যা আমরা লঙ্ঘন করবো না আর তুমিও না। এই মোকাবিলা এক খোলা ময়দানে হবে।

(৫৯) মুসা (মোজেস) বললঃ তোমাদের নির্ধারিত উৎসবের দিন, এবং সেদিন সকাল বেলায় লোকদেরকে সমবেত করা হবে। (৬০) ফ্যারাও উঠে গেল, নিজের সব কৌশল ঠিক করল, অতঃপর ফিরে এল। (৬১) মুসা (মোজেস) বললঃ হায় তোমাদের দুর্ভোগ! তোমরা ঈশ্বরের নামে মিথ্যা উদ্ভাবন করো না। তাহলে কোন বিপত্তি দ্বারা তিনি তোমাদেরকে ধ্বংস করে দেবেন। আর ঈশ্বরের উপরে যে মিথ্যা উদ্ভাবন করে, সেই অসফল হয়।

(৬২) তারপর তারা (জাদুকররা) তাদের ব্যাপারে মতভেদ করল আর গোপনে শলা-পরামর্শ করল। (৬৩) তারা বললঃ এই দুজন নিশ্চিতরূপে জাদুকর, এরা চায় যে, জাদুর শক্তি দ্বারা তোমাদেরকে তোমাদের দেশ থেকে বহিস্কার করে দিতে এবং তোমাদের উৎকৃষ্ট জীবন পদ্ধতির বিলোপ ঘটাতে। (৬৪) অতএব তোমরা তোমাদের কৌশল সুসংহত কর। তারপর একজোট হয়ে এস। আর যে জিতবে সেই সফল হবে।

(৬৫) তারা বললঃ হে মুসা (মোজেস)! হয় তুমি নিক্ষেপ কর, না হয় আমরাই আগে নিক্ষেপ করি। (৬৬) মুসা (মোজেস) বললঃ তোমরাই প্রথমে নিক্ষেপ কর, আমরা ওদের রশি ও লাঠি ওদের জাদুর প্রভাবে দৌড়াচ্ছে বলে তাদের মনে হল। (৬৭) এতে মুসা (মোজেস) তার মনে কিছুটা ভীতি অনুভব

করল। (৬৮) আমি বললামঃ ভয় পেওনা, তুমিই বিজয়ী হবে। (৬৯) আর যা তোমার ডান হাতে আছে তা নিক্ষেপ কর সে তাদের গিলে ফেলবে যা তারা তৈরী করেছে। তারা যা কিছু তৈরী করেছে তা জাদুর ধোঁকা। আর জাদুকর কখনও সফল হয় না, তা সে যেভাবেই আসুক। (৭০) অতঃপর জাদুকরেরা সিজদায় (প্রণত হয়ে) লুটিয়ে পড়লো। তারা বললঃ আমরা হারান (অ্যারন) ও মুসার (মোজেসের) প্রভুর প্রতি বিশ্বাস স্থাপন করলাম।

(৭১) ফ্যারাও বললঃ আমার অনুমতি দেওয়ার পূর্বেই তোমরা এদের মেনে নিলে! দেখছি সেই তোমাদের প্রধান যে তোমাদের জাদু শিখিয়েছে; তাহলে এখন আমি তোমাদের হাত-পা বিপরীত দিক থেকে কেটে দেব এবং তোমাদেরকে খেজুর গাছের কাণ্ডে ফাঁসী দেব। আর তোমরা জানতে পারবে আমাদের মধ্যে কার শাস্তি কঠোরতর ও অধিক স্থায়ী।

(৭২) জাদুকরেরা বললঃ আমাদের কাছে যে সব স্পষ্ট প্রমাণাদি এসেছে তাঁর উপর এবং যিনি আমাদেরকে সৃষ্টি করেছেন তাঁর উপর, তোমাকে কিছুতেই আর প্রাধান্য দেব না, অতএব তোমার যা কিছু করার করো। তুমি তো কেবল এই পার্থিব জীবনেই করতে পার। (৭৩) আমরা আমাদের প্রভুর উপর বিশ্বাস স্থাপন করেছি যাতে তিনি আমাদের পাপসমূহ ক্ষমা করে দেন আর এই জাদু প্রদর্শনকে যা তুমি আমাদের করতে বাধ্য করেছ তা। আর ঈশ্বরই সর্বশ্রেষ্ঠ ও শাস্ত।

(৭৪) নিঃসন্দেহে যে ব্যক্তি অপরাধী হয়ে তার প্রভুর সামনে উপস্থিত হবে তার জন্য রয়েছে নরক, ওতে সে মরবেও না আর বাঁচবেও না। (৭৫) আর যে ব্যক্তি তার প্রভুর কাছে আস্থাবান ও সৎকর্মশীল হয়ে আসবে, তার জন্য আছে উচ্চ মর্যাদা। (৭৬) ওদের জন্য চিরস্থায়ী উদ্যান রয়েছে, যার পাদদেশ দিয়ে নদী প্রবাহিত হবে, তারা সেখানে চিরকাল থাকবে আর

এটাই ঐ ব্যক্তির প্রতিফল যে ব্যক্তি পবিত্রতা গ্রহণ করেছে।

(৭৭) আর আমি মুসাকে (মোজেসকে) প্রত্যাশ করলাম যে, আমার বান্দাদের নিয়ে রাতের বেলায় বেরিয়ে পড় এবং তাদের জন্য সমুদ্রে একটি শুকনো পথ তৈরী করে নাও, পশ্চাদ্ধাবনের আশংকা করবে না আর অন্য কিছুরও ভয় পাবে না। (৭৮) অতঃপর ফ্যারাও তার সেনাদল নিয়ে ওদের পশ্চাদ্ধাবন করল তারপর সমুদ্রের জল ওদের নিমজ্জিত করল, পুরোপুরি নিমজ্জিত করে নিল। (৭৯) ফ্যারাও তার সম্প্রদায়কে বিপথগামী করেছিল সে তাদেরকে সঠিক পথ দেখায়নি।

(৮০) হে ইসরাইলের সন্তানেরা! আমি তোমাদেরকে তোমাদের শত্রুর হাত থেকে মুক্তি দিয়েছিলাম এবং তুর পাহাড়ের ডান পাশে তোমাদেরকে প্রতিশ্রুতি দিয়েছিলাম আর আমি তোমাদের উপর মান্না ও সালওয়া প্রেরণ করেছিলাম। (৮১) আমার দেওয়া পবিত্র জীবিকা আহার কর এবং এ ব্যাপারে সীমালঙ্ঘন করো না, পাছে তোমাদের উপর আমার শাস্তি নেমে আসে আর যার উপরে আমার প্রকোপ নেমে আসে সে অবশ্যই ধ্বংস হয়ে যায়। (৮২) তবে যে অনুশোচনা করে, বিশ্বাস স্থাপন করে, সৎকর্ম করে এবং সৎপথে থাকে তার জন্য আমি সবচেয়ে অধিক ক্ষমাশীল।

(৮৩) (যখন মোজেস পাহাড়ের উপর আরোহন করলো, ঈশ্বর বললেন) হে মুসা (মোজেস)! কেন তুমি এত দ্রুত তোমার সম্প্রদায়কে রেখে চলে এলে? (৮৪) মুসা (মোজেস) বললঃ এই তো তারা আমার পিছনেই আছে। হে প্রভু! আমি একটু তাড়াতাড়ি তোমার কাছে এসেছি যাতে তুমি প্রসন্ন হও। (৮৫) বললেনঃ আমি তো তোমার চলে আসার পরে তোমার লোকদেরকে এক পরীক্ষায় ফেলেছি এবং সামিরী তাদেরকে পথভ্রষ্ট করে ফেলেছে।

(৮৬) তখন মূসা (মোজেস) ত্রুদ্ধ ও ক্ষুদ্ধ হয়ে তার সম্প্রদায়ের কাছে ফিরে এল। সে বললঃ হে আমার সম্প্রদায়! তোমাদের প্রভু কি তোমাদের সাথে একটি ভাল প্রতিশ্রুতি করেন নি? তোমাদের উপর দিয়ে কি দীর্ঘ সময় অতিক্রান্ত হয়ে গেছে? না কি তোমরা চাও যে, তোমাদের উপর তোমাদের প্রভুর ক্রোধ নেমে আসুক, এজন্যে তোমরা তোমাদের প্রতিশ্রুতি ভঙ্গ করলে?

(৮৭) তারা বললঃ আমরা ইচ্ছা করে তোমার সাথে বিশ্বাসঘাতকতা করিনি; বরং আমাদের উপর লোকদের অলংকারের বোঝা চাপানো হয়েছিল এবং আমরা তা (অগ্নিকুণ্ডে) ফেলে দিয়েছি। আর এভাবে সামিরী আমাদের পরামর্শ দিয়েছে। (৮৮) তারপর সে এদের জন্য একটি বাছুরের মূর্তি তৈরী করে, এমন এক মূর্তি যা থেকে হাম্মা শব্দ বার হত। তখন তারা বললঃ এটা তোমাদের উপাস্য আর মূসার (মোজেসের) ও উপাস্য; কিন্তু মূসা (মোজেস) একে ভুলে গেছে। (৮৯) ওরা কি দেখেনি যে, সে কোন কথার উত্তর দেয় না, কিন্সা তাদের কোন ক্ষতি বা উপকার করতে পারে না?

(৯০) আর হারুন (অ্যারন) ওদের আগেই বলেছিলঃ হে আমার সম্প্রদায়! তোমরা এই বাছুরের দ্বারা পথভ্রষ্ট হয়ে গেছ, তোমাদের প্রভু তো পরম করুণাময়। অতএব তোমরা আমার অনুসরণ কর এবং আমার আদেশ মেনে চল। (৯১) তারা বললঃ আমরা তো এরই পূজা করবো যতক্ষণ না মূসা (মোজেস) আমাদের কাছে ফিরে আসে।

(৯২) মূসা (মোজেস) বললঃ হারুন (অ্যারন)! তুমি যখন দেখলে যে, তারা বিপথগামী হয়ে গেছে তখন কি তোমাকে নিবৃত্ত করল, (৯৩) যে তুমি আমার আদেশ পালন করলে না? তুমি কি তাহলে আমার কথা অমান্য করলে? (৯৪) হারুন (অ্যারন) বললঃ হে আমার সহোদর! তুমি আমার দাড়ী এবং মাথার চুল ধরে টেনো না। আমি তো এই ভয় করছিলাম যে, তুমি এসে

বলবে যে, তুমি ইসরাইলের সন্তানদের মধ্যে বিভেদ সৃষ্টি করেছ, আর আমার কথার সম্মান রাখনি।

(৯৫) মূসা (মোজেস) বললঃ হে সামিরী! তোমার ব্যাপার কি? (৯৬) সে বললঃ আমি এমন একটি জিনিষ দেখেছি যা অন্যরা দেখেনি। আমি বার্তাবাহকের পায়ের ছাপ থেকে এক মুঠো মাটি নিয়ে এতে নিক্ষেপ করলাম। আমার মন আমাকে এভাবেই প্ররোচিত করেছিল। (৯৭) মূসা (মোজেস) বললঃ দূর হও। জীবদ্দশায় তোর জন্য এটাই শাস্তি যে, তুই সারাজীবন ধরে বলবি - আমাকে ছুঁয়ো না। তুই তোর পরিণতি পেয়ে যাবি, এর কোন ব্যতিক্রম হবে না। এখন তোর উপাস্যকে দেখ যার প্রতি তুই এত অনুরক্ত হয়েছিলি। আমি এটাকে পুড়িয়ে দেব, তারপর টুকরো টুকরো করে সমুদ্রে ফেলে দেব। (৯৮) তোমাদের উপাস্য তো কেবল ঈশ্বর, তিনি ছাড়া কোনই উপাস্য নেই, সবকিছুই তাঁর জ্ঞানের পরিধিতে আবদ্ধ।

(৯৯) এভাবেই আমি তোমাকে ঐসব বৃত্তান্ত শোনাই যা পূর্বে ঘটেছে। আর আমি তোমাকে নিজের পক্ষ থেকে একটি অভিজ্ঞান (কুরআন) দিয়েছি। (১০০) যে এথেকে বিমুখ হবে শেষ বিচারের দিনে সে একটি ভারী বোঝা বহন করবে। (১০১) সে ওটা চিরকাল বহন করবে। শেষ বিচারের দিনে এই বোঝা ওদের জন্য কতই না মন্দ হবে। (১০২) যে দিন শৃঙ্গায় (মহাশঙ্খে) ফুঁক দেওয়া হবে আর অপরাধীদেরকে আমি এমন দশায় একত্রিত করবো যে, ভয়ে ওদের চোখ নীল হয়ে যাবে। (১০৩) তারা নিজেদের মধ্যে চুপিচুপি বলাবলি করবে, তোমরা দশদিনের বেশী অবস্থান করনি। (১০৪) তারা যা বলবে তা আমি খুব ভাল করে জানি, যখন ওদের মধ্যে সবচেয়ে জ্ঞান-বুদ্ধিতে শ্রেষ্ঠতম ব্যক্তি বলবে, তোমরা একদিনের বেশী অবস্থান করনি।

(১০৫) লোকেরা তোমার কাছে পাহাড়-পর্বত সম্পর্কে জিজ্ঞেস

করে। বলঃ আমার প্রভু এগুলোকে ধুলোর মতো ছড়িয়ে দেবেন। (১০৬) তারপর পৃথিবীকে সমতল পরিষ্কার ময়দান তৈরী করে ছাড়বেন। (১০৭) তাতে তুমি কোন বক্রতা বা উৎক্ষেপ পাবে না। (১০৮) সেদিন সব লোক আহ্বানকারীর কথামতো চলবে। কোনও অব্যাহতি হবে না। সব আওয়াজ করুণাময়ের ভয়ে স্তব্ধ হয়ে যাবে। সুতরাং ফিসফিসানি ছাড়া তুমি আর কিছু শুনবে না।

(১০৯) সেদিন সুপারিশ কাজে আসবে না; কিন্তু করুণাময় যাকে অনুমতি প্রদান করবেন এবং যার কথা তিনি পছন্দ করবেন (সে ব্যতীত)। (১১০) তিনি সবার সম্মুখের ও পশ্চাতের বৃত্তান্ত জানেন; কিন্তু তারা তাঁকে জ্ঞানের সীমায় আনতে পারে না। (১১১) আর সকল মুখমণ্ডল সেদিন চিরঞ্জীব চিরস্থায়ী সত্ত্বার সামনে অবনমিত হবে। (১১২) এবং যে আস্থা রেখে সংকর্ম করে তার আশঙ্কা নেই অবিচারের এবং ক্ষতির।

(১১৩) আর এভাবেই আমি আরবী ভাষায় কুরআন অবতীর্ণ করেছি এবং তাতে বিভিন্ন প্রকারে সতর্ক বার্তা বিবৃত করেছি যাতে লোকে ভয় করে অথবা তাদের মনে কিছু চিন্তার উদ্রেক হয়। (১১৪) ঈশ্বরই শ্রেষ্ঠ, প্রকৃত অধিপতি। তোমার প্রতি প্রত্যাশা সম্পূর্ণ না হওয়া পর্যন্ত তুমি কুরআন নিয়ে তাড়াহুড়া করো না। আর বলঃ হে আমার প্রভু! আমার জ্ঞান বৃদ্ধি করে দিন।

(১১৫) আর আমি ইতিপূর্বে আদমকে (অ্যাডাম) আদেশ দিয়েছিলাম; কিন্তু সে ভুলে গিয়েছিল। আর আমি তার থেকে সংকল্পে দৃঢ়তার পরিচয় পাইনি। (১১৬) আর যখন আমি দেবদূতদের বলেছিলাম যে, আদমকে সিজদা (প্রণতি জ্ঞাপন) করো তখন তারা সিজদা (প্রণতি জ্ঞাপন) করল, ইবলিস ব্যতীত; সে অস্বীকার করল। (১১৭) তখন আমি বললামঃ হে আদম (অ্যাডাম)!

নিঃসন্দেহে এ তোমার আর তোমার স্ত্রীর শত্রু। অতএব সে যেন তোমাদেরকে স্বর্গ থেকে বহিস্কার করাতে না পারে, তাহলে তোমরা দুঃখ কষ্টপাবে।

(১১৮) তুমি এখানে ক্ষুধার্ত হবে না আর বিবস্ত্রও হবে না। (১১৯) এখানে তুমি তৃষণার্তও হবে না আর রৌদ্রতাপও লাগবে না। (১২০) অতঃপর শয়তান তাকে কুমন্ত্রনা দিল। সে বললঃ হে আদম (অ্যাডাম)! আমি কি তোমাকে অমরত্ব বৃক্ষের কথা বলবো আর অক্ষয় রাজ্যের সন্ধান দেব? (১২১) অতঃপর তারা দুজন ঐ বৃক্ষের ফল খেয়ে নিল তখন তারা তাদের বস্ত্রহীনতা সম্পর্কে চেতনা লাভ করল। তারা নিজেদেরকে স্বর্গের পাতা দিয়ে ঢাকতে লাগল আর আদম (অ্যাডাম) তার প্রভুর আদেশ অবমাননা করার জন্য বিব্রান্ত হয়ে গেল। (১২২) অতঃপর তার প্রভু তাকে কৃপা করলেন এবং তার অনুশোচনা গ্রহণ করলেন ও তাকে দিক-নির্দেশনা দিলেন।

(১২৩) ঈশ্বর বললেনঃ তোমরা দুজনে এখান থেকে নেমে যাও, তোমরা একে অপরের শত্রু হবে। তারপর যদি তোমাদের কাছে আমার নিকট হতে দিক-নির্দেশনা আসে, তখন যে আমার দিক-নির্দেশনা অনুসরণ করবে সে পথভ্রষ্ট হবে না, আর বঞ্চিতও হবে না। (১২৪) আর যে ব্যক্তি আমার উপদেশ থেকে মুখ ফিরিয়ে নেয়, তার জীবন হবে বিপন্নতায় পূর্ণ আর শেষবিচারের দিন আমি তাকে অন্ধ অবস্থায় উত্তিত করবো। (১২৫) সে বলবেঃ হে আমার প্রভু! আপনি আমাকে অন্ধ অবস্থায় উত্তিত করলেন কেন? আমি তো দৃষ্টিশক্তি সম্পন্ন ছিলাম। (১২৬) বলা হবেঃ এভাবেই তোমার কাছে আমার নিদর্শনসমূহ এসেছিল, তুমি তার প্রতি কোন গুরুত্ব দাওনি, সেভাবেই আজ তোমাকেও কোন গুরুত্ব দেওয়া হবে না। (১২৭) আর এভাবেই আমি প্রতিফল দিই তাকে যে সীমালঙ্ঘন করে আর আপন প্রভুর উপর বিশ্বাস স্থাপন করে না; আর পরলোকের শাস্তি খুবই কঠিন ও অধিকতর স্থায়ী হবে।

(১২৮) লোকদের কি এ বিষয়ে কোন শিক্ষা হয় নি? ইতিপূর্বে আমি কত জনগোষ্ঠীকে সমূলে ধ্বংস করে দিয়েছি। এরা তাদের জনপদে চলা-ফেরা করে। নিঃসন্দেহে এতে বুদ্ধিমানদের জন্য বড় নিদর্শন রয়েছে। (১২৯) যদি তোমাদের প্রভুর পক্ষ থেকে একটি কথা পূর্ব নির্ধারিত না থাকত এবং অবকাশের সময়সীমা নির্ধারিত না হত তাহলে অবশ্যই এদের শাস্তি ত্বরান্বিত হত। (১৩০) সুতরাং এরা যাই বলুক না কেন তাতে ধৈর্য ধারণ কর। আর নিজ প্রভুর পবিত্রতা ও প্রশংসা বর্ণনা কর, সূর্যোদয়ের পূর্বে আর সূর্যাস্তের পূর্বে, রাতের কিছু সময়েও স্তুতি কর এবং দিনের প্রান্ত সমূহেও। যাতে তুমি সন্তুষ্ট হতে পার।

(১৩১) আর কখনই ঐ সব জিনিষের দিকে চোখ তুলেও তাকিয়ে না যা আমি ওদের কিছু সম্প্রদায়কে পরীক্ষা করার জন্য পার্থিব জীবনের সৌন্দর্য স্বরূপ দিয়ে রেখেছি। তোমার প্রভুর দেওয়া জীবিকাই শ্রেষ্ঠ ও স্থায়ী। (১৩২) আর তোমার পরিবারবর্গকে প্রার্থনার আদেশ দাও এবং নিজে তাতে অবিচল থাক। আমি তোমার কাছে কোন জীবিকা চাইছি না। আমি তো তোমাকে জীবিকা দেব এবং ঈশ্বর ভীরুতার পরিণাম শুভ।

(১৩৩) আর লোকেরা বলেঃ সে আমাদের জন্য তার প্রভুর কাছ থেকে কোন নিদর্শন নিয়ে আসে না কেন? তবে কি আগের গ্রন্থের প্রমাণ সমূহ তাদের কাছে পৌঁছায়নি? (১৩৪) আর যদি আমি তাদের আগেই কোন শাস্তি দিয়ে ধ্বংস করে দিতাম তাহলে তারা বলত হে আমাদের প্রভু! আপনি আমাদের কাছে কোন বার্তাবহ কেন পাঠালেন না? তাহলে আমরা লাক্ষিত ও অপমানিত হওয়ার পূর্বে আপনার নিদর্শনসমূহ অনুসরণ করতাম। (১৩৫) বলঃ প্রত্যেকেই প্রতীক্ষা করছে। অতএব তোমরাও প্রতীক্ষা কর। অতএব, তোমরা শীঘ্রই জানতে পারবে কারা সঠিক পথের অনুসারী আর কারাই বা সৎ পথ প্রাপ্ত।

অধ্যায় ২১ : আল আশ্বিয়া (দিব্যপুরুষ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) মানুষের হিসাব গ্রহণের সময় ঘনিষে এসেছে; অথচ তারা উদাসীনতায় মুখ ফিরিয়ে আছে। (২) তাদের প্রভুর কাছে থেকে নতুন যে উপদেশই তাদের কাছে আসে, তারা তা উপহাসের ছলে শোনে। (৩) তাদের অন্তর থাকে অমনোযোগী, সীমালঙ্ঘনকারীরা গোপনে পরামর্শ করে; এতো তোমাদের মতই একজন মানুষ; তবুও কি তোমরা চোখে দেখেও এর জাদুর কবলে পড়বে? (৪) পয়গম্বর বললঃ আমার প্রভু আকাশমণ্ডলী ও পৃথিবীর যাবতীয় কথা জানেন। তিনি সবকিছু শোনেন, সবকিছু জানেন।

(৫) এছাড়া তারা বলেঃ এটাতো একটা ভ্রান্ত স্বপ্ন। সে নিজে এসব বানিয়েছে, না হয় সে একজন কবি। অতএব সে আমাদের কাছে এমন কোন নিদর্শন নিয়ে আসুক যেমন নিদর্শনসহ পূর্বের পয়গম্বরদের পাঠানো হয়েছিল। (৬) এদের আগে যেসব জনপদ আমি ধ্বংস করেছি তার অধিবাসীরা বিশ্বাস স্থাপন করেনি। অতএব এরা কি বিশ্বাস স্থাপন করবে?

(৭) আর তোমার পূর্বেও যাদেরকে আমি বার্তাবাহক বানিয়ে পাঠিয়েছি মানুষের মধ্যে থেকেই পাঠিয়েছি। তাদের কাছে প্রত্যাদেশ পাঠাতাম। অতএব তুমি গ্রন্থধারীদের কাছে জিজ্ঞেস করে নাও যদি তোমার জানা না থাকে। (৮) আর আমি ঐ বার্তাবাহকদের এমন শরীর দিই নি যে তারা আহা করত না, আর তারা অমরও ছিল না। (৯) অতঃপর আমি ওদের সাথে কৃত অঙ্গীকার সত্যে পরিণত করে দেখিয়েছি। অতএব তাদের আর যাদেরকে ইচ্ছা রক্ষা করেছে। আর আমি সীমা লঙ্ঘনকারীদের ধ্বংস করে দিয়েছি।

(১০) আমি তো তোমাদের কাছে একটি গ্রন্থ অবতীর্ণ করেছি

যাতে তোমাদের জন্য উপদেশ রয়েছে। তবুও কি তোমরা বুঝবে না? (১১) আর কত অত্যাচারীদের জনপদ আমি ধংস করেছি এবং ওদের পরে অন্য জনগোষ্ঠীকে উত্থাপন করেছি। (১২) অতএব তারা যখন আমার শাস্তি প্রত্যক্ষ করল, তখনই সেখান থেকে ছুটে পালাতে লাগল। (১৩) পলায়ন করো না, তোমাদের জীবন সামগ্রীর দিকে আর নিজ বাসস্থানের দিকে ফিরে চল। যাতে তোমাদেরকে জিজ্ঞাসা করা যেতে পারে। (১৪) তারা বললঃ হায় আমাদের দুর্ভাগ্য! নিশ্চয়ই আমরা অত্যাচারী ছিলাম। (১৫) তারা এভাবেই আত্ননাদ করতে থাকে। এমনকি আমি তাদের এমন করে দিলাম যেন তারা কর্তিত শস্য ও নির্বাপিত আগুন।

(১৬) আর আমি আকাশ ও পৃথিবী এবং যা কিছু এই দুই এর মাঝখানে আছে খেলাচ্ছলে সৃষ্টি করিনি। (১৭) যদি আমি কোন খেলার উপকরণ সৃষ্টি করতে চাইতাম তাহলে তা নিজের থেকেই বানাতাম, যদি এটাই আমার করণীয় হত। (১৮) বরং আমি সত্য দ্বারা মিথ্যার উপর আঘাত করি, তখন সত্য মিথ্যাকে চূর্ণ-বিচূর্ণ করে দেয়, তখনই মিথ্যা বিলুপ্ত হয়; দূর্ভোগ তোমাদের! তোমরা যা বলছ তার জন্য।

(১৯) আকাশ ও পৃথিবীতে যারা আছে তারা তাঁরই। আর যারা তাঁর সান্নিধ্যে আছে তারা তাঁর এবাদতে (উপাসনায়) অহংকার করে না এবং অলসতাও করে না। (২০) তারা রাত-দিন তাঁরই গুনগান করে, কখনই ক্লান্ত হয় না।

(২১) তারা মাটি থেকে তৈরি যে সব দেবতা গ্রহণ করেছে তারা কি কাউকে জীবিত করতে সক্ষম? (২২) যদি আকাশ ও পৃথিবীতে আল্লাহ (ঈশ্বর) ব্যতীত অন্য কেউ উপাস্য থাকত তাহলে দুইয়েরই অবস্থা লণ্ড-ভণ্ড হয়ে যেত। অতএব ঈশ্বর, সিংহাসনের মালিক, একথা থেকে পবিত্র যা তারা বলে।

(২৩) তিনি যা করেন তৎসম্পর্কে তাকে জিজ্ঞাসা করা যাবে না বরং তাদেরকেই জিজ্ঞাসা করা হবে।

(২৪) এরা কি ঈশ্বর ছাড়া অন্য উপাস্য তৈরী করে নিয়েছে? এদেরকে বলঃ তোমাদের প্রমাণ নিয়ে এস। এটা আমার সঙ্গে যারা আছে তাদের জন্য উপদেশ এবং আমার পূর্বে যারা ছিল তাদের জন্যও উপদেশ। তবে তাদের অধিকাংশই সত্য জানে না। তাই তারা মুখ ফিরিয়ে আছে। (২৫) তোমার পূর্বে আমি যে বার্তাবাহকই পাঠিয়েছি তাকে প্রত্যদেশের মাধ্যমে একথাই বলেছি যে, আমি ছাড়া অন্য কোন উপাস্য নেই, অতএব তোমরা আমার উপাসনা কর।

(২৬) আর তারা বলে করুণাময় সন্তান গ্রহণ করেছেন। তিনি পবিত্র মহান! বরং (দেবদূতরা) তারা তো ঈশ্বরের সম্মানিত বান্দা। (২৭) তারা তাঁর থেকে আগ বাড়িয়ে কথা বলে না। আর তারা তাঁরই আদেশ অনুযায়ী কাজ করে। (২৮) ঈশ্বর এদের অগ্র-পশ্চাতের বৃত্তান্ত জানেন। তারা কেবল তার জন্যই সুপারিশ করতে পারে যার প্রতি ঈশ্বর সন্তুষ্ট আর তারা তাঁর ভয়ে ভীত। (২৯) আর ওদের মধ্যে যে ব্যক্তি বলবে যে তিনি ছাড়া আমিই একজন উপাস্য, তাকে আমি নরকের শাস্তি দেব। আমি যুলুমকারীদের এমনই শাস্তি দিয়ে থাকি।

(৩০) অবিশ্বাসীরা কি দেখেনি যে, আকাশ ও পৃথিবী দুটো একত্রিত ছিল, তারপর আমি উভয়কে পৃথক করে দিলাম এবং জল থেকে আমি প্রত্যেক জীবিত বস্তু সৃষ্টি করেছি। তারপরও কি তারা বিশ্বাস করবে না?

(৩১) আর আমি পৃথিবীতে সূদৃঢ় পর্বতমালা স্থাপন করেছি, যাতে তা তাদেরকে নিয়ে ঝুঁকে না পড়ে। আমি তাতে গিরিপথ ও তৈরী করেছি, যাতে তারা পথের সন্ধান পায়। (৩২) আর আমি আকাশকে এক সুরক্ষিত

শামিয়ানা বানিয়েছি; অথচ তারা এর নিদর্শন থেকে মুখ ফিরিয়ে আছে। (৩৩) আর তিনিই রাত, দিন, চন্দ্র ও সূর্য সৃষ্টি করেছেন। প্রত্যেকে নিজ নিজ কক্ষপথে বিচরণ করছে।

(৩৪) তোমার পূর্বেও আমি কোন মানুষকে অনন্ত জীবন দিইনি। অতএব তোমার যদি মৃত্যু হয় তাহলে তারা কি চিরকাল বেঁচে থাকবে? (৩৫) প্রত্যেক জীবকেই মৃত্যুর স্বাদ গ্রহণ করতে হবে। আর আমি তোমাদের মন্দ ও ভাল পরিস্থিতি দ্বারা বিশেষভাবে পরীক্ষা করে থাকি। আর তোমাদের সবাইকে আমার কাছে ফিরিয়ে আনা হবে।

(৩৬) অবিশ্বাসীরা যখন তোমাকে দেখে তখন তারা তোমাকে উপহাস করে। এই কি সেই ব্যক্তি যে তোমাদের উপাস্যদের সমালোচনা করে? অথচ এরাই করুণাময়ের কথা উল্লেখ করতেও অস্বীকার করে।

(৩৭) মানুষ সৃষ্টিগত ভাবে ত্বরাপ্রবণ। আমি তোমাকে শীঘ্রই আমার নিদর্শন দেখাব। অতএব আমাকে তাড়াতাড়ি করতে বলো না। (৩৮) তারা জিজ্ঞাসা করে, যদি তুমি সত্যবাদী হও তবে বল সেই প্রতিশ্রুতি কখন পূর্ণ হবে? (৩৯) যারা সত্যকে অস্বীকার করে তারা যদি সেই সময়ের কথা জানতে পারতো যখন তারা সন্মুখ বা পশ্চাৎ থেকে আগুনকে প্রতিহত করতে পারবে না। তাদেরকে সাহায্য করাও হবে না। (৪০) বরং ওটা অতর্কিতে তাদের উপর এসে যাবে এবং তাদেরকে হতবাক করে দেবে। ফলে তারা তা রোধ করতেও পারবে না, আর তাদেরকে সময়ও দেওয়া হবে না। (৪১) তোমার পূর্বেও বার্তাবাহকদেরকে উপহাস করা হয়েছিল। পরিণামে তারা যা নিয়ে উপহাস করত তাই তাদেরকে পরিবেষ্টন করেছিল।

(৪২) বলঃ কে তোমাদের রাতে ও দিনে করুণাময়ের থেকে

হেফাজত করবে বরং তারা তাদের প্রভুর স্মরণ থেকে বিমুখ হচ্ছে। (৪৩) তবে কি তাদের আমি ছাড়া অন্য কোন উপাস্য আছে যারা তাদের রক্ষা করে? তারা তো স্বয়ং নিজেকেই রক্ষা করার সামর্থ রাখে না। আর আমার মোকাবিলায় তাদের কোন সাহায্যকারী থাকবে না।

(৪৪) বস্তুতঃ আমিই তাদেরকে আর তাদের পিতৃ-পুরুষদের পার্থিব সামগ্রী দিয়েছিলাম। এমনকি তাদের আয়ুষ্কাল দীর্ঘ হয়েছিল। তাহলে তারা কি দেখে না যে, আমি পৃথিবীকে চতুর্দিক থেকে সঙ্কুচিত করে আনছি? তারপরও কি তারা প্রভাবশালী থাকবে?

(৪৫) বলঃ আমি কেবল মাত্র প্রত্যাদেশের মাধ্যমে তাদেরকে সতর্ক করি। তবে বধিরদের যখন সতর্ক করা হয় তখন তারা সে ডাক শুনে না। (৪৬) আর যদি তাদেরকে তোমার প্রভুর শাস্তির সামান্য কিছুমাত্র স্পর্শ করে তখন তারা বলে উঠবে, হায়! আমাদের কি দুর্ভাগ্য! নিশ্চয়ই আমরা যুলুমকারী ছিলাম।

(৪৭) আর আমি শেষবিচারের দিনে ন্যায় বিচারের মানদণ্ড স্থাপন করবো। সুতরাং কারো প্রতি সামান্যতম অবিচার হবে না, আর কারো যদি শস্যদানা পরিমাণও কর্ম থাকে আমি তা উপস্থিত করবো, আর হিসাব নেওয়ার জন্য আমিই যথেষ্ট।

(৪৮) আমি তো মূসা (মোজেস) ও হারুন কে (অ্যারনকে) সত্য-মিথ্যার পার্থক্যকারী গ্রন্থ এবং ঈশ্বরভীরুদেরকে জ্যোতি ও উপদেশ দিয়েছিলাম। (৪৯) যারা না দেখেও তাদের প্রভুকে ভয় করে এবং শেষ বিচারের ক্ষণকে ভয় করে। (৫০) আর এ এক কল্যাণকারী উপদেশ যা আমি অবতীর্ণ করেছি; তবুও কি তোমরা তা অস্বীকার করবে?

(৫১) আর আমি ইতিপূর্বে ইবরাহীম (আব্রাহাম) কে তার দিক-নির্দেশনা

প্রদান করেছিলাম, আর আমি তার সম্পর্কে ভালভাবেই অবগত ছিলাম। (৫২) যখন সে তার পিতা ও তার সম্প্রদায়কে বললঃ এই মূর্তিগুলো কি, যেগুলোর প্রতি তোমরা এত অনুরক্ত? (৫৩) তারা বললঃ আমরা আমাদের পিতৃপুরুষদের এগুলোর পূজা করতে দেখেছি। (৫৪) ইবরাহীম (আব্রাহাম) বললঃ আসলে তোমরা স্পষ্ট বিভ্রান্তির মধ্যে লিপ্ত রয়েছো এবং তোমাদের পূর্বপুরুষেরা ও।

(৫৫) তারা বললঃ তুমি কি আমাদের কাছে সত্য নিয়ে এসেছ, না কি কৌতুক করছো? (৫৬) ইবরাহীম (আব্রাহাম) বললঃ তোমাদের প্রভু তিনিই যিনি আকাশ ও পৃথিবীর প্রভু। যিনি এগুলো সৃষ্টি করেছেন আর আমিই এই কথার অন্যতম সাক্ষী। (৫৭) ঈশ্বরের শপথ, আমি তোমাদের মূর্তিগুলোর ব্যপারে একটা ব্যবস্থা অবলম্বন করবো, যখন তোমরা পিছন ফিরে চলে যাবে। (৫৮) অতঃপর সে মূর্তিগুলো চূর্ণ-বিচূর্ণ করে দিল, তবে তাদের বড়টিকে ভাঙল না, যাতে তারা সেটার কাছে (খোঁজ নিতে) ফিরে আসে।

(৫৯) তারা বললঃ কে আমাদের মূর্তিগুলোর সাথে এই আচরণ করেছে? নিশ্চয়ই সে এক বড় অত্যাচারী। (৬০) লোকেরা বললঃ আমরা এক যুবককে ওদের বিষয় বলতে শুনেছিলাম যাকে ইব্রাহীম (আব্রাহাম) বলা হয়। (৬১) তারা বললঃ তাকে জনসমক্ষে উপস্থিত করো, যাতে তারা সাক্ষ্য দিতে পারে। (৬২) তারা বললঃ ইবরাহীম (আব্রাহাম)! আমাদের উপাস্যের সাথে এই আচরণ কি তুমি করেছ? (৬৩) ইবরাহীম (আব্রাহাম) বললঃ এটা বরং এদের এই বড়টাই করেছে, তোমরা একেই জিজ্ঞেস কর যদি এ কথা বলতে পারে।

(৬৪) তখন তারা আপন মনে চিন্তা করল। তারপর একে অপরের সাথে বলাবলি করতে লাগল যে, আসলে তোমরা নিজেরাই তো বিভ্রান্তির

মধ্যে রয়েছে। (৬৫) এরপর তারা মাথা নত করল। (আর বলল) : ইবরাহীম (আব্রাহাম)! তুমি তো জানো, এরা কথা বলতে পারে না। (৬৬) ইবরাহীম (আব্রাহাম) বললঃ তোমরা কি ঈশ্বর ছাড়া এমন কিছু উপাসনা কর যা তোমাদের কোন উপকার বা ক্ষতি করতে পারে না? (৬৭) ঠিক তোমাদেরকে এবং ঈশ্বর ব্যতীত তোমরা যাদের উপাসনা কর তাদেরকেও! তোমরা কি বোঝ না?

(৬৮) তারা বললঃ একে আগুনে নিক্ষেপ কর আর আপন উপাস্যদের সাহায্য কর। যদি তোমরা কিছু করতে চাও। (৬৯) আমি বললামঃ হে আগুন! তুই ইবরাহীমের (আব্রাহামের) জন্য শীতল, শান্ত ও নিরাপদ হয়ে যা। (৭০) তারা তার ক্ষতি করতে চাইল; কিন্তু আমি তাদেরকে অকৃতকার্য করে দিলাম।

(৭১) আর আমি তাকে ও লূতকে উদ্ধার করে সেই ভূখণ্ডে নিয়ে গেলাম যেখানে আমি বিশ্ববাসীর জন্য কল্যাণ (ঈশ্বর কৃপা) রেখেছি। (৭২) আর আমি তাকে দান করলাম ইসহাক (আইজ্যাক) এবং অতিরিক্ত পুরস্কার স্বরূপ দিলাম ইয়াকুবকে (জ্যাকবকে) আর আমি এদের সবাইকে করেছি সদাচারী। (৭৩) আর আমি ওদেরকে নেতা বানিয়েছি যারা আমার নির্দেশে পথ দেখাত আর আমি তাদেরকে সৎকাজ করার, প্রার্থনা করার ও উদ্বৃত্ত সম্পদ থেকে আবশ্যিক দান প্রদান করার নির্দেশ পাঠিয়েছি, তারা আমারই উপাসনা করত।

(৭৪) আর লূতকে আমি প্রদান করেছি বিবেক ও জ্ঞান এবং তাকে সেই জনপদ থেকে উদ্ধার করেছি যারা অশ্লীল কাজ করত। নিঃসন্দেহে তারা ছিল পাপী আর দূরাচারী এক জনগোষ্ঠী। (৭৫) আর আমি তাকে আমার অনুগ্রহের অন্তর্ভুক্ত করেছি। নিঃসন্দেহে সে সৎকর্মশীলদের অন্তর্ভুক্ত ছিল।

(৭৬) আর নূহ (নোয়াহ), এর পূর্বে যখন ডেকেছিল, আমি তার ডাকে সাড়া দিয়েছিলাম। অতএব আমি তাকে আর তার লোকদেরকে মহা বিপদ থেকে উদ্ধার করেছিলাম। (৭৭) এবং তাকে সেই লোকদের বিরুদ্ধে সাহায্য করেছিলাম যারা আমার নিদর্শনসমূহ অস্বীকার করেছিল। নিঃসন্দেহে তারা ছিল এক মন্দ জনগোষ্ঠী। অতএব আমি তাদের সবাইকে ডুবিয়ে দিয়েছিলাম।

(৭৮) দাউদ (ডেভিড) এবং সোলাইমানের (সলোমন) কথা স্মরণ কর, যখন তারা শস্যক্ষেত্র সম্পর্কে বিচার করছিল, যেখানে কোন সম্প্রদায়ের মেঘ রাত্রি বেলায় প্রবেশ করেছিল, আর আমি তাদের বিচার প্রত্যক্ষ করেছিলাম। (৭৯) অতঃপর আমি সোলাইমানকে (সলোমন) সে ফায়সালা বুঝিয়ে দিয়েছিলাম এবং উভয়কে বিবেক ও জ্ঞান প্রদান করেছিলাম। আর পর্বতসমূহকে আমি দাউদের (ডেভিড) অধীন করে দিয়েছিলাম, সে তাদের সাথে স্তুতি করত আর পাখিরাও। আর আমিই এসব করেছিলাম। (৮০) আর আমি তাকে তোমাদের জন্য যুদ্ধের বর্ম তৈরী করা শিখিয়েছি যা তোমাদেরকে যুদ্ধক্ষেত্রে সুরক্ষিত রাখে। তার জন্য তোমরা কি কৃতজ্ঞ হবে না?

(৮১) আর আমি প্রবল বাতাসকে সোলাইমানের (সলোমন) অধীন করে দিই, যা তার নির্দেশে সেই ভূখণ্ডের দিকে প্রবাহিত হত যেখানে আমি কল্যাণ রেখেছিলাম। আর আমি সবকিছুই জানি। (৮২) আর শয়তানদের মধ্যে কতিপয় তার জন্য ডুবুরীর কাজ করত, এছাড়াও অন্য কাজও করত। আর আমিই তাদেরকে সামলে রাখতাম।

(৮৩) আর আইয়ুবকেও (জব), যখন সে তার প্রভুকে ডেকে বলেছিলঃ আমি রোগগ্রস্থ হয়ে পড়েছি। আর তুমিই সকল দয়ালুর চেয়ে বড় দয়ালু। (৮৪) তখন আমি তার ডাকে সাড়া দিয়ে তার যা কষ্ট ছিল তা দূর করে দিয়েছিলাম। আর আমি তাকে তার পরিবার-পরিজন ফিরিয়ে দিয়েছিলাম।

আর সেই সাথে অনুরূপ আরো দিলাম আমার পক্ষ থেকে অনুগ্রহ ও উপদেশ উপাসনাকারীদের জন্য।

(৮৫) আর ইসমাইল, ইদরীস ও যুল-কিফল, এরা সবাই ধৈর্যশীলদের অন্তর্ভুক্ত। (৮৬) আমি এদেরকে আমার অনুগ্রহ ভাজন করেছিলাম। নিঃসন্দেহে এরা সৎকর্মশীলদের অন্তর্ভুক্ত ছিল।

(৮৭) আর (স্মরণ কর) মাছের পেটে অবস্থাকারী (জোনাহ) কে, যখন সে তার সম্প্রদায়ের উপর ক্রুদ্ধ হয়ে চলে গিয়েছিল আর মনে করেছিল আমি তাকে ধরবো না। অতঃপর সে অন্ধকারে (মাছের পেটে) ডাক দিয়ে বলেছিল, আপনি ছাড়া কোন উপাস্য নেই, আপনিই পবিত্র। নিঃসন্দেহে আমিই দোষী। (৮৮) আমি তার ডাকে সাড়া দিয়েছিলাম এবং তার কষ্ট দূর করেছিলাম। আর এভাবেই আমি সত্যে বিশ্বাস স্থাপনকারীদের রক্ষা করে থাকি।

(৮৯) আর যাকারিয়াকে, যখন সে তার প্রভুকে ডাকল যে, হে আমার প্রভু! আমাকে একা (সন্তানহীন) ছেড়ে দেবেন না। আর আপনিই তো শ্রেষ্ঠতম উত্তরাধিকারী। (৯০) তখন আমি তার প্রার্থনা গ্রহণ করি এবং তাকে ইয়াহইয়া (জন) প্রদান করি। আর তার পত্নীকে তার জন্য সন্তান ধারণের উপযোগী করে দিই। এরা সৎকর্মে বাপিয়ে পড়ত এবং আমাকে আশা ও ভয় নিয়ে ডাকত। আর এরা ছিল আমার প্রতি বিনয়াবনত।

(৯১) আর ওই মহিলা (মারইয়াম) যে তার সতীত্ব রক্ষা করেছিল। আমি ওর মধ্যে আমার আত্মা সঞ্চারিত করলাম এবং তাকে আর তার পুত্রকে বিশ্ববাসীর জন্য নিদর্শন বানালাম।

(৯২) এ হচ্ছে তোমাদেরই সম্প্রদায়-এটা তো একই সম্প্রদায়। আর আমিই তোমাদের প্রভু। অতএব আমারই উপাসনা কর। (৯৩) আর তারা

নিজেদের মধ্যে বিভেদ সৃষ্টি করেছে। সকলকে আমার কাছে ফিরে আসতে হবে। (৯৪) অতএব যে ব্যক্তি সৎকর্ম করবে এবং সত্যে বিশ্বাস স্থাপনকারী হবে তার কর্ম উপেক্ষা করা হবে না আর আমি তা লিপিবদ্ধ করে রাখি।

(৯৫) আর যে জনপদকে আমি বিনাশের জন্য নির্ধারিত করে দিয়েছি, তাদের জন্য সেখানে ফিরে আসা অবৈধ হয়ে গেছে। (৯৬) যে পর্যন্ত না ইয়াজুজ আর মাজুজকে মুক্ত করে দেওয়া হয় এবং তারা প্রতিটি উঁচু ভূমি হতে ছুটে আসবে। (৯৭) আর যখন ঈশ্বরের সত্য প্রতিশ্রুতি নিকটবর্তী হবে তখন হঠাৎই ওদের চক্ষু উচ্ছে স্থির হয়ে যাবে যারা অবিশ্বাস করেছিল। হায়! আমাদের দুর্ভাগ্য! এই ব্যাপারে আমরা অচেতন ছিলাম; বরং আমরা যুলুমকারী ছিলাম।

(৯৮) নিঃসন্দেহে তোমরা আর তোমরা যাদেরকে উপাসনা করতে, সকলেই নরকের জ্বালানি। সেখানেই তোমাদের গন্তব্য। (৯৯) বাস্তবে সত্যিই যদি তারা উপাস্য হত তাহলে তারা সেখানে (নরকে) প্রবেশ করত না। সেখানেই তারা চিরকাল থাকবে। (১০০) ওখানে তারা আত্নাদ করতে থাকবে আর ওখানে তারা এছাড়া কিছুই শুনতে পাবে না। (১০১) নিঃসন্দেহে যাদের জন্য আমার পক্ষ থেকে কল্যাণ নির্ধারিত হয়েছে, তাদেরকে জাহান্নাম থেকে দূরে রাখা হবে। (১০২) তারা তার (নরকের) মৃদু শব্দও শুনবে না। আর তারা তাদের মনের বাসনা অনুযায়ী চিরকাল ভোগ করবে। (১০৩) (বিচার দিবসের) মহাভীতি তাদেরকে চিন্তিত করবে না আর দেবদূতগন তাদেরকে অভ্যর্থনা জানাবে। এই হল তোমাদের সেই দিন যে দিনের প্রতিশ্রুতি তোমাদেরকে দেওয়া হয়েছিল।

(১০৪) সেদিন আমি আকাশকে গুটিয়ে দেব যেমন ভাবে চর্মের কাগজ গুটানো হয়। যেভাবে প্রথমে আমি সৃষ্টির সূচনা করেছিলাম সেভাবেই তার

পুনরায় সৃষ্টি করবো। এটা আমার প্রতিশ্রুতি আর আমি এটা অবশ্যই করবো। (১০৫) আর ‘যবুর’ গ্রন্থে উপদেশের পর আমি লিখে দিয়েছি যে, পৃথিবীর উত্তরাধিকারী হবে আমার সৎকর্মপরায়ণ বান্দারা। (১০৬) নিশ্চয়ই এতে ধর্মপ্রান লোকদের জন্য একটি বাণী রয়েছে।

(১০৭) আর আমি তোমাকে বিশ্ববাসীর জন্য রহমত (করুণা) স্বরূপ পাঠিয়েছি। (১০৮) বলঃ আমার কাছে যে প্রত্যাদেশ আসে তা এই যে, তোমাদের উপাস্য কেবল মাত্র একজন উপাস্যই, তবে কি তোমরা অনুসরণকারী হবে? (১০৯) অতএব যদি তারা বিমুখ হয় তাহলে বলে দাও যে, আমি তো স্পষ্ট ভাবে জানিয়ে দিয়েছি। আর তাদেরকে যে অঙ্গীকার করা হচ্ছে তা কাছে না দূরে আমি জানি না। (১১০) নিঃসন্দেহে তিনি প্রকাশ্য কথা তো জানেনই, তোমরা যা গোপন কর তাও তিনি জানেন। (১১১) আমি জানি না, হয়ত এটা তোমাদের জন্য এক পরীক্ষা এবং সীমিত সুখভোগ। (১১২) পয়গম্বর বলেঃ হে আমার প্রভু! আপনি ন্যায্য বিচার করে দিন। আমাদের প্রভু করুণাময় এবং তোমরা যা কিছু বলছো সে বিষয়ে আমরা তাঁরই সাহায্য চাই।

অধ্যায় ২২ঃ আল হাজ্জ (তীর্থযাত্রা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে মানুষ! তোমরা প্রভুকে ভয় কর। নিঃসন্দেহে প্রলয় দিবসের কম্পন এক ভয়ানক ব্যাপার। (২) সেদিন তোমরা দেখবে যে, প্রত্যেক স্তন্যদাত্রী তার দুধের শিশুর কথা ভুলে যাবে এবং প্রত্যেক গর্ভবতীর গর্ভপাত হয়ে যাবে। আর তুমি মানুষকে নেশাগ্রস্তের মত দেখতে পাবে যদিও তারা নেশাগ্রস্ত থাকবে না। বস্তুতঃ ঈশ্বরের শাস্তি অত্যন্ত কঠোর।

(৩) মানুষের মধ্যে এমন মানুষও আছে যে ঈশ্বর সম্পর্কে না জেনে তর্ক করে এবং প্রত্যেক অব্যর্থ শয়তানের অনুসরণ করতে থাকে। (৪) তার সম্বন্ধে বিধিবদ্ধ হয়েছে, যে ব্যক্তি তাকে বন্ধু করবে সে তাকে পথভ্রষ্ট করে দেবে আর তাকে প্রজ্বলিত অগ্নির শাস্তির পথ দেখাবে।

(৫) হে মানুষ! পুনরুত্থান সম্বন্ধে যদি তোমাদের কোন সন্দেহ থাকে তাহলে জেনে রাখো, আমিই তো তোমাকে মাটি থেকে, তারপর শুক্রে থেকে, তারপর জমাট রক্তপিণ্ড থেকে, তারপর সুগঠিত ও সুগঠিত নয় এমন মাংসপিণ্ড থেকে সৃষ্টি করেছি। তোমাদের কাছে আমার ক্ষমতা প্রকাশ করার জন্যে; আমি যা চাই তা এক নির্দিষ্ট মেয়াদ পর্যন্ত মাতৃগর্ভে রেখে দিই। তারপর তোমাদের শিশু অবস্থায় বের করে আনি, পরে যাতে তোমরা যুবাবস্থায় উপনীত হও। আর তোমাদের মধ্যে কোন কোন ব্যক্তিকে শিষ্য মৃত্যু দান করা হয় আর কোন কোন ব্যক্তিকে জরাজীর্ণ বার্ধক্যে পৌঁছে দেওয়া হয়, যখন তারা তাদের জ্ঞাতবিষয়গুলি সম্পর্কে সজ্ঞান থাকে না। আর তুমি ভুমিকে শুষ্ক অবস্থায় দেখতে পাও, তারপর যখন আমি তাতে বৃষ্টি বর্ষণ করি তখন সে সজীব হয় আর বিভিন্ন রকম আকর্ষণীয় বস্তু উদ্গত করে। (৬) তা এই জন্য যে, ঈশ্বরই সত্য আর তিনি মৃতকে জীবিত করেন, তিনি সব কিছু করার ক্ষমতা রাখেন। (৭) আর মহাপ্রলয় অবশ্যম্ভাবী, এতে কোন সন্দেহ নেই, আর ঈশ্বর অবশ্যই ঐ লোকদের ওঠাবেন যারা সমাহিত আছে।

(৮) আর লোকেদের মধ্যে এমন ব্যক্তিও আছে যার কাছে কোন জ্ঞান পথনির্দেশ কিংবা দিক-নির্দেশনা প্রদানকারী গ্রন্থ না থাকা সত্ত্বেও সে ঈশ্বরের ব্যাপারে তর্ক করে। (৯) অহংকার করতে থাকে যাতে সে মানুষকে ঈশ্বরের পথ থেকে বিপথগামী করতে পারে। তার জন্য পার্থিব জীবনে অপমান আর মহাবিনাশের দিন আমি তাকে জলন্ত আগুনের স্বাদ আস্বাদন করাবো।

(১০) এটা তোমার নিজেদের কৃতকর্মের প্রতিফল, কারণ ঈশ্বর তাঁর বান্দাদের প্রতি অত্যাচার করেন না।

(১১) আর মানুষের মধ্যে এমন ব্যক্তিও আছে যে দ্বিধাগ্রস্ত অবস্থায় ঈশ্বরের উপাসনা করে। যদি তার লাভ হয়, তাহলে তাতে সন্তুষ্ট থাকে। আর যদি পরীক্ষা এসে পড়ে তাহলে তার পূর্বাবস্থায় ফিরে যায়। সে ইহলোক ও পরলোক দুটোই হারাল, এটাই হলো প্রকাশ্য ক্ষতি।

(১২) সে ঈশ্বরের পরিবর্তে এমন কিছুকে ডাকে যে তার কোন ক্ষতি করতে পারে না এবং তার কোন উপকারও করতে পারে না। এটাই হল চরম পথভ্রষ্টতা। (১৩) সে এমন জিনিষকে ডাকে যার ক্ষতি তার উপকার অপেক্ষা নিকটতর। কত নিকৃষ্ট এই অভিভাবক, কত নিকৃষ্ট এই সহচর। (১৪) যারা বিশ্বাস স্থাপন করেছে আর সৎকর্ম করেছে নিঃসন্দেহে ঈশ্বর তাদেরকে এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে। ঈশ্বর যা চান তাই করেন।

(১৫) যে ব্যক্তি মনে করে যে, ঈশ্বর তাকে (পয়গম্বরকে) পৃথিবীতে ও পরলোকে সাহায্য করবেন না, তার উচিৎ সে একটি রশি আকাশ পর্যন্ত টেনে দিক, পরে তা বিচ্ছিন্ন করুক আর দেখুক তার এই কৌশল তার ক্রোধ দূর করতে পারে কি না। (১৬) আর এভাবেই আমি কুরআনকে স্পষ্ট প্রমাণের সাথে অবতীর্ণ করেছি। আর নিঃসন্দেহে ঈশ্বর যাকে ইচ্ছা পথ দেখান।

(১৭) এতে কোন সন্দেহ নেই যে, যারা বিশ্বাস স্থাপন করেছে আর যারা ঈহুদী ধর্ম গ্রহণ করেছে, যারা সাবেয়ী, খৃষ্টান, অগ্নি পূজক এবং যারা বহুশ্বরবাদী, বিচার দিবসে ঈশ্বর তাদের বিষয়গুলি নিষ্পত্তি করবেন। নিশ্চয়ই ঈশ্বর সবকিছুর সম্যক প্রত্যক্ষদর্শী।

(১৮) তুমি কি দেখনি যে, যা কিছু আকাশ ও পৃথিবীতে আছে তারা

সবাই ঈশ্বরকে সিজদা (প্রণতি জ্ঞাপন) করে। সূর্য, চাঁদ, তারকারাজি, পাহাড়-পর্বত, গাছপালা, জীব-জন্তু এবং অনেক মানুষ। আবার অনেকেই আছে যাদের উপর শাস্তি ধার্য আছে। ঈশ্বর যাকে লাঞ্ছিত করেন তাকে সম্মান করার কেউ নেই। নিশ্চয় ঈশ্বর যা চান তাই করেন।

(১৯) এরা দুই প্রতি পক্ষ (সত্যে বিশ্বাস স্থাপনকারী ও সত্য অস্বীকারকারী) যারা তাদের প্রভু সম্পর্কে বিতর্ক করে। অতএব যারা অস্বীকার করে তাদের জন্য আগুনের পোশাক তৈরী করা হয়েছে। তাদের মাথায় ফুটন্ত জল ঢেলে দেওয়া হবে। (২০) এর দ্বারা তাদের পেটের বস্তুও গলে যাবে আর তাদের চামড়াও। (২১) আর ওদের জন্য ওখানে লোহার হাতুড়ি থাকবে। (২২) যখন তারা ঘাবড়ে গিয়ে সেখান থেকে বের হতে চাইবে তখন তাদের ধাক্কা দিয়ে সেখানে ফেরত পাঠানো হবে এবং বলা হবেঃ অগ্নিদহনের যন্ত্রণা আস্বাদন করো।

(২৩) যারা বিশ্বাস স্থাপন করে এবং সৎকর্ম করে, নিশ্চয়ই ঈশ্বর তাদের এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে। তাদেরকে সেখানে সোনার কঙ্কন আর মোতি পরানো হবে আর সেখানে তাদের পোশাক হবে রেশমের। (২৪) আর ওদেরকে পবিত্র কথার (তাওহীদের) পথ দেখানো হয়েছিল এবং প্রশংসিত ঈশ্বরের পথ দেখানো হয়েছিল।

(২৫) নিঃসন্দেহে যারা অস্বীকার করে আর যারা মানুষকে ঈশ্বরের পথে চলতে এবং সেই পবিত্র মসজিদে প্রবেশ করতে বাধা দেয় যাকে আমি সেখানকার স্থায়ী বাসিন্দা এবং বাহিরাগত সকলের জন্য অবাধ করেছি, এবং যারা তাদের মন্দ কাজের দ্বারা এটাকে অপবিত্র করতে চায়, আমি তাদের কষ্টপ্রদ যন্ত্রণাদায়ক শাস্তির স্বাদ আস্বাদন করাব।

(২৬) আর যখন আমি ইবরাহিমকে ঈশ্বরের ঘরের স্থান নির্ধারণ করে দিলাম এবং বললামঃ আমার সাথে কোন অংশীদার করবে না, আমার ঘরকে পরিক্রমাকারীদের জন্য, দৃঢ়ভাবে দণ্ডায়মানদের জন্য, মস্তক অবনত কারীদের জন্য এবং সিজদা (প্রণতিজ্ঞাপন) কারীদের জন্য পবিত্র রেখো।

(২৭) আর মানুষের মধ্যে তীর্থ যাত্রার কথা ঘোষণা করে দাও, তারা তোমার কাছে আসবে পায়ে হেঁটে আর সর্বপ্রকার ক্ষীণকায় উষ্ট্রসমূহের পিঠে আরোহন করে দূর-দূরান্ত থেকে। (২৮) যাতে তারা তাদের কল্যাণের জন্য উপস্থিত হতে পারে এবং নির্দিষ্ট দিনে ঈশ্বর তাদেরকে যে চতুষ্পদ জন্তুগুলি প্রদান করেছেন তার উপর তার প্রভুর নাম নিতে পারে। তারপর তোমরা এগুলি আহার কর এবং দুঃস্থ ও অভাবগ্রস্তদের আহার করাও। (২৯) তারপর তীর্থযাত্রীরা যেন তাদের অপরিচ্ছন্নতা অপসারণ করে, তাদের অঙ্গীকার পূর্ণ করে এবং প্রাচীন ঘর পরিক্রমা করে।

(৩০) এটাই ঈশ্বরের নির্দেশ এবং কেউ ঈশ্বরের পবিত্র বিধানসমূহের সম্মান করলে, তার প্রতিপালকের নিকট সেটা তার জন্য উত্তম। তোমাদের জন্য যা স্পষ্টভাবে নিষিদ্ধ করা হয়েছে তা ব্যতীত সব চতুষ্পদ জন্তু তোমাদের জন্য বৈধ করে দেওয়া হয়েছে। সুতরাং তোমরা বিগ্রহের অসারতা পরিহার কর এবং মিথ্যা বর্জন কর।

(৩১) ঈশ্বরের প্রতি একনিষ্ঠ হও, তার সাথে অংশীদার স্থাপন করো না। আর যে ঈশ্বরের সাথে অংশীদার স্থাপন করে সে যেন আকাশ থেকে পড়ল। আর পাখিরা তাকে ছোঁ মেরে নিয়ে গেল অথবা বাতাস তাকে কোন দূরবর্তী স্থানে নিক্ষেপ করলো।

(৩২) এটাই হল বিধান। আর যে ব্যক্তি ঈশ্বরের নিদর্শনসমূহকে সম্মান করে, সে তার অন্তরের নিষ্ঠা প্রদর্শন করে। (৩৩) এই পশুগুলি থেকে

তোমাদের জন্য এক নির্দিষ্ট মেয়াদ পর্যন্ত কিছু উপকারিতা আছে; অতঃপর তাদেরকে প্রাচীন ঘরের (কাবার) নিকট উৎসর্গ করতে হবে।

(৩৪) আর আমি প্রত্যেক সম্প্রদায়ের জন্য উৎসর্গ করা আবশ্যিক করে দিয়েছি, যাতে তারা যে পশুগুলো তিনি তাদের জীবনোপকরণ হিসাবে দিয়েছেন, তাদের উপর ঈশ্বরের নাম উচ্চারণ করতে পারে। তোমাদের উপাস্য তো একজনই। তার কাছে আত্মসমর্পণ কর এবং বিনয়ীদের সুসংবাদ দাও। (৩৫) যাদের পরিস্থিতি এমন যে, যখন ঈশ্বরের নাম নেওয়া হয় তখন অন্তর কেঁপে ওঠে, বিপদ এলে ধৈর্য ধারণ করে এবং প্রার্থনা করে ও তাদেরকে আমি যা কিছু দিয়েছি তা হতে ব্যয় করে।

(৩৬) আর উৎসর্গের উটগুলি আমি তোমাদের জন্য ঈশ্বরের অন্যতম নিদর্শন করেছি। এতে তোমাদের জন্যে কল্যাণ আছে। অতএব উৎসর্গের জন্য সারিবদ্ধ দণ্ডায়মান অবস্থায় ওদের উপর ঈশ্বরের নাম নাও। তারা যখন কাত হয়ে পড়ে যায়, তখন তোমরা তাদের থেকে আহার কর; এবং যারা চাইতে পারে না এমন অভাবগ্রস্ত এবং যারা চায় এমন অভাবগ্রস্তদের খাওয়াও। এই ভাবেই আমি ঐ পশুদের তোমাদের বশীভূত করে দিয়েছি, যাতে তোমরা কৃতজ্ঞতা প্রকাশ কর। (৩৭) তাদের মাংস বা রক্ত ঈশ্বরের কাছে পৌঁছায় না; বরং পৌঁছায় তোমাদের ঈশ্বরভক্তি। এভাবেই ঈশ্বর ওদেরকে তোমাদের বশীভূত করেছেন, যাতে তোমরা ঈশ্বরের প্রদত্ত দিক-নির্দেশনায় তারই গৌরব বর্ণনা কর আর সৎকর্মশীলদের সুসংবাদ দাও।

(৩৮) নিঃসন্দেহে ঈশ্বর সত্যে বিশ্বাস স্থাপনকারীদের রক্ষা করেন। নিঃসন্দেহে ঈশ্বর বিশ্বাসঘাতক অকৃতজ্ঞকে পছন্দ করেন না। (৩৯) যুদ্ধের অনুমতি তাদেরকে দেওয়া হল যাদের সাথে লড়াই করা হচ্ছে কারণ তাদের প্রতি অত্যাচার করা হয়েছে আর অবশ্যই ঈশ্বর তাদের সহায়তা করতে

সক্ষম। (৪০) যাদেরকে তাদের ঘর থেকে অকারণে বহিস্কার করা হয়েছে কেবল মাত্র এই জন্য যে তারা বলতঃ আমাদের প্রভু ঈশ্বর। আর ঈশ্বর যদি একদল মানুষকে আরেক দল দ্বারা প্রতিহত না করতেন তাহলে আশ্রম, গির্জা, সিনাগগ (ইহুদীদের উপসনালয়) ও মসজিদ সমূহ যেখানে ঈশ্বরের নাম অধিক পরিমাণে স্মরণ করা হয়, তা ভেঙে ফেলা হত। আর ঈশ্বর অবশ্যই তাদের সহায়তা করবেন যারা ঈশ্বরকে সহায়তা করে। নিঃসন্দেহে ঈশ্বর বড়ই শক্তিমান পরাক্রমশালী।

(৪১) এরাই সেই লোক যাদেরকে পৃথিবীতে যদি আমি ক্ষমতা দিই, তারা প্রার্থনা প্রতিষ্ঠা করবে, উদ্ধৃত সম্পদের থেকে অত্যাৱশ্যকীয় দান প্রদান করবে, ভালো কাজের আদেশ প্রদান করবে, আর মন্দ কাজে বাধা প্রদান করবে এবং ঈশ্বরের হাতেই সব কিছুর পরিণতি।

(৪২) তারা যদি তোমাকে অস্বীকার করে তাহলে জেনে রাখো ইতিপূর্বে নূহের (নোয়াহ'র) সম্প্রদায়, আদ ও সামুদ এর সম্প্রদায়ও অস্বীকার করেছিল। (৪৩) ইবরাহিম (আব্রাহাম) ও লূতের সম্প্রদায় ও। (৪৪) আর মাদইয়ানবাসীরা ও (অস্বীকার করেছিল তাদের পয়গম্বরদেরকে) এবং মূসাকেও (মোজেস) অস্বীকার করা হয়েছিল; আমি অস্বীকারকারীদের কিছুটা অবকাশ দিয়েছিলাম এবং তারপর আমি তাদেরকে শাস্তি দিয়েছিলাম। ভেবে দেখো কি ভীষণ ছিল আমাকে অস্বীকৃতির পরিণাম?

(৪৫) কত জনপদ আমি ধ্বংস করে দিয়েছি, আর তারা ছিল অত্যাচারী। অতএব এখন তাদের ছাদ ধ্বংস স্তূপে পরিণত হয়েছে। আর কত কূপ অকেজো হয়েছে। আর কত অট্টালিকা নির্জনে পড়ে আছে। (৪৬) এরা কি পৃথিবীতে পরিভ্রমণ করেনি? করলে তাদের অন্তর এমন হয়ে যেত যে, তারা বুঝতে পারত। তাদের কান এমন হয়ে যেত যে, তারা শুনতে পেত,

প্রকৃতপক্ষে চোখ তো অন্ধ নয়; বরং বক্ষস্থিত অন্তরই অন্ধ।

(৪৭) আর এরা তোমাকে শাস্তি ত্বরান্বিত করতে বলে, আর ঈশ্বর কখনই তাঁর প্রতিশ্রুতি রক্ষা থেকে পশ্চাদপদ হবেন না। আর তোমার প্রভুর একটি দিন তোমাদের গণনা অনুসারে এক হাজার বছরের সমান।

(৪৮) আর কত না জনপদকে আমি অবকাশ দিয়েছি তারা অত্যাচারী ছিল। তারপর তাদেরকে শাস্তি দিয়েছি। আর আমার কাছেই ফিরে আসতে হবে।

(৪৯) বলঃ হে মানুষ! আমি তোমাদের জন্য একজন স্পষ্ট সতর্ককারী।

(৫০) অতএব যারা বিশ্বাস স্থাপন করে এবং সৎকর্ম করে তাদের জন্য রয়েছে মার্জনা আর সম্মানজনক জীবিকা। (৫১) আর যারা আমার নিদর্শনসমূহের বিরুদ্ধে চক্রান্ত করে এবং তাদের উদ্দেশ্য ব্যর্থ করার প্রচেষ্টা চালায়, তাই হবে অগ্নিকুণ্ডের বাসিন্দা।

(৫২) তোমার পূর্বে আমি যত বার্তাবাহক ও পয়গম্বর পাঠিয়েছি তারা যখনই (আমার প্রত্যাদেশ থেকে) কিছু পাঠ করেছে, শয়তান তাদের পাঠকৃত অংশের কিছুটা বিকৃত করেছে। কিন্তু ঈশ্বর শয়তানের ঐ বিকৃতসমূহ বিলুপ্ত করেন এবং তাঁর প্রত্যাদেশসমূহ সুপ্রতিষ্ঠিত করেন। ঈশ্বর মহাজ্ঞানী, প্রজ্ঞাময়।

(৫৩) শয়তান যা বিকৃত করে, তার দ্বারা তিনি ঐ লোকদের যাচাই করেন যাদের অন্তরে ব্যাধি আছে এবং যাদের অন্তর কঠোর; অন্যায়কারীরা দুস্তর বিভ্রান্তিতে লিপ্ত আছে। (৫৪) তার ফলে, যাদেরকে জ্ঞান দেওয়া হয়েছে, তারা বুঝতে পারবে, এটা প্রকৃতপক্ষে তোমার প্রভুর পক্ষ থেকে আগত সত্য এবং তারা তাতে বিশ্বাস স্থাপন করবে। আর তাদের অন্তর তাঁর প্রতি অবনত হবে। আর ঈশ্বর অবশ্যই আস্থাবানদের সঠিক পথ দেখান।

(৫৫) আর অবিশ্বাসীরা এর ব্যাপারে সন্দেহ পোষন করতে থাকবে, এমন কি যদি তাদের উপর হঠাৎই মহাপ্রলয় আসে, অথবা এক অশুভ দিনের শাস্তি আসে।

(৫৬) সেদিন সব কতৃৎই হবে ঈশ্বরের, তিনিই তাদের বিচার করবেন। অতএব যারা বিশ্বাস স্থাপন করে এবং সৎকর্ম করে তারা অনুগ্রহের উদ্যানে থাকবে। (৫৭) আর যারা অবিশ্বাস করেছে ও আমার নিদর্শন সমূহকে মিথ্যা বলেছে তাদের জন্য রয়েছে লাঞ্ছনাকর শাস্তি।

(৫৮) আর যারা ঈশ্বরের পথে তাদের ঘর বাড়ি ত্যাগ করেছে তারপর যদি তারা নিহত হয় বা মারা যায়, ঈশ্বর অবশ্যই তাদের উত্তম জীবিকা দান করবেন। নিঃসন্দেহে ঈশ্বরই সর্বোত্তম জীবিকা প্রদানকারী। (৫৯) তিনি তাদেরকে এমন এক জায়গায় স্থান দেবেন যাতে তারা সন্তুষ্ট হবে। আর নিঃসন্দেহে ঈশ্বর সুবিজ্ঞ সহনশীল।

(৬০) এটাই হয়ে থাকে। আর যদি কোন ব্যক্তি নিপীড়িত হয়ে সমপরিমাণ প্রতিশোধ গ্রহণ করে এবং পুনরায় যদি সে নিপীড়িত হয় তাহলে ঈশ্বর অবশ্যই তাকে সাহায্য করবেন। ঈশ্বর অবশ্যই মার্জনাকারী ও ক্ষমাশীল।

(৬১) তা এজন্য যে, ঈশ্বর রাতকে দিনের মধ্যে এবং দিনকে রাতের মধ্যে প্রবেশ করান। আর ঈশ্বর তো সবকিছু শোনেন, সবকিছু দেখেন। (৬২) তা এজন্য যে, ঈশ্বরই সত্য আর ঈশ্বরের পরিবর্তে তারা যাকে ডাকে তা অসত্য। আর ঈশ্বরই সমুচ্চ, সুমহান।

(৬৩) তুমি কি দেখোনি যে, ঈশ্বর আকাশ থেকে বৃষ্টি বর্ষণ করেন তাই পৃথিবী সবুজ শ্যামল হয়ে উঠে। নিঃসন্দেহে ঈশ্বর সূক্ষ্মদর্শী, সর্বজ্ঞ। (৬৪) আকাশ ও পৃথিবীতে যা কিছু সবই তাঁর। নিঃসন্দেহে ঈশ্বর অমুখাপেক্ষী, প্রশংসনীয়।

(৬৫) তুমি কি দেখনি যে, ঈশ্বর পৃথিবীর সবকিছুকে তোমাদের সেবায় নিয়োজিত করে রেখেছেন, আর নৌযানগুলোকেও, এগুলো তাঁরই আদেশে সমুদ্রে চলাচল করে। আর ঈশ্বর আকাশকে পৃথিবীর উপর পতিত হওয়া

থেকে আটকে রেখেছেন। এসব তাঁরই আদেশ। নিঃসন্দেহে ঈশ্বর মানুষের জন্য করুণাময়, দয়ালু। (৬৬) আর তিনিই তোমাদেরকে জীবন দান করেছেন, তিনিই তোমাদের মৃত্যু দান করেন। আবার তিনিই তোমাদেরকে জীবিত করবেন। নিঃসন্দেহে মানুষ বড়ই অকৃতজ্ঞ।

(৬৭) আর আমি প্রত্যেক সম্প্রদায় জন্য নির্ধারিত করে দিয়েছি একটা উপাসনা পদ্ধতি যা তারা অনুসরণ করে। অতএব এব্যাপারে তারা যেন তোমার সাথে বিতর্ক না করে। তুমি তাদেরকে তোমার প্রতিপালকের দিকে আহ্বান কর। নিশ্চিতরূপে তুমি সঠিক পথেই আছ। (৬৮) যদি তারা তোমার সাথে বিতর্ক করে তাহলে বলঃ ঈশ্বরই ভালো জানেন যা তোমরা করছো। (৬৯) ঈশ্বর শেষ বিচারের দিন তোমাদের মধ্যে মীমাংসা করে দেবেন যা নিয়ে তোমরা মতভেদ করছো। (৭০) তুমি কি জানো না যে, আকাশ ও পৃথিবীতে যা কিছু আছে ঈশ্বর তা জানেন? সবকিছু একটি গ্রন্থে আছে। নিঃসন্দেহে এটা ঈশ্বরের জন্য সহজ।

(৭১) ঈশ্বরের পরিবর্তে তারা এমন কিছুর উপাসনা করে যার সম্বন্ধে ঈশ্বর কোন প্রমাণ পাঠাননি, আর সে সম্বন্ধে তাদের কোনো জ্ঞান নেই। আর অত্যাচারীদের কোন সাহায্যকারী নেই। (৭২) আর যখন তোমাকে আমার স্পষ্টবাণী সমূহ পড়ে শোনান হয়, তখন অস্বীকারকারীদের চেহারায় মন্দ লক্ষণ দেখতে পাও। যেন তারা ঐ লোকেদের উপর আক্রমণ করে দেবে, যে তাদেরকে আমার বাণী সমূহকে পড়ে শোনাচ্ছে। বলঃ আমি কি তোমাদের বলবো এর চেয়েও খারাপ জিনিস কি? তা হল আগুন। ওটা ঈশ্বর ঐ লোকেদের সাথে প্রতিশ্রুতি দিয়েছেন, যারা অস্বীকার করে, আর তা খুবই নিকৃষ্ট ঠিকানা!

(৭৩) হে মানুষ! একটি উদাহরণ বর্ণনা করা হচ্ছে এটাকে মন দিয়ে

শোন; তোমরা ঈশ্বরের পরিবর্তে যাদেরকে ডাক তারা একটি মাছিও সৃষ্টি করতে পারে না। যদি তারা সবাই এজন্য জোট বাঁধে তবুও। আর যদি মাছি ওদের কিছু ছিনিয়েও নেয় তারা তার কাছ থেকে তা উদ্ধার করতেও পারবে না। অস্বেষক এবং অস্বেষিত উভয়ে কতই না দুর্বল! (৭৪) তারা ঈশ্বরের যথাযথ মর্যাদা উপলব্ধি করেনি, যা উপলব্ধি করা একান্ত কর্তব্য। নিঃসন্দেহে ঈশ্বর ক্ষমতাবান, পরাক্রমশালী।

(৭৫) ঈশ্বর দেবদূতদের মধ্য থেকে তার বার্তাবাহক মনোনীত করেন, এবং মানুষের মধ্য থেকেও। নিঃসন্দেহে ঈশ্বর সবই শোনে, সবই দেখেন। (৭৬) তাদের সামনে যা কিছু আছে আর তাদের পিছনে যা কিছু আছে তা তিনি জানেন, আর সব ব্যাপারই ঈশ্বরের দিকে প্রত্যাবর্তন করে।

(৭৭) হে বিশ্বাসীগণ! অবনত হও ও সিজদা (প্রণতি জ্ঞাপন) কর এবং আপন প্রতি পালকের উপাসনা কর, আর ভাল কাজ কর যাতে তোমরা সফল হতে পারো। (৭৮) আর ঈশ্বরের পথে যথাযথভাবে সংগ্রাম কর। তিনিই তোমাকে মনোনীত করেছেন। আর ধর্মের ব্যাপারে তোমাদের উপর কোন কঠোরতা আরোপ করেন নি, এটা তোমাদের পিতা ইবরাহীমের (আব্রাহামের) ধর্ম। এর পূর্বে এবং এই গ্রন্থে তিনি তোমাদেরকে মুসলিম নাম দিয়েছেন, যাতে পয়গম্বর তোমাদের সাক্ষী হন এবং যাতে তোমরা মানবজাতির জন্য সাক্ষী হও। অতএব প্রার্থনা প্রতিষ্ঠা কর, এবং উদ্বৃত্ত সম্পদের থেকে অত্যাৱশ্যকীয় দান প্রদান কর। এবং ঈশ্বরকে দৃঢ়ভাবে ধারণ কর। তিনিই তোমাদের অভিভাবক। কতই না উত্তম অভিভাবক, কতই না উত্তম সাহায্যকারী!

অধ্যায় ২৩ : আল মু'মিনুন (আস্থাবানগণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) নিশ্চিত ভাবে আস্থাবানেরাই সফল। (২) যারা তাদের প্রার্থনায় নিয়োজিত হয়। (৩) যারা অসার কথা ও কাজ থেকে বিরত থাকে। (৪) আর যারা উদ্বৃত্ত সম্পদ থেকে আবশ্যিক দান প্রদান করে। (৫) যারা তাদের যৌনাঙ্গকে সংযত রাখে। (৬) তবে তাদের স্ত্রী অথবা অধিকারভুক্ত দাসীগণ ব্যতীত; এতে তারা নিন্দনীয় হবে না। (৭) তবে যারা এর অতিরিক্ত চায় তারাই সীমালংঘনকারী। (৮) আর যারা তাদের আমানত ও প্রতিশ্রুতি রক্ষা করে। (৯) যারা তাদের প্রার্থনায় যত্নবান হয়। (১০) এরাই হল স্বর্গের উত্তরাধিকারী। (১১) তারা স্বর্গের উত্তরাধিকারী হবে, সেখানে তারা চিরকাল থাকবে।

(১২) আর আমি মানুষকে মাটির সারাংশ থেকে সৃষ্টি করেছি। (১৩) তারপর আমি তাকে এক ফোঁটা তরল হিসাবে এক সংরক্ষিত আধারে স্থাপন করেছি। (১৪) তারপর তরলের ফোঁটাকে ভ্রূণের আকৃতি দিয়েছি। তারপর ভ্রূণকে মাংস পিণ্ডে পরিণত করেছি। তারপর মাংস পিণ্ডের ভিতরে হাড় সৃষ্টি করেছি, হাড়গুলোকে আবার মাংস দ্বারা আচ্ছাদিত করেছি। অবশেষে তাকে এক নতুন আকৃতিতে দাঁড় করিয়েছি। অতএব সর্বোত্তম সৃষ্টিকর্তা ঈশ্বর কত মহান। (১৫) এরপর অবশ্যই তোমরা মৃতুবরণ করবে। (১৬) তারপর পুনরুত্থান দিবসে আবার তোমাদেরকে ওঠানো হবে।

(১৭) আর আমি তোমাদের উপর সাতটি পথ সৃষ্টি করেছি, আর আমি তো সৃষ্টি সম্পর্কে অনবহিত নই। (১৮) আর আমি আকাশ থেকে পরিমাণ মতো বৃষ্টি বর্ষণ করেছি এবং তা মাটিতে সংরক্ষণ করে রেখেছি এবং ইচ্ছা

করলে আমি তা অপসারিত করতে সক্ষম। (১৯) অতঃপর আমি ঐ জল দ্বারা তোমাদের জন্য খেজুর ও আঙুরের বাগান তৈরী করেছি। তাতে তোমাদের জন্য অনেক ফল রয়েছে। আর তোমরা তা থেকে আহার করে থাকো। (২০) আর আমি ঐ বৃক্ষ সৃষ্টি করেছি যা সিনাই পর্বতে জন্মায়, যা আহারকারীদের জন্য ভোজ্য ও সুগন্ধী মশলা উৎপন্ন করে। (২১) গবাদী পশুর মধ্যেও তোমাদের জন্য শিক্ষণীয় বিষয় আছে। আমি তোমাদেরকে ওদের উদরের জিনিস পান করাই এবং তোমাদের জন্য এতে অনেক উপকার রয়েছে। তোমরা তাদের কিছু কিছু আহার কর। (২২) তোমরা ওদের পিঠে ও নৌয়ানে আরোহণও করে থাক।

(২৩) আর আমি নূহকে (নোয়াহ) তার সম্প্রদায়ের কাছে পাঠালাম। সে বললঃ হে আমার সম্প্রদায়! তোমরা ঈশ্বরের উপাসনা কর। তিনি ছাড়া তোমাদের জন্য কোন উপাস্য নেই। তোমরা কি ভয় কর না? (২৪) তার সম্প্রদায়ের অবিশ্বাসীদের নেতারা বললঃ এতো তোমাদের মতোই একজন মানুষ। সে তোমাদের উপর শ্রেষ্ঠত্ব লাভ করতে চায়। ঈশ্বর চাইলে তো দেবদূতই পাঠাতে পারতেন। আমরা আমাদের পূর্বপুরুষদের মুখে এইরূপ কিছু শুনি নি। (২৫) এ তো এমন এক লোক যে, উন্মাদ হয়ে গেছে। অতএব তোমরা তার ব্যাপারে কিছুকাল অপেক্ষা কর।

(২৬) নূহ (নোয়াহ) বললঃ হে আমার প্রভু! আপনি আমাকে সাহায্য করুন। কারণ এরা আমাকে অবিশ্বাস করেছে। (২৭) তখন আমি তাকে প্রত্যাদেশ পাঠালাম যে, তুমি আমার পর্যবেক্ষণে এবং আমার নির্দেশ অনুযায়ী নৌকা তৈরী কর। যখন আমার নির্দেশ আসবে এবং ভূমি থেকে জল উঠলে উঠবে তখন প্রত্যেক প্রকার জীবের এক এক জোড়া নিয়ে তাতে আরোহণ কর। আর তোমার পরিবার পরিজনদেরও (নিও)। তবে তাদের মধ্যে থেকে যাদের বিরুদ্ধে পূর্বে সিদ্ধান্ত হয়ে আছে তাদেরকে নয়। আর যারা অন্যায় করেছে তাদের ব্যাপারে

আমাকে কিছু বলো না। তারা অবশ্যই নিমজ্জিত হবে।

(২৮) তুমি ও তোমার সঙ্গীরা যখন নৌকায় উঠে বসবে তখন বলঃ সকল প্রশংসা ঈশ্বরের যিনি আমাদেরকে অত্যাচারী সম্প্রদায় হতে রক্ষা করেছেন। (২৯) আর বলঃ হে আমার প্রভু! আমাকে এমনভাবে অবতরণ করিয়ে নিন যা হবে কল্যাণকর; আর আপনিই শ্রেষ্ঠতম অবতরণকারী। (৩০) নিঃসন্দেহে এতে নিদর্শন আছে আর নিঃসন্দেহে আমি বান্দাদের পরীক্ষা নিয়ে থাকি।

(৩১) অতঃপর তাদের পরে আমি আর এক প্রজন্মকে সৃষ্টি করলাম। (৩২) তারপর তাদের মধ্য থেকে তাদের পয়গম্বরকে তাদের মাঝেই পাঠালাম! সে বললঃ তোমরা ঈশ্বরের উপাসনা কর। তিনি ছাড়া তোমাদের কোনই উপাস্য নেই। তোমরা কি ভয় কর না? (৩৩) তার সম্প্রদায়ের অবিশ্বাসীদের নেতারা যারা পরলোকের পুনরুত্থান অস্বীকার করেছিল, আর যাদেরকে আমি সাংসারিক জীবনে সম্পন্নতা প্রদান করেছিলাম তারা বলেছিলঃ এতো আমাদের মতোই একজন মানুষ, সে তাই আহার করে যা তোমরা আহার করো, আর তাই পান করে যা তোমরা পান করো। (৩৪) আর যদি তোমরা তোমাদের মতোই একজন মানুষের কথা মানো তাহলে অবশ্যই ক্ষতিগ্রস্ত হবে।

(৩৫) সে কি তোমাদের এই প্রতিশ্রুতিই দেয় যে, যখন তোমাদের মৃত্যু হবে এবং তোমরা মৃত্তিকা ও অস্থিতে পরিনত হবে, তখন তোমাদেরকে পুনরুত্থিত করা হবে? (৩৬) অসম্ভব, তোমাদেরকে যে বিষয়ের প্রতিশ্রুতি দেওয়া হচ্ছে তা অসম্ভব। (৩৭) জীবন তো এই আমাদের পার্থিব জীবন। আমরা মরি ও বাঁচি এখানেই। আমাদের পুনরুত্থিত হবো না। (৩৮) সে তো এমন একটা লোক, যে ঈশ্বরের নামে মিথ্যা বানিয়ে বলছে; আমরা তাকে বিশ্বাস করবো না।

(৩৯) পয়গম্বর বললঃ হে আমার প্রভু! আমাকে সাহায্য করুন এরা আমাকে অবিশ্বাস করছে। (৪০) বললেনঃ এরা শীঘ্রই অনুতপ্ত হবে।

(৪১) অতঃপর এক বিকট শব্দ তাদেরকে যথাযথ ভাবে আঘাত করল। তারপর আমি ওদেরকে অবর্জনার স্তূপে পরিণত করে দিলাম। অতএব অত্যাচারী সম্প্রদায় দূর হয়ে গেল।

(৪২) অতঃপর তাদের পরে আমি বহু সম্প্রদায় সৃষ্টি করেছি। (৪৩) কোন জাতি তার নির্ধারিত সময়কে ত্বরান্বিত বা বিলম্বিত করতে পারে না। (৪৪) অতঃপর আমি একের পর এক পয়গম্বর পাঠিয়েছি। যখনই কোন সম্প্রদায়ের কাছে তাদের পয়গম্বর এসেছে তখন তারা তাকে অবিশ্বাস করেছে। আমিও তাদেরকে একের পর এক ধ্বংস করে দিয়েছি এবং তাদেরকে ইতিহাসে পরিণত করেছি। অতএব দূর হয়ে যাক অবিশ্বাসীরা!

(৪৫) অতঃপর আমি আমার স্পষ্ট নিদর্শন ও প্রমাণসহ মুসা (মোজেস) ও তার ভাই হারুনকে (অ্যারন) পাঠিয়েছি। (৪৬) ফ্যারাও ও তার পারিষদবর্গের নিকট, কিন্তু তারা অহংকারপূর্ণ আচরণ করল। আর তারা ছিল এক উদ্ধত জনগোষ্ঠী। (৪৭) তারা বললঃ আমরা কি আমাদের মতো দুজন মানুষের কথা মেনে নেব, অথচ এদের সম্প্রদায়ের লোকেরা আমাদের দাস। (৪৮) এভাবেই তারা তাদেরকে অবিশ্বাস করল এবং তাদেরকে ধ্বংস করে দেওয়া হল। (৪৯) আর আমি মুসাকে (মোজেসকে) গ্রন্থ দিয়েছিলাম যাতে তারা পথ পায়।

(৫০) আর আমি মারইয়ামের (মেরী) পুত্র ইসা (যীশু) ও তার মাকে একটি নিদর্শন বানিয়েছিলাম এবং তাদেরকে আমি এক উচ্চভূমিতে আশ্রয় দিয়েছিলাম যা ছিল শান্তির স্থান, আর সেখানে এক বিশুদ্ধবরণাধারা প্রবাহিত ছিল।

(৫১) হে পয়গম্বরগণ! স্বাস্থ্যকর বস্তু আহার কর আর সংকাজ কর। তোমরা যা কর সে বিষয়ে আমি সবিশেষ অবহিত। (৫২) আর এটাই তোমাদের ধর্ম, একই ধর্ম। আর আমি তোমাদের প্রভু; অতএব আমাকে ভয় কর।

(৫৩) কিছু মানুষেরা তাদের ধর্মকে বহু ভাগে বিভক্ত করে নিয়েছে। প্রত্যেক

সম্প্রদায়ের কাছে যা কিছু আছে তাতেই তারা মগ্ন। (৫৪) অতএব তাদেরকে তাদের অজ্ঞতার মধ্যে কিছুদিন থাকতে দাও। (৫৫) তারা কি মনে করে যে, আমি তাদেরকে যে সম্পত্তি ও সম্ভান দিয়ে যাচ্ছি (৫৬) তাতে আমি ওদের কল্যাণসাধনে সক্রিয়; বরং তারা বোঝে না।

(৫৭) নিঃসন্দেহে যারা তাদের প্রভুর ভয়ে ভীত থাকে, (৫৮) যারা তাদের প্রভুর নিদর্শন সমূহ বিশ্বাস করে, (৫৯) যারা তাদের প্রভুর সাথে অংশীদার করে না, (৬০) কোন কিছু দান করার সময়, তারা যে তাদের ভীত কম্পিত হৃদয়ে একারনে দান করে যে তারা তাদের পালনকর্তার কাছে প্রত্যা বর্তন করবে। (৬১) এরাই সংকর্ম করার ব্যাপারে একে ওপরের সাথে প্রতিযোগীতা করছে এবং তারা তাতে অগ্রগামী থাকে। (৬২) আর আমি কাউকে সাধ্যের অতীত বোঝা চাপাইনা এবং আমার কাছে একটি গ্রন্থ আছে যা সঠিক তথ্য প্রদান করে, তাদের প্রতি কোন অবিচার করা হবে না।

(৬৩) বরং এর ব্যাপারে তাদের অন্তরসমূহ অজ্ঞানতায় আচ্ছন্ন। এছাড়া তাদের আরও অতিরিক্ত কাজ আছে যা তারা করে থাকে। (৬৪) এক পর্যায়ে যখন আমি তাদের অবস্থা সম্পন্ন লোকেদের শাস্তি দ্বারা পাকড়াও করবো তখন তারা ফরিয়াদ করতে থাকবে। (৬৫) এখন ফরিয়াদ করো না; এখন আমার পক্ষ থেকে তোমাকে কোন সাহায্য করা হবে না। (৬৬) তোমাকে আমার বাণী সমূহ শোনান হত, তখন তোমরা পিছন ফিরে পালাতে (৬৭) দম্ভভরে, যেন কোন গল্পকারের গল্প না শুনে পালিয়ে যাচ্ছ।

(৬৮) তবে কি তারা ঈশ্বরের এই বাণী অনুধাবন করে না? অথবা তাদের কাছে যা এসেছে, তেমন তাদের পূর্বপুরুষদের কাছে আসেনি? (৬৯) অথবা তারা কি তাদের পয়গম্বরকে চিনতে পারিনি, তাই তারা তাকে অস্বীকার করছে? (৭০) নাকি তারা বলে যে, এর মধ্যে উন্মত্ততা আছে; বরং সে তাদের কাছে সত্য নিয়ে এসেছে। তাদের অধিকাংশই সত্যকে অপছন্দ করে।

(৭১) আর সত্য যদি তাদের ইচ্ছাধীন হত তাহলে আকাশ ও পৃথিবীতে যা কিছু আছে সবই বিপর্যস্ত হয়ে যেত। বরং আমি তাদের অভিজ্ঞান দান করেছি; কিন্তু তারা তাদের সেই অভিজ্ঞান থেকে বিমুখ হচ্ছে।

(৭২) তুমি কি তাদের কাছে কোন প্রতিদান চাইছো? তাহলে তোমার প্রভুর প্রতিদানই তোমার জন্য শ্রেষ্ঠ আর তিনিই শ্রেষ্ঠ প্রতিদান প্রদানকারী।

(৭৩) আর নিঃসন্দেহে তুমি তাদেরকে এক সরল পথের দিকে আহ্বান করছো।

(৭৪) আর যারা পরলোক বিশ্বাস করে না, তারা এই পথ থেকে বিচ্যুত।

(৭৫) আমি যদি তাদের প্রতি দয়া করি আর তাদের কষ্ট দূর করি তবুও তারা তাদের অবাধ্যতায় বিভ্রান্তের মতো ঘুরতে থাকবে। (৭৬) আমি তাদের শাস্তি দ্বারা পাকড়াও করলাম; কিন্তু তারা তাদের প্রভুর কাছে নতিস্বীকার করেনি এবং মিনতিও করেনি। (৭৭) এমনকি যখন আমি তাদের উপরে আমার কঠিন শাস্তির দুয়ার খুলে দেব তখন তারা হতভস্ত হয়ে যাবে।

(৭৮) আর তিনিই তোমাদের জন্য কান, চোখ ও অন্তর সৃষ্টি করেছেন। তোমরা খুবই কম কৃতজ্ঞতা প্রকাশ কর! (৭৯) তিনিই তোমাদের

১ বিঃদ্রঃ-(২৩ঃ ৭৮) এই বিশ্বব্রহ্মাণ্ডে মানবজাতি ঈশ্বরের এক অনন্য সৃষ্টি যাদেরকে শ্রবণ, দর্শন ও চিন্তনের অসাধারণ ক্ষমতা দেওয়া হয়েছে। একটি বিশেষ উদ্দেশ্যে এই ক্ষমতাগুলি মানুষকে দেওয়া হয়েছে - সেটি হল, জীবনের উদ্দেশ্য অনুধাবন করা। সে তার কান দিয়ে সত্যের বাণী শ্রবণ করবে। তার চারপাশে ঈশ্বরের যে অপার নিদর্শন সমূহ বিস্তীর্ণ হয়ে আছে সেগুলি তার চোখ দিয়ে সে অবলোকন করবে। এই সমস্ত কিছু গভীরভাবে অনুধাবন করার জন্য সে তার চিন্তাশক্তি ব্যবহার করবে। বস্তুত এভাবেই চক্ষু, কর্ণ ও অন্তরের কৃতজ্ঞতা প্রকাশ করা হয়। যারা এইভাবে কৃতজ্ঞতা প্রকাশ করার কোন ইচ্ছা প্রকাশ করে না, তাদের চিরকালের জন্য এই উপহারগুলি হারানোর সম্ভাবনা থাকে।

পৃথিবীতে ছড়িয়ে দিয়েছেন এবং তাঁরই কাছে তোমাদেরকে একত্রিত করা হবে। (৮০) তিনিই জীবন দেন ও মৃত্যু ঘটান এবং রাত দিনের পরিবর্তন তাঁরই ইচ্ছায়। তবুও কি তোমরা বুঝবে না?

(৮১) বরং তারা সেই কথাই বলে যা পূর্ববর্তী লোকেরা বলেছিল।

(৮২) তারা বলেঃ মৃত্যুর পর যখন মুক্তিকা ও অস্থি হয়ে যাব, তখন কী আমরা পুনরুত্থিত হবো? (৮৩) এই প্রতিশ্রুতি আমাদের পূর্বে আমাদের পূর্বপুরুষদেরও করা হয়েছে। এটা কেবল পূর্ববর্তীদের গল্পকাহিনী ছাড়া কিছুই নয়।

(৮৪) বলঃ এই পৃথিবী এবং এতে যা কিছু আছে তা কার? যদি তোমরা জান। (৮৫) তারা বলবেঃ ঈশ্বরের। বলঃ তবুও তোমরা চিন্তা কর না? (৮৬) বলঃ কে সপ্ত আকাশের মালিক আর কে মহাসিংহাসনের মালিক? (৮৭) তারা বলবেঃ সবই ঈশ্বরের, বলঃ তবুও কি তোমরা ভয় করবে না? (৮৮) বলঃ কে সেই সত্ত্বা যার হাতে সব কিছুর কতৃত্ব, আর যিনি আশ্রয় দেন যার মোকাবিলায় কেউই আশ্রয় দিতে পারে না, যদি তোমরা জান। (৮৯) তারা বলবেঃ এ ঈশ্বরেরই। বলঃ তাহলে কিভাবে তোমরা বিভ্রান্ত হচ্ছো?

(৯০) বরং আমি তাদের কাছে সত্য উপস্থিত করেছি, আর নিঃসন্দেহে তারা মিথ্যাবাদী। (৯১) ঈশ্বর কোন সন্তান গ্রহণ করেন নি তাঁর সাথে অন্য কোন উপাস্যও নেই। যদি এমন হত তাহলে প্রত্যেক উপাস্য তার সৃষ্টি নিয়ে আলাদা আলাদা হয়ে যেত এবং একজন আর একজনের উপরে স্থান করে নিত। (৯২) তিনি প্রকাশ্য ও গোপন সবকিছুর জ্ঞান রাখেন। এরা যাকে অংশীদার করে তিনি তার অনেক উর্দে।

(৯৩) বলঃ হে আমার প্রভু! এদের যে (শাস্তির) বিষয়ে সতর্ককরা

হয়েছে, তা যদি আমাকে দেখিয়ে দিতেন। (৯৪) হে প্রভু! তবে আমাকে অত্যাচারীদের অন্তর্ভুক্ত করবেন না। (৯৫) এদেরকে যে বিষয়ে সতর্ক করা হচ্ছে তা আমি তোমাকে দেখাতে অবশ্যই সক্ষম।

(৯৬) মন্দেরমোকাবিলা কর উত্তম দ্বারা। তারা যা বলে আমি সে বিষয়ে সবিশেষ অবগত। (৯৭) আর বলঃ হে আমার প্রভু! শয়তানের কুমন্ত্রণা থেকে আমি আপনার আশ্রয় চাই। (৯৮) হে প্রভু! আমার কাছে তাদের উপস্থিতি থেকে আপনার আশ্রয় চাই।

(৯৯) অবশেষে যখন তাদের মধ্যে কারো মৃত্যু উপস্থিত হয় তখন সে বলেঃ প্রভু আমাকে ফেরৎ পাঠান। (১০০) যাতে আমি কিছু সৎকর্ম করতে পারি যা আমি পূর্বে করি নি। কখনই নয়, এটা কেবল একটা অর্থহীন কথা যা সে বলে। আর পুনরুত্থান দিবস পর্যন্ত তাদের মাঝে একটা প্রতিবন্ধকতা থাকবে। (১০১) তারপর যখন মহাশঙ্খে ফুৎকার দেওয়া হবে তখন পরস্পরের মধ্যে সম্পর্ক থাকবে না এবং কেউ কারো খোঁজখবর নেবে না। (১০২) যাদের সৎকর্মের পাল্লা ভারী হবে তারাই সফলকাম হবে। (১০৩) আর যাদের পাল্লা হালকা হবে তারাই সেই লোক যারা নিজেরাই নিজেদের ক্ষতি করেছে, তারা চিরকাল নরকে থাকবে। (১০৪) আগুন তাদের চেহারা ঝলসে দেবে এবং সেখানে তাদের রূপ বিভৎস হবে।

(১০৫) তোমাদেরকে আমার বাণী সমূহ পাঠ করে শোনান হতো না? অথচ তোমরা তা অবিশ্বাস করতে। (১০৬) তারা বলবেঃ হে প্রভু! আমাদের দুর্ভাগ্য আমাদেরকে পরাভূত করেছিল এবং আমরা ছিলাম এক বিভ্রান্ত জনগোষ্ঠী। (১০৭) হে আমাদের প্রভু! আমাদেরকে এই অগ্নি হতে উদ্ধার করুন; অতঃপর আমরা যদি পুনরায় পাপের কাজ করি তাহলে অবশ্যই আমরা অত্যাচারী বলে গণ্য হব।

(১০৮) ঈশ্বর বলবেনঃ তোমরা বিকৃত অবস্থায় এখানেই পড়ে থাক, আর আমার সাথে কথা বলো না।

(১০৯) আমার বান্দাদের মধ্যে একটা দল ছিল যারা বলতঃ হে আমার প্রভু! আমরা বিশ্বাস স্থাপন করেছি, অতএব আপনি আমাদের ক্ষমা করে দিন। আর আমাদের প্রতি দয়া করুন। আপনি তো শ্রেষ্ঠ দয়াকারী। (১১০) কিন্তু তোমরা তাদেরকে এমন উপহাসের পাত্র বানিয়েছিলে যে তোমরা নিজেরাই আমার স্মরণ নিতে ভুলে গিয়েছিলে। তোমরা তাদেরকে নিয়ে কেবল উপহাসই করছিলে। (১১১) আমি আজ তাদের ঋণের প্রতিদান দিলাম, আজ তারাই সফল।

(১১২) বলা হবেঃ বছরের হিসাবে তোমরা কতদিন পৃথিবীতে ছিলে? (১১৩) তারা বলবেঃ আমরা একদিন ছিলাম অথবা একদিনের চেয়েও কম। তুমি গণনাকারীদেরকে জিজ্ঞাসা করে দেখ। (১১৪) তিনি বলবেনঃ তোমরা অল্পকালই অবস্থান করেছিলে, যদি তোমরা জানতে।

(১১৫) তোমরা কি মনে কর যে, আমি তোমাদের উদ্দেশ্যহীন ভাবে সৃষ্টি করেছি এবং তোমাদেরকে আমার কাছে ফিরিয়ে আনা হবে না? (১১৬) ঈশ্বর মহিমান্বিত, যিনি প্রকৃত অধিপতি, তিনি ছাড়া কোন উপাস্য নাই। তিনি মহাসিংহাসনের মালিক (১১৭) আর যে ব্যক্তি ঈশ্বরের পরিবর্তে অন্য কোন উপাস্যকে ডাকে, যাদের স্বপক্ষে তাদের কাছে কোন প্রমাণ নেই, তার হিসাব তার প্রভুর কাছে আছে। অবশ্যই অস্বীকারকারীরা সফল হবে না। (১১৮) আর বলঃ হে আমার প্রভু! আমাকে ক্ষমা করে দিন আর আমার উপর দয়া করুন। আপনিই তো শ্রেষ্ঠ দয়াকারী।

অধ্যায় ২৪ : আন্-নূর (জ্যোতি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) এটা একটি অধ্যায় যা আমি অবতীর্ণ করেছি আর আমি এটাকে আবশ্যপালনীয় করেছি আর এতে আমার স্পষ্টবাণী সমূহ অবতীর্ণ করেছি। যাতে তোমরা মনে রাখ। (২) ব্যভিচারিণী মহিলা আর ব্যভিচারী পুরুষ দুজনের প্রত্যেককে একশত বার বেত্রাঘাত কর। আর ঈশ্বরের বিধান কার্যকর করতে তোমরা যেন তাদের প্রতি দয়া পরবশ না হও, যদি তোমরা ঈশ্বর ও পরলোকে বিশ্বাসী হয়ে থাক। আর দু'জনকে দণ্ড দেওয়ার সময় বিশ্বাসীদের একটি দল যেন সেখানে উপস্থিত থাকে। (৩) ব্যভিচারী পুরুষ কেবল ব্যভিচারিণী নারীকে অথবা বহুশ্বরবাদী নারীকে বিবাহ করবে; ব্যভিচারিণী নারীকে ব্যভিচারী পুরুষ অথবা বহুশ্বরবাদী পুরুষ বিবাহ করবে। বিশ্বাসীদের জন্য এদেরকে বিবাহ করা অবৈধ করে দেওয়া হয়েছে।

(৪) যারা সাধ্বী নারীদের নামে অপবাদ দেয়, এবং চারজন সাক্ষী হাজির করতে পারে না, তাদেরকে আশি বার বেত্রাঘাত কর এবং কখনও তাদের সাক্ষ্য গ্রহণ করবে না, এরাই অবজ্ঞাকারী। (৫) তবে পরে যদি তারা অনুশোচনা করে এবং নিজেদেরকে শুধরে নেয় তাহলে ঈশ্বর ক্ষমাশীল দয়ালব।

(৬) যদি কেউ তার স্ত্রীর নামে অপবাদ আরোপ করে এবং সে ব্যতীত যদি কোন সাক্ষী না থাকে, সে ঈশ্বরের নামে শপথ করে চার বার বলবে, যে তার অভিযোগ সত্য। (৭) এবং পঞ্চমবারে বলবে যে, সে মিথ্যা বললে তার উপর ঈশ্বরের অভিসম্পাত পড়বে। (৮) আর স্ত্রীর শাস্তি রহিত হয়ে যাবে যদি সে ঈশ্বরের নামে শপথ করে চার বার বলে, যে তার স্বামীর

অভিযোগ মিথ্যা। (৯) আর পঞ্চমবারে বলবে যে, যদি স্বামীর কথা সত্য হয় তাহলে তার (স্ত্রীর) উপর ঈশ্বরের ক্রোধ আপতিত হবে। (১০) যদি তোমাদের উপর ঈশ্বরের কৃপা এবং দয়া না থাকত (তাহলে তোমরা দুর্দশাগ্রস্ত হতে)। নিশ্চই ঈশ্বর অনুশোচনা গ্রহণকারী ও প্রজ্ঞাময়।

(১১) যারা এই অপবাদ রচনা করেছে তারা তো তোমাদেরই একটি দল। এটাকে তোমরা তোমাদের জন্য দুর্ভাগ্যজনক মনে কর না, বরং এটি তোমাদের জন্য মঙ্গলজনক। তাদের জন্য রয়েছে তাদের দ্বারা কৃত মন্দ কর্মের ফল এবং তাদের মধ্যে যে এই ব্যাপারে মূল ভূমিকা গ্রহণ করেছিল, তার জন্য আছে কঠিন শাস্তি।

(১২) যখন তোমরা এটা শুনলে তখন সত্যে বিশ্বাস স্থাপনকারী নারী পুরুষেরা কেন নিজেদের লোকেদের সম্পর্কে ভাল ধারণা করলে না? আর কেন বললে না এটা একটা স্পষ্ট মিথ্যা? (১৩) এ ব্যাপারে কেন তারা চারজন সাক্ষী হাজির করল না? যেহেতু তারা সাক্ষী হাজির করেনি, সেইহেতু ঈশ্বরের নিকট তারাই মিথ্যাবাদী।

(১৪) আর যদি তোমাদের উপর পার্থিব জগতে এবং পরলোকে ঈশ্বরের অনুগ্রহ ও দয়া না থাকত তাহলে তোমরা যে কথা উচ্চারণ করেছ তার জন্য তোমাদের উপর কোন গুরুতর শাস্তি আসত। (১৫) যখন তোমরা তোমাদের মুখে একথা উল্লেখ করছিলে, তোমাদের মুখ দিয়ে এমন কথা বলছিলে যে সম্বন্ধে তোমাদের কোন জ্ঞান ছিল না। তোমরা এটাকে একটা সাধারণ বিষয় মনে করেছিলে; অথচ ঈশ্বরের কাছে এটা একটা গুরুতর ব্যাপার। (১৬) তোমরা যখন এটা শুনলে তখন বললে না কেন যে, এ বিষয়ে আমাদের কথা বলার অধিকার নেই। ঈশ্বর পবিত্র, মহান! এটা তো এক গুরুতর অপবাদ। (১৭) ঈশ্বর তোমাদেরকে উপদেশ দিচ্ছেন যেন তোমরা পুনরায়

এই রকম কাজ না কর, যদি তোমরা সত্যে বিশ্বাস স্থাপনকারী হও। (১৮) ঈশ্বর তোমাদের স্পষ্ট নির্দেশ দিচ্ছেন আর ঈশ্বর মহাজ্ঞানী, প্রজ্ঞাময়।

(১৯) নিঃসন্দেহে যারা চায় আস্থাবানদের মধ্যে অলীলতার চর্চা হোক, তাদের জন্য ইহলোক ও পরলোকে যত্ননাদায়ক শাস্তি রয়েছে। ঈশ্বর জানেন তোমরা জান না। (২০) যদি তোমাদের উপর ঈশ্বরের অনুগ্রহ এবং দয়া না থাকত তাহলে দেখতে তোমাদের কি অবস্থা হত? নিশ্চই ঈশ্বর স্নেহপরায়ণ ও অতি দয়ালু।

(২১) হে বিশ্বাসীগণ! তোমরা শয়তানের পদাঙ্ক অনুসরণ কর না। আর যে ব্যক্তি শয়তানের পদাঙ্ক অনুসরণ করবে তাকে তো শয়তান অলীলতা ও মন্দ কাজে প্ররোচিত করবেই। আর যদি তোমাদের উপর ঈশ্বরের কৃপা ও দয়া না থাকত তাহলে তোমাদের কেউই পবিত্র হতে পারতে না; তবে ঈশ্বরই যাকে চান পবিত্র করে দেন। আর ঈশ্বর সব জানেন সব শোনেন।

(২২) আর তোমাদের মধ্যে যারা উচ্চ মর্যদা ও অবস্থা সম্পন্ন তারা যেন এবিষয়ে শপথ না করে যে, তাদের আত্মীয়-স্বজনকে, নিঃস্বদেরকে এবং ঈশ্বরের পথে দেশ ত্যাগীদের দান করবো না। তারা যেন ক্ষমা করে আর দোষত্রুটি উপেক্ষা করে। তোমরা কি চাওনা যে, ঈশ্বর তোমাদের ক্ষমা করুন। আর ঈশ্বর ক্ষমাশীল পরম দয়ালু।

(২৩) যারা সতী-সাধবী, সরলমনা আস্থাবান নারীদের প্রতি মিথ্যা অপবাদ আরোপ করে তারা ইহকালে এবং পরকালে অভিশপ্ত আর তাদের জন্য রয়েছে কঠোর শাস্তি। (২৪) সেই দিন তাদের বিরুদ্ধে সাক্ষী দেবে তাদের জিহ্বা, তাদের হাত ও পা, তাদের কৃতকর্ম সম্পর্কে। (২৫) সেদিন ঈশ্বর তাদের যথার্থ কর্মফল পুরোপুরি দেবেন। তারা জানবে ঈশ্বরই সত্য এবং সব কিছু প্রকাশকারী।

(২৬) ব্যভিচারিণী মহিলা ব্যভিচারী পুরুষদের জন্য, আর ব্যভিচারী পুরুষ ব্যভিচারিণী মহিলাদের জন্য। আর পবিত্র চরিত্রের মহিলা পবিত্র চরিত্রের পুরুষদের জন্য। লোকেরা যা বলে এরা তা থেকে সম্পূর্ণ নির্দোষ। ওদের জন্য ক্ষমা আর সম্মাজনক জীবিকা।

(২৭) হে বিশ্বাসীগণ! তোমরা নিজেদের গৃহ ব্যতীত অন্য কারো গৃহে প্রবেশ করো না, যতক্ষণ না তাদের অনুমতি মেলে এবং ঘরের লোকদের অভিবাদন না কর; এটাই তোমাদের জন্য উত্তম, সম্ভবত তোমরা উপদেশ গ্রহণ করবে। (২৮) গৃহে যদি কাউকে না পাও তাহলে তাতে প্রবেশ করবে না, যতক্ষণ না তোমাদের অনুমতি দেওয়া হয়। আর যদি তোমাদের বলা হয় ফিরে যাও তাহলে তোমরা ফিরে যাবে। এটাই তোমাদের জন্য উত্তম। আর তোমরা যা কর ঈশ্বর জানেন। (২৯) আর যেসব গৃহে কেউ বাস করে না সেখানে প্রবেশ করলে তোমাদের কোন পাপ নেই, যদি সেটি তোমাদের কোন উদ্দেশ্য সাধন করে। তোমরা যা প্রকাশ কর আর যা গোপন কর ঈশ্বর তা জানেন।

(৩০) মোমিন (আস্থাবান) পুরুষদের বলঃ তারা যেন তাদের দৃষ্টি অবনত রাখে এবং তাদের গুপ্তাঙ্গকে সুরক্ষিত রাখে। এটা তাদের জন্য পবিত্রতম। নিঃসন্দেহে ঈশ্বর জানেন যা তারা করে।

(৩১) আর মোমিন (আস্থাবান) মহিলাদের বলঃ তারা যেন তাদের দৃষ্টি অবনত রাখে এবং নিজেদের গুপ্তাঙ্গকে সুরক্ষিত রাখে আর তাদের সৌন্দর্য প্রকাশ না করে, সাধারণতঃ যতটুকু প্রকাশিত হয় তা ব্যতীত। আর বুকের উপর ওড়না দিয়ে রাখে এবং নিজের স্বামী, পিতা, শ্বশুর, ছেলে, স্বামীর ছেলে, ভাই, ভাইয়ের ছেলে, বোনের ছেলে, আপন নারীগণ, মালিকানাধীন দাসী, অধিনস্ত যৌন চাহিদামুক্ত পুরুষ কিংবা নারী সংসর্গে অনাসক্ত শিশুদের

ছাড়া অন্যদের কাছে নিজেদের সৌন্দর্য প্রকাশ না করে। এছাড়া তারা যেন তাদের গোপন সাজ-সজ্জার প্রতি দৃষ্টি আকর্ষণের জন্য সজোরে পদচারণা না করে। হে বিশ্বাসীগণ! তোমরা সকলে ঈশ্বরের দিকে প্রত্যাবর্তন কর, যাতে তোমরা সফল হও।

(৩২) তোমাদের মধ্যে যারা অবিবাহিত তাদের বিবাহের ব্যবস্থা কর। আর তোমাদের দাস-দাসীদের মধ্যে যারা বিবাহ যোগ্য তাদেরও। তারা যদি নির্ধন হয় তাহলে ঈশ্বর আপন কৃপায় তাদের ধনবান করে দেবেন। ঈশ্বর সর্বব্যাপী, মহাজ্ঞানী। (৩৩) আর যারা বিবাহ করতে পারে না তারা যেন আত্মসংযম অবলম্বন করে যতক্ষণ না ঈশ্বর আপন কৃপায় তাদের সচ্ছল করে দেন। আর তোমরা অধিনস্তদের (যাদের উপরে তুমি মালিকানা প্রাপ্ত) মধ্যে থেকে যারা নিজেদের মুক্তির জন্য তোমাদের সাথে লিখিত চুক্তি করতে চায় তাদের সাথে তোমরা লিখিত চুক্তি করতে পার, যদি তুমি তাদের মধ্যে যোগ্যতার সন্ধান পাও তাদেরকে সেই সম্পদ হতে দাও যা ঈশ্বর তোমাদেরকে দিয়েছেন। আর তোমাদের দাসদাসীরা তাদের সতীত্ব রক্ষা করতে চাইলে তোমরা পার্থিব জীবনের সামগ্রীর লোভে তাদেরকে ব্যভিচারে বাধ্য করবে না। কেউ তা করলে তাদের বাধ্য করার পর ঈশ্বর তাদের প্রতি ক্ষমাশীল ও কৃপাশীল। (৩৪) আর নিঃসন্দেহে আমি তোমাদের প্রতি সুস্পষ্ট বাণী অবতীর্ণ করেছি আর ঐ লোকদের উদাহরণসমূহ যারা তোমাদের পূর্বে চলে গেছে আর ঈশ্বরভীরুদের জন্য উপদেশাবলী।

(৩৫) ঈশ্বর আকাশমণ্ডলী ও পৃথিবীর জ্যোতি। তাঁর জ্যোতি একটি কুলুঙ্গিতে অবস্থিত এক প্রদীপের সঙ্গে তুলনীয়। তারকার মতো ঔজ্জ্বল্যে জাজ্বল্যমান স্ফটিকের মধ্যে স্থিত প্রদীপটি প্রজ্জ্বলিত থাকে পবিত্র অলিভ বৃক্ষের (তৈল) দ্বারা, যা প্রাচ্যের নয়, প্রতীচ্যের ও নয়। এই (ভাস্বর) তৈল

আগুনের স্পর্শ ছাড়াই জাজ্বল্যমান থাকে। জ্যোতির উপরে জ্যোতি;^১ ঈশ্বর যাকে চান তাকে জ্যোতির পথে পরিচালিত করেন। ঈশ্বর মানুষের জন্য এমনই উপমা পেশ করে থাকেন; ঈশ্বর সর্ব বিষয়ে সর্বজ্ঞ।

(৩৬) (তারা প্রার্থনা করে) সেই সমস্ত গৃহে যেখানে সকাল সন্ধ্যায় তাঁর নাম স্মরণের জন্য ঈশ্বর সেগুলিকে সমুন্নত করার অনুমতি দিয়েছেন। (৩৭) এরা এমন সব লোক, যাদেরকে ব্যাবসা-বাণিজ্য ও ক্রয়-বিক্রয় ঈশ্বরের স্মরণ থেকে, প্রার্থনা প্রতিষ্ঠা করা থেকে ও উদ্বৃত্ত সম্পদ থেকে আবশ্যিক দান দেওয়া থেকে বিরত রাখে না। তারা সেই দিনটিকে ভয় করে যখন অন্তর ও দৃষ্টিসমূহ ওলটপালট হয়ে যাবে। (৩৮) যাতে ঈশ্বর তাদেরকে তাদের কাজের সেরা প্রতিদান দেন এবং স্বীয় অনুগ্রহ থেকে তাদেরকে আরো বেশি দান করেন। ঈশ্বর যাকে চান তাকে অপরিমিত জীবিকা দান করেন।

(৩৯) আর যারা অস্বীকার করে তাদের কর্ম মরুপ্রান্তরে মরীচিকার সঙ্গে তুলনীয়। তৃষণ্ত মানুষ যাকে জল মনে করে; কিন্তু যখন সে তার নিকটে আসে, সে কিছুই পায় না। সেখানে সে ঈশ্বরকে পায়, যিনি তার হিসাব পূর্ণমাত্রায় মিটিয়ে দেন। ঈশ্বর হিসাব গ্রহণে তৎপর। (৪০) অথবা অতল সমুদ্রের গাড় অন্ধকারের মত, সেখানে উদ্বেলিত হয় তরঙ্গের উপর তরঙ্গ, উর্দ্বৈ ঘনঘোর মেঘে আচ্ছন্ন, অন্ধকারের উপর অন্ধকার, হাত বার করলেও

^১ বিঃ দ্রঃ- (২৪:৩৫) এটি একটি বহু অর্থযুক্ত রূপকালঙ্কার। এখানে জ্যোতি ঈশ্বরের 'পথনির্দেশনার' প্রতীক। 'কুলুঙ্গি' হল মানুষের মন এবং 'প্রদীপ' হল বিশ্বাস (ঈমান), কুলুঙ্গি যার আশ্রয়স্থল। এই রূপকল্পটি আরও দুটি বিষয় দ্বারা সম্প্রসারিত করা হয়েছে, সেগুলি হল - 'তারকার মত ঔজ্জ্বল্যে জাজ্বল্যমান 'স্ফটিক' এবং 'ভাস্বর তৈল'।

তা দেখা যায় না। ঈশ্বর যাকে আলো দান না করেন, তার জন্য কোন আলো নেই।

(৪১) (হে পয়গম্বর!) তুমি কি দেখনি যে, আকাশ ও পৃথিবীতে যা কিছু আছে সব ঈশ্বরের পবিত্রতা বর্ণনা করছে এমনকি পাখা মেলে থাকা পাখিরাও। প্রত্যেকেই তাঁর প্রার্থনা ও তাঁর স্তুতি জানে। আর তারা যা করে ঈশ্বর সব জানেন। (৪২) আকাশ ও পৃথিবীর সার্বভৌমত্ব ঈশ্বরেরই এবং ঈশ্বরের কাছেই সবার প্রত্যাবর্তন।

(৪৩) তুমি কি দেখনি যে, ঈশ্বর মেঘ সঞ্চালন করেন, তারপর তা একত্রিত করেন, তারপর পূঞ্জীভূত করেন। তারপর তুমি দেখতে পাও যে, ওর মধ্য থেকে বৃষ্টি ধারা নির্গত হয়। তিনি আকাশের পর্বতসম মেঘপূঞ্জ থেকে শিলা বর্ষণ করেন এবং তদ্বারা যাকে চান তাকে আঘাত করেন। আর যাকে চান তাকে সরিয়ে দেন। মেঘের বিদ্যুত বলকে এমন মনে হয় যেন দৃষ্টি কেড়ে নেবে। (৪৪) ঈশ্বর রাত ও দিন পরিবর্তন করতে থাকেন। নিঃসন্দেহে দৃষ্টি সম্পন্নদের জন্য এতে শিক্ষার বিষয় রয়েছে।

(৪৫) ঈশ্বর সকল জীবকে সৃষ্টি করেছেন জল দ্বারা। তাদের মধ্যে কতকগুলি পেটে ভর দিয়ে চলে, কতকগুলি দু পায়ে হাঁটে আবার কতকগুলি চার পায়ে হাঁটে। ঈশ্বর যা ইচ্ছা সৃষ্টি করেন। নিঃসন্দেহে ঈশ্বর সব কিছু করতে সক্ষম। (৪৬) আমি তো অবতীর্ণ করেছি সুস্পষ্টবাণী। ঈশ্বর যাকে চান তাকে সোজা পথ দেখান।

(৪৭) আর তারা বলেঃ আমরা ঈশ্বর ও তাঁর বার্তাবাহকের প্রতি বিশ্বাস স্থাপন করেছি এবং আমরা আনুগত্য স্বীকার করেছি, তারপর ওদের মধ্যে একদল মুখ ফিরিয়ে নেয়। আসলে এরা সত্যে বিশ্বাস স্থাপনকারী নয়। (৪৮) আর যখন তাদেরকে ঈশ্বর ও তাঁর বার্তাবাহকের দিকে ডাকা হয়,

যাতে ঈশ্বরের বার্তাবাহক তাদের মধ্যে মীমাংসা করেন তখন তাদের মধ্যে একদল মুখ ফিরিয়ে নেয়। (৪৯) আর সত্য যদি তাদের অভিরূচি মতো হোত, তাহলে তারা তার দিকে আজ্ঞানুবর্তী হয়ে চলে আসত। (৫০) ওদের অন্তরে কি ব্যাধি আছে অথবা তারা কি সন্দেহের মধ্যে পড়ে আছে? অথবা এরা কি আশঙ্কা করছে যে, ঈশ্বর ও তাঁর বার্তাবাহক এদের প্রতি অবিচার করবেন? বরং এরাই তো অত্যাচারী।

(৫১) বার্তাবাহক তাদের মধ্যে মীমাংসা করে দেবেন, এই উদ্দেশ্যে যখন তাদেরকে ঈশ্বর ও তাঁর বার্তাবাহকের দিকে ডাকা হয় তখন আস্থাবানদের জবাব হয় এটাই - আমরা শুনেছি ও মেনে নিয়েছি। আর তারাই সফলকাম। (৫২) আর যে ব্যক্তি ঈশ্বর ও বার্তাবাহকের আনুগত্য করে এবং ঈশ্বরকে ভয় করে ও তাঁর অবাধ্যতা থেকে বেঁচে থাকে তারাই সফলকাম।

(৫৩) আর তারা ঈশ্বরের শপথ করে, খুবই দৃঢ় শপথ, যে তুমি ওদেরকে আদেশ দাও তাহলে তারা অবশ্যই বের হবে। বলঃ শপথ করো না। নিয়মানুযায়ী আনুগত্য কর। নিঃসন্দেহে ঈশ্বর জানেন যা তোমরা কর। (৫৪) বলঃ ঈশ্বরের আনুগত্য কর এবং বার্তাবাহকের আনুগত্য কর; কিন্তু যদি তোমরা মুখ ফিরিয়ে নাও তাহলে বার্তাবাহকের উপর যে দায়িত্ব অর্পন করা হয়েছে তার জন্য বার্তাবাহক দায়বদ্ধ; আর তোমাদের উপর যে দায়িত্ব অর্পন করা হয়েছে তার জন্য তোমরা দায়বদ্ধ। আর যদি তোমরা তাঁর আজ্ঞাপালন কর তাহলে সঠিক পথ পাবে। আর বার্তাবাহকের দায়িত্ব তো কেবল স্পষ্ট রূপে পৌঁছে দেওয়া।

(৫৫) ঈশ্বর তোমাদের মধ্যে ওই লোকেদের প্রতিশ্রুতি দিয়েছেন, যারা আস্থা স্থাপন করবে এবং সংকাজ করবে, তিনি তাদেরকে পৃথিবীতে ক্ষমতা দান করবেন। যেমন এদের আগের লোকদের ক্ষমতা দেওয়া হয়েছিল এবং

তাদের জন্য যে ধর্ম তিনি মনোনিত করেছেন তা তিনি প্রতিষ্ঠা করবেন। তাদের ভীতিজনক অবস্থার পরিবর্তন করে নিরাপত্তা প্রদান করবেন। তারা আমার উপাসনা করবে এবং আমার সাথে কোন অংশীদার স্থাপন করবে না, অতঃপর যারা সত্য অস্বীকার করে, তারা অবাধ্য।

(৫৬) প্রার্থনায় মনোযোগী হও, উদ্বৃত্ত সম্পদ থেকে আবশ্যিক দান প্রদান কর, আর বার্তাবাহকের আজ্ঞা পালন কর, যাতে তোমরা অনুগ্রহ লাভ করতে পার। (৫৭) যারা অবিশ্বাস করছে তাদের ব্যাপারে মনে কর না যে তারা পৃথিবীতে ঈশ্বররের পরিকল্পনাকে ব্যর্থ করে দেবে; বরং তাদের ঠিকানা নরক তা খুবই নিকৃষ্ট ঠিকানা।

(৫৮) হে বিশ্বাসীগণ! তিনটি সময়ে যদি তোমাদের আইনসঙ্গত অধিনস্তরা এবং অপ্রাপ্তবয়স্করা তোমাদের সাথে সাক্ষাৎ করতে আসে, তারা যেন তোমাদের অনুমতি নেয় - সকালের প্রার্থনার আগে, দ্বিপ্রহরে উষ্যতার জন্য যখন তোমরা পোশাক খুলে রাখ এবং সন্কার প্রার্থনার পরে। এই তিন সময় তোমাদের জন্য একান্ত ব্যক্তিগত সময়। এছাড়া অন্য সময়ে তোমরা যদি পরস্পরের সাক্ষাৎ করতে যাও, তাহলে তা দোষনীয় নয়। তোমাদের তো একে অপরের কাছে যাতায়াত করতেই হয়। এভাবেই ঈশ্বর তাঁর প্রত্যাদেশগুলো তোমাদের কাছে স্পষ্ট করে দেন। আর ঈশ্বর সর্বজ্ঞ, প্রজ্ঞাময়। (৫৯) তোমাদের শিশুরা যখন বয়ঃপ্রাপ্ত হবে তখন সেও এভাবেই অনুমতি নেবে যেমন ওর বয়োজ্যেষ্ঠরা অনুমতি নিয়ে থাকে। এভাবেই ঈশ্বর তোমাদের জন্য তাঁর প্রত্যাদেশ সমূহ স্পষ্ট করেন। আর ঈশ্বর মহাজ্ঞানী, প্রজ্ঞাময়। (৬০) বয়োজ্যেষ্ঠা নারীরা, যাদের বিবাহের বয়স উত্তীর্ণ হয়ে গেছে, তারা যদি সৌন্দর্য্য প্রদর্শনের ইচ্ছা না করে তাদের বহির্বাস খুলে রাখে, তাহলে তাতে কোন মন্দ নেই। আর যদি তারাও সাবধানতা অবলম্বন করে তাহলে উত্তম। ঈশ্বর সর্বশ্রোতা, সর্বজ্ঞ।

(৬১) অন্ধ, খোঁড়া, রোগী এবং তোমাদের নিজেদেরও আহার গ্রহণ করতে দোষ নেই - নিজেদের গৃহে অথবা তোমাদের পিতা, মাতা, ভাই, বোন, কাকা, কাকী, মামা, মামি, তোমাদের অধিনস্ত বা বন্ধুদের গৃহে। তোমরা একত্রে বা পৃথকভাবে আহার গ্রহণ করলেও দোষ নেই। কিন্তু যখন একে অপরের গৃহে প্রবেশ করবে তখন শাস্তির অভিবাদন জানাবে, আশির্বাদ ও পবিত্রতাপূর্ণ ঈশ্বরের অভিবাদন। এভাবে ঈশ্বর তাঁর বিধানসমূহ বিস্তারিতভাবে বর্ণনা করেন, যাতে তোমরা বুঝতে পার।

(৬২) আস্থাবান তরাই যারা ঈশ্বর ও তাঁর বার্তাবাহকের প্রতি বিশ্বাস ব্যক্ত করে এবং যখন তারা কোন সার্বজনীন কাজে বার্তাবাহকের সঙ্গে থাকে তখন তার অনুমতি না নিয়ে চলে যায় না। যারা তোমার কাছে অনুমতি চায় তরাই ঈশ্বর ও তাঁর বার্তাবাহকের প্রতি বিশ্বাস রাখে। অতএব তারা যদি নিজেদের কোন কাজের জন্য তোমার কাছে অনুমতি চায় তাহলে তাদের মধ্যে যাকে তুমি চাও অনুমতি দিও এবং তাদের জন্য ক্ষমা প্রার্থনা করো। নিঃসন্দেহে ঈশ্বর ক্ষমাশীল, দয়ালু।

(৬৩) তোমরা বার্তাবাহকের আহ্বানকে তোমাদের একে অপরের প্রতি আহ্বানের মত মনে করো না। ঈশ্বর তোমাদের মধ্যে ঐ লোকদের জানেন যারা একে অপরকে আড়াল করে চুপিচুপি চলে যায়। অতএব যারা তার আদেশ উল্লঙ্ঘন করে তারা যেন তাদের উপর কঠিন বিপর্যয় অথবা যন্ত্রনাদায়ক শাস্তি আপতিত হওয়ার ব্যাপারে সতর্ক থাকে। (৬৪) জেনে রেখো, আকাশ ও পৃথিবীর মধ্যে যা কিছু আছে সবই ঈশ্বরের। তিনি জানেন তোমরা কি অবস্থায় আছ। আর যে দিন তাদেরকে তাঁরই কাছে ফিরিয়ে আনা হবে, সেদিন তিনি তাদেরকে তাদের অতীত কর্মসমূহ অবহিত করাবেন। আর ঈশ্বর সবকিছুই জানেন।

অধ্যায় ২৫ : আল-ফুরকান (মানদণ্ড)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) পরম কল্যাণময় সেই সত্ত্বা যিনি স্বীয় বান্দার (মুহাম্মাদ) প্রতি ফুরকান (কুরআন) অবতীর্ণ করেছেন যাতে সে বিশ্ববাসীর জন্য সতর্ককারী হতে পারে। (২) তিনিই নভোমণ্ডল ও ভূমণ্ডলের সার্বভৌমত্বের অধিকারী। তিনি কোন পুত্র গ্রহণ করেন নি এবং রাজত্বে তাঁর কোন অংশীদার নেই। তিনি প্রতিটি বস্তু সৃষ্টি করে তা যথাযথ করেছেন পরিমিত অনুপাতে। (৩) আর লোকেরা তাঁর পরিবর্তে এমন উপাস্য গ্রহণ করেছে যারা কিছুই সৃষ্টি করে না; বরং তারা নিজেরাই সৃষ্টি এবং তারা নিজেদের অপকার অথবা উপকার করবার ক্ষমতা রাখে না এবং মৃত্যু, জীবনদান বা পুনরুত্থানের উপর তাদের কোন নিয়ন্ত্রন নেই।

(৪) আর অস্বীকারকারীরা বলেঃ ‘এটা তার উদ্ভাবিত মিথ্যা জালিয়াতি ছাড়া কিছুই নয়, যাতে অন্যান্যরা তাকে সাহায্য করেছে।’ তারা যা বলে অন্যায় ও মিথ্যা। (৫) তারা বলে যে, এ তো কেবল প্রাচীন উপকথা সমূহ যেগুলো সে লিপিবদ্ধ করেছে। সকাল সন্ধ্যায় এগুলো তাকে শোনান হয়। (৬) তাদেরকে বলঃ এটা তিনি অবতীর্ণ করেছেন যিনি আকাশ ও পৃথিবীর রহস্য জানেন। নিঃসন্দেহে তিনি ক্ষমাশীল ও অতি দয়ালু।

(৭) তারা আরও বলেঃ এ কেমন বার্তাবাহক, যে খাবার খায় ও হাটে-বাজারে চলাফেরা করে? তার কাছে কোন দেবদূত কেন পাঠান হল না যে সতর্ককারী হিসাবে তার সাথে থাকত? (৮) অথবা তার জন্য যদি কোন ধনভাণ্ডার পাঠান হত, অথবা তার জন্য কোন বাগান হত যেখান থেকে সে আহার করত। আর অত্যাচারীরা বলল যে তোমরা এক জাদুগ্রন্থ লোকের অনুসরণ করছো। (৯) দেখো : তারা তোমার প্রতি কি আরোপ

করছে। তারা নিশ্চয় পথভ্রষ্ট হয়ে গেছে, এবং তারা সঠিক পথ পাবে না।

(১০) তিনি অত্যন্ত কল্যাণময়। তিনি ইচ্ছা করলে এর চেয়ে আরও উৎকৃষ্ট জিনিষ তোমাদেরকে দিতে পারেন; এমন উদ্যানসমূহ যার তলদেশ দিয়ে নদী প্রবাহিত এবং দিতে পারেন প্রাসাদসমূহ। (১১) তারা প্রলয় দিবসকে অবিশ্বাস করেছে, আর আমি এমন ব্যক্তিদের জন্য নরক প্রস্তুত করে রেখেছি যারা প্রলয় দিবসকে অবিশ্বাস করে। (১২) যখন তারা তা দূর থেকে দেখবে তখন তারা তার দ্রুত গর্জন ও চীৎকার শুনতে পাবে। (১৩) আর যখন শিকলবদ্ধ অবস্থায় তাদের নরকের কোন সংকীর্ণ স্থানে নিক্ষেপ করা হবে তখন সেখানে তারা মৃত্যু কামনা করবে। (১৪) আজ তোমরা একবারের জন্য মৃত্যু আহ্বান করো না বরং বহুবার মৃত্যুকে আহ্বান করো। (১৫) তাদেরকে জিজ্ঞেস করঃ এটাই উত্তম, না চিরকাল বসবাসের স্বর্গ যার প্রতিশ্রুতি ঈশ্বর ঈশ্বরভীরুদের জন্য করেছেন, তা উত্তম ? এটাই তাদের পুরস্কার ও চূড়ান্ত গন্তব্যস্থল। (১৬) তারা যা চাইবে সেখানে তাদের জন্য তাই থাকবে, সেখানে তারা চিরকাল থাকবে। এই প্রতিশ্রুতি পূরণ তোমার প্রতিপালকেরই দায়িত্ব।

(১৭) আর যে দিন তিনি ওদের সবাইকে একত্রিত করবেন এবং ঈশ্বরের পরিবর্তে অন্যকে যারা উপাসনা করত তাদেরও, তখন তিনি বলবেনঃ তোমরাই কি আমার এই বান্দাদেরকে বিভ্রান্ত করেছিলে, না কি তারা নিজেরাই পথভ্রষ্ট হয়েছিল? (১৮) তারা বলবেঃ তুমি কত মহান! আমাদের উচিত হয় নি তোমার পরিবর্তে অন্যকে অভিভাবক হিসাবে গ্রহণ করা এবং তুমিই তো তাদের আর তাদের পূর্বপুরুষদের ভোগ-সম্ভার দিয়েছিলে, ফলে তারা উপদেশ ভুলে গিয়েছিল এবং এক অধঃপতিত জনগোষ্ঠীতে পরিণত হয়েছিল। (১৯) (ঈশ্বর বলবেন) - তোমরা যা বলতে তারা (উপাস্যগুলি) তা মিথ্যা

সাব্যস্ত করেছে। সুতরাং তোমরা শাস্তি প্রতিরোধ করতে পারবে না, কোন সাহায্য ও পাবে না। তোমাদের মধ্যে যে অন্যায় করবে আমি তাকে মহাশাস্তি আশ্বাদন করাব।

(২০) আমি তোমার পূর্বে যত পয়গম্বর পাঠিয়েছি, সবাই আহার করত আর হাটে-বাজারে চলাফেরা করত আর আমি তোমাদের একে অপরের জন্য পরীক্ষার মাধ্যম বানিয়েছি। তোমরা কি ধৈর্য ধারণ করবে? তোমাদের প্রভু সব কিছুই দেখেন।

(২১) আর যারা আমার সামনে উপস্থিত হওয়ার ভয় রাখে না তারা বলেঃ আমাদের কাছে দেবদূত কেন পাঠানো হল না? বা আমরা আমাদের প্রভুকে কেন দেখতে পাই না? তারা নিজেদেরকে খুব বড় মনে করেছে আর তারা গুরুতরভাবে সীমালঙ্ঘন করেছে। (২২) যে দিন তারা দেবদূতদের দেখবে সেদিন অপরাধীদের জন্য কোন সুসংবাদ থাকবে না আর তারা বলবে রক্ষা কর, রক্ষা কর। (২৩) তারা যে সব কাজ করেছিল আমি প্রতিটি কর্মের দিকে মনোনিবেশ করবো এবং সেগুলিকে বিক্ষিপ্ত ধূলিকণায় পরিণত করবো। (২৪) স্বর্গবাসীরা সে দিন উৎকৃষ্ট বাসস্থান ও শ্রেষ্ঠ বিশ্রামস্থলের অধিকারী হবে।

(২৫) আর যে দিন আকাশ মেঘের মত ফেটে যাবে এবং দেবদূতদের ধারাবাহিকভাবে নামিয়ে দেওয়া হবে। (২৬) সেদিন সত্যিকার রাজত্ব হবে করুণাময়ের এবং অস্বীকারকারীদের জন্য হবে কঠিন দিন। (২৭) আর সেদিন অন্যায়কারীরা হাত কামড়াবে আর বলবেঃ হায়! যদি আমি পয়গম্বরের পথ গ্রহণ করতাম! (২৮) হায়! আমার দুর্ভাগ্য যদি অমুককে বন্ধুরূপে গ্রহণ না করতাম! (২৯) সেই আমাকে পথভ্রষ্ট করে দিয়েছে অথচ আমার কাছে সতর্কবাণী এসেছিল আর শয়তান তো আছেই মানুষকে ধোঁকা দেওয়ার জন্য। (৩০) পয়গম্বর বলবেঃ হে আমার প্রভু! আমার লোকেরা এই

কুরআনকে ফেলে রেখেছিল। (৩১) এভাবে আমি প্রত্যেক পয়গম্বরের জন্য অপরাধীদের মধ্য থেকে শত্রু বানিয়েছি আর তোমাদের প্রভুই পথপ্রদর্শক ও সাহায্য কারীরূপে যথেষ্ট।

(৩২) অস্বীকারকারীরা বলে যে, তার উপর পুরো কুরআন একবারে অবতীর্ণ করা হল না কেন? এভাবেই তোমাদের হৃদয়কে মজবুত করার জন্য এই ভাবে আমি কুরআন অবতীর্ণ করেছি এবং ক্রমে ক্রমে তা স্পষ্টরূপে প্রকাশ করেছি। (৩৩) যখনই তারা কোন অভিযোগ উত্থাপন করে, তখনই আমি তার সঠিক সমাধান ও সুন্দর ব্যাখ্যা প্রদান করি। (৩৪) যাদেরকে হেঁটমুণ্ড অবস্থায় নরকের দিকে নিয়ে যাওয়া হবে তাদের জায়গা বড় নিকৃষ্ট এবং তারা অধিকতর পথভ্রষ্ট।

(৩৫) আর আমি মূসাকে (মোজেসকে) গ্রন্থ দিয়েছি এবং তার সাথে তার ভাই হারুনকে (অ্যারন) সহায়ক বানিয়েছি। (৩৬) অতঃপর আমি তাদেরকে বললামঃ তোমরা দু'জনে তাদের কাছে যাও যারা আমার নিদর্শন সমূহকে মিথ্যা অভিহিত করেছে। তারপর আমি ওদেরকে একেবারে ধ্বংস করে দিয়েছি। (৩৭) আর নূহের (নোয়াহ'র) সম্প্রদায়কেও আমি ডুবিয়ে দিয়েছি, যখন তারা পয়গম্বরের দের অবিশ্বাস করেছে, আর আমি তাদেরকে মানুষের জন্য এক নিদর্শন বানালাম। আর আমি অপরাধীদের জন্য যন্ত্রণাদায়ক শাস্তি প্রস্তুত করে রেখেছি। (৩৮) এবং আদ, সামূদ, আল্ রাস এর অধিবাসীদের এবং এদের মধ্যবর্তী আরও অনেক প্রজন্মকে (ধ্বংস করেছি)। (৩৯) আমি তাদের প্রত্যেকের জন্যে দৃষ্টান্ত বর্ণনা করেছিলাম, তাদের প্রত্যেককে কার্যতঃ আমি ধ্বংস করে দিয়েছিলাম। (৪০) আর এরা সেই জনপদের উপর দিয়েই এসেছে যাদের উপর সাংঘাতিকভাবে অকল্যাণ বর্ষণ করা হয়েছে। তারা কি তা দেখেনি? আসলে তারা পুনরুত্থান প্রত্যাশা করে না।

(৪১) তারা যখন তোমাকে দেখে তখন উপহাস করতে থাকে। এই কি সেই ব্যক্তি, যাকে ঈশ্বর পয়গম্বর করে পাঠিয়েছেন? (৪২) সে তো আমাদেরকে আমাদের উপাস্যদের থেকে দূরে সরিয়ে দিত, যদি না আমরা তাদেরকে আঁকড়ে ধরে থাকতাম। যখন ওরা শাস্তি প্রত্যক্ষ করবে, তখন জানতে পারবে, কে অধিক পথভ্রষ্ট।

(৪৩) তুমি কি ঐ ব্যক্তিকে দেখেছ যে প্রবৃত্তিকে উপাস্য বানিয়ে রেখেছে? তবুও কি তুমি তার দায়িত্ব নিতে পার? (৪৪) অথবা তুমি মনে কর যে, এদের অধিকাংশই শোনে এবং বোঝে। তারা আসলে পশুদের মতই; বরং পশুদের চেয়েও পথভ্রষ্ট।

(৪৫) তুমি কি তোমার প্রভুকে দেখনি যে, তিনি কিভাবে ছায়াকে বিস্তৃত করেন। আর তিনি যদি ইচ্ছা করতেন তাহলে ওকে স্থির করে দিতেন। তারপর আমি সূর্যকে এর নিয়ন্ত্রক করেছি। (৪৬) অতঃপর আমি আন্তে আন্তে ওকে আমার দিকে গুটিয়ে নিই। (৪৭) তিনিই তোমাদের জন্য রাতকে পর্দা আর ঘুমকে বিশ্রাম সুখ বানিয়েছেন আর দিনকে জাগ্রত হওয়ার সময় বানিয়েছেন।^১ (৪৮) আর তিনিই স্বীয় রহমতে রসুসংবাদ রূপে বাতাসকে পাঠান আর আমি আকাশ থেকে পবিত্র বৃষ্টি বর্ষণ করি। (৪৯) যাতে ওর মাধ্যমে নিষ্প্রাণ ভূমিতে প্রাণের সঞ্চার করতে পারি এবং আমার সৃষ্ট অনেক পশু ও মানুষকে তা পান করাতে পারি।

^১ বিঃ দ্রঃ-(২৫ঃ ৪৭) পৃথিবীর এই রীতির মধ্যে অনেক শিক্ষণীয় বিষয় রয়েছে। যেমন রাতের অন্ধকারের পরে দিনের আলো ফুটে ওঠে, ঠিক তেমনই মিথ্যার পরেই সত্যের বিজয় আসে। ঠিক তেমনই রাত্রির নিদ্রার পর সকালের জাগরণ, মৃত্যুর পর পুনরুত্থান এর প্রতীক হিসাবে প্রতীয়মান হয়।

(৫০) আর আমি এটাকে ওদের মধ্যে ভিন্ন ভিন্ন রূপে বর্ণনা করেছি যাতে তারা অনুধাবন করে; তবুও অধিকাংশ মানুষ কেবল অকৃতজ্ঞতাই প্রকাশ করে। (৫১) আর আমি যদি ইচ্ছা করতাম তাহলে প্রত্যেক নগরেই একজন করে সতর্ককারী পাঠাতাম। (৫২) অতএব তুমি অস্বীকারকারীদের কথা শুনোনা বরং এর দ্বারা (কুরআন, তাদের মধ্যে এর বাণী প্রচারের জন্য) তাদের বিরুদ্ধে প্রবল সংগ্রাম চালিয়ে যাও।

(৫৩) আর তিনিই দুই সমুদ্রকে মিলিয়েছেন, একটা মিষ্টি জল তৃষ্ণা মেটাবার জন্য আর একটা নোনতা ও তিক্ত। আর তিনি এদুটোর মধ্যে একটা অন্তরায় আর একটা অনতিক্রম ব্যবধান রেখে দিয়েছেন। (৫৪) আর তিনিই মানুষকে জল দ্বারা সৃষ্টি করেছেন। অতঃপর তার জন্য পারিবারিক বৈবাহিক সম্পর্ক নির্ধারণ করে দিয়েছেন। তোমার প্রভু অত্যন্ত ক্ষমতাবান।

(৫৫) আর তারা ঈশ্বরের পরিবর্তে এমন কিছুর উপাসনা করে যা তাদের কোন উপকার করতে পারে না আর কোন ক্ষতি ও করতে পারে না। অবিশ্বাসী মাত্রই তার প্রভুর বিরোধী। (৫৬) আর আমি তোমাকে কেবলমাত্র সুসংবাদদাতা ও সতর্ককারী করে পাঠিয়েছি। (৫৭) তুমি বলঃ আমি তোমাদের কাছ থেকে কোন পারিশ্রমিক চাই না, আমি কেবল চাই, যে ইচ্ছা করে সে তার প্রভুর পথ অবলম্বন করুক।

(৫৮) আর তুমি সেই চিরঞ্জীব ঈশ্বরের উপর ভরসা রাখ যার মৃত্যু নেই এবং তাঁর সপ্রশংস পবিত্রতা ও মহিমা ঘোষণা কর। তিনি তাঁর বান্দাদের পাপ সম্পর্কে সম্যক অবহিত। (৫৯) যিনি আকাশ ও পৃথিবী এবং যা কিছু এর মধ্যে আছে তা ছয় দিনে (সময়কালে) সৃষ্টি করেছেন,

অতঃপর সিংহাসনে আসীন হয়েছেন। তিনিই করুণাময়, তাঁর সম্পর্কে অবগত এমন ব্যক্তিকে জিজ্ঞাসা করে দেখ।^১ (৬০) ওদেরকে যখন বলা হয় যে, “করুণাময়কে সিজদা (প্রণতিজ্ঞাপন) কর” তখন তারা বলেঃ করুণাময় আবার কি? আমরা কি তাকে সিজদা (প্রণতিজ্ঞাপন) করবো যাকে তোমরা সিজদা (প্রণতিজ্ঞাপন) করতে বলছ? এর ফলে তাদের বিমুখতার মাত্রা আরও বৃদ্ধি পায়।

(৬১) অত্যন্ত মহিমাম্বিত ওই সত্ত্বা, তিনি আকাশে নক্ষত্রপুঞ্জ স্থাপন করেছেন এবং তাতে এক বিরাট প্রদীপ (সূর্য) আর এক বলমলে চন্দ্র স্থাপন করেছেন। (৬২) আর তিনিই রাত ও দিনকে পরস্পরের অনুগামী করেছেন তাদের জন্য, যারা শিক্ষা গ্রহণ করতে চায় এবং কৃতজ্ঞতা প্রকাশ করতে চায়।

(৬৩) আর করুণাময়ের বান্দা তারাই যারা পৃথিবীতে নম্রভাবে চলাফেরা করে এবং মুখরী যখন তাদের সঙ্গে কথা বলে তখন তারা বলে তোমাদের উপর শাস্তি বর্ষিত হোক! (৬৪) আর যে তার প্রভুর সামনে সিজদারত ও দণ্ডায়মান অবস্থায় রাত কাটায়। (৬৫) আর যারা বলেঃ হে আমাদের প্রভু! আমাদের থেকে নরকের শাস্তিকে দূরে রেখো। নিঃসন্দেহে তাদের শাস্তি একটা বড় সর্বনাশ। (৬৬) নিঃসন্দেহে সেটা খুবই নিকৃষ্ট ঠিকানা ও নিকৃষ্ট অবস্থানস্থল। (৬৭) আর ঐ লোকেরা যখন ব্যয় করে তখন তারা অপব্যয় করে না বা কৃপণতা করে না বরং এক মধ্যম পস্থা অবলম্বন করে। (৬৮) এবং তারা ঈশ্বরের পরিবর্তে

^১ বিঃ দ্রঃ-(২৫ঃ ৫৯) এখানে ছয়দিন হল ঈশ্বরের ভাষায় ছয়দিন। মানুষের ভাষায় এটাকে ছয়টি স্তর বা ছয়টি পর্যায়। ছয়টি পর্যায়ের বিশ্বব্রহ্মাণ্ডের সৃষ্টি - এই বিষয়টি তাঁর সুপরিকল্পিত কর্মপন্থার পরিচয় বহন করে। তাঁর পরিকল্পনা এবং স্বাতন্ত্র্য আয়োজনের উপর ভিত্তি করে যাদেরকে তিনি অস্তিত্ব দান করেছেন, তা নিরর্থ হতে পারে না।

অন্য কোন উপাস্যকে ডাকে না এবং ঈশ্বর কতৃক অবৈধ ঘোষিত কোন প্রাণ যথার্থ কারণ ছাড়া হত্যা করে না আর ব্যভিচার করে না আর যে ব্যক্তি এধরনের কাজ করবে তার শাস্তির অংশীদার সে হবে। (৬৯) পুনরুত্থানের দিনে তার শাস্তি বেড়েই চলবে। আর সে সেখানে অপমানিত হয়ে চিরকাল থাকবে। (৭০) কিন্তু যারা অনুতপ্ত হয় এবং বিশ্বাস স্থাপন করে আর সৎকাজ করে, ঈশ্বর এই ধরনের লোকদের পাপসমূহ পুণ্য দ্বারা পরিবর্তন করে দেবেন। আর ঈশ্বর ক্ষমাশীল পরম দয়ালু। (৭১) আর যে ব্যক্তি অনুতপ্ত হয় এবং ভালকাজ করে সে বাস্তবে ঈশ্বরের দিকেই ফিরে আসে।

(৭২) আর যারা মিথ্যা সাক্ষ্য দেয় না এবং যখন অসার ক্রিয়া কলাপের সম্মুখীন হয় তখন স্বীয় মর্যাদার সাথে তা পরিহার করে, (৭৩) তারা এমন যে, যখন তাদের প্রতিপালকের বাণীসমূহের মাধ্যমে তাদেরকে উপদেশ দেওয়া হয় তখন তারা বধির ও অন্ধ হয়ে থাকে না। (৭৪) আর যারা বলে, হে আমাদের প্রভু! আমাদের জন্য এমন স্ত্রী ও সন্তান-সন্ততি দান করুন যারা আমাদের জন্য নয়ন প্রীতিকর হয় এবং আমাদেরকে ঈশ্বরভীরুদের জন্য আদর্শ স্বরূপ করুন।

(৭৫) এমন লোকদেরকে তাদের ধৈর্যের কারণে স্বর্গে সুউচ্চ স্থান দান করা হবে। সেখানে তাদেরকে অভিবাদন ও শাস্তির আশীর্বাদ দিয়ে স্বাগত জানান হবে। (৭৬) তারা সেখানে চিরকাল থাকবে। বাসস্থান ও অবস্থানস্থল হিসাবে তা কতই না উত্তম। (৭৭) বলঃ তোমরা আমার প্রভুকে না ডাকলে তার কিছু আসে যায় না। সত্য অস্বীকার করার কারণে অচিরেই তোমাদের উপর অপরিহার্য শাস্তি অবশ্যই নেমে আসবে।

অধ্যায় ২৬ : আশ - শুআ'রা (কবিগণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ত্বোয়া-সীন মীম। (২) এগুলো সুস্পষ্ট গ্রন্থের বাণী। (৩) তারা বিশ্বাস স্থাপন করে না বলে তুমি মনোকণ্ঠে হয়তো আত্মবিনাশী হয়ে পড়বে। (৪) আমি যদি ইচ্ছা করি তাহলে তাদের কাছে আকাশ থেকে কোন নিদর্শন নামিয়ে দিতে পারি যার সামনে তাদের গ্রীবা নত হয়ে যাবে। (৫) তাদের কাছে করুণাময়ের পক্ষ থেকে কোন নতুন উপদেশ এলেই তারা তা থেকে মুখ ফিরিয়ে নেয়। (৬) অতএব তারা অবিশ্বাসই করেছে। তাই তারা যা নিয়ে ঠাট্টা-বিদ্রুপ করত তার বাস্তবিকতা তারা শীঘ্রই জানতে পারবে।

(৭) তারা কি পৃথিবীর দিকে চেয়ে দেখে না? তাতে আমি কত রকমের উৎকৃষ্ট জিনিষ উৎপন্ন করেছি। (৮) নিশ্চয়ই এর মধ্যে নিদর্শন আছে; কিন্তু তাদের অধিকাংশই বিশ্বাসী নয়। (৯) আর নিঃসন্দেহে তোমাদের প্রভু পরাক্রমশালী ও অতি দয়ালু।^১ (১০) আর যখন তোমাদের প্রভু মূসাকে (মোজেসকে) ডেকে বললেন যে, অত্যাচারী লোকদের কাছে যাও। (১১) ফারাও এর লোকদের কাছে, তারা কি ভয় করে না? (১২) মূসা (মোজেস) বললঃ প্রভু!

^১ বিঃদ্রঃ-(২৬:০৯) মহান ঈশ্বর ইচ্ছাপোষণ করেন যে, সাধারণ প্রাকৃতিক ঘটনাবলীর মধ্যে যে অসাধারণ এবং গুপ্ত বিষয়গুলি আছে মানুষ সেগুলি অনুধাবন করুক। কার্য-কারণ ধারায় ঘটমান বিষয়গুলি মধ্যে সে ঈশ্বরের প্রত্যক্ষ ভূমিকা অনুভব করতে পারে। যাদের মধ্যে এই ধরনের গভীর অন্তর্দৃষ্টি আছে, তারা ঈশ্বরের প্রতি আস্থাশীল বলে পরিগণিত হবে এবং ঈশ্বরের অপার অনুগ্রহ প্রাপ্ত হবে।

আমি আশঙ্কা করছি তারা আমাকে অবিশ্বাস করবে। (১৩) আমার হৃদয় সঙ্কুচিত হয়ে পড়ছে এবং আমার জিহ্বা সাবলীল নয়। অতএব তুমি হারুনের (অ্যারন) কাছে বার্তা পাঠাও। (১৪) আমার বিরুদ্ধে তাদের একটি অভিযোগও আছে; অতএব আমার ভয় হয়, তারা আমাকে হত্যা করে ফেলবে।

(১৫) বললেনঃ কখনই নয়। অতঃপর তোমরা দু'জনেই আমার নিদর্শন নিয়ে যাও। আমিও তোমাদের সাথে থাকব এবং সব শুনবো। (১৬) অতএব তোমরা দু'জনে ফ্যারাও এর কাছে গিয়ে বলবে আমরা বিশ্বজগতের প্রভুর দূত। (১৭) তুমি ইসরাইলের সন্তানদের আমাদের সাথে যেতে দাও। (১৮) ফ্যারাও বললঃ আমরা কি তোমাকে ছোটবেলায় আমাদের কাছে লালন-পালন করিনি? আর তুমিতো তোমার বয়সের অনেকগুলি বছর আমাদের সাথে কাটিয়েছ। (১৯) আর তুমি তোমার সেই কর্মটিও করেছ যা করার। আর তুমি বড় অকৃতজ্ঞ।

(২০) মুসা (মোজেস) বললঃ সেই সময় আমি এটা করেছিলাম এবং আমার এটা অপরাধ হয়ে গেছে। (২১) অতঃপর আমি তোমাদের ভয়ে তোমাদের থেকে পালিয়ে যাই। তারপর আমার প্রভু আমাকে প্রজ্ঞা দান করেছেন আর আমাকে তাঁর বার্তাবাহকদের মধ্যে একজন বানিয়েছেন। (২২) আর তুমি আমাকে অনুগ্রহের কথা বলে বিদ্রুপ করছ আবার তুমি ইসরাইলের সন্তানদের দাস বানিয়ে রেখেছ।

(২৩) ফ্যারাও বললঃ বিশ্বজগতের প্রভুআবার কি জিনিষ? (২৪) মোজেস বললঃ আকাশ ও পৃথিবী এবং এর মধ্যকার সবকিছুর প্রভু, যদি তোমরা বিশ্বাস করো। (২৫) ফ্যারাও তার চারপাশের লোকদের বললঃ তোমরা কি শুনছো না? (২৬) মোজেস বললঃ তিনি তোমাদেরও প্রভু এবং তোমাদের পূর্ব পুরুষদেরও। (২৭) ফ্যারাও বললঃ তোমাদের এই বার্তাবাহক যাকে

তোমাদের কাছে পাঠানো হয়েছে একটা পাগল। (২৮) মোজেস বললঃ তিনি পূর্ব-পশ্চিম ও তার মধ্যবর্তী সবকিছুর প্রভু, যদি তোমরা বুঝতে। (২৯) ফ্যারাও বললঃ যদি তুমি আমাকে ছাড়া অন্য কাউকে উপাস্য বানাও তাহলে তোমাকে বন্দী করবো। (৩০) মোজেস বললঃ যদি আমি কোন স্পষ্ট প্রমাণ নিয়ে আসি তবুও? (৩১) ফ্যারাও বললঃ তাহলে তা নিয়ে এস যদি তুমি সত্যবাদী হও (৩২) তখন মোজেস তার লাঠি নিক্ষেপ করল, দেখা গেল সেটি একটি স্পষ্ট অজগর। (৩৩) তারপর সে তার হাত বের করল, হঠাৎ দর্শকরা দেখল সেটা ঝলমল করছে। (৩৪) ফ্যারাও আশপাশের সরদারদের বললঃ এতো একটা বিজ্ঞ জাদুকর। (৩৫) সে চাইছে তার জাদুর মাধ্যমে তোমাদের দেশছাড়া করতে, এখন তোমরা কি পরামর্শ দিচ্ছে?

(৩৬) পারিষদবর্গ বললঃ একে আর এর ভাইকে কিছুটা অবকাশ দিন এবং নগরে ঘোষক পাঠিয়ে দিন। (৩৭) যাতে তারা প্রত্যেক অভিজ্ঞ জাদুকরদিগের আপনার কাছে নিয়ে আসে। (৩৮) অতঃপর এক নির্দিষ্ট দিনে জাদুকরদের একত্রিত করা হল। (৩৯) আর লোকদের বলা হল যে, তোমরাও একত্রিত হচ্ছ কি? (৪০) যাতে আমরা জাদুকরদের অনুসরণ করতে পারি, যদি তারা বিজয়ী হয়। (৪১) তারপর যখন জাদুকরেরা এল তখন তারা ফ্যারাও কে বললঃ আমরা যদি বিজয়ী হই তাহলে আমাদের জন্য কোন পুরস্কার আছে কি? (৪২) সে বললঃ হ্যাঁ, তোমরা তখন আমার নিকটজনদের মধ্যে গণ্য হবে।

(৪৩) মোজেস তাদের বললঃ তোমরা যা নিক্ষেপ করতে চাও নিক্ষেপ কর। (৪৪) অতঃপর তারা তাদের দড়ি আর লাঠিগুলো নিক্ষেপ করল, আর বললঃ ফ্যারাও এর শক্তির শপথ, আমরাই বিজয়ী হব। (৪৫) তখন মোজেস তার লাঠি নিক্ষেপ করল, আর সহসাই দেখা গেল, তারা যা বানিয়েছিল

সে তা সব গিলে ফেলছে। (৪৬) তখন জাদুকরেরা সিজদায় পড়ে গেল। (৪৭) তারা বললঃ আমরা বিশ্বজগতের প্রভুর প্রতি বিশ্বাস আনলাম। (৪৮) যিনি মোজেস ও অ্যারনের প্রভু।

(৪৯) ফ্যারাও বললঃ আমি অনুমতি দেওয়ার পূর্বেই তোমরা একে মেনে নিলে; নিশ্চয়ই সে তোমাদের গুরু, যে তোমাদেরকে জাদু শিখিয়েছে। অতঃপর এখন তোমরা জানতে পারবে। আমি তোমাদের একদিকের হাত এবং অন্য দিকের পা কেটে দেব এবং তোমাদের সবাইকে ক্রুশ বিদ্ধ করবো। (৫০) তারা বললঃ কোন ক্ষতি নেই। আমরা তো আমাদের প্রভুর কাছেই পৌঁছে যাব। (৫১) আমরা আশা করি, আমাদের প্রভু আমাদের পাপসমূহ মার্জনা করে দেবেন; এজন্য যে আমরা প্রথমেই বিশ্বাস স্থাপন করেছি।

(৫২) আমি মোজেসকে এই বলে প্রত্যাদেশ পাঠালাম যে, তুমি আমার বান্দাদের নিয়ে রাতে বেরিয়ে পড়, নিশ্চয়ই তোমাদের পিছনে ধাওয়া করা হবে। (৫৩) অতঃপর ফ্যারাও নগরগুলোতে দূত পাঠাল। (৫৪) এরা তো একটা ছোট দল। (৫৫) আর এরা আমাকে ক্রোধান্বিত করে দিয়েছে। (৫৬) আর আমরা এক সতর্ক দল। (৫৭) অতএব আমি ওদেরকে বাগীচাসমূহ ও বর্ণা থেকে বহিস্কার করে দিলাম। (৫৮) আর ধন-ভাণ্ডার ও সম্মানজনক স্থান থেকে (৫৯) আর আমি ইসরাইলের সন্তানদের এই সব জিনিষের উত্তরাধিকারী বানিয়ে দিলাম।

(৬০) অতঃপর তারা সূর্যোদয়কালে তাদের পিছনে এসে পড়ল। (৬১) যখন দুই দল মুখোমুখী হয়ে গেল তখন মূসার সঙ্গীরা বলতে লাগলঃ আমরা তো ধরা পড়ে গেছি। (৬২) মোজেস বললঃ কখনই নয়। আমার প্রভু আমার সাথে আছেন, তিনিই আমাকে পথ বলে দেবেন। (৬৩) অতঃপর আমি মোজেসকে আদেশ দিলাম, তোমার লাঠি দিয়ে সমুদ্রে আঘাত কর।

এতে সমুদ্র বিভক্ত হল এবং প্রত্যেক ভাগ বিশাল পর্বতের মত হয়ে গেল। (৬৪) তারপর আমি অপর পক্ষকে সেখানে পৌঁছে দিলাম। (৬৫) আর আমি মোজেস ও তার সাথীদের বাঁচিয়ে দিলাম। (৬৬) তারপর অন্যদেরকে ডুবিয়ে দিলাম। (৬৭) নিঃসন্দেহে এই ঘটনার মধ্যে এক বড় নিদর্শন আছে আর তাদের অধিকাংশরাই বিশ্বাসী নয়। (৬৮) আর নিঃসন্দেহে তোমার প্রভু পরাক্রমশালী ও অতি দয়ালু।

(৬৯) আর এদেরকে আবরাহামের ঘটনা শোনাও। (৭০) যখন সে তার পিতা ও তার সম্প্রদায়কে বলেছিলঃ যে, তোমরা কিসের উপাসনা কর? (৭১) তারা বললঃ আমরা মূর্তিদের উপাসনা করি আর আমরা নিরন্তর এতেই অটল থাকব। (৭২) আবরাহাম বললঃ এরা কি তোমাদের ডাক শুনতে পায়? যখন তোমরা এদের ডাক। (৭৩) বা এরা তোমাদের উপকার বা অপকার করতে পারে? (৭৪) তারা বললঃ আমরা আমাদের পিতৃপুরুষদের এমনই করতে দেখেছি।

(৭৫) আবরাহাম বললঃ তোমরা কি তাদের সম্বন্ধে ভেবে দেখেছ যাদের পূজো করছো। (৭৬) তোমরা ও তোমাদের পূর্বপুরুষেরা? (৭৭) এরা সব আমার শত্রু, সৃষ্টি জগতের প্রভু ব্যতীত। (৭৮) যিনি আমাকে সৃষ্টি করেছেন, তিনিই আমাকে পথ দেখান। (৭৯) এবং যিনি আমাকে আহার দেন ও পান করান। (৮০) আর যখন আমি অসুস্থ হই তিনিই আমাকে সুস্থ করেন। (৮১) যিনি আমাকে মৃত্যু প্রদান করবেন তিনিই আমাকে জীবিত করবেন। (৮২) আর তিনিই যাঁর প্রতি আমি আশা রাখি যে, প্রতিফল দিবসে আমার ভুল-ভ্রান্তি ক্ষমা করবেন।

(৮৩) হে আমার প্রভু! আমাকে বিবেক দান করুন এবং আমাকে সংকর্মপরায়ণদের অন্তর্ভুক্ত করুন। (৮৪) পরবর্তী বংশধরদের মধ্যে

আমার সুখ্যাতি অব্যাহত রাখুন। (৮৫) আর আমাকে উদ্যানের নেয়ামতের উত্তরাধিকারী করুন। (৮৬) আর আমার পিতাকে ক্ষমা করুন; অবশ্যই সে পথভ্রষ্ট লোকদের অন্তর্গত। (৮৭) আর যে দিন লোকদেরকে পুনরায় ওঠানো হবে সেদিন আমাকে অপমানিত করবেন না। (৮৮) যে দিন ধন-সম্পদ ও সম্মান-সম্মতি কোন কাজে আসবে না। (৮৯) কেবল সেই সুরক্ষিত হবে যে বিশুদ্ধ অন্তঃকরণ নিয়ে ঈশ্বরের নিকট আসবে।

(৯০) আর স্বর্গ ঈশ্বরভীরুদের নিকটবর্তী করা হবে। (৯১) এবং নরককে বিপথগামীদের সামনে উন্মোচিত করা হবে। (৯২) আর তাদেরকে বলা হবে, কোথায় তারা, তোমরা যাদের উপাসনা করতে। (৯৩) ঈশ্বরের পরিবর্তে? তারা কি তোমাদের সাহায্য করে অথবা তারা কি নিজেদের বাঁচাতে পারে? (৯৪) তারপর তাদের অধোমুখী করে ওতে নিক্ষেপ করা হবে। (৯৫) তারা আর পথভ্রষ্টরা এবং ইবলিসের সেনা, সবাইকে। (৯৬) তারা সেখানে বিতর্কে লিপ্ত হয়ে বলবে, (৯৭) ঈশ্বরের শপথ, আমরা স্পষ্ট বিভ্রান্তির মধ্যে ছিলাম। (৯৮) যখন আমরা তোমাদেরকে জগৎ প্রভুর সমান সাব্যস্ত করতাম। (৯৯) অপরাধীরাই আমাদেরকে বিভ্রান্ত করেছিল। (১০০) এখানে আমাদের কোন সুপারিশকারী নেই। (১০১) আর কোন শুভাকাঙ্ক্ষী বন্ধু ও নেই। (১০২) হায়! আমরা একবার যদি ফিরে যাওয়ার সুযোগ পেতাম তাহলে আস্থাবান হয়ে যেতাম। (১০৩) নিঃসন্দেহে এর মধ্যে নিদর্শন আছে; কিন্তু ওদের মধ্যে অধিকাংশই আস্থাবান নয়। (১০৪) আর নিঃসন্দেহে তোমার প্রভু পরাক্রমশালী ও অতি দয়ালু।

(১০৫) নূহের (নোয়াহ) সম্প্রদায় বার্তাবাহকদের অবিশ্বাস করেছিল। (১০৬) যখন তাদের ভাই নূহ (নোয়াহ) তাদেরকে বললঃ তোমাদের কি ভয় নেই? (১০৭) আমি তোমাদের জন্য একজন বিশ্বস্ত পয়গম্বর। (১০৮) অতএব তোমরা

ঈশ্বরকে ভয় কর আর আমার কথা মানো। (১০৯) আমি এর জন্য তোমাদের কাছে কোন প্রতিদান চাইনা। বিশ্বজগতের প্রভুই আমার প্রতিদান দেবেন। (১১০) অতএব তোমরা ঈশ্বরকে ভয় কর আর আমার কথা মানো। (১১১) ওরা বললঃ যখন কেবল নিম্নতম শ্রেণীর লোকেরা তোমার অনুসরণ করছে সেখানে আমরা কিভাবে তোমার কথা মানি? (১১২) নূহ (নোয়াহ) বললঃ তারা কি করছে আমি তা কি জানি? (১১৩) এর হিসাব তো আমার প্রভুর কাছে আছে, যদি তোমরা জানতে। (১১৪) আর আমি আস্থাবানদেরকে তাড়িয়ে দিতে পারি না। (১১৫) আমি তো কেবল একজন স্পষ্ট সতর্ককারী।

(১১৬) তারা বললঃ হে নূহ (নোয়াহ)! তুমি যদি বিরত না হও তাহলে তোমাকে প্রস্তরাঘাতে হত্যা করা হবে। (১১৭) নূহ (নোয়াহ) বললঃ প্রভু! আমার লোকেরা তো আমাকে অবিশ্বাস করল। (১১৮) অতঃপর আমার আর তাদের মাঝে স্পষ্ট মিমাংসা করে দাও আর আমাকে এবং আমার সাথে যে আস্থাবানেরা আছে তাদেরকে রক্ষা কর। (১১৯) তখন আমি তাকে এবং তার সাথীদেরকে একটি বোঝাইকৃত নৌকায় রক্ষা করলাম। (১২০) এরপর আমি অবশিষ্টদেরকে ডুবিয়ে দিলাম। (১২১) এর মধ্যে অবশ্যই নিদর্শন আছে; কিন্তু তাদের অধিকাংশই মানে না। (১২২) এবং তোমার প্রভু তিনিই যিনি পরাক্রমশালী ও অতি দয়ালু।

(১২৩) আদ সম্প্রদায় পয়গম্বরদেরকে অবিশ্বাস করেছিল। (১২৪) যখন তাদের ভাই হুদ তাদেরকে বললঃ তোমাদের কি ভয় নেই? (১২৫) আমি তোমাদের জন্য একজন বিশ্বস্ত পয়গম্বর। (১২৬) অতএব ঈশ্বরকে ভয় কর আর আমার কথা মানো। (১২৭) আমি এর জন্য তোমাদের কাছে কোনো প্রতিদান চাই না। আমার প্রতিদান তো বিশ্বজগতের প্রভুর কাছে রয়েছে। (১২৮) তোমরা কি প্রত্যেক উঁচু জায়গায় অনর্থক স্মারক তৈরী করছো?

(১২৯) আর বড় বড় অটালিকা তৈরী করছো। মনে করছো তোমরা এখানে চিরকাল থাকবে। (১৩০) আর তোমরা যখন কারো উপর হাত তোল তখন স্বেচ্ছাচারী হয়ে নির্দয়ভাবে হাত তোল। (১৩১) অতএব তোমরা ঈশ্বরকে ভয় কর আর আমার কথা মানো। (১৩২) সেই ঈশ্বরকে ভয় কর যিনি তোমাদেরকে সেই সব জিনিষ দ্বারা সাহায্য করেছেন যা তোমরা জান। (১৩৩) তিনিই তোমাদের সাহায্য করেছেন পশু সম্পদ এবং সন্তান দ্বারা। (১৩৪) এবং বাগান ও বরনা দ্বারা। (১৩৫) আমি তোমাদের জন্য এক ভয়ানক দিনের শাস্তির আশংকা করছি।

(১৩৬) তারা বললঃ আমাদের জন্য উভয়ই সমান, তুমি আমাদের উপদেশ দাও আর না দাও। (১৩৭) এতো কেবল পূর্ববর্তীদের অভ্যাস মাত্র। (১৩৮) আমাদের উপর কোন শাস্তি আসবে না। (১৩৯) অতএব তারা তাকে অবিশ্বাস করল। তারপর আমি ওদের ধ্বংস করে দিলাম, নিঃসন্দেহে এর মধ্যে নিদর্শন আছে। এদের মধ্যে অধিকাংশ লোকই মানে না। (১৪০) এবং তোমার প্রভু তিনিই যিনি পরাক্রমশালী ও অতি দয়ালু।

(১৪১) সামুদ সম্প্রদায় পয়গম্বরদেরকে অবিশ্বাস করেছিল। (১৪২) যখন তাদের ভাই সালেহ তাদেরকে বললঃ তোমাদের কি ভয় নেই? (১৪৩) আমি তোমাদের জন্য একজন বিশ্বস্ত পয়গম্বর। (১৪৪) অতএব তোমরা ঈশ্বরকে ভয় কর এবং আমার আনুগত্য কর। (১৪৫) এর জন্য আমি তোমাদের কাছে কোন প্রতিদান চাই না। আমার প্রতিদান বিশ্বজগতের প্রভুই দেবেন। (১৪৬) তোমরা কি মনে কর তোমাদের (চিরকাল) নিরাপদ অবস্থায় রাখা হবে? (১৪৭) উদ্যান আর বরনার মধ্যে? (১৪৮) ফসলের ক্ষেত আর রসাল মঞ্জুরীবিশিষ্ট খেজুরের মধ্যে? (১৪৯) আর তোমরা গর্ব করে পাহাড় কেটে কেটে ঘর তৈরী করছো। (১৫০) ঈশ্বরকে ভয় কর,

আমার কথা মানো (১৫১) আর সীমা লংঘনকারীদের কথা মান্য করো না। (১৫২) যারা পৃথিবীতে অনর্থ সৃষ্টি করে, ভাল কাজ করে না।

(১৫৩) তারা বললঃ তুমি নিশ্চয় জাদুগ্রস্ত হয়েছে। (১৫৪) তুমিতো আমাদের মতই একজন মানুষ, অতএব যদি তুমি সত্য হও তাহলে কোন নিদর্শন উপস্থিত কর। (১৫৫) সালেহ বললঃ এটা একটা উষ্ট্রী। এর জন্য জল পানের পালা এবং তোমাদের জন্যও জল পানের পালা নির্ধারিত আছে এক এক দিনে। (১৫৬) তোমরা এর কোন ক্ষতি করো না। তাহলে তোমাদের উপর এক ভয়ানক শাস্তি এসে আপতিত হবে। (১৫৭) কিন্তু তারা উষ্ট্রীকে হত্যা করল এবং অপমানিত হয়ে রইল। (১৫৮) অতঃপর তাদের উপরে শাস্তি নেমে এল। এতে অবশ্যই নিদর্শন আছে; কিন্তু তাদের অধিকাংশই তা মানেনি। (১৫৯) নিঃসন্দেহে তোমাদের প্রভু মহা পরাক্রমশালী ও অতি দয়ালু।

(১৬০) লূতের সম্প্রদায়ও পয়গম্বরদেরকে মিথ্যা বলেছিল। (১৬১) যখন তাদের ভাই লূত তাদেরকে বললঃ তোমাদের কি ভয় নেই? (১৬২) আমি তোমাদের জন্য একজন বিশ্বস্ত বার্তাবাহক। (১৬৩) অতএব ঈশ্বরকে ভয় কর আর আমার কথা মানো। (১৬৪) এর জন্য আমি তোমাদের কাছে কোন প্রতিদান চাইনা, আমার প্রতিদান বিশ্বজগতের প্রভু ঈশ্বরের কাছে আছে। (১৬৫) তোমরা কি পৃথিবীতে পুরুষে উপগত হও? (১৬৬) আর তোমাদের প্রভু তোমাদের জন্য যে স্ত্রীদের সৃষ্টি করেছেন তাদেরকে বর্জন কর? তোমরা তো এক সীমালংঘনকারী সম্প্রদায়।

(১৬৭) তারা বললঃ হে লূত! তুমি যদি বিরত না হও তাহলে অবশ্যই তোমাকে বহিস্কার করা হবে। (১৬৮) সে বললঃ তোমাদের এই কু-কর্মে আমি যথার্থই বিরক্ত। (১৬৯) হে আমার প্রভু! আপনি আমাকে ও আমার পরিবারকে এদের কু-কর্ম থেকে রক্ষা করুন। (১৭০) অতঃপর আমি তাকে

আর তার পরিবারকে রক্ষা করলাম। (১৭১) কেবল এক বৃদ্ধা ব্যতীত যে তাদের সাথে রয়ে গিয়েছিল। (১৭২) তারপর আমি অন্যদেরকে ধ্বংস করে দিলাম। (১৭৩) তাদের উপরে আমি মেঘ পাঠালাম, তাদের উপর এক বিশেষ বৃষ্টি বর্ষণ করলাম। ভীতি প্রদর্শিতাদের জন্য এই বৃষ্টি ছিল কত নিকৃষ্ট ! (১৭৪) এর মধ্যে অবশ্যই এক নিদর্শন আছে; কিন্তু তাদের অধিকাংশই মানে না। (১৭৫) আর তোমার প্রভু তো পরাক্রমশালী ও অতি দয়ালু।

(১৭৬) আইকার (বনের) অধিবাসীরা পয়গম্বরদেরকে অবিশ্বাস করেছিল। (১৭৭) যখন শোয়ায়েব ওদেরকে বললঃ তোমরা কি ভয় কর না? (১৭৮) আমি তোমাদের জন্য একজন বিশ্বস্ত পয়গম্বর। (১৭৯) অতএব ঈশ্বরকে ভয় কর আমার কথা মানো। (১৮০) এর জন্য আমি তোমাদের কাছে কোন প্রতিদান চাই না। আমার প্রতিদান তো বিশ্বজগতের প্রভুর কাছে আছে। (১৮১) তোমরা মাপে পূর্ণমাত্রায় দেবে, যারা মাপে কম দেয় তাদের দলভুক্ত হয়ো না। (১৮২) আর সঠিক দাঁড়ি পাল্লায় ওজন কর। (১৮৩) আর লোকদের জিনিষ পত্রে কম দেবে না এবং পৃথিবীতে অশান্তি সৃষ্টি করবে না। (১৮৪) আর সেই সত্ত্বাকে ভয় কর যিনি তোমাদের সৃষ্টি করেছেন এবং তোমাদের পূর্ববর্তীদেরকেও।

(১৮৫) তারা বললঃ তোমার উপর কেউ জাদু করেছে। (১৮৬) আর তুমি তো আমাদের মতই একজন মানুষ। আমাদের ধারণা তুমি একজন মিথ্যাবাদী। (১৮৭) অতএব আমাদের উপর আকাশের কোন খণ্ড ফেল দেখি, যদি তুমি সত্যবাদী হও। (১৮৮) শো'আইব বললঃ তোমরা যা করছো আমার প্রভু তা ভালই জানেন। (১৮৯) সুতরাং তারা তাকে অবিশ্বাস করল। ফলে মেঘাচ্ছন্ন দিনের শান্তি তাদেরকে পাকড়াও করল। (১৯০) সে এক ভয়ংকর দিন ছিল। অবশ্যই এর মধ্যে নিদর্শন আছে। তাদের অধিকাংশই তা মানে না।

(১৯১) নিঃসন্দেহে তোমাদের প্রভু পরাক্রমশালী ও অতি দয়ালু।

(১৯২) আর নিঃসন্দেহে এটা বিশ্বজগতের প্রভু ঈশ্বরের নিকট থেকে অবতীর্ণ বাণী। (১৯৩) এটাকে বিশ্বস্ত দেবদূত নিয়ে এসেছে। (১৯৪) তোমার অন্তরে, যাতে তুমি সতর্ককারীদের অন্তর্ভুক্ত হতে পার। (১৯৫) স্পষ্ট আরবী ভাষায়। (১৯৬) পূর্ববর্তী গ্রন্থসমূহে নিশ্চয় এর উল্লেখ আছে। (১৯৭) ঈসরাইলের সম্প্রদায়ের পণ্ডিতরা অবগত আছে - এটা কি তাদের জন্য নিদর্শন নয়?

(১৯৮) আর যদি আমি এটা কোন অনারবের প্রতি অবতীর্ণ করতাম, (১৯৯) এবং সে এটা তাদেরকে পড়ে শোনাত, তবুও তারা তা বিশ্বাস করত না। (২০০) এভাবেই আমি অপরাধীদের অন্তরে অবিশ্বাস সঞ্চার করেছি। (২০১) এক ভয়ংকর শাস্তি প্রত্যক্ষ না করা পর্যন্ত এরা বিশ্বাস স্থাপন করবে না। (২০২) অতএব এদের কাছে সেই শাস্তি হঠাৎই এসে পড়বে, তারা বুঝতেই পারবে না। (২০৩) তখন এরা বলবে : আমরা কি একটু সময় পেতে পারি?

(২০৪) তারা কি আমার শাস্তি ত্বরাস্তিত করতে চায়? (২০৫) বলে দাও: যদি আমি তাদের কিছু বছর উপভোগ করতে দিই (২০৬) তারপর তাদের উপরে সেই বিষয়টি এসে পড়ে যা থেকে এদেরকে সতর্ক করা হয়েছে। (২০৭) তখন তাদের ওই উপভোগ কোন কাজে আসবে? (২০৮) আমি এমন কোন জনপদ ধ্বংস করিনি যার জন্য সতর্ককারী ছিল না। (২০৯) স্মরণ করানোর জন্য, আমি অত্যাচারী নই। (২১০) শয়তানেরা এ নিয়ে অবতীর্ণ হয় নি। (২১১) তারা এই কাজের যোগ্য নয় এবং তারা এর সামর্থ্যও রাখে না। (২১২) তাদেরকে তো শ্রবণের সুযোগ হতে দূরে রাখা হয়েছে।

(২১৩) অতএব ঈশ্বরের সাথে অন্য কোন উপাস্যকে আহ্বান করো

না, তাহলে তুমি শাস্তি প্রাপ্তদের অন্তর্ভুক্ত হবে। (২১৪) আর তোমার নিকটাত্মীয়দেরকে সতর্ক করে দাও। (২১৫) তোমার অনুসারী আস্থাবানদের প্রতি বিনয়ী হও। (২১৬) যদি তারা তোমাকে অস্বীকার করে তাহলে বলঃ যা কিছু তোমরা করছো তাতে আমি বিরক্ত। (২১৭) আর পরাক্রমশালী, দয়াময় ঈশ্বরের উপর ভরসা রাখো। (২১৮) যিনি তোমাকে দেখতে পান যখন তুমি (প্রার্থনার জন্য) দণ্ডায়মান হও। (২১৯) এবং দেখেন সিজদাকারীদের সাথে তোমার উঠা-বসা। (২২০) নিঃসন্দেহে তিনি সবকিছু শোনেন, সবকিছু জানেন।

(২২১) আমি কি তোমাদের কে বলবো যে, শয়তান কাদের উপর অবতীর্ণ হয়? (২২২) সে প্রত্যেক মিথ্যাবাদী পাপীদের উপর অবতীর্ণ হয়। (২২৩) তারা কান পেতে থাকে এবং তাদের অধিকাংশই মিথ্যাবাদী। (২২৪) দিশাহীন লোকেরাই কবিদের পিছনে চলে। (২২৫) তুমি কি দেখনি যে, তারা প্রত্যেক উপত্যকায় উদ্ভ্রান্ত হয়ে ঘুরে বেড়ায়? (২২৬) আর তারা যা বলে তা করে না। (২২৭) কিন্তু তারা ব্যতীত যারা বিশ্বাস স্থাপন করে আর সংকর্ম করে এবং ঈশ্বরকে অধিক স্মরণ করে আর অত্যাচারিত হওয়ার পর প্রতিরক্ষার ব্যবস্থা গ্রহণ করে। আর অত্যাচারীরা শিঘ্রই জানতে পারবে যে, তাদের কেমন স্থানে ফিরে যেতে হবে।

অধ্যায় ২৭ : আন-নামূল (পিপীলিকা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হোয়া-সীন। এগুলো কুরআন এবং সুস্পষ্ট এক গ্রন্থের বাণী। (২) বিশ্বাসীদের জন্য পথ নির্দেশ ও সুসংবাদ। (৩) যারা নিয়মিত প্রার্থনা করে, উদ্বৃত্ত সম্পদ থেকে নির্ধারিত দান করে আর তারাই পরলোকে নিশ্চিত

বিশ্বাসী। (৪) যারা পরলোক বিশ্বাস করে না, তাদের কর্মকাণ্ডকে আমি তাদের জন্য শোভনীয় করেছি, অতএব তারা বিভ্রান্ত হচ্ছে। (৫) এদের জন্য রয়েছে নিকৃষ্ট শাস্তি এবং পরলোকে এরা সর্বাধিক ক্ষতিগ্রস্ত হবে। (৬) আর নিঃসন্দেহে তোমাকে কুরআন দেওয়া হচ্ছে এক পরম প্রাপ্ত ও মহাজ্ঞানীর পক্ষ থেকে।

(৭) যখন মোজেস তার পরিবারকে বলেছিলঃ আমি একটা আগুন দেখতে পেয়েছি সেখান থেকে কোন সংবাদ আনছি অথবা আগুনের কোন অঙ্গার আনছি যাতে তোমরা উত্তাপ নিতে পার। (৮) সে যখন তার কাছে পৌঁছাল তখন তাকে সম্বোধন করে বলা হলঃ কল্যাণময় তিনি যিনি আগুনের মধ্যে আছেন এবং যে তার পাশে আছে। আর ঈশ্বর পবিত্র যিনি সমস্ত বিশ্ব-জগতের প্রভু।

(৯) হে মোজেস! আমিই ঈশ্বর! পরাক্রমশালী, প্রজ্ঞাময়। (১০) তুমি তোমার লাঠিটি নিক্ষেপ কর। অতঃপর সে যখন সেটিকে সাপের মত নড়তে দেখল তখন সে পিছনে ঘুরলো এবং পালিয়ে গেল। হে মোজেস! ভয় পেওনা, আমার সান্নিধ্যে পয়গম্বরগণ ভয় পায় না। (১১) যারা মন্দ করে, পরে মন্দ কর্মের পরিবর্তে সৎকর্ম করে, তাদের প্রতি আমি ক্ষমাশীল ও অতি দয়ালু। (১২) আর তুমি তোমার হাত বাহুমূলে প্রবেশ করাও, দেখবে কোন দ্রুতি ছাড়াই তা নির্মল শুভ্র হয়ে বেরিয়ে আসবে। ফারাও ও তার সম্প্রদায়ের নিকট আনীত নয়টি নিদর্শনগুলির মধ্যে এটি একটি। নিঃসন্দেহে ওরা অব্যাহত জনগোষ্ঠী। (১৩) অতএব যখন তাদের কাছে আমার স্পষ্ট নিদর্শন এলো তারা বললঃ এতো পরিষ্কার জাদু। (১৪) তারা অন্যায় এবং উদ্ধতভাবে নিদর্শনগুলো প্রত্যাখ্যান করল, যদিও তাদের মন সেগুলো বিশ্বাস করেছিল। দেখ, অশাস্তি সৃষ্টিকারীদের পরিণাম কেমন হয়েছিল।

(১৫) আর আমি দাউদ (ডেভিড) ও সলোমনকে জ্ঞান প্রদান করলাম। তারা দু'জনেই বললঃ সকল প্রশংসা সেই ঈশ্বরের যিনি আমাদেরকে তাঁর অনেক বিশ্বাসী বান্দার উপর শ্রেষ্ঠত্ব প্রদান করেছেন। (১৬) আর দাউদের (ডেভিড) উত্তরাধিকারী হয়েছিল সলোমন। সে বলেছিলঃ হে মানবমণ্ডলী! আমাকে পাখিদের ভাষা শেখানো হয়েছে এবং আমাকে সবকিছুই দেওয়া হয়েছে। অবশ্যই এটা স্পষ্ট অনুগ্রহ।

(১৭) আর সলোমনের জন্য তার সেনা একত্রিত করা হল - জ্বিন, মানুষ, পাখিদেরকে; অতঃপর তার বাহিনী প্রস্তুত করা হল। (১৮) এমনকি যখন পিঁপড়াদের উপত্যাকায় এল, তখন এক পিঁপড়ে বললঃ হে পিঁপড়েরা! তোমরা গর্তে প্রবেশ কর। যাতে সলোমন ও তার সৈন্যরা তোমাদের পদতলে পিষে না দেয়। (১৯) পিঁপড়ের কথা শুনে সলোমন মৃদু হাঁসল আর বললঃ হে প্রভু! আমাকে শক্তি দিন যেন আমি কৃতজ্ঞতা প্রকাশ করতে পারি আপনার অনুগ্রহের জন্য, যা আপনি আমার আর আমার পিতা-মাতার উপর করেছেন, আর আমি যেন ভাল কাজ করতে পারি যে কাজ আপনার পছন্দ, আর আপনি স্বীয় অনুগ্রহে আমাকে আপনার সৎ বান্দাদের অন্তর্ভুক্ত করুন।

(২০) আর সলোমন পাখিদের নিরীক্ষণ করল আর বললঃ কি ব্যাপার হৃদহৃদকে দেখছি না তো? না কি সে অনুপস্থিত? (২১) অবশ্যই আমি তাকে কঠোর শাস্তি দেব, কিংবা বধ করে ফেলব, অথবা সে আমার কাছে কোন স্পষ্ট কারণ উপস্থিত করবে। (২২) অল্পক্ষণের মধ্যেই হৃদহৃদ এসে হাজির হল এবং বললঃ আমি এমন একটা তথ্য নিয়ে এসেছি যা আপনারও অজানা। সাব্বা রাজ্য থেকে একটি নিশ্চিত সংবাদ নিয়ে এসেছি। (২৩) আমি দেখে এসেছি যে, একজন মহিলা সেখানে রাজত্ব করছে, তাকে সবকিছুই দেওয়া হয়েছে, তার একটি বড় সিংহাসন আছে। (২৪) আমি দেখলাম

সে আর তার প্রজারা ঈশ্বরের পরিবর্তে সূর্যকে সিজদা (প্রণতি জ্ঞাপন) করছে, শয়তান তাদের কাজকর্ম তাদের কাছে আকর্ষণীয় করে তুলেছে এবং তাদেরকে সৎপথ থেকে বিরত রেখেছে; অতএব তারা সৎপথ প্রাপ্ত হচ্ছে না। (২৫) তারা কি ঈশ্বরের উপাসনা করবে না, যিনি আকাশ ও পৃথিবীর গোপন বিষয়সমূহ প্রকাশ করেন এবং যা তোমরা গোপন কর বা ব্যক্ত কর সবই তিনি জানেন? (২৬) ঈশ্বর! তিনি ব্যতীত কোন উপাস্য নেই, মহাসিংহাসনের তিনিই অধিপতি।

(২৭) সলোমন বললঃ আমি দেখব, তুমি সত্য বলছ না কি তুমি মিথ্যাবাদী। (২৮) আমার এই পত্রটি নিয়ে যাও এটি তাদের কাছে দেবে, তারপর সেখান থেকে সরে থাকবে, তারপর দেখবে তারা কি প্রতিক্রিয়া ব্যক্ত করে। (২৯) সেবার রাণী (The Queen of Sheba) বললঃ পারিষদবর্গ! আমার কাছে একটি গুরুত্বপূর্ণ পত্র পাঠান হয়েছে। (৩০) সলোমনের নিকট থেকে আর তা এই যে, শুরু আল্লাহর নামে যিনি পরম করুণাময় ও অতি দয়ালু। (৩১) আমার মোকাবেলায় শক্তি প্রদর্শন করো না বরং আনুগত্য স্বীকার করে আমার কাছে উপস্থিত হও। (৩২) রাণী বললঃ হে পারিষদবর্গ! আমার এই ব্যাপারটিতে তোমরা আমাকে পরামর্শ দাও। তোমাদের উপস্থিতি ছাড়া আমি তো কোন চূড়ান্ত সিদ্ধান্ত গ্রহণ করি না। (৩৩) তারা বললঃ আমরা ক্ষমতাবান এবং প্রচণ্ড শক্তিদর; তবে সিদ্ধান্ত গ্রহণের অধিকার আপনার। অতএব আপনি দেখুন আপনি কি নির্দেশ দেবেন। (৩৪) রাণী বললঃ রাজা বাদশাহরা যখন কোন জনপদে প্রবেশ করে তখন তারা তাকে তছনছ করে দেয় এবং সেখানকার সম্মানিত লোকদের লাঞ্চিত করে, এরাও তাই করবে। (৩৫) আমি তাদের কাছে কিছু উপটৌকন পাঠাচ্ছি তারপর দেখি দূতেরা কি জবাব নিয়ে আসে।

(৩৬) অতঃপর দূত যখন সলোমনের কাছে এল, তখন সে বললঃ তোমরা কি আমাকে সম্পদ দিয়ে সাহায্য করতে চাও? ঈশ্বর আমাকে যা দিয়েছেন তা তার চাইতে উত্তম যা তোমাদেরকে দিয়েছেন, তোমরা বরং তোমাদের উপটৌকন নিয়ে প্রসন্ন হও। (৩৭) তাদের কাছে ফিরে যাও। আমি সেখানে এমন সেনাদল নিয়ে আসবো যাদের মোকাবিলা করার শক্তি তাদের নেই আর আমি তাদের সেখান থেকে অপমানিত করে বহিস্কার করবো এবং তারা তিরস্কৃত হবে।

(৩৮) সলোমন বললঃ হে পারিষদবর্গ! তাদের আত্মসমর্পণ করার পূর্বেই কে তার সিংহাসন আমার কাছে আনতে পারবে? (৩৯) জ্বিনদের এক দৈত্য বললঃ আপনি আপনার জায়গা থেকে ওঠার আগেই আমি আপনার কাছে এনে দেব, আর একাজ করার আমি সামর্থ্য রাখি এবং আমি বিশ্বস্ত। (৪০) যার কাছে গ্রন্থের জ্ঞান ছিল সে বললঃ আপনার চোখের পলক পড়ার পূর্বেই আমি তা এনে দেব; অতঃপর সলোমন যখন তার সামনে সিংহাসনটি দেখল তখন বললঃ এটা আমার প্রভুর অনুগ্রহ, যাতে তিনি আমাকে পরীক্ষা করতে পারেন যে, আমি কৃতজ্ঞ হই না অকৃতজ্ঞ হই। আর যে কৃতজ্ঞ হয় সে তার নিজেরই জন্য কৃতজ্ঞ হয় আর যে অকৃতজ্ঞ হয় (তার জানা উচিত) আমার প্রভু অভাবমুক্ত, মহানুভব।

(৪১) সলোমন বললঃ তার সিংহাসনের আকৃতি বদলে দাও, দেখি সে সঠিকদিশা পায়, না সে বিভ্রান্তদের অন্তর্ভুক্ত হয়। (৪২) অতঃপর যখন সে আসলো তখন তাকে জিজ্ঞাসা করা হল, তোমার সিংহাসনটা কি এরকম? সে বললঃ ঠিক যেন এটাই এবং ইতিপূর্বেই আমাদেরকে প্রকৃত জ্ঞান দান করা হয়েছে, আর আমরা আনুগত্য স্বীকারকারী। (৪৩) ঈশ্বরের পরিবর্তে সে যার পূজা করত তা তাকে সত্য হতে নিবৃত্ত করেছিল; নিশ্চয়ই সে

অস্বীকারকারীদের অন্তর্ভুক্ত ছিল। (৪৪) তাকে বলা হলঃ প্রাসাদে প্রবেশ কর। যখন সে ওটাকে দেখল তখন মনে করল যে, ওটা গভীর জল, আর তার দুই গোড়ালি অনাবৃত করে নিল (নিজের কাপড় উঁচু করে নিল)। সলোমন বললঃ এটা তো কাঁচের স্বচ্ছ প্রলেপযুক্ত একটি প্রাসাদ। সে বললঃ হে আমার প্রভু! আমি আমার নিজের প্রতি অন্যায় করেছি। আর আমি সলোমনের সাথে বিশ্বজগতের প্রভু ঈশ্বরের প্রতি বিশ্বাস স্থাপন করলাম।

(৪৫) আমি সামুদ সম্প্রদায়ের কাছে তাদের ভাই সালেহকে এই বলে পাঠালাম যে, তোমরা ঈশ্বরের উপাসনা কর; কিন্তু তারা দুই দলে বিভক্ত হয়ে বিতর্কে লিপ্ত হল। (৪৬) সে বললঃ হে আমার সম্প্রদায়! তোমরা কল্যাণের আগে দ্রুত অকল্যাণ চাইছ কেন? তোমরা কেন ঈশ্বরের কাছে ক্ষমা চাইছো না? যাতে তোমরা অনুগ্রহ পেতে পার। (৪৭) তারা বললঃ আমরা তো তোমাকে ও তোমার সঙ্গীদেরকে অশুভ মনে করি। সে বললঃ তোমাদের শুভাশুভ ঈশ্বরের এখতিয়ারে, বস্তুত তোমরা এমন এক সম্প্রদায়, যাদেরকে পরীক্ষা করা হচ্ছে।

(৪৮) তাদের শহরে এমন নয়জন ব্যক্তি ছিল যারা পৃথিবীতে অশান্তি করে বেড়াতে এবং তারা সংশোধনের কাজ করত না। (৪৯) তারা বললঃ তোমরা ঈশ্বরের শপথ নাও, রাত্রিকালে আমরা অবশ্যই তাকে আর তার পরিবার পরিজনকে আক্রমণ করবো এবং তার অভিভাবকদের (যারা প্রতিফল চায়) বলে দেব - যখন তাদেরকে হত্যা করা হয় আমরা উপস্থিত ছিলাম না। আমরা অবশ্যই সত্যবাদী। (৫০) আর তারা একটি কৌশল অবলম্বন করেছিল আর আমিও একটি পাল্টা কৌশল অবলম্বন করেছিলাম, তারা আঁচ করতেও পারেনি। (৫১) অতএব দেখ, তাদের কৌশলের পরিণাম কি হয়েছিল। আমি তাদেরকে আর তাদের পুরো সম্প্রদায়কে ধ্বংস করে

দিলাম। (৫২) অতএব এই হল তাদের ঘরবাড়ী, তাদের অপকর্মের জন্য জনশূন্য অবস্থায় পড়ে আছে। নিঃসন্দেহে এতে জ্ঞানী লোকদের জন্য নিদর্শন আছে। (৫৩) আর আমি এই লোকদের রক্ষা করলাম যারা বিশ্বাস স্থাপন করেছিল এবং ভয় করত।

(৫৪) আর লূত যখন তার সম্প্রদায়কে বললঃ তোমরা জেনেশুনে কেন অশ্লীলতা অবলম্বন করছো? (৫৫) তোমরা কি পুরুষের সাথে কাম-প্রবৃত্তি চরিতার্থ করছো মহিলাদের ছেড়ে? আসলে তোমরা এক বর্বর জনগোষ্ঠী। (৫৬) এর জবাবে তার সম্প্রদায় কেবল এটাই বলেছিলঃ লূতের পরিবারকে আমাদের নগর থেকে তাড়িয়ে দাও, এরা খুবই পবিত্র সাজছে। (৫৭) অতঃপর আমি লূত ও তার পরিবারকে রক্ষা করলাম, তবে তার স্ত্রীকে ছাড়া যাকে আমি অবশ্যই পশ্চাৎগামীদের অন্তর্ভুক্ত করেছিলাম। (৫৮) আর তাদের উপর এক ভয়ানক বর্ষণের শাস্তি প্রেরণ করেছিলাম। কেমন ভয়ঙ্কর বর্ষণ ছিল তাদের উপর যে সম্পর্কে তাদের সাবধান করা হয়েছিল। (৫৯) বলঃ প্রশংসা ঈশ্বরের জন্য আর শাস্তি তাঁর ঐ বান্দাদের যাদেরকে তিনি মনোনীত করেছেন। আল্লাহ উত্তম না ওরা যাদেরকে অংশীদার করে?

(৬০) কে তিনি যিনি আকাশ ও পৃথিবী সৃষ্টি করেছেন আর তোমাদের জন্য আকাশ থেকে বৃষ্টি বর্ষণ করেছেন আর তা থেকে সৌন্দর্যমণ্ডিত উদ্যান উৎপন্ন করেছেন? এমন গাছপালা উৎপন্ন করা তোমাদের পক্ষে সম্ভব ছিল না। ঈশ্বরের সাথে অন্য কোন উপাস্য আছে কি? বরং তারা দিশাহীন করে দেওয়া সম্প্রদায়। (৬১) কে পৃথিবীকে বাসযোগ্য করেছেন এবং এর মধ্যে নদী প্রবাহিত করেছেন, এর জন্য পর্বতসমূহ স্থাপন করেছেন, আর দুই সমুদ্রের মাঝে অন্তরায় রেখেছেন? ঈশ্বরের সাথে অন্য কেউ উপাস্য আছে কি? কিন্তু ওদের অধিকাংশই তা জানে না।

(৬২) কে আছেন যিনি আর্থের ডাকে সাড়া দেন আর তার দুঃখ দূর করে দেন, তোমাদেরকে পৃথিবীর উত্তরাধিকারী বানান? ঈশ্বরের সাথে অন্য কোন উপাস্য আছে কি? তোমরা খুবই অল্প উপদেশ গ্রহণ কর। (৬৩) কে তোমাদেরকে জলে-স্থলে অন্ধকারে পথ দেখান, আর যিনি স্বীয় অনুগ্রহের পূর্বাভাষ রূপে বাতাস প্রেরণ করেন? ঈশ্বরের সাথে অন্য কোন উপাস্য আছে কি? তারা যাকে অংশীদার বানায় ঈশ্বর তার উর্দে। (৬৪) কে সৃষ্টির সূচনা করেছেন আবার তার পুনরাবৃত্তি করেন? আকাশ ও পৃথিবী থেকে কে তোমাদের জীবিকা দান করেন? ঈশ্বরের সাথে অন্য কোন উপাস্য আছে কি? বলঃ তোমরা যদি সঠিক হও তাহলে তার প্রমাণ পেশ কর।

(৬৫) বলঃ ঈশ্বর ছাড়া আকাশ ও পৃথিবীর অদৃশ্যের জ্ঞান কারো নেই। আর তারা জানে না কখন পুনরুত্থিত হবে। (৬৬) বরং পরলোক সম্পর্কে ওদের জ্ঞান ফুরিয়ে গেছে, তারা এ বিষয়ে সন্দিহান; বরং এ বিষয়ে ওরা অন্ধ। (৬৭) আর অবিশ্বাসীরা বলেঃ আমরা ও আমাদের পূর্বপুরুষরা মৃত্তিকায় পরিণত হয়ে গেলেও কি আমাদেরকে পুনরুত্থিত করা হবে? (৬৮) এই প্রতিশ্রুতি আমাদেরকে দেওয়া হচ্ছে আর পূর্বে আমাদের পূর্বপুরুষদেরও দেওয়া হয়েছিল, এটা তো পূর্ববর্তীদের উপকথা ছাড়া আর কিছু নয় (৬৯) বলঃ পৃথিবীতে পরিভ্রমণ করে দেখ অপরাধীদের পরিণাম কি হয়েছিল।

(৭০) আর তাদের জন্য দুঃখ করো না আর তাদের ষড়যন্ত্রে মনঃক্ষুব্ধ হয়ো না। (৭১) আর তারা বলেঃ যদি তোমরা সঠিক হও তাহলে বলঃ সেই প্রতিশ্রুতি কবে পূরণ হবে? (৭২) বলে দাওঃ তোমরা যার জন্য তাড়াতাড়ি করছো হয়ত তার কিছু তোমাদের কাছে আসতে আরম্ভ করেছে। (৭৩) নিঃসন্দেহে তোমার প্রভু মানুষের প্রতি অনুগ্রহশীল বরং তাদের অনেকেই কৃতজ্ঞতা প্রকাশ করে না। (৭৪) তাদের অন্তর যা লুকিয়ে রাখে

এবং তারা যা প্রকাশ করে অবশ্যই তোমার প্রভু তা ভালভাবেই জানেন। (৭৫) আকাশ ও ধরণীর এমন কোন অদৃশ্য বস্তু নেই যার কথা স্পষ্ট গ্রন্থে লেখা নেই।

(৭৬) নিঃসন্দেহে এই কুরআন ইসরাইলের সন্তানদের কাছে অনেক বিষয় স্পষ্ট করেছে যা নিয়ে তারা মতভেদ করত। (৭৭) আর তা আস্ত্রাবানদের জন্য অবশ্যই এক দিক নির্দেশনা ও অনুগ্রহ। (৭৮) নিঃসন্দেহে তোমার প্রভু তাঁর বিধান অনুযায়ী তাদের মধ্যে মীমাংসা করে দেবেন। তিনি পরাক্রমশালী, মহাজ্ঞানী। (৭৯) অতএব ঈশ্বরের উপর ভরসা কর, নিঃসন্দেহে তুমি স্পষ্ট রূপে সত্যের উপর আছো। (৮০) তুমি মৃত কিংবা বধিরকে ডাক শোনাতে পার না, যখন তারা পিছন ফিরে চলে যায়। (৮১) আর অন্ধকেও পথ ভ্রষ্টতা থেকে সুপথে আনতে পার না। তুমি কেবল শোনাতে পারবে তাদেরকে যারা আমার নিদর্শন সমূহ বিশ্বাস করে। আর তারাই আত্মসমর্পণকারী।

(৮২) যখন তাদের প্রতিশ্রুতি বাস্তবায়িত হবে তখন তাদের জন্য ভূমি থেকে এক দাব্বাহ^১ (একটি অমানবীয় প্রাণী) বার করবো যে তাদের সাথে এ কথা বলবে যে, লোকেরা আমার নিদর্শন সমূহ বিশ্বাস করত না।

^১ বিঃদ্রঃ-(২৭ঃ৮২) এক সময়ে যখন ঈশ্বর পৃথিবীর বর্তমান ইতিহাস সমাপ্ত করার সিদ্ধান্ত নেন, তখন শেষ পর্বের পূর্বাভাস হিসাবে কিছু অস্বাভাবিক নিদর্শন তিনি প্রকাশ করেন। এই সমস্ত নিদর্শনগুলির মধ্যে ‘দাব্বাহ’ এর আবির্ভাব একটি। মানুষের মাধ্যমে কি বাণী আনীত হয়েছে এবং মানুষ কি গ্রহণ করে নি - দাব্বাহ সেগুলো ঘোষণা করবে। আধুনিক যোগাযোগ মাধ্যম সম্ভবত ‘দাব্বাহ’ বলে উদ্দিষ্ট হয়েছে। এটাই হবে পরীক্ষা সমাপ্তি ঘোষণার ঘণ্টা ধ্বনি, প্রারম্ভিক নয়।

(৮৩) যে দিন আমি প্রত্যেক জাতি থেকে একটি করে দল একত্রিত করবো যারা আমার নিদর্শনসূহ বিশ্বাস করত না; অতঃপর তাদেরকে ভাগে ভাগে বিন্যস্ত করা হবে। (৮৪) অবশেষে তারা যখন উপস্থিত হবে তখন ঈশ্বর বলবেনঃ তোমরা কি ভালভাবে না জেনেই আমার নিদর্শন সমূহকে মিথ্যা বলেছিলে? না কি তোমরা অন্য কিছু করছিলে? (৮৫) তাদের বিরুদ্ধে ফয়সলা এসে যাবে, কারণ তারা অন্যায় করেছে, তাই তারা কথা বলতে পারবে না। (৮৬) তারা কি দেখেনা যে, আমি রাত বানিয়েছি যাতে তারা বিশ্রাম করতে পারে আর দিনকে করেছে আলোকময়, নিঃসন্দেহে এতে বিশ্বাসীদের জন্য রয়েছে নিদর্শন।

(৮৭) যে দিন মহাশঙ্খে ফুৎকার দেওয়া হবে সেদিন ঈশ্বর যাদেরকে চাইবেন তারা ব্যতীত আকাশ ও পৃথিবীতে যারা আছে তারা সবাই ভীত-বিস্মল হয়ে যাবে আর বিনীত অবস্থায় সবাই তাঁর কাছে চলে আসবে। (৮৮) তুমি পাহাড় দেখে তাকে নিশ্চল মনে কর, অথচ তা মেঘের মত চলমান হবে। এটা ঈশ্বরের কাজ যিনি সবকিছু নিপুনভাবে করেছেন। নিঃসন্দেহে তিনি জানেন যা কিছু তোমরা কর। (৮৯) যারা ভাল কাজ নিয়ে আসবে তারা তার চেয়েও ভাল প্রতিদান পাবে এবং সে দিন তারা ভয় থেকে নিরাপদ থাকবে। (৯০) আর যারা খারাপ কাজ নিয়ে আসবে তাদেরকে অধোমুখ করে নরকের আগুনে নিক্ষেপ করা হবে। তোমরা যা করতে তোমাদেরকে কেবল তারই প্রতিফল দেওয়া হচ্ছে।

(৯১) আমাকে এই আদেশ দেওয়া হয়েছে যে, আমি যেন এই নগরের (মক্কার) প্রভুর উপাসনা করি যিনি একে প্রতিষ্ঠিত করেছেন। তিনিই সবকিছুর মালিক। আমাকে আরো আদেশ দেওয়া হয়েছে যে, যেন আমি আব্রাহামপূজারকারী হই। (৯২) আর এই কুরআন পাঠ করি। অতএব যে সৎপথে

আসবে সে নিজের জন্যই সৎপথে আসবে, আর কেউ বিপথগামী হলে বলঃ আমি তো কেবল একজন সতর্ককারী। (৯৩) আর বলঃ সকল প্রশংসা কেবল ঈশ্বরের। তিনি তোমাকে তাঁর নিদর্শন দেখাবেন এবং তুমি তাঁকে চিনতে পারবে, তোমাদের প্রভু সে সম্পর্কে বেখবর নন যা তোমরা কর।

অধ্যায় ২৮ : আল কাসাস (বিবরণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ছোয়া-সীন-মীম। (২) এগুলো স্পষ্ট গ্রন্থের বাণী। (৩) আমি মূসা (মোজেস) ও ফারাও এর কিছু বৃত্তান্ত তোমাকে যথাযথভাবে শোনাচ্ছি, বিশ্বাসী সম্প্রদায়ের উদ্দেশ্যে। (৪) নিঃসন্দেহে ফারাও পৃথিবীতে বিদ্রোহ করেছে। সে এর বাসিন্দাদের বিভিন্ন দলে বিভক্ত করে দিয়েছে। এদের মধ্যে একটি দলকে সে দুর্বল করে রেখেছিল। সে ওদের ছেলেদের হত্যা করত আর মেয়েদেরকে জীবিত রাখত। সে ছিল অশান্তি সৃষ্টিকারীদের অন্তর্ভুক্ত। (৫) যাদেরকে পৃথিবীতে দুর্বল করে রাখা হয়েছিল, আমি চাইলাম তাদের প্রতি অনুগ্রহ করতে, তাদেরকে উত্তরাধিকারী করতে। (৬) আর তাদেরকে ক্ষমতা প্রদান করতে। আর ফারাও, হামান ও তাদের সেনাদের দেখিয়ে দিতে যা তারা ভয় করত।

(৭) আর আমি মূসার (মোজেসের) মাকে 'ইলহাম' (অবগত) করলাম সে যেন তাকে বুকের দুধপান করায়। যখন তার সম্পর্কে বিপদের আশঙ্কা করবে তখন সে যেন তাকে নদীতে নিক্ষেপ করে। কোনও আশঙ্কা করো না আর কোন দুঃখ পেয়োনা। আমি তাকে তোমার কাছে ফিরিয়ে আনব এবং তাকে একজন পয়গম্বর বানাব। (৮) অতএব তাকে ফারাও এর পরিবার উঠিয়ে নিল যাতে সে তাদের শত্রু এবং দুঃখের কারণ হতে পারে। নিঃসন্দেহে

ফ্যারাও, হামান ও তাদের সেনাদল পাপী ছিল। (৯) আর ফ্যারাও এর স্ত্রী বললঃ এ আমার ও তোমার নয়নের প্রশান্তি। একে হত্যা করো না, সে আমাদের উপকারে আসতে পারে, না হয় আমরা একে সন্তান হিসাবে গ্রহণ করবো। আসলে তারা বুঝতে পারেনি।

(১০) আর মূসার (মোজেসের) মায়ের হৃদয় ব্যকুল হয়ে পড়ল। সে প্রায় তা প্রকাশ করে ফেলেছিল যদি তার হৃদয়কে দৃঢ় না করতাম যাতে সে আস্থাশীল থাকে। (১১) সে মূসার (মোজেসের) বোনকে বললঃ তুমি এর পিছনে পিছনে যাও। আর সে অপরিচিতা হয়ে তাকে লক্ষ্য করতে লাগল আর তারা ঘূনাক্ষরেও জানতে পারল না। (১২) আর আমি আগে থেকেই ধাত্রীস্তুন্যপানে মূসাকে (মোজেসকে) বিরত রেখেছিলাম। তখন মেয়েটি বললঃ আমি কি আপনাদের এমন একটা পরিবারের সন্ধান দেব যারা আপনাদের জন্য এর লালন-পালনের দায়িত্ব নেবে এবং তারা এর হিতাকাঙ্ক্ষীও হবে। (১৩) এভাবে আমি তাকে তার মায়ের কোলে ফিরিয়ে দিলাম যাতে তার চোখ জুড়ায়। আর সে কষ্ট না পায় আর সে জানুক যে, ঈশ্বরের প্রতিশ্রুতি সত্য; কিন্তু অধিকাংশ লোকই তা জানে না। (১৪) আর মূসা (মোজেস) যখন পরিণত বয়সে উপনীত হল এবং সুপুরুষ হল তখন আমি তাকে প্রজ্ঞা ও জ্ঞান দান করলাম। আর আমি সৎকর্মশীলদের এভাবেই প্রতিফল দিয়ে থাকি।

(১৫) সে নগরে প্রবেশ করল যখন নগরবাসীরা অসতর্ক ছিল। সে দু'জন লোককে মারা মারি করতে দেখল। একজন তার নিজের দলের আর অন্যজন তার শত্রুপক্ষের। তার নিজের দলের লোকটি তার শত্রুদলের লোকটির বিরুদ্ধে তার সাহায্য চাইল। মোজেস তখন লোকটিকে ঘুষি মেরে হত্যা করে বসলো। সে বললঃ এটা শয়তানের কাজ। নিশ্চয় সে একজন

বিশৃঙ্খলা সৃষ্টিকারীর অন্তর্ভুক্ত। (১৬) সে বললঃ হে প্রভু! আমি তো আমার নিজের প্রতি অন্যায় করে ফেলেছি। অতএব তুমি আমাকে ক্ষমা কর। ঈশ্বর তাকে ক্ষমা করলেন। নিঃসন্দেহে, তিনি ক্ষমাশীল পরম দয়ালু। (১৭) সে বললঃ হে আমার প্রভু! আপনি যেহেতু আমাকে অনুগ্রহ করলেন এরপর আমি কখনই অপরাধীদের সাহায্যকারী হব না।

(১৮) অতঃপর ভীত সতর্ক অবস্থায় সেই নগরীতে তার প্রভাত হল। তখন দেখল যে ব্যক্তি গতকাল তার সাহায্য চেয়েছিল সে আজও তাকে সাহায্যের জন্য ডাকছে। মূসা (মোজেস) তাকে বললঃ নিঃসন্দেহে তুমি একটা বিপথগামী লোক। (১৯) তারপর সে যখন ঐ লোকটিকে ধরতে চাইল যে তাদের দু'জনেরই শত্রু, তখন সে বললঃ হে মূসা (মোজেস)! তুমি কি আমাকে হত্যা করতে চাও না কি, যেমন কাল এক ব্যক্তিকে হত্যা করেছে? তুমি তো কেবল পৃথিবীতে স্বেচ্ছাচারী হয়ে থাকতে চাও, শান্তি স্থাপনকারী হতে চাও না। (২০) আর এক ব্যক্তি শহরের প্রান্ত থেকে দৌড়ে এল। সে বললঃ হে মূসা (মোজেস)! পারিষদবর্গ তোমাকে মেরে ফেলার শলা পরামর্শ করছে। অতএব তুমি পালিয়ে যাও, আমি তোমার শুভাকাঙ্ক্ষী। (২১) তারপর ভয়ে ভয়ে সে সেখান থেকে বেরিয়ে গেল। সে বললঃ হে প্রভু! অত্যাচারীদের হাত থেকে আমাকে রক্ষা করুন।

(২২) আর যখন সে মাদইয়ান অভিমুখে যাত্রা করার সিদ্ধান্ত নিল তখন বললঃ আশাকরি আমার প্রভু আমাকে সঠিক পথ দেখাবেন। (২৩) আর যখন সে মাদইয়ানের কূপের নিকট পৌঁছাল তখন দেখল একদল লোক জল পান করাচ্ছে। তাদের পাশেই সে দু'জন মহিলাকে দেখল, যারা তাদের পশুগুলো ধরে দাঁড়িয়ে আছে। মূসা (মোজেস) তাদের জিজ্ঞাসা করল তোমাদের কি ব্যাপার? তারা বললঃ রাখালেরা যতক্ষণ না তাদের

পশুগুলোকে সরিয়ে নিচ্ছে আমরা জল পান করাতে পারছি না। আমাদের পিতা একজন বৃদ্ধ মানুষ। (২৪) তখন সে তাদের পশুগুলোকে জল পান করাল। তারপর ছায়ার দিকে সরে গেল এবং বললঃ প্রভু! আপনি আমাকে যে কল্যাণই দিন কেন আমি তার প্রত্যাশি।

(২৫) তারপর মহিলাদ্বয়ের একজন সলজ্জ পদক্ষেপে তার কাছে এল এবং বললঃ আপনি যে আমাদের হয়ে জল পান করিয়েছেন তার পুরস্কার দিতে আমাদের পিতা আপনাকে ডাকছেন। তারপর যখন সে তার কাছে এল এবং সমস্ত বৃত্তান্ত বলল তখন সে বললঃ ভয় করো না, তুমি অত্যাচারী লোকদের কবল থেকে রক্ষা পেয়েছ। (২৬) তাদের মধ্যে একজন বললঃ হে পিতা! একে তুমি কাজে রেখে দাও। এর মত শক্তিশালী ও বিশ্বস্ত লোকই তোমার সবচেয়ে ভাল কাজের লোক হবে। (২৭) সে বললঃ আমার এই দুই মেয়ের একজনকে তোমার সাথে বিবাহ দিতে চাই এই শর্তে যে তুমি আমার কাছে আট বছর কাজ করবে। আর যদি তুমি দশ বছর পুরো কর তাও করতে পারবে। তবে আমি তোমাকে কষ্ট দিতে চাই না। ঈশ্বরের ইচ্ছায় তুমি আমাকে ভাল লোক হিসাবেই দেখতে পাবে। (২৮) মুসা (মোজেস) বললঃ আমার ও আপনার মাঝে এই চুক্তিই থাকল। আমি এ দু'টি মেয়াদ এর যে কোনটি পুরো করি না কেন আমার উপর কোন বাধ্য-বাধকতা থাকবে না। ঈশ্বর আমাদের কথা ও চুক্তির সাক্ষী রইলেন।

(২৯) অতঃপর মুসা (মোজেস) যখন তার মেয়াদ পূর্ণ করে সপরিবারে যাত্রা করল তখন তুর পর্বতের দিক থেকে একটা আগুন দেখতে পেল। সে তার পরিবারকে বললঃ তোমরা অপেক্ষা কর, আমি একটা আগুন দেখতে পেয়েছি। সম্ভবতঃ আমি ওখান থেকে কোন সংবাদ আনতে পারি অথবা আগুনের অঙ্গার যাতে তোমরা তাপ নিতে পার। (৩০) অতঃপর সে যখন

আগুনের কাছে গেল তখন ঐ পবিত্র ভূখণ্ডের ডান দিকের বৃক্ষ থেকে সন্মোহন করে বলা হলঃ হে মুসা (মোজেস)! আমি ঈশ্বর, বিশ্বজগতের মালিক। (৩১) আরো বলা হলঃ তোমার লাঠিটা নিষ্ক্ষেপ করো। অতঃপর সে যখন লাঠিটাকে সাপের মত নড়াচড়া করতে দেখল তখন পিছনে ফিরে পালাল, ঘুরে দেখল না। হে মুসা (মোজেস)! এগিয়ে এস, ভয় পেয়ো না। তুমি অবশ্যই সুরক্ষিত। (৩২) তোমার হাত বাহুমূলে রাখো, দেখবে কোন ক্রটি ছাড়াই তা শুভ্র সমুজ্জ্বল হয়ে বেরিয়ে আসবে। আর ভয় দূর করার জন্য তোমার হস্তদ্বয় তোমার পার্শ্বদেশে লাগিয়ে ধর। এদুটি হল তোমার প্রভুর পক্ষ থেকে দুই প্রমাণ, ফ্যারাও ও তার পারিষদবর্গের কাছে যাওয়ার জন্য। তারা তো দুষ্কর্ম পরায়ণ সম্প্রদায়।

(৩৩) মুসা (মোজেস) বললঃ হে আমার প্রভু! আমি তাদের মধ্যে এক ব্যক্তিকে হত্যা করেছি। সেজন্য আমি ভয় পাচ্ছি তারা আমাকে মেরে ফেলবে। (৩৪) আর আমার ভাই হারুন (অ্যারন) তার ভাষা আমার চেয়ে সাবলীল; অতএব আপনি তাকেও আমার সাথে সাহায্যকারী হিসাবে পাঠান। আমার আশংকা তারা আমাকে অবিশ্বাস করবে। (৩৫) বললেনঃ তোমার ভাই দ্বারা অবশ্যই তোমার হাত শক্তিশালী করে দেব এবং তোমাদের দু'জনকে ক্ষমতা প্রদান করবো যাতে তারা তোমাদের কাছে পৌঁছাতে না পারে। আমার নিদর্শনাবলীর দ্বারা তোমরা এবং তোমাদের অনুসারীরাই বিজয়ী হবে।

(৩৬) অতঃপর মুসা (মোজেস) যখন তাদের কাছে আমার স্পষ্ট নিদর্শনসমূহ নিয়ে এল, তারা বললঃ এতো উদ্ভাবিত জাদু ছাড়া আর কিছু নয়। আমরা আমাদের পূর্ব-পুরুষদের মুখে এতো শুনি নি। (৩৭) আর মুসা (মোজেস) বললঃ আমার প্রভু সবচেয়ে ভাল জানেন কে তাঁর কাছ থেকে দিক নির্দেশনা নিয়ে এসেছে এবং পরলোকে কার পরিণতি ভাল

হবে। নিঃসেন্দেহে অত্যাচারীরা সফলতা পাবে না। (৩৮) ফ্যারাও বললঃ হে পারিষদবর্গ! আমি ছাড়া তোমাদের অন্য কোন উপাস্যের কথা আমার জানা নেই। হামান! তুমি আমার জন্যে ইট পোড়াও এবং একটি সুউচ্চ প্রাসাদ তৈরী কর; যাতে আমি মূসার প্রভুকে দেখতে পারি। আমি অবশ্য মনে করি, সে একজন মিথ্যাবাদী।

(৩৯) সে এবং তার সৈন্যরা পৃথিবীতে অন্যায়ভাবে অহংকার করেছিল এবং তাদের ধারণা ছিল তাদের আমার কাছে আর ফিরে আসতে হবে না। (৪০) তাই আমি তাকে ও তার সেনাদের পাকড়াও করলাম। তারপর ওদেরকে সমুদ্রে নিক্ষেপ করলাম। দেখ, অত্যাচারীদের পরিণাম কি হয়েছিল। (৪১) ওদেরকে আমি নেতা বানিয়েছিলাম, যারা নরকের দিকে ডাকত। আর মহাবিনাশের দিনে তাদেরকে সাহায্য করা হবে না। (৪২) আর এই পৃথিবীতে আমি তাদের পিছনে অভিশাপ লাগিয়ে রেখেছি এবং শেষ বিচারের দিনে তারা দুর্দশাগ্রস্ত হবে। (৪৩) পূর্ববর্তী প্রজন্মসমূহকে ধ্বংস করার পর আমি মূসাকে (মোজেসকে) গ্রন্থ দিয়েছি। মানুষের জন্য জ্ঞানবর্তিকা, পথনির্দেশ ও অনুগ্রহ স্বরূপ, যাতে তারা উপদেশ গ্রহণ করে।

(৪৪) যখন আমি মূসার (মোজেসের) কাছে নির্দেশ পৌঁছে দিয়েছিলাম তখন তুমি পাহাড়ের পশ্চিম প্রান্তে উপস্থিত ছিলে না এবং তুমি প্রত্যক্ষদর্শীও ছিলে না। (৪৫) কিন্তু আমি অনেক প্রজন্ম সৃষ্টি করেছি এবং ওদের উপর দিয়ে অনেক যুগও অতিবাহিত হয়েছে। আর তুমি মাদইয়ানবাসীদের সাথেও থাকতে না যে, তাদেরকে আমার বাণী সমূহ শোনাতে; আমিই তো ছিলাম পয়গম্বর প্রেরণকারী। (৪৬) আমি যখন মূসাকে (মোজেসকে) সন্মোদন করেছিলাম তখন তুমি তুর পর্বতপার্শ্বে উপস্থিত ছিলে না; কিন্তু এটা তোমার প্রভুর অনুগ্রহ, যাতে তুমি এমন এক সম্প্রদায়কে সতর্ক কর যাদের কাছে

তোমার পূর্বে কোন সতর্ককারী আসে নি যেন তারা উপদেশ গ্রহণ করে।

(৪৭) এবং তাদের কৃতকর্মের জন্য তাদের উপর কোন বিপদ নেমে এলে তারা যেন বলতে না পারে যে - হে আমাদের প্রভু ! তুমি আমাদের কাছে কোন পয়গম্বর পাঠালে না কেন? তাহলে আমরা তোমার বাণী সমূহ মেনে চলতাম এবং আমরা আস্ত্রাবানদের অন্তর্ভুক্ত হতাম। (৪৮) অতঃপর যখন আমাদের পক্ষ হতে সত্য এল তখন তারা বললঃ মুসাকে (মোজেসকে) যেমন দেওয়া হয়েছিল এই পয়গম্বরকে তেমনটি দেওয়া হয় নি কেন? পূর্বে মুসাকে (মোজেসকে) যা দেওয়া হয়েছিল তারা কি তা অবিশ্বাস করেনি? তারা বললঃ দুটোই জাদু, একটি আরেকটির সহায়ক। তারা আরও বললঃ আমরা দুটোকেই অবিশ্বাস করি।

(৪৯) বলঃ তাহলে তোমরা ঈশ্বরের কাছ থেকে কোন গ্রন্থ নিয়ে এসো যা পথ নির্দেশের জন্য এই দুটির চেয়ে উত্তম, আমি তা অনুসরণ করবো যদি তোমরা সত্যবাদী হও। (৫০) তখন যদি তারা তোমার কথায় সাড়া না দেয় তাহলে জানবে, তারা শুধু নিজেদের প্রবৃত্তির অনুসরণ করেছে। আর তাদের চেয়ে অধিক পথভ্রষ্ট কে হবে যারা ঈশ্বরের পথ নির্দেশ না মেনে নিজের প্রবৃত্তির অনুসরণ করে? ঈশ্বর যুলুমকারীদেরকে পথ দেখান না। (৫১) আর আমি তো তাদের জন্য একের পর এক বাণী পাঠিয়েছি যাতে তারা উপদেশ গ্রহণ করে।

(৫২) যাদেরকে আমি ইতিপূর্বে গ্রন্থ দিয়েছিলাম তারা এই কুরআন বিশ্বাস করে। (৫৩) যখন তাদের কাছে এটা শোনান হয় তখন তারা বলে আমরা এটা বিশ্বাস করি। নিঃসন্দেহে এ সত্য আমাদের প্রভুর নিকট থেকে আগত। আমরা তো পূর্ব হতেই এর মান্যকারী। (৫৪) এরাই সেই লোক যাদেরকে দ্বিগুণ প্রতিফল দেওয়া হবে, কেননা তারা ধৈর্য ধারণ করেছে। আর

তারা ভাল দ্বারা মন্দ প্রতিহত করে আর আমি যা কিছু তাদের দিয়েছি তা হতে খরচ করে। (৫৫) তারা যখন অসার বাক্য শ্রবণ করে তখন তা থেকে বিমুখ হয় আর বলে, আমাদের জন্য আমাদের কর্ম আর তোমাদের জন্য তোমাদের কর্ম। তোমাদের জন্য শান্তি কামনা করি! আমরা অজ্ঞদের সহচর্য চাই না। (৫৬) তুমি যাকে ইচ্ছা সুপথে আনতে পারবে না; বরং ঈশ্বর যাকে ইচ্ছা সুপথ দিতে পারেন। আর তিনিই ভাল জানেন কে সুপথ স্বীকার করবে।

(৫৭) আর তারা বলেঃ যদি আমরা তোমাদের সাথে এই উপদেশ মত কাজ করতে থাকি তাহলে এই ভূ-ভাগ থেকে আমাদেরকে উৎখাত করা হবে। আমি কি তাদেরকে শান্তির স্থলে (মক্কায়) স্থান দিইনি? যেখানে সর্বপ্রকার ফলমূল আমদানী হয়, আমার পক্ষ হতে জীবিকা সুরুদপ; কিন্তু তাদের অধিকাংশই এটা জানে না।

(৫৮) আর আমি কত না জনপদ ধ্বংস করে দিয়েছি যারা তাদের আর্থিক উন্নতিতে গর্ব করত। এই তো তাদের জনপদ যা তাদের পরে খুব কমই আবাদ হয়েছে। আর আমিই তার উত্তরাধিকারী হয়েছি। (৫৯) তোমার প্রভু জনপদসমূহ ধ্বংস করেন না, যতক্ষণ পর্যন্ত তার কেন্দ্রে তিনি একজন পয়গম্বর না পাঠান। যে তাদেরকে আমার বাণীসমূহ পাঠ করে শোনায়। আমি কোন জনপদ ধ্বংস করি না যতক্ষণ পর্যন্ত তার অধিবাসীরা অত্যাচারী না হয়।

(৬০) তোমাদেরকে যা দেওয়া হয়েছে তা তো কেবল পার্থিব জীবনের ভোগ আর শোভা। আর যা কিছু ঈশ্বরের কাছে আছে তা আরও ভাল এবং স্থায়ী। তবুও কি তোমরা অনুধাবন করবে না? (৬১) যাকে আমি উত্তম প্রতিশ্রুতি দিয়েছি, সে তা পাবেই। সে কি ঐ ব্যক্তির সমান হতে পারে যাকে আমি কেবল পার্থিব জীবনের ভোগ সম্ভার দিয়েছি, এবং তাকে পুনরুত্থান দিবসে হাজির করা হবে?

(৬২) আর যে দিন ঈশ্বর তাদেরকে ডেকে বলবেন, তোমরা যাদেরকে আমার অংশীদার বলে দাবী করতে তারা কোথায়? (৬৩) যাদের জন্য শাস্তি অবধারিত হয়ে গেছে তারা বলবেঃ হে আমাদের প্রভু! এই লোকেরাই আমাদের পথভ্রষ্ট করেছিল। আমরাও ওদেরকে সেভাবেই পথভ্রষ্ট করেছিলাম যেমন ভাবে আমরা স্বয়ং বিভ্রান্ত হয়েছিলাম। আমরা তোমার সামনে দায়মুক্ত হতে চাই। এরা আমাদের উপাসনা করত না।

(৬৪) বলা হবেঃ তোমাদের অংশীদারদের ডাক! তারা তাদেরকে ডাকবে; কিন্তু তাদের ডাকে সাড়া দেবে না এবং তারা শাস্তি প্রত্যক্ষ করবে। হায়! তারা যদি সঠিক পথে চলত! (৬৫) আর সেদিন ঈশ্বর তাদের ডেকে বলবেনঃ তোমরা পয়গম্বরদেরকে কি জবাব দিয়েছিলে? (৬৬) সেদিন তাদের সব কথা অদৃশ্য হয়ে যাবে, তারা একে অপরকেও জিজ্ঞেস করতে পারবে না। (৬৭) তবে হ্যাঁ, যারা অনুতাপ করেছিল এবং বিশ্বাস এনেছিল এবং ভাল কাজ করেছিল আশা করা যায় তারা সফলকাম হবে।

(৬৮) তোমার প্রভু যা ইচ্ছা সৃষ্টি করেন এবং যাকে ইচ্ছা মনোনীত করেন। এই ব্যাপারে তাদের কোন এজ্জিয়ার নেই। ঈশ্বর পবিত্র ও মহান। তারা যাকে অংশীদার বানায় তা থেকে তিনি উদ্ধে। (৬৯) আর তোমার প্রভু জানেন যা তারা অন্তরে গোপন করে আর যা তারা প্রকাশ করে। (৭০) আর তিনিই ঈশ্বর, তিনি ছাড়া কোন উপাস্য নেই, তাঁরই জন্য প্রশংসা ইহলোকে এবং পরলোকে। সিদ্ধান্ত তাঁরই এবং তাঁর কাছেই তোমাদেরকে ফিরে যেতে হবে।

(৭১) তাদেরকে বলঃ যদি ঈশ্বর শেষ বিচারের দিন পর্যন্ত তোমাদের জন্য রাতকে স্থায়ী করেন তাহলে তিনি ছাড়া এমন উপাস্য কে আছে, যে তোমাদের জন্য আলো এনে দিতে পারে? তবুও কি তোমরা শুনবে না?

(৭২) তাদেরকে জিজ্ঞেসা কর, ঈশ্বর যদি শেষ বিচারের দিন পর্যন্ত দিনকে স্থায়ী করে দিতেন তাহলে ঈশ্বর ছাড়া আর কোন উপাস্য আছে যে তোমাদের জন্য রাত নিয়ে আসতে পারে যাতে তোমরা বিশ্রাম কর। তবুও কি তোমরা দেখবে না? (৭৩) তিনিই আপন অনুগ্রহে তোমাদের জন্য রাত ও দিন সৃষ্টি করেছেন যাতে তোমরা তাতে বিশ্রাম করতে পারো এবং তাঁর অনুগ্রহ সন্ধান করতে পারো আর যাতে তোমরা তাঁর কৃতজ্ঞতা প্রকাশ করতে পার।

(৭৪) আর যে দিন ঈশ্বর তাদেরকে ডেকে বলবেন, তোমরা যাদেরকে আমার অংশীদার বলে গর্ব করতে তারা কোথায়? (৭৫) আর আমি প্রত্যেক সম্প্রদায় হতে একজন সাক্ষী উপস্থিত করবো এবং বলবো: তোমাদের প্রমাণ উপস্থিত কর, তখন তারা জানতে পারবে যে, সত্য ঈশ্বরের পক্ষে এবং তারা যা উদ্ভাবন করত তা তাদের কাছ থেকে উধাও হয়ে যাবে।

(৭৬) কারদন (কোরাহ) ছিল মূসার দলেরই একজন; কিন্তু সে তার বিরুদ্ধে বিদ্রোহ করল আর আমি তাকে এত সম্পদ দিয়েছিলাম যার চাবি বহন করতে অনেক বলবান লোকও ক্লান্ত হয়ে পড়ত। যখন তার লোকেরা তাকে বলেছিল অহংকার করো না, ঈশ্বর অহংকারকারীদের পছন্দ করেন না। (৭৭) ঈশ্বর তোমাকে যা কিছু দিয়েছেন তা দিয়ে পরলোকের আবাস অনুসন্ধান কর এবং পৃথিবী হতে তোমার (পরলোকের) আবাস সন্ধান করতে ভুলে যেও না আর মানুষের প্রতি অনুগ্রহ কর যেমন ঈশ্বর তোমার প্রতি অনুগ্রহ করেছেন, আর পৃথিবীতে বিশৃঙ্খলা সৃষ্টি করতে চেয়ো না, ঈশ্বর বিশৃঙ্খলাকারীদের পছন্দ করেন না।

(৭৮) সে বললঃ এই সম্পদ আমার নিজস্ব জ্ঞানের দ্বারা প্রাপ্ত হয়েছে। সে কি জানে না যে, ঈশ্বর তার পূর্বেও কত প্রজন্ম সমূহকে ধ্বংস করে দিয়েছেন, যারা ছিল তার চেয়ে অধিক শক্তিশালী ও অধিক জনবলের অধিকারী? আর

অপরাধীদেরকে তাদের অপরাধ সম্পর্কে জিজ্ঞাসা করা হবে না।

(৭৯) অতঃপর সে জাকজমক সহকারে তার সম্প্রদায়ের লোকদের সামনে উপস্থিত হল। যারা পার্থিব জীবনের ভোগ বিলাস কামনা করত তারা বললঃ আহা! আমাদেরও যদি ঐ রকম দেওয়া হত যেমন কারদনকে (কোরাহ) দেওয়া হয়েছে। নিশ্চয়ই সে বড় ভাগ্যবান। (৮০) কিন্তু তাদেরকে জ্ঞান দেওয়া হয়েছিল তারা বললঃ ধিক তোমাদেরকে! যারা বিশ্বাস করে এবং সৎকাজ করে তাদের জন্য ঈশ্বরের পুরস্কারই উত্তম, এ পুরস্কার কেবল ধৈর্যশীলরাই পাবে।

(৮১) অতঃপর আমি তাকে আর তার ঘরবাড়ীকে ভূগর্ভে ধ্বসিয়ে দিলাম তখন ঈশ্বরের বিপক্ষে তাকে সাহায্য করার জন্য কেউ দাঁড়াল না আর সে স্বয়ং নিজেকে রক্ষা করতে পারল না। (৮২) আর যারা আগের দিনই তার মত হওয়ার আকাঙ্ক্ষা ব্যক্ত করেছিল তারা বলতে লাগলঃ আফসোস! নিঃসন্দেহে ঈশ্বর তাঁর বান্দাদের মধ্যে যাকে ইচ্ছা জীবিকা প্রসারিত করেন আর যাকে ইচ্ছা তার জন্য জীবিকা সঙ্কুচিত করেন। ঈশ্বর যদি আমাদের প্রতি অনুগ্রহ না করতেন তাহলে আমাদেরকেও ভূগর্ভে ধ্বসিয়ে দিতেন। আফসোস! অস্বীকার কারীরা সফলকাম হয় না।

(৮৩) এই পরলোকের আবাস আমি তাদেরকে দেব যারা পৃথিবীতে ঔদ্ধত্য দেখাতে বা বিশৃঙ্খলা সৃষ্টি করতে চায় না। আর অস্তিম পরিণাম ঈশ্বরভীরুদের জন্য। (৮৪) যে ভাল কর্ম নিয়ে আসবে, তার জন্য আরো ভাল পরিণাম, আর যে ব্যক্তি মন্দ নিয়ে আসবে তারা যা করেছে কেবল তারই প্রতিফল পাবে।

(৮৫) নিঃসন্দেহে যিনি তোমার উপর কুরআনের দায়িত্ব দিয়েছেন তিনি তোমাকে এক ভাল পরিণামের দিকে পরিচালিত করবেন। বলঃ আমার

প্রভু ভালভাবেই জানেন কে সুপথ নিয়ে এসেছে আর কে স্পষ্ট বিভ্রান্তিতে আছে। (৮৬) তুমি আশা করনি যে তোমার প্রতি গ্রন্থ অবতীর্ণ হবে। এটা তো কেবল তোমার প্রভুর অনুগ্রহ। অতএব তুমি অবিশ্বাসীদের সহায় হয়েও না। (৮৭) তোমার প্রতি ঈশ্বরের বাণী অবতীর্ণ হওয়ার পর তারা যেন তোমাকে কিছুতেই সেগুলো থেকে বিচ্যুত করতে না পারে। আর তুমি তোমার প্রভুর দিকে আহ্বান কর। অংশীবাদীদের দলভুক্ত হয়েও না। (৮৮) ঈশ্বরের সাথে অন্য কোন উপাস্যকে ডেকো না। তিনি ছাড়া কোন উপাস্য নেই। তাঁর সত্ত্বা ছাড়া সবকিছুই ধ্বংস হয়ে যাবে। সিদ্ধান্ত তাঁরই এবং তাঁর কাছেই তোমাদেরকে ফিরে যেতে হবে।

অধ্যায় ২৯ : আল আনকাবুত (মাকড়সা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-মীম। (২) মানুষ কি মনে করে যে, “আমরা বিশ্বাস স্থাপন করেছি” বললেই তাদেরকে ছেড়ে দেওয়া হবে এবং তাদেরকে যাচাই করা হবে না? (৩) আর আমি তাদের পূর্বে যারা ছিল তাদেরকে যাচাই করেছি। অতএব ঈশ্বর তাদেরকে অবশ্যই জেনে নেবেন কারা সত্যবাদী আর তিনি মিথ্যাকেও অবশ্যই যাচাই করে নেবেন।

(৪) যারা দুর্কর্ম করছে তারা কি মনে করছে যে, তারা আমার থেকে বেঁচে যাবে? তাদের সিদ্ধান্ত কত মন্দ! (৫) যে ব্যক্তি ঈশ্বরের সাক্ষাত কামনা করে সে জেনে রাখুক তার নির্ধারিত সময় অবশ্যই আসবে। তিনি সবকিছু শোনে সবকিছু জানেন। (৬) আর যে পরিশ্রম করে সে নিজের জন্যেই পরিশ্রম করে; নিশ্চই ঈশ্বর বিশ্বজগৎ হতে অমুখাপেক্ষী। (৭) আর যারা

বিশ্বাস স্থাপন করে এবং সৎকর্ম করে, আমি তাদের মন্দগুলো দূর করে দেব এবং তাদের কাজের উৎকৃষ্টতম প্রতিদান দেব।

(৮) আর আমি মানুষকে সতর্ক করেছি তারা যেন তাদের পিতা-মাতার সঙ্গে ভাল ব্যবহার করে। তবে তারা যদি তোমাকে আমার সাথে এমন কিছুকে অংশীদার স্থাপন করতে বলে যে সম্পর্কে তোমার কোন জ্ঞান নেই তবে তুমি তাদেরকে মান্য করো না। তোমাদের সবাইকে আমার কাছে ফিরে আসতে হবে। তখন তোমাদের বলে দেব যা কিছু তোমরা করতে। (৯) আর যারা বিশ্বাস স্থাপন করেছে এবং ভালকর্ম করেছে তাদেরকে আমি আমার সৎ বান্দাদের অন্তর্ভুক্ত করবো।

(১০) মানুষের মধ্যে এমনও আছে যারা বলেঃ আমরা ঈশ্বরের প্রতি বিশ্বাস স্থাপন করেছি; কিন্তু যখন তারা ঈশ্বরের পথে নিপীড়িত হয় তখন তারা মানুষের নিপীড়নকে ঈশ্বরের শাস্তির ন্যায় মনে করে। আর তোমার প্রভুর পক্ষ থেকে যদি কোন সাহায্য আসে তখন তারা বলেঃ আমরা তো তোমাদের সাথেই ছিলাম, ঈশ্বর কি তাদের অন্তরের কথা সম্যক অবগত নন? (১১) নিশ্চয় ঈশ্বর বিশ্বাস স্থাপনকারীদের চিহ্নিত করবেন এবং কপটাচারীদের ও চিহ্নিত করবেন।

(১২) আর অবিশ্বাসীরা বিশ্বাসীদেরকে বলে যে, তোমরা আমাদের পথে চলো আমরা তোমাদের পাপ বহন করবো, আসলে তারা তাদের কোন পাপ বহন করবে না; তারা অবশ্যই মিথ্যাবাদী। (১৩) তারা তাদের নিজের বোঝা বহন করবে এবং তাদের বোঝার সাথে আরো কিছু বোঝা, আর তারা যে সব মিথ্যা উদ্ভাবন করে সে সম্পর্কে বিচারদিনে তাদেরকে জিজ্ঞাসা করা হবে।

(১৪) আর আমি নূহকে (নোয়াহ) তার সম্প্রদায়ের কাছে পাঠিয়েছিলাম।

সে তাদের মাঝে পঞ্চাশ বৎসর কম এক হাজার বছর অবস্থান করেছিল। অতঃপর তারা প্লাবনের কবলে পড়ে, আর তারা ছিল অত্যাচারী। (১৫) আমি তাকে ও তার নৌকার আরোহীদের রক্ষা করলাম এবং এই ঘটনাটিকে আমি জগৎবাসীদের জন্য একটি নিদর্শন বানিয়ে দিলাম।

(১৬) আর স্মরণ কর আব্রাহামকে, যখন সে তার সম্প্রদায়কে বলেছিলঃ ঈশ্বরের উপাসনা করো এবং তাঁকে ভয় কর। এটাই তোমাদের জন্য ভাল যদি তোমরা জানতে। (১৭) তোমরা তো ঈশ্বরের পরিবর্তে কতকগুলো মূর্তির পূজা করছো আর মিথ্যা উদ্ভাবন করছো। ঈশ্বরের পরিবর্তে তোমরা যাদের পূজা করছো তারা তো তোমাদের জীবিকার মালিক নয়। অতএব তোমরা ঈশ্বরের কাছে জীবিকা প্রার্থনা কর এবং তাঁর উপাসনা কর ও তাঁর প্রতি কৃতজ্ঞতা প্রকাশ কর। তাঁর কাছেই তোমাদেরকে ফিরে যেতে হবে। (১৮) আর যদি তোমরা অবিশ্বাস করো তাহলে তোমাদের পূর্বেও অনেক জাতিসমূহ অবিশ্বাস করেছিল। স্পষ্টভাবে বার্তা পৌঁছে দেওয়া ছাড়া পয়গম্বরের কোন দায়-দায়িত্ব নেই।

(১৯) লোকেরা কি দেখেনা যে, কিভাবে ঈশ্বর সৃষ্টি শুরু করেন? তারপর তার পুনরাবৃত্তি করবেন। এটা নিঃসন্দেহে ঈশ্বরের জন্য সহজ। (২০) বলঃ তোমরা পৃথিবীতে পরিভ্রমণ করে দেখ, ঈশ্বর কিভাবে সৃষ্টির সূচনা করেছেন। ঈশ্বর একে পুনরায় সৃষ্টি করবেন। নিঃসন্দেহে ঈশ্বর সবকিছু করতে সক্ষম। (২১) তিনি যাকে ইচ্ছা শাস্তি দেবেন এবং যাকে ইচ্ছা অনুগ্রহ করবেন। আর তাঁরই দিকে তোমরা প্রত্যাবর্তিত হবে। (২২) তোমরা স্থলে বা অন্তরীক্ষে তাঁর উদ্দেশ্যকে পরাভূত করতে পারবে না আর তোমাদের জন্য ঈশ্বর ব্যতীত কোন অভিভাবক নেই, সাহায্যকারীও নেই। (২৩) আর যারা ঈশ্বরের নিদর্শন সমূহ ও তাঁর সাক্ষাৎ অবিশ্বাস করে তারাই আমার

করণা থেকে বঞ্চিত হয় এবং তাদের জন্য রয়েছে যন্ত্রণাদায়ক শাস্তি।

(২৪) আব্রাহামের সম্প্রদায় উত্তরে শুধু এই কথা বলল যে একে হয় হত্যা করো নয়তো পুড়িয়ে দাও। ঈশ্বর তাকে আগুন থেকে রক্ষা করেন। এই ঘটনার মধ্যে আস্থাবানদের জন্য অবশ্যই নিদর্শন রয়েছে। (২৫) আর সে বললঃ তোমরা ঈশ্বর ছাড়া যে সব মূর্তিগুলো তৈরী করেছ তা শুধু পার্থিব জীবনে পারস্পারিক বন্ধুত্বের জন্য। বিচারদিনে তোমরা একে অপরকে অস্বীকার করবে এবং একে অপরকে অভিশাপ দেবে। আর তোমাদের ঠিকানা হবে নরকে এবং কেউ তোমাদেরকে সমর্থন করবে না। (২৬) অতঃপর লুত তাকে (আব্রাহামকে) মেনে নিল এবং বললঃ আমি আমার প্রভুর দিকে ফিরে এলাম। নিঃসন্দেহে তিনি মহা পরাক্রমশালী, মহাজ্ঞানী। (২৭) আমি তাকে (আব্রাহামকে) ইসহাক (আইজ্যাক) ও ইয়াকুব (জ্যাকব) দান করলাম। তার বংশধরদের মধ্যে পয়গম্বরত্ব ও গ্রন্থ নির্ধারণ করলাম এবং পৃথিবীতে তাকে তার যোগ্য পুরস্কার দিলাম এবং পরলোকেও সে সৎলোকদের অন্তর্ভুক্ত হবে।

(২৮) আর লুত যখন তার আপন সম্প্রদায়কে বলেছিলঃ তোমরা এমন অশ্লীল কর্ম করছো যা তোমাদের পূর্বে সারা বিশ্বে আর কেউ করেনি। (২৯) তোমরা কি পুরুষে উপগত হও, রাহাজানী কর এবং নিজেদের মজলিশে ঘৃণ্য কাজ কর? উত্তরে তার সম্প্রদায় শুধু এই কথাই বলল যে, যদি তুমি সত্য হও তাহলে আমাদের উপর ঈশ্বরের শাস্তি নিয়ে এস। (৩০) লুত বললঃ হে আমার প্রভু! অনর্থ সৃষ্টিকারীদের বিরুদ্ধে আমাকে সাহায্য করুন।

(৩১) আর যখন আমার দূতেরা সংবাদ নিয়ে আব্রাহামের কাছে পৌঁছাল তখন তারা বললঃ আমরা এই জনপদের অধিবাসীদের ধ্বংস করে দেব। নিঃসন্দেহে এর অধিবাসীরা খুবই অত্যাচারী।

(৩২) আব্রাহাম বললঃ সেখানে তো লুতও আছে তারা বললঃ আমরা ভালই জানি সেখানে কে আছে। আমরা তাকে আর তার পরিবারকে বাঁচিয়ে নেব; তবে তার স্ত্রীকে নয়। সে পিছনে থেকে যাওয়া লোকদের মধ্যে থাকবে। (৩৩) অতঃপর যখন আমার দূতেরা লুতের কাছে এল তখন সে তাদের নিয়ে দুশ্চিন্তায় পড়ে গেল এবং সঙ্কটাপন্ন বোধ করল। তারা বললঃ তুমি ভয় পেয়ো না আর চিন্তাও করো না। আমরা তোমাকে আর তোমার পরিবারকে রক্ষা করবো তবে তোমার স্ত্রীকে নয়। সে পিছনে থেকে যাওয়া লোকদের মধ্যে থাকবে। (৩৪) আমরা এই জনপদের অধিবাসীদের উপর তাদের কুকর্মের শাস্তি স্বরূপ আকাশ থেকে এক মহা বিপদ অবতীর্ণ করবো। (৩৫) আর বুদ্ধিমান লোকদের জন্য আমি এই জনপদের কিছু স্পষ্ট নিদর্শন অবশিষ্ট রেখেছি।

(৩৬) আর মাদইয়ানের প্রতি তাদের ভাই শো'আইব কে পাঠিয়েছিলাম। সে বলেছিলঃ হে আমার সম্প্রদায়! ঈশ্বরের উপাসনা কর। আর পরলোকের দিনে আশা রাখো এবং পৃথিবীতে বিশৃঙ্খলা সৃষ্টি করো না। (৩৭) কিন্তু তারা তাকে অবিশ্বাস করল; অতঃপর তাদের উপরে ভূমিকম্পের আঘাত আসে এবং তারা নিজেদের বাড়ী-ঘরে উপুড় হয়ে পড়ে থাকে।

(৩৮) আর আদ এবং সামুদকেও ধ্বংস করেছিলাম আর তাদের বাড়ীঘর থেকে তোমাদের কাছে তাদের রহস্য উদ্ঘাটিত হয়েছে। শয়তান তাদের কাজকর্ম তাদের কাছে শোভনীয় করেছিল এবং তাদেরকে সৎপথ অবলম্বন থেকে বিরত রেখেছিল যদিও তারা দূরদৃষ্টি সম্পন্ন লোক ছিল।

(৩৯) কারুন (কোরাহ), ফ্যারাও ও হামান কে ধ্বংস করেছিলাম আর মূসা (মোজেস) তাদের কাছে স্পষ্ট নিদর্শন নিয়ে এসেছিল তখন তারা ধরণীতে অহংকার করল; কিন্তু তারা আমার শাস্তি এড়াতে পারে

নি। (৪০) অতএব আমি প্রত্যেককেই তাদের অপরাধের জন্য ধরলাম। তাদের মধ্যে কতকের উপর শিলাবৃষ্টিসহ প্রবল ঝড় পাঠালাম আর কতককে বজ্রপাত ঘায়েল করেছিল। আর কতককে আমি ভূগর্ভে বিলিন করে দিলাম এবং কতককে আমি ডুবিয়ে দিলাম। ঈশ্বর তাদের প্রতি কোন অত্যাচার করেন নি বরং তারা স্বয়ং নিজের উপর অত্যাচার করেছিল।

(৪১) যারা ঈশ্বরের পরিবর্তে অন্য অভিভাবক বানিয়ে নেয় তাদের অবস্থা হল মাকড়সার মত। যে নিজের জন্য ঘর বানায় এবং ঘরের মধ্যে মাকড়সার ঘরই তো দুর্বলতম, হায়! যদি লোকেরা জানত! (৪২) ঈশ্বরের পরিবর্তে যত কিছুকেই তারা ডাকে অবশ্যই ঈশ্বর তা জানেন। তিনি পরাক্রমশালী, মহাজ্ঞানী। (৪৩) আর এসব উদাহরণ আমি মানুষের জন্য দিয়ে থাকি, তবে কেবল জ্ঞানীরাই তা বুঝতে পারে। (৪৪) ঈশ্বর আকাশ ও পৃথিবী যথার্থভাবেই সৃষ্টি করেছেন। নিঃসন্দেহে এতে বিশ্বাসীদের জন্য নিদর্শন রয়েছে।

(৪৫) তোমার কাছে যে গ্রন্থ অবতীর্ণ করা হয়েছে তা পাঠ কর, প্রার্থনা কর; নিঃসন্দেহে প্রার্থনা অশ্লীলতা ও খারাপ কাজ থেকে বিরত রাখে আর ঈশ্বরের স্মরণই সবচেয়ে বড়।^১ ঈশ্বর জানেন যা তোমরা কর।

^১ বিঃদ্রঃ-(২৯:৪৫) যখন কোন মানুষ গভীর ঈশ্বর চेतনার বা মারেফাতের মাধ্যমে বিশুদ্ধ জ্ঞান লাভ করে, তখন তার সমগ্র অস্তিত্ব ঈশ্বর ভাবনা দ্বারা পরিব্যপ্ত হয়। এটাই হল ঈশ্বর স্মরণ বা জিকর। ঈশ্বর স্মরণ বা জিকর এর ঝরণাধারা তার সমস্ত শরীর ও মনের গহীনে সতত উৎসারিত ও প্রবাহিত হয়। আধ্যাত্মিকতার এই উচ্চ মার্গে পৌঁছানোর পর মানুষ উদাত্ত কণ্ঠে ঈশ্বরের প্রশংসায় বিভোর হয়ে যায় এবং এটাই নিঃসন্দেহে প্রার্থনা বা আরাধনার এক উচ্চতম রূপ।

(৪৬) উদ্ভ্রমপন্থা ব্যতীত গ্রন্থধারীদের সাথে তর্ক-বিতর্ক করো না, তাদের সাথে করতে পার যারা তাদের মধ্যে অনাচারী। আর বলবে, আমাদের কাছে যা প্রেরিত হয়েছে আমরা তাতে বিশ্বাস করি এবং তোমাদের কাছে যা প্রেরিত হয়েছে তাতেও। আমাদের ও তোমাদের উপাস্য একই এবং আমরা তাঁরই অনুগত।

(৪৭) আর এভাবেই আমি তোমাদের উপর গ্রন্থ অবতীর্ণ করেছি; তবে যাদেরকে আমি গ্রন্থ দিয়েছিলাম তারা এটাকে বিশ্বাস করে এবং এদের ও কেউ কেউ এতে বিশ্বাস করে। আর আমার বাণী সমূহ কেবল মাত্র অবিশ্বাসীরাই অস্বীকার করে থাকে। (৪৮) তুমি তো আগে কোন গ্রন্থ পাঠ করনি এবং স্বহস্তে কোন গ্রন্থ লেখনি যে, মিথ্যাচারীরা সন্দেহ পোষন করবে। (৪৯) বস্তুত যাদেরকে জ্ঞান প্রদান করা হয়েছে, তাদের অন্তরে এটা স্পষ্ট নিদর্শন। শুধু যালিমরাই আমার নিদর্শন অস্বীকার করে।

(৫০) আর তারা বলেঃ তার কাছে তার প্রভুর পক্ষ থেকে নিদর্শন পাঠান হয় নি কেন? বলঃ নিদর্শন তো ঈশ্বরের কাছেই আছে আর আমি কেবল একজন পরিষ্কার সতর্ককারী। (৫১) এদের জন্য কি এটাই যথেষ্ট নয় যে, যে গ্রন্থ আমি অবতীর্ণ করেছি তা এদেরকে পড়ে শোনান হয়। নিঃসন্দেহে এর মধ্যে কৃপা ও কল্যাণ রয়েছে তাদের জন্য যারা বিশ্বাস স্থাপন করেছে। (৫২) বলঃ আমার ও তোমাদের মধ্যে সাক্ষী হিসাবে ঈশ্বরই যথেষ্ট। আকাশ ও পৃথিবীতে যা কিছু আছে তা সবই তিনি জানেন, আর যারা মিথ্যায় বিশ্বাস করে এবং ঈশ্বরকে অবিশ্বাস করে তারাই ক্ষতিগ্রস্ত হবে।

(৫৩) আর এরা তোমাকে শাস্তি নিয়ে আসতে বলে। যদি একটি সময় নির্ধারিত না থাকত তাহলে শাস্তি এসেই যেত। নিশ্চয়ই তা তাদের উপর হঠাৎই এসে পড়বে। যা তারা জানতেই পারবে না। (৫৪) তারা তোমার কাছে দ্রুত শাস্তি চাইছে; অথচ নরক তাদেরকে ঘিরেই রয়েছে।

(৫৫) যে দিন মাথার উপর থেকে এবং পায়ের নিচ থেকে তাদের উপর শাস্তি এসে পড়বে, তিনি বলবেন, তোমরা তোমাদের কৃতকর্মের স্বাদ আস্বাদন কর।

(৫৬) হে আমার সত্যে বিশ্বাস স্থাপনকারী বান্দারা! আমার পৃথিবী তো প্রশস্ত; তোমরা আমারই উপাসনা কর। (৫৭) প্রত্যেক জীবই মৃত্যুর স্বাদ গ্রহণ করবে। তারপর তোমরা আমারই কাছে প্রত্যাবর্তিত হবে। (৫৮) আর যারা বিশ্বাস স্থাপন করেছে এবং সৎকাজ করেছে, তাদেরকে আমি স্বর্গের সুউচ্চ প্রাসাদে স্থান দেব, যার পাদদেশ দিয়ে নদী প্রবাহিত হবে, তারা সেখানে চিরকাল থাকবে, কত সুন্দর প্রতিফল সৎকর্মশীলদের! (৫৯) যারা ধৈর্য ধারণ করে আর আপন প্রভুর প্রতি ভরসা করে। (৬০) অনেক প্রাণী আছে যারা নিজের জীবিকা (আহার) সঙ্গে রাখে না। ঈশ্বর তাদের জীবিকা প্রদান করেন এবং তোমাদেরও। তিনি সবকিছু শোনে, সবকিছু জানেন।

(৬১) তুমি যদি এদেরকে প্রশ্ন কর যে, কে আকাশ ও পৃথিবী সৃষ্টি করেছেন এবং সূর্য ও চন্দ্রকে নিয়ন্ত্রিত করেছেন? তবে অবশ্যই এরা বলবে ঈশ্বর। তাহলে তারা বিপথগামী হয় কিভাবে? (৬২) ঈশ্বরই তাঁর বান্দাদের মধ্যে যাকে চান জীবিকা প্রসারিত করেন এবং যাকে চান সঙ্কুচিত করেন। নিঃসন্দেহে ঈশ্বর সবকিছুই অবগত আছেন। (৬৩) আর যদি তুমি এদেরকে প্রশ্ন কর, কে আকাশ থেকে বৃষ্টি বর্ষণ করেন এবং তার সাহায্যে মৃতভূমি কে জীবিত করেন? তাহলে অবশ্যই তারা বলবে, ঈশ্বর। বলঃ সকল প্রশংসা ঈশ্বরের। তবে তাদের অধিকাংশই বোঝে না।

(৬৪) এই পার্থিব জীবন তো একটা আমোদ-প্রমোদ আর খেলা ছাড়া কিছুই নয়। পরলোকের জীবনই প্রকৃত জীবন, যদি তারা জানত। (৬৫) অতএব যখন তারা নৌকায় আরোহণ করে তখন ঈশ্বরকে একনিষ্ঠ বিশ্বাস নিয়ে ডাকে। তারপর তিনি যখন তাদের উদ্ধার করে স্থলে নিয়ে আসেন, অমনি তারা অংশীদার বানাতে থাকে। (৬৬) আমি তাদেরকে যা দান করেছি তার প্রতি

অকৃতজ্ঞ থাকার জন্য এবং কিছুদিনের জন্য ভোগে মত্ত থাকার জন্য। তবে তারা শীঘ্রই জানতে পারবে।

(৬৭) তারা কি দেখেনি, আমি একটি শান্তিপূর্ণ পবিত্র স্থান বানিয়েছি, অথচ আশ-পাশ থেকে মানুষকে ছিনিয়ে নেওয়া হচ্ছে? তবে কি তারা মিথ্যায় বিশ্বাস করে আর ঈশ্বরের অনুগ্রহ অস্বীকার করে? (৬৮) যে ঈশ্বরের নামে মিথ্যা বানিয়ে বলে অথবা তার কাছে সত্য আসার পর তা অবিশ্বাস করে তার চেয়ে বড় যুলুমকারী আর কে আছে? অবিশ্বাসীদের ঠিকানা কি নরক নয়? (৬৯) যারা আমার জন্য কঠোর পরিশ্রম করবে তাদেরকে আমি পথ দেখাব। অবশ্যই ঈশ্বর সৎকর্মশীলদের সাথে আছেন।

অধ্যায় ৩০ : আর-রুম (রোমান)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-মিম। (২) রোমানরা পরাজিত হয়েছে (৩) নিকটবর্তী অঞ্চলে; কিন্তু তারা তাদের পরাজয়ের পর শীঘ্রই বিজয়ী হবে। (৪) কয়েক বছরের মধ্যেই। আগের ও পরের সকল বিষয় ঈশ্বরের হাতে। সেদিন আত্মবানগণ প্রসন্ন হবে। (৫) ঈশ্বরের সহায়তায়। তিনি যাকে ইচ্ছা সহায়তা করেন। তিনি পরাক্রমশালী ও অতি দয়ালু। (৬) এটা ঈশ্বরের প্রতিশ্রুতি। ঈশ্বর তাঁর প্রতিশ্রুতি ব্যতিক্রম করেন না; কিন্তু অধিকাংশ লোকে জানে না। (৭) তারা পার্থিব জীবনের বাহ্যিক সম্পর্কে অবগত, আর তারা পরলোক সম্পর্কে অনবহিত।

(৮) তারা কি নিজেদের সম্পর্কে ভেবে দেখে না? ঈশ্বর তো আকাশ ও পৃথিবী আর যা কিছু এর মধ্যে আছে যথার্থভাবেই সৃষ্টি করেছেন। আর তাও কেবল এক নির্দিষ্ট কাল অবধি; কিন্তু অনেক মানুষই তাদের প্রভুর সাথে সাক্ষাৎকে অস্বীকার করে। (৯) এরা কি পৃথিবীতে ঘুরে দেখে না যে, এদের

পূর্ববর্তীদের পরিণতি কেমন হয়েছিল? তারা এদের চেয়েও শক্তিশালী ছিল। তারা পৃথিবীতে কৃষিকাজ করত এবং এদের চেয়ে অধিক পরিমাণে তারা ওটা আবাদ করত। তাদের পয়গম্বররা তাদের কাছে সুস্পষ্ট প্রমাণ নিয়ে এসেছিল। অতএব ঈশ্বর তাদের প্রতি কোন অত্যাচার করেন নি; বরং তারাই তাদের নিজেদের প্রতি অত্যাচার করত। (১০) অতঃপর যারা মন্দ কাজ করেছিল তাদের পরিণতি মন্দই হয়েছিল; কারণ তারা ঈশ্বরের নিদর্শন সমূহকে মিথ্যা বলেছিল এবং তা নিয়ে ঠাট্টা-বিদ্রূপ করত।

(১১) ঈশ্বর আদিতে সৃষ্টি করেছেন, তারপর তিনি পুনরায় সৃষ্টি করবেন। অতঃপর তোমরা তাঁরই দিকে প্রত্যবর্তিত হবে। (১২) আর যে দিন মহাপ্রলয় হবে, সেদিন অপরাধীরা হতভম্ব হয়ে যাবে। (১৩) তাদের অংশীদারদের কেউ তাদের জন্য সুপারিশ করবে না। তারাও তাদের অংশীদারদের অস্বীকার করবে। (১৪) আর যে দিন মহা-বিনাশ হবে, সেদিন সব লোক ভিন্ন ভিন্ন হয়ে যাবে। (১৫) অতএব যারা বিশ্বাস স্থাপন করেছে এবং সৎকর্ম করেছে, তারা একটি উদ্যানে সমাদৃত হবে। (১৬) আর যারা অস্বীকার করেছে আমার নিদর্শন সমূহ আর পরলোকের সাক্ষাৎকে অস্বীকার করেছে তাদেরকে শাস্তির সম্মুখীন করা হবে। (১৭) অতএব তুমি পবিত্র ঈশ্বরকে স্মরণ কর সন্ধ্যায় ও সকালে। (১৮) এবং অপরাহ্নে ও মধ্যাহ্নে, নভোমণ্ডলে ও ভূমণ্ডলে তাঁরই প্রশংসা।^১

^১ বিঃ দ্রঃ-(৩০ঃ১৮) প্রার্থনা বা অন্যান্য উপায়ে নিত্য স্মরণ এবং গভীর মনোনিবেশের দ্বারা মানুষ ঈশ্বর প্রাপ্তির পথে পরিচালিত হতে পারে। প্রগাঢ় ধ্যানের মাধ্যমে একজন মানুষের ঈশ্বর প্রাপ্তি ঘটে। মানুষ পরিবেশে, পারিপার্শ্বিক মহাবিশ্বে এবং পয়গম্বরদের উপদেশাবলীতে ঈশ্বর তাঁর নিদর্শনগুলি এই পৃথিবীর সর্বত্র ছড়িয়ে দিয়েছেন। যারা এই নিদর্শনগুলি নিয়ে গভীর অনুধাবন করে তারাই ঈশ্বর প্রাপ্ত হয়।

(১৯) তিনি মৃত থেকে জীবিতকে বহির্গত করেন এবং জীবিত থেকে মৃতকে বহির্গত করেন। আর তিনি ভূমিকে মৃত হয়ে যাওয়ার পরে জীবিত করেন আর এভাবেই তোমাদেরকেও বহির্গত করা হবে। (২০) আর তাঁর নিদর্শনসমূহের মধ্যে একটি এই যে, তিনি তোমাদেরকে মাটি হতে সৃষ্টি করেছেন। অতঃপর তোমরা মানুষ, পৃথিবীতে সর্বত্র ছড়িয়ে পড়ছো। (২১) আর তাঁর নিদর্শনসমূহের মধ্যে আরেকটি এই যে, তিনি তোমাদের জন্যে তোমাদের মধ্য হতে সৃষ্টি করেছেন তোমাদের সঙ্গিনীদেরকে যাতে তোমরা তাদের কাছে শাস্তি পাও আর তিনি তোমাদের মধ্যে ভালবাসা ও দয়া সৃষ্টি করে দিয়েছেন। নিঃসন্দেহে এতে চিন্তাশীল ব্যক্তিদের জন্য অনেক নিদর্শন আছে।

(২২) আর তাঁর নিদর্শনসমূহের মধ্যে আকাশ ও পৃথিবীর সৃষ্টি এবং তোমাদের ভাষা ও বর্ণের বিভিন্নতা। নিঃসন্দেহে এতে অনেক নিদর্শন রয়েছে জ্ঞানীদের জন্য। (২৩) তাঁর নিদর্শনসমূহের মধ্যে আরো রয়েছে তোমাদের রাতে ও দিনে নিদ্রা ও তাঁর কৃপা (জীবিকা) অন্বেষণ। নিঃসন্দেহে এতে অনেক নিদর্শন রয়েছে যারা শোনে তাদের জন্য। (২৪) এবং তাঁর নিদর্শনসমূহের মধ্যে এও আছে যে, তিনি তোমাদের বিদ্যুতের ঝলক দেখান ভয় ও আশার সঞ্চরক রূপে। আর তিনি আকাশ থেকে বৃষ্টি বর্ষণ করেন; অতঃপর তা হতে মৃত ভূমিকে জীবিত করেন। নিঃসন্দেহে এতে নিদর্শন রয়েছে বুদ্ধিমান লোকদের জন্য।

(২৫) তাঁর নিদর্শনসমূহের মধ্যে আরো হল, আকাশ ও পৃথিবী তাঁরই আদেশে দাঁড়িয়ে আছে। অতঃপর যখন তিনি তোমাদেরকে একবার ডাক দেবেন তখন তোমরা তৎক্ষণাৎ পৃথিবী থেকে বেরিয়ে পড়বে। (২৬) আর আকাশ ও পৃথিবীতে যা কিছু আছে সব তাঁরই; সবই তাঁর অনুগত।

(২৭) তিনিই প্রথমবার সৃষ্টি করেন আবার তিনিই পুনরায় সৃষ্টি করবেন আর এটা তাঁর পক্ষে আরো সহজ। আকাশ ও পৃথিবীতে শ্রেষ্ঠ গুণের অধিকারী তিনিই। তিনি পরাক্রমশালী, মহাজ্ঞানী।

(২৮) তিনি তোমাদের জন্য তোমাদের নিজেদেরই একটি দৃষ্টান্ত পেশ করেছেন, আমি তোমাদেরকে যে সহায় সম্পত্তি দিয়েছি তাতে তোমাদের দাস-দাসীদের কেউ কি অংশীদার আছে? তোমরা আর তারা কি তাতে সমান অধিকারী? আর যেভাবে তোমরা তোমাদের আপনজনদের খেয়াল রাখো সেভাবেই কি তাদেরও খেয়াল রাখো? এভাবেই আমি স্পষ্ট ভাবে বাণী সমূহের বর্ণনা করি বুদ্ধিমান লোকদের জন্য। (২৯) বরং নিজেদের প্রতি অত্যাচারকারীরা কোন প্রমাণ ব্যতীত নিজ প্রবৃত্তির অনুসরণ করে থাকে। তাদেরকে কে পথ দেখাতে পারে যাদেরকে ঈশ্বর পথদ্রষ্ট করে দিয়েছেন? আর তাদের সাহায্য করার কেউ নেই।

(৩০) অতএব তুমি একাগ্রচিত্তে এই ধর্মে প্রতিষ্ঠিত থাক। ঈশ্বরের প্রকৃতির অনুসরণ কর, যে প্রকৃতি অনুযায়ী তিনি মানুষকে সৃষ্টি করেছেন। তাঁর তৈরী করা জিনিষের পরিবর্তন করো না। এটাই সঠিক ধর্ম; কিন্তু অধিকাংশ লোক তা জানে না। (৩১) তাঁরই প্রতি একাগ্রচিত্ত হয়ে তাঁকেই ভয় কর এবং প্রার্থনা প্রতিষ্ঠা করো আর অংশীবাদীদের অন্তর্ভুক্ত হয়ো না। (৩২) যারা নিজেদের ধর্মকে টুকরো টুকরো করে নিয়েছে এবং বিভিন্ন দলে বিভক্ত হয়ে গেছে, প্রত্যেক দলই যার যার মত নিয়ে আনন্দিত।

(৩৩) মানুষ যখন কোন কষ্টে পড়ে তখন একাগ্র মনে তার প্রতিপালককে ডাকে। তারপর যখন তিনি তাদেরকে তাঁর অনুগ্রহের স্বাদ আশ্বাদন করান, অমনি তাদের একদল তাদের প্রভুর সাথে অংশীদার করতে আরম্ভ করে (৩৪) আমি যা কিছু তাদেরকে দান করেছি তার প্রতি অকৃতজ্ঞতা প্রকাশের

জন্য। ঠিক আছে কিছু দিন ভোগ করে নাও শীঘ্রই এর ফল জানতে পারবে। (৩৫) আমি কি তাদের কাছে এমন কোন নিদর্শন অবতীর্ণ করেছি যে, যা তাদেরকে অংশীবাদী হতে বলে?

(৩৬) আর যখন আমি মানুষকে অনুগ্রহ আস্বাদন করাই তারা তখন প্রসন্ন হয়ে যায়। আর যদি তাদের কৃতকর্মের জন্য কোন কষ্টে পড়ে অমনি তারা হতাশ হয়ে পড়ে। (৩৭) তারা কি দেখেনা যে, ঈশ্বর যাকে চান অধিক জীবিকা দান করেন, আর যাকে চান তাকে সীমিত করেন। নিঃসন্দেহে এতে বিশ্বাসীদের জন্য নিদর্শন রয়েছে। (৩৮) অতএব আত্মীয়কে তার অধিকার দাও এবং নির্ধনকে আর পথিককেও। যারা ঈশ্বরের সন্তুষ্টি চায় তাদের জন্য এটা শ্রেয়, আর তারাই সফলকাম। (৩৯) আর যে সুদ তোমরা দিয়ে থাক যার সাথে লোকদের মূলধনে মিশে বৃদ্ধি পাবে এই আশায়, ঈশ্বরের কাছে তা বৃদ্ধি পায় না। আর উদ্বৃত্ত সম্পদ থেকে ঈশ্বরের সন্তুষ্টি প্রাপ্তির আশায় যে আবশ্যিক দান তোমরা করে থাকো, তাই বহুগুনে বৃদ্ধি পায়; তারাই সমৃদ্ধশালী।

(৪০) ঈশ্বরই তোমাদের সৃষ্টি করেছেন। অতঃপর তোমাদেরকে জীবিকা দিয়েছেন। এরপর তিনি তোমাদের মৃত্যু দেন। তারপর আবার জীবিত করবেন। তোমাদের অংশীদারদের কেউ কি এসবের কোন কিছু করতে পারে? তিনি পবিত্র; আর তারা যাদের অংশীদার করে তা থেকে তিনি উদ্ধে। (৪১) মানুষের মন্দ উপার্জনের ফলে জলে ও স্থলে বিপর্যয় ছড়িয়ে পড়েছে। তিনি চান তাদেরকে তাদের কিছু কর্মের স্বাদ আস্বাদন করাতে, যাতে তারা মন্দ থেকে বিরত হয়। (৪২) বলঃ তোমরা পৃথিবীতে পরিভ্রমণ কর এবং দেখ, তোমাদের পূর্বতীদের পরিণাম কেমন হয়েছিল। এদের অধিকাংশ অংশীবাদী লোক ছিল।

(৪৩) ঈশ্বরের নির্দেশে অনিবার্য দিবস আসার পূর্বে (হে পয়গম্বর) তুমি সত্য ধর্মে নিজেকে প্রতিষ্ঠিত কর। সেই দিন মানুষ দ্বিধা বিভক্ত হয়ে পড়বে। (৪৪) যে অস্বীকার করে তার অস্বীকারের দায় তারই, আর যে ভাল কাজ করে তারা নিজের জন্যে কল্যাণের সরঞ্জাম প্রস্তুত করে। (৪৫) যাতে তিনি বিশ্বাসী ও সৎকর্মশীলদের স্বীয় অনুগ্রহ থেকে পুরস্কার দিতে পারেন। নিঃসন্দেহে ঈশ্বর অস্বীকারকারীদের পছন্দ করেন না।

(৪৬) আর তাঁর নিদর্শনসমূহের মধ্যে এও আছে যে, তিনি সুসংবাদবাহী বাতাস পাঠান, আর যাতে তিনি তোমাদেরকে তার অনুগ্রহের রসাস্বাদন করাতে পারেন। আর যাতে জলযান গুলি তাঁর আদেশে চলতে পারে, আর যাতে তুমি তাঁর কৃপা অনুসন্ধান করতে পার এবং যাতে তুমি তাঁর কৃতজ্ঞতা প্রকাশ কর। (৪৭) আর আমি তোমার পূর্বেও পয়গম্বরদেরকে তাদের সম্প্রদায়ের কাছে পাঠিয়েছিলাম। তারা তাদের কাছে স্পষ্ট প্রমাণ নিয়ে এসেছিল। অতঃপর যারা অপরাধ করেছিল তাদের বিরুদ্ধে প্রতিশোধ নিয়েছিলাম আর আস্থাবানদের সাহায্য করা আমার দায়িত্ব ছিল।

(৪৮) ঈশ্বরই সেই মহান সত্ত্বা যিনি বাতাস পাঠান। অতঃপর এই বাতাস মেঘ উঠিয়ে আনে। অতঃপর ঈশ্বর যেমন চান একে আকাশে ছড়িয়ে দেন এবং তা খণ্ড খণ্ড করেন। এরপর তুমি দেখতে পাও। এই মেঘের মধ্যে থেকে বৃষ্টি নির্গত হয়। তিনি যখন তাঁর বান্দাদের মধ্যে যাদেরকে ইচ্ছা এই বৃষ্টি পৌঁছে দেন তখনি তারা আনন্দিত হয়। (৪৯) যদিও এই বৃষ্টি বর্ষণ হওয়ার পূর্ব পর্যন্ত তারা নিরাশ ছিল। (৫০) অতএব ঈশ্বরের করুণার নিদর্শন সমূহ দেখ, ভূমির মৃত্যুর পর কিভাবে তিনি জীবিত করেন। নিঃসন্দেহে তিনিই মৃতকে জীবিত করেন। আর তিনি সর্ব বিষয়ের সামর্থ্য রাখেন। (৫১) এমনকি যদি আমি এমন বাতাস পাঠাই যার ফলে তাদের ফসলের

ক্ষেত হলদে হয়ে যায়, তারা তখন (আমার অনুগ্রহ) অস্বীকার করতে থাকবে। (৫২) অতএব তুমি মৃতদের শোনাতে পারবে না কিংবা বধির যখন পিছন ফেরে তখন তাকে কিছুতেই শোনাতে পারবে না। (৫৩) আর তুমি চেতনাহীন অন্ধকে পথভ্রষ্টতা থেকে সুপথে আনতে পারবে না। তুমি কেবল তাদেরকেই শোনাতে পারবে যারা আমার বাণী সমূহে বিশ্বাস করে। অতএব এরাই অনুগত।

(৫৪) ঈশ্বরই সেই মহান সত্ত্বা যিনি তোমাদেরকে দুর্বল অবস্থায় সৃষ্টি করেন, অতঃপর দুর্বলতার পর শক্তি দেন, তারপর শক্তির পর দুর্বলতা ও শুভ্র কেশ দেন। তিনি যা ইচ্ছা সৃষ্টি করেন। তিনি মহাজ্ঞানী, সর্বশক্তিমান। (৫৫) আর যে দিন মহাবিনাশ আসবে, সেদিন অপরাধীরা শপথ করে বলবে যে, তারা মুহূর্তকালের বেশী অবস্থান করেনি। এমনিভাবে তারা সত্য বিমুখ হত। (৫৬) আর যাদের জ্ঞান ও আস্থা দেওয়া হয়েছে তারা বলবে, ঈশ্বরের বিধান মতো তোমরা পুনরুত্থান দিবস পর্যন্ত অবস্থান করেছ। এটাই পুনরুত্থান দিবস; কিন্তু তোমরা তা জানতে না। (৫৭) অতএব অত্যাচারীদের কোন ওজর আপত্তি কাজে আসবে না, এবং তাদেরকে সংশোধনের কোন সুযোগ দেওয়া হবে না।

(৫৮) আমি এই কুরআনে মানুষের জন্য সবরকম দৃষ্টান্তই দিয়েছি। তুমি যদি তাদের কাছে কোন নিদর্শন নিয়ে আস তাহলে তারা অস্বীকার করে তারা বলবে। তোমরা সবাই মিথ্যার অনুসারী। (৫৯) এভাবেই ঈশ্বর অঙ্গদের অন্তরে মোহর মেরে দেন। (৬০) অতএব তুমি ধৈর্য ধারণ কর। নিঃসন্দেহে ঈশ্বরের প্রতিশ্রুতি সত্য। যারা দৃঢ় বিশ্বাস পোষণ করে না তারা যেন তোমাকে হতোদ্যম না করে।

অধ্যায় ৩১ : লুকমান (লোকমান)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-মীম। (২) এগুলো প্রজ্ঞাময় গ্রন্থের বাণী। (৩) পথ-নির্দেশ এবং অনুগ্রহ সংকর্ম পরায়ণদের জন্য। (৪) যারা প্রার্থনা প্রতিষ্ঠা করে এবং উদ্বৃত্ত সম্পদ থেকে নির্ধারিত দান করে আর পরলোকে বিশ্বাস করে। (৫) এরাই তাদের প্রভুর নির্দেশিত পথে আছে; আর এরাই সফলকাম।

(৬) একশ্রেণীর লোক আছে যারা মানুষকে ঈশ্বরের পথ থেকে বিভ্রান্ত করার জন্য অবাস্তুর কথাবার্তা ক্রয় (সংগ্রহ) করে এবং এই পথটিকেই উপহাস করে। এদের জন্য রয়েছে অবমাননাকর শাস্তি। (৭) আর যখন তাদেরকে আমার বাণী সমূহ শোনানো হয় তখন তারা দম্ভভরে তা থেকে মুখ ফিরিয়ে নেয়, যেন তারা শোনেইনি, যেন তাদের দু'কানে বধিরতা রয়েছে। অতএব তাকে কষ্টদায়ক শাস্তির সংবাদ দাও। (৮) নিঃসন্দেহে যারা বিশ্বাস স্থাপন করে এবং ভালো কাজ করে তাদের জন্য রয়েছে কল্যাণপূর্ণ উদ্যান। (৯) সেখানে তারা চিরকাল থাকবে। ঈশ্বরের প্রতিশ্রুতি সত্য। তিনি পরাক্রমশালী, পরম প্রাজ্ঞ।

(১০) ঈশ্বর আকাশমণ্ডলী সৃষ্টি করেছেন, এমন বিনা স্তম্ভে যা তুমি দেখতে পাচ্ছ। আর তিনি পৃথিবীতে পর্বতমালা স্থাপন করেছেন, যাতে তা তোমাকে নিয়ে হেলে না পড়ে। আর তিনি সর্বপ্রকার প্রাণী ছড়িয়ে দিয়েছেন। আর আমি আকাশ থেকে বৃষ্টি বর্ষণ করেছি। অতঃপর ধরণীতে সব রকম উৎকৃষ্ট বস্তু উৎপন্ন করেছি। (১১) এটাই ঈশ্বরের সৃষ্টি। তিনি ব্যতীত অন্যরা কিছু সৃষ্টি করে থাকলে আমাকে তা দেখাও তো। বরং অত্যাচারী লোকেরা স্পষ্ট বিভ্রান্তির মধ্যেই রয়েছে।

(১২) আর আমি লোকমানকে প্রজ্ঞা প্রদান করেছিলাম (এবং বলেছিলাম)

ঈশ্বরের প্রতি কৃতজ্ঞতা প্রকাশ কর। আর যে ব্যক্তি কৃতজ্ঞতা প্রকাশ করবে সে নিজের জন্যই কৃতজ্ঞতা প্রকাশ করবে। আর কেউ অকৃতজ্ঞ হলে, ঈশ্বর তো অমুখাপেক্ষী, প্রশংসিত। (১৩) যখন লোকমান তার পুত্রকে উপদেশ দিতে গিয়ে বললঃ হে পুত্র! ঈশ্বরের সাথে অংশীদার স্থাপন করো না; নিঃসন্দেহে অংশীদার স্থাপন করা মহা অন্যায।

(১৪) আমি মানুষকে তার পিতা-মাতার প্রতি সদাচারের নির্দেশ দিয়েছি। তার মা তাকে কষ্টের পর কষ্ট সহ্য করে গর্ভে ধারণ করেছে। আর তার দুধ ছাড়ানো হয় দু'বছরে। অতএব তুমি আমার প্রতি ও তোমার পিতামাতার প্রতি কৃতজ্ঞতা প্রকাশ কর। আমার কাছেই তো ফিরে আসতে হবে। (১৫) আর যদি তারা দু'জনে তোমার উপর চাপ দিতে থাকে যে, যাতে তুমি আমার সাথে কোন কিছু অংশীদার স্থাপন কর যে বিষয়ে তোমার কোন জ্ঞান নেই, তাহলে তাদের কথা অমান্য করবে। তবে পৃথিবীতে তাদের সাথে ভাল ব্যবহার করবে। আর যে আমার অভিমুখী হয়, তাকে অনুসরণ করবে। অবশেষে আমার কাছেই তোমাদেরকে ফিরে আসতে হবে, তখন আমি তোমাদের বলে দেব তোমরা যা কিছু করেছিলে।

(১৬) হে পুত্র! কোন সৎ-কর্ম যদি শস্য দানা পরিমাণও হয় আর তা কোন পাথরের মধ্যে অথবা আকাশে অথবা ভূগর্ভেও থাকে ঈশ্বর তা উপস্থিত করবেন। নিঃসন্দেহে ঈশ্বর সূক্ষ্মদর্শী, সর্বজ্ঞ। (১৭) হে পুত্র! প্রার্থনা কর, ভাল কাজের উপদেশ দাও এবং মন্দ কাজ থেকে বিরত রাখ আর যে বিপদই আসুক না কেন ধৈর্য ধারণ কর। নিঃসন্দেহে এটাই সাহসী পদক্ষেপ। (১৮) আর মানুষের কাছ থেকে মুখ ফিরিয়ে নিওনা এবং ভূমিতে দস্তভরে চলো না। নিঃসন্দেহে ঈশ্বর কোন দান্তিক অহংকারীকে পছন্দ করেন না। (১৯) চলনে মধ্যপস্থা অবলম্বন কর এবং কণ্ঠস্বর নিচু রেখো। নিঃসন্দেহে সবচেয়ে

কর্কশ স্বর হলো গাধার কণ্ঠস্বর।

(২০) তোমরা কি দেখনা যে যা কিছু আকাশ ও পৃথিবীতে আছে তা সবই তোমাদের সেবায় নিয়োজিত করে দিয়েছেন এবং তোমাদেরকে তাঁর প্রকাশ্য ও অপ্রকাশ্য কল্যাণসমূহ প্রচুর পরিমাণে দিয়েছেন। আর কিছু লোক এমনও আছে যারা কোন জ্ঞান, পথ-নির্দেশ কিংবা আলোকপ্রদ গ্রন্থ ছাড়াই ঈশ্বর সম্পর্কে বিতর্ক করে। (২১) যখন তাদেরকে বলা হয় যে, তোমরা ঈশ্বরের অবতীর্ণ বিষয়ের অনুসরণ কর তখন তারা বলেঃ আমরা বরং তারই অনুসরণ করবো যেভাবে আমরা আমাদের পূর্বপুরুষদের দেখেছি। শয়তান যদি তাদেরকে আগুনের শাস্তির দিকে ডাকে তবুও।

(২২) যে নিজেকে ঈশ্বরের কাছে সমর্পণ করে এবং সৎকর্মশীল হয় সে তো সবচেয়ে মজবুত রজ্জুটি আঁকড়ে ধরেছে। আর ঈশ্বরের কাছেই সকল কাজের পরিণতি। (২৩) আর যে অস্বীকার করে তার অস্বীকৃতি যেন তোমাকে মনক্ষুন্ন না করে। আমারই কাছে তাদের প্রত্যাবর্তন। তখন আমি তাদেরকে তাদের যাবতীয় কৃতকর্ম অবহিত করাবো। নিঃসন্দেহে ঈশ্বর অন্তরের খবরও ভাল করেই জানেন। (২৪) এদেরকে আমি অল্পকালের জন্য উপভোগ করতে দেব। অতঃপর এক কঠিন শাস্তির দিকে টেনে আনব।

(২৫) তুমি যদি এদেরকে জিজ্ঞাসা কর : আকাশ ও পৃথিবী কে সৃষ্টি করেছেন? তাহলে তারা অবশ্যই বলবে ঈশ্বর সৃষ্টি করেছেন। বলঃ সব প্রশংসা ঈশ্বরের; বরং তাদের অধিকাংশই তা জানে না। (২৬) আকাশ ও পৃথিবীতে যা কিছু আছে সবই ঈশ্বরের। নিঃসন্দেহে ঈশ্বর অভাবমুক্ত, প্রশংসিত। (২৭) যদি পৃথিবীর সকল বৃক্ষরাজি কলম হয় এবং এই সমুদ্রের সাথে যদি আরো সাত সমুদ্র যুক্ত হয়ে কালি হয়, তবুও ঈশ্বরের বাণীসমূহ (লিখে) শেষ হবে না। নিঃসন্দেহে ঈশ্বর পরাক্রমশালী, প্রজ্ঞাময়।

(২৮) তোমাদের সকলের সৃষ্টি ও পুনরুত্থান, একটি প্রাণের সৃষ্টি ও পুনরুত্থানের অনুরূপ। নিঃসন্দেহে ঈশ্বর সবকিছু শোনে, সবকিছু দেখেন। (২৯) তুমি কি দেখনি যে, ঈশ্বর রাতকে দিনের মধ্যে এবং দিনকে রাতের মধ্যে প্রবেশ করান। আর তিনি সূর্য ও চন্দ্রকে তাঁর কাজে নিয়োজিত করেছেন। প্রত্যেকেটি নির্ধারিত সময় অবধি বিচরণ করছে। আর তোমরা যা করছ তার সব খবরই ঈশ্বর রাখেন। (৩০) এটা এই কারণে যে, ঈশ্বরই সত্য। তিনি ব্যতীত যত কিছুকে তারা ডাকে, সবই অসত্য। নিঃসন্দেহে ঈশ্বর সর্বোচ্চ, মহান।

(৩১) তুমি কি দেখনা যে, ঈশ্বরেরই অনুগ্রহে সমুদ্রে নৌকা চলে, যাতে তিনি তোমাদেরকে তাঁর কিছু নিদর্শন দেখাতে পারেন। নিঃসন্দেহে এতে প্রত্যেক ধৈর্যশীল, কৃতজ্ঞ ব্যক্তির জন্য অবশ্যই নিদর্শন আছে। (৩২) যখন (মৃত্যুর) ছায়ার মত সমুদ্র তরঙ্গ আচ্ছন্ন করে ফেলে তখন তারা একনিষ্ঠে আনুগত্যে ঈশ্বরকে ডাকে। তারপর যখন তিনি তাদেরকে নিরাপদ স্থলে বাঁচিয়ে নিয়ে আসেন তখন তাদের মধ্যে কিছু সংখ্যক সঠিক পথে থাকে। আর আমার নিদর্শন সমূহ তারাই অস্বীকার করে যারা প্রতিশ্রুতি ভঙ্গকারী এবং অকৃতজ্ঞ।

(৩৩) হে মানুষ! তোমরা ঈশ্বরের কাছে আশ্রয় প্রার্থনা কর এবং সেই দিনকে ভয় কর যখন পিতা তার সন্তানের উপকারে আসবে না, সন্তান পিতার কোন উপকারে আসবে না। ঈশ্বরের প্রতিশ্রুতি সত্য। অতএব পার্থিব জীবন যেন তোমাদের ধোঁকায় না ফেলে, আর প্রতারক যেন তোমাদেরকে ঈশ্বর সম্পর্কে প্রতারিত না করতে পারে। (৩৪) নিঃসন্দেহে মহা-বিনাশের জ্ঞান ঈশ্বরেরই কাছে আছে। তিনিই বৃষ্টি বর্ষণ করেন এবং মাতৃগর্ভে যা আছে তা তিনিই জানেন। আর কোন ব্যক্তি জানে না আগামী কাল সে কি উপার্জন করবে এবং কেউ জানে না যে, সে কোন ভূখণ্ডে মারা যাবে। ঈশ্বরই সবকিছু জানেন, সব কিছুর খবর রাখেন।

অধ্যায় ৩২ : আস-সাজ্দাহ (প্রণতি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আলিফ-লাম-মীম।

(২) এতে কোন সন্দেহ নেই। বিশ্বজগতের প্রভুর পক্ষ থেকে এই গ্রন্থ অবতীর্ণ হয়েছে। (৩) তারা কি বলে, সে নিজে এটা রচনা করেছে? বরং এটা এক মহাসত্য তোমার প্রভুর পক্ষ হতে, যাতে তুমি ওদেরকে সতর্ক করতে পার যাদের কাছে তোমার পূর্বে কোন সতর্ককারী আসেনি। যাতে তারা পথের সন্ধান পায়।

(৪) ঈশ্বরই সেই মহান সত্ত্বা যিনি আকাশ ও পৃথিবী এবং তার মধ্যবর্তী সবকিছু ছয় দিনে (সময়ে) সৃষ্টি করেছেন তারপর তিনি সিংহাসনে সমাসীন হয়েছেন। তিনি ছাড়া তোমাদের কোন সাহায্যকারী নাই, সুপারিশকারীও নাই। তোমরা কি চিন্তা করো না? (৫) তিনি আকাশ থেকে পৃথিবী পর্যন্ত সবকিছু নিয়ন্ত্রণ করেন। অতঃপর এক দিন সবকিছুই তাঁর সমীপে সমুথিত হবে, যে দিনের পরিমাপ হবে তোমাদের গণনায় হাজার বছরের সমান। (৬) পরোক্ষ ও প্রত্যক্ষ সবই তাঁর জানা। তিনি পরাক্রমশালী পরম দয়ালু। (৭) তিনি যা কিছুই সৃজন করেছেন, উত্তমরূপে সৃজন করেছেন। আর তিনি মাটি দ্বারা মানুষ সৃষ্টির সূচনা করেছেন; অতঃপর তার বংশধর সৃষ্টি করেছেন এক তুচ্ছ জলের সারাংশ থেকে। (৯) পরে তিনি তাকে সুষম দেহ বিশিষ্ট করেছেন এবং তাতে তাঁর আত্মা সঞ্চার করেছেন। তিনি তোমাদেরকে কান, চোখ ও অন্তরও দিয়েছেন। তোমরা খুব কমই কৃতজ্ঞতা প্রকাশ কর।

(১০) আর তারা বলেঃ আমরা যখন মাটিতে লুপ্ত হয়ে যাব তারপরও কি আমাদেরকে নতুন করে সৃষ্টি করা হবে? আসলে তারা তাদের প্রতি

পালকের সাক্ষাৎকে অস্বীকার করে। (১১) বলঃ তোমাদের জন্য নিযুক্ত মৃত্যুর দেবদূত তোমাদের প্রাণ হরণ করবে। অতঃপর তোমরা তোমাদের প্রভুর নিকট প্রত্যাবর্তীত হবে। (১২) যদি তুমি দেখতে! যখন অপরাধীরা তাদের প্রভুর সামনে অবনত মস্তকে বলবে, হে আমাদের প্রভু! আমরা বিশ্বাসী হয়ে গেছি। (১৩) আর যদি আমি চাইতাম তাহলে প্রত্যেককেই তার সঠিক পথের সন্ধান দিতাম; কিন্তু আমার একথা তো সত্য যে, আমি জ্বিন ও মানুষ দিয়ে নরক পূর্ণ করবো। (১৪) অতএব যেহেতু তোমরা তোমাদের এ দিনটির সাক্ষাতের কথা ভুলে গিয়েছিলে, তাই এখন শাস্তির স্বাদ আস্বাদন কর। আমিও তোমাদেরকে ভুলে গেলাম। তোমরা তোমাদের কৃতকর্মের জন্য স্থায়ী শাস্তি ভোগ করতে থাক।

(১৫) আমার নিদর্শন সমূহে তারাই বিশ্বাস করে যাদেরকে সেগুলোর কথা স্মরণ করিয়ে দিলে তারা সিজদায় (প্রণত হয়ে) লুটিয়ে পড়ে এবং আপন প্রভুর প্রশংসা ও স্তুতি করতে থাকে আর তারা অহংকার করে না। (১৬) তারা বিছানা ত্যাগ করে তাদের প্রভুকে ডাকে ভয় ও আশা নিয়ে। আর যা কিছু আমি ওদেরকে দিয়েছি তা হতে ব্যয় করে। (১৭) তাদের পুরস্কার স্বরূপ তাদের জন্য কি কি চোখ জুড়ানো বস্তু লুকিয়ে রাখা হয়েছে সে সম্পর্কে কারও ধারণা নেই।

(১৮) তাই যারা মোমিন (আস্থাবান) সে কি ঐ ব্যক্তির মত হবে যারা আস্থাহীন? দুই সমান হতে পারে না। (১৯) যারা বিশ্বাস এনেছে এবং ভাল কাজ করেছে তাদের জন্যই স্বর্গের বিশ্রামস্থল, আতিথ্য তাদের কৃতকর্মের কারণে। (২০) আর যারা অস্বীকার করেছে তাদের ঠিকানা নরক। তারা যখনই সেখান থেকে বের হতে চাইবে তখনই ধাক্কা দিয়ে তাদের সেখানেই ফেরৎ পাঠানো হবে আর তাদেরকে বলা হবে নরক যন্ত্রণা আস্বাদন কর যা

তোমরা মিথ্যা মনে করতে। (২১) আর আমি তাদেরকে বড় শাস্তির পূর্বে ছোট শাস্তি আশ্বাদন করাই সম্ভবতঃ যাতে তারা অনুশোচনা করে ফিরে আসে। (২২) আর ঐ ব্যক্তির চেয়ে বড় যুলুমকারী আর কে আছে, যাকে তার প্রভুর বাণীসমূহের মাধ্যমে উপদেশ দেওয়া সত্ত্বেও সে তা থেকে মুখ ফিরিয়ে নেয়? এমন অপরাধীর প্রতিশোধ আমি অবশ্যই নেব।

(২৩) আমি মূসাকে (মোজেসকে) গ্রন্থ দিয়েছিলাম। অতএব তুমি তার সাক্ষাৎ সম্বন্ধে কোন সন্দেহের মধ্যে থেকো না। আর আমিই তাকে ইসরাইলের সন্তানদের জন্য দিক নির্দেশনা বানিয়েছিলাম। (২৪) তাদের মধ্য থেকে আমি নেতা মনোনীত করেছিলাম, যারা আমার নির্দেশ অনুযায়ী লোকদের পথ প্রদর্শন করাত। যখন তারা ধৈর্যশীল হয়েছিল এবং আমার নিদর্শন সমূহের প্রতিও বিশ্বাস রেখেছিল। (২৫) নিঃসন্দেহে তোমার প্রভু বিচারদিনে তাদের মধ্যে মীমাংসা করে দেবেন যে বিষয় নিয়ে তারা মতভেদ করত। (২৬) এটা কি তাদের জন্য দিক-নির্দেশনা নয় যে, তাদের পূর্বে আমি অনেক প্রজন্মকে ধ্বংস করে দিয়েছি, যাদের বাড়ি ঘরে এরা যাতায়াত করে। নিঃসন্দেহে এতে নিদর্শন আছে। এরা কি শোনেও না।

(২৭) এরা কি দেখেও না যে, আমিই জলকে শুষ্ক ভূমির দিকে প্রবাহিত করি। অতঃপর তা হতে শস্য উৎপন্ন করি যা তাদের পশুরা খায় এবং তারা নিজেরাও খায়। তবুও কি তারা দেখে না? (২৮) আর তারা বলেঃ সেই মীমাংসা কবে হবে যদি তুমি সত্যবাদী হও? (২৯) বলঃ মীমাংসার দিনে অবিশ্বাসীদের বিশ্বাস আনয়ন কোন কাজে আসবে না আর তাদের অবকাশও দেওয়া হবে না। (৩০) অতএব ওদের থেকে মুখ ফিরিয়ে নাও এবং অপেক্ষা কর আর তারাও অপেক্ষা করছে।

অধ্যায় ৩৩ : আল-আহযাব (সম্প্রদায়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে পয়গম্বর! ঈশ্বরকে ভয় কর এবং অবিশ্বাসী ও কপটচারীদের কথামত কাজ করো না। নিঃসন্দেহে ঈশ্বর মহাজ্ঞানী, পরম প্রাজ্ঞ।
(২) তাঁরই অনুসরণ কর যা তোমার প্রভুর পক্ষ থেকে তোমার উপর অবতীর্ণ হয়েছে। নিঃসন্দেহে তোমরা যা কর সে সম্বন্ধে ঈশ্বর অবহিত আছেন। (৩) আর ঈশ্বরের উপর ভরসা রাখ। অভিভাবক হিসাবে ঈশ্বরই যথেষ্ট।

(৪) ঈশ্বর কোন মানুষের জন্যে তার বুক দুটি হৃদয় সৃষ্টি করেন নি। আর তোমাদের স্ত্রীদের যাদের তোমরা যিহার (মায়ে পিঠের সাথে তুলনা) কর, তাদেরকে তোমাদের মা করে দেন নি এবং তোমাদের পোষ্য পুত্রদেরকে তোমাদের নিজের পুত্র করেন নি। এগুলো কেবল তোমাদের মুখের কথা আর ঈশ্বর যথার্থ কথা বলেন এবং সঠিক পথ দেখান। (৫) তোমাদের পোষ্যপুত্রদেরকে তাদের পিতার পরিচয়ে ডাক, এটাই ঈশ্বরের কাছে ন্যায্যতর। আর যদি তুমি তাদের পিতৃ পরিচয় না জান তাহলে তারা তোমাদের ধর্মীয় ভাই ও আশ্রিত ব্যক্তি হিসাবে গণ্য হবে। আর যে জিনিষে তোমাদের ভুল-ত্রুটি হয়ে যায় তার জন্য তোমাদের কোন পাপ নেই; কিন্তু ইচ্ছাকৃত ভাবে অন্যায় করলে ভিন্ন কথা। আর ঈশ্বর ক্ষমাশীল ও অতি দয়ালু।

(৬) আস্থাবানদের উপর পয়গম্বরের অধিকার তাদের প্রাণের চেয়েও অধিক। আর পয়গম্বরের সহধর্মিণীরা তাদের মা। আর ঈশ্বরের বিধান অনুসারে আস্থাবান ও প্রবাসীদের তুলনায় রক্ত সম্পর্কীয় আত্মীয়স্বজনরা একে অপরের নিকটতর। তবে তোমরা যদি তোমাদের বন্ধুদের প্রতি সহৃদয়তা প্রদর্শন করতে চাও, করতে পার। এটা গ্রন্থে নির্দেশিত আছে।

(৭) আর যখন আমি পয়গম্বরদের কাছ থেকে শপথ গ্রহণ করেছিলাম, তোমার কাছ থেকে, নোয়াহ, আব্রাহাম, মোজেস এবং মেরী পুত্র যীশুর কাছ থেকে। সকলের কাছ থেকে আমি দৃঢ় শপথ গ্রহণ করেছিলাম। (৮) যাতে ঈশ্বর সত্যবাদীদেরকে তাদের সত্যবাদীতা সম্বন্ধে প্রশংসা করতে পারেন আর অবিশ্বাসীদের জন্য তিনি কষ্টদায়ক শাস্তি প্রস্তুত রেখেছেন।

(৯) হে মানবমণ্ডলী! যারা বিশ্বাস এনেছো, তোমাদের প্রতি ঈশ্বরের অনুগ্রহ স্মরণ কর, যখন তোমাদের উপর সেনা আক্রমণ হয়েছিল। আমি তাদের প্রতি একটি ঝড় পাঠিয়েছিলাম এবং এমন সেনা দল পাঠিয়েছিলাম যাদেরকে তোমরা দেখতে পাওনি। তোমরা যা কর ঈশ্বর তা দেখতে পান। (১০) যখন তারা (তোমাদের বিরুদ্ধে) সমাগত হয়েছিল উপরের দিক থেকে ও নিচের দিক থেকে, ভয়ে তোমাদের চোখ স্থির হয়ে গিয়েছিল এবং হৃৎপিণ্ড কন্ঠাগত হয়েছিল আর তোমরা ঈশ্বর সম্পর্কে নানারকম সন্দেহ পোষণ করছিলে। (১১) সেই সময় আস্ত্রাবানরা পরীক্ষিত হয়েছিল এবং ভীষণভাবে প্রকম্পিত হয়েছিল।

(১২) আর যখন কপটচারী ও যাদের অন্তরে ব্যাধি আছে তারা বলছিলঃ ঈশ্বর ও তাঁর বার্তাবাহক আমাদেরকে যে প্রতিশ্রুতি দিয়েছিল তা শুধুই প্রতারণা। (১৩) এবং যখন তাদের মধ্যে একদল বলেছিলঃ হে ইয়াসরিববাসী! তোমাদের তো অবস্থানের কোন জায়গা নেই, অতএব ফিরে চল। আর তাদের মধ্যে একদল পয়গম্বরের কাছে অনুমতি চাইছিল, তারা বলছিল আমাদের বাড়ীঘর অরক্ষিত; অথচ তা অরক্ষিত নয়; আসলে তারা পালাতে চাইছিল। (১৪) যদি মদীনার আশপাশ হতে তাদের উপর কোন শত্রুর প্রবেশ ঘটত এবং তাদেরকে চ্যালেঞ্জ জানাত তারা বশ্যতা স্বীকার করতে বিলম্ব করত না। (১৫) অথচ তারা পূর্বেই ঈশ্বরের সাথে অঙ্গীকার করেছিল যে, তারা

পৃষ্ঠ প্রদর্শন করবে না। ঈশ্বরের সাথে করা এই অঙ্গীকার সম্পর্কে জিজ্ঞাসা করা হবে। (১৬) বলঃ তোমরা মৃত্যু অথবা হত্যার ভয়ে পালিয়ে গেলেও পলায়ন তোমাদের কোন কাজে আসবে না। আর সেক্ষেত্রে তোমাদেরকে কেবল কিছু দিনের জন্য ভোগ করতে দেওয়া হবে।^১ (১৭) বলঃ কে আছে যে তোমাদেরকে ঈশ্বর থেকে রক্ষা করতে পারবে, তিনি যদি তোমাদের ক্ষতি করতে চান, অথবা যদি তিনি তোমাদেরকে দয়া করতে চান? আর তারা নিজের জন্য ঈশ্বরকে ছাড়া কোন সমর্থক বা সাহায্যকারী পাবে না।

(১৮) ঈশ্বর তোমাদের মধ্যে তাদেরকে ভাল রকমই জানেন যারা বাধা দেয় এবং তাদের ভাইদেরকে বলেঃ আমাদের কাছে এস। অথচ তারা খুব কমই যুদ্ধে অংশ নেয়। (১৯) তারা তোমাদের সঙ্গে কৃপণতা করে। আর যখন বিপদ আসে তখন দেখতে পাও যে, তারা এমন ভাবে চোখ উল্টিয়ে তোমার দিকে তাকায় যেন মৃত্যু যন্ত্রনা ঘনিয়ে আসছে। অতঃপর যখন বিপদ দূর হয়ে যায় তখন সম্পদের লোভে বাক চাতুরতার সাথে তোমাদের কাছে আসে। এরা বিশ্বাস করে না তাই ঈশ্বর তাদের কর্ম ব্যর্থ করে দিয়েছেন। এটা করা ঈশ্বরের পক্ষে খুবই সহজ। (২০) এরা মনে করে শত্রু-সেনা এখনও চলে যায়নি। যদি সেনারা আবার এসে পড়ে, তখন তারা কামনা করবে যে, যদি তারা বেদুঈনদের সাথে গ্রামে থাকত এবং তোমাদের খবর জেনে নিত! আর তারা তোমাদের মাঝে অবস্থান করলেও যুদ্ধে খুব কমই অংশ গ্রহণ করত।

(২১) যারা ঈশ্বর ও শেষ দিবসের আশা রাখে এবং ঈশ্বরকে অধিক স্মরণ করে, তাদের জন্যে পয়গম্বরের মধ্যে রয়েছে উত্তম আদর্শ। (২২) আর যখন বিশ্বাসীরা সেনা বাহিনীগুলো দেখল, তখন বললঃ এতো তাই,

^১ বিঃ দ্রঃ- (৩৩ঃ ১৬) পরিচয় অংশে ১৩ থেকে ১৫ পৃষ্ঠা দ্রষ্টব্য।

যার প্রতিশ্রুতি ঈশ্বর ও তাঁর বার্তাবাহক আমাদেরকে দিয়েছিলেন। ঈশ্বর ও তাঁর বার্তাবাহক সত্যিই বলেছিলেন। আর এতে তাদের বিশ্বাস ও আনুগত্য আরো বৃদ্ধি পেল। (২৩) বিশ্বাসীদের মধ্যে এমন লোকও আছে যারা ঈশ্বরের কাছে করা প্রতিজ্ঞায় অবিচল থেকেছে। অতএব তাদের মধ্যে কেউ নিজের অঙ্গীকার পূর্ণ করেছে আর কেউ প্রতিক্ষায় আছে; তারা অঙ্গীকারে কোন রকম পরিবর্তন করেনি। (২৪) যাতে ঈশ্বর খাঁটি লোকদের তাদের সততার প্রতিফল দেন এবং কপটাচারীদের শাস্তি দেন অথবা চাইলে তাদের ক্ষমা করে দিতে পারেন। নিঃসন্দেহে ঈশ্বর ক্ষমাশীল ও অতি দয়ালু।

(২৫) ঈশ্বর অবজ্ঞাকারীদের ত্রুণ্ণাবস্থায় ফিরিয়ে দিলেন। তাদের কোনই ইচ্ছা পূরণ হয় নি। আর বিশ্বাসীদের পক্ষে লড়াই করার জন্য ঈশ্বরই যথেষ্ট, আর ঈশ্বর মহা শক্তিদর, পরাক্রমশালী। (২৬) আর ঈশ্বর ঐ গ্রন্থধারীদের যারা আক্রমণকারীদের পক্ষ অবলম্বন করেছিল, তাদের দুর্গ থেকে নামিয়ে দিলেন এবং তাদের অন্তরে ব্যাধি ঢুকিয়ে দিলেন। তুমি তাদের একদলকে হত্যা করছো আর এক দলকে বন্দী করছো। (২৭) এবং তিনি তোমাদেরকে উত্তরাধিকারী করলেন তাদের জমি-জায়গা ঘর-বাড়ী ও ধন-সম্পদের এবং এমন একটি ভূখণ্ডের যেখানে তোমরা এর আগে পা রাখো নি। ঈশ্বর সবকিছুই করতে সক্ষম।

(২৮) হে বার্তাবাহক! তোমার স্ত্রীদেরকে বলঃ তোমরা যদি পার্থিব জীবন ও তার বিলাসিতা কামনা কর, তবে এসো, আমি তোমাদের ভোগ সামগ্রীর ব্যবস্থা করে দিই এবং সৌজন্যের সহিত বিদায় করে দিই। (২৯) আর যদি তোমরা ঈশ্বর ও তাঁর পয়গম্বর এবং পরলোকের নিবাস চাও তাহলে ঈশ্বর তোমাদের মধ্যে সৎকর্মপরায়ণদের জন্য বড় পুরস্কারের ব্যবস্থা করে রেখেছেন। (৩০) হে পয়গম্বরের স্ত্রীগণ! তোমাদের মধ্যে

কেউ যদি প্রকাশ্যে অশ্লীলতায় লিপ্ত হয় তাহলে তাকে দ্বিগুণ শাস্তি দেওয়া হবে। এটা ঈশ্বরের জন্য সহজ।

(৩১) আর তোমাদের মধ্যে যে ঈশ্বর ও তাঁর পয়গম্বরের অনুগত থাকবে এবং সৎকর্ম করবে তাহলে আমি তাকে দু'বার পুরস্কার দেব। আর তার জন্য আমি সম্মানজনক জীবিকা প্রস্তুত করে রেখেছি। (৩২) হে পয়গম্বরের স্ত্রীগণ! তোমরা তো সাধারণ নারীদের মত নও। তোমরা যদি ঈশ্বরকে ভয় করে থাক তবে এমন কোমল স্বরে কথা বলবে না যাতে অন্তরে যার ব্যাধি আছে, সে প্রলুব্ধ হয়। তোমরা ন্যায়সঙ্গত উপায়ে কথা বলবে।

(৩৩) তোমরা শাস্তিপূর্ণভাবে নিজেদের ঘরে থাকবে এবং আগের অজ্ঞতাযুগের মত সৌন্দর্য প্রদর্শন করবে না আর প্রার্থনা কর এবং উদ্বৃত্ত সম্পদ থেকে আবশ্যিক দান প্রদান কর, আর ঈশ্বর ও তাঁর পয়গম্বরের কথা মেনে চলবে। ঈশ্বর তো চান তোমাদের পয়গম্বরের পরিবার থেকে পক্ষিলতা দূর করতে এবং তোমাদেরকে পরিপূর্ণভাবে পবিত্র করতে। (৩৪) তোমাদের ঘরে ঈশ্বরের যে বাণী সমূহের এবং বিবেকের যে শিক্ষা দেওয়া হয় তা স্মরণ রাখবে। নিঃসন্দেহে ঈশ্বর সূক্ষ্মদর্শী ও সর্ব বিষয়ে অবগত।

(৩৫) নিঃসন্দেহে নিষ্ঠাবান পুরুষ ও নিষ্ঠাবতী মহিলা, বিশ্বাসী পুরুষ ও বিশ্বাসী মহিলা, অনুগত পুরুষ ও অনুগত মহিলা, সৎপথে চলা পুরুষ ও সৎপথে চলা মহিলা, ধৈর্যশীল পুরুষ ও ধৈর্যশীলা মহিলা, বিনীত পুরুষ ও বিনীতা মহিলা, দানশীল পুরুষ ও দানশীলা মহিলা, উপোষকারী পুরুষ ও উপোষকারিণী মহিলা, যৌন পবিত্রতা রক্ষাকারী পুরুষ ও যৌন পবিত্রতা রক্ষাকারিণী মহিলা, ঈশ্বরকে অধিক স্মরণকারী পুরুষ ও অধিক স্মরণকারিণী মহিলা, এদের জন্য ঈশ্বর ক্ষমা ও বড় পুরস্কার রেখেছেন।

(৩৬) ঈশ্বর ও তাঁর পয়গম্বরের কোন বিষয়ে সিদ্ধান্ত নিলে কোন সত্যে

বিশ্বাস স্থাপনকারী পুরুষ এবং সত্যে বিশ্বাস স্থাপনকারিণী নারীর পক্ষে ভিন্ন কিছু করার ক্ষমতা থাকে না। আর যে ঈশ্বর ও তাঁর পয়গম্বরের অবাধ্য হয় সে স্পষ্টই পথভ্রষ্ট হয়।

(৩৭) ঈশ্বর যাকে অনুগ্রহ করেছেন এবং তুমিও যাকে অনুগ্রহ করেছ, তুমি তাকে বলছিলেঃ তোমার স্ত্রীকে তোমার কাছে রাখ এবং ঈশ্বরকে ভয় কর। তুমি তোমার মনে একটি কথা লুকিয়ে রেখেছিলে যা ঈশ্বর প্রকাশ করে দিতে চেয়েছিলেন। তুমি মানুষকে ভয় করছিলে, অথচ তোমার ভয় করার কথা তো ঈশ্বরকে। অতঃপর যায়েদ যখন তার সাথে সম্পর্ক ছিন্ন করল, তখন আমি তাকে তোমার সাথে বিবাহ বন্ধনে আবদ্ধ করলাম, যাতে পোষ্যপুত্ররা তাদের স্ত্রীদের সাথে সম্পর্ক ছিন্ন করলে তাদেরকে বিবাহ করতে আস্থাবানদের মনে সন্দেহ না থাকে। ঈশ্বরের আদেশ তো কার্যকর হয়েই থাকে।

(৩৮) পয়গম্বরের জন্য ঈশ্বর যা নির্ধারিত করে দিয়েছেন, তাতে তার কোন ক্ষতি নেই। পূর্বে যে সব পয়গম্বর গত হয়েছেন, তাদের জন্য ঈশ্বরের একই বিধান ছিল। ঈশ্বরের বিধান সুনির্ধারিত। (৩৯) তারা ঈশ্বরের বাণী প্রচার করতেন এবং তাঁকেই ভয় করতেন। হিসাব গ্রহণকারী হিসাবে ঈশ্বরই যথেষ্ট। (৪০) মুহাম্মদ তোমাদের মধ্যে কোন পুরুষদের পিতা নয়, বরং ঈশ্বরের বার্তাবাহক এবং অন্তিম পয়গম্বর। আর ঈশ্বর সবকিছুই জানেন।

(৪১) হে বিশ্বাসীগণ! ঈশ্বরকে অধিক স্মরণ কর। (৪২) আর সকাল সন্ধ্যায় তাঁরই স্তুতি কর। (৪৩) তিনিই তোমাদের প্রতি অনুগ্রহ পাঠান এবং তাঁর দেবদূতগণও অনুগ্রহ প্রার্থনা করে যাতে তিনি তোমাদেরকে অন্ধকার থেকে আলোয় নিয়ে আসেন। আর তিনি আস্থাবানদের প্রতি খুবই দয়াশীল। (৪৪) যে দিন তারা তাঁর সাথে মিলিত হবে, সেদিন তাদেরকে

‘শান্তি’ দ্বারা অভ্যর্থনা করা হবে। তিনি তাদের জন্য সম্মানজনক প্রতিদান প্রস্তুত করে রেখেছেন।

(৪৫) হে পয়গম্বর! আমি তোমাকে পাঠিয়েছি একজন সাক্ষী, সুসংবাদাতা ও সতর্ককারী হিসাবে। (৪৬) ঈশ্বরের অনুমতিক্রমে তাঁরই দিকে আহ্বানকারীরূপে এবং এক উজ্জ্বল আলোকবর্তিকা রূপে। (৪৭) বিশ্ববাসীগণকে সুসংবাদ দিয়ে দাও যে, তাদের জন্য ঈশ্বরের পক্ষ থেকে বিরাট অনুগ্রহ রয়েছে। (৪৮) আর অস্বীকারকারী এবং কপটাচারীদের কথা মান্য করো না, তাদের নির্যাতন উপেক্ষা কর এবং ঈশ্বরের উপর ভরসা কর। নির্ভর করার জন্য ঈশ্বরই যথেষ্ট।

(৪৯) হে বিশ্বাসীগণ! যখন তোমরা আস্থাশীলা নারীদের বিয়ে কর এবং বিয়ে সুসম্পন্ন হওয়ার আগেই যদি তাদেরকে ত্যাগ কর, তাহলে নির্ধারিত বিলম্ব কাল (ইদ্দত) পালন করার প্রয়োজন নেই, অতএব তাদেরকে কিছু জীবন ধারণের সামগ্রী দাও এং সৌজন্যের সাথে বিদায় কর।

(৫০) হে পয়গম্বর! আমি তোমার জন্য বৈধ করে দিয়েছি তোমার ওই সব স্ত্রীদের যাদের মোহরানা (যৌতুক) তুমি দিয়ে দিয়েছ, এবং ওই মহিলাদেরকেও যারা তোমার মালিকানাধীন, যা ঈশ্বর যুদ্ধলব্ধ হিসাবে তোমাকে দিয়েছেন এবং তোমার কাকার মেয়ে, পিসির মেয়ে, মামার মেয়ে, মাসির মেয়ে যারা তোমার সাথে দেশত্যাগ করেছে, এবং সেই আস্থাবান মহিলাকেও যে নিজেকে পয়গম্বরের নিকট নিবেদন করলে এবং পয়গম্বর তাকে বিবাহ করতে চাইলে, সেও বৈধ। এটা বিশেষভাবে তোমার জন্যে, অন্য আস্থাবানদের জন্যে নয়; তোমার অসুবিধা দূরীকরণের উদ্দেশ্যে। আস্থাবানদের স্ত্রী ও দাসীদের ব্যাপারে যা নির্ধারিত করেছি আমার জানা আছে। ঈশ্বর ক্ষমাশীল ও অতি দয়ালু।

(৫১) তুমি তাদের মধ্যে থেকে যাকে ইচ্ছা দূরে রাখতে এবং যাকে ইচ্ছা তোমার কাছে রাখতে পার। আবার যাদেরকে দূরে রেখেছিলে তাদের মধ্যে কাউকে ডেকে নিলেও তোমার কোন পাপ নেই। আশা করা যায় এতে তাদের চক্ষুশীতল হবে এবং তারা ব্যথিত হবে না। আর তুমি তাদেরকে যা দেবে তাতে তারা সবাই সন্তুষ্ট থাকবে। তোমার অন্তরে যা আছে তা ঈশ্বর জানেন। ঈশ্বর মহাজ্ঞানী, সহনশীল। (৫২) এর বাইরে অন্য নারীরা তোমার জন্য বৈধ নয়, এবং তোমার স্ত্রীদের পরিবর্তে অন্য স্ত্রী গ্রহণ করাও বৈধ নয়, যদিও তাদের রূপ সৌন্দর্য তোমাকে মুগ্ধ করে; তবে তোমার মালিকানাধীন দাসীদের ক্ষেত্রে এই বিধি নিষেধ প্রযোজ্য নয়। আর ঈশ্বর সবকিছুর সংরক্ষক।

(৫৩) হে বিশ্বাসীগণ! তোমরা পয়গম্বরের ঘরে প্রবেশ করো না। অবশ্য খাদ্য গ্রহণের জন্য অনুমতি দেওয়া হলে প্রবেশ করতে পার। তা তৈরী না হওয়া পর্যন্ত এভাবে বসে থাকবে না; কিন্তু যখন তোমাদের ডাকা হবে তখন প্রবেশ কর। আহার করা শেষ হলে প্রস্থান কর। কথা বার্তায় মশগুল হয়ে বসে থাকবে না। তাতে পয়গম্বরের অসুবিধা হয়; কিন্তু সে তোমাদেরকে উঠিয়ে দিতে সঙ্কোচ বোধ করে। তবে ঈশ্বর সত্য কথা বলতে সঙ্কোচ বোধ করেন না। আর যখন তোমরা পয়গম্বরের স্ত্রীদের নিকট কোন জিনিষ চাইবে তখন পর্দার আড়াল থেকে চাও। এই ব্যবস্থায় তোমাদের ও তাদের মন অধিকতর পবিত্র থাকবে। পয়গম্বরকে কষ্ট দেওয়া এবং তারপরে তার স্ত্রীদেরকে বিবাহ করা তোমাদের জন্য বৈধ নয়। এটা ঈশ্বরের নিকট খুবই গুরুতর বিষয়। (৫৪) তোমরা কোন বিষয় প্রকাশ কর কিংবা গোপন রাখ, ঈশ্বর সবকিছুই জানেন।

(৫৫) পয়গম্বরের স্ত্রীদের জন্য তাদের পিতা, পুত্র, ভ্রাতা, ভ্রাতুষ্পুত্র, ভগ্নীপুত্র, সেবিকাগণ ও মালিকানাধীন দাসদাসীদের সামনে উপস্থিত হওয়ার ব্যাপারে কোন অপরাধ নেই। তোমরা ঈশ্বরকে ভয় কর। নিঃসন্দেহে ঈশ্বর সবকিছুর প্রতি দৃষ্টিবান।

(৫৬) ঈশ্বর ও তাঁর দেবদূতগণ পয়গম্বরের প্রতি দরদ (কল্যাণ) প্রেরণ করেন। হে বিশ্বাসীগণ! তোমরাও তার প্রতি দরদ (কল্যাণ) ও শান্তি প্রেরণ কর। (৫৭) যারা ঈশ্বর ও তাঁর পয়গম্বরকে কষ্ট দেয় ঈশ্বর তাদেরকে পৃথিবীতে এবং পরলোকে অভিশপ্ত করেন। তিনি তাদের জন্য লাঞ্ছনাকর শাস্তিও প্রস্তুত করে রেখেছেন। (৫৮) আর যারা বিনা অপরাধে আস্থাবান পুরুষ ও আস্থাবান মহিলাদেরকে কষ্ট দেয় তারা অপবাদ ও স্পষ্ট পাপের বোঝা বহন করে।

(৫৯) হে পয়গম্বর! তুমি তোমার স্ত্রী ও কন্যাদের এবং আস্থাবান মহিলাদের বলঃ তারা যেন (জনসমক্ষে থাকাকালীন) তাদের বহিরাবরণের কিছু অংশ তাদের উপরে টেনে নেয়। এর ফলে তাদেরকে চেনা সহজ হবে এবং তারা উত্মত্ত হবে না, আর ঈশ্বর ক্ষমাশীল দয়াবান। (৬০) কপটাচারীরা এবং ওই লোকেরা যাদের মন ব্যাধিগ্রস্ত আর মদীনায গুজব রটনাকারীরা যদি বিরত না হয় তাহলে তোমাকে তাদের উপর কতৃৎ দান করবো। অতঃপর এই নগরীতে তোমার প্রতিবেশীরূপে অল্প সংখ্যক লোকই থাকবে। (৬১) তারা অভিশপ্ত হয়েছে; তাদেরকে যেখানেই পাওয়া যাবে, ধরা হবে এবং প্রাণ বধ করা হবে।^১ (৬২) যারা পূর্বে অতীত হয়ে গেছে তাদের ক্ষেত্রেও ঈশ্বরের এই বিধানই ছিল। আর তুমি ঈশ্বরের বিধানে কোন পরিবর্তন দেখবে না।

^১ বিঃ দ্রঃ- (৩৩ : ৬১) পরিচয় অংশে ১৩ থেকে ১৫ পৃষ্ঠা দ্রষ্টব্য।

(৬৩) লোকেরা তোমাকে মহা-বিনাশ সম্পর্কে জিজ্ঞেস করে। বলঃ তার জ্ঞান কেবল ঈশ্বরের কাছেই আছে। তুমি কি জান? সম্ভবতঃ মহা-বিনাশ নিকটে এসে গেছে। (৬৪) নিঃসন্দেহে ঈশ্বরের অবজ্ঞাকারীদের অনুগ্রহ থেকে বঞ্চিত করেছেন। আর ওদের জন্য জ্বলন্ত আগুন প্রস্তুত করে রেখেছেন। (৬৫) তারা তার মধ্যে চিরকাল থাকবে। কোন অভিভাবক বা সাহায্যকারীও পাবে না। (৬৬) যে দিন ওদের মুখমণ্ডল আগুনে ওলট-পালট করে দেওয়া হবে। তারা বলবেঃ হায়! আমরা যদি ঈশ্বরের আদেশ মেনে চলতাম আর পয়গম্বরের আদেশ মেনে চলতাম! (৬৭) তারা আরো বলবেঃ হে আমাদের প্রভু! আমরা তো আমাদের নেতাদের ও বড়দের কথা মেনে চলতাম; কিন্তু তারাই আমাদেরকে বিপথগামী করেছে। (৬৮) হে আমাদের প্রভু! তাদেরকে দ্বিগুন শাস্তি দিন এবং তাদেরকে ভয়ানক অভিসম্পাত করুন।

(৬৯) হে বিশ্বাসীগণ! তোমরা তাদের মত হয়ো না, যারা মুসাকে (মোজেসকে) কষ্ট দিয়েছিল। তারা যা বলেছিল ঈশ্বর তা থেকে তাকে নির্দোষ প্রমাণ করেছিলেন। সে ছিলো ঈশ্বরের কাছে মর্যাদাবান। (৭০) হে বিশ্বাসীগণ! ঈশ্বরকে ভয় কর এবং উচিৎ কথা বল। (৭১) তিনিই তোমাদের কর্ম ত্রুটিমুক্ত করবেন এবং তোমাদের পাপসমূহ ক্ষমা করবেন। আর যে ঈশ্বর ও তাঁর পয়গম্বরের কথা মেনে চলবে সে বড় সাফল্য লাভ করবে।

(৭২) আমি তো আকাশ, পৃথিবী ও পর্বতমালার কাছে এই আমানত পেশ করেছিলাম। তারা তা বহন করতে অস্বীকার করল এবং একে ভয় পেল; কিন্তু মানুষ তা বহন করলো, নিঃসন্দেহে সে অত্যাচারী ও অজ্ঞ। (৭৩) পরিণামে কপটাচারী পুরুষ ও কপটাচারী মহিলা এবং বহুশ্বরবাদী পুরুষ ও বহুশ্বরবাদী মহিলাকে ঈশ্বর শাস্তি দেবেন এবং আস্থাবান পুরুষ ও আস্থাবান মহিলাদের ক্ষমা করবেন। আর ঈশ্বর ক্ষমাশীল, দয়াবান।

অধ্যায় ৩৪ : সাবা (সাবা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) প্রশংসা ঈশ্বরেরই যিনি আকাশ ও পৃথিবীর সবকিছুরই মালিক। তাঁরই প্রশংসা পরলোকেও, তিনি প্রজ্ঞাবান, সর্বজ্ঞ। (২) ভূমিতে যা কিছু প্রবেশ করে, ভূমি থেকে যা কিছু নির্গত হয়। আকাশ থেকে যা কিছু নেমে আসে আর আকাশে যা কিছু উঠে যায় তিনি সবকিছুই জানেন। তিনিই পরম দয়ালু, ক্ষমাশীল।

(৩) যারা অবিশ্বাস করে তারা বলেঃ আমাদের উপর মহা-বিনাশ আসবে না। বলঃ কেন আসবে না? আমার প্রভুর শপথ, তোমাদের উপর তা অবশ্যই আসবে। তিনি অদৃশ্যকে জানেন। আকাশ ও পৃথিবীর অনু পরিমাণ বা তার চেয়েও ছোট কিংবা বড় কোন কিছুই তাঁর অগোচরে নয়। বরং সবই এক স্পষ্ট গ্রন্থে লিপিবদ্ধ আছে। (৪) যাতে তিনি ঐ লোকদের প্রতিফল দেন যারা আস্থাশীল ও সৎকর্মপরায়ণ। এদের জন্যেই ক্ষমা আর সম্মানজনক জীবিকা রয়েছে। (৫) আর যারা আমার নিদর্শন সমূহকে ব্যর্থ করার চেষ্টা করেছে তাদের জন্য রয়েছে যন্ত্রনাদায়ক কঠোর শাস্তি। (৬) আর যাদেরকে জ্ঞান দেওয়া হয়েছে তারা জানে, তোমার কাছে তোমার প্রভুর পক্ষ থেকে যে জিনিষ পাঠানো হয়েছে, তারা জানে এ সত্য আর তা পরাক্রমশালী ও প্রশংসিত ঈশ্বরের পথ দেখায়।

(৭) আর যারা অস্বীকার করে তারা বলেঃ আমরা কি তোমাকে এমন এক ব্যক্তির সন্ধান দেব যে বলে, যখন তোমরা ছিন্ন-ভিন্ন হয়ে যাবে তখন আবার তোমাদের নতুন করে সৃষ্টি করা হবে। (৮) সে কি ঈশ্বর সম্পর্কে মিথ্যা বানিয়ে বলছে না কি তার মধ্যে পাগলামি আছে? বরং যারা পরলোকে

বিশ্বাসী নয় তারাই শাস্তির মধ্যে এবং সুদূর পথ ভ্রষ্টতায় লিপ্ত আছে। (৯) তবে কি তারা আকাশ ও পৃথিবীর দিকে তাকিয়ে দেখে না যা তাদের সামনে ও পিছনের দিকে আছে? আমি যদি ইচ্ছা করি তাদেরকে ভূমিতে ধবসিয়ে দিতে পারি অথবা আকাশ থেকে তাদের উপর খণ্ড ফেলে দিতে পারি। নিঃসন্দেহে প্রত্যেক ঈশ্বরঅভিমুখী বান্দার জন্য এতে নিদর্শন রয়েছে।

(১০) আর আমি আমার পক্ষ থেকে দাউদ কে (ডেভিড) বড় অনুগ্রহ দান করেছি। হে পর্বতমালা! তোমরাও তার সাথে স্তুতি কর আর এভাবে পাখিদেরকেও আদেশ দিয়েছি এবং লোহাকেও তার জন্য নরম করে দিয়েছি। (১১) তুমি প্রশস্ত বর্ম তৈরী কর, তাতে পরিমাপ মত আংটা লাগাও আর সৎকর্ম কর। তুমি যা করছো আমি তা দেখছি।

(১২) সলোমনের জন্য বাতাসকে তার বশীভূত করে দিয়েছিলাম যাতে সকালে এক মাসের পথ এবং সন্ধ্যায় এক মাসের পথ অতিক্রম করতে পারে। আর তার জন্য আমি তামার একটি বারনা প্রবাহিত করেছিলাম। কতক জ্বিন তার প্রভুর আদেশে তার সামনে কাজ করত। তাদের মধ্যে কেউ আমার আদেশের অন্যথা করলে আমি তাকে জ্বলন্ত আগুনের শাস্তি আশ্বাদন করাবো। (১৩) সে যা চাইত জ্বিনেরা তার জন্য তাই বানাত। অটালিকা, ভাস্কর্য, হাওজ (পুকুর) এর মতো গামলা ও মজবুত ডেগ। হে দাউদের (ডেভিড) সন্তানেরা! তোমরা কৃতজ্ঞতার সাথে কাজ কর, তবে আমার বান্দাদের মধ্যে অল্প সংখ্যকই কৃতজ্ঞ।

(১৪) অতঃপর আমি যখন তার মৃত্যুর সিদ্ধান্ত কার্যকর করলাম তখন কোন জিনিসই তাকে তার মৃত্যুর খবর দিতে পারেনি, একমাত্র মাটির পোকা ছাড়া, যা তার লাঠিটি খেয়ে ফেলেছিল। অতঃপর সে যখন পড়ে গেল তখন জ্বিনেরা বুঝতে পারল যে তারা যদি অদৃশ্যের খবর জানতো তাহলে তারা

এত অপমানজনক শ্রমে নিযুক্ত থাকত না।

(১৫) সাবাবাসীদের জন্য তাদের আবাসস্থল তাদের জন্য একটি নিদর্শন ছিল। দুটি বাগান একটি ডানদিকে, ওপরটি বামদিকে; তাদেরকে বলা হলো, “তোমরা তোমাদের প্রভুর দেওয়া জীবিকা থেকে আহার কর এবং তাঁর প্রতি কৃতজ্ঞতা প্রকাশ করো। (কত) সুন্দরতম নগরী এবং ক্ষমাশীল তোমাদের প্রভু!” (১৬) অতঃপর তারা অবজ্ঞা করল তখন আমি তাদের উপর বাঁধ ভাঙা প্লাবন পাঠালাম এবং তাদের বাগান দুটোকে এমন দুটি বাগানে পরিবর্তন করে দিলাম যাতে উৎপন্ন হয় বিস্বাদ ফলমূল, বাউগাছ ও সামান্য কিছু কুলগাছ। (১৭) এটা আমি তাদের কৃতঘ্নতার প্রতিফল দিলাম, আর এমন প্রতিফল আমি তাদেরকে দিই যারা কৃতঘ্ন।

(১৮) তাদের প্রতি ও যে সব জনপদের প্রতি আমি অনুগ্রহ করেছিলাম, তাদের মধ্যবর্তী স্থানে দৃশ্যমান বহু জনপদ স্থাপন করেছিলাম এবং তাদের মধ্যে যাতায়াতের যথাযথ ব্যবস্থা করেছিলাম এবং তাদের বলেছিলামঃ তোমরা রাতে ও দিনে নিরাপদে ঐ সমস্ত জনপদে ভ্রমণ করো। (১৯) কিন্তু তারা বললঃ হে আমাদের প্রভু! আমাদের যাত্রাপথের ব্যবধান বাড়িয়ে দাও। তারা তাদের নিজেদের প্রতি অন্যায় করেছিল। তাই আমি তাদেরকে উপখ্যানে পরিণত করে দিয়েছি এবং তাদেরকে একেবারে ছিন্নভিন্ন করে দিয়েছি। নিঃসন্দেহে এতে ধৈর্যশীল ও কৃতজ্ঞ লোকদের জন্য রয়েছে নিদর্শন।

(২০) তাদের সম্বন্ধে ইবলীস তার ধারণা সত্য প্রমাণ করল। ফলে তাদের মধ্যে একটি বিশ্বাসী দল ব্যতীত সকলেই তার অনুসরণ করল। (২১) তাদের উপর ইবলিসের কোন কর্তৃত্ব ছিল না; কিন্তু আমি চেয়েছিলাম পরকালে বিশ্বাসীদেরকে এবং পরকালের ব্যাপারে সন্দেহ পোষনকারীদেরকে চিহ্নিত করা। তোমার প্রভু সব কিছুর সংরক্ষক।

(২২) বলঃ তোমরা ঈশ্বর ব্যতীত যাদেরকে উপাস্য মনে করতে তাদের কে ডাকো। তারা নভোমণ্ডলের ও ভূমণ্ডলের কণা পরিমান অংশের মালিক নয়। আর না এই দুইয়ে তাদের কোনো অংশীদারী আছে, আর না এদের মধ্যে তাদের কোন সহায়ক আছে। (২৩) তিনি যাকে অনুমতি দেবেন সে ব্যতীত তাঁর কাছে অন্য কারোর সুপারিশ কাজে আসবে না। অবশেষে যখন তাদের অন্তর থেকে ভয় দূর হবে, তখন তারা বলবেঃ তোমাদের প্রভু কি বললেন? উত্তরে তারা বলবেঃ তিনি সত্যের আদেশ দিয়েছেন। তিনি সর্বোচ্চ, মহামহিম।

(২৪) বলঃ কে তোমাদের আকাশ ও ধরণী থেকে জীবিকা দেন? বলঃ ঈশ্বর। আমাদের ও তোমাদের মধ্যে কোনো একদল সঠিক পথে আছে এবং অন্যদল স্পষ্ট পথভ্রষ্টতায় আছে। (২৫) বলঃ আমরা যে অপরাধ করি সে সম্পর্কে তোমাদেরকে জিজ্ঞাসা করা হবে না আর তোমরা যা কিছু করছো সে সম্পর্কে আমাদেরকেও কিছু জিজ্ঞাসা করা হবে না। (২৬) বলঃ আমাদের প্রভু আমাদেরকে একত্রিত করবেন, অতঃপর আমাদের মধ্যে তিনি সত্য অনুযায়ী মীমাংসা করবেন। তিনিই শ্রেষ্ঠ মীমাংসাকারী, মহাজ্ঞানী। (২৭) বলঃ তোমরা যাদেরকে অংশীদার হিসাবে তাঁর সাথে যুক্ত করেছো তাদেরকে আমাকে দেখাও। কখনই নয়, বরং সেই ঈশ্বর অত্যন্ত পরাক্রমশালী, প্রজ্ঞাময়।

(২৮) আমি তো তোমাকে সব মানুষের জন্য সুসংবাদদাতা ও সতর্ককারী রূপে পাঠিয়েছি; কিন্তু অধিকাংশ মানুষ তা জানে না। (২৯) আর তারা বলেঃ তোমরা যদি সত্যবাদী হও তাহলে বল, ওই প্রতিশ্রুতি কখন বাস্তবায়িত হবে? (৩০) বলঃ তোমাদের জন্য একটি বিশেষ দিনের প্রতিশ্রুতি আছে যা মুহূর্তের জন্য বিলম্বিত হবে না, আর ত্বরান্বিতও হবে না।

(৩১) আর যারা অস্বীকার করে তারা বলেঃ আমরা কখনই এই কুরআনকে বিশ্বাস করবো না এবং এর পূর্ববর্তী গ্রন্থকেও। এই অত্যাচারীদের যখন তাদের প্রভুর সামনে দাঁড় করানো হবে তখন যদি তুমি তাদের দেখতে। তারা তখন একে অপরের উপর দোষ চাপাতে থাকবে। যাদেরকে দুর্বল মনে করা হত তারা অহংকারীদের বলবেঃ যদি তোমরা না থাকতে তাহলে অবশ্যই আমরা সত্যে বিশ্বাস স্থাপনকারী হতাম। (৩২) অহংকারীরা দুর্বলদের কে বলবেঃ আমরা কি তোমাদের সঠিক পথে বাধা দিয়েছিলাম, সত্য যখন তোমাদের কাছেই পৌঁছে গিয়েছিল? বরং তোমরা নিজেরাই অপরাধী ছিলে। (৩৩) আর দুর্বলেরা অহংকারীদের বলবেঃ বরং তোমরা দিবারাত্র চক্রান্তে লিপ্ত ছিলে, যখন তোমরা আমাদেরকে বলতে ঈশ্বরকে অস্বীকার কর আর তার সাথে অংশীদার বানাও। তারা যখন শাস্তি দেখতে পাবে তখন অনুতাপ গোপন রাখবে। আর আমি অস্বীকার কারীদের গলদেশে শৃঙ্খল পরাবো। তাদেরকে তাদের কৃতকর্মের প্রতিফল দেওয়া হবে।

(৩৪) আমি যখনই কোন জনপদে সতর্ককারী পাঠিয়েছি, তখনই সেখানকার সম্পন্ন লোকেরা এটাই বলেছে যে, তোমাদেরকে যা দিয়ে পাঠানো হয়েছে আমরা তা বিশ্বাস করি না। (৩৫) তারা আরও বলেছে আমরা অধিক ধনসম্পদ ও সন্তান-সন্ততির অধিকারী তাই আমাদেরকে শাস্তি দেওয়া হবে না। (৩৬) বলঃ আমার প্রভু যাকে ইচ্ছা জীবিকা বর্ধিত করেন, আর যাকে ইচ্ছা জীবিকা সীমিত করেন; কিন্তু অধিকাংশ লোক তা জানে না। (৩৭) আর তোমাদের ধন-সম্পদ ও সন্তান-সন্ততি ওই বস্তু নয় যা পদমর্যাদায় তোমাদেরকে আমাদের নিকটবর্তী বানিয়ে দেয়। তবে হ্যাঁ, যে বিশ্বাস স্থাপন করেছে এবং ভালো কাজ করেছে এমন লোকদের জন্য তাদের কর্মের দ্বিগুণ প্রতিফল রয়েছে। আর তারা সুউচ্চ বাসস্থানে সন্তোষজনক ভাবে থাকবে।

(৩৮) আর যারা আমার নিদর্শন সমূহকে হয়ে প্রতিপন্ন করার জন্য সক্রিয়, তাদেরকে শাস্তির মধ্যে প্রবেশ করানো হবে। (৩৯) বলঃ আমার প্রভু তাঁর বান্দাদের মধ্যে যাকে চান অটেল জীবিকা দান করেন আর যাকে চান তার জীবিকা সংকুচিত করে দেন। আর যা কিছুই তোমরা ব্যয় করবে তিনি তার প্রতিফল দেবেন। তিনি শ্রেষ্ঠ জীবিকাদাতা।

(৪০) আর যে দিন তিনি তাদের সবাইকে একত্রিত করবেন এবং দেবদূতদের জিজ্ঞাসা করবেন, এরা কি তোমাদের উপাসনা করত? (৪১) তারা বলবেঃ তুমি পবিত্র মহান। আমরা আপনার পক্ষে, তাদের পক্ষে নই বরং তারা জ্বিনদের উপাসনা করত। এদের মধ্যে অধিকাংশই তাদের প্রতি অস্থাবান ছিল। (৪২) অতএব আজ তোমাদের কেউ কারও উপকার করতে পারবে না। আর ক্ষতিও করতে পারবে না আর আমি অপরাধীদেরকে বলবোঃ আগুনের স্বাদ আশ্বাদন কর যাকে তোমরা মিথ্যা বলতে।

(৪৩) আর যখন তাদেরকে আমার স্পষ্ট বাণী সমূহ শোনানো হত তখন তারা বলতঃ এতো এমনই এক ব্যক্তি যে তোমাদেরকে তোমাদের পিতৃপুরুষের উপাস্য থেকে বিমুখ করতে চায়। তারা আরও বলতঃ এটাতো (কুরআন) মিথ্যা উদ্ভাবন ব্যতীত কিছু নয়। ঐ অস্বীকারকারীদের কাছে যখন সত্য এল তখন তারা বললঃ এতো এক স্পষ্ট জাদু। (৪৪) তাদেরকে কোন গ্রন্থ দিইনি যা তারা পড়বে। আর আমি তোমার পূর্বে ওদের কাছে কোন সতর্ককারীও পাঠাইনি। (৪৫) তাদের পূর্ববতীরাও অস্বীকার করেছিল। আমি তাদেরকে যা দিয়েছিলাম এরাতো তার দশভাগের এক ভাগও পায়নি। তার পরেও তারা আমার পয়গম্বরদেরকে মিথ্যা বলেছিল। অতএব কেমন ভয়ঙ্কর ছিল আমার শাস্তি।

(৪৬) বলঃ আমি তোমাদেরকে একটা পরামর্শ দিচ্ছি তোমরা ঈশ্বরের জন্য দুজন দুজন করে ও একজন একজন করে দাঁড়িয়ে যাও। তারপর চিন্তা কর; তোমাদের বন্ধু উন্মাদ নয়। সেতো এক কঠোর শাস্তির পূর্বে তোমাদের সতর্ককারী মাত্র। (৪৭) বলঃ আমি তোমাদের কাছে যে প্রতিদান চাইতে পারতাম তা তোমাদেরই থাক। আমার প্রতিদান দেবেন তো ঈশ্বর। তিনি সবকিছুর সাক্ষী।

(৪৮) বলঃ আমার প্রভু সত্যকে (মিথ্যার উপর) নিক্ষেপ করেন। তিনি গোপন বিষয় সমূহ ভালোভাবেই জানেন। (৪৯) বলঃ সত্য এসে গেছে এবং তা স্থায়ী হবে আর মিথ্যা না পারে নতুন কিছু সৃষ্টি করতে এবং না পারে পুনরাবৃত্তি করতে। (৫০) বলঃ আমি যদি বিপদগামী হই তাহলে আমার বিপদগামীতার পরিণাম আমার উপর, আমি যদি সুপথে থাকি তবে তা এজন্য যে, আমার প্রতি আমার প্রভু প্রত্যাশে প্রেরণ করেছেন। নিঃসন্দেহে তিনি সর্বশ্রোতা এবং অতি নিকটবর্তী।

(৫১) আর যদি তখন তুমি দেখতে, যখন তারা ভীতসন্ত্রস্ত হবে এবং তারা পালাতেও পারবে না এবং নিকট থেকেই ধরে আনা হবে। (৫২) আর তারা বলবেঃ আমরা তাঁর প্রতি বিশ্বাস স্থাপন করলাম কিন্তু এত দূর থেকে তাঁর নাগাল পাবো কি ভাবে। (৫৩) অথচ আগে তারা তা অবিশ্বাস করেছিল আর না দেখে দূর থেকে আন্দাজে মন্তব্য করত। (৫৪) তাদের ও তাদের কামনার মধ্যে অন্তরাল সৃষ্টি করা হয়েছে, যেমন পূর্বে তাদের সতীর্থদের ক্ষেত্রেও করা হয়েছিল। তারা বিভ্রান্তিকর সন্দেহে পতিত ছিল।

অধ্যায় ৩৫ : ফাতির (স্রষ্টা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) সকল প্রশংসা ঈশ্বরের জন্য, যিনি আকাশমণ্ডলী ও পৃথিবীর সৃষ্টিকর্তা। দুই-দুই, তিন-তিন ও চার-চার ডানা বিশিষ্ট দেবদূতদেরকে বার্তাবাহক করেছেন। তিনি তাঁর সৃষ্টির সঙ্গে যা চান তা সংযোজন করেন, কারণ তিনি সবকিছু করতে সক্ষম। (২) ঈশ্বর মানুষের জন্য যে অনুগ্রহ উন্মুক্ত করে দেন তা অবরুদ্ধ করার ক্ষমতা কারো নেই। আর তিনি যা অবরুদ্ধ করেন তা উন্মুক্ত করার ক্ষমতা কারো নেই। তিনি পরাক্রমশালী, প্রজ্ঞাময়।

(৩) হে মানুষ! তোমাদের প্রতি ঈশ্বরের অনুগ্রহ স্মরণ কর। ঈশ্বর ছাড়া অন্য কোন সৃষ্টি কর্তা আছে কি? যিনি তোমাদেরকে আকাশ ও পৃথিবী থেকে জীবিকা দান করেন। তিনি ছাড়া কোনই উপাস্য নেই। তাহলে তোমরা সত্য বিমুখ হচ্ছে কেন? (৪) আর এরা যদি তোমার প্রতি মিথ্যা আরোপ করে তাহলে তোমার পূর্বেও অনেক পয়গম্বরদের প্রতি মিথ্যা আরোপ করা হয়েছিল। আর যাবতীয় বিষয় ঈশ্বরের কাছেই প্রত্যাবর্তিত হবে।

(৫) হে মানুষ! নিঃসন্দেহে ঈশ্বরের প্রতিশ্রুতি সত্য। অতএব পার্থিব জীবন যেন তোমাদের প্রতারিত না করে। আর সেই প্রধান প্রতারক যেন তোমাদের ঈশ্বর সম্পর্কে প্রতারণা করতে না পারে।^১

^১ বিঃ দ্রঃ - (৩৫:০৫) আকস্মিক মৃত্যু, ভূমিকম্পের বিপর্যয় এবং এমন ঘটনাপ্রবাহ মানুষের স্বাভাবিক স্থৈর্যকে আন্দোলিত করে দেয়। বস্তুতপক্ষে এই ঘটনাগুলি আমাদেরকে প্রলয় দিবসের কথা স্মরণ করিয়ে দেয়। কিন্তু শয়তান পরক্ষণেই মানুষের মনোযোগের অভিমুখ পরিবর্তন করে দেয় এই বলে, যে-এই ঘটনাগুলির পশ্চাতে প্রকৃতিক কারণ আছে, কোন দৈব কারণ নেই।

(৬) নিঃসন্দেহে শয়তান তোমাদের শত্রু, তাই তাকে শত্রুই মনে করবে, সে তার দলকে এজন্যই ডাকে যাতে তারাও নরকবাসী হয়ে যায়। (৭) যারা অস্বীকার করেছে, ওদের জন্য রয়েছে কঠোর শাস্তি আর যারা বিশ্বাস স্থাপন করেছে এবং সৎকর্ম করেছে তাদের জন্য রয়েছে ক্ষমা আর বড় প্রতিফল।

(৮) এমন ব্যক্তি যাকে তার মন্দকর্ম শোভনীয় করে দেখানো হয়েছে, অতঃপর সে ওটাই উত্তম মনে করতে আরম্ভ করেছে (সে কি ঐ ব্যক্তির সমতুল্য যে সত্য পথে পরিচালিত হয়েছে) ঈশ্বর যাকে চান বিপথগামী করেন আর যাকে চান সঠিক পথ দেখান। অতএব ওদের জন্য দুঃখী হয়ে তুমি নিজেকে ব্যথিত করো না। ঈশ্বর জানেন তারা যা করছে।

(৯) ঈশ্বরই বাতাস পাঠিয়ে দেন। এই বাতাস মেঘ উড়িয়ে আনে, তারপর আমি ওকে কোন নিষ্প্রাণ দেশের দিকে নিয়ে যাই। অতঃপর তা থেকে আমি মৃত-ভূমিকে পূর্ণজীবিত করি। এভাবেই হবে পুনরুত্থান। (১০) কেহ সম্মান চাইলে জেনে রেখো সমস্ত সম্মানতো ঈশ্বরের জন্যই, তাঁরই দিকে পবিত্র বাক্য আরোহণ করে এবং সৎকর্ম তাকে উন্নীত করে। যারা মন্দকর্মের চক্রান্ত করছে ওদের জন্য কঠোর শাস্তি এবং ওদের চক্রান্ত ব্যর্থ হবেই।

(১১) আর ঈশ্বর তোমাদেরকে মাটি থেকে সৃষ্টি করেছেন। তারপর শুক্রবিন্দু থেকে, তারপর তোমাদেরকে জোড়া বানিয়েছেন। তাঁর জ্ঞান ব্যতীত কোন নারী গর্ভধারণ করে না বা প্রসব করে না; এবং কোন ব্যক্তির জীবন দীর্ঘায়িত বা সংক্ষিপ্ত করা হয় না। এ সবই গ্রন্থে লিখিত আছে। নিঃসন্দেহে ঈশ্বরের জন্য এটা খুব সহজ।

(১২) দুই সমুদ্র সমান হয় না একটি সুমিষ্ট ও তৃষ্ণানিবারক সুপেয় এবং অন্যটি লবনাক্ত ও বিস্বাদপূর্ণ। আর দুটো থেকেই তোমরা টাটকা মাংস আহার কর এবং সৌন্দর্যের বস্তু আহরণ কর যা তোমরা পরিধান কর। আর তোমরা

তার বুক চিরে জাহাজ চলতে দেখ, যাতে তোমরা তাঁর অনুগ্রহ অন্বেষণ কর এবং যাতে কৃতজ্ঞতা প্রকাশ কর। (১৩) তিনি রাতকে দিনের মধ্যে প্রবেশ করান ও দিনকে রাতের মধ্যে প্রবেশ করান। আর তিনি সূর্য ও চন্দ্রকে নিয়মাধীন করে দিয়েছেন। প্রত্যেকেই একটি নির্ধারিত মেয়াদ পর্যন্ত ছুটে চলেছে। সেই ঈশ্বরই তোমাদের প্রভু; রাজত্ব তাঁরই। তিনি ব্যতীত তোমরা যাদেরকে ডাক তারা তো খেজুরের আঁটির পাতলা আবরণেরও মালিক নয়। (১৪) যদি তোমরা তাদেরকে ডাক তারা তোমার ডাক শুনবে না আর যদি তারা শোনেও তাহলে তোমার ডাকের উত্তরে তারা কিছুই করতে পারবে না, আর পুনরুত্থান দিবসে তারা তোমাদের শিরক (অংশীবাদীতা) অস্বীকার করবে; আর মহা-বিজ্ঞের ন্যায় কেউ তোমাকে অবহিত করবে না।

(১৫) হে মানুষ! তোমরা তো ঈশ্বরের মুখাপেক্ষী; কিন্তু ঈশ্বর অ-মুখাপেক্ষী, প্রশংসিত। (১৬) তিনি যদি ইচ্ছা করেন তাহলে তোমাদেরকে অপসৃত করে এক নতুন সৃষ্টি আনতে পারেন। (১৭) আর এটা ঈশ্বরের জন্য কঠিন কিছু নয়। (১৮) কোন বোঝা বহনকারী অন্যের বোঝা বহন করবে না। আর গুরুতর ভারগ্রস্ত কেউ তার ভার বহন করতে অন্যকে ডাকলে তার কিছুই বহন করা হবে না, যদি সে নিকটাত্মীয়ও হয়। তুমি তো কেবল তাদেরকেই সতর্ক করতে পার যারা তাদের প্রভুকে না দেখেও ভয় করে এবং প্রার্থনা করে; আর যে ব্যক্তি পবিত্র হয় সে নিজের জন্যই পবিত্র হয়। আর ঈশ্বরের কাছেই তো প্রত্যাবর্তন।

(১৯) আর অন্ধ ও দৃষ্টিমান সমান নয়। (২০) সমান নয় অন্ধকার আর আলো। (২১) সমান নয় ছায়া আর রৌদ্র। (২২) আর জীবিত ও মৃত সমান হতে পারে না। নিঃসন্দেহে ঈশ্বর যাকে চান শোনাতে পারেন আর তুমি ওদেরকে শোনাতে পার না যারা কবরে আছে। (২৩) তুমি তো কেবল একজন সতর্ককারী। (২৪) আমি তোমাকে সত্যসহ পাঠিয়েছি সুসংবাদদাতা ও সতর্ককারী করে, আর

এমন কোন উন্মত (জাতি) নেই যাদের কাছে কোন সতর্ককারী আসেনি। (২৫) যদি এরা তোমার প্রতি মিথ্যা আরোপ করে তাহলে এর পূর্বেও যারা ছিল তারাও তাদের পয়গম্বরদের প্রতি মিথ্যা আরোপ করেছিল। ওদের কাছে ওদের পয়গম্বর প্রত্যক্ষ নিদর্শন, গ্রন্থাবলী এবং আলোকজ্জ্বল গ্রন্থ নিয়ে এসেছিল। (২৬) তবুও যারা অস্বীকার করেছিল আমি তাদেরকে পাকড়াও করেছিলাম। কী ভয়ঙ্কর ছিল আমার শাস্তি!

(২৭) তুমি কি দেখনি যে, ঈশ্বর আকাশ থেকে বৃষ্টি বর্ষণ করেছেন। অতঃপর তার সাহায্যে আমি বিভিন্ন বর্ণের ফলমূল উৎপন্ন করেছি, আর পর্বতেও আছে সাদা, লাল এবং বিভিন্ন বর্ণের রেখা এবং গাঢ় কালো বর্ণেরও। (২৮) এমনভাবে বিভিন্ন বর্ণের মানুষ, জীব-জন্তু ও চুতুষ্পদ পশুও আছে। ঈশ্বরের বান্দাদের মধ্যে কেবল জ্ঞানীরাই তাঁকে ভয় করে। নিঃসন্দেহে ঈশ্বর পরাক্রমশালী, ক্ষমশীল।

(২৯) যারা ঈশ্বরের গ্রন্থ পাঠ করে, প্রার্থনা করে আর আমি যা কিছু তাদেরকে দিয়েছি তা থেকে গোপনে ও প্রকাশ্যে ব্যয় করে তারা এমন এক ব্যবসা আশা করে যাতে কখনই মন্দা আসবে না। (৩০) এজন্য যে, তিনি তাদেরকে তাদের কর্মফল পরিপূর্ণরূপে দেবেন এবং নিজ অনুগ্রহে আরো বেশী দেবেন। নিঃসন্দেহে তিনি ক্ষমশীল ও গুণগ্রাহী। (৩১) আর আমি তোমার প্রতি যে গ্রন্থ অবতীর্ণ করেছি তা সত্য এবং তাঁর পূর্ববর্তী গ্রন্থের সমর্থক। নিঃসন্দেহে ঈশ্বর তাঁর বান্দাদের খবর রাখেন এবং দেখেন।

(৩২) অতঃপর আমি আমার বান্দাদের মধ্যে যাদেরকে পছন্দ করেছি তাদেরকে গ্রন্থের উত্তরাধিকারী করেছি। তবে তাদের মধ্যে কেউ নিজের প্রতি অন্যায় করেছে আর কেউ মধ্যপন্থা অবলম্বন করেছে। আবার কেউ ঈশ্বরের কৃপায় কল্যাণকর কাজ কর্মে অগ্রগামী। এটাই সবচেয়ে বড় অনুগ্রহ। (৩৩) এরা স্থায়ী উদ্যানে প্রবেশ করবে, সেখানে তাদেরকে সোনার কংকন ও মুক্তার অলংকার

পরানো হবে, সেখানে তাদের পোষাক হবে রেশমের। (৩৪) আর তারা বলবেঃ ঈশ্বরকে ধন্যবাদ! তিনিই আমাদের দুঃখ দূর করেছেন। নিঃসন্দেহে আমাদের প্রভু ক্ষমাশীল, গুণগ্রাহী। (৩৫) যিনি নিজ অনুগ্রহে আমাদেরকে স্থায়ী বসবাসের ঘর দিয়েছেন; যেখানে কোন কষ্ট আমাদের স্পর্শ করে না এবং যেখানে কোন ক্লান্তি আমাদেরকে স্পর্শ করে না।

(৩৬) কিন্তু যারা অবিশ্বাস করেছে তাদের জন্য রয়েছে নরকের আগুন। না তাদের মৃত্যু আসবে আর না তাদের অব্যহতি আর না তাদের নরকের শাস্তি লাঘব করা হবে। আমি প্রত্যেক অস্বীকারকারীকেই এমনই শাস্তি দিই। (৩৭) আর তারা সেখানে আর্ত-চিৎকার করে বলবেঃ হে আমাদের প্রভু! আমাদেরকে বের করে নাও। আমরা ভাল কাজ করবো, আগে যা করতাম তা থেকে অন্য কিছু। আমি কি তোমার এতটা আয়ু দিই নি, যাতে কেউ উপদেশ গ্রহণ করতে চাইলে গ্রহণ করতে পারতে? আর তোমাদের কাছে সতর্ককারী এসেছিল; অতএব শাস্তি আশ্বাদন কর। অন্যায়কারীদের কোন সহায়ক নেই।

(৩৮) ঈশ্বর আকাশ ও পৃথিবীর অদৃশ্য বিষয় অবগত আছেন। নিঃসন্দেহে তিনি মনের কথা সম্পর্কেও অবহিত রয়েছেন। (৩৯) তিনিই তোমাদেরকে পৃথিবীতে প্রতি নিধি করেছেন।^১ অতএব যে অস্বীকার করবে তার অস্বীকার তার উপরে বর্তাবে। আর অবিশ্বাসীদের অস্বীকার ওদের প্রভুর ক্রোধই বৃদ্ধি করে। আর অবিশ্বাসীদের অস্বীকার ওদের ক্ষতিই বৃদ্ধি করবে।

^১ বিঃ দ্রঃ-(৩৫ঃ৩৯) ‘ঈশ্বর তোমাদেরকে পৃথিবীতে প্রতিনিধি করেছেন’-এই বাক্য দ্বারা বোঝানো হয়েছে যে, পূর্ববর্তী জাতিসমূহের আবির্ভাবের পর তোমাদেরকে তাদের স্থলাভিষিক্ত করা হয়েছে। মহিমাম্বিত ঈশ্বরের এটাই বিধান যে, তিনি কোন জাতিকে পৃথিবীতে তাদের গোড়াপত্তন করতে এবং উন্নতিবিধান করতে সুযোগ দেন। যখন তারা অকর্মণ্য হয়ে যায়, তখন তিনি অন্য জাতিকে তার স্থলাভিষিক্ত করেন।

(৪০) বলঃ ঈশ্বর ব্যতীত তোমরা যাদেরকে ডাক, তোমাদের সেই অংশীদারদের কথা কি ভেবে দেখেছ? তোমরা আমাকে দেখাওতো তারা পৃথিবীতে কি সৃষ্টি করেছে? না কি আকাশে তাদের কোন অংশ আছে? না কি আমি তাদেরকে কোন গ্রন্থ দিয়েছি যে, তারা তার প্রমাণের উপর রয়েছে? আসলে অত্যাচারীরা কেবল একে অন্যকে প্রতারণামূলক প্রতিশ্রুতি দিয়ে থাকে। (৪১) নিঃসন্দেহে ঈশ্বরই আকাশ ও পৃথিবীকে ধারণ করে রেখেছেন, যাতে তারা স্থানচ্যুত না হয়। আর যদি তারা স্থানচ্যুত হয় তাহলে তিনি ছাড়া কেউ তাদেরকে ধরে রাখতে পারবে না। নিঃসন্দেহে তিনি সহনশীল, ক্ষমাপরায়ণ।

(৪২) আর তারা দৃঢ়তার সাথে ঈশ্বরের শপথ করে বলেছিল যে, যদি তাদের কাছে কোন সতর্ককারী আসে তাহলে অবশ্যই তারা যে কোন জাতির চেয়ে বেশী সৎপথের অনুসারী হবে। অতঃপর যখন তাদের কাছে একজন সতর্ককারী এল তখন তারা বেশী করে বিমুখ হল, (৪৩) পৃথিবীতে ঔদ্ধাত্য প্রকাশের কারণে এবং কূট-চক্রান্তের কারণে। কূট-চক্রান্ত কূট-চক্রীদেরকেই পরিবেষ্টন করবে। তবে কি তারা সেই বিধানের অপেক্ষা করছে যা তাদের পূর্বের লোকদের উপর প্রকট হয়েছিল। অতএব ঈশ্বরের বিধানে তুমি কোন পরিবর্তন পাবে না বা কোন ব্যতিক্রম দেখতে পাবে না। (৪৪) এরা কি পৃথিবীতে পরিভ্রমণ করেনি? তাহলে তো দেখতে পেত, এদের পূর্ববর্তীদের পরিণতি কেমন হয়েছিল। তারা তো এদের চেয়ে বেশী শক্তিশালী ছিল। আকাশমণ্ডলী ও পৃথিবীর কোন কিছুই তাঁর পরিকল্পনা ব্যর্থ করে দিতে পারে না। নিঃসন্দেহে তিনি মহাজ্ঞানী, পরম সামর্থবান।

(৪৫) ঈশ্বর যদি মানুষকে তাদের কৃতকর্মের জন্য পাকড়াও করতেন তাহলে পৃথিবীর কোন প্রাণীকেও ছাড়তেন না; বরং তিনি তাদেরকে এক নির্দিষ্ট সময় পর্যন্ত অবকাশ দিয়ে থাকেন। যখন তাদের সেই নির্দিষ্ট মেয়াদ পূর্ণ হয়ে যায় তখন ঈশ্বর হবেন তাঁর বান্দাদের সম্যক দ্রষ্টা।

অধ্যায় ৩৬ : ইয়াসীন (ইয়াসীন)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ইয়া-সীন-(২) প্রজ্ঞাপূর্ণ কুরআনের শপথ। (৩) নিঃসন্দেহে তুমি পয়গম্বরদের একজন। (৪) খুবই সরল পথের অনুসারী। (৫) এটা সর্বশক্তিমান, পরম করুণাময় ঈশ্বরের পক্ষ থেকে অবতীর্ণ। (৬) যাতে তুমি ঐ লোকদেরকে সতর্ক করতে পার যাদের পূর্বপুরুষদেরকে সতর্ক করা হয় নি; অতএব তারা অনবহিত।

(৭) ওদের মধ্যে অধিকাংশ লোকের জন্য সেই বাণী অবধারিত হয়ে গেছে; অতএব তারা বিশ্বাস স্থাপন করবে না। (৮) আমি ওদের গলদেশে চিবুক পর্যন্ত বেড়ী লাগিয়ে দিয়েছি; ফলে তারা উদ্ধর্মুখী হয়ে আছে। (৯) আর আমি একটি আবরণ ওদের সামনে করে দিয়েছি আর একটি আবরণ ওদের পিছনে দিয়ে দিয়েছি এবং তাদেরকে টেকে দিয়েছি; ফলে তারা দেখতে পায় না। (১০) ওদেরকে তুমি সতর্ক কর আর না কর ওদের পক্ষে সমান। তারা বিশ্বাস করবে না। (১১) তুমি তো কেবল তাকেই সতর্ক করতে পারো যে উপদেশ মেনে চলে এবং না দেখেও ঈশ্বরকে ভয় করে। তাই এমন ব্যক্তিকে ক্ষমা ও সম্মানজনক পুরস্কারের সুসংবাদ দাও।

(১২) আমি মৃতদেরকে অবশ্যই জীবিত করবো আর আমি লিখে রাখছি যা তারা সামনে পাঠিয়েছে আর যা পিছনে রেখে এসেছে। আর সবকিছু আমি লিখে নিয়েছি এক স্পষ্ট গ্রন্থে।

(১৩) আর উদাহরণ স্বরূপ এদেরকে এক জনপদের অধিবাসীদের বৃত্তান্ত শোনাও যখন সেখানে পয়গম্বরগণ এসেছিল। (১৪) যখন আমি তাদের কাছে দুজন পয়গম্বর পাঠিয়েছিলাম কিন্তু তারা দুজনকেই অস্বীকার

করল, তখন আমি তৃতীয় একজনকে দিয়ে ওদের সহায়তা করলাম, তারা বললঃ আমরা তোমাদের কাছে প্রেরিত হয়েছি। (১৫) লোকেরা বললঃ তোমরা তো আমাদের মতই মানুষ, করুণাময় কোন কিছুই অবতীর্ণ করেন নি। তোমরা শুধু মিথ্যা বলছো। (১৬) তারা বললঃ আমাদের প্রভু জানেন, আমরা নিশ্চিতরূপে তোমাদের কাছে প্রেরিত হয়েছি। (১৭) আর আমাদের দায়িত্ব তো কেবল স্পষ্টরূপে পৌঁছে দেওয়া। (১৮) লোকেরা বললঃ আমরা তোমাদেরকে অশুভ মনে করি, তোমরা যদি বিরত না হও তাহলে আমরা তোমাদেরকে পাথর মেরে হত্যা করবো এবং আমাদের তরফ থেকে তোমাদের উপর এক কঠোর শাস্তি নেমে আসবে। (১৯) তারা বললঃ তোমাদের অশুভ তোমাদেরই সাথে, এটা কি এ জন্যে যে, তোমাদেরকে উপদেশ দেওয়া হবে? আসলে তোমরা সীমালঙ্ঘনকারী জনগোষ্ঠী।

(২০) একটি লোক নগরীর দূর প্রান্ত থেকে ছুটতে ছুটতে এল, সে বললঃ হে আমার সম্প্রদায়! তোমরা পয়গম্বরদের কথা মেনে নাও। (২১) এদেরকে অনুসরণ কর যারা তোমাদের কাছে কোন প্রতিদান চায় না এবং এরা সঠিক পথে আছে।

(২২) আমি কেন সেই মহান সত্ত্বার উপাসনা করবো না, যিনি আমাকে সৃষ্টি করেছেন আর যার কাছে তোমাদেরকেও ফিরে যেতে হবে? (২৩) আমি কি তাঁর পরিবর্তে অন্য কাউকে উপাস্য বানাব? যদি করুণাময় আমাকে কোন কষ্ট দিতে চান তাহলে ওদের সুপারিশ আমার কোনই কাজে আসবে না আর ওরা আমাকে উদ্ধার ও করতে পারবে না। (২৪) নিঃসন্দেহে তখন আমি প্রকাশ্য পথভ্রষ্টতায় পতিত হব। (২৫) আমি তোমাদের প্রভুর প্রতি বিশ্বাস স্থাপন করেছি; অতএব তোমরাও আমার কথা শোন। (২৬) বলা হলঃ জান্নাতে (স্বর্গে) প্রবেশ কর। সে বললঃ হায়! আমার সম্প্রদায় যদি জানত!

(২৭) যে, আমার প্রভু আমাকে ক্ষমা করেছেন এবং আমাকে সম্মানিতদের অন্তর্ভুক্ত করেছেন।

(২৮) তারপর তার সম্প্রদায়ের বিরুদ্ধে আমি আকাশ থেকে কোন বাহিনী প্রেরণ করিনি আর আমি প্রেরণকারীও ছিলাম না। (২৯) একটি মাত্র বিস্ফোরণ হল আর অমনি সব স্তব্ধ হয়ে গেল। (৩০) বড় আফসোস বান্দাদের জন্য! যে পয়গম্বরই তাদের কাছে এসেছে, তারা তাকে উপহাসই করেছে। (৩১) তারা কি দেখেনি, আমি তাদের পূর্বে কত প্রজন্মকে ধ্বংস করে দিয়েছি, তারা তো আর তাদের কাছে ফিরে আসবে না। (৩২) অবশ্যই তাদের সকলকে একত্রিত করে আমার নিকট উপস্থিত করা হবে।

(৩৩) তাদের জন্য একটি নিদর্শন হল মৃত ভূমি। আমি তাকে জীবিত করি এবং তা থেকে আমি শস্য উৎপন্ন করি এবং তারা তা থেকে আহার করে। (৩৪) আর তাতে আমি খেজুরের এবং আঙুরের বাগান তৈরী করেছি এবং তাতে স্রোত প্রবাহিত করেছি। (৩৫) যাতে লোকেরা এর ফল খেতে পারে; অথচ এটা তাদের হাতের সৃষ্টি নয়; তবুও কি তারা কৃতজ্ঞতা প্রকাশ করবে না? (৩৬) পবিত্র সেই সত্ত্বা যিনি সমস্ত কিছু জোড়ায় জোড়ায় সৃষ্টি করেছেন - মাটি থেকে জন্মানো উদ্ভিদকে, তাদের নিজেদেরকে এবং অন্যান্যদেরকে যাদের সম্বন্ধে তারা জানে না।

(৩৭) আর তাদের জন্য একটি নিদর্শন হল রাত। আমি ওর থেকে দিনকে অপসারিত করি, অমনি সে অন্ধকারাচ্ছন্ন হয়ে পড়ে। (৩৮) এবং সূর্য, তার স্থির গন্তব্যে ছুটে চলে। এটা পরাক্রমশালী, মহাবিজ্ঞ ঈশ্বরের নির্ধারিত বিধান। (৩৯) আর চন্দ্রের জন্য আমি নির্ধারিত করেছি কতগুলো তিথি। যার ফলে তা এমন হয়ে যায় যেমন পুরানো খেজুরের ডাল। (৪০) সূর্যের পক্ষে চন্দ্রের নাগাল পাওয়া সম্ভব নয় আর না রাতের পক্ষে সম্ভব

দিনের আগে আসা। প্রত্যেকে নিজ নিজ কক্ষে ভেসে বেড়ায়।

(৪১) আর তাদের জন্য একটি নিদর্শন এই যে, আমি তাদের বংশধরদেরকে বোঝাই করা নৌকায় আরোহণ করিয়েছিলাম। (৪২) আর আমি তাদের জন্য ওর মত অন্য জিনিষও তৈরী করেছি যাতে তারা আরোহণ করে। (৪৩) আমি যদি ইচ্ছা করি তাদেরকে ডুবিয়ে দিতে পারি। তখন না থাকবে তাদের ডাক শোনার কেউ আর না থাকবে কোন উদ্ধারকারী। (৪৪) কিন্তু এটা আমার অনুকম্পা এবং ওদেরকে নির্দিষ্ট মেয়াদ অবধি সুযোগ দেওয়া।

(৪৫) যখন তাদেরকে বলা হয়ঃ তোমাদের সামনে যা আছে আর পিছনে যা আছে তাকে ভয় কর, যাতে তোমরা অনুগ্রহ লাভ করতে পারো। (৪৬) এবং যখনই তাদের প্রভুর নিদর্শনাবলীর কোন নিদর্শন তাদের নিকটে আসে, তখনই তারা তা থেকে মুখ ফিরিয়ে নেয়। (৪৭) আর যখন ওদের বলা হয়, ঈশ্বর তোমাদের যা কিছু দিয়েছেন তা থেকে ব্যয় কর তখন অস্বীকারকারীরা বিশ্বাসীগণকে বলেঃ আমরা কেন এমন কাউকে আহার করাব, যাকে ঈশ্বর ইচ্ছা করলে আহার করতে পারতেন? তোমরাতো স্পষ্ট বিভ্রান্তির মধ্যে রয়েছ।

(৪৮) তারা আরো বলেঃ তোমরা যদি সত্যবাদী হও তাহলে সেই প্রতিশ্রুতি কবে পূর্ণ হবে? (৪৯) তারা কেবল এক আওয়াজের অপেক্ষায় আছে যা তাদেরকে পাকড়াও করবে ঝগড়ায় লিপ্ত থাকা অবস্থায়। (৫০) তখন তারা না পারবে কোন অসিয়ত করতে আর না পারবে তাদের পরিবার-পরিজনদের কাছে ফিরে যেতে। (৫১) আর শিঙ্গায় (মহাশঙ্খ) ফুৎকার দেওয়া হবে; অমনি তারা কবর থেকে তাদের প্রতিপালকের দিকে চলতে থাকবে। (৫২) তারা বলবেঃ হায়! আমাদের দুর্ভাগ্য, আমাদের কবর থেকে কে আমাদের উঠালো? করুণাময় তো এরই প্রতিশ্রুতি দিয়েছিলেন এবং পয়গম্বরগণও সত্য কথাই বলেছিলেন। (৫৩) কেবলমাত্র একটি আওয়াজ হবে, অমনি সবাইকে একত্রিত

করে আমার সামনে উপস্থিত করে দেওয়া হবে।

(৫৪) অতএব আজকের দিনে কারো প্রতি কোন অত্যাচার হবে না এবং তোমরা যা করতে কেবল তারই প্রতিফল তোমরা পাবে। (৫৫) নিঃসন্দেহে স্বর্গবাসীরা এদিন আনন্দে মগ্ন থাকবে। (৫৬) তারা ও তাদের স্ত্রীরা, সুশীতল ছায়ায় আরামদায়ক আসনে বালিশে হেলান দিয়ে বসে থাকবে। (৫৭) সেখানে তাদের জন্য সুস্বাদু ফল থাকবে এবং তারা যা চাইবে তাই পাবে। (৫৮) পরম করুণাময় প্রভুর পক্ষ থেকে তাদেরকে শাস্তি বলা হবে।

(৫৯) আর হে অপরাধীরা! আজ তোমরা পৃথক হয়ে যাও। (৬০) হে আদম (অ্যাডাম) সন্তানেরা! আমি কি তোমাদেরকে সতর্ক করে দিইনি যে, তোমরা শয়তানের দাসত্ব করবে না। নিঃসন্দেহে সে তোমাদের প্রকাশ্য শত্রু। (৬১) আর তোমরা আমারই দাসত্ব করবে, এটাই সোজা পথ। (৬২) আর সে তোমাদের বহুসংখ্যক লোককে বিপথগামী করে দিয়েছে। তোমরা কি বুঝতে না? (৬৩) এই সেই নরক, যার কথা তোমাদের বলা হত। (৬৪) এখন তোমাদের অস্বীকারের কারণে এতে প্রবেশ কর। (৬৫) আজ আমি ওদের মুখে মোহর লাগিয়ে দেব এবং এদের হাত কথা বলবে আর এদের পা সাক্ষ্য দেবে এরা যা করত।

(৬৬) যদি আমি চাইতাম এদের চোখগুলো বিলীন করে দিতে পারতাম। তখন পথ চলতে চাইলে তারা দেখত কি ভাবে? (৬৭) আর আমি যদি চাইতাম তাদের জায়গাতেই এমন বিকলাঙ্গ করে দিতাম যে তারা সামনের দিকে যেতে পারত না বা পিছিয়ে আসতে পারত না। (৬৮) আমি যাকে দীর্ঘজীবী করি, তাকে তার পূর্বের আকৃতিতে ফিরিয়ে দিই। তবুও কি তারা বোঝে না?

(৬৯) আমি তাকে কবিতা শিখাইনি, আর সে এর যোগ্যও নয়। এতো কেবল এক স্মারকপত্র আর স্পষ্ট কুরআন। (৭০) যাতে সে ঐ ব্যক্তিকে সতর্ক

করতে পারে যে জীবিত এবং অস্বীকারকারীদের বিরুদ্ধে সেই কথা (ঈশ্বরের নির্ণয়) সত্য বলে প্রমাণিত হয়।

(৭১) তারা কি দেখেনা যে, আমি নিজের হাতে তৈরী বস্তুর মধ্যে তাদের জন্য গৃহপালিত পশু সৃষ্টি করেছি এবং তারাই এগুলোর অধিকারী। (৭২) আর আমি ওদেরকে তাদের অধীন করে দিয়েছি। ফলে এদের মধ্যে কতকগুলো ওদের বাহন আর কতকগুলো তারা খায়। (৭৩) তারা এথেকে উপকার পায় এবং পানীয় পেয়ে থাকে। তবুও কি তারা কৃতজ্ঞতা প্রকাশ করে না? (৭৪) আর তারা ঈশ্বর ছাড়া অন্য উপাস্য গ্রহণ করে, এই আশায় যে, তারা সাহায্যপ্রাপ্ত হবে। (৭৫) তারা তাদের সাহায্য করতে পারবে না এবং এগুলো তাদের বাহিনীরূপে ধৃত হয়ে আসবে। (৭৬) অতএব তাদের কথায় তুমি দুঃখ পেয়ে না। আমি জানি তারা যা গোপন করে আর যা প্রকাশ করে।

(৭৭) মানুষ কি দেখে না যে, আমি তাকে সৃষ্টি করেছি শুক্রেবিন্দু থেকে? আর সে কি না পরে প্রকাশ্য বিতর্ককারী হয়ে গেল। (৭৮) আর সে আমার জন্য উদাহরণ পেশ করে এবং নিজের সৃষ্টির কথা ভুলে যায়। সে বলেঃ হাড়গুলো কে জীবিত করবে যখন তা পচে গলে যাবে? (৭৯) বলঃ যিনি প্রথমবার সেগুলোকে সৃষ্টি করেছেন, তিনিই জীবিত করবেন। তিনি সর্বপ্রকার সৃষ্টি সম্পর্কে সম্যক অবগত। (৮০) তিনিই, যিনি তোমাদের জন্য সবুজ বৃক্ষ থেকে আগুন উৎপন্ন করেছেন, তা থেকে তোমরা আগুন জ্বালাও। (৮১) যিনি আকাশ ও পৃথিবী সৃষ্টি করেছেন, তিনি কি অনুরূপ সৃষ্টি করতে সক্ষম নন? হ্যাঁ, তিনি সক্ষম। আর তিনিই বাস্তবিক স্রষ্টা, সর্বজ্ঞ। (৮২) তিনি যখন কোন কিছু করতে ইচ্ছা করেন, তখন তিনি কেবল বলে দেন ‘হও’। তখন তা হয়ে যায়। (৮৩) অতএব পবিত্র সেই মহান সত্ত্বা, যাঁর হাতে রয়েছে সর্বময় কতৃত্ব আর তাঁর কাছেই তোমরা প্রত্যাবর্তিত হবে।

অধ্যায় ৩৭ : আস-সা-ফ্যাত (সারিবদ্ধ)

ঈশ্বরের নামে শুরু যিনি পরম করুণাময় ও অতি দয়ালু।

(১) শপথ সারিবদ্ধ দেবদূতদের। (২) এর যারা ভৎসনা করে (পাপিষ্ঠদের) বিতাড়িত করে। (৩) এবং যারা নিরন্তর কুরআন আবৃত্তি করে। (৪) নিশ্চয় তোমাদের উপাস্য একজনই। (৫) আকাশ ও পৃথিবীর প্রতিপালক, আর যা কিছু এর মধ্যে আছে আর সমস্ত পূর্ব দিগন্তের প্রতিপালক।

(৬) আমি আকাশকে তারকারাজি দিয়ে সুশোভিত করেছি। (৭) আর প্রত্যেক বিদ্রোহী শয়তান থেকে তাকে সুরক্ষিত করেছি। (৮) সে সর্বোচ্চ দরবারে আর কান পাততে পারে না, এবং তাদের প্রতি সবদিক থেকে (জলন্ত তারকা) নিক্ষিপ্ত হয় (৯) তাড়িয়ে দেওয়ার জন্য। আর তাদের জন্য রয়েছে অন্তহীন শাস্তি। (১০) কেউ যদি (ঐ জ্ঞানের) সামান্য আভাস পায়, এক জ্বলন্ত অঙ্গার তার পিছনে ধাওয়া করে।

(১১) অতএব এদেরকে জিজ্ঞেস কর যে এদের সৃষ্টি বেশী কঠিন না আমি যা সৃষ্টি করেছি তা বেশী কঠিন। আমি তাদেরকে আঠাল মাটি থেকে সৃষ্টি করেছি। (১২) তুমি বিস্ময় বোধ করছ, আর ওরা উপহাস করছে। (১৩) যখন ওদেরকে বোঝান হয় তারা বোঝে না। (১৪) আর যখন তারা কোন নিদর্শন দেখতে পায় তখন বিদ্রূপ করে। (১৫) আর বলেঃ এতো কেবল জাদু। (১৬) আমরা মরে গিয়ে মাটি ও অস্থিতে পরিণত হবো তার পরেও কি আমাদের আবার উঠানো হবে? (১৭) আর আমাদের পূর্ব-পুরুষদেরকেও? (১৮) বলঃ হ্যাঁ, আর তোমরা অপমানিতও হবে।

(১৯) তা হবে এক বিকট শব্দ। আর তখনই তারা দেখতে পাবে। (২০) আর তারা বলবেঃ হায় আমাদের দুর্ভাগ্য! এটাই তো প্রতিদানের দিন।

(২১) এটাই শেষ বিচারের দিন যাকে তোমরা মিথ্যা বলতে।
 (২২) একত্রিত করো ওদেরকে যারা অন্যায় করেছে এবং ওদের সাথীদেরকে
 আর ওদের উপাস্যদেরকে, (২৩) যাদেরকে তারা ঈশ্বরের পরিবর্তে উপাসনা
 করত, তারপর তাদেরকে নরকের পথ দেখাও। (২৪) আর ওদেরকে দাঁড়
 করাও, ওদেরকে কিছু জিজ্ঞাসা করার আছে। (২৫) তোমাদের কি হল যে
 তোমরা একে অপরকে সাহায্য করছো না? (২৬) বরং আজ তো তারা
 আত্মসমর্পণকারী।

(২৭) আর তারা একে অপরকে সম্বোধন করে জিজ্ঞাসাবাদ করবে।
 (২৮) বলবেঃ তোমরা তো আমাদের কাছে ডান দিক দিয়ে আসতে।
 (২৯) তারা উত্তরে বলবেঃ কিন্তু তোমরা আস্থাবান ছিলে না। (৩০)
 তোমাদের উপর আমাদের কোন কর্তৃত্ব ছিল না; বরং তোমরা বিদ্রোহী ছিলে।
 (৩১) আমাদের সম্বন্ধে আমাদের প্রভুর কথাই সঠিক হয়েছে। আমাদেরকে
 এর স্বাদ গ্রহণ করতেই হবে। (৩২) আমরাই তোমাদেরকে বিপথগামী
 করেছিলাম আর আমরা নিজেরাও বিপথগামী ছিলাম। (৩৩) অতএব তারা
 সকলেই সেদিন শাস্তির অংশীদার হবে। (৩৪) আমি অপরাধীদের সাথে
 এরূপ আচরণই করি। (৩৫) এরাই সেই লোক যখন তাদেরকে বলা হত
 যে, ঈশ্বর ছাড়া কোন উপাস্য নেই তখন তারা অহংকার করত। (৩৬) আর
 তারা বলতঃ আমরা কি এক উন্মাদ কবির কথায় আমাদের উপাস্যদের
 ত্যাগ করবো? (৩৭) বরং সে তো সত্য নিয়ে এসেছে এবং পয়গম্বরদের
 ভবিষ্যৎদ্বানী সার্থক করেছে। (৩৮) নিঃসন্দেহে তোমাদের কঠিন শাস্তি
 আত্মদান করতে হবে। (৩৯) আর তোমাদেরকে তারই প্রতিফল দেওয়া
 হচ্ছে তোমরা যা করতে।

(৪০) কিন্তু যারা ঈশ্বরের মনোনীত বান্দা। (৪১) তাদের জন্য নির্দিষ্ট

জীবিকা রয়েছে, (৪২) ফলমূল এবং তারা হবে সম্মানিত। (৪৩) সুখময় উদ্যানে। (৪৪) পালঙ্কে মুখো-মুখি হয়ে বসবে। (৪৫) তাদেরকে বিশুদ্ধ শরাবের পিয়াল পরিবেশন করা হবে। (৪৬) যা হবে স্বচ্ছ এবং পানকারীদের জন্য সুস্বাদু। (৪৭) তাতে কোন ক্ষতি হবে না আর বুদ্ধিভ্রম ও হবে না। (৪৮) তাদের পাশে থাকবে অবগত দৃষ্টির ডাগর চক্ষু বিশিষ্ট রমণীরা। (৪৯) সময়ে সুরক্ষিত মুক্তোর মতো।

(৫০) তারা একে অপরের মুখোমুখি হয়ে বাক্যালাপ করবে। (৫১) তাদের একজন বলবে যে, আমার একজন পরিচিত ছিল। (৫২) সে বলত, তুমিও কি বিশ্বাস কর? (৫৩) আমরা যখন মরে যাব এবং মাটি ও অস্থিতে পরিণত হয়ে যাব তখনও কি আমাদের প্রতিফল দেওয়া হবে? (৫৪) সে বলবেঃ আমরা কি তার খোঁজ করবো? (৫৫) যখন সে খোঁজ করবে, সে তাকে নরকের মধ্যে দেখতে পাবে। (৫৬) বলবেঃ ঈশ্বরের শপথ। আমাকে তো তুমি প্রায় ধ্বংস করে দিয়েছিলে। (৫৭) যদি আমার প্রভুর কৃপা না হত তাহলে আমিও ওদের মধ্যে থাকতাম যাদেরকে ধরে আনা হয়েছে। (৫৮) এখন তো আর আমাদের মৃত্যু হবে না। (৫৯) প্রথমবারের মৃত্যু ছাড়া, আর আমাদের শাস্তিও হবে না। (৬০) নিঃসন্দেহে এটাই বড় সফলতা। (৬১) এমনটি পাওয়ার জন্য সবাইকে কর্ম করা উচিত।

(৬২) এই আতিথ্য সুন্দর, না কি যাক্কুম বৃক্ষ? (৬৩) আমি ওটাকে অপরাধীদের পরীক্ষার জন্য তৈরী করেছি। (৬৪) এ এক বৃক্ষ যা নরকের তলদেশ থেকে উৎপন্ন হয়েছে। (৬৫) এর ফল শয়তানের মাথার মতো। (৬৬) তারা তা থেকে খাবে। আর তা থেকেই উদরপূর্ণ করবে। (৬৭) তারপর ওদেরকে ফুটন্ত জল দেওয়া হবে। (৬৮) তারপর তাদের প্রত্যাবর্তন

নরকের দিকেই ঘটবে। (৬৯) তারা তাদের পূর্বপুরুষদের বিপথগামী অবস্থায় পেয়েছিল। (৭০) আর তারাও তাদের পদাঙ্ক অনুসরণ করেছিল। (৭১) আসলে তাদের আগে পূর্ববতীদের অধিকাংশ বিপথগামী হয়েছিল। (৭২) আমি ওদের কাছেও সতর্ককারী পাঠিয়েছিলাম। (৭৩) তাহলে দেখ, তাদের অন্তিম পরিণতি কি হয়েছিল, যাদেরকে সতর্ক করা হয়েছিল। (৭৪) ঈশ্বরের মনোনিত বান্দারা ব্যতীত।

(৭৫) আর নূহ (নোয়াহ) আমাকে ডেকেছিল। আমি কত উত্তম ডাক শ্রবণকারী। (৭৬) আর আমি তাকে ও তার লোকদেরকে মহাবিপদ থেকে রক্ষা করেছিলাম। (৭৭) আর আমি তার বংশকে অবশিষ্ট রেখেছি। (৭৮) তার কথা পরবতীদের স্মরণে রেখে দিয়েছি। (৭৯) বিশ্বজগতে নোয়াহ এর প্রতি শান্তি বর্ষিত হোক! (৮০) এভাবেই আমি সৎকর্মশীলদের প্রতিদান দিই। (৮১) নিঃসন্দেহে সে আমার আস্থাবান বান্দাদের অন্তর্ভুক্ত ছিল। (৮২) তারপর আমি অন্যদেরকে ডুবিয়ে দিয়েছি।

(৮৩) আর তাঁর অনুসারীদেরই একজন ছিল ইবরাহীম (আব্রাহাম)। (৮৪) যখন সে বিশুদ্ধ চিন্তে তার প্রভুর কাছে এসেছিল। (৮৫) যখন সে তার পিতা ও তার সম্প্রদায়কে বলেছিলঃ তোমরা কিসের উপাসনা করছো? (৮৬) তোমরা কি ঈশ্বরের পরিবর্তে মনগড়া উপাস্যদের চাও? (৮৭) তাহলে বিশ্বজগতের প্রভু সম্পর্কে তোমাদের ধারণা কি?

(৮৮) অতঃপর ইবরাহীম (আব্রাহাম) তারকারাজীর দিকে একবার তাকাল। (৮৯) এবং বলল যে, আমি অসুস্থ। (৯০) তারপর তারা তাকে রেখে চলে গেল। (৯১) তখন সে তাদের মূর্তিগুলোর মাঝে প্রবেশ করল এবং বললঃ তোমরা কেন আহার করছ না? (৯২) তোমাদের কি হল যে তোমরা কিছু বলছ না? (৯৩) অতঃপর সর্বশক্তি দিয়ে ওদের

প্রহার করল। (৯৪) লোকেরা তার কাছে দৌড়ে এল। (৯৫) ইবরাহীম (আব্রাহাম) বললঃ তোমরা কি ওদেরই পূজা কর যে ভাস্কর্য তোমরাই তৈরী করেছ? (৯৬) আর ঈশ্বরই সৃষ্টি করেছেন তোমাদেরকে এবং তোমরা যা কিছু তৈরী কর তাদেরকেও। (৯৭) তারা বললঃ এর জন্য একটি ঘর (অগ্নিকুণ্ড) তৈরী কর এবং তাকে জ্বলন্ত আগুনে নিক্ষেপ কর। (৯৮) অতএব তারা তার বিরুদ্ধে একটি চক্রান্ত করতে চেয়েছিল কিন্তু আমি ওদেরকেই হেয় করলাম। (৯৯) আর সে বললঃ আমি আমার প্রভুর কাছে যাচ্ছি, তিনিই আমাকে পথ দেখাবেন। (১০০) হে আমার প্রভু! আমাকে সৎ সন্তান দান করুন। (১০১) তখন আমি তাকে এক ধৈর্যশীল সন্তানের সুসংবাদ দিই।

(১০২) অতঃপর যখন সে তার সাথে কাজ করার বয়সে উপনীত হল, সে বললঃ বৎস! আমি স্বপ্নে দেখি যে, তোমাকে উৎসর্গ করছি। অতএব ভেবে বল তোমার মত কি! সে বললঃ পিতা! তোমাকে যা আদেশ দেওয়া হয়েছে তাই কর। ঈশ্বর যদি চান তাহলে আমাকে ধৈর্যশীল দেখতে পাবে। (১০৩) অতঃপর যখন তারা দুজনেই আব্রাহামের সমর্পণ করল তখন ইবরাহীম (আব্রাহাম) তার পুত্রকে উপুড় করে শুইয়ে দিল। (১০৪) আর আমি তাকে ডাকলাম, হে ইবরাহীম (আব্রাহাম)! (১০৫) তুমি স্বপ্ন সত্য প্রতিপন্ন করে দেখিয়েছ। আমি এভাবেই সৎকর্মশীলদের প্রতিদান দিয়ে থাকি। (১০৬) নিশ্চয়ই এটা ছিল এক স্পষ্ট পরীক্ষা। (১০৭) আমি তাকে মুক্ত করলাম এক মহান উৎসর্গের বিনিময়ে। (১০৮) আর আমি তাকে পরবর্তীদের মাঝে স্মরণীয় করে রাখলাম। (১০৯) ইবরাহীমের (আব্রাহামের) উপর শান্তি বর্ষিত হোক! (১১০) আমি সৎকর্মশীলদের এভাবেই প্রতিদান দিয়ে থাকি। (১১১) নিঃসন্দেহে সে আমার আস্থাবান বান্দাদের অন্তর্ভুক্ত ছিল।

(১১২) আর আমি ওকে ইসহাকের (আইজ্যাক) সুসংবাদ দিই। সৎকর্মশীলদের মধ্যে একজন পয়গম্বর। (১১৩) তাকে এবং আইজ্যাককে কল্যাণ দান করি। আর ওদের দুজনের বংশে সৎকর্মশীল মানুষেরাও আছে আর এমনও আছে যারা নিজেরাই নিজেদের উপরে অত্যাচার করে।

(১১৪) আর আমি মূসা (মোজেস) ও হারুনের (অ্যরনের) প্রতি অনুগ্রহ করেছি। (১১৫) তাদেরকে আর তাদের সম্প্রদায়কে এক বড় সংকট থেকে মুক্তি দিয়েছি। (১১৬) আর আমি ওদের সাহায্য করেছিলাম তাই তারা বিজয়ী হতে পেরেছিল। (১১৭) আর আমি ওদের দুজনকে স্পষ্ট গ্রন্থ দিয়েছিলাম। (১১৮) এবং তাদেরকে সরল পথে পরিচালিত করেছিলাম। (১১৯) আমি তাদের উভয়কে পরবর্তীদের মাঝে স্মরণীয় করে রেখেছি। (১২০) মূসা (মোজেস) ও হারুনের (অ্যরনের) প্রতি শান্তি বর্ষিত হোক! (১২১) নিঃসন্দেহে তারা দুজনেই আমার আস্থাবান বান্দাদের অন্তর্ভুক্ত ছিল।

(১২৩) আর ইলিয়াস (এলিজা) ও ছিল পয়গম্বরদের মধ্যে একজন। (১২৪) যখন সে তার সম্প্রদায়কে বললঃ (১২৫) তোমরা কি ‘বাবাল’ দেবতার উপাসনা করবে এবং পরিত্যাগ করবে সর্বোত্তম স্রষ্টা - (১২৬) ঈশ্বরকে, যিনি তোমাদের প্রভু এবং তোমাদের পিতৃ-পুরুষদেরও প্রভু। (১২৭) তখন তারা তাকে অস্বীকার করল। তাই অবশ্যই তাদেরকে তলব করা হবে। (১২৮) কিন্তু যারা ঈশ্বরের বিশেষ বান্দা ছিল। (১২৯) আমি এটা পরবর্তীদের মাঝে স্মরণীয় করে রেখেছি। (১৩০) ইলিয়াসের (এলিজার) উপর শান্তি বর্ষিত হোক! (১৩১) সৎকর্মশীলদের আমি এভাবেই প্রতিদান দিয়ে থাকি। (১৩২) নিঃসন্দেহে সে আমার আস্থাবান বান্দাদের অন্তর্ভুক্ত ছিল।

(১৩৩) আর নিঃসন্দেহে লূতও একজন পয়গম্বর ছিল। (১৩৪) যখন আমি তাকে আর তার লোকদের রক্ষা করি। (১৩৫) এক বৃদ্ধা ছাড়া যে পশ্চাতে অবস্থানকারী লোকদের মধ্যে ছিল। (১৩৬) অতঃপর আমি অন্যদেরকে ধ্বংস করে দিই। (১৩৭) তোমরা তাদের জনপদের উপর দিয়ে যাতায়াত কর সকালে (১৩৮) এবং রাতে, তবুও কি তোমরা বোঝ না?

(১৩৯) আর নিঃসন্দেহে ইউনুস (জোনাহ) ও পয়গম্বরদের মধ্যে একজন ছিল। (১৪০) যখন সে পালিয়ে বোঝাই নৌকায় পৌঁছাল। (১৪১) অতঃপর সে ভাগ্য পরীক্ষায় যোগদান করল এবং পরাভূত হলো। (১৪২) পরে এক বৃহদাকার মাছ তাকে গিলে ফেলল। তখন সে নিজেকেই ভর্ৎসনা করতে থাকল। (১৪৩) যদি সে স্তুতিকারীর মধ্যে না হত। (১৪৪) তাহলে পুনরুত্থান দিবস পর্যন্ত সে মাছের পেটেই অবস্থান করত। (১৪৫) অতঃপর তাকে আমি রুগ্ন অবস্থায় এক প্রান্তরে নিক্ষেপ করলাম। (১৪৬) আর আমি তার উপরে একটি লতা বৃক্ষ উৎপন্ন করে দিই। (১৪৭) আর আমি তাকে এক লক্ষ বা তার বেশী লোকের কাছে পাঠিয়ে দিই। (১৪৮) অতঃপর তারা বিশ্বাস স্থাপন করলে, তাদেরকে কিছুকালের জন্য ভোগের সুযোগ দিই।

(১৪৯) এখন তাদের কাছে জানতে চাও, তোমার প্রভুর জন্য কন্যা আর তাদের জন্য পুত্র? (১৫০) না কি তারা দেখেছিল যে, আমি দেবদূতদেরকে নারীরূপে সৃষ্টি করেছি? (১৫১) শুনে রাখ, ওরা মনগড়া কথা বলে (১৫২) যে, ঈশ্বর সন্তান জন্ম দিয়েছেন। তারা অবশ্যই মিথ্যাবাদী। (১৫৩) তিনি কি পুত্র সন্তানের স্থলে কন্যা সন্তান পছন্দ করেছেন? (১৫৪) তোমাদের কী হয়েছে? তোমাদের এ কেমন বিচার?

(১৫৫) তবে কি তোমরা অনুধাবন করো না? (১৫৬) তোমাদের কাছে কি কোন স্পষ্ট প্রমাণ আছে? (১৫৭) তাহলে তোমাদের গ্রন্থ নিয়ে এস যদি তোমরা সত্যবাদী হও।

(১৫৮) আর তারা ঈশ্বর ও জ্বিনদের মধ্যেও আত্মীয়তার সম্পর্ক স্থির করে রেখেছে। অথচ জ্বিনেরা জানে যে, অবশ্যই তাদেরকে হাজির হতে হবে। (১৫৯) তারা যেসব কথা বলে ঈশ্বর তা হতে পবিত্র। (১৬০) ঈশ্বরের একনিষ্ঠ বান্দারা ব্যতীত। (১৬১) অতএব তোমরা এবং তোমরা যাকে উপাসনা কর - (১৬২) কাউকেই তোমরা ঈশ্বর সম্বন্ধে বিভ্রান্ত করতে পারবে না। (১৬৩) একমাত্র তারা ব্যতীত, যারা নরকে নিষ্কিপ্ত হবে। (১৬৪) আমাদের প্রত্যেকের জন্য একটি নির্দিষ্ট স্থান রয়েছে। (১৬৫) আর আমরা ঈশ্বরের সামনে কেবল সারিবদ্ধ হই। (১৬৬) আর আমরা তাঁরই স্তুতিকারী।

(১৬৭) আর এরা বলত - (১৬৮) যদি আমাদের কাছে পূর্বের লোকদের কোন শিক্ষা থাকত। (১৬৯) তাহলে আমরা ঈশ্বরের বিশিষ্ট বান্দা হতাম। (১৭০) অতঃপর তারা এটাকে অবিশ্বাস করল, অতএব তারা শীঘ্রই জানতে পারবে। (১৭১) আমার প্রেরিত বান্দাদের জন্য আমার নির্ণয় আগেই ঠিক হয়ে আছে (১৭২) তারাই নিঃসন্দেহে প্রভাবশীল হবে। (১৭৩) আর আমার সেনারাই বিজয়ী হবে। (১৭৪) অতএব কিছুকালের জন্য ওদের থেকে মুখ ফিরিয়ে নাও (১৭৫) এবং দেখতে থাকো, তারা শীঘ্রই দেখতে পাবে।

(১৭৬) ওরা কি আমার শাস্তি ত্বরান্বিত করতে চায়? (১৭৭) কিন্তু শাস্তি যখন তাদের আগ্নিনায় নেমে আসবে তখন যাদেরকে সতর্ক করা হয়েছিল তাদের সকালটা কত খারাপ হবে! (১৭৮) তাই কিছু সময়ের

জন্য এদের থেকে মুখ ফিরিয়ে নাও। (১৭৯) আর দেখতে থাকো, শীঘ্রই তারা নিজেরাই দেখতে পাবে। (১৮০) পবিত্র তোমার প্রভু! তারা যা কিছু বলে তার উর্দে তোমার মহাসম্মানিত প্রভু। (১৮১) পয়গম্বরদের প্রতি শান্তি বর্ষিত হোক! (১৮২) সকল প্রশংসা নিখিলজগতের প্রভু ঈশ্বরের।

অধ্যায় ৩৮ : সোয়া-দ (সোয়া-দ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) সোয়া-দ।

উপদেশপূর্ণ কুরআনের শপথ। (২) তবে যারা অস্বীকারকারী তারা অহংকার ও বিরোধীতায় লিপ্ত। (৩) এদের পূর্বে আমি কত জনগোষ্ঠীকে ধ্বংস করে দিয়েছি। তখন তারা চিৎকার করেছে; কিন্তু তখন পালাবার সময় ছিল না।

(৪) তারা এজন্য বিস্ময়বোধ করল যে, তাদের কাছে তাদের মধ্যে থেকেই একজন সতর্ককারী এসেছে। আর অবিশ্বাসীরা বলেঃ এতো এক জাদুকর, মিথ্যাবাদী। (৫) সে কি বহু উপাস্যকে এক উপাস্য করে দিয়েছে? এতো এক অদ্ভুত ব্যাপার। (৬) তাদের প্রধান এই বলে চলে গেলঃ চলো আর তোমাদের উপাস্যতে অটল থাকো, এটা একটা উদ্দেশ্যমূলক ব্যাপার। (৭) আমরা তো একথা পূর্বের ধর্মে শুনিনি! এটা একটা বানানো কথা। (৮) আমাদের মধ্যে থেকে এর উপরেই ঈশ্বরের বাণী অবতীর্ণ হল? আসলে তারা আমার অনুসরণ সম্পর্কে সন্দিহান। তারা এখনও আমার শাস্তির স্বাদ আস্বাদন করেনি।

(৯) ওদের কাছে কি তোমার প্রভুর অনুগ্রহের ভাণ্ডার আছে না কি? যিনি পরাক্রমশালী, দয়াবান। (১০) আকাশ ও পৃথিবী ও তার মধ্যে যা কিছু আছে তার মালিকানা কি ওদের অধিকারে আছে? তাহলে তারা সিঁড়ি বেয়ে আরোহন করুক। (১১) বহু দলের এই বাহিনীও সেক্ষেত্রে অবশ্যই পরাজিত হবে। (১২) এদের পূর্বে মিথ্যা আরোপ করেছিল নূহের (নোয়াহ) সম্প্রদায়, আদ জাতি এবং কিলক বিশিষ্ট ফ্যারাও। (১৩) আর সামূদ, লূতের সম্প্রদায় এবং আইকার অধিবাসীবৃন্দরাও অবিশ্বাস করেছিল। এরা ছিল এক একটি বিশাল বাহিনী। (১৪) তারা সবাই পয়গম্বরদের অস্বীকার করেছিল তাই আমার শাস্তি পৌঁছেই গিয়েছিল। (১৫) আর এরা কেবল মাত্র এক বিকট আওয়াজের অপেক্ষায় আছে, যাতে কোন বিরতি থাকবে না। (১৬) আর তারা বলে যেঃ হে আমাদের প্রভু! আমাদের প্রাপ্য বিচার দিবসের পূর্বেই আমাদের দিয়ে দাও।

(১৭) তারা যা বলে তাতে ধৈর্য ধারণ করো এবং আমার শক্তিশালী বান্দা দাউদকে (ডেভিড) স্মরণ করো, সে সর্বদা আমার অভিমুখী ছিল। (১৮) আমি পর্বতসমূহকে তার সাথে নিয়োজিত করে ছিলাম, সে সকাল সন্ধ্যায় ওদের সাথে স্তুতি করত। (১৯) আর পাখীদেরকেও, যারা একত্রিত হত। প্রত্যেকেই তার অভিমুখী। (২০) আর আমি তার রাজ্যকে সুদৃঢ় করেছিলাম, তাকে বিবেক প্রদান করেছিলাম এবং তাকে বিচারশক্তি দান করেছিলাম।

(২১) আর তোমার কাছে কি বিবাদকারী পক্ষের খবর পৌঁছেছে? যখন তারা প্রাচীর টপকে উপাসনালয়ে এসে পৌঁছাল। (২২) যখন তারা দাউদের (ডেভিড) কাছে পৌঁছাল তখন সে ঘাবড়ে গেল। তারা বললঃ আপনি ভয় পাবেন না। আমরা দুই বিবাদমান পক্ষ, একপক্ষ অন্যপক্ষের উপর অত্যাচার করেছে। আপনি আমাদের মধ্যে নায্য মীমাংসা করে দিন,

অবিচার করবেন না। আর আমাদেরকে সঠিক পথ বলে দিন।

(২৩) এই আমার ভাই, এর কাছে নিরানব্বুইটি দুশ্বা আছে, আর আমার কাছে একটি মাত্র দুশ্বা আছে। তারপরও সে বলছে - ওটি আমার জিন্মায় দিয়ে দাও। আর তর্ক-বিতর্কে সে আমাকে পরাস্ত করেছে। (২৪) দাউদ (ডেভিড) বললঃ এ তোমার দুশ্বাটি তার দুশ্বাগুলির যুক্ত করতে চেয়ে সত্যিই তোমার প্রতি অবিচার করেছে। অধিকাংশ অংশীদার একে অন্যের প্রতি অবিচার করে থাকে। অবশ্য সত্যে বিশ্বাস স্থাপনকারী ও সৎকর্মশীলরা এর ব্যতিক্রম, তবে তারা সংখ্যায় কম। আর দাউদের (ডেভিড) মনে ধারণা জন্মাল, আমি তার পরীক্ষা নিয়েছি তাই সে তার প্রভুর কাছে ক্ষমা চাইল এবং প্রণত হয়ে লুটিয়ে পড়ল এবং তাঁর অভিমুখী হল। (২৫) অতঃপর আমি তার সে অপরাধ ক্ষমা করলাম। আর নিঃসন্দেহে আমার কাছে তার জন্য নৈকট্য ও শুভ পরিণাম আছে।

(২৬) হে দাউদ (ডেভিড)! আমি তোমাকে পৃথিবীতে কতৃৎ দিয়েছি। অতএব মানুষের মধ্যে ন্যায় মীমাংসা করো, প্রবৃত্তির অনুসরণ করো না। তাহলে সে তোমাকে ঈশ্বরের পথ থেকে বিচ্যুত করে দেবে। আর যারা ঈশ্বরের পথ থেকে বিচ্যুত হয় তাদের জন্য রয়েছে কঠোর শাস্তি। এই কারণে যে তারা হিসাবের দিনকে ভুলে গেছে।

(২৭) আকাশ ও পৃথিবী এবং তার মধ্যে যা কিছু আছে তা আমি বিনা উদ্দেশ্যে সৃষ্টি করিনি। এটা তাদেরই ধারণা যারা অবিশ্বাস করেছে। অতএব অবিশ্বাসীদের জন্য আগুনের বিনাশ রয়েছে। (২৮) আমি কি সত্যে বিশ্বাস স্থাপনকারী এবং সৎকর্মশীলদেরকে ওদের সমান করে দেব যারা পৃথিবীতে উপদ্রব

সৃষ্টিকারী অথবা আমি কি সদাচারীদের দূরাচারীদের মত করে দেব? (২৯) এটা এক কল্যাণময় গ্রন্থ যা আমি তোমাদের প্রতি অবতীর্ণ করেছি, যাতে লোকেরা এর বাণী সমূহ গভীর ভাবে চিন্তা করে এবং বুদ্ধিমানেরা উপদেশ প্রাপ্ত হয়।

(৩০) আর আমি দাউদকে (ডেভিড) সোলাইমান (সলোমন) প্রদান করেছি। সে ছিল উত্তম বান্দা এবং অতিশয় ঈশ্বর অভিমুখী। (৩১) যখন সন্ধ্যার সময় তার সম্মুখে উন্নত মানের দ্রুতগামী অশ্বরাজিকে উপস্থিত করা হলো, (৩২) তখন সে বললঃ আমি তো আমার প্রভুকে ভুলে সম্পদের মোহে আকৃষ্ট হয়েছি, যার ফলে সূর্য পর্দার আড়ালে লুকিয়ে গেছে। (৩৩) ওইগুলোকে আমার কাছে ফিরিয়ে আনো। অতঃপর সে তাদের পা ও গলদেশ ছেদন করতে শুরু করল।

(৩৪) আর আমি সোলাইমানকে (সলোমন) পরীক্ষা করলাম এবং তার সিংহাসনের উপর একটি নিম্প্রান দেহ রেখে দিলাম; অতঃপর সে (আমার) অভিমুখী হল। (৩৫) সে বললঃ হে আমার প্রভু! আমাকে ক্ষমা করুন এবং আমাকে এমন রাজ্য দান করুন যা আমার পরে আর কারো না হয়। নিঃসন্দেহে আপনিই তো মহান দাতা। (৩৬) তখন আমি বাতাসকে তার অধীন করে দিলাম। তার আদেশে সে শান্তভাবে প্রবাহিত হত যদিকে সে চাইত। (৩৭) আর জ্বিনদেরকেও তার অধীন করে দিলাম যারা ছিল প্রাসাদ নির্মাণকারী ও ডুবুরী। (৩৮) এবং শিকলে বেঁধে রাখা আরো অনেককে। (৩৯) এসব আমার দান। এগুলো তুমি বিনা হিসাবে ব্যয় করতে অথবা রেখে দিতে পারো। (৪০) আর তার জন্য তো আমার কাছে নৈকট্য ও সর্বশ্রেষ্ঠ পরিণাম আছেই।

(৪১) আর আমার বান্দা আয়ুবকে (জব) স্মরণ করো। যখন সে তার প্রভুকে সন্মোদন করে বলেছিলঃ শয়তান আমাকে দুর্ভোগ আর কষ্টে ফেলে

দিয়েছে। (৪২) (আমি বললামঃ) তুমি তোমার পা দিয়ে আঘাত করো, এখানেই আছে স্নানের সুশীতল জল এবং পানীয়। (৪৩) আর আমি তাকে দিলাম তার পরিবারবর্গ এবং তাদের সাথে তাদের মত আরো অনেককে, নিজের পক্ষ হতে অনুগ্রহ স্বরূপ ও বুদ্ধিমানদের জন্য উপদেশ স্বরূপ। (৪৪) (আমি তাকে বললামঃ) তুমি তোমার হাতে এক গোছা তৃণশলা নাও এবং তা দিয়ে মারো আর শপথ ভঙ্গ করো না। নিঃসন্দেহে আমি তাকে ধৈর্যশীল হিসাবে পেলাম। সর্বশ্রেষ্ঠ বান্দা! আপন প্রভুর নিকটে আত্মসমর্পণকারী।^১ (৪৫) আর হে আমার বান্দাগণ! ইবরাহীম (আব্রাহাম), ইসহাক (আইজ্যক) এবং ইয়াকুবকে (জ্যাকব) স্মরণ করো। তাদের ও ক্ষমতা ও সূক্ষ্মদৃষ্টি ছিল। (৪৬) আমি ওদেরকে এক বিশেষ গুণ সম্পন্ন করেছিলাম তা হল পরলোকের স্মরণ। (৪৭) আর তারা আমার কাছে বাছাই করা সদাচারীদের অন্তর্ভুক্ত। (৪৮) ইসমাইল, আল-ইয়াসা‘আ (এলিশা) এবং যুলকিফলের কথাও স্মরণ কর, তারা প্রত্যেকেই উত্তম লোকদের অন্তর্ভুক্ত ছিল।

(৪৯) এ হল এক অভিজ্ঞান, আর ঈশ্বরভীরুদের জন্য রয়েছে উত্তম ঠিকানা। (৫০) চিরস্থায়ী উদ্যান যার প্রবেশ দ্বার তাদের জন্য উন্মুক্ত থাকবে। (৫১) সেখানে তারা বালিশে হেলান দিয়ে বসবে। আর অনেক ফলমূল ও পানীয় চাইবে।

^১ বিঃ দ্রঃ- (৩৮ : ৪৪) আনুমানিক খৃষ্টপূর্ব নবম শতকে, জব (আযুব) ছিল একজন ইজরাইলের পয়গম্বর। বাইবেলে (জব ১ : ২০-২২) কথিত আছে, সে খুব ধনী ব্যক্তি ছিল। শস্যক্ষেত্র, গবাদীপশু, বাড়িঘর, সন্তান সন্ততি ইত্যাদি নানা ধরনের আশীর্বাদ এত বেশি পরিমাণে প্রাপ্ত হল যে, প্রাচ্যদেশে তার সমতুল্য আর কেউ ছিল না। এতদসত্ত্বেও জব ছিল খুবই কৃতজ্ঞ এবং বিশ্বস্ত। একজন মানুষ এত সম্পদ ও সম্মান থাকা সত্ত্বেও কিভাবে বিনয়ী ও নম্র থাকতে পারে তার প্রকৃষ্ট দৃষ্টান্ত হলো তার সম্পূর্ণ জীবন।

(৫২) আর তাদের কাছে থাকবে লজ্জাশীলা সমবয়স্কা পত্নী। (৫৩) এটাই বিচার দিবসের জন্যে তোমাদেরকে দেওয়া প্রতিশ্রুতি। (৫৪) এটাই আমার দেওয়া রিযিক যা কখনও শেষ হবে না।

(৫৫) অতঃপর এটাই বিদ্রোহীদের জন্য নিকৃষ্ট ঠিকানা। (৫৬) নরক, সেখানে তারা প্রবেশ করবে। তা কতই না নিকৃষ্ট স্থান! (৫৭) এটা ফুটন্ত জল আর পুঁজ, এরা তা আস্বাদন করুক! (৫৮) আর এধরণের আরো অনেক শাস্তি থাকবে। (৫৯) (তারা একে ওপরকে বলবে - দেখেছ কি,) একদল জনতা তোমাদের সাথে যোগদান করার জন্য ছুটে আসছে। ওদের জন্য কোন অভ্যর্থনা নেই। তারা তো আগুনে জ্বলবে। (৬০) তারা বলবেঃ বরং তোমরাও; তোমাদের জন্যেও কোন অভ্যর্থনা নেই। তোমরাই আমাদের জন্য এই বিপদ নিয়ে এসেছো। কত খারাপ এই আবাসস্থল! (৬১) তারা বলবেঃ হে প্রভু! যে আমাদের জন্য বিপদ নিয়ে এসেছে তাকে তুমি নরকে দ্বিগুণ শাস্তি দাও। (৬২) তারা আরও বলবেঃ কি ব্যাপার? যাদের আমরা খারাপ মনে করতাম তাদের এখানে দেখছি না? (৬৩) তবে আমরা কি তাদের উপহাসের পাত্র বানিয়েছিলাম, না কি চোখ তাদেরকে দেখতে ভুল করছে? (৬৪) নিঃসন্দেহে নরকবাসীদের এই ঝগড়া অবশ্যই সত্য।

(৬৫) বলঃ আমি তো কেবল একজন সতর্ককারী। আর একক ও পরম প্রতাপশালী ঈশ্বর ছাড়া কোন উপাস্য নেই। (৬৬) তিনিই আকাশ ও পৃথিবী এবং এর মধ্যকার সব কিছুরই প্রতিপালক, মহা পরাক্রমশালী ও পরম ক্ষমশীল। (৬৭) বলঃ এটি একটি মহা সংবাদ। (৬৮) যা থেকে তোমরা অসাবধান হয়ে পড়ছো। (৬৯) পরলোক সম্পর্কে আমার কোন কিছুই জানা ছিল না, যখন তারা বাদানুবাদ করছিল। (৭০) আমার কাছে প্রত্যাদেশ এজন্যেই আসে যে, আমি কেবল একজন স্পষ্ট সতর্ককারী।

(৭১) যখন তোমার প্রভু দেবদূতগণকে বললেনঃ আমি মাটি থেকে

একজন মানুষ সৃষ্টি করবো। (৭২) সুতরাং যখন আমি তার আকৃতি ঠিক করে তাতে আমার আত্মা সঞ্চারিত করে দেব তখন তোমরা তার প্রতি সিজদাবনত (প্রণত) হয়ে। (৭৩) অতঃপর দেবদূতরা সবাই সিজদা (প্রণতি জ্ঞাপন) করল। (৭৪) কিন্তু ইবলিস করল না। সে নিজেকে বড় মনে করল এবং অবজ্ঞাকারীদের দলভুক্ত হয়ে গেল। (৭৫) বললেন : ইবলিস! কিসে তোমাকে বাধা দিল একে সিজদা (প্রণতি জ্ঞাপন) করতে যখন আমি একে আমার দুহাতে তৈরী করেছি? তুমি কি নিজেকে বড় মনে কর, না কি তুমি খুবই উচ্চ মর্যাদাসম্পন্ন? (৭৬) সে বললঃ আমি আদমের (অ্যাডাম) চেয়ে শ্রেষ্ঠ। তুমি আমাকে আগুন থেকে সৃষ্টি করেছ আর একে মাটি থেকে। (৭৭) বললেন : তুই এখান থেকে বের হয়ে যা, কারণ তুই বিতাড়িত হওয়ারই যোগ্য। (৭৮) আর তোর উপর আমার অভিশাপ থাকল বিচারের দিন পর্যন্ত।

(৭৯) ইবলিস বললঃ হে আমার প্রভু! তাহলে আমাকে সেদিন পর্যন্ত অবকাশ দিন যে দিন লোকদের পুনরুত্থিত করা হবে। (৮০) বললেন : তোকে অবকাশ দেওয়া হল। (৮১) নির্ধারিত সময় পর্যন্ত। (৮২) সে বললঃ আপনার সম্মানের শপথ, আমি তাদের সকলকে পথভ্রষ্ট করবো। (৮৩) কেবল তাদের মধ্য থেকে আপনার একনিষ্ঠ বান্দাদের ছাড়া। (৮৪) তিনি বললেনঃ তবে এটাই সত্য, আর আমি সত্যই বলি। (৮৫) আমি তোকে এবং যারা তোকে অনুসরণ করবে তাদের দ্বারা নরক পূর্ণ করবো।

(৮৬) বলঃ আমি এজন্য তোমাদের কাছে কোন প্রতিদান চাই না এবং আমি কোন মিথ্যা দাবীদারও নই। (৮৭) এতো কেবল এক উপদেশ জগৎবাসীর জন্য। (৮৮) আর তোমরা শীঘ্রই তাঁর দেওয়া সংবাদের সত্যতা জানতে পারবে।

অধ্যায় ৩৯ : আয-যুমার (সমাবেশ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) এই গ্রন্থ ঈশ্বরের পক্ষ হতে অবতীর্ণ হয়েছে যিনি পরাক্রমশীল ও প্রজ্ঞাবান। (২) নিঃসন্দেহে আমি এই গ্রন্থ তোমার কাছে সত্যসহ অবতীর্ণ করেছি। অতএব তুমি ঈশ্বরেরই উপাসনা করো, তাঁরই আনুগত্যে বিশুদ্ধ চিত্ত হয়ে। (৩) জেনে রেখো, অবিমিশ্র আনুগত্য ঈশ্বরেরই প্রাপ্য। যারা তাঁর পরিবর্তে অন্যদেরকে অভিভাবক বানিয়ে রেখেছে, তারা বলেঃ আমরা এদের উপাসনা এজন্যেই করি তারা যেন আমাদেরকে ঈশ্বরের নিকটবর্তী করে দেয়। নিঃসন্দেহে ঈশ্বর তাদের মতভেদের ব্যাপারে তাদের মধ্যে মীমাংসা করে দেবেন। এমন ব্যক্তিকে ঈশ্বর পথ প্রদান করেন না যে মিথ্যাবাদী, সত্য অস্বীকারকারী।

(৪) ঈশ্বর যদি চাইতেন যে, সন্তান গ্রহণ করবেন তাহলে তাঁর সৃষ্টির মধ্যে যাকে ইচ্ছা বেছে নিতেন। তিনি পবিত্র, তিনি একক পরম প্রতাপশালী ঈশ্বর। (৫) তিনি আকাশ ও পৃথিবী যথাযথভাবে সৃষ্টি করেছেন। তিনি রাতকে দিনের অনুবর্তী করেন এবং দিনকে রাতের অনুবর্তী করেন। আর তিনি সূর্য ও চন্দ্রকে নিয়মাধীন করে রেখেছেন। প্রত্যেকেই নির্ধারিত কাল অবধি চলে। জেনে রেখো, তিনিই মহা পরাক্রমশালী, পরম ক্ষমশীল।

(৬) ঈশ্বর তোমাদের একটি প্রাণ থেকে সৃষ্টি করেছেন। অতঃপর তিনি তা থেকে তার জোড়া তৈরী করেছেন। আর তিনিই তোমাদের জন্য স্ত্রী ও পুরুষ আট প্রকার গবাদীপশু অবতীর্ণ করেছেন। তিনি তোমাদেরকে তোমাদের মাতৃগর্ভে তৈরী করেন, এক স্তর থেকে অন্য স্তর, তিনটি অন্ধকার স্তরের মধ্যে। তিনিই ঈশ্বর, তোমাদের প্রভু, কর্তৃত্ব তাঁরই। তিনি ব্যতীত কোনই উপাস্য নেই; তাহলে কেমন করে তোমরা মুখ ফিরিয়ে নাও?

(৭) যদি তোমরা অস্বীকার করো তাহলে ঈশ্বর তোমাদের মুখাপেক্ষী

নন। তিনি তাঁর বান্দাদের অস্বীকার পছন্দ করেন না। আর যদি তোমরা কৃতজ্ঞ হও তাহলে তিনি তোমাদের এই কৃতজ্ঞতা পছন্দ করেন। একজন আরেকজনের বোঝা বহন করবে না; অতঃপর তোমাদের বলে দেবেন তোমরা যা করছিলে। নিঃসন্দেহে তিনি অন্তরের বিষয় সম্যক অবগত আছেন।

(৮) মানুষের যখন কষ্ট আসে তখন সে তার প্রভুকে ডাকে তাঁর প্রতি একনিষ্ঠ হয়ে। তারপর যখন তিনি তাকে কোন কল্যাণ দান করেন তখন সে ভুলে যায় যে, ইতিপূর্বে সে কিজন্য ডাকছিল। আর অন্যকে ঈশ্বরের সমকক্ষ দাঁড় করায় মানুষকে ঈশ্বরের পথ থেকে বিভ্রান্ত করার জন্য। বলঃ অবিশ্বাসী অবস্থায় তুমি কিছুকাল উপভোগ করে নাও। নিঃসন্দেহে তুমি তো নরকের বাসিন্দা হবে। (৯) যদি কোন ব্যক্তি রাতের বেলায় সিজদা (প্রণত হয়ে) ও দণ্ডায়মান অবস্থায় বিনয়াবনত হয় আর পরলোকের ভয় করে সেই ব্যক্তি প্রভুর অনুগ্রহের প্রত্যাশী হয়। বলঃ যারা জানে আর যারা জানে না তারা কি সমান হতে পারে? বুদ্ধিমানেরাই কেবল উপদেশ গ্রহণ করে থাকে।

(১০) বলঃ হে আমার বান্দারা যারা বিশ্বাস স্থাপন করেছো, আপন প্রভুকে ভয় করো। যারা এই পৃথিবীতে সংকাজ করবে তাদের জন্য উত্তম প্রতিদান আছে। আর ঈশ্বরের পৃথিবী প্রশস্ত। নিঃসন্দেহে ধৈর্যশীলদেরকে অগণিত প্রতিফল দেওয়া হবে।

(১১) বলঃ আমাকে আদেশ দেওয়া হয়েছে যে, যেন ঈশ্বরেরই উপাসনা করি তাঁরই আনুগত্যে একনিষ্ঠ হয়ে। (১২) আর আমাকে নির্দেশ দেওয়া হয়েছে যে, আমিই সর্বাত্মে নিজেই মুসলিম (আত্মসমর্পণকারী) হই। (১৩) বলঃ যদি আমি আমার প্রভুকে অস্বীকার করি তাহলে আমি এক ভয়ানক দিনের শাস্তির ভয় করি। (১৪) বলঃ আমি ঈশ্বরের উপাসনা করি, তাঁরই আনুগত্যে একনিষ্ঠ হয়ে। (১৫) অতএব তোমরা তাঁকে ছাড়া যাকে চাও

উপাসনা করো। বলঃ বাস্তবিক ক্ষতিগ্রস্ত তারাই যারা নিজেই নিজেকে এবং নিজের পরিবার-পরিজনদের শেষ বিচারের দিনে ক্ষতিগ্রস্ত করল। জেনে রেখো! এটাই প্রকৃত ক্ষতি। (১৬) ওদের জন্য ওদের উপর থেকেও আগুনের আচ্ছাদন হবে এবং নিচের থেকেও। এই বিষয় হতে ঈশ্বর তাঁর বান্দাদের সতর্ক করেন। হে আমার বান্দাগণ! আমাকে ভয় করো।

(১৭) আর যারা শয়তানের উপাসনা করা থেকে দূরে থাকে এবং ঈশ্বরের প্রতি একাগ্র হয়, তাদের জন্য সুসংবাদ। অতএব আমার বান্দাদের সুসংবাদ দাও। (১৮) যারা মন দিয়ে কথা শোনে, তারপর যা উত্তম তাই গ্রহণ করে, তারাই সেই ব্যক্তিবর্গ যাদেরকে ঈশ্বর পথ দেখিয়েছেন এবং এরাই বুদ্ধিমান।

(১৯) যার উপর শাস্তির বিধান অবধারিত হয়ে গেছে তুমি কি সেই নরকবাসীকে রক্ষা করতে পারবে? (২০) তবে যারা তাদের প্রভু কে ভয় করে তাদের জন্য নির্মিত আছে প্রাসাদের উপর প্রাসাদ, যার পাদদেশ দিয়ে নদী প্রবাহিত হয়। এটাই ঈশ্বরের প্রতিশ্রুতি। ঈশ্বর প্রতিশ্রুতি ভঙ্গ করেন না।

(২১) তুমি কি দেখনি যে, ঈশ্বর আকাশ থেকে বৃষ্টি বর্ষণ করেন, তারপর তা ধরণীতে ঝরণারূপে প্রবাহিত করেন। তারপর তা হতে বিভিন্ন প্রকার ফসল উৎপন্ন হয়, অতঃপর তা শুকিয়ে যায় এবং তুমি তাকে হলুদবর্ণের দেখ। তারপর তিনি তাকে খড়কুটোয় পরিণত করেন। এতে বুদ্ধিমানদের জন্য অবশ্যই শেখার আছে।^১

^১ বিঃ দ্রঃ-(৩৯ঃ ২১) বৃষ্টিপাতের চমৎকার প্রক্রিয়া ও তার ফলশ্রুতিতে নানাবিধ উদ্ভিদের উদগমন এবং ফসল উৎপাদন-এ সমস্ত ঘটনাবলীর মধ্যে অসংখ্য অর্থপূর্ণ শিক্ষা আছে। যারা এই বিষয়গুলি সম্বন্ধে গভীরভাবে অনুধাবন করে তারাই সেই শিক্ষা অর্জন করে। যারা তাদের স্বাভাবিক দক্ষতাগুলিকে সজীব রাখে এবং সেগুলি প্রয়োগ করে পার্থিব বিষয়গুলি নিয়ে গভীরভাবে চিন্তা করে, তাদের অন্তরসমূহ ঈশ্বর চেতনায় (মারিফাত) পরিপূর্ণ হয়ে যায়।

(২২) ঈশ্বর যার অন্তর ইসলামের জন্য উন্মুক্ত করে দিয়েছেন, সে তার প্রভুর এক আলোকোজ্জ্বল পথে রয়েছে। অতএব ঈশ্বরকে স্মরণ করার ব্যাপারে যারা কঠিন হৃদয়, তাদের জন্য দুর্ভোগ আছে। তারা পরিষ্কার বিভ্রান্তিতে রয়েছে।

(২৩) ঈশ্বর সর্বশ্রেষ্ঠ বাণী অবতীর্ণ করেছেন। এমন এক গ্রন্থ যার পরস্পর অংশ সমূহ সাদৃশ্যপূর্ণ যা বার বার বর্ণিত হয়েছে, এতে ঐ লোকদের গাত্র শিহরিত হয় যারা তাদের প্রভুকে ভয় করে। অতঃপর তাদের দেহ-মন প্রশান্ত হয়ে ঈশ্বরের স্মরণে বিনম্র হয়ে যায়। এটা ঈশ্বরের পথ নির্দেশ। এর দ্বারা তিনি যাকে ইচ্ছা পথ প্রদর্শন করেন। আর ঈশ্বর যাকে পথভ্রষ্ট করেন তার কোন পথ প্রদর্শক নেই।

(২৪) যে ব্যক্তি পুনরুত্থানের দিনে তার মুখমণ্ডল দিয়ে কঠিন শাস্তি ঠেকাতে চাইবে, তার কি হবে? অত্যাচারীদের বলা হবে, তোমরা যা করতে তার স্বাদ গ্রহণ করো। (২৫) তাদের পূর্ববতীরাও মিথ্যা মনে করেছিল। তাই তাদের উপর এমনভাবে শাস্তি এসেছিল যে, তারা কোন অনুমানও করতে পারেনি। (২৬) এভাবে ঈশ্বর তাদেরকে পার্থিব জীবনেই অপমান আশ্বাদন করালেন আর পরলোকের শাস্তিতে আরও বড়, যদি তারা জানত!

(২৭) আর আমি এই কুরআনে সব রকমের দৃষ্টান্ত বর্ণনা করেছি, যাতে তারা উপদেশ গ্রহণ করে। (২৮) এটা আরবী কুরআন, বক্তৃতামুক্ত, যাতে লোক ভয় করে। (২৯) ঈশ্বর একটি দৃষ্টান্ত বর্ণনা করেছেনঃ এক ব্যক্তির মালিক কয়েকজন ঝগড়াটে অংশীদার। আরেকজন লোক শুধু এক ব্যক্তির মালিকানাধীন এই দুজনের অবস্থা কি এক রকম? সমস্ত প্রশংসা ঈশ্বরের জন্য; কিন্তু তাদের অধিকাংশ এটা জানে না।

(৩০) নিঃসন্দেহে তোমারও মৃত্যু হবে এবং তাদেরও মৃত্যু হবে।

(৩১) পুনরুত্থানের দিনে নিশ্চয়ই তোমরা তোমাদের প্রভুর সামনে তোমাদের বিতর্ক প্রস্তুত করবে।

(৩২) ঐ ব্যক্তির চেয়ে বড় অত্যাচারী আর কে হবে যে ব্যক্তি ঈশ্বর সম্বন্ধে মিথ্যা বলে? এবং তার কাছে সত্য আসার পরে তাঁকে অবিশ্বাস করে। এমন অস্বীকারকারীদের ঠিকানা কি নরক নয়? (৩৩) আর যে ব্যক্তি সত্য নিয়ে এসেছে আর যারা তা বিশ্বাস করেছে, তারাই ঈশ্বরভীরু। (৩৪) ওদের জন্য ওদের প্রভুর কাছে ঐ সবই আছে যা তারা চাইবে। সেটাই সৎকর্মশীলদের পুরস্কার। (৩৫) যাতে ঈশ্বর তাদের মন্দকাজগুলো দূর করে ভাল কাজের পুণ্য দান করেন।

(৩৬) ঈশ্বর কি তাঁর বান্দাদের জন্য পর্যাপ্ত নন? অথচ তারা তোমাকে তিনি ব্যতীত অন্যদের ভয় দেখায়। আর ঈশ্বর যাকে বিপথগামী করেন তাকে কেউ পথ দেখাতে পারে না। (৩৭) আর ঈশ্বর যাকে পথ দেখান তাকে কেউ বিপথগামী করার নেই। ঈশ্বর কি পরাক্রমশালী শাস্তিপ্রদানকারী নন?

(৩৮) যদি তুমি এদেরকে জিজ্ঞাসা করো যে, আকাশ আর পৃথিবী কে সৃষ্টি করেছে? তাহলে তারা বলবে ঈশ্বর সৃষ্টি করেছেন। বলঃ তোমরা ঈশ্বরের পরিবর্তে যাদেরকে ডাক, তাদের সম্পর্কে তোমাদের ধারণা কি? ঈশ্বর যদি আমাকে কোন কষ্ট দিতে চান তাহলে তারা কি ঈশ্বরের দেওয়া কষ্ট দূর করতে পারে? অথবা ঈশ্বর আমাকে কোন কৃপা করতে চাইলে তারা কি তাঁর কৃপা রোধ করতে পারবে? ঈশ্বরই আমার জন্য যথেষ্ট। নির্ভরকারীরা তাঁর উপরেই নির্ভর করে। (৩৯) বলঃ হে আমার সম্প্রদায়! তোমরা তোমাদের অবস্থানে কর্ম কর, আমিও কর্ম করছি, তারপর তোমরা শীঘ্রই জানতে পারবে। (৪০) কার প্রতি আসবে অপমানকর শাস্তি এবং

কার উপর আপতিত হবে স্থায়ী শাস্তি। (৪১) আমি মানুষের দিক নির্দেশনার জন্য এই গ্রন্থ তোমার উপর সত্যসহ অবতীর্ণ করেছি। অতএব যে সুপথপ্রাপ্ত হবে সে নিজের জন্যই তা প্রাপ্ত হবে, আর যে বিপথগামী হবে তার বিপথে যাওয়ার দায় তারই। আর তুমি এদের অভিভাবক নও।

(৪২) ঈশ্বরই প্রান হরণ করেন তাদের মৃত্যুর সময়, আর যার মৃত্যু আসেনি তাকে নিদ্রার সময়। তারপর যেগুলোর মৃত্যুর সিদ্ধান্ত করেন সেগুলো রেখে দেন এবং অন্যগুলোকে এক নির্দিষ্ট মেয়াদ পর্যন্ত ফিরিয়ে দেন। নিঃসন্দেহে এতে নিদর্শন রয়েছে চিন্তাশীলদের জন্য।

(৪৩) এরা কি ঈশ্বরকে ছেড়ে অন্যদের সুপারিশকারী হিসাবে গ্রহণ করেছে? বলঃ যদিও তারা কোন ক্ষমতা রাখে না আর কিছু বোঝেও না। (৪৪) বলঃ সকল সুপারিশে কেবল ঈশ্বরেরই অধিকার, আকাশ ও পৃথিবীর রাজত্ব তাঁরই। অতঃপর তাঁর কাছেই তোমরা প্রত্যাবর্তিত হবে। (৪৫) আর যখন কেবলমাত্র এক ঈশ্বরের কথা আলোচিত হয় তখন ওদের অন্তর সংকুচিত হয়ে যায় যারা পরলোকে বিশ্বাস করে না। আর তিনি ছাড়া অন্যদের কথা আলোচিত হলেই তাঁরা খুশী হয়। (৪৬) বলঃ হে ঈশ্বর! আকাশ ও পৃথিবীর স্রষ্টা, প্রকাশ্য ও গোপন বিষয়সমূহ সম্বন্ধে জ্ঞাত, তুমিই তোমার বান্দাদের মধ্যে ঐ বিষয়ের মীমাংসা করবে যা নিয়ে তারা মতবিরোধ করছে। (৪৭) আর যদি অত্যাচারীদের কাছে ঐ সব থাকত যা পৃথিবীতে আছে আর তার সাথে আরো সমপরিমাণ যুক্ত হত, তাহলে পুনরুত্থানের দিন কঠিন শাস্তি থেকে বাঁচার জন্য তারা তা সব মুক্তিপণ হিসাবে দিয়ে দিত। আর তারা ঈশ্বরের পক্ষ থেকে এমন বিষয়ের সম্মুখীন হবে যা তাদের ধারণায়ও ছিল না। (৪৮) আর তাদের সামনে প্রকাশিত হবে তাদের অপকর্ম। আর তারা যা উপহাস করত তা তাদের ঘিরে ধরবে।

(৪৯) মানুষ কষ্টে পড়লে আমাকে ডাকে, অতঃপর যখন আমি আমার পক্ষ থেকে তাকে দয়া করি তখন সে বলে, আমাকে এটাতো আমার জ্ঞানের কারণে দেওয়া হয়েছে, বরং ওটা একটা পরীক্ষা; তবে ওদের মধ্যে অধিকাংশ লোকই জানে না। (৫০) ওদের পূর্ববতীরাও এরকম বলেছিল; তবে তাদের কৃতকর্ম তাদের কোন কাজে আসেনি। (৫১) তাদের অপকর্মসমূহ তাদেরকে আঘাত করেছিল। এদের মধ্যেও যারা অন্যায় করবে তাদের কৃতকর্মের পরিণামও শীঘ্রই তাদের কাছে আসবে। তারা পরিকল্পনা ব্যর্থ করতে পারবে না। (৫২) তারা কি জানে না যে, ঈশ্বর যাকে চান জীবিকা বৃদ্ধি করে দেন আর তিনিই সঙ্কুচিত করেন। নিঃসন্দেহে এর মধ্যে নিদর্শন রয়েছে ঐ লোকদের জন্য যারা বিশ্বাস স্থাপন করেছে।

(৫৩) বলে দাওঃ আমার বান্দারা যারা নিজেদের উপর অত্যাচার করেছে, তারা যেন ঈশ্বরের অনুগ্রহ থেকে নিরাশ না হয়; নিঃসন্দেহে ঈশ্বর সমস্ত পাপ ক্ষমা করে দেবেন। তিনি তো পরম ক্ষমাশীল ও অসীম দয়ালু। (৫৪) তোমাদের উপর শাস্তি আসার পূর্বে তোমরা তোমাদের প্রভুর অভিমুখী হও এবং তাঁর কাছে আত্মসমর্পণ কর, এর পরে তোমাদেরকে সাহায্য করা হবে না।

(৫৫) অতর্কিতে তোমাদের অজ্ঞতাসারে শাস্তি আসার আগে তোমাদের প্রভুর নিকট হতে তোমাদের উপর উত্তম যা কিছু অবতীর্ণ হয়েছে, তা অনুসরণ কর। (৫৬) যাতে কাউকে না বলতে হয়, হায় আফসোস! ঈশ্বরের প্রতি আমার কর্তব্যে আমি শৈথিল্য করেছি, আর আমি উপহাসকারীদের সাথে ছিলাম। (৫৭) অথবা কেউ না বলেঃ ঈশ্বর যদি আমাকে পথ দেখাতেন তাহলে আমি ঈশ্বরভীরুদের অন্তর্ভুক্ত হতাম। (৫৮) অথবা শাস্তি দেখে কেউ না বলেঃ হায়! আমি যদি আরেকবার পৃথিবীতে

সৎকর্মশীলদের অন্তর্ভুক্ত হতে পারতাম। (৫৯) হ্যাঁ, তোমার কাছে আমার নিদর্শন সমূহ এসেছিল; কিন্তু তুমি তাকে মিথ্যা আখ্যায়িত করেছিলে, তুমি অহংকার করেছিলে এবং অস্বীকারকারীদের অন্তর্ভুক্ত হয়েছিলে। (৬০) আর তুমি পুনরুত্থান দিবসে ঐ লোকদের মুখমণ্ডল কালো দেখবে যারা ঈশ্বরকে মিথ্যা বলেছিল। নরকে কি অহংকারীদের ঠাই হবে না? (৬১) আর যারা ভয় করত, ঈশ্বর তাদের সফল ভাবে রক্ষা করবেন, অমঙ্গল তাদেরকে স্পর্শ করবে না আর তারা দুঃখিত হবে না।

(৬২) ঈশ্বরই সবকিছুর স্রষ্টা আর সবকিছুর সংরক্ষক। (৬৩) আকাশ ও পৃথিবীর চাবি-কাঠি তাঁরই হাতে। আর যারাই ঈশ্বরের নিদর্শন সমূহ অবিশ্বাস করেছে তারাই ক্ষতিগ্রস্ত। (৬৪) বলঃ হে মুখের দল! তোমরা কি আমাকে ঈশ্বর ব্যতীত অন্যের উপাসনা করতে বলছো? (৬৫) তোমাদের প্রতি আর তোমাদের পূর্ববর্তীদের প্রতি অবশ্যই প্রত্যাদেশ পাঠানো হয়েছে যে, যদি তোমরা অংশীদার স্থাপন কর তাহলে তোমাদের কর্ম নষ্ট হয়ে যাবে। আর তোমরা ক্ষতিগ্রস্ত হবে। (৬৬) বরং কেবল ঈশ্বরের উপাসনা কর আর কৃতজ্ঞতা প্রকাশকারীদের অন্তর্ভুক্ত হও।

(৬৭) তারা ঈশ্বরের যথাযোগ্য মর্যাদা দেয় নি। পুনরুত্থানের দিবসে গোটা পৃথিবী তাঁর হাতের মুঠোয় থাকবে আর আকাশ সমূহ তার ডান হাতে ভাঁজ করা থাকবে। তিনি পবিত্র ও মহান। তারা যাদেরকে অংশীদার স্থাপন করে তাদের থেকে তিনি উদ্ধে। (৬৮) আর মহাশঙ্খে যখন ফুৎকার দেওয়া হবে তখন আকাশও পৃথিবীতে যা কিছু আছে সবই মুর্ছিত হয়ে পড়ে যাবে, কেবলমাত্র ঈশ্বর যাদেরকে ইচ্ছা করবেন তারা ব্যতীত। অতঃপর পুনর্বীর ওতে ফুৎকার দেওয়া হবে তখন হঠাৎই সবাই উঠে দাঁড়িয়ে তাকাতে থাকবে। (৬৯) আর পৃথিবী তার প্রভুর জ্যোতিতে উজ্জ্বল হয়ে উঠবে।

কর্মলিপি পেশ করা হবে, আর পয়গম্বর ও সান্নীদেব উপস্থিত করা হবে এবং সকলের মধ্যে ন্যায্যবিচার করা হবে। (৭০) আর প্রত্যেক ব্যক্তিকে তার কৃতকর্মের পূর্ণ প্রতিফল দেওয়া হবে। তারা যা কিছু করে তিনি তা ভালভাবেই জানেন।

(৭১) আর যারা অস্বীকার করেছে তাদেরকে দলে দলে নরকের দিকে তাড়িয়ে নিয়ে যাওয়া হবে। যখন তারা তার কাছে আসবে তখন নরকের দ্বার খুলে দেওয়া হবে এবং নরকের প্রহরী তাদেরকে বলবে: তোমাদের কাছে কি তোমাদের মধ্যে থেকে কোন পয়গম্বর আসেনি? যিনি তোমাদেরকে তোমাদের প্রভুর বাণী শোনাত আর এই দিনের সামনা সামনি হওয়া থেকে সতর্ক করত? তারা বলবে: হ্যাঁ; কিন্তু অস্বীকারকারীদের বিরুদ্ধে শাস্তির আদেশ বাস্তবায়িত হয়ে গেছে। (৭২) বলা হবে: নরকের দরজায় প্রবেশ কর, ওখানে চিরকাল থাকার জন্য। অতএব অহঙ্কারীদের জন্য কতই না নিকৃষ্টতম আবাসস্থল!

(৭৩) আর যারা তাদের প্রভুকে ভয় করত, তাদেরকে দলে দলে স্বর্গের দিকে নিয়ে যাওয়া হবে। এমন কি যখন তারা সেখানে পৌঁছাবে তার দ্বার খুলে দিয়ে প্রহরী তাদেরকে বলবে শান্তি তোমাদের উপর! তোমরা খুশী হও আর এখানে চিরকালের জন্য প্রবেশ কর। (৭৪) তারা বলবে: সকল কৃতজ্ঞতা সেই ঈশ্বরের জন্য যিনি আমাদের প্রতি তাঁর প্রতিশ্রুতি সত্য করে দেখিয়েছেন আর আমাদেরকে এই ধরণীর উত্তরাধিকারী করেছেন। আমরা এই স্বর্গের যেখানে খুশী নিবাস স্থাপন করতে পারি। অতএব, কত উত্তম প্রতিফল সৎকর্মশীলদের! (৭৫) তুমি দেবদূতদেরকে দেখবে সিংহাসনের চারপাশ ঘিরে আপন প্রভুর প্রশংসা ও স্তুতি করেছে। আর সবার মাঝে ন্যায্য বিচার করা হবে। আর বলা হবে: সকল প্রশংসা নিখিল জগতের প্রভু ঈশ্বরের।

অধ্যায় ৪০ : আল - গাফির (ক্ষমাশীল)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হা-মীম। (২) এই গ্রন্থ ঈশ্বরের পক্ষ থেকে অবতীর্ণ হয়েছে; যিনি পরাক্রমশালী, মহাজ্ঞানী। (৩) পাপ ক্ষমাকারী ও অনুশোচনা গ্রহণকারী, কঠোর শাস্তিদাতা ও ক্ষমতাবান, তিনি ছাড়া কোন উপাস্য নেই। তাঁর কাছেই প্রত্যাবর্তন।

(৪) ঈশ্বরের নিদর্শন সম্পর্কে শুধু অস্বীকারকারীরাই বিতর্ক করে। সুতরাং জনপদসমূহে তাদের অবাধ বিচরণ যেন তোমাকে বিশ্রান্ত না করে। (৫) এদের পূর্বে নূহের (নোয়াহ) সম্প্রদায় এবং তার পরে অন্যান্য সম্প্রদায়ও অস্বীকার করেছিল। প্রত্যেক সম্প্রদায় অভিসন্ধি করেছিল তাদের বার্তাবাহককে পাকড়াও করতে এবং তার সাথে অসার বিতর্ক করতে যাতে তারা সত্যকে পরাভূত করতে পারে, তখন আমি তাদেরকে পাকড়াও করলাম। অতএব কেমন ছিল আমার শাস্তি! (৬) আর এভাবেই তোমার প্রভুর বাণী ওদের ক্ষেত্রে সত্য হয়েছে। যারাই অস্বীকার করে তারাই নরকবাসী।

(৭) যারা সিংহাসন বহন করছে এবং যারা তার চারপাশে অবস্থান করছে তারা তাদের প্রভুর পবিত্রতা ও মহিমা ঘোষণা করে। তারা তাঁর প্রতি আস্থা রাখে। আর তারা বিশ্বাসীদের জন্য ক্ষমা প্রার্থনা করে। হে আমাদের প্রভু! তোমার অনুগ্রহ ও জ্ঞান দ্বারা সবকিছু বেঁটন করে আছো। অতএব তুমি ওদের ক্ষমা করো যারা অনুশোচনা করে আর তোমার পথ অনুসরণ করে। আর তুমিই ওদের নরকের শাস্তি হতে রক্ষা করো। (৮) হে আমাদের প্রভু! আর তুমি তাদেরকে চিরকাল বসবাসের স্বর্গে স্থান দাও, যার প্রতিশ্রুতি তুমি তাদেরকে দিয়েছ। আর তাদেরকেও যারা সদাচারী,

তাদের পিতামাতা, তাদের স্ত্রী ও সন্তানদের। নিঃসন্দেহে তুমি পরাক্রমশালী, অসীম প্রজ্ঞাবান। (৯) আর তাদের মন্দকর্ম থেকে রক্ষা করো। আর যাকে তুমি সেদিন অমঙ্গল থেকে রক্ষা করবে তাকে তো অবশ্যই দয়া করলে। আর এটাই বড় সফলতা।

(১০) যারা অস্বীকার করেছে তাদেরকে ডাক দিয়ে বলা হবে: তোমাদের নিজেদের প্রতি নিজেদের যতটা বিমুখতা, ঈশ্বরের প্রতি তোমাদের বিমুখতা তার চেয়ে অধিক ছিল। যখন তোমাদেরকে সত্যে বিশ্বাসের জন্য আহ্বান করা হতো তোমরা অস্বীকার করত। (১১) তারা বলবে: হে আমাদের প্রভু! তুমি আমাদের দু'বার মৃত্যু দিয়েছো এবং দু'বার জীবন দিয়েছো। এখন আমরা আমাদের অপরাধ স্বীকার করছি। অতএব বহির্গমনের কোন পথ আছে কি? (১২) তোমাদের এই শাস্তি তো এজন্য যে, যখন তোমাদের একমাত্র ঈশ্বরের দিকে ডাকা হত তখন তোমরা অস্বীকার করত। আর যদি তাঁর সাথে কোন অংশীদার স্থাপন করা হত তখন তোমরা মেনে নিতে। সুতরাং এখন সিদ্ধান্ত গ্রহণের অধিকার ঈশ্বরের, যিনি সর্বোচ্চ, মহামহিম।

(১৩) তিনিই তোমাদেরকে তাঁর নিদর্শন সমূহ দেখান এবং আকাশ থেকে তোমাদের জীবিকা পাঠান। উপদেশ কেবল সেই ব্যক্তিই গ্রহণ করে যে ঈশ্বরের অভিমুখী। (১৪) ঈশ্বরের আনুগত্যে একনিষ্ঠ হয়ে ডাক, যদি ও অস্বীকারকারীরা এটা অপছন্দ করে। (১৫) তিনি উচ্চ মর্যাদার অধিকারী ও সিংহাসনের মালিক। তিনি তাঁর বান্দাদের মধ্যে যার প্রতি ইচ্ছা করেন প্রত্যাদেশ পাঠান, যাতে সে সাক্ষাতের দিন সম্পর্কে সতর্ক করতে পারে। (১৬) যে দিন তারা সবাই (তাদের সমাধি থেকে) নিষ্কাশিত হবে, সেদিন ঈশ্বরের কাছে তাদের কিছুই গোপন থাকবে না। আজ রাজত্ব কার? প্রবল পরাক্রান্ত এক ঈশ্বরের। (১৭) আজ প্রত্যেককে তার কৃতকর্মের প্রতিফল

দেওয়া হবে। আজ কোন অবিচার হবে না। নিঃসন্দেহে ঈশ্বর দ্রুত হিসাব গ্রহণকারী।

(১৮) আর ওদেরকে আসন্ন বিপদের দিন সম্পর্কে সতর্ক কর, যখন প্রাণ কণ্ঠাগত হবে, এবং দম বন্ধ হয়ে আসবে। অত্যাচারীদের কোন বন্ধু বা সাহায্যকারী থাকবে না, যার কথা শোনা হবে। (১৯) চোখের গোপন চাহনি বা অন্তরের গোপন কথা সবই তিনি জানেন। (২০) আর ঈশ্বর সঠিক বিচার করবেন। আর ঈশ্বর ছাড়া যাদেরকে তারা ডাকত, তাদেরতো বিচার করার ক্ষমতা নেই। নিঃসন্দেহে ঈশ্বর সবকিছু শোনে, সব কিছু দেখেন।

(২১) এরা কি পৃথিবীতে পরিভ্রমণ করে না? তাহলে দেখত তাদের পূর্ববর্তীদের পরিণাম কি হয়েছিল। তাদের শক্তি ও কীর্তি এদের চেয়ে বেশী ছিল। তবুও ঈশ্বর তাদের পাকড়াও করেছিলেন তাদের পাপের কারণে। ঈশ্বরের শাস্তি থেকে তাদেরকে রক্ষা করার কেউ ছিল না। (২২) এটা এজন্য হয়েছিল যে, তাদের পয়গম্বরেরা তাদের কাছে স্পষ্ট নিদর্শন নিয়ে এসেছিল; কিন্তু তারা তা অবিশ্বাস করেছিল। ফলে ঈশ্বর তাদের পাকড়াও করেন। নিশ্চয়ই তিনি শক্তিশালী, কঠোর শাস্তিদাতা।

(২৩) আর আমি আমার নিদর্শন সমূহ ও স্পষ্ট প্রমাণসহ মূসাকে (মোজেসকে) প্রেরণ করেছিলাম। (২৪) ফারাওকে, হামান ও কারণের (কোরাহ) কাছে; কিন্তু তারা বলেছিল এ একজন মিথ্যাবাদী জাদুকর। (২৫) তারপর যখন সে আমার কাছ থেকে সত্য নিয়ে ওদের কাছে গেল, তারা বললঃ তার সাথে যারা বিশ্বাস স্থাপন করেছে, তাদের পুত্র সন্তানদের হত্যা কর আর তাদের মহিলাদের জীবিত রাখো; কিন্তু অস্বীকারকারীদের এই চক্রান্ত ব্যর্থই হয়েছিল।

(২৬) আর ফ্যারাও বললঃ আমাকে ছেড়ে দাও আমি মূসাকে (মোজেসকে) হত্যা করে ফেলি আর সে তার প্রভু কে ডাকুক। আমার ভয় হয়, সে তোমাদের ধর্ম পরিবর্তন করে দেবে অথবা দেশে অরাজকতা ছড়াবে। (২৭) আর মূসা (মোজেস) বললঃ যারা বিচার দিনে বিশ্বাস করে না, সেই সব উদ্ধত ব্যক্তি হতে আমি আমার প্রভু ও তোমাদেরও প্রভু ঈশ্বরের আশ্রয় নিয়েছি।

(২৮) আর ফ্যারাও এর দলের একজন আস্থাভাজন ব্যক্তি যে নিজের বিশ্বাস স্থাপন গোপন রেখেছিল সে বললঃ তোমরা কি একজন লোককে শুধু আমার প্রভু ঈশ্বর বলার কারণে হত্যা করবে? অথচ সে তোমাদের কাছে তোমাদের প্রভুর পক্ষ থেকে স্পষ্ট নিদর্শন নিয়ে এসেছে। সে যদি মিথ্যাবাদী হয় তাহলে তার মিথ্যার দায় তার উপর বর্তাবে। আর যদি সে সত্যবাদী হয় তাহলে ও যে কথা তোমাদের বলছে তার কিছু অংশ তোমাদের উপর বর্তাবে। নিঃসন্দেহে ঈশ্বর এমন ব্যক্তিকে পথ দেখান না যে সীমালঙ্ঘনকারী, মিথ্যাবাদী। (২৯) হে আমার সম্প্রদায়। দেশে আজ তোমাদের রাজত্ব, তোমরাই ক্ষমতাশীল; কিন্তু আমাদের উপর ঈশ্বরের শাস্তি আসলে কে আমাদেরকে সাহায্য করবে? ফ্যারাও বললঃ আমি তোমাদের সেই পরামর্শ দিচ্ছি যা আমি বুঝতে পারছি, আর আমি তোমাদের সঠিক পথই নির্দেশ করছি।

(৩০) যে ব্যক্তিটি বিশ্বাস স্থাপন করেছিল সে বললঃ হে আমার সম্প্রদায়, আমি আশঙ্কা করছি তোমাদের উপর পূর্বের দলগুলির মত দুর্দিন আসতে পারে। (৩১) যেমন দিন নূহ (নোয়াহ), আদ এবং সামুদ জাতির উপর এবং পরবর্তী জাতির উপর এসেছিল। ঈশ্বর তাঁর আপন বান্দাদের উপর কোন যুলুম করতে চান না। (৩২) হে আমার সম্প্রদায়! আমি আশঙ্কা করছি তোমাদের উপর বিকট শব্দের দিন এসে না পড়ে। (৩৩) যে দিন তোমরা

পৃষ্ঠপ্রদর্শন করে পালাবে আর তোমাদের ঈশ্বরের থেকে বাঁচাবার কেউ থাকবে না। আর ঈশ্বর যাকে পথভ্রষ্ট করেন, তাকে পথ দেখাবার কেউ নেই।

(৩৪) ইতিপূর্বে ইউসুফ (যোসেফ) তোমাদের কাছে স্পষ্ট প্রমাণসহ এসেছিল; কিন্তু সে তোমাদের কাছে যা নিয়ে এসেছিল সে সম্পর্কে তোমরা কেবলই সন্দেহ করেছ। অবশেষে যখন তাঁর মৃত্যু হল, তখন তোমরা বলেছ, তারপরে ঈশ্বর আর কোন বার্তাবাহক পাঠবেন না। এভাবেই ঈশ্বর ঐ লোকদের পথভ্রষ্ট করে দেন যারা সীমালঙ্ঘনকারী এবং সংশয় পোষণকারী। (৩৫) যারা কোন প্রমাণ ছাড়া ঈশ্বরের নিদর্শন সম্পর্কে বিতর্ক করে, ঈশ্বর ও আস্থাবানদের নিকট তাদের কাজ অতিশয় অপছন্দনীয়। এভাবেই ঈশ্বর প্রত্যেক অহংকারী ও স্বেচ্ছাচারীর অন্তর মোহর করে দেন।

(৩৬) ফ্যারাও বললঃ হে হামান! আমার জন্য একটা উঁচু মিনার বানাও, যাতে আমি পথ পেয়ে যাই- (৩৭) ওই আকাশের, এবং মুসার (মোজেস) উপাস্যকে দেখতে পাই। যদিও তাকে আমি মিথ্যাবাদী মনে করি। এভাবেই ফ্যারাও এর কাছে তার কুকর্ম শোভনীয় করে দেওয়া হয়েছিল এবং তাকে সোজা পথ থেকে বিরত রাখা হয়েছিল। আর ফ্যারাও এর চক্রান্ত ব্যর্থ হয়েই রইল।

(৩৮) যে ব্যক্তি বিশ্বাস স্থাপন করেছিল সে বললঃ হে আমার সম্প্রদায়! তোমরা আমাকে অনুসরণ করো, আমি তোমাদেরকে সঠিক পথে পরিচালিত করব। (৩৯) হে আমার সম্প্রদায়! এই পার্থিব জীবন কেবল কয়েক দিনের আর পরলোকই হচ্ছে আসল নিবাস। (৪০) যে ব্যক্তি মন্দকর্ম করবে সে কেবল ঐ কাজের অনুরূপ প্রতিফল পাবে, আর যে ভাল কাজ করবে, সে পূরুষই হোক বা নারী, যদি সে আস্থাবান হয়। তাহলে তারা স্বর্গে প্রবেশ করবে। সেখানে তারা অটেল জীবিকা পাবে। (৪১) হে আমার সম্প্রদায়!

তোমাদের কি হয়েছে? আমি তোমাদের মুক্তির দিকে আহ্বান করছি আর তোমরা আমাকে নরকের দিকে আহ্বান করছো। (৪২) তোমরা আমাকে বলছো ঈশ্বরকে অস্বীকার করতে আর এমন জিনিসকে তাঁর অংশীদার করতে যে সম্পর্কে আমার কোন জ্ঞান নেই। আর আমি তোমাদেরকে মহাপরাক্রমশালী, ক্ষমাশীল ঈশ্বরের দিকে ডাকছি। (৪৩) সন্দেহ নেই, তোমরা যে জিনিষের দিকে আমাকে ডাকছ, তার ইহলোকে বা পরলোকে কোন ক্ষমতা নেই। আর নিঃসন্দেহে আমাদের সবার প্রত্যাবর্তন ঈশ্বরের দিকেই, আর সীমালঙ্ঘনকারীরাই হল নরকের অধিবাসী। (৪৪) পরে তোমরা আমার কথা স্মরণ করবে। আর আমি আমার ব্যাপার ঈশ্বরের উপরই ন্যস্ত করছি। নিঃসন্দেহে ঈশ্বর সমস্ত বান্দার সংরক্ষক।

(৪৫) অতঃপর ঈশ্বর তাকে তাদের চক্রান্ত থেকে রক্ষা করলেন এবং নিকৃষ্ট শাস্তি ঘিরে ধরলো ফ্যারাও সম্প্রদায়কে। (৪৬) তাদেরকে সকাল সন্ধ্যায় আগুনের সামনে উপস্থিত করা হবে। আর যে দিন কিয়ামত (মহাবিনাশ) সংঘটিত হবে সে দিন বলা হবেঃ ফ্যারাও গোত্রকে সবচেয়ে কঠিন শাস্তির মধ্যে নিষ্ক্ষেপ কর।

(৪৭) আর যখন তারা নরকের মধ্যে একে অপরের সঙ্গে ঝগড়া করবে তখন দুর্বলেরা অহংকারীদের বলবে, আমরা তো তোমাদের অধিনস্ত ছিলাম। অতএব তোমরা কি আমাদের থেকে আগুনের একটা অংশ নিবারণ করতে পারবে?। (৪৮) অহংকারীরা বলবেঃ আমরা সবাই তো আগুনের মধ্যেই আছি। ঈশ্বর তাঁর বান্দাদের মধ্যে বিচার-মীমাংসা করে দিয়েছেন। (৪৯) আর যারা আগুনের মধ্যে থাকবে তারা নরকের রক্ষীদের বলবেঃ তোমরা তোমাদের প্রভুর কাছে প্রার্থনা করো, তিনি যেন আমাদের অন্ততঃ একদিনের শাস্তি লাঘব করে দেন। (৫০) তারা বলবেঃ তোমাদের কাছে কি

তোমাদের পয়গম্বর স্পষ্ট প্রমাণ নিয়ে আসেনি? তারা বলবে হ্যাঁ, রক্ষীরা বলবে, তাহলে তোমরাই প্রার্থনা করো। আর অবিশ্বাসীদের প্রার্থনা ব্যর্থ হয়েই থাকে।

(৫১) নিঃসন্দেহে আমি সাহায্য করি আমার পয়গম্বরদের আর যারা সত্যে বিশ্বাস স্থাপনকারী তাদের পার্থিব জীবনে, আর ঐ দিনেও যে দিন সাক্ষীরা দণ্ডায়মান হবে। (৫২) যে দিন অত্যাচারীদের ওজর-আপত্তি তাদের কোন কাজে আসবে না আর তাদের জন্য থাকবে থিক্কার আর নিকৃষ্ট আবাস। (৫৩) আর আমি মোজেসকে পথের সন্ধান দিয়েছি এবং ইসরাইলের সম্ভানদের গ্রন্থের উত্তরাধিকারী বানিয়েছি। (৫৪) পথ নির্দেশ এবং উপদেশ বুদ্ধিমানদের জন্য। (৫৫) অতএব তুমি ধৈর্য ধারণ কর, নিশ্চয়ই ঈশ্বরের প্রতিশ্রুতি সত্য এবং নিজ অপরাধের ক্ষমা প্রার্থনা কর। সকাল ও সন্ধ্যায় আপন প্রভুর সপ্রশংস মহিমা ঘোষণা কর।

(৫৬) যারা তাদের কাছে ঈশ্বরের যে নিদর্শন এসেছে সে সম্পর্কে কোন প্রমাণ ছাড়াই বিতর্ক করে, তাদের অন্তরে আছে আত্মসন্ত্রস্ততা যা অর্জনে তারা সফল হবে না। অতএব তুমি ঈশ্বরের আশ্রয় প্রার্থনা কর। নিঃসন্দেহে তিনি সবকিছুই শোনেন, সবকিছুই দেখেন।

(৫৭) নিঃসন্দেহে আকাশ ও পৃথিবী সৃষ্টি করা মানুষ সৃষ্টি করার চেয়েও বড় কাজ; কিন্তু অধিকাংশ মানুষ তা জানে না। (৫৮) অন্ধ আর দৃষ্টিসম্পন্ন সমান নয়, ঠিক তেমনিই আস্থাবান সদাচারী এবং দুষ্কৃতিপরায়ণ। তোমরা অল্লই উপদেশ গ্রহণ করে থাকো। (৫৯) প্রলয় দিবস অবশ্যই আসবে। এতে কোন সন্দেহ নেই; কিন্তু অধিকাংশ মানুষ তা বিশ্বাস করে না।

(৬০) আর তোমার প্রভু তো বলেই দিয়েছেন যে, আমাকে ডাক, আমি তোমাদের ডাকে সাড়া দেব। যারা আমার উপাসনা হতে মুখ ফিরিয়ে নেয়,

তারা শীঘ্রই লাঞ্চিত হয়ে নরকে প্রবেশ করবে। (৬১) ঈশ্বরই তোমাদের জন্য রাত বানিয়েছেন বিশ্রামের জন্য এবং দিনকে আলোকময় করেছেন। নিঃসন্দেহে ঈশ্বর মানুষের প্রতি বড়ই কৃপাশীল; কিন্তু অধিকাংশ লোক কৃতজ্ঞতা প্রকাশ করে না। (৬২) সেই ঈশ্বর তোমাদের প্রভু, সব কিছুর স্রষ্টা। তিনি ব্যতীত অন্য কোন উপাস্য নেই। তাহলে তোমরা কিভাবে পথভ্রষ্ট হচ্ছে? (৬৩) এভাবেই ঐ লোকেরা পথভ্রষ্ট হয়ে যাচ্ছে যারা ঈশ্বরের নিদর্শন সমূহ অস্বীকার করত।

(৬৪) ঈশ্বরই তোমাদের জন্য পৃথিবীকে বাসস্থান করেছেন আর আকাশকে ছাদ করেছেন আর তোমাদের আকার কত সুন্দর করেছেন। আর তিনিই ঈশ্বর, যিনি তোমাদের উত্তম জীবিকা দান করেছেন। এই ঈশ্বরই তোমাদের প্রভু, যিনি বড়ই কল্যাণময়। ঈশ্বর, যিনি সমগ্র জগতের প্রভু। (৬৫) তিনি চিরজীব, তিনি ছাড়া কোন উপাস্য নেই। অতএব তোমরা তাঁকেই ডাক, এবং তাঁর আনুগত্যে একনিষ্ঠ হও। সমস্ত প্রশংসা ঈশ্বরের জন্য যিনি নিখিল জগতের প্রভু।

(৬৬) বলঃ তোমরা আল্লাহর (ঈশ্বর) পরিবর্তে যাদেরকে ডাক, তাদের উপাসনা করতে আমাকে নিষেধ করা হয়েছে - তার কারণ আমার কাছে আমার প্রভুর পক্ষ থেকে স্পষ্ট প্রমাণ এসে গেছে। আর আমাকে আদেশ দেওয়া হয়েছে যে, আমি নিজেকে বিশ্ব-প্রভুর নিকটে সমর্পণ করি। (৬৭) তিনিই তোমাকে মাটি দ্বারা সৃষ্টি করেছেন, অতঃপর এক ফোঁটা তরল হতে, তারপর ক্ষুদ্র বুলন্ত আকৃতি, তারপর তিনি তোমাদেরকে নবজাতক রূপে ভূমিষ্ঠ করান। তারপর তিনিই তোমাদেরকে বড় করান যাতে তোমরা পূর্ণ সামর্থ্যবান হতে পার। তারপর তিনি তোমাদের বৃদ্ধ করেন। যদিও তোমাদের মধ্যে কিছু পূর্বেই মারা যায়। আর যাতে একটা নির্ধারিত সময়কালে পৌছতে

পার এবং চিন্তা করতে পার। (৬৮) তিনিই জীবিত করেন আর তিনিই মৃত্যুদান করেন। আর যখন কোন কিছু করার সিদ্ধান্ত নেন তখন তাকে বলেন ‘হও’ আর তা হয়ে যায়।

(৬৯) তোমরা কি ঐ লোকদের দেখনি যারা ঈশ্বরের নিদর্শন সম্পর্কে বিতর্ক করে? তারা কিভাবে বিপথগামী হচ্ছে? (৭০) যারা গ্রন্থকে অবিশ্বাস করেছে আর ঐ জিনিষকেও অবিশ্বাস করেছে যা দিয়ে আমি পয়গম্বরদের পাঠিয়েছি। শীঘ্রই তারা জানতে পারবে - (৭১) যখন তাদের গলদেশে বেড়ী আর শিকল পরানো হবে। তাদেরকে টেনে হিঁচড়ে নিয়ে যাওয়া হবে। (৭২) ফুটন্ত গরম জলে। তারপর তাদেরকে আগুনে নিক্ষেপ করা হবে। (৭৩) অতঃপর তাদেরকে বলা হবে, কোথায় তারা যাদেরকে তোমরা অংশীদার স্থাপন করতে; (৭৪) ঈশ্বরের পরিবর্তে? তারা বলবেঃ তারা আমাদের থেকে উধাও হয়ে গেছে; বস্তুতঃ এর আগে আমরা কোন কিছুকেই ডাকতাম না। এইভাবে ঈশ্বর অস্বীকারকারীদের পরিত্যাগ করবেন। (৭৫) এর কারণ তোমরা পৃথিবীতে অন্যায়ভাবে আনন্দোন্মত্ত করতে এবং দম্ভ করতে। (৭৬) নরকের দরজায় প্রবেশ কর সেখানে চিরকাল অবস্থানের জন্য, অহংকারীদের আবাস স্থল কতই না নিকৃষ্ট!

(৭৭) অতএব ধৈর্য ধারণ কর, নিঃসন্দেহে ঈশ্বরের অঙ্গীকার সত্য। আমি তাদেরকে যে অঙ্গীকার প্রদান করি, তার কিছু অংশ আমি তোমাকে দেখাই, অথবা তোমার মৃত্যু ঘটাই - অতঃপর এদেরকে তো আমার কাছেই ফিরে আসতে হবে।

(৭৮) তোমার পূর্বেও আমি অনেক পয়গম্বর পাঠিয়েছি, তার মধ্যে কিছু বৃত্তান্ত আমি তোমাকে শুনিয়েছি। আর ওর মধ্যে এমনও আছে যাদের বৃত্তান্ত আমি তোমাকে শুনাইনি। আর কোন পয়গম্বরের এই ক্ষমতা ছিল না

যে, ঈশ্বরের বিনা অনুমতিতে কোন নিদর্শন নিয়ে আসবে। অতঃপর যখন ঈশ্বরের আদেশ এসে গেল, তখন সঠিকভাবে ফয়সালা করা হল। আর অসৎকর্মশীলরাই ক্ষতিগ্রস্ত হয়ে রইল।

(৭৯) ঈশ্বরই তোমাদের জন্য চতুষ্পদ পশু সৃষ্টি করেছেন যাতে কোন কোনটিবাহন হিসাবেব্যবহার করো এবং কোন কোনটি খাদ্য হিসাবে আহার করো। (৮০) আর তোমাদের জন্য ওতে আরও উপকার আছে যাতে এগুলোর মাধ্যমে তোমরা তোমাদের প্রয়োজন মেটাতে পারো। এগুলোর উপর ও নৌযানের উপর তোমাদেরকে বহন করা হয়। (৮১) তিনি তোমাদেরকে তাঁর নিদর্শনাবলী প্রদর্শন করে থাকেন। অতএব তোমরা তাঁর কোন্ নিদর্শনটি অস্বীকার করবে?

(৮২) তারা কি পৃথিবীতে পরিভ্রমণ করে না এবং প্রত্যক্ষ করে না যে, তাদের পূর্ববর্তীদের কি পরিণাম হয়েছিল। তারা এদের চেয়ে সংখ্যায় অনেক বেশী ছিল এবং পৃথিবীতে তাদের শক্তি ও কীর্তিও প্রবলতর ছিল। তারপরও তাদের উপার্জন তাদের কোন কাজে আসেনি। (৮৩) যখন তাদের পয়গম্বরগণ তাদের কাছে স্পষ্ট প্রমাণ নিয়ে এল তখন তারা তাদের নিজস্ব জ্ঞানেই গর্ব প্রকাশ করল। আর তাদের উপর সেই শাস্তি এসে গেল যা নিয়ে তারা উপহাস করত। (৮৪) অতঃপর যখন তারা আমার শাস্তি অবলোকন করল তখন তারা বলতে লাগলঃ আমরা একমাত্র ঈশ্বরের উপরে বিশ্বাস স্থাপন করেছি। আর যা কিছু আমরা তাঁর অংশীদার বানাতাম তাদের অস্বীকার করছি। (৮৫) তখন তাদের আস্থাস্থাপন তাদের কোন কাজে এল না যখন তারা আমার শাস্তি প্রত্যক্ষ করেছে। এটাই ঈশ্বরের বিধান যা পূর্ব থেকেই তাঁর বান্দাদের মধ্যে প্রযোজ্য হয়েছে এবং এইভাবে অস্বীকারকারীরা ক্ষতিগ্রস্ত হয়।

অধ্যায় ৪১ : ফুস্‌সিলাত (স্পষ্ট ব্যাখ্যা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হা-মীম। (২) এটা পরম করুণাময় অসীম দয়াবান ঈশ্বরের পক্ষ থেকে অবতীর্ণ বাণী। (৩) এমন একটি গ্রন্থ যার বাণী সমূহ বিস্তারিতভাবে বিবৃত হয়েছে, আরবী ভাষার কুরআন, জ্ঞানী লোকদের জন্য। (৪) সুসংবাদদাতা ও সতর্ককারী হিসাবে; কিন্তু ঐ লোকদের অধিকাংশই এর থেকে মুখ ফিরিয়ে নিয়েছে, তাই তারা শুনতে পায় না। (৫) তারা বলেঃ আমাদের অন্তরে পর্দা পড়ে আছে, যদিকে তুমি আমাদের ডাকছ। আর আমাদের কান অবরুদ্ধ হয়ে গেছে এবং আমাদের ও তোমাদের মাঝে একটি অন্তরাল রয়েছে। তুমি তোমার কাজ কর, আমরা আমাদের কাজ করি।

(৬) বলঃ আমি তো তোমাদের মত একজন মানুষ। আমার কাছে এই মর্মে প্রত্যাদেশ আসে যে, তোমাদের উপাস্য মাত্র একজনই। অতএব তোমরা তাঁরই পথ দৃঢ়ভাবে অবলম্বন কর^১ এবং তাঁর কাছে ক্ষমা প্রার্থনা কর। আর অংশীবাদীদের জন্য রয়েছে বিনাশ। (৭) যারা উদ্বৃত্ত সম্পদ থেকে আবশ্যিক দান দেয় না এবং পরলোক বিশ্বাস করে না। (৮) নিঃসন্দেহে যারা বিশ্বাস স্থাপন করেছে এবং ভাল কাজ করেছে তাদের জন্য রয়েছে নিরবিচ্ছিন্ন এক পুরস্কার।

(৯) বলঃ তোমরা কি সেই মহান সত্ত্বাকে অবিশ্বাস কর যিনি দুই দিনে (সময়কালে) পৃথিবীকে সৃষ্টি করেছেন এবং তোমরা তাঁর সমকক্ষ দাঁড়

^১ বিঃ দ্রঃ (৪১ঃ০৬) ‘অতএব তোমরা তাঁরই পথ দৃঢ়ভাবে অবলম্বন কর।’ এর অর্থ ‘তোমরা কেবলমাত্র তাঁরই উপাসনা কর।’ অর্থাৎ ঈশ্বরের প্রতি পরিপূর্ণ অভিনিবেশ জ্ঞাপন কর; এক এবং একমাত্র ঈশ্বরই তোমাদের সকল প্রার্থনা ও আরাধনার একান্ত লক্ষ্য।

করতেচাও ? তিনিই তো নিখিল বিশ্বের প্রতিপালক। (১০) তিনি পৃথিবীর উপরিভাগে অটল পর্বতমালা স্থাপন করেছেন, তাতে কল্যাণ নিহিত রেখেছেন এবং চার দিনের (সময়কালের) মধ্যে তাতে খাদ্যের ব্যবস্থা করেছেন পরিপূর্ণভাবে - প্রশ্নকারীদের জন্য। (১১) অতঃপর তিনি আকাশের দিকে মনযোগ দেন, যা ছিল ধুমুকুঞ্জ বিশেষ। অনন্তর তিনি ওটাকে ও পৃথিবীকে বলেন এসো, ইচ্ছায় অথবা অনিচ্ছায়। উভয়েই বললঃ আমরা স্বানন্দে এলাম। (১২) অতঃপর তিনি দুদিনে (সময় কালে) সপ্ত আকাশ তৈরী করলেন এবং প্রত্যেক আকাশে তাঁর নির্দেশ পাঠিয়ে দিলেন। আর আমি পৃথিবীকে আকাশ প্রদীপের আলোয় সৌন্দর্য প্রদান করলাম এবং তাকে সুরক্ষিত করে দিলাম। এটা পরাক্রমশালী ঈশ্বরের পরিকল্পনা।

(১৩) কিন্তু তারা যদি মুখ ফিরিয়ে নেয় তাহলে বলঃ আমি তোমাদেরকে আদ ও সামুদ জাতির উপর যেমন শাস্তি এসেছিল তেমন শাস্তি হতে সাবধান করছি। (১৪) যখন তাদের সম্মুখ ও পশ্চাৎ হতে পয়গম্বর এল এ কথা বলতে - তোমরা ঈশ্বর ব্যতীত অন্য কারো উপাসনা করো না। তারা বললঃ আমাদের প্রভু যদি চাইতেন তাহলে দেবদূত পাঠিয়ে দিতেন। অতএব আমরা ওটাকে অবিশ্বাস করছি যা দিয়ে তোমাকে পাঠানো হয়েছে।

(১৫) আদ জাতির অবস্থা এমন ছিল যে, তারা পৃথিবীতে অহেতুক দস্ত করেছিল এবং বলেছিলঃ কে আছে যে শক্তিতে আমাদের চেয়ে অধিক ? তারা কি দেখেনি যে ঈশ্বর তাদের সৃষ্টি করেছেন, তিনি শক্তিতে তাদের চেয়ে বেশি ? আর তারা আমার নিদর্শন সমূহকে অবিশ্বাস করতেই থাকল। (১৬) তাই আমি এক অশুভ দিনে ওদের উপর প্রবল ঝঞ্ঝা পাঠিয়ে দিলাম যাতে তারা পার্থিব জীবনে লাঞ্ছনাকর শাস্তির স্বাদ পায়। আর পরলোকের শাস্তি এর চেয়েও ভয়ঙ্কর। তখন তারা কোন সাহায্য পাবে না।

(১৭) আর সামূদ জাতিকে তো আমি সৎপথ দেখিয়েছিলাম; কিন্তু তারা সৎপথে চলার পরিবর্তে অন্ধ থাকাই পছন্দ করল। তাই তাদেরই কৃতকর্মের ফলে তাদেরকে লাঞ্ছনাকর শাস্তির বজ্রাঘাত পাকড়াও করল। (১৮) আর যারা বিশ্বাস স্থাপন করেছিল এবং আমাকে ভয় করত তাদেরকে আমি রক্ষা করেছিলাম।

(১৯) আর যে দিন ঈশ্বরের শত্রুদের একত্রিত করা হবে, তারপর তাদেরকে পৃথক-পৃথক করা হবে। (২০) অবশেষে তারা যখন সেখানে পৌঁছে যাবে তখন তাদের কান, তাদের চোখ ও তাদের ত্বক তাদের কর্ম সম্বন্ধে তাদেরই বিরুদ্ধে সাক্ষ্য দেবে। (২১) তারা তাদের ত্বককে বলবে : তুমি আমার বিরুদ্ধে সাক্ষ্য দিচ্ছে কেন? জবাবে ত্বক বলবে: আমাকে ঐ ঈশ্বর বলার ক্ষমতা দিয়েছেন যিনি সবাইকে বলার ক্ষমতা দিয়েছেন। আর তিনিই তোমাকে প্রথমবার সৃষ্টি করেছেন আর তাঁরই কাছে তোমাকে আনা হয়েছে। (২২) আর তোমরা নিজেকে তার কাছ থেকে গোপন করতে পারবে না যে তোমার কান, তোমার চোখ এবং তোমার ত্বক তোমারই বিরুদ্ধে সাক্ষ্য দেবে। কিন্তু তুমি এই ভ্রমে ছিলে যে, ঈশ্বর তোমার অনেক কু-কর্ম জানতে পারবে না যা তুমি করতে। (২৩) আর তোমার এই ভ্রান্ত ধারণা যা তোমার প্রভু সম্পর্কে করেছিলে, তা তোমার সর্বনাশ ডেকে এনেছে। অতএব তুমি ক্ষতিগ্রস্তদের অন্তর্ভুক্ত হলে। (২৪) অতএব এখন ধৈর্য ধরলেও, তাদের ঠিকানা নরক আর যদি তারা ক্ষমা প্রার্থনাও করে তবুও তাদের ক্ষমা করা হবে না।

(২৫) আর আমি তাদের জন্য কিছু সাথী নিযুক্ত করে দিলাম। তারা প্রত্যেককে তার সামনের ও পিছনের সব জিনিষকে তাদের জন্য শোভনীয় করে দেখিয়ে দিল। আর তাদের উপর তাই কার্যকর হল যা তাদের পূর্ববর্তী

জ্বিন ও মানুষের উপর কার্যকর হয়েছিল। নিঃসন্দেহে তারা ক্ষতিগ্রস্ত ছিল।

(২৬) আর অবজ্ঞাকারীরা বললঃ এই কুরআন শুনো না, এতে বাধা দাও, যাতে তোমরা প্রভাবশালী থাকতে পারো। (২৭) অতএব আমি অস্বীকারকারীদের কঠোর শাস্তি আশ্বাদন করাব এবং ওদেরকে ওদের কৃতকর্মের নিকৃষ্টতম প্রতিফল দেব। (২৮) এটাই ঈশ্বরের শত্রুদের প্রতিফল অর্থাৎ নরক। ওটাই ওদের জন্য চিরকাল অবস্থান করার ঠিকানা। এজন্যে যে, তারা আমার নিদর্শন সমূহকে মিথ্যা মনে করত।

(২৯) আর অবিশ্বাসীরা বলবেঃ হে আমাদের প্রতিপালক! জ্বিন ও মানুষের মধ্যে যারা আমাদেরকে পথভ্রষ্ট করেছিল তাদেরকে আমাদের দেখিয়ে দাও। আমরা তাদেরকে আমাদের পায়ের তলায় পিষ্ট করবো, যাতে তারা অপমানিত হয়। (৩০) যারা বলে ঈশ্বরই আমাদের প্রতিপালক, আর তারা তাতেই অবিচল থাকে, নিশ্চয়ই তাদের কাছে দেবদূত অবতরণ করে এবং তাদেরকে বলেঃ তোমরা ভয় পেওনা, দুঃখ করো না। আর সেই জান্নাতের (স্বর্গের) সুসংবাদে খুশী হও যা তোমাদের সাথে প্রতিশ্রুতি করা হয়েছে। (৩১) আমরা পার্থিব জীবনে তোমাদের বন্ধু আর পরলোকেও। আর তোমাদের জন্য সেখানে তাই মজুদ আছে যা তোমাদের মন কামনা করে। আর তোমরা যা চাইবে সেখানে সব আছে। (৩২) ক্ষমাশীল পরম করুণাময়ের আতিথেয়তা।

(৩৩) এর চেয়ে শ্রেষ্ঠ কার কথা হবে, যে ঈশ্বরের দিকে ডাকে এবং ভালকাজ করে আর বলে যে, আমি আজ্ঞাবাহদের মধ্যে একজন। (৩৪) ভাল আর মন্দ দুটো সমান নয়। মন্দ প্রতিহত কর উৎকৃষ্ট দ্বারা, দেখবে তোমার সাথে যার শত্রুতা ছিল সে এমন হয়ে গেছে যেন এক অন্তরঙ্গ বন্ধু। (৩৫) আর এ গুনটি কেবল ধৈর্যশীলরাই পায়, এ গুনটি কেবল পরম

ভাগ্যবানদেরকেই দেওয়া হয়। (৩৬) যদি শয়তানের কোন প্ররোচনা তোমাকে প্ররোচিত করে তাহলে ঈশ্বরকে স্মরণ কর। নিঃসন্দেহে তিনি সবকিছু শোনেন, সবকিছু জানেন।

(৩৭) আর তাঁর নিদর্শনসমূহের মধ্যে রাত, দিন এবং সূর্য ও চন্দ্র। তোমরা সূর্য বা চন্দ্রকে সিজদা (প্রণতিজ্ঞাপন) করো না বরং সেই ঈশ্বরকেই সিজদা (প্রণতিজ্ঞাপন) করো যিনি এসব সৃষ্টি করেছেন। যদি তুমি তাঁরই উপাসক হও। (৩৮) যদি তারা অহংকার করে তাহলে যারা তোমার প্রভুর সান্নিধ্যে রয়েছে তারা রাত-দিন তাঁরই স্তুতি করছে আর তারা কখনও ক্লান্ত হয় না।

(৩৯) আর তাঁর নিদর্শনসমূহের মধ্যে অন্যতম নিদর্শন এই যে, তুমি ভূমিকে অনুর্বর দেখতে পাও। অতঃপর যখন আমি তার উপর বৃষ্টি বর্ষণ করি তখন তা উর্বর হয়ে ওঠে এবং ফুলে ফেঁপে ওঠে। নিঃসন্দেহে যিনি একে জীবিত করেছেন তিনিই মৃতদেরকেও জীবিত করেন। নিঃসন্দেহে তিনি সব কিছু করতে সামর্থবান। (৪০) যারা আমার বাণীসমূহের বিকৃত অর্থ করে, তারা আমার অগোচরে নয়। শ্রেষ্ঠ কে? যে নরকে নিক্ষিপ্ত হবে সে, না যে শেষ বিচারের দিন নিরাপদ থাকবে সে? যা খুশী করে নাও, নিঃসন্দেহে তিনি দেখছেন যা তোমরা করছো।

(৪১) যারা অভিজ্ঞান (কুরআন) আসার পর তা অস্বীকার করে (তারাই ক্ষতিগ্রস্ত)। নিঃসন্দেহে এটা একটা মহিমাময় গ্রন্থ। (৪২) এতে মিথ্যা প্রবেশ করতে পারে না, সামনে থেকেও না, পিছন থেকেও না। এটা এক প্রজ্ঞাময়, প্রশংসিত সত্ত্বার পক্ষ থেকে অবতীর্ণ। (৪৩) তোমাকে ওই কথাই বলা হচ্ছে যা তোমার পূর্বের পয়গম্বরদের বলা হয়েছিল। নিঃসন্দেহে তোমার প্রভু ক্ষমাশীল এবং কঠিন শাস্তিদাতা।

(৪৪) আমি যদি আরবী ভাষার পরিবর্তে অন্য ভাষায় কুরআন অবতীর্ণ

করতাম তাহলে তারা বলত এর বাণী সমূহ বিস্তারিত ব্যাখ্যা করা হল না কেন? অনারবী কুরআন অথচ আরবী পয়গম্বর। বলঃ এটা মুমিনদের জন্য পথ-নির্দেশ আর আরোগ্য। আর যারা বিশ্বাস স্থাপন করে না তাদের কানে বধিরতা আছে আর এই ব্যাপারে তারা অন্ধ। যেন এদেরকে অনেক দূর থেকে আহ্বান জানানো হচ্ছে।

(৪৫) আর আমি মুসাকে (মোজেসকে) গ্রন্থ দিয়েছিলাম কিন্তু তাতে মতভেদ সৃষ্টি করা হয়েছে। যদি তোমার প্রভুর পক্ষ থেকে পূর্ব সিদ্ধান্ত নির্ধারিত না হয়ে থাকত, তাহলে তাদের মধ্যে মীমাংসা করে দেওয়া হত। নিশ্চয়ই তারা এ ব্যাপারে বিভ্রান্তিকর এক সন্দেহের মধ্যে রয়েছে। (৪৬) যে সৎকাজ করবে সে নিজের জন্যই করবে আর যে মন্দ কাজ করবে, তার প্রতিফল সেই ভোগ করবে। আর তোমার প্রভু বান্দার উপর অত্যাচারকারী নন।

(৪৭) শেষ বিচারের জ্ঞান কেবল ঈশ্বরের সাথে সম্পর্কিত। তাঁর অজ্ঞাতসারে কোন ফল তাঁর আবরণ থেকে নিষ্কাশিত হয় না, আর কোন নারী গর্ভধারন করে না বা সন্তান ও প্রসব করে না। আর যে দিন ঈশ্বর তাদেরকে ডেকে জিজ্ঞেস করবেন, আমার অংশীদারেরা কোথায়? তারা বলবেঃ আমরা আপানার কাছে এই নিবেদন করছি যে, এই ব্যাপারে আমাদের মধ্যে কোন সাক্ষী নেই। (৪৮) আর যাদেরকে তারা পূর্বে আহ্বান করত তারা সবাই তাদের থেকে উধাও হয়ে যাবে, আর তারা বুঝতে পারবে যে, তাদের বাঁচার কোন উপায় নেই।

(৪৯) মানুষ মঙ্গল কামনায় ক্লান্ত হয় না আর যদি তাদের কোন কষ্ট এসে পড়ে তাহলে তারা নিরাশ এবং হতাশ হয়ে পড়ে। (৫০) দুঃখ কষ্ট ভোগের পর যদি আমি আমার অনুগ্রহের স্বাদ আস্বাদন করাই তখন তারা বলেঃ এটাতো আমার প্রাপ্য। আর আমি মনে করি না যে, কখনও প্রলয় দিবস আসবে। আর আমাকে যদি আমার প্রভুর কাছে প্রত্যাবর্তিত করা হয়

তাহলে তাঁর কাছেও আমার শ্রেষ্ঠত্বই বজায় থাকবে। অতএব আমি অবশ্যই অস্বীকারকারীদের কৃতকর্ম অবহিত করবো। আর এদেরকে কঠিন শাস্তির স্বাদ আস্বাদন করাবো।

(৫১) আর যখন আমি মানুষের উপর অনুগ্রহ করি তখন সে মুখ ফিরিয়ে নেয় এবং বিমুখ হয়ে পড়ে। আর যখন সে কষ্টে পড়ে তখন দীর্ঘ প্রার্থনাকারী হয়ে যায়। (৫২) ওদেরকে প্রশ্ন কর যে, যদি এই কুরআন ঈশ্বরের পক্ষ থেকে এসে থাকে এবং তোমরা তাকে অস্বীকার কর তাহলে সেই ব্যক্তির চেয়ে অধিক পথভ্রষ্ট আর কে হবে যে ঘোর বিরোধীতায় লিপ্ত আছে।

(৫৩) শীঘ্রই আমি তাদেরকে আমার নিদর্শন দেখাব বিশ্বজগতে ও তাদের নিজেদের মধ্যে। এমনকি তাদের কাছে স্পষ্ট হয়ে যাবে যে, এই কুরআন সত্য। আর একথা কি যথেষ্ট নয় যে, তোমার প্রভু প্রত্যেক জিনিসের সাক্ষী। (৫৪) জেনে রেখো এরা এদের প্রভুর সাথে সাক্ষাতের ব্যাপারে সন্দিহান। নিঃসন্দেহে, তিনি সবকিছু পরিবেষ্টন করে আছেন।

অধ্যায় ৪২ : আশ - শুরা (পারস্পরিক পরামর্শ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হা-মীম। (২) আইন-সীন-কাফ। (৩) এভাবেই পরাক্রমশীল, অসীমপ্রজ্ঞাবান ঈশ্বর প্রত্যাদেশ প্রেরণ করেন তোমার কাছে ও তোমার পূর্ববর্তীদের কাছে। (৪) আকাশ ও পৃথিবীতে যা কিছু আছে সবই তাঁর। তিনি সর্বোপরি, মহামহিম। (৫) আকাশসমূহ ফেটে পড়ার উপক্রম হয়, এবং দেবদূতরা তাদের প্রভুর প্রশংসা ও স্তুতি করে আর জগৎবাসীদের জন্য ক্ষমা প্রার্থনা করে। শোন, ঈশ্বরই ক্ষমাশীল ও অতি দয়ালু। (৬) আর যারা তাঁকে ছাড়া অন্য অভিভাবক গ্রহণ করে, ঈশ্বর তাদের দিকে নজর রেখেছেন আর তুমি তাদের কর্ম-বিধায়ক নও।

(৭) আর আমি এভাবেই তোমার উপরে আরবী ভাষায় কুরআন অবতীর্ণ করেছি, যাতে তুমি মক্কাবাসীদের আর তার চতুর্দিকে লোকদের সতর্ক করতে পার। আর তাদেরকে একত্রিত হওয়ার দিন সম্পর্কে সাবধান করে দাও, যা আসার ব্যাপারে কোন সন্দেহ নেই। একদল স্বর্গে থাকবে আরেকদল নরকে।

(৮) আর যদি ঈশ্বর চাইতেন ওদের সবাইকে একই উম্মতে (সম্প্রদায়) পরিণত করে দিতেন; কিন্তু তিনি যাকে ইচ্ছা তাঁর অনুগ্রহের অন্তর্ভুক্ত করেন, আর অত্যাচারীদের কোন সমর্থক ও সহায়তাকারী নেই। (৯) তারা কি তাঁকে ছাড়া অন্যকে অভিভাবক বানিয়ে নিয়েছে? আসলে তো ঈশ্বরই অভিভাবক, আর তিনিই মৃতকে জীবিত করেন। তিনি সবকিছুই করতে সক্ষম। (১০) আর যে বিষয়ে তোমরা মতভেদ কর, তার মীমাংসা ঈশ্বরের কাছে। তিনিই ঈশ্বর আমার প্রভু। তাঁর উপরেই নির্ভর করি এবং তাঁর দিকেই ফিরে আসি।

(১১) তিনিই আকাশ ও পৃথিবীর স্রষ্টা। তিনিই তোমাদের মধ্য থেকে তোমাদের জোড়া সৃষ্টি করেছেন। আর পশুদের ও জোড়া তৈরী করেছেন। এই ভাবে তিনি তোমাদের বংশ পরম্পরা প্রবাহমান রাখেন। কোন কিছুই তাঁর সমান নয়। তিনি সবকিছু শোনে ও সবকিছু দেখেন। (১২) আকাশ ও পৃথিবীর চাবি তাঁরই কাছে। তিনি যাকে চান অধিক জীবিকা দান করেন আর যাকে চান সঙ্কুচিত করে দেন। নিঃসন্দেহে তিনি সর্ব বিষয়ের জ্ঞান রাখেন।

(১৩) ঈশ্বর তোমাদের জন্য সেই ধর্ম নির্ধারিত করেছেন যার আদেশ তিনি নূহকে (নোয়াহ) দিয়েছিলেন আর যার প্রত্যাদেশ আমি তোমাকে করেছি। আর এই আদেশ আমি ইবরাহীমকে (আব্রাহামকে), মূসাকে (মোজেসকে) এবং ঈসাকে (যিশুকে) দিয়েছিলাম যে, ধর্মে অবিচল থাক, এতে মতভেদ করো না। অংশীবাদীদের কাছে একথা খুবই কষ্টকর মনে হয় যেদিকে তুমি

তাদের ডাকছ। ঈশ্বর যাকে ইচ্ছা তাঁর জন্য মনোনীত করে নেন এবং যে তাঁর অভিমুখী হয়, তিনি নিজে তাকে তাঁর পথে পরিচালিত করেন।

(১৪) আর জ্ঞান আসার পরও তারা বিভেদ করে বিভিন্ন দলে বিভক্ত হয় পারস্পারিক বাড়াবাড়ির কারণে। যদি তোমাদের প্রভুর পক্ষ থেকে একটি নির্ধারিত সময় পর্যন্ত অবকাশের পূর্ব সিদ্ধান্ত না থাকত তাহলে ওদের মধ্যে ফয়সালা করে দেওয়া হত। তাদের পরে যারা গ্রন্থের উত্তরাধিকারী হয়েছে তারা সে সম্পর্কে এক বিভ্রান্তিকর সন্দেহের মধ্যে রয়েছে।

(১৫) অতএব তুমি ওই দিকে (সবাইকে) ডাকো এবং ওতেই অবিচল থাকো, যার আদেশ তোমাকে দেওয়া হয়েছে। তাদের ইচ্ছার অনুসরণ করো না। আর বলঃ ঈশ্বর যে গ্রন্থ অবতীর্ণ করেছেন তাতেই বিশ্বাস করি। আর আমাকে এই আদেশ দেওয়া হয়েছে যে, আমি যেন তোমাদের মধ্যে ন্যায্যবিচার করি। আর ঈশ্বরই আমাদের প্রতিপালক এবং তোমাদের প্রতিপালক। আমাদের কর্ম আমাদের জন্য আর তোমাদের কর্ম তোমাদের জন্য। আমাদের ও তোমাদের মধ্যে কোন বিবাদ নেই। ঈশ্বর আমাদের সবাইকে একত্রিত করবেন। আর তাঁর কাছেই যেতে হবে। (১৬) আর যারা ঈশ্বর সম্পর্কে তর্ক-বিতর্ক করছে তাঁকে মেনে নেওয়ার পরও, তাদের তর্ক-বিতর্ক তাদের প্রতিপালকের কাছে অসার এবং তাদের প্রতি রয়েছে (ঈশ্বরের) ক্রোধ এবং তাদের জন্য রয়েছে কঠিন শাস্তি।

(১৭) ঈশ্বরই সত্যসহ অবতীর্ণ করেছেন - গ্রন্থ ও মানদণ্ড। তুমি কিভাবে জানবে সম্ভবতঃ মহাবিনাশ কাল সন্নিহিতে? (১৮) যারা তা বিশ্বাস করে না তারাই তা তাড়াতাড়ি কামনা করে। আর যারা বিশ্বাস করে তারা তাকে ভয় পায় আর তারা জানে যে তা সত্য। মনে রেখো, যারা সেই ক্ষণ সম্পর্কে বিতর্ক করে, তারা গভীর পথভ্রষ্টতায় নিমজ্জিত।

(১৯) ঈশ্বর তাঁর বান্দাদের প্রতি দয়ালু। তিনি যাকে ইচ্ছা জীবিকা দেন। তিনি মহাশক্তিধর, মহাপরাক্রমশালী। (২০) যে পরকালের ফসল চায় তার জন্য আমি তার ফসল বাড়িয়ে দিই। আর যে ব্যক্তি পার্থিব জগতের ফসল চায় আমি তাকে তা থেকেই কিছু দিয়ে দিই। আর পরলোকে তার কোন অংশ থাকবে না।

(২১) এদের কি কতিপয় অংশীদার আছে, যারা এদের জন্য এমন কোন ধর্ম প্রবর্তন করে দিয়েছে, ঈশ্বর যার অনুমতি দেননি? যদি চূড়ান্ত সিদ্ধান্ত নির্ধারিত না থাকত তাহলে তাদের ফয়সালা হয়ে যেত। নিঃসন্দেহে অত্যাচারীদের জন্য কঠোর শাস্তি রয়েছে। (২২) তুমি অত্যাচারীদেরকে তাদের কাজকর্মের জন্য ভীত সন্ত্রস্ত থাকতে দেখবে। আর তা তাদের উপরে আপতিত হবেই। আর যারা বিশ্বাস স্থাপন করেছে এবং ভাল কাজ করেছে, তারা স্বর্গের উদ্যানে অবস্থান করবে। তাদের জন্য তাদের প্রভুর কাছে ঐ সবকিছু আছে যা তারা কামনা করবে, এটাই বড় পুরস্কার। (২৩) ঈশ্বর তাঁর সত্যে বিশ্বাস স্থাপনকারী ও সৎকর্মশীল বান্দাদের জন্যে এই সুসংবাদই দিয়ে থাকেন। বলঃ আমি এর জন্য তোমাদের কাছে কোন প্রতিদান চাই না, কেবল আত্মীয়তার সৌহার্দ্য ছাড়া। আর কেউ কোন ভাল কাজ করলে আমি তার জন্য তাতে কল্যাণ বাড়িয়ে দিই। নিঃসন্দেহে ঈশ্বর ক্ষমাশীল, গুণগ্রাহী।

(২৪) তারা কি বলে যে, সে ঈশ্বরের উপর মিথ্যা বানিয়ে বলছে? ঈশ্বর ইচ্ছা করলে তোমার অন্তরে মোহর লাগিয়ে দিতেন। আর ঈশ্বর মিথ্যাকে মুছে দেন এবং নিজ বাণী দ্বারা সত্যকে প্রতিষ্ঠিত করেন। নিঃসন্দেহে তিনি অন্তরের বিষয় ভালভাবেই জানেন। (২৫) আর তিনি তাঁর বান্দাদের অনুশোচনা গ্রহণ করেন এবং পাপসমূহ ক্ষমা করেন। তোমরা যা কিছু করো তিনি তা জানেন। (২৬) আর তিনি ঐ লোকদের প্রার্থনা গ্রহণ করেন

যারা বিশ্বাস স্থাপন করেছে এবং যারা ভাল কাজ করে। তিনি তাদের আপন কৃপা অধিক বৃদ্ধি করেন। আর যারা অবিশ্বাস করবে তাদের জন্য রয়েছে কঠোর শাস্তি।

(২৭) ঈশ্বর যদি তাঁর বান্দাদের জন্য জীবিকার প্রাচুর্য দিতেন তাহলে তারা পৃথিবীতে উপদ্রব করত। তাই তিনি তাঁর ইচ্ছানুযায়ী পরিমাণমত অবতীর্ণ করেন। নিঃসন্দেহে ঈশ্বর আপন বান্দাদের সমস্ত খবর রাখেন, সবকিছুই দেখেন। (২৮) আর মানুষ নিরাশ হয়ে যাওয়ার পর তিনিই বৃষ্টি বর্ষণ করেন এবং তাঁর অনুগ্রহ ছড়িয়ে দেন। তিনিই কার্যনির্বাহী ও প্রশংসার অধিকারী। (২৯) আকাশ ও পৃথিবীর সৃষ্টি তাঁরই নিদর্শনসমূহের একটি। আর এই দুইয়ের মাঝে তিনি যেসব প্রাণী ছড়িয়ে দিয়েছেন, সেগুলো; তিনি যখন চাইবেন তখনই তাদের একত্রিত করতে সক্ষম।

(৩০) তোমাদের উপর যেসব বিপদ-আপদ আসে তা তোমাদের স্ব-হস্ত উপার্জিত কৃতকর্মেরই ফল। আর তোমাদের অনেক অপরাধ তিনি ক্ষমা করে দেন। (৩১) আর পৃথিবীতে তোমরা ঈশ্বরের নিয়ন্ত্রণের বাইরে বেরতে পারো না। ঈশ্বর ছাড়া তোমাদের কোন অভিভাবক নেই, আর না কোন সাহায্যকারী।

(৩২) আর তাঁর নিদর্শনসমূহের মধ্যে রয়েছে সমুদ্রে চলমান পাহাড়ের মত জাহাজসমূহ। (৩৩) তিনি ইচ্ছা করলে বাতাসকে থামিয়ে দিতে পারেন। তখন জাহাজগুলো সমুদ্রপৃষ্ঠে স্থির হয়ে থাকবে। নিঃসন্দেহে এর মধ্যে নিদর্শন রয়েছে প্রত্যেক ধৈর্যবান মানুষের জন্য যারা কৃতজ্ঞতা প্রকাশকারী। (৩৪) অথবা তাদের কৃতকর্মের জন্য ওগুলো নষ্ট করে দেন, তিনি অনেক লোককে ক্ষমাও করেন। (৩৫) যারা আমার নিদর্শন সমূহ নিয়ে বিতর্ক করে তারা জেনে রাখুক, তাদের কোন নিষ্ফলতা নেই।

(৩৬) অতএব যা কিছু তোমরা পেয়েছ তা কেবল পার্থিব জীবনের অস্থায়ী সুখসামগ্রী। আর যা কিছু ঈশ্বরের কাছে আছে তা অধিক শ্রেষ্ঠ এবং চিরস্থায়ী। ঐ লোকদের জন্য যারা বিশ্বাস স্থাপন করেছে এবং ঈশ্বরের উপর ভরসা রাখে।

(৩৭) যারা বড়পাপ এবং অশ্লীল কাজ পরিহার করে এবং ত্রুটির সময় ক্ষমা করে দেয়। (৩৮) আর যারা তাদের প্রভুর আমন্ত্রণ গ্রহণ করে এবং প্রার্থনা করে ও নিজের কাজ পরস্পর পরামর্শের ভিত্তিতে সম্পন্ন করে। আর আমি যা কিছু দিয়েছি তা থেকে খরচ করে। (৩৯) এবং যারা তাদের প্রতি অন্যায় করা হলে প্রতিরক্ষার ব্যবস্থা করে। (৪০) মন্দের প্রতিফল মন্দই। আর যে ক্ষমা করে দেয় এবং মিটমাট করে নেয় তার প্রতিফল ঈশ্বরের কাছে রয়েছে। নিঃসন্দেহে তিনি অত্যাচারীদের পছন্দ করেন না। (৪১) যারা অত্যাচারিত হওয়ার পর প্রতিশোধ গ্রহণ করে তাদের বিরুদ্ধে কোন অভিযোগ নেই। (৪২) অভিযোগ কেবল তাদের উপরেই যারা অত্যাচার করে এবং পৃথিবীতে অন্যায়ভাবে বিদ্রোহ করে। ঐ লোকদের জন্যই যন্ত্রণাদায়ক শাস্তি রয়েছে। (৪৩) আর যে ধৈর্য ধারণ করেছে এবং ক্ষমা করে দিয়েছে, নিঃসন্দেহে সে সাহসী পদক্ষেপ নিয়েছে।

(৪৪) আর ঈশ্বর যাকে বিপথগামী করেন তার জন্য তিনি ছাড়া কোন অভিভাবক নেই। আর তুমি অত্যাচারীদের দেখবে যে, যখন তারা শাস্তি প্রত্যক্ষ করবে তখন বলবে, ফিরে যাওয়ার কোন উপায় আছে কি? তুমি আরো দেখবে যে, তাদেরকে নরকের সামনে উপস্থিত করা হচ্ছে। (৪৫) তারা অপমানে ঝুঁকে থাকবে, এবং লজ্জাবনত দৃষ্টিতে তাকাতে থাকবে। আর বিশ্বাসীগণ বলবে যে, ক্ষতিগ্রস্ত তারাই যারা শেষ বিচারের দিন নিজেরা ক্ষতিগ্রস্ত হবে ও পরিবার-পরিজনদেরও ক্ষতিগ্রস্ত করবে। শোন, অত্যাচারীরা স্থায়ী শাস্তির মধ্যে থাকবে। (৪৬) আর তাদের কোন সাহায্যকারী থাকবে না যে ঈশ্বরের বিরুদ্ধে তাদের সাহায্য করে। আর ঈশ্বর যাকে পথভ্রষ্ট করেন তার আর কোন পথ নেই।

(৪৭) তোমরা প্রভুর আহ্বানে সাড়া দাও ঈশ্বরের পক্ষ হতে সেই দিন আসার পূর্বেই, যা অপ্রতিরোধ্য। সেদিন তোমাদের কোন আশ্রয়স্থল থাকবে না এবং তোমাদের জন্য কোন প্রতিরোধকারী ও থাকবে না। (৪৮) তথাপিও যদি তারা মুখ ফিরিয়ে নেয় তাহলে আমি তো তোমাকে তাদের রক্ষক করে পাঠাইনি। তোমার দায়িত্ব কেবল পৌঁছে দেওয়া। আর আমি যখন মানুষকে আমার কৃপা দ্বারা সুশোভিত করি, তখন সে তাতে প্রসন্ন হয়। আর যদি তাদের কর্মের কারণে তাদের উপর কোন বিপদ-আপদ এসে পড়ে তখন মানুষ কৃতঘ্ন হয়ে যায়।

(৪৯) আকাশ ও পৃথিবীর রাজত্ব একমাত্র ঈশ্বরের। তিনি যা চান সৃষ্টি করেন। যাকে ইচ্ছা কন্যা দান করেন আর যাকে ইচ্ছা পুত্র দান করেন। (৫০) অথবা পুত্র ও কন্যা দুইই দান করেন এবং যাকে ইচ্ছা নিঃসন্তান রাখেন। নিশ্চয়ই তিনি মহাজ্ঞানী, সর্বশক্তিমান।

(৫১) কোন মানুষের এ সামর্থ নেই যে, ঈশ্বর তার সাথে কথা বলেন; প্রত্যাদেশের মাধ্যম ব্যতীত, পর্দার অন্তরাল ব্যতীত, অথবা এমন কোন দূত প্রেরণ ব্যতীত, যে দূত তাঁর অনুমতিক্রমে তিনি যা চান তাই ব্যক্ত করে। নিঃসন্দেহে তিনি সমুন্নত, প্রজ্ঞাবান। (৫২) আর এই ভাবেই আমি তোমার কাছে এক ফেরেস্তা প্রেরণ করেছি আমার আদেশ ক্রমে। তুমি জানতে না গ্রহ কি আর এও জানতে না যে, বিশ্বাস স্থাপন কি? কিন্তু আমি একে একটি আলো করেছি, যার সাহায্যে আমি আমার বান্দাদের মধ্যে যাকে চাই পথ দেখাই। নিঃসন্দেহে তুমি মানুষকে এক সোজা পথই প্রদর্শন করছো। (৫৩) সেই ঈশ্বরের পথ যিনি আকাশ ও পৃথিবীর সবকিছুরই মালিক। শুনে রেখো, সকল বিষয় ঈশ্বরের কাছেই প্রত্যাবর্তন করবে।

অধ্যায় ৪৩ : আয-যুখরুফ (স্বর্ণালঙ্কার)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হা-মীম। (২) স্পষ্ট গ্রন্থের শপথ। (৩) আমি এটাকে আরবী কুরআন করেছি যাতে তোমরা বুঝতে পারো। (৪) নিঃসন্দেহে এর মূল গ্রন্থ আমার কাছে সংরক্ষিত আছে, সুমহান প্রজ্ঞাপূর্ণ।

(৫) তোমরা এক সীমালঙ্ঘনকারী সম্প্রদায়- এই জন্য কি এই উপদেশ বাণী তোমাদের কাছ থেকে প্রত্যাহার করে নেব? (৬) আমি পূর্ববর্তী মানুষদের কাছে কত না পয়গম্বর পাঠিয়েছি। (৭) তাদের কাছে এমন কোন পয়গম্বর আসেনি যাকে তারা উপহাস করেনি। (৮) অতঃপর যারা তাদের চেয়ে শক্তিশালী ছিল, তাদেরকে আমি ধ্বংস করে দিয়েছি এবং পূর্ববর্তীদের সেই উদাহরণ অতীত হয়ে গেছে।

(৯) আর যদি তুমি এদেরকে জিজ্ঞেস করো যে, আকাশ ও পৃথিবীর স্রষ্টা কে? তাহলে তারা অবশ্যই বলবে, পরাক্রমশালী মহাজ্ঞানী ঈশ্বরই সৃষ্টি করেছেন। (১০) যিনি তোমাদের জন্য পৃথিবীকে বিছানা করে দিয়েছেন, আর তাতে তোমাদের জন্য পথ তৈরী করে দিয়েছেন যাতে তোমরা পথ পাও। (১১) এবং যিনি আকাশ থেকে পরিমাণমত বৃষ্টি বর্ষণ করেন। অতঃপর তার দ্বারা মৃত ভূমিকে পুনরুজ্জীবিত করেন। এভাবেই তোমাদেরকেও পুনরুত্থিত করা হবে। (১২) আর তিনি বিভিন্ন প্রকার জিনিস তৈরী করেছেন। আর তোমাদের জন্য নৌযান এবং চতুষ্পদ পশু সৃষ্টি করেছেন যাতে তোমরা আরোহণ করো। (১৩) যাতে তোমরা তাদের পিঠে স্থির হয়ে বসতে পারো। যাতে তোমরা তোমাদের প্রভুর কল্যাণ স্মরণ করো, যখন তোমরা তাদের পিঠে স্থির হয়ে বস; আর বলঃ তিনিই মহান, যিনি এসব আমাদের বশীভূত করে দিয়েছেন। অন্যথায় আমরা

এদেরকে নিয়ন্ত্রণ করতে পারতাম না। (১৪) নিঃসন্দেহে আমরা আমাদের প্রভুর কাছে ফিরে যাব।

(১৫) আর তারা ঈশ্বরের বান্দাদের মধ্যে ঈশ্বরের অংশীদার বানিয়েছে। নিঃসন্দেহে মানুষ স্পষ্ট কৃত্য। (১৬) তিনি কি তাঁর সৃষ্টি থেকে কন্যা গ্রহণ করেছেন, আর তোমাদের জন্য পুত্র মনোনীত করেছেন? (১৭) দয়াময় ঈশ্বরের প্রতি তারা যা (কন্যা সন্তান) আরোপ করে, তাদের কাউকে সেই (কন্যা সন্তানের) সংবাদ দেওয়া হলে তার মুখমণ্ডল কালো হয়ে যায় এবং সে দুঃখ ভারাক্রান্ত হয়। (১৮) তারা কি ঈশ্বরের প্রতি আরোপ করে এমন সন্তান, যে সাজ-সজ্জার মধ্যে লালিত-পালিত হয় এবং বিতর্কের সময় কথা বলতে পারে না। (১৯) আর দেবদূতরা, যারা করুণাময়ের বান্দা, তাদেরকে তারা নারী সাব্যস্ত করে রেখেছে। তারা কি তাদের সৃষ্টির সময় উপস্থিত ছিল? ওদের এই দাবী লিপিবদ্ধ করা হবে আর ওদেরকে জিজ্ঞাসা করা হবে।

(২০) আর তারা বলেঃ যদি করুণাময় চাইতেন তাহলে আমরা ওদেরকে উপাসনা করতাম না। ওদের এ সম্পর্কে কোন জ্ঞান নেই। তারা কেবল কাল্পনিক কথা বলছে। (২১) অথবা আমি কি তাদের এর আগে কোন গ্রন্থ দিয়েছি, যা তারা দৃঢ় ভাবে আঁকড়ে ধরে আছে। (২২) বরং তারা বলেঃ আমরা আমাদের পিতৃপুরুষদের একটি ধর্মমতের অনুসরণ করতে দেখেছি, আর আমরা তাদেরকেই অনুসরণ করছি। (২৩) আর এভাবেই তোমার পূর্বে যে জনপদে কোন সতর্ককারী পাঠিয়েছি তখন সেখানকার সম্পন্ন লোকেরা বলেছে যে : আমরা আমাদের পিতৃপুরুষদের যে পথে চলতে দেখেছি আমরাও তাদের পদাঙ্ক অনুসরণ করছি। (২৪) সে (সতর্ককারী) বললঃ তোমরা তোমাদের পিতৃপুরুষদের যে পথের অনুসরণ করতে দেখেছ, আমি যদি তোমাদের জন্য তার চেয়ে উত্তম পথ-নির্দেশ নিয়ে আসি?

তারা বললঃ আমরা তা অবিশ্বাস করছি যা দিয়ে তোমাকে পাঠানো হয়েছে (২৫) তাই আমি তাদের উপর প্রতিশোধ নিয়েছি। অতএব দেখ, অবিশ্বাসীদের কি পরিণাম হয়েছিল।

(২৬) আর যখন ইবরাহীম (আব্রাহাম) তার পিতা ও তার সম্প্রদায়কে বলেছিলঃ আমি ঐ সব বিষয় থেকে মুক্ত যাদেরকে তোমরা উপাসনা করছ। (২৭) কিন্তু যিনি আমাকে সৃষ্টি করেছেন তিনি নিঃসন্দেহে আমাকে সুপথ দেখাবেন। (২৮) আর একথাই ইবরাহীম (আব্রাহাম) তার পরবর্তী বংশধরদের জন্য রেখে গেছেন। যাতে তারা তার দিকে ফিরে আসে। (২৯) বরং আমি ওদের আর ওদের পূর্বপুরুষদেরকে পার্থিব সামগ্রী দিয়েছি। অবশেষে তাদের কাছে সত্য এবং স্পষ্ট বর্ণনাকারী পয়গম্বর এল। (৩০) আর যখন ওদের কাছে সত্য এসেছে, তারা বললঃ এতো জাদু, আমরা এটা বিশ্বাস করি না।

(৩১) তারা আরো বললঃ এই কুরআন দুই জনপদের মধ্যে কোন প্রভাবশালী ব্যক্তির উপর কেন অবতীর্ণ হলো না? (৩২) তোমার প্রভুর অনুগ্রহ কি এরা বন্টন করে? পার্থিব জীবনে আমিই তো তাদের মধ্যে তাদের জীবিকা বন্টন করি, আর আমিই তো একে অপরের উপর শ্রেষ্ঠত্ব দান করি, যাতে তারা একে অপরের দ্বারা কাজ করিয়ে নিতে পারে। এরা যা জমা করছে তোমার প্রভুর কৃপা এর চেয়ে উৎকৃষ্টতর। (৩৩) সব মানুষ একই (অস্বীকারকারীদের) শ্রেণীভুক্ত হয়ে যাওয়ার আশংকা না থাকলে, যারা করুণাময়কে অস্বীকার করে, তাদেরকে আমি রূপোর তৈরী ছাদ ও তার উপরে উঠার সিঁড়ি দিতাম। (৩৪) এবং তাদের ঘরের দরজা, তাদের পালঙ্ক যাতে তারা ঠেস দিয়ে বসে। (৩৫) আর সোনাও দিতাম, আর এসব জিনিষ তো কেবল পার্থিব জীবনের সামগ্রী। আর পরলোকের কল্যাণ তোমার প্রভুর কাছে সংরক্ষিত আছে, তাঁকে যারা ভয় করে তাদের জন্য।

(৩৬) আর যে ব্যক্তি করুণাময়ের উপদেশ থেকে মুখ ফিরিয়ে নেয়, আমি তার উপরে একজন শয়তান নিযুক্ত করে দিই। সে তার বন্ধু হয়ে যায়। (৩৭) আর সে তাকে সৎপথ থেকে বিরত রাখে। আর তারা মনে করে যে, তারা সৎপথেই আছে। (৩৮) অবশেষে যখন সে আমার কাছে আসবে, তখন সে (শয়তানকে) বলবে, হায়! আমার ও তোমার মধ্যে যদি পূর্ব ও পশ্চিমের দূরত্ব থাকত! সে কত খারাপ বন্ধু ছিল! (৩৯) (এমন লোকদেরকে) বলা হবে - যেহেতু তোমরা অন্যায় করেছ, তাই শাস্তিতে তোমরা একে অপরের শরিক হলেও আজ তোমাদের কোন লাভ হবে না।

(৪০) তাহলে তোমরা কি বধিরদেরকে শোনাবে, না কি অন্ধদেরকে পথ দেখাবে, নাকি তাদেরকে যারা স্পষ্ট বিভ্রান্তিতে লিপ্ত? (৪১) অতএব যদি আমি তোমাকে (পৃথিবী থেকে) উঠিয়েও নিই, তবুও আমি তাদের প্রতিশোধ গ্রহণ করবো। (৪২) অথবা তাদেরকে যে প্রতিশ্রুতি দিয়েছি তা আমি তাদেরকে দেখিয়ে দেব। (৪৩) তাদের ব্যাপারে আমি পুরোপুরি সামর্থ রাখি। অতএব তুমি এটাকে দৃঢ়ভাবে আঁকড়ে থাকো যা তোমার প্রতি প্রত্যাদেশ করা হয়েছে। নিঃসন্দেহে তুমি এক সঠিক পথে আছো। (৪৪) আর এটাই তোমার ও তোমার সম্প্রদায়ের জন্য একটি উপদেশ। অতি শীঘ্রই ওদেরকে জিজ্ঞাসা করা হবে। (৪৫) আর যাদেরকে আমি তোমার পূর্বে পাঠিয়েছি, ওদেরকে জিজ্ঞাসা করো, আমি কি করুণাময় ছাড়া অন্য কোন উপাস্য নির্ধারিত করে দিয়েছি যে, তাদেরকে উপাসনা করা হবে?

(৪৬) আর আমি মূসাকে (মোজেসকে) আমার নিদর্শনসহ ফারাও ও তার সর্দারদের কাছে পাঠিয়েছিলাম, সে বলেছিল যে, আমি বিশ্বজগতের প্রভুর প্রেরিত পয়গম্বর। (৪৭) অতএব যখন সে আমার নিদর্শনসহ তাদের কাছে এল, তখন তারা তাকে বিদ্রূপ করতে লাগল।

(৪৮) আর আমি তাদেরকে যে নিদর্শন দেখাতাম তা পূর্বের নিদর্শনের চাইতেও বড়। আর আমি তাদেরকে শাস্তি দ্বারা পাকড়াও করেছি যাতে তারা ফিরে আসে। (৪৯) আর তারা বললঃ হে জাদুকর, আমাদের জন্য তোমার প্রভুর কাছে প্রার্থনা করো, তিনি তোমাকে যে প্রতিশ্রুতি করেছেন তা উপস্থিত করার জন্য। তাহলে আমরা অবশ্যই সৎপথ অবলম্বন করব। (৫০) অতঃপর যখন আমি তাদের উপর থেকে শাস্তি প্রত্যাহার করলাম, তখনই তারা আপন প্রতিশ্রুতি ভঙ্গ করতে লাগল।

(৫১) আর ফ্যারাও তার সম্প্রদায়ের কাছে চিৎকার করে বললঃ হে আমার সম্প্রদায়! মিশরের সম্রাজ্য কি আমার নয়? আর এই নদী যা আমার পাদদেশ দিয়ে প্রবাহিত হচ্ছে? তোমরা কি দেখছ না? (৫২) এই হীন লোকটি থেকে আমি কি শ্রেষ্ঠ নই? সে তো স্পষ্ট করে কথাও বলতে পারে না। (৫৩) তাহলে কেন তাকে সোনার কঙ্কন দেওয়া হল না? কেনই বা তার সাথে দেবদূত পাখা মেলে এল না? (৫৪) এভাবে সে তার সম্প্রদায়কে বোকা বানাল। তখন তারা তার কথা মেনে নিল। এরা অস্বীকারকারী লোক ছিল। (৫৫) অতঃপর যখন তারা আমাকে রাগান্বিত করল তখন আমি প্রতিশোধ নিলাম। আর আমি ওদেরকে ডুবিয়ে দিলাম। (৫৬) এভাবে আমি তাদেরকে অতীত ইতিহাস ও পরবর্তী প্রজন্মের জন্য এক দৃষ্টান্ত বানিয়ে দিলাম।

(৫৭) আর যখন মারইয়ামের (মেরী) পুত্রের উদাহরণ দেওয়া হল তখন তোমার সম্প্রদায়ের লোকেরা হৈ চৈ শুরু করল। (৫৮) আর বললঃ আমাদের উপাস্যরা শ্রেষ্ঠ না সে? কেবল বিতর্কের জন্যই তারা তার কথা উল্লেখ করল। বস্তুত তারা ছিল কলহপ্রিয় সম্প্রদায়। (৫৯) ঈসা (যিশু) তো কেবল আমারই এক বান্দা ছিল, তার উপরে আমি কৃপা করেছিলাম এবং তাকে করেছিলাম ইসরাইলের সন্তানদের জন্য

এক দৃষ্টান্ত । (৬০) আর আমি যদি চাইতাম তাহলে আমি দেবদূত নিযুক্ত করে দিতাম যারা পৃথিবীতে তোমাদের উত্তরাধিকারী হতো । (৬১) আর নিঃসন্দেহে ঈসা (যিশু) পুনরুত্থানের এক নিদর্শন, তোমরা এতে সন্দেহ পোষণ করো না, আর আমার আদেশ পালন করো । এটাই সরল পথ । (৬২) আর শয়তান যেন এথেকে তোমাদের বাধা দিতে না পারে, নিঃসন্দেহে সে তোমাদের প্রকাশ্য শত্রু ।

(৬৩) আর যখন ঈসা (যিশু) স্পষ্ট নিদর্শনসহ এল, সে বললঃ আমি তোমাদের কাছে প্রজ্ঞা নিয়ে এসেছি যাতে আমি তোমাদের কাছে পরিষ্কার করে দিতে পারি যে বিষয় নিয়ে তোমরা মতভেদ করছ । অতএব তোমরা ঈশ্বরকে ভয় করো আর আমার কথা মেনে চলো । (৬৪) নিঃসন্দেহে ঈশ্বরই আমার প্রভু এবং তোমাদেরও প্রভু, তাই তোমরা তাঁরই উপাসনা করো এটাই সরল পথ । (৬৫) অতঃপর তাদের মধ্যে বিভিন্ন দল মতভেদ করল । তাই দুর্ভোগ ওদের জন্য যারা অত্যাচার করেছে, এক কঠিন দিনের শাস্তির ।

(৬৬) তারা তাদের অজ্ঞাতসারে হঠাৎ শেষ বিচারের দিন (মহাপ্রলয়) এসে পড়ারই অপেক্ষা করছে । (৬৭) সব বন্ধুরাই সেদিন একে অপরের শত্রু হবে, কেবল যারা ভয় করে তারা ছাড়া । (৬৮) হে আমার বান্দাগন ! আজ তোমাদের কোন ভয় নেই এবং তোমরা দুঃখিত হবে না । (৬৯) যারা আমার নিদর্শন সমূহ বিশ্বাস করে এবং আমার কাছে আত্মসমর্পণ করে । (৭০) স্বর্গে প্রবেশ কর তোমরা আর তোমাদের স্ত্রীরা, তোমাদেরকে প্রসন্ন করা হবে । (৭১) সোনার থালা এবং পানপাত্রে তাদেরকে পরিবেশন করা হবে । আর সেখানে এমন জিনিষ থাকবে মন যা চায় এবং চোখ যা দেখে তৃপ্ত হয় । আর সেখানে তোমরা চিরকাল থাকবে । (৭২) এই তো সেই স্বর্গ, তোমাদেরকে যার উত্তরাধিকারী করা হয়েছে তোমাদের কর্মের জন্য ।

(৭৩) তোমাদের জন্য এখানে প্রচুর ফলমূল আছে যা থেকে তোমরা আহার করবে।

(৭৪) নিঃসন্দেহে অপরাধীরা চিরকাল নরকের শাস্তির মধ্যে অবস্থান করবে। (৭৫) তাদের জন্য তা লাঘব করা হবে না এবং তারা তার মধ্যে হতাশায় মুহ্যমান হয়ে পড়ে থাকবে। (৭৬) আমি তাদের উপর অত্যাচার করিনি বরং তারা নিজেরাই অত্যাচারী ছিল। (৭৭) তারা চিৎকার করে বলবেঃ হে মালিক (জাহান্নামের অধিকর্তা)! তোমার প্রভু যেন আমাদের মৃত্যু ঘটান। দেবদূত বলবেঃ তোমাদেরকে এভাবেই পড়ে থাকতে হবে। (৭৮) আমি তোমাদের কাছে সত্য এনে দিয়েছিলাম; কিন্তু তোমাদের অধিকাংশই ছিলে সত্য থেকে বিমুখ। (৭৯) তারা কি কোন ব্যাপারে সিদ্ধান্ত নিয়ে ফেলেছে? তাহলে আমিও তো দৃঢ় সিদ্ধান্ত নেব। (৮০) তারা কি ভাবে যে, আমি তাদের গোপন রহস্য ও গোপন পরামর্শ শুনি না? হ্যাঁ, অবশ্যই আমার দূতগণ তাদের কাছে থেকে সবকিছু লিপিবদ্ধ করে রাখে।

(৮১) বলঃ যদি করুণাময়ের কোন সন্তান হতো তাহলে আমিই হতাম তার প্রথম উপাসনাকারী। (৮২) তারা যা অরোপ করে তা হতে পবিত্র ও মহান, আকাশমণ্ডলী ও পৃথিবীর অধিপতি এবং আরশের (মহাসিংহাসনের) অধিপতি। (৮৩) অতএব তাদেরকে ছেড়ে দাও, তারা বাদ-বিবাদ ও খেল তামাশা নিয়েই থাকুক, এমনকি যে দিন সম্পর্কে তাদের সাথে প্রতিশ্রুতি করা হয়েছে সেই দিনের মুখোমুখী হোক!

(৮৪) আর তিনিই আকাশের অধিপতি এবং তিনিই পৃথিবীর অধিপতি এবং তিনিই প্রজ্ঞাময়, মহাজ্ঞানী। (৮৫) আর অত্যন্ত কল্যাণময় সেই সত্ত্বা যাঁর সম্রাজ্য আকাশ ও পৃথিবীতে ব্যপ্ত আর যা কিছু এর মধ্যে আছে। আর তাঁরই নিকটে আছে পুনরুত্থানের খবর। আর তাঁরই দিকে তোমাদের প্রত্যাবর্তন।

(৮৬) আর ঈশ্বর ব্যতীত এরা যাদেরকে ডাকে তাদের সুপারিশের ক্ষমতা নেই, কেবলমাত্র যারা সত্য সাক্ষ্য দেয়, তারা জানে। (৮৭) যদি তুমি এদেরকে জিজ্ঞাসা করো যে, তোমাদের কে সৃষ্টি করেছেন তাহলে তারা একথাই বলবে যে, ঈশ্বর সৃষ্টি করেছেন। তাহলে তারা কিভাবে ফিরে যায়? (৮৮) আর তাদের পয়গম্বর একথাই বলেছে - হে আমার প্রভু! এরা এমন লোক যারা বিশ্বাস করে না। (৮৯) সুতরাং এদেরকে উপেক্ষা করো আর বল - শাস্তি! তারা শীঘ্রই জানতে পারবে।

অধ্যায় ৪৪ : আদ-দুখান (ধূম্র)

ঈশ্বরের নামে শুরু যিনি পরম করুণাময় ও অতি দয়ালু।

(১) হা-মীম। (২) স্পষ্ট গ্রন্থের শপথ। (৩) আমি একে এক কল্যাণময় (বিভূতিপূর্ণ) রাতে অবতীর্ণ করেছি, নিশ্চয়ই আমি সতর্ককারী ছিলাম। (৪) এ রাতে প্রত্যেক প্রজ্ঞাপূর্ণ বিষয় নির্ধারণ করা হয়। (৫) আমার নির্দেশে, নিঃসন্দেহে আমিই তো বার্তা প্রেরণ করে থাকি। (৬) তোমার প্রভুর কৃপায় তিনিই শ্রবণকারী, সর্বজ্ঞাত। (৭) যিনি আকাশ পৃথিবী ও এর মধ্যবর্তী সব কিছুর প্রভু, যদি তোমরা বিশ্বাস করো। (৮) তিনি ছাড়া কোনই উপাস্য নেই। তিনিই জীবন দান করেন, তিনিই মৃত্যু প্রদান করেন। তিনিই তোমাদের প্রভু আর তোমাদের পূর্বপুরুষদেরও প্রভু। (৯) বস্তুতঃ তারা সন্দেহের বশবর্তী হয়ে খেলা-তামাশা করছে। (১০) অতএব সেই দিনের প্রতীক্ষা করো যে দিন আকাশ স্পষ্ট ধোঁয়ায় ছেয়ে যাবে (১১) যা মানুষকে ঢেকে ফেলবে, এটা এক যন্ত্রণাদায়ক শাস্তি। (১২) (তারা বলবেঃ) হে আমাদের প্রভু! আমাদের থেকে শাস্তি উঠিয়ে

নিন, আমরা বিশ্বাস স্থাপন করেছি। (১৩) তাদের জন্য পথ কোথায়? ওদের কাছে পয়গম্বর এসেছিল স্পষ্ট বর্ণনাকারী। (১৪) তারপর তারা তার থেকে মুখ ফিরিয়ে নিয়েছিল এবং বলেছিলঃ এতো এক প্রশিক্ষিত উন্মাদ। (১৫) আমি কিছু সময়ের জন্য যদি শাস্তি উঠিয়ে নিই তাহলে তোমরা তো আগের অবস্থায় ফিরে যাবে। (১৬) যে দিন আমি কঠিন ভাবে ধরব, সেদিন অবশ্যই প্রতিশোধ গ্রহণ করবো।

(১৭) এদের পূর্বে আমি ফ্যারাও এর লোকজনদের পরীক্ষা নিয়েছিলাম। আর এদের কাছে এক সন্মানিত পয়গম্বর এসেছিল (১৮) সে বলেছিলঃ ঈশ্বরের বান্দাদেরকে আমার কাছে প্রত্যর্পন করো। আমি তোমাদের জন্য একজন বিশ্বস্ত পয়গম্বর। (১৯) আর তোমরা ঈশ্বরের বিরুদ্ধে বিদ্রোহ করো না। আমি তোমাদের কাছে উপস্থাপিত করছি এক স্পষ্ট প্রমাণ। (২০) তোমরা যাতে আমাকে পাথর মেরে হত্যা করতে না পারো, সেজন্য আমি আমার প্রভু ও তোমাদের প্রভুর আশ্রয় চাচ্ছি। (২১) যদি তোমরা বিশ্বাস স্থাপন না করো তাহলে আমার কাছ থেকে দূরে থাকো।

(২২) অতঃপর মুসা (মোজেস) তার প্রভুর কাছে দোয়া (প্রার্থনা) করলঃ এরা তো এক অপরাধী সম্প্রদায়। (২৩) আমি বলেছিলামঃ তুমি আমার বান্দাদের নিয়ে রাতে বের হয়ে পড়, তোমাদের পশ্চাদ্ধাবন করা হবে। (২৪) আর তুমি সমুদ্রকে শান্ত থাকতে দাও, ওদের সেনা নিমজ্জিত হবে। (২৫) তারা ছেড়ে গিয়েছিল কত উদ্যান ও ঝরণা, (২৬) কত শস্য ক্ষেত আর সুন্দর ঘরবাড়ী, (২৭) আর বিশ্বামের সামগ্রী যাতে তারা প্রসন্ন থাকত! (২৮) এমনই ঘটেছিল এবং আমি অন্যজাতিকে এসবের উত্তরাধিকারী করেছিলাম। (২৯) তাদের জন্য না আকাশ কাঁদল আর না ধরণী কাঁদল আর না তাদেরকে অবকাশ দেওয়া হল।

(৩০) আর আমি ইসরাইলের সন্তানদের অপমানকর শাস্তি থেকে মুক্ত করলাম। (৩১) অর্থাৎ ফ্যারাও এর হাত থেকে, নিঃসন্দেহে সে ছিল সীমা লঙ্ঘনকারী এবং বিদ্রোহী। (৩২) তাদেরকে আমি জেনে শুনেই বিশ্ববাসীর উপর শ্রেষ্ঠত্ব প্রদান করলাম। (৩৩) আর আমি তাদেরকে এমন সব নিদর্শন প্রদান করেছিলাম যাতে ছিল প্রত্যক্ষ পরীক্ষা।

(৩৪) তারা বলেই থাকে, (৩৫) এটাই আমাদের প্রথম মৃত্যু, আমাদেরকে আর উঠানো হবে না। (৩৬) তুমি যদি সত্য হও তাহলে আমাদের পিতৃপুরুষদের উঠিয়ে আনো। (৩৭) এরা কি তুঝে সম্প্রদায় ও তাদের পূর্ববর্তীদের চেয়ে শ্রেষ্ঠতর? আমি তাদেরকে ধ্বংস করে দিয়েছি। নিঃসন্দেহে তারাও অস্বীকারকারী ছিল।

(৩৮) আকাশ ও পৃথিবী এবং এর মধ্যে যা কিছু আছে আমি ক্রীড়া চলে সৃষ্টি করেনি। (৩৯) এগুলো আমি যথার্থ উদ্দেশ্যেই সৃষ্টি করেছি; কিন্তু অধিকাংশ লোক তা জানে না। (৪০) নিঃসন্দেহে বিচারের দিন এদের সবার নির্ধারিত সময়। (৪১) সেদিন কোন বন্ধুকোন বন্ধুর উপকারে আসবে না, এবং তারা সাহায্যপ্রাপ্ত হবে না।^১

^১ বিঃদ্রঃ (৪৪ঃ ৪১) যদি কেহ আকাশমণ্ডলী ও ভূ-মণ্ডল তথা সমগ্র বিশ্ব ব্রহ্মাণ্ড নিয়ে চিন্তা করে, তাহলে পরিস্কারভাবে বুঝতে পারবে যে এ সমস্ত কিছু বিশেষ উদ্দেশ্য নিয়ে সৃষ্টি করা হয়েছে। যদি তাই না হতো তাহলে পৃথিবীতে গৌরবময় ঐতিহ্য স্থাপন করা মানুষের পক্ষে সম্ভব হত না। সমস্ত কর্মকাণ্ডের অর্থবহতা এটাই ইঙ্গিত করে যে এর সমস্ত কিছুই একটি অর্থপূর্ণ এবং উদ্দেশ্যমূলক ভাবে সমাপ্ত হবে। এর অন্যথা হওয়া অকল্পনীয়। এর সমাপ্তির মধ্য দিয়েই পরলৌকিক জীবনের সূচনা ঘটবে। পরলোকের প্রতি বিশ্বাস হল সার্বজনীন অর্থবহতার এক বৃহত্তর রূপ। পার্থিব জীবন একটা পরীক্ষা স্বরূপ। ইহজগতের বাস্তবতায় প্রত্যেকের একটা অংশ আছে। ঈশ্বরের কাছে যোগ্যতা সম্পন্ন প্রতিপন্ন করতে পারলেই পরজগতের অর্থবহতায় অংশীদার হওয়া যায়।

(৪২) তারা ব্যতীত, যাদের উপর ঈশ্বর দয়া করবেন। নিঃসন্দেহে তিনি পরাক্রমশালী ও অতি দয়ালু।

(৪৩) যাক্কুম বৃক্ষ। (৪৪) পাপীদের আহার হবে। (৪৫) গলিত তাম্বের মত; ওটা তার পেটের মধ্যে ফুটবে। (৪৬) যেমন গরম জল ফোটে। (৪৭) (একটা আওয়াজ শোনা যাবে) একে ধর এবং টেনে হিঁচড়ে নিয়ে যাও জাহান্নামের মধ্যে। (৪৮) তারপর এর মাথার উপর ঢেলে দাও ফুটন্ত জলের শাস্তি। (৪৯) স্বাদ গ্রহণ কর, তুই খুবই সন্মানিত কুলীন ছিলি। (৫০) এটাই সেই জিনিষ যা তুই সন্দেহ করতিস।

(৫১) নিঃসন্দেহে যারা ঈশ্বরকে ভয় করত তারা এক শান্তির স্থানে থাকবে। (৫২) উদ্যান ও ঝরনার মাঝে। (৫৩) তারা মিহি ও পুরু রেশমের বস্ত্র পরিধান করে সামনা সামনি বসে থাকবে। (৫৪) এমনই হবে, আমি তাদেরকে বিবাহ দেব আয়তনয়না কুমারীদের সাথে। (৫৫) সেখানে তারা প্রশান্ত মনে প্রত্যেক প্রকার ফল আনতে বলবে। (৫৬) সেখানে তারা অমর হবে এবং তিনি তাদেরকে নরকের শাস্তি হতে রক্ষা করবেন। (৫৭) তোমার প্রভুর অনুগ্রহে এমনই হবে, এটাই বড় সফলতা।

(৫৮) বস্ত্রত আমি এই গ্রন্থকে তোমার ভাষায় সহজ করে দিয়েছি যা থেকে লোকেরা দিশা খুঁজে পায়। (৫৯) অতএব তুমিও প্রতীক্ষা করো, তারাও প্রতীক্ষা করছে।

অধ্যায় ৪৫ : আজ-জাসিয়াহ্ (নতজানু)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হা-মীম। (২) এই গ্রন্থ পরাক্রমশালী প্রজ্ঞাবান ঈশ্বরের নিকট থেকে অবতীর্ণ। (৩) নিঃসন্দেহ বিশ্বাসীদের জন্য আকাশ ও পৃথিবীতে অনেক নিদর্শন আছে। (৪) তোমাদের সৃষ্টিতে এবং জীবজন্তুর বিস্তারে নিশ্চিত বিশ্বাসীদের জন্য নিদর্শন রয়েছে। (৫) আর রাত ও দিনের পরিবর্তনে, আকাশ থেকে ঈশ্বর কতক জীবিকা প্রেরণে, ধরিত্রীর মৃত্যুর পর তাকে পুনর্জীবিত করণে এবং বাতাসের গমনাগমনে চিত্তাশীল লোকদের জন্য নিদর্শন রয়েছে। (৬) এগুলি ঈশ্বরের নিদর্শন যা আমি সঠিকভাবে তোমাকে শোনাচ্ছি। সুতরাং ঈশ্বর ও তাঁর নিদর্শনের পরিবর্তে তারা কোন্ বাণীতে বিশ্বাস করবে?

(৭) প্রত্যেক মিথ্যাবাদী পাপীদের দুর্ভোগ! (৮) যারা ঈশ্বরের বাণী শোনে যখন তাদের সামনে তা আবৃত্তি করা হয়, অতঃপর অহংকারবশত অনড় থাকে, যেন সে তা শুনতে পায়নি। অতএব তাদেরকে এক কষ্টদায়ক শাস্তির সংবাদ দিয়ে দাও। (৯) আর যখন সে আমার কোন বাণী জানতে পারে তখন তা নিয়ে হাসি-ঠাট্টা করে। এমন লোকদের জন্য লাঞ্ছনাকর শাস্তি রয়েছে। (১০) তাদের সামনেই নরক। আর তারা যা উপার্জন করেছে তা তাদের কোন কাজে আসবে না। তারা ঈশ্বরের পরিবর্তে যাদেরকে অভিভাবক বানিয়েছে তারাও তাদের কোন কাজে আসবে না। আর তাদের জন্য রয়েছে মহাশাস্তি। (১১) এটি একটি পথ নির্দেশ, আর যারা তাদের প্রভুর বাণী সমূহ অবিশ্বাস করেছে তাদের জন্য কঠিনতম যন্ত্রণাদায়ক শাস্তি রয়েছে।

(১২) ঈশ্বরই সমুদ্রকে তোমাদের আয়ত্তাধীন করে দিয়েছেন। যাতে তাঁর আদেশে তাতে নৌযান চলাচল করতে পারে এবং তোমরা তাঁর

অনুগ্রহ অনুসন্ধান করো ও কৃতজ্ঞতা প্রকাশ করো। (১৩) আকাশ ও পৃথিবীতে যা কিছু আছে সবই তিনি তাঁর পক্ষ থেকে তোমাদের আয়ত্ত্বাধীন করে দিয়েছেন। নিঃসন্দেহে এতে নিদর্শন রয়েছে চিন্তাশীল লোকদের জন্য।

(১৪) বিশ্বাসীদের বলঃ তারা যেন সেই সব লোকদের ক্ষমা করে দেয়, যারা ঈশ্বরের সেই দিবস সমূহের প্রত্যাশা করে না, যাতে ঈশ্বর কতিপয় লোকদেরকে তাদের কৃতকর্মের প্রতিফল দান করেন। (১৫) যে সৎকাজ করবে তার কল্যাণ তার জন্যেই আর যে মন্দ কাজ করবে তার বিড়ম্বনা তারই; অতঃপর তোমার প্রভুর কাছেই প্রত্যাবর্তন করতে হবে।

(১৬) আমি তো ইসরাইলের সন্তানদের গ্রন্থ (তাওরাত), শাসন ক্ষমতা, পয়গম্বরত্ব প্রদান করেছিলাম এবং ওদেরকে পবিত্র জীবিকা দান করেছিলাম ও জগৎবাসীর উপর শ্রেষ্ঠত্ব প্রদান করেছিলাম। (১৭) আমি ওদেরকে ধর্ম সম্পর্কে প্রত্যক্ষ প্রমাণ দিয়েছিলাম। তাদের কাছে জ্ঞান আসার পরেও তারা পারস্পরিক বিদ্বেষবশত মতভেদ করেছে। নিঃসন্দেহে তোমার প্রভু শেষ বিচারের দিন ওদের বিষয় মীমাংসা করবেন যা নিয়ে তারা মতভেদ করত। (১৮) এরপর আমি তোমাকে ধর্মের স্পষ্ট পথে স্থাপিত করেছি, অজ্ঞদের প্রবৃত্তির অনুসরণ করো না। (১৯) ঈশ্বরের সামনে তারা তোমাদের কোনই কাজে আসবে না। আর অত্যাচারী লোকেরা একে অপরের বন্ধু। আর ঈশ্বরভীরু লোকদের বন্ধু ঈশ্বর। (২০) এটা মানুষের জন্য বিবেকের বাণী। পথ-নির্দেশ ও অনুগ্রহ ওই লোকদের জন্য যারা বিশ্বাস করে।

(২১) যারা অপকর্ম করে তারা কি মনে করে যে, আমি তাদেরকে সত্যে বিশ্বাস স্থাপনকারী আর সৎকর্মশীলদের মত গণ্য করবো? তাদের জীবিত অবস্থা ও মৃত অবস্থা কি একই রকম হবে? তাদের সিদ্ধান্ত কত মন্দ! (২২) আর ঈশ্বর আকাশ ও পৃথিবী এক বিশেষ পরিকল্পনার সাথে সৃষ্টি করেছেন,

যাতে প্রত্যেক ব্যক্তিকে তার কৃতকর্মের ফল দেওয়া যায়, আর তাদের প্রতি কোন অবিচার না হয়।

(২৩) তুমি কি ঐ ব্যক্তিকে দেখেছ যে তার প্রবৃত্তিকে তার উপাস্য বানিয়ে নিয়েছে? আর ঈশ্বর তাকে জ্ঞান থাকা সত্ত্বেও পথভ্রষ্ট করে দিয়েছেন। আর তার কানে ও অন্তরে মোহর করে দিয়েছেন এবং তার চোখে আবরণ দিয়ে দিয়েছেন। তাহলে এমন ব্যক্তিকে কে পথ দেখাবে ঈশ্বর যাকে পরিত্যাগ করেছেন? তবুও কি তোমরা উপদেশ গ্রহণ করবে না?

(২৪) আর তারা বলেঃ আমাদের পার্থিব জীবন ছাড়া আর কোন জীবন নেই। আমরা মরি আর বাঁচি আমাদেরকে তো কেবল কালচক্র ধ্বংস করে। এসম্পর্কে ওদের কোন জ্ঞান নেই। তারা কেবল অনুমান ভিত্তিক এরকম বলে। (২৫) আর যখন ওদেরকে আমার স্পষ্ট বাণী শোনান হয় তখন ওদের কাছে এছাড়া বলার কিছু থাকে না যে, আমাদের পিতৃপুরুষদের জীবিত করে আনো। যদি তোমরা সঠিক হও। (২৬) বলঃ ঈশ্বরই তোমাদের জীবন দান করেন এবং মৃত্যু ঘটান। অতঃপর পুনরুত্থান দিবসে তিনি তোমাদেরকে একত্রিত করবেন, এতে কোন সন্দেহ নেই; কিন্তু অধিকাংশ লোক তা জানে না।

(২৭) আর আকাশ ও পৃথিবীতে ঈশ্বরেরই রাজত্ব। আর যে দিন কিয়ামত সংঘটিত হবে সেদিন মিথ্যাশ্রয়ীরা ক্ষতিগ্রস্ত হবে। (২৮) এবং তুমি দেখবে যে, প্রত্যেক দল নতজানু অবস্থায় থাকবে। প্রত্যেক দলকে তাদের কর্ম-পঞ্জিকা দেখতে ডাকা হবে। আজ তোমাদের ঐ সব কর্মের প্রতিফল দেওয়া হবে যা তোমরা করেছিলে। (২৯) এটা আমার পঞ্জীকা যা তোমাদের বিষয়ে সঠিক তথ্য প্রদান করছে। তোমরা যা করেছিলে আমি তা লিপিবদ্ধ করাচ্ছিলাম।

(৩০) যারা বিশ্বাস স্থাপন করেছে ও সৎকাজ করেছে তাদেরকে

তাদের প্রভু নিজ অনুগ্রহে প্রবেশ করাবেন, এটাই স্পষ্ট সফলতা। (৩১) আর যারা অস্বীকার করেছে, (তাদেরকে বলা হবে) তোমাদেরকে কি আমার বাণী সমূহ পড়ে শোনানো হয় নি? তখন তোমরা অহংকার বশতঃ অস্বীকার করেছিলে, তোমরাই অপরাধী ছিলে। (৩২) আর যখন বলা হত যে, ঈশ্বরের প্রতিশ্রুতি সত্য, পুনরুত্থানের ব্যাপারে কোন সন্দেহ নেই, তখন তোমরা বলতে, আমরা জানি না শেষ বিচারের দিন কি? আমরা তো শুধু একটা ভুল ধারণাই করি, আর এ বিষয়ে আমরা নিশ্চিত নই।

(৩৩) তাদের খারাপ কাজগুলো তাদের সামনে প্রকাশ হয়ে পড়বে এবং যা নিয়ে তারা ঠাট্টা করত তা তাদের ঘিরে ধরবে। (৩৪) আর বলা হবেঃ আজ আমি তোমাদেরকে ভুলে যাব, যেমন তোমরা তোমাদের এ দিনের সাক্ষাৎকে ভুলে গিয়েছিলে। আর তোমাদের ঠিকানা নরক। তোমাদের কেউ সাহায্য করার নেই। (৩৫) এর কারণ এই যে, তোমরা ঈশ্বরের বাণী সমূহকে উপহাস করেছিলে। পার্থিব জীবন তোমাদেরকে প্রতারিত করেছিল। অতএব আজ তাদেরকে নরক থেকে বের করা হবে না। আর তাদের ক্ষমা প্রার্থনা গ্রাহ্য হবে না।

(৩৬) অতএব সকল প্রশংসা ঈশ্বরের যিনি আকাশের প্রভু, পৃথিবীর প্রভু এবং নিখিল জগতের প্রভু। (৩৭) আর আকাশ ও পৃথিবীতে তাঁরই মহিমা। তিনিই পরাক্রমশালী, অসীম প্রজ্ঞাবান।

অধ্যায় ৪৬ : আল - আহ্‌কাফ (বালুময় পাহাড়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হা-মীম। (২) এই গ্রন্থ পরাক্রমশালী ও অসীম প্রজ্ঞাবান ঈশ্বরের নিকট থেকে অবতীর্ণ। (৩) আকাশ ও পৃথিবী এবং তার মধ্যবর্তী সবকিছুই আমি যথাযথভাবে ও নির্দিষ্ট সময়ের জন্যেই সৃষ্টি করেছি। আর যারা অস্বীকার করে

তারা এথেকে মুখ ফিরিয়ে নেয়, যে বিষয়ে তাদেরকে সতর্ক করা হয়েছে।

(৪) বলঃ ঈশ্বর ব্যতীত যাদেরকে তোমরা ডাক তাদের কথা কি ভেবে দেখেছ? আমাকে দেখাও তো তারা পৃথিবীর কি সৃষ্টি করেছে? না কি আকাশ সৃষ্টিতে তাদের কোন অংশীদারিত্ব আছে? তোমরা যদি সত্যবাদী হও তাহলে এর পূর্বের কোন গ্রন্থ অথবা কোন জ্ঞানের নিদর্শন আমার কাছে উপস্থিত করো। (৫) ঐ ব্যক্তির চেয়ে অধিক পথভ্রষ্ট আর কে আছে, যে ঈশ্বরকে ছেড়ে এমন কাউকে ডাকে যে পুনরুত্থান দিবস পর্যন্ত সেই ডাকে সাড়া দিতে অক্ষম। তারা তো এদের ডাক সম্পর্কে অবহিতও নয়। (৬) আর যখন লোকদেরকে একত্রিত করা হবে তখন তারা ওদের শত্রু হয়ে যাবে এবং এদের উপাসনা অস্বীকার করবে।

(৭) যখন আমার সুস্পষ্টবাণী সমূহ তাদেরকে পড়ে শোনানো হয় তখন তাদের কাছে এই সত্য পৌঁছানোর পরেও অস্বীকারকারীরা বলেঃ এতো স্পষ্ট জাদু। (৮) অথবা তারা বলেঃ সে এটা নিজে রচনা করেছে। বলঃ আমি যদি এটা নিজে রচনা করে থাকি তাহলে তোমরা আমাকে ঈশ্বরের শাস্তি হতে ক্ষণিকের জন্যও বাঁচাতে পারবে না। তোমরা যা আলোচনা করছো সে সম্পর্কে ঈশ্বর খুব ভালভাবেই জানেন। তিনি আমার আর তোমাদের মধ্যে সাক্ষী হিসাবে যথেষ্ট। তিনি ক্ষমাশীল ও অতি দয়ালু।

(৯) বলঃ আমি তো পয়গম্বরদের মধ্যে নতুন নই। আমি জানিও না, আমার ও তোমাদের সাথে কি আচরণ করা হবে। আমি তো কেবল সেটাই পালন করি যা প্রত্যাদেশের মাধ্যমে আমার কাছে আসে। আর আমি তো কেবল একজন সতর্ককারী। (১০) বলঃ তোমরা কি কখনও ভেবে দেখেছ, যদি এই কুরআন ঈশ্বরের পক্ষ হতে এসে থাকে আর তোমরা একে অমান্য কর, তাহলে কি হবে? অথচ ইসরাইলের সন্তানদের একজন সাক্ষ্য দেয়

যে পূর্ববর্তী গ্রন্থের মতো এটা সত্য এবং এর উপরে বিশ্বাস স্থাপন করে, আর তোমরা এত দান্তিকযে এটাকে অস্বীকার কর? নিঃসন্দেহে ঈশ্বর অত্যাচারী লোকদেরকে সুপথ দেখান না।

(১১) অবিশ্বাসীরা বিশ্বাসীদের সম্পর্কে বলেঃ এই কুরআন যদি ভাল কিছু হত তাহলে এরা কি আমাদের আগে বিশ্বাস স্থাপন করতো না? যেহেতু তারা এর দ্বারা চালিত হতে অস্বীকার করেছিল, তাই তারা বলেঃ এ এক পুরানো মিথ্যা।

(১২) এর পূর্বে পথ প্রদর্শক ও অনুগ্রহ স্বরূপ ছিল মূসার (মোজেসের) গ্রন্থ আর এই গ্রন্থ তার সমর্থক, আরবী ভাষায়, যাতে অত্যাচারীদের সতর্ক করা যায়, এবং সৎকর্মশীলদের সুসংবাদ দেওয়া যায়। (১৩) নিঃসন্দেহে যারা বলেঃ ঈশ্বর আমাদের প্রভু এবং একথায় দৃঢ় থাকে তাহলে তাদের কোন ভয় নেই আর তারা দুঃখী হবে না। (১৪) এরাই স্বর্গের অধিবাসী, এখানে তারা চিরদিন থাকবে ঐ কাজের প্রতিদান হিসাবে যা তারা পার্থিব জীবনে করত।

(১৫) আর আমি মানুষকে নির্দেশ করেছি তারা যেন পিতা-মাতার প্রতি সদ্যবহার করে। তার মাতা তাকে কষ্ট করে গর্ভে ধারণ করেছে এবং কষ্ট করে তার জন্ম দিয়েছে। তাকে গর্ভে ধারণ ও দুধ ছাড়াতে ত্রিশ মাস সময় লেগেছে। অবশেষে যখন সে বলিষ্ঠতার বয়সে উপনীত হয় এবং চল্লিশ বৎসর আয়ুকালে পৌঁছায় তখন সে বলতে থাকে হে আমার প্রভু! আপনার প্রতি কৃতজ্ঞতা ব্যক্ত করার সামর্থ্য আমাকে দিন, যে কল্যাণ আপনি আমার প্রতি করেছেন আর আমার পিতা-মাতার উপর করেছেন, তার জন্য। আর আমি যেন সেই সৎকাজ করি যাতে আপনি প্রসন্ন হন এবং আমার জন্য আমার সন্তানদেরও সৎকর্মশীলতা দান করুন। আমি আপনার দিকে ফিরে এসেছি, আমি আপনার অনুগত। (১৬) এরাই সেই লোক যাদের সৎকর্ম

আমি গ্রহণ করবো, আর এদের খারাপ কাজগুলো আমি ক্ষমা করবো। এরা স্বর্গের অধিবাসী হবে। তাদেরকে যে প্রতিশ্রুতি দেওয়া হয়েছে তা সত্য।

(১৭) আর যে তার পিতা-মাতাকে বলে ধিক তোমাদেরকে! তোমরা কি আমাকে এই ভয় দেখাও যে, আমাকে আবার কবর থেকে ওঠানো হবে, আমার পূর্বে অনেক প্রজন্ম গত হয়েছে। আর তারা দুজন ঈশ্বরের কাছে ফরিয়াদ করে যে, তোমার সর্বনাশ হোক! তুমি বিশ্বাস স্থাপন করো, নিঃসন্দেহে ঈশ্বরের প্রতিশ্রুতি সত্য। তখন সে বলেঃ এসব আগের লোকদের উপকথা ছাড়া কিছুই নয়। (১৮) এদের পূর্বে যে সব মানব জাতি ও জ্বিন জাতি গত হয়েছে তাদের মত এদের ক্ষেত্রেও ঈশ্বরের কথা সত্য হয়েছে। নিঃসন্দেহে তারা ক্ষতিগ্রস্ত হয়েছে।

(১৯) আর প্রত্যেকের কর্ম অনুযায়ী মর্যাদা হবে। এজন্য যে, ঈশ্বর প্রত্যেকের কর্মের পূর্ণ প্রতিফল দেবেন এবং কারো প্রতি অবিচার হবে না। (২০) আর যে দিন অবজ্ঞাকারীদের নরকের সামনে আনা হবে, (ওদের বলা হবে যে,) তোমরা তোমাদের ভাল জিনিষগুলো পার্থিব জীবনে নিয়ে নিয়েছ এবং সেগুলো উপভোগ করেছ, তাই আজ তোমাদের শাস্তি দেওয়া হবে, এজন্যে যে তোমরা পার্থিব জীবনে অহংকার করতে এবং অস্বীকার করতে।

(২১) আর আদ জাতির ভাইকে (হুদ) স্মরণ করো। যখন সে তার সম্প্রদায়কে আহ্কাফ (বালির ঢিবি) উপত্যকায় সতর্ক করেছিল। এমন সতর্ককারীরা এদের পূর্বে এসেছিল, পরেও এসেছিল। বলেছিলঃ ঈশ্বর ছাড়া কারো উপাসনা করো না। আমি তোমাদের জন্য এক ভয়ানক শাস্তির দিনের আশংকা করি। (২২) তারা বললঃ তুমি কি আমাদের কাছে এজন্য এসেছ যে, আমাদেরকে আমাদের উপাস্য থেকে বিমুখ করবে। যদি তুমি সত্যবাদী হও তাহলে তুমি যে জিনিষের ভয় দেখাচ্ছ তা হাজির কর।

(২৩) সে বললঃ এর জ্ঞান তো রয়েছে ঈশ্বরের কাছে, আর আমি শুধু তোমাদের কাছে সেই বার্তা পৌঁছে দিই যা দিয়ে আমাকে পাঠানো হয়েছে; কিন্তু আমি দেখছি তোমরা অবুঝের ন্যায় কথা-বার্তা বলছো।

(২৪) অতঃপর তারা যখন তাদের উপত্যকার দিকে একটি মেঘ এগিয়ে আসতে দেখল তখন তারা বললঃ এই মেঘ আমাদের জন্য বৃষ্টি বর্ষণ করবে। হুদ বললঃ না, বরং এ হল সেই শাস্তি যা তোমরা তাড়াতাড়ি পেতে চেয়েছ। একটি ঝড় যার মধ্যে আছে কঠিন শাস্তি। (২৫) যা তার প্রভুর আদেশে সব কিছু ধ্বংস করে দেবে। পরে তাদের এমন পরিণতি হয়েছিল যে, তাদের ঘর-বাড়ী ছাড়া আর কিছুই দেখা যায়নি। অপরাধীদের আমি এভাবেই শাস্তি দিয়ে থাকি।

(২৬) তাদেরকে আমি এমন ক্ষমতা দিয়েছিলাম যা তোমাদেরকে দিইনি। তাদেরকে কান, চোখ ও অন্তর দিয়েছিলাম কিন্তু তাদের কান, চোখ কিংবা অন্তর তাদের কোন কাজে আসেনি। কেননা তারা ঈশ্বরের নিদর্শন সমূহ অস্বীকার করত। আর তারা যা নিয়ে ঠাট্টা-বিদ্রূপ করত সেই শাস্তি তাদেরকে আবেষ্টন করল। (২৭) আমি তোমাদের চারপাশের জনপদসমূহ ধ্বংস করে দিয়েছি। আর আমি বার বার আমার নিদর্শনাবলী দেখিয়েছি, যাতে তারা সৎপথে ফিরে আসে। (২৮) তারা যাদেরকে নৈকট্য লাভের জন্য উপাস্য বানিয়ে রেখেছিল তারা তাদেরকে কোন সাহায্য করেনি? বরং তারা তাদের থেকে উধাও হয়ে গেছে। ওটা ছিল ওদের মিথ্যা আর অলীক উদ্ভাবন।

(২৯) যখন আমি তোমার কাছে কুরআন শোনার জন্য জ্বিনদের একটি দলকে তোমার কাছে নিয়ে এসেছিলাম, তারা কুরআন শুনতে লাগল। অতঃপর যখন তারা তার কাছে এল তখন বললঃ সবাই চুপ করে শোন। তারপর যখন

পাঠ সমাপ্ত হল তখন তারা তাদের সম্প্রদায়ের কাছে ফিরে গিয়ে অন্যদেরকে সতর্ক করতে লাগল। (৩০) তারা বললঃ হে আমার সম্প্রদায়! আমরা একটি গ্রন্থ শুনে এসেছি যা মূসার (মোজেসের) পরে অবতীর্ণ হয়েছে। যা সেই ভবিষ্যদ্বাণীসমূহ সমর্থন করে যা ইতিপূর্বে মজুদ ছিল। যা সত্যের দিকে এক সোজা পথের সন্ধান দিচ্ছে। (৩১) হে আমার সম্প্রদায়! ঈশ্বরের দিকে আহ্বানকারীরা আমন্ত্রণ গ্রহণ কর এবং তার উপর বিশ্বাস স্থাপন কর, ঈশ্বর তোমাদের অন্যায় মার্জনা করবেন এবং যন্ত্রণাদায়ক শাস্তি থেকে তোমাদেরকে রক্ষা করবেন। (৩২) আর যে ব্যক্তি ঈশ্বরের দিকে আহ্বানকারীর ডাকে সাড়া দেবে না তারা পৃথিবীতে (ঈশ্বরের শাস্তিকে) পরাজিত করতে পারবে না এবং ঈশ্বর ব্যতীত তাদের কোন সহায়ক ও হবে না। এই ধরনের লোকেরা সুস্পষ্ট বিভ্রান্তির মধ্যে রয়েছে।

(৩৩) ঐ লোকেরা কি দেখেনি যে, যে ঈশ্বর আকাশ ও পৃথিবী সৃষ্টি করেছেন এবং এসব সৃষ্টি করতে ক্লান্তি বোধ করেন নি, তিনি মৃতদেরকে জীবিত করতে সক্ষম। হ্যাঁ অবশ্যই তিনি সবকিছুই করার ক্ষমতা রাখেন। (৩৪) আর যে দিন এই অস্বীকারকারীদের নরকের সামনে হাজির করা হবে (তাদের বলা হবে) এটা কি বাস্তব নয়? তারা বলবেঃ হ্যাঁ, আমাদের প্রভুর শপথ। বলা হবে : তাহলে শাস্তি আন্বাদন করো, কারণ তোমরা অস্বীকার করতে।

(৩৫) অতএব তুমি ধৈর্য ধারণ করো যেমন সাহসী পয়গম্বরগণ ধৈর্য ধারণ করেছিল। আর তাদের জন্য তাড়াতাড়ি করো না যে দিন তারা সেই জিনিষ দেখতে পাবে, যে জন্য তাদেরকে সতর্ক করা হয়েছে। তখন তাদের মনে হবে, তারা যেন এক মুহূর্তের বেশী পৃথিবীতে অবস্থান করে নি। এই বাণী পৌঁছে দেওয়া তোমার দায়িত্ব। অবাধ্য সম্প্রদায় অবশ্যই ধ্বংস হবে।

অধ্যায় ৪৭ : মুহাম্মাদ (মুহাম্মাদ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) যারা অস্বীকার করে ও ঈশ্বরের পথে বাধা সৃষ্টি করে, ঈশ্বর তাদের কর্মসমূহ ব্যর্থ করে দেন। (২) আর যারা বিশ্বাস স্থাপন করে এবং সৎকাজ করে আর ঐ সব মেনে নেয় যা মুহাম্মাদের উপর অবতীর্ণ করা হয়েছে যা তার প্রভুর পক্ষ থেকে প্রেরিত সত্য - ঈশ্বর তাদের মন্দগুলি তাদের থেকে দূর করেন এবং তাদের অবস্থা শুধরে দেন। (৩) এজন্য যে, যারা অস্বীকার করে তারা অসত্যের অনুসরণ করে। যারা বিশ্বাস স্থাপন করে তারা সত্যের অনুসরণ করে যা তার প্রভুর পক্ষ থেকে এসেছে; এভাবেই মানুষের জন্য তাদের উদাহরণ পেশ করেন।

(৪) অতএব অস্বীকারকারীদের সঙ্গে যখন তোমরা যুদ্ধে অবতীর্ণ হও, তখন তাদের ঘাড়ে আঘাত করো। অবশেষে যখন তাদেরকে পূর্ণরূপে পরাস্ত কর, তখন তাদেরকে শক্ত করে বাঁধো।^১ অতঃপর হয় তাদের প্রতিঅনুগ্রহ কর, না হয় তাদের থেকে মুক্তিপণ গ্রহণ কর। যতক্ষণ তারা আত্মসমর্পণ না করে, ততক্ষণ যুদ্ধ চালিয়ে যাও। এটাই বিধান। ঈশ্বর যদি চাইতেন তাহলে তিনি তাদেরকে শাস্তি দিতেন, কিন্তু ঈশ্বর তোমাদের একজনকে অন্যের দ্বারা পরীক্ষা করতে চান। যারা ঈশ্বরের পথে নিহত হয়, ঈশ্বর তাদের কর্ম বিনষ্ট হতে দেন না। (৫) তিনি তাদেরকে সৎপথ প্রদর্শন করবেন এবং তাদের অবস্থা শুধরে দেবেন। (৬) এবং তাদেরকে স্বর্গে প্রবেশ করাবেন, যার কথা তিনি তাদেরকে জানিয়ে দিয়েছেন।

(৭) হে বিশ্বাসীগণ! যদি তোমরা ঈশ্বরকে সহায়তা করো তাহলে

^১ বিঃ দ্রঃ- (৪৭ : ০৪) পরিচয় অংশে ১৩ থেকে ১৫ পৃষ্ঠা দ্রষ্টব্য)

ঈশ্বরও তোমাদের সহায়তা করবেন এবং তোমাদের পা সুদৃঢ় করবেন। (৮) আর যারা অস্বীকার করে তাদের জন্য দুর্গতি রয়েছে এবং ঈশ্বর তাদের কর্ম নষ্ট করে দেবেন। (৯) এই কারণে যে, ঈশ্বর যা অবতীর্ণ করেছেন তারা তা পছন্দ করেনি। তাই ঈশ্বর তাদের কর্ম নিষ্ফল করে দেবেন। (১০) এরা কি দেশের মধ্যে চলা-ফেরা করেনি এবং দেখেনি যে, তাদের পূর্ববর্তীদের পরিণতি কি হয়েছিল? ঈশ্বর তাদের সমূলে বিনষ্ট করে দিয়েছেন। এটাই অস্বীকারকারীদের জন্য পূর্বনির্ধারিত। (১১) এজন্য যে, ঈশ্বর বিশ্বাসীদের সংরক্ষক আর অবিশ্বাসীদের কোন সংরক্ষক নেই।

(১২) নিঃসন্দেহে যারা সত্যে বিশ্বাস স্থাপনকারী ও সৎকর্মশীল ঈশ্বর তাদের এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে। যারা অস্বীকার করে, পার্থিব ভোগবিলাসে মত্ত থাকে এবং গবাদী পশুদের মতো আহার করে, নরকই হচ্ছে ওদের ঠিকানা। (১৩) তোমার যে জনপদ হতে তোমাকে বিতাড়িত করেছে তার চেয়ে অধিক শক্তিশালী কত জনপদ ছিল, আমি তাদেরকে ধ্বংস করে দিয়েছি। তাদেরকে কেউ বাঁচাতে পারে নি।

(১৪) অতএব যে, তার প্রভুর কাছ থেকে আগত স্পষ্ট প্রমাণের উপর প্রতিষ্ঠিত রয়েছে, সে কি তার মত, যার কাছে তার নিজের খারাপ কাজ সুন্দর বলে প্রতীয়মান হয় এবং যে নিজের প্রবৃত্তির অনুসরণ করে? (১৫) সদাসতর্ক ব্যক্তিদের জন্য যে স্বর্গের প্রতিশ্রুতি দেওয়া হয়েছে, তার বর্ণনা এমন সেখানে যে নদী থাকবে তার জল সর্বদা নির্মল, যে দুধের নদী থাকবে তার স্বাদ কখনও পরিবর্তন হবে না, যে সুরার নদী থাকবে তা পানকারীদের জন্য সুস্বাদু হবে এবং থাকবে স্বচ্ছ মধুর নদী। তাদের জন্য ওখানে প্রত্যেক প্রকারের ফল থাকবে। আর তাদের প্রভুর পক্ষ থেকে থাকবে ক্ষমা। এরা কি

ওদের মত হবে যারা চিরকাল নরকে থাকবে? যাদেরকে ফুটন্ত গরম জল পান করতে দেওয়া হবে, যা তাদের নাড়ী-ভুঁড়ি ছিন্ন বিচ্ছিন্ন করে দেবে।

(১৬) ওদের মধ্যে কিছু লোক এমন আছে যারা তোমার কথায় কান পাতে। অতঃপর যখন তোমার কাছ থেকে বের হয় তখন যাদেরকে জ্ঞান দান করা হয়েছে তাদেরকে জিজ্ঞাসা করে এইমাত্র উনি কি বললেন? এই সেই লোকেরা যাদের অন্তরে মোহর করে দেওয়া হয়েছে। আর এরাই নিজের প্রবৃত্তির অনুসরণ করে। (১৭) আর যারা সৎপথ প্রাপ্ত হয়েছে ঈশ্বর তাদের পথ সুগম করেছেন এবং তাদেরকে ঈশ্বর নির্ভরতা প্রদান করেন।

(১৮) এরা তো কেবল এই প্রতীক্ষায় আছে যে, অকস্মাৎ প্রলয় দিবস তাদের উপর এসে পড়ে। তবে তার লক্ষণ সমূহ তো এসেই গেছে। যখন তা এসে পড়বে তখন এদের জন্য উপদেশ প্রাপ্তির অবসর কোথায় থাকবে? (১৯) অতএব জেনে রেখো, ঈশ্বর ছাড়া কোনই উপাস্য নেই, আর নিজেদের এবং বিশ্বাসী নারী পুরুষদের জন্য ক্ষমা প্রার্থনা করো। ঈশ্বর তোমাদের গতিবিধি ও ঠিকানা সম্বন্ধে সম্যক অবগত।

(২০) যারা বিশ্বাস স্থাপন করেছে তারা বলেঃ কোন অনুচ্ছেদ অবতীর্ণ করা হয় না কেন? তাই যখন কোন স্পষ্ট অনুচ্ছেদ অবতীর্ণ করা হয় আর তাতে যুদ্ধের উল্লেখ থাকে। তখন তুমি দেখবে যে, যাদের অন্তরে ব্যাধি আছে, তারা তোমার দিকে এমন তাকাচ্ছে যেন তারা মৃত্যু পথযাত্রী। অতএব বড় দূর্ভোগ তাদের জন্য। (২১) নির্দেশ পালন আর উত্তম কথন, তাদের জন্য উত্তম ছিল। অতএব বিষয়টি যখন চূড়ান্ত হবে তখন যদি তারা ঈশ্বরের প্রতি প্রদত্ত অঙ্গীকার পালন করত তাহলে তাদের জন্য ভাল হত। (২২) অতএব যদি ক্ষমতা লাভ কর, তাহলে সম্ভবতঃ তোমরা পৃথিবীতে বিশৃঙ্খলা সৃষ্টি করবে আর নিজেদের সম্পর্ক ছিন্ন করবে। (২৩) এই সেই লোকেরা যাদেরকে ঈশ্বর প্রত্যাখ্যান করেছেন। অতএব এদেরকে বধির করেছেন

এবং এদের চোখ অন্ধ করে দিয়েছেন।

(২৪) তবে কি এরা কুরআন সম্পর্কে চিন্তা করে না? না কি এদের অন্তরে তালা লাগানো আছে? (২৫) যারা পৃষ্ঠ প্রদর্শন করে চলে গেছে সুপথ স্পষ্ট হওয়ার পরেও, শয়তান তাদেরকে বিভ্রান্ত করে দিয়েছে আর ঈশ্বর তাদের অবকাশ দিয়েছেন। (২৬) এটা এজন্য যে, যারা ঈশ্বরের অবতীর্ণ গ্রন্থ অপছন্দ করে তাদেরকে এরা বলেছে - আমরা কিছু কিছু বিষয়ে তোমাদের কথা মেনে চলব। তবে ঈশ্বর এদের গোপন অভিসন্ধি অবগত আছেন। (২৭) তবে তখন কি হবে যখন দেবদূতরা ওদের মুখমণ্ডল ও পৃষ্ঠদেশে আঘাত করতে করতে প্রাণ হরণ করবে। (২৮) এজন্য যে, ওরা এমন সব জিনিষের অনুসরণ করেছে যা ঈশ্বরকে ক্রোধান্বিত করে আর তারা তাঁর প্রসন্নতাকে অপছন্দ করেছে। তাই ঈশ্বর তাদের কর্ম নিষ্ফল করে দিয়েছেন।

(২৯) যাদের অন্তরে ব্যাধি রয়েছে তারা কি মনে করে যে, ঈশ্বর তাদের বিদ্বেষ কখনও প্রকাশ করবেন না? (৩০) আমি যদি চাইতাম তাহলে তোমাকে অবশ্যই দেখিয়ে দিতাম। তখন তুমি তাদের চিহ্ন দেখেই তাদেরকে চিনতে পারবে, তবে তাদের বাকশৈলিতে তাদেরকে চিনে নেবে। আর ঈশ্বর তোমাদের কর্মসমূহ অবগত আছেন।

(৩১) আর আমি অবশ্যই তোমাদেরকে পরীক্ষা করবো, যাতে আমি ঐ লোকদের জেনে নিতে পারি তোমাদের মধ্যে কে সংগ্রাম করতে চায় এবং কে ধৈর্য ধারণ করতে পারে, আর তোমাদের প্রতিক্রিয়া যাচাই করি। (৩২) স্পষ্ট সত্য আসার পরেও যারা অস্বীকার করেছে এবং ঈশ্বরের পথে বাধা সৃষ্টি করেছে আর পয়গম্বরের বিরোধিতা করেছে; তারা ঈশ্বরের কোন ক্ষতি করতে পারবে না; বরং তিনি তাদের কর্মসমূহ নিষ্ফল করে দেবেন।

(৩৩) হে বিশ্বাসীগণ! তোমরা ঈশ্বর ও পয়গম্বরের নির্দেশ পালন কর এবং তোমাদের কর্মসমূহ বিনষ্ট করো না। (৩৪) নিশ্চয় যারা অস্বীকার করে

আর ঈশ্বরের পথে বাধা দেয় আর অস্বীকারকারী অবস্থায় মারা যায়, ঈশ্বর কখনই তাদের ক্ষমা করবেন না। (৩৫) অতএব তোমরা হীনবলা হয়ো না এবং শাস্তি-চুক্তির আবেদন করো না, তোমরাই প্রভাবশীল থাকবে। ঈশ্বর তোমাদের সাথে আছেন আর তিনি কখনই তোমাদের কর্ম ক্ষুন্ন করবেন না।

(৩৬) পার্থিব জীবন তো কেবল ক্রীড়া কৌতুক ছাড়া কিছু নয়। যদি তোমরা বিশ্বাস স্থাপন করো আর ঈশ্বরকে ভয় করো তাহলে ঈশ্বর তোমাদেরকে তার প্রতিফল প্রদান করবেন। আর তিনি তোমাদের কাছে তোমাদের সম্পদ চাইবেন না। (৩৭) তিনি যদি তোমাদের কাছে তোমাদের সম্পদ চান এবং শেষ পর্যন্ত চাইতেই থাকেন তাহলে তোমরা কার্পণ্য করবে, আর ঈশ্বর তোমাদের মনের বক্রতা প্রকাশ করে দেবেন। (৩৮) দেখো, তোমরাই তো তারা, যাদেরকে ঈশ্বরের পথে খরচ করার জন্য বলা হচ্ছে, তবে তোমাদের মধ্যে কিছু লোক আছে যারা কৃপণতা করে। যে কৃপণতা করছে সে তো নিজের প্রতিই কৃপণতা করছে। আর ঈশ্বর অভাবমুক্ত এবং তোমরা অভাবগ্রস্ত। তোমরা যদি বিমুখ হও তাহলে ঈশ্বর অন্য সম্প্রদায়কে তোমাদের স্থলাভিষিক্ত করবেন এবং তারা তোমাদের মত হবে না।

অধ্যায় ৪৮ : আল - ফাত্‌হ (বিজয়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) নিঃসন্দেহে আমি তোমাকে স্পষ্ট বিজয় দিয়েছি। (২) যেন ঈশ্বর তোমাকে তোমার অতীত ও বর্তমান ক্রটিসমূহ ক্ষমা করে দেন, তোমার প্রতি তার অনুকম্পা পূর্ণ করে দেন এবং তোমাকে সরল পথ দেখান। (৩) আর তোমাকে দৃঢ় সমর্থন দান করেন।

(৪) তিনিই বিশ্বাসীদের অন্তরে প্রশান্তি দান করেছেন, যাতে তাদের

বিশ্বাসের সাথে আরও বিশ্বাস বৃদ্ধি পায়। আকাশ ও পৃথিবীর বাহিনীগুলি ঈশ্বরেরই। ঈশ্বর মহাজ্ঞানী, অসীম প্রজ্ঞাবান। (৫) যাতে তিনি বিশ্বাসী পুরুষ ও বিশ্বাসী নারীদেরকে এমন উদ্যানে প্রবেশ করিয়ে দেন যার পাদদেশ দিয়ে নদী প্রবাহিত। তারা সেখানে চিরকাল থাকবে। আর তিনি তাদের পাপ সমূহ মোচন করবেন। এটাই ঈশ্বরের নিকট বড় সফলতা। (৬) আর যাতে ঈশ্বর কপটচারী পুরুষ আর কপটচারী মহিলাদের এবং অংশীবাদী পুরুষ ও অংশীবাদী মহিলাদের শাস্তি দেন যারা ঈশ্বর সম্পর্কে খারাপ ধারণা পোষণ করে। অমঙ্গল চক্র ওদের জন্য। ওদের উপরেই ঈশ্বরের ক্রোধ আর ওদের উপরেই ঈশ্বরের অভিসম্পাত। আর ওদের জন্যই তিনি নরক প্রস্তুত করে রেখেছেন এবং তা খুবই নিকৃষ্ট ঠিকানা। (৭) আকাশ ও পৃথিবীর বাহিনীগুলি তাঁরই। ঈশ্বর পরাক্রমশালী, প্রজ্ঞাবান।

(৮) নিঃসন্দেহে আমি তোমাকে সাক্ষীরূপে, সুসংবাদদাতা ও সতর্ককারীরূপে পাঠিয়েছি। (৯) যাতে তোমরা ঈশ্বর ও তাঁর বার্তাবাহকের উপর বিশ্বাস স্থাপন করো এবং তাকে সহায়তা করো আর তার সম্মান করো এবং তোমরা সকাল ও সন্ধ্যায় ঈশ্বরের স্তুতি করো। (১০) যারা তোমার কাছে প্রতিজ্ঞা করে তারা আসলে ঈশ্বরের কাছেই প্রতিজ্ঞা করে। তাদের হাতের উপর ঈশ্বরের হাত। আর যে ব্যক্তি প্রতিজ্ঞা ভঙ্গ করে তার দায় সেই বহন করবে। আর যে ঈশ্বরের নিকট তার অঙ্গীকার পূর্ণ করে, তিনি অবশ্যই তাকে মহাপুরস্কার দেবেন।

(১১) যে সব মরুভূমির পিছনে রয়ে গেছে তারা এখন তোমাকে বলবে, আমাদের ধন সম্পদ আর আমাদের সম্ভান-সমৃদ্ধিরা আমাদেরকে ব্যস্ত রেখেছিল, অতএব আপনি আমাদের জন্য ক্ষমা প্রার্থনা করুন। তারা মুখে যে কথা বলছে তাদের অন্তরে সে কথা নেই। তুমি বলঃ কে আছে

যে ঈশ্বরের নিকট তোমাদের ব্যাপারে হস্তক্ষেপ করতে পারে, যদি ঈশ্বর তোমাদের কোন ক্ষতি বা উপকার করতে চান? বরং তোমরা যা করছো ঈশ্বর তা ভালভাবেই জানেন। (১২) বরং তোমরা মনে করেছিলে যে, পয়গম্বর ও বিশ্বাসীগণ কখনই তাদের পরিবার-পরিজনদের কাছে ফিরে আসবে না এবং এই ধারণা তোমাদের অন্তরে প্রীতিকর মনে হয়েছিল। তোমরা খুব খারাপ ধারণা পোষণ করেছিলে। আর তোমরা ছিলে এক ধ্বংসমুখ সম্প্রদায়। (১৩) আর যারা ঈশ্বর ও পয়গম্বরকে বিশ্বাস করল না, তাদের জন্য আমি জ্বলন্ত আগুন প্রস্তুত করে রেখেছি। (১৪) আকাশ ও পৃথিবীর রাজত্ব ঈশ্বরেরই, তিনি যাকে ইচ্ছা ক্ষমা করেন এবং যাকে ইচ্ছা শাস্তি দেন। আর ঈশ্বর ক্ষমাশীল, দয়ালু।

(১৫) যখন তোমরা যুদ্ধলব্ধ সম্পদ সংগ্রহের জন্য যাবে তখন যারা পিছনে রয়ে গিয়েছিল তারা বলবেঃ আমাদেরকেও তোমাদের সাথে যেতে দাও। তারা ঈশ্বরের প্রতিশ্রুতি পরিবর্তন করে দিতে চায়। বলঃ তোমরা কখনই আমাদের সাথে যেতে পারবে না। এমনটি ঈশ্বর আগেই বলেছেন, তখন তারা বলবেঃ তোমরা আমাদেরকে হিংসা করছো; বরং তারা খুব কমই বোঝে।

(১৬) পিছনে রয়ে যাওয়া মরুবাসীদের বলঃ শিঘ্রই তোমাদেরকে এক প্রবল পরাক্রান্ত জাতির সাথে লড়াই করবার জন্য ডাকা হবে। তোমরা তাদের বিরুদ্ধে লড়াই করবে যতক্ষণ না তারা আত্মসমর্পণ করে। সুতরাং তোমরা যদি এ নির্দেশ পালন করো তাহলে ঈশ্বর তোমাদেরকে উত্তম পুরস্কার প্রদান করবেন। আর যদি তোমরা মুখ ফিরিয়ে নাও, যেভাবে ইতি পূর্বে তোমরা মুখ ফিরিয়ে নিয়েছিলে তাহলে তিনি তোমাদেরকে কষ্টদায়ক যন্ত্রণা দেবেন। (১৭) অন্ধ, পঙ্গু এবং অসুস্থ ব্যক্তির জন্য কোন অপরাধ হবে

না। আর যে ব্যক্তি ঈশ্বর ও বার্তাবাহকের আনুগত্য করবে, তাকে ঈশ্বর এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে। আর যে ব্যক্তি মুখ ফিরিয়ে নেবে তাকে তিনি যন্ত্রণাদায়ক শাস্তি প্রদান করবেন।

(১৮) ঈশ্বর সত্যে বিশ্বাস স্থাপনকারীগণের প্রতি সন্তুষ্ট হয়েছেন যখন তারা গাছের নিচে আনুগত্যের শপথ করছিল, ঈশ্বর তাদের মনের কথা জেনে নিলেন। অতএব তিনি তাদের উপর প্রশান্তি অবতীর্ণ করেন এবং তাদের পুরস্কার স্বরূপ তাদেরকে দেন আসন্ন বিজয়। (১৯) আর অনেক যুদ্ধলব্ধ সম্পদ যা তারা প্রাপ্ত হবে। আর ঈশ্বর মহাপরাক্রমশালী, অসীম প্রজ্ঞাবান। (২০) আর ঈশ্বর তোমাদেরকে অনেক যুদ্ধলব্ধ সম্পদের প্রতিশ্রুতি দিয়েছেন যা তোমরা দখল করবে। তিনি এগুলো তোমাদের জন্য ত্বরান্বিত করবেন। লোকদের হাতকে তোমাদের অনিষ্ট সাধন থেকে বিরত রেখেছেন, যাতে তা সত্যে বিশ্বাস স্থাপনকারীগণের জন্য একটা নিদর্শন হয়ে যায় এবং তিনি তোমাদেরকে সঠিক পথে পরিচালিত করেন। (২১) আরও বিজয় আছে যা তোমরা এখনও লাভ করতে সামর্থ্য হও নাই। ঈশ্বর তা (তোমাদের জন্য) বেঁটন করে আছেন। ঈশ্বর সবকিছু করতে সক্ষম।

(২২) আর এই অস্বীকারকারীরা যদি তোমার সাথে লড়াই করত তাহলে তারা অবশ্যই পিছন ফিরে পালাত। আর তারা কোন সাহায্যকারী বা অভিভাবক পেত না। (২৩) এটাই ঈশ্বরের নিয়ম যা প্রথম থেকেই চলে আসছে এবং তোমরা ঈশ্বরের নিয়মে কোন পরিবর্তন দেখতে পাবে না। (২৪) আর তিনিই, যিনি মক্কা উপত্যকায় তাদের হাত তোমাদের উপর থেকে এবং তোমাদের হাত তাদের উপর থেকে নিবৃত্ত করে রেখেছেন, তাদেরকে তোমাদের নিয়ন্ত্রনাধীন করার পর। আর ঈশ্বর তোমাদের কর্মসমূহ দেখেছেন।

(২৫) এরাই অস্বীকার করেছিল এবং তোমাকে পবিত্র মসজিদে (কাবায়)

প্রবেশে বাধা দিয়েছিল এবং উৎসর্গের পশুগুলোকে নির্ধারিত স্থানে নিয়ে যেতে বাধা দিয়েছিল। (ঈশ্বর তাদের বিরুদ্ধে যুদ্ধের আদেশ দিতেন) যদি (মক্কায়) কিছু সংখ্যক বিশ্বাসী পুরুষ এবং বিশ্বাসী নারী না থাকত, যাদেরকে তোমরা অজ্ঞানতবশতঃ পদ পিষ্ট করে দিতে এবং যার ফলে তোমরা নিজেদের অজান্তে হয়তো দোষী বলে সাব্যস্ত হতে। (কিন্তু তিনি আদেশ দিলেন না) যাতে ঈশ্বর যাকে ইচ্ছা তার অনুগ্রহাধীন করতে পারেন। আর যদি তারা পৃথক থাকত তাহলে তাদের মধ্য থেকে অস্বীকারকারীদের আমি কঠিন শাস্তি দিতাম।

(২৬) যখন অস্বীকারকারীরা তাদের অন্তরে অজ্ঞতায়ুগের অহমিকা-পোষণ করত, তখন ঈশ্বর তার বার্তাবাহক ও বিশ্বাসীদের অন্তরে স্বীয় প্রশান্তি অবতীর্ণ করেন এং তাদেরকে সত্যনিষ্ঠার বাণীতে অটল রাখেন। আর তারাই এর অধিকতর যোগ্য ও উপযুক্ত ছিল। ঈশ্বর সবকিছুই ভালোভাবে জানেন।

(২৭) নিঃসন্দেহে ঈশ্বর তাঁর বার্তাবাহককে সত্য স্বপ্নই দেখিয়েছেন যা বাস্তবসম্মত। নিঃসন্দেহে ঈশ্বর চাইলে তুমি অবশ্যই পবিত্র মসজিদে প্রবেশ করবে নিরাপদে। মস্তক মুগুন করে, চুল ছেঁটে, তোমার কোন ভয় থাকবে না। ঈশ্বর যে কথা জানেন তোমরা তা জানো না। অতএব এর পূর্বেই ঈশ্বর এক বিজয় দিয়ে দিয়েছেন।

(২৮) আর ঈশ্বরই তাঁর বার্তাবাহককে পথ-নির্দেশ ও সত্যধর্মই পাঠিয়েছেন; এজন্য যে তিনি একে সব ধর্মের উপর বিজয়ী করবেন। আর সাক্ষী হিসাবে ঈশ্বরই যথেষ্ট।

(২৯) মুহাম্মদ ঈশ্বরের বার্তাবাহক, আর তার সঙ্গীরা অবিশ্বাসীদের প্রতি কঠোর এবং নিজেরা পরস্পরের প্রতি সহানুভূতিশীল। তুমি তাদের অবনত অবস্থায় এবং সিজদা (প্রণত) অবস্থায় দেখবে। তারা ঈশ্বরের কৃপা এবং তাঁর

প্রসন্নতার জন্য সদা ব্যস্ত থাকতে দেখবে। তাদের চিহ্ন তাদের কপালে সিজদাজনিত কারণে। তাদের বর্ণনা তৌরাত (তোরাহ) গ্রন্থে আছে। আর ইঞ্জীল (বাইবেল) গ্রন্থে তাদের বর্ণনা এই যে, যেমন একটি বীজ, সে তার অঙ্কুর বার করে এবং অঙ্কুরটি ক্রমে শক্ত হয় তারপর তা আরো মোটা হয় এবং নিজের কাণ্ডের উপর সোজা হয়ে দাঁড়ায়, যা বপনকারীদের মুগ্ধ করে। যাতে তিনি তাদের দ্বারা অস্বীকারকারীদের অন্তরজ্বালা সৃষ্টি করেন। ওদের মধ্যে যারা বিশ্বাস স্থাপন করে আর ভালকাজ করে, ঈশ্বর তাদেরকে ক্ষমা ও বড় পুরস্কারের প্রতিশ্রুতি দিয়েছেন।

অধ্যায় ৪৯ : আল - হুজুরাত (কামরা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে বিশ্বাসীগণ! তোমরা ঈশ্বর ও তাঁর বার্তাবাহককে অতিক্রম করে যেওনা, আর ঈশ্বরকে ভয় করো। নিঃসন্দেহে ঈশ্বর সবকিছু শোনেন, সবকিছু জানেন।

(২) হে বিশ্বাসীগণ! তোমরা পয়গম্বরের কণ্ঠস্বরের চেয়ে তোমাদের কণ্ঠস্বর উঁচু করো না এবং নিজেরা একে অন্যের সাথে যেভাবে জোরে কথা বলো সেভাবে তার সাথে জোরে কথা বলো না, পাছে তোমাদের অজান্তে তোমাদের কর্ম নিষ্ফল হয়ে যায়। আর ঈশ্বরকে ভয় করো, নিঃসন্দেহে ঈশ্বর সবকিছু জানেন, সবকিছু শোনেন। (৩) যারা ঈশ্বরের বার্তাবাহকের সামনে নিজেদের কণ্ঠস্বর নিচু রাখে, ঈশ্বর তাদের অন্তরকে ঈশ্বরভীরুতার (শিষ্ঠাচারের) জন্য শোধিত করেছেন। ওদের জন্য রয়েছে ক্ষমা আর বড় পুরস্কার। (৪) যারা তোমাকে ঘরের বাইরে থেকে ডাকাডাকি করে তাদের অধিকাংশের বুদ্ধি নেই। (৫) তুমি বের হয়ে তাদের কাছে আসা পর্যন্ত তারা যদি ধৈর্য ধরত,

তাহলে সেটাই তাদের জন্য মঙ্গলজনক হত। ঈশ্বর ক্ষমাশীল, দয়াবান। (৬) হে বিশ্বাসীগণ! যদি কোন অস্বীকারকারী তোমাদের কাছে কোন সংবাদ নিয়ে আসে তাহলে তোমরা তা ভাল ভাবে যাচাই করে নেবে, এমন যেন না হয় যে তোমরা অজ্ঞতাবশতঃ কোন সম্প্রদায়কে ক্ষতি করে ফেল, আর তোমাদের কৃতকর্মের জন্য তোমাদেরকে পরিতাপ করতে হয়। (৭) আর জেনে রাখো তোমাদের মধ্যে ঈশ্বরের বার্তাবাহক আছেন। অনেক ব্যাপারে সে যদি তোমাদের কথা মেনে নিত, তাহলে তোমরাই কষ্ট পেতে; কিন্তু ঈশ্বর তোমাদের জন্য বিশ্বাস স্থাপনকে প্রিয় বানিয়ে দিয়েছেন, আর তোমাদের অন্তরে সেটিকে সুশোভিত করেছেন। আর ঈশ্বরকে অস্বীকার, অবাধ্যতা এবং পাপাচারকে তোমাদের জন্য অপ্রিয় বানিয়ে দিয়েছেন। ওরাই সৎপথ অবলম্বনকারী। (৮) এটা ঈশ্বরের করুণা ও অনুগ্রহ; আর ঈশ্বর সর্বজ্ঞ, প্রজ্ঞাময়।

(৯) আর বিশ্বাসীদের দুটি দল যদি পরস্পরের সাথে বিবাদ করে তাহলে তাদের মধ্যে মীমাংসা করে দাও; তবুও যদি একদল আরেক দলের উপর অত্যাচার করে তাহলে অত্যাচারী দলের বিরুদ্ধে লড়াই করো, যতক্ষণ না তারা ঈশ্বরের নির্দেশের দিকে ফিরে আসে। (১০) বিশ্বাসীরা সবাই ভাই ভাই। অতএব তোমার ভাইদের একে অপরের সাথে মিলিয়ে দাও এবং ঈশ্বরকে ভয় করো, যাতে তোমাদের উপর অনুগ্রহ করা হয়।

(১১) হে বিশ্বাসীগণ! কোন পুরুষ যেন অপর পুরুষকে উপহাস না করে, কেননা তারা তাদের চেয়ে উত্তম হতে পারে। আর কোন মহিলা যেন অপর মহিলাকে উপহাস না করে, কেননা সে তাদের চেয়ে উত্তম হতে পারে। আর একে অপরকে ব্যাঙ্গ করো না আর পরস্পরকে খারাপ উপাধিতে সম্বোধিত করো না। বিশ্বাস স্থাপন করার পর মন্দ নামে ডাকা

খুবই খারাপ। আর যারা এগুলো বন্ধ না করে তারাই অত্যাচারী।

(১২) হে বিশ্বাসীগণ! তোমরা অধিকাংশ অনুমান করা থেকে বিরত থাকো, কেননা কোন কোন অনুমান পাপ এবং তোমরা একে ওপরের দোষ ত্রুটি অনুসন্ধান করো না এবং কারো পশ্চাতে নিন্দা করো না। তোমাদের মধ্যে কেউ কি তার মৃত ভাই এর মাংস আহার করা পছন্দ করবে? না, বরং তোমরা তা ঘৃণা করো। ঈশ্বরকে ভয় করো। নিঃসন্দেহে ঈশ্বর ক্ষমাশীল ও অতি দয়ালু।

(১৩) হে মানুষ! আমি তোমাদেরকে একজন পুরুষ ও একজন নারী থেকে সৃষ্টি করেছি এবং তোমাদেরকে বিভিন্ন জাতি এবং পরিবারে বিভক্ত করেছি, যাতে তোমরা একে অপরের সাথে পরিচিত হতে পারো। নিঃসন্দেহে ঈশ্বরের নিকট অধিক সম্মানীয় সে, যে সবচেয়ে অধিক ঈশ্বরকে ভয় করে। নিঃসন্দেহে ঈশ্বর মহাজ্ঞানী, সর্বজ্ঞ।

(১৪) মরুবাসীরা বলেঃ আমরা বিশ্বাস স্থাপন করেছি, বলঃ তোমরা বিশ্বাস স্থাপন করো নি; বরং এভাবে বলঃ যে, আমরা আত্মসমর্পণ করেছি এবং এখনও পর্যন্ত বিশ্বাস স্থাপন তোমাদের হৃদয়ে প্রবেশ করেনি। আর যদি তোমরা ঈশ্বর ও তাঁর বার্তাবাহকের আনুগত্য করো তাহলে তিনি তোমাদের কর্মের কিছুই কমাবেন না। নিঃসন্দেহে ঈশ্বর পরম ক্ষমাশীল, অসীম দয়ালু।

(১৫) আস্থাবান তো কেবল সে, যে ঈশ্বর ও তাঁর বার্তাবাহককে বিশ্বাস করে সন্দেহাতীত ভাবে, আর নিজের সম্পদ ও জীবন দিয়ে ঈশ্বরের পথে কঠোর সংগ্রাম করে। এরাই সত্যবাদী।

(১৬) বলঃ তোমরা কি তোমাদের ধর্মপরায়ণতা সম্পর্কে ঈশ্বরকে অবহিত করছো? ঈশ্বর জানেন যা কিছু আকাশে ও পৃথিবীতে আছে আর ঈশ্বর সর্বজ্ঞ।

(১৭) এরা মনে করে ইসলাম গ্রহণ করে এরা তোমার প্রতি অনুগ্রহ

করেছে। বলঃ তোমাদের ইসলাম গ্রহণ করাকে তোমরা আমার প্রতি অনুগ্রহ মনে করো না; বরং তোমাদেরকে ঈমানের (বিশ্বাস স্থাপনের) পথ দেখিয়ে ঈশ্বরই তোমাদের প্রতি অনুগ্রহ করেছেন। যদি তোমরা সত্যবাদী হও। (১৮) নিঃসন্দেহে ঈশ্বর আকাশ ও ধরণীর অদৃশ্য বিষয় জানেন। আর তোমরা যা কিছু কর ঈশ্বর সবই দেখেন।

অধ্যায় ৫০ : ক্বাফ (ক্বাফ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ক্বাফ। গৌরবময় কুরআনের শপথ। (২) বরং তারা অবাক হয়েছে যে, তাদের কাছে তাদেরই মধ্য থেকে একজন সতর্ককারী এসেছে। অস্বীকারকারীরা বলেঃ এতো এক আশ্চর্যের বিষয়। (৩) আমরা মরার পরে মাটি হয়ে গেলেও পুনরুজ্জীবিত হব, সে তো অনেক দূরের কথা। (৪) মাটি তাদের কতটুকু ক্ষয় করবে তা আমার জানা আছে, তাছাড়া আমাদের কাছে এক সংরক্ষিত গ্রন্থ তো আছেই। (৫) বরং সত্য যখন তাদের কাছে এল তখন তারা তা অস্বীকার করল। সুতরাং তারা সংশয়ের মধ্যেই পড়ে আছে।

(৬) তবে কি এই লোকেরা তাদের মাথার উপরের আকাশটা দেখেনি? আমি কিভাবে ওটা নির্মাণ করেছি এবং ওর সৌন্দর্য প্রদান করেছি এবং ওটাকে কত নিখুঁত করেছি। (৭) আর ধরণীকে আমি বিস্তৃত করেছি এবং তাতে পর্বত স্থাপন করেছি ও সবরকম মনোরম গাছপালা উৎপন্ন করেছি। (৮) প্রত্যেক নিবেদিত বান্দার জন্য শিক্ষা ও উপদেশ স্বরূপ। (৯) আর আমি আকাশ থেকে কল্যাণময় বৃষ্টি বর্ষণ করেছি। অতঃপর ওর সাহায্যে বাগ-বাগিচা এবং কর্তন করা যায় এমন ফসল উৎপন্ন করেছি। (১০) আর

সুউচ্চ খেজুরগাছ যাতে স্তরে স্তরে সাজানো খেজুর। (১১) মানুষের জীবিকার জন্য; আর ওর মাধ্যমে আমি মৃত ভূমিকে জীবিত করি। এভাবেই পুনরুত্থান হবে।

(১২) তাদের পূর্বেও সত্য প্রত্যাখ্যান করেছিল নূহের (নোয়াহ) সম্প্রদায়, রাস্‌স সম্প্রদায় এবং সামুদ সম্প্রদায়। (১৩) আদ, ফ্যারাও এবং লূতের ভাইয়েরা, (১৪) আইকার অধিবাসীরা ও তুব্বা সম্প্রদায়েরাও সত্যকে অবিশ্বাস করেছিল। অতঃপর আমার সতর্কবার্তা বাস্তবে সত্যই সংঘটিত হল। (১৫) প্রথম সৃষ্টির সময় আমি কি ক্লান্ত ছিলাম? বরং তারা আবার নতুন করে সৃষ্টি সম্পর্কে সন্দেহ পোষণ করছে।

(১৬) আমি মানুষ সৃষ্টি করেছি আর তার মন নিভৃত্তে যে কুচিন্তা করে সে সম্বন্ধেও আমি জানি তাদের অন্তরে যা আছে। গলার ধমনীর চেয়েও আমি তাদের অধিক নিকটবর্তী। (১৭) যখন ডাইনে ও বামে দুই লিপিবদ্ধকারী দেবদূত লিপিবদ্ধ করতেই থাকে। (১৮) একজন সতর্ক প্রহরী তার উচ্চারিত প্রতিটি শব্দ লিপিবদ্ধ করার জন্য তার কাছে উপস্থিত রয়েছে।

(১৯) মৃত্যু যন্ত্রনা নিশ্চিতই আসবে, যা থেকে তুমি পলায়ন করতে চাইবে। (২০) আর শৃঙ্গায় (মহাশঙ্খ) ফুৎকার দেওয়া হবে। সে এক ভয়াবহ দিন হবে। (২১) প্রত্যেক ব্যক্তি এমন ভাবে আসবে যে, তার সাথে একজন চালক এবং একজন সাক্ষী থাকবে। (২২) তুমি তো এদিন সম্পর্কে উদাসীন ছিলে, এখন আমি তোমার উপর থেকে পর্দা সরিয়ে দিলাম, তাই তোমার দৃষ্টি আজ তীক্ষ্ণ। (২৩) আর তার সঙ্গের দেবদূত বলবেঃ তার এই কর্মলিপি আমি প্রস্তুত রেখেছি। (২৪) আদেশ হবে প্রত্যেক অব্যাহত কৃতঘ্নকে নরকে নিক্ষেপ করো। (২৫) ভাল কাজে বাধাদানকারী, সীমালঙ্ঘনকারী ও সন্দেহ পোষণকারীকে। (২৬) যে ঈশ্বরের সাথে অন্য উপাস্য সাব্যস্ত করেছিল, তাকে কঠোর শাস্তিতে

নিষ্ক্ষেপ করো। (২৭) এর সঙ্গী (শয়তান) বলবেঃ হে আমাদের প্রভু! আমি একে অবাধ্য বানাইনি বরং সে নিজেই বিভ্রান্ত হয়ে পড়েছিল। (২৮) আদেশ হবেঃ তোমরা আমার সামনে ঝগড়া করো না। আমি তো আগেই তোমাদেরকে শাস্তি থেকে সাবধান করেছিলাম। (২৯) আমার এখানে কথার নড়চড় হয় না আর আমি বান্দার উপর অত্যাচার করি না।

(৩০) যে দিন আমি নরককে বলবোঃ তুমি কি ভরে গেছো? সে বলবেঃ আরো আছে কি? (৩১) আর স্বর্গ ঈশ্বরভীরুদের নিকটে উপস্থিত করা হবে, দূরে রাখা হবে না। (৩২) এরই প্রতিশ্রুতি তোমাদেরকে দেওয়া হয়েছিল। ঈশ্বরের দিকে প্রত্যাবর্তনকারী ও প্রতিজ্ঞা রক্ষাকারী প্রত্যেকের জন্য এই প্রতিশ্রুতি। (৩৩) যে না দেখেও করুণাময়কে ভয় করল এবং বিনীত অন্তর নিয়ে উপস্থিত হল। (৩৪) শান্তির সাথে তোমরা এতে প্রবেশ করো। এটাই অনন্ত জীবন শুরুর দিন। (৩৫) তারা যা চাইবে এখানে তাদের জন্য সবই থাকবে, আর আমার কাছে আরো বেশী আছে।

(৩৬) আমি তাদের পূর্বে অনেক প্রজন্মকে ধ্বংস করে দিয়েছি। তারা এদের চেয়েও শক্তিশালী ছিল। অতএব তারা অনেক দেশে ঘুরেছে। যদি কোথাও আশ্রয়স্থল মেলে। (৩৭) এতে উপদেশ রয়েছে সেই ব্যক্তির জন্য যার অনুধাবনযোগ্য অন্তর আছে অথবা যে মনযোগ দিয়ে শ্রবণ করে।

(৩৮) আমি আকাশ, পৃথিবী এবং এর মধ্যে যা কিছু আছে ছয় দিনে (সময়ে) সৃষ্টি করেছি। কোন ক্লাস্তি আমাকে স্পর্শ করেনি। (৩৯) অতএব তারা যাই বলুক ধৈর্য ধারণ করো এবং আপন প্রভুর স্তুতি করো প্রশংসাসহ, সূর্যোদয়ের পূর্বে এবং সূর্যাস্তের পূর্বে। (৪০) এবং রাতেও তাঁর স্তুতি কর, সিজদার (নামাজের) পরেও।

(৪১) আর কান খাড়া রাখো, যে দিন আহ্বানকারী নিকট থেকে আহ্বান

করবে। (৪২) যে দিন মানুষ সত্যিই সেই ভয়াবহ আওয়াজ শুনবে। সেটাই পুনরুত্থান দিবস। (৪৩) নিঃসন্দেহে আমিই জীবিত করি আমিই মৃত্যু দিই আর আমার কাছেই প্রত্যাবর্তন করতে হবে। (৪৪) যে দিন ধরণী চৌচির হয়ে যাবে, সবাই দৌড়াদৌড়ি করবে। সেই একত্রিতকরণ আমার জন্য এক সহজ ব্যাপার।

(৪৫) এরা যা বলছে আমি জানি। আর তুমি তাদের প্রতি বল প্রয়োগকারী নও। অতএব যে আমার শাস্তিকে ভয় করে তাকে কুরআনের মাধ্যমে উপদেশ দাও।

অধ্যায় ৫১ : আয - যারিয়াত (বিক্ষিপ্ত বাতাস)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ধূলি উড়ানো প্রবল ঝঞ্ঝাবায়ুর শপথ। (২) তারপর সে উঠিয়ে নেয় (বৃষ্টির) বোঝা। (৩) তারপর সে ধীরগতিতে চলতে থাকে। (৪) তাঁর আদেশক্রমে, তাঁর আজ্ঞা বন্টিত হয়। (৫) নিঃসন্দেহে তোমাদেরকে যে প্রতিশ্রুতি দেওয়া হচ্ছে তা সত্য। (৬) আর বিচার অবশ্যই হবে। (৭) তারকাখচিত আকাশের শপথ। (৮) তোমরা অবশ্যই মত-বিরোধে পড়ে আছো। (৯) এথেকে সেই মুখ ফিরিয়ে নেয় যে সত্যভ্রষ্ট।

(১০) অভি শপ্ত হোক মিথ্যাচারীরা! (১১) যারা অজ্ঞ ও ভ্রান্ত। (১২) তারা জিজ্ঞাসা করে, বিচারের দিন কবে হবে? (১৩) যে দিন ওদের আগুনের উপর রাখা হবে। (১৪) তোমাদের বিদ্রোহের স্বাদ আস্বাদন করো। এতো সেই শাস্তি যা তোমরা তাড়াতাড়ি পেতে চাইতে। (১৫) নিঃসন্দেহে যারা ঈশ্বরকে ভয় করত তারা থাকবে উদ্যানে, বর্ণধারায়। (১৬) তাদের প্রভু তাদেরকে যা দিয়েছেন তা উপভোগ করতে থাকবে,

ইতিপূর্বে তারা ছিল সৎকর্মপরায়ণ। (১৭) তারা রাতে কম সময়ই ঘুমাতে। (১৮) এবং শেষরাতে তারা ক্ষমা প্রার্থনা করত। (১৯) এবং তাদের সম্পদে দানপ্রার্থী ও বঞ্চিতদের প্রাপ্য থাকত।

(২০) বিশ্বাসীদের জন্য ধরণীতে অনেক নিদর্শন আছে। (২১) এবং তোমাদের নিজেদের মধ্যেও, তোমরা কি দেখ না? (২২) আর আকাশে আছে তোমাদের জীবিকা আরও সেই সব, যার প্রতিশ্রুতি তোমাদেরকে দেওয়া হয়েছে। (২৩) অতএব আকাশ ও পৃথিবীর প্রভুর শপথ। অবশ্যই একথা তোমাদের কথোপকথনের মতই সত্য।

(২৪) তোমাদের কাছে কি আব্রাহামের সম্মানিত অতিথিদের বৃত্তান্ত পৌঁছেছে? (২৫) যখন তারা তার কাছে উপস্থিত হয়ে ‘শান্তি’ বলেছিল। জবাবে সেও বলেছিল ‘শান্তি’, এরা ছিল অপরিচিত ব্যক্তি। (২৬) তারপর সে তার ঘরের দিকে গেল এবং একটি বাছুর রান্না করে নিয়ে এল। (২৭) আর সেটি তাদের সামনে রাখল। বললঃ আপনারা আহার করছেন না কেন? (২৮) অতঃপর সে মনে মনে তাদেরকে ভয় পেল। তারা বললঃ ভয় নেই। এরপর তারা তাকে এক জ্ঞানী পুত্রসন্তানের সুসংবাদ দিল। (২৯) তখন তার স্ত্রী চিৎকার করতে করতে এগিয়ে এল এবং কপাল চাপড়ে বলতে লাগল “আমি এক বৃদ্ধা, বন্ধ্যা। (৩০) তারা বললঃ তবু এমনই বলেছেন তোমার প্রভু। নিঃসন্দেহে তিনি অসীম প্রজ্ঞাবান, মহাজ্ঞানী।

(৩১) ইবরাহীম (আব্রাহাম) বললঃ হে দূতগণ! তোমাদের উদ্দেশ্যটা কি? (৩২) তারা বললঃ আমাদেরকে এক অপরাধী সম্প্রদায়ের কাছে (লুতের সম্প্রদায়) পাঠানো হয়েছে। (৩৩) এজন্যে যে, আমরা তাদের উপর শক্ত মাটির পাথর বর্ষণ করবো। (৩৪) যা তোমার প্রভুর কাছে সীমালঙ্ঘনকারীদের জন্য চিহ্নিত আছে। (৩৫) তারপর সেখানে যত বিশ্বাসী লোকেরা ছিল তাদেরকে আমি বের করে নিই। (৩৬) কিন্তু সেখানে আমি একটি ঘর ছাড়া কোন আত্মসমর্পণকারীদের ঘর পাইনি। (৩৭)

যারা কষ্টদায়ক শাস্তির ভয় করে তাদের জন্য আমি সেখানে এক নিদর্শন রেখেছি।

(৩৮) আর মোজেসের ঘটনায় ও নিদর্শন রয়েছে। যখন তাকে স্পষ্ট প্রমাণ সহ ফ্যারাও এর কাছে পাঠালাম। (৩৯) কিন্তু সে তার সভাসদসহ প্রত্যাখ্যান করল আর বললঃ এতো জাদুকর। (৪০) তাই আমি তাকে সমুদ্রে নিক্ষেপ করলাম, সে ছিল নিন্দনীয়। (৪১) আর আদ সম্প্রদায়ের ঘটনাতেও নিদর্শন রয়েছে। যখন তাদের উপরে এক অশুভ বাতাস পাঠালাম। (৪২) যা কিছু উপর দিয়েই তা প্রবাহিত হয়েছিল, তাকেই চুরমার করে দিয়েছিল। (৪৩) আর সামূদ জাতির ঘটনায়ও নিদর্শন রয়েছে। যখন তাদেরকে বলা হয়েছিল কিছুকালের জন্য ভোগ করে নাও। (৪৪) অতঃপর তারা তাদের প্রভুর আদেশ অমান্য করলো। তখন তাদেরকে বজ্রাঘাত পাকড়াও করল আর তারা দেখতেই থাকল। (৪৫) তারা উঠে দাঁড়াতে পারে নি এবং নিজেদেরকে রক্ষা করতে ও পারে নি। (৪৬) এর আগে নূহের সম্প্রদায়কেও (আমি ধ্বংস করেছিলাম)। নিঃসন্দেহে তারা এক অবাধ্য সম্প্রদায় ছিল।

(৪৭) আর আমি আকাশকে নিজ সামর্থের দ্বারা তৈরী করেছি এবং একে বিস্তৃত করতেও সক্ষম। (৪৮) আর ধরণীকে আমি বিছিয়ে দিয়েছি। আমি কত সুন্দরভাবে বিছাতে পারি। (৪৯) আর আমি প্রত্যেক জিনিষ জোড়ায় জোড়ায় তৈরী করেছি যাতে তোমরা চিন্তা-ভাবনা করো। (৫০) অতএব তোমরা ঈশ্বরের দিকে ধাবিত হও। আমি তাঁরই পক্ষ হতে এক স্পষ্ট সতর্ককারী। (৫১) আর ঈশ্বরের সাথে অন্য কোন উপাস্য সাব্যস্ত করো না। আমি তাঁর পক্ষ হতে তোমাদের জন্য একজন প্রত্যক্ষ সতর্ককারী।

(৫২) একই ভাবে তাদের পূর্ববর্তীদের কাছে যে পয়গম্বরই এসেছে তারা বলেছে - হয় এ জাদুকর নয়তো পাগল। (৫৩) তারা কি একে ওপরকে এই উপদেশই দিয়ে এসেছে? বস্তুতঃ তারা এক অবাধ্য জনগোষ্ঠী।

(৫৪) তাই তুমি ওদের কথায় আমল দিও না, তোমার কোন দোষ নেই। (৫৫) আর উপদেশ দিতে থাকো কারণ উপদেশ বিশ্বাসীদের উপকারে আসে।

(৫৬) জ্বিন ও মানুষকে আমি আমার উপাসনা করার জন্যই সৃষ্টি করেছি। (৫৭) তাদের কাছ থেকে আমি কোন জীবিকা চাই না এবং এটাও চাই না যে, তারা আমাকে খাওয়াবে। (৫৮) নিঃসন্দেহে জীবিকা দেওয়ার মালিক ঈশ্বর, ক্ষমতাশালী, মহা শক্তিমান। (৫৯) অতএব অত্যাচারীদের পরিণাম তেমনই হবে যেমন তাদের পূর্বগামীদের হয়েছিল। অতএব তারা যেন তাড়াতাড়ি না করে। (৬০) অস্বীকারকারীদের জন্য দূর্ভাগ্য নেমে আসবে সেই দিনে, যে দিনের প্রতিশ্রুতি তাদের সাথে করা হয়েছে।

অধ্যায় ৫২ : আত-তুর (সিনাই পর্বত)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তুর পর্বতের শপথ, (২) এবং লিপিবদ্ধ গ্রন্থের (৩) বিস্তৃত পৃষ্ঠায়, (৪) জনবহুল ঘরের শপথ, (৫) এবং উঁচু ছাদের শপথ, (৬) আর উত্তাল সমুদ্রের শপথ। (৭) নিঃসন্দেহে তোমার প্রভুর শাস্তি আসবেই। (৮) তা কেউ প্রতিরোধ করতে পারবে না। (৯) যে দিন আকাশ আন্দোলিত হবে (১০) এবং পাহাড়-পর্বত চলতে শুরু করবে। (১১) অতএব সেদিন দূর্ভোগ রয়েছে অবিশ্বাসীদের জন্য। (১২) যারা খেলার ছলে কথা তৈরী করে। (১৩) যে দিন তাদেরকে নরকের আগুনে ধাক্কা দিয়ে নিক্ষেপ করা হবে। (১৪) এই সেই আগুন যা তোমরা মিথ্যা মনে করতে। (১৫) এটা কি জাদু? না কি তোমরা দেখতে পাচ্ছে না? (১৬) এতে প্রবেশ করো। তোমরা সহ্য করতে পারো বা না পারো তোমাদের জন্য সমান। তোমরা যা করতে তোমাদেরকে কেবল তারই প্রতিফল দেওয়া হচ্ছে।

(১৭) নিঃসন্দেহে ঈশ্বরভীরু লোকেরা উদ্যানে অপার অনুগ্রহের মধ্যে থাকবে। (১৮) তাদের প্রভু তাদেরকে যা দেবেন তাতে তারা আনন্দিত হবে, আর তাদের প্রভু তাদেরকে নরকের শাস্তি থেকে রক্ষা করবেন। (১৯) তোমাদের কর্মের প্রতিফল স্বরূপ আহার কর, পানাহার করো উৎফুল্ল চিত্তে। (২০) তারা সারিবদ্ধভাবে সজ্জিত আসনে হেলান দিয়ে বসবে। আমি তাদেরকে আয়তলোচনা সুনয়না অপ্সরাদের সাথে বিবাহ দিয়ে দেব।

(২১) আর যারা বিশ্বাস স্থাপন করেছে এবং তাদের সন্তানেরাও ঈমানের সাথে তাদের অনুসরণ করে, তাদের সাথে তাদের সন্তানদেরকেও আমি একত্রিত করবো এবং তাদের কর্ম একটুও হ্রাস করবো না। প্রত্যেক ব্যক্তি নিজ কৃতকর্মের জন্য দায়বদ্ধ। (২২) আমি তাদেরকে তাদের পছন্দের ফলমূল ও মাংসের যোগান দেব। (২৩) সেখানে তারা একে অপরের মধ্যে পানপাত্র আদান প্রদান করবে, যাতে কোন অসার কথা কিংবা পাপ থাকবে না। (২৪) আর সুরক্ষিত মুক্তার মত সুদর্শন কিশোরেরা তাদের সেবায় সদা নিয়োজিত থাকবে। (২৫) তারা একে অপরের কাছে সম্বোধন করে কথা-বার্তা বলবে। (২৬) তারা বলবেঃ আমরাতো এর পূর্বে আমাদের পরিবার-পরিজনের মাঝে (ঈশ্বরের অসম্ভুষ্টির) ভয়ে শঙ্কিত থাকতাম। (২৭) অতঃপর ঈশ্বর আমাদের প্রতি অনুগ্রহ করেছেন এবং আমাদেরকে বলসানো শাস্তি হতে রক্ষা করেছেন। (২৮) আমরা আগেও ঈশ্বরকে ডাকতাম। নিঃসন্দেহে তিনি প্রতিশ্রুতি পালনকারী, করুণাময়।

(২৯) অতএব তুমি উপদেশ দিতেই থাক, তোমার প্রভুর কৃপায়, তুমি ভণ্ড গণক নও আর পাগলও নও। (৩০) তারা না কি বলে - একজন কবি, আমরা তার উপর কোন বিপর্যয় নেমে আসার প্রতিক্ষা করছি। (৩১) বলঃ প্রতীক্ষা করো, আমিও তোমাদের সাথে প্রতীক্ষা করছি। (৩২) এদের বুদ্ধি কি এদের এই শেখায়? না কি এরা অবাধ্য জনগোষ্ঠী?

(৩৩) তারা কি বলেঃ এই কুরআন সে নিজেই রচনা করেছে? বরং তারা বিশ্বাস করতে চায় না। (৩৪) তারা তাহলে এর অনুরূপ একটি বাণী রচনা করে নিয়ে আসুক, যদি তারা সঠিক হয়।

(৩৫) তারা কি কোন আদি স্রষ্টা ছাড়াই সৃষ্টি হয়েছে? অথবা তারা স্বয়ংই আদি স্রষ্টা? (৩৬) আকাশ ও পৃথিবীর স্রষ্টা কি তারাই? আসলে তারা বিশ্বাস করে না। (৩৭) না কি তাদের কাছে তোমার প্রভুর ভাণ্ডার রয়েছে? না কি তারাই সর্বময় ক্ষমতার অধিকারী? (৩৮) না কি তাদের কাছে কোন সিঁড়ি আছে যার মাধ্যমে তারা কথা শুনে নেয়? যদি তাই হয় তাহলে এদের শ্রবণকারী কোন প্রত্যক্ষ প্রমাণ উপস্থিত করুক। (৩৯) না কি ঈশ্বরের জন্য কন্যা সন্তান আর তোমাদের জন্য পুত্র সন্তান?

(৪০) না কি তাদের কাছে তুমি পারিশ্রমিক চাচ্ছে। যে, তারা একে এক কঠিন বোঝা মনে করবে। (৪১) না কি তাদের কাছে কোন পরোক্ষের জ্ঞান আছে যা তারা লিখে নেয়? (৪২) তারা কি কোন ষড়যন্ত্র করতে চায়? তাহলে অস্বীকারকারীরা নিজেরাই নিজেদের ষড়যন্ত্রের শিকার হবে। (৪৩) ঈশ্বর ছাড়া এদের অন্য কোন উপাস্য আছে কি? এরা যাঁর অংশীদার স্থাপন করে ঈশ্বর তা থেকে পবিত্র।

(৪৪) তারা যদি আকাশের কোন খণ্ড ভেঙ্গে পড়তে দেখে তাহলে তারা বলবেঃ এতো পুঞ্জীভূত মেঘ। (৪৫) অতএব ওদেরকে উপেক্ষা করে চল সেই দিন পর্যন্ত, যে দিন তারা মুর্ছিত হয়ে পড়বে। (৪৬) যে দিন তাদের ষড়যন্ত্র তাদের কোন কাজে আসবে না, আর তারা কোন সাহায্য ও পাবে না। (৪৭) এই অত্যাচারীদের জন্য এছাড়াও আরো শাস্তি আছে; কিন্তু এদের অধিকাংশই তা জানে না।

(৪৮) আর তুমি ধৈর্য সহকারে তোমার প্রভুর নির্দেশের প্রতীক্ষা কর;

নিঃসন্দেহে তুমি আমার চোখের সামনেই রয়েছো। তোমার প্রভুর স্তুতি কর তাঁর প্রসংশার সাথে, যখন তুমি শয্যা ত্যাগ কর। (৪৯) আর রাতেও তাঁর পবিত্রতা ঘোষণা কর এবং তারকা অন্তর্মিত হওয়ার পরও।

অধ্যায় ৫৩ : আন-নাজম (সুবিন্যস্ত তারকা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) অন্তর্গামী তারকার শপথ। (২) তোমাদের সাথি পথভ্রষ্ট ও হয় নি, বিভ্রান্ত ও হয় নি। (৩) সে মনগড়া কথাও বলে না। (৪) এটি (কুরআন) একটি প্রত্যাদেশ, যা তার নিকট প্রেরিত হয়েছে। (৫) তাকে শিক্ষা দান করে মহাশক্তিশালী (দেবদূত)। (৬) প্রজ্ঞাসম্পন্ন; যে নিজেকে উদ্ভাষিত করেছিল। (৭) সুস্থির দণ্ডায়মান অবস্থায় উর্দ্ধ দিগন্তে। (৮) তারপর সে নিকটবর্তী হল। (৯) তারপর সে নেমে এল। তাদের মধ্যে দুই ধনুক পরিমাণ বা তারচেয়েও কম দূরত্ব ছিল। (১০) তখন ঈশ্বর তাঁর বান্দার প্রতি প্রত্যাদেশ করলেন, যা প্রত্যাদেশ করার ছিল। (১১) সে (পয়গম্বর) যা দেখেছিল অন্তর্করণ তা মিথ্যা বলেনি। (১২) এখন কি তোমরা ঐ বিষয়ে তার সাথে বিতর্ক করবে যা সে স্বচক্ষে অবলোকন করেছে? (১৩) আর সে তাকে আরো একবার নেমে আসতে দেখেছে। (১৪) সিদরাতুল মুনতাহার নিকট (প্রান্তবর্তী বদরী বৃক্ষের নিকট)। (১৫) যার নিকটে অবস্থিত শাস্ত্র উদ্যান (জান্নাতুল মাওয়া)। (১৬) তখন বদরী বৃক্ষটি যা দিয়ে আচ্ছাদিত থাকার, আচ্ছাদিত ছিল। (১৭) তার দৃষ্টি ভ্রম হয় নি আর দৃষ্টি সীমালঙ্ঘন ও করে নি। (১৮) সে তার প্রভুর মহান নিদর্শনাবলী দেখেছে।

(১৯) তোমরা ‘লাত’ ও ‘উয্যা’^১ সম্পর্কে কি ধারণা পোষণ কর।
 (২০) এবং তৃতীয় আর একটি ‘মানাত’ সম্পর্কে।^২ (২১) তাহলে কি তোমাদের
 জন্য পুত্র সন্তান আর ঈশ্বরের জন্য কন্যা সন্তান? (২২) এতো অসম
 বাঁটোয়ারা হলো। (২৩) এগুলো তো নাম মাত্র যা তোমাদের পিতৃপুরুষরা
 রেখে দিয়েছে। এদের স্বপক্ষে ঈশ্বর কোন প্রমাণ পাঠাননি। তারা কেবল
 মনের ভ্রম আর প্রবৃত্তির অনুসরণ করেছে। অথচ ওদের কাছে ওদের প্রভুর
 কাছ থেকে পথ নির্দেশ এসে গেছে। (২৪) মানুষ যা আশা করে তা কি সে
 পায়? (২৫) বরং ঈশ্বরেরই অধিকারে রয়েছে পরলোক এবং ইহলোক।

(২৬) আকাশে অনেক দেবদূত আছে, যাদের সুপারিশ কোন কাজে আসবে
 না; তবে সে ব্যতীত যাকে ঈশ্বর অনুমতি দেবেন এবং যাকে পছন্দ করবেন।
 (২৭) যারা পরলোক বিশ্বাস করে না, তারা দেবদূতদের নাম নারীদের নামে
 রাখে। (২৮) অথচ তাদের কাছে এর স্বপক্ষে কোন প্রমাণই নেই। আর তারা
 কেবল অনুমানের পিছনে ছোটে। আর অনুমান দিয়ে বিন্দুমাত্র সত্যের কাজ
 হয় না। (২৯) অতএব যারা আমার স্মরণ থেকে মুখ ফিরিয়ে নেয় এবং পার্থিব
 জীবন ছাড়া কিছুই চায় না, তাদেরকে পরিহার করে চল। ওদের জ্ঞান কেবল এই
 পর্যন্ত। (৩০) তোমাদের প্রভু ভালভাবেই জানেন, কে তাঁর পথ থেকে বিচ্যুত
 হয়ে গেছে। আর তাদেরকেও ভালকরেই জানেন, কে সঠিক পথে আছে।

(৩১) আকাশ ও ধরণীতে যা কিছু আছে সবই ঈশ্বরেরই। তিনি
 চান, যারা খারাপ কাজ করে তাদের কৃতকর্মের প্রতিফল দিতে এবং যারা
 ভাল কাজ করে তাদের উত্তম প্রতিফল দিতে। (৩২) যারা ছোটখাটো

^১ বিঃদ্রঃ-(৫৩ঃ ১৯-২০)আল-লাত, আল-উয্যা এবং মানাত হল প্রাচীন আরবের দেবদেবী।

অপরাধ করে ফেললেও বড় বড় পাপ ও কু-কর্ম থেকে দূরে থাকে। নিঃসন্দেহে তোমার প্রভুর ক্ষমা সুদূর প্রসারিত। তিনি তোমাদের সম্পর্কে ভাল জানেন, যখন তিনি তোমাদেরকে মৃত্তিকা থেকেই সৃষ্টি করেছেন। আর যখন তোমরা মায়ের পেটে ভ্রূণ অবস্থায় ছিলে। অতএব তোমরা নিজেকে পবিত্র মনে করো না। তিনি ঈশ্বরভীরুদের ভালভাবেই জানেন।^১

(৩৩) তোমরা কি ঐ সময় সেই ব্যক্তিকে দেখেছ যে মুখ ফিরিয়ে নিয়েছে। (৩৪) আর সামান্য দান করেছে, তারপর তা বন্ধ করেছে। (৩৫) তার কি অদৃশ্যের জ্ঞান আছে যে, সে সব দেখতে পাচ্ছে? (৩৬) না কি তাকে সে সব জানানো হয় নি যা মুসার (মোজেসের) গ্রন্থে আছে। (৩৭) আর ইবরাহীমের (আব্রাহামের), যে তার দায়িত্ব পালন করেছে। (৩৮) তা এই যে, একজন আরেকজনের বোঝা বহন করবে না। (৩৯) আর এই যে, মানুষ তাই পায় যা সে করে। (৪০) আর এই যে, তার উপার্জন শীঘ্রই সে দেখতে পাবে। (৪১) অতঃপর তার পূর্ণ প্রতিফল দেওয়া হবে। (৪২) আর এই যে, সবাইকে তোমার প্রভুর কাছে আসতে হবে। (৪৩) নিঃসন্দেহে তিনি হাসান, আর তিনিই কাঁদান। (৪৪) এবং তিনিই মারেন, তিনিই বাঁচান। (৪৫) আর তিনিই পুরুষ ও স্ত্রী দুরকমই সৃষ্টি করেছেন। (৪৬) একটি ফোঁটা থেকে যখন তা নির্গত হয়।

^১ বিঃ দ্রঃ- (৫৩ঃ ৩২) মানুষের কি করা উচিত এবং কি করা উচিত নয় সে সম্পর্কে ঈশ্বর পরিপূর্ণ নির্দেশনা দিয়েছেন। তবুও ছোটো-খাটো ত্রুটি, যথা ক্ষনিকের আবেগের তাড়নায় সংঘটিত ত্রুটি, তাকে ক্ষমা করে দেওয়া হতে পারে যদি সে তার ত্রুটি বুঝতে পারে এবং লজ্জিত হয়ে ঈশ্বরের কাছে ক্ষমা চায়।

(৪৭) পুনরুত্থানের দায়িত্ব তাঁরই। (৪৮) আর তিনিই সম্পত্তি দিয়েছেন এবং ধনবান করেছেন। (৪৯) তিনিই শি'রা নক্ষত্রের প্রভু।

(৫০) ঈশ্বরই প্রাচীন আদ জাতিকে ধ্বংস করেছেন। (৫১) সামুদ্র জাতিকেও। কাউকেও অবশিষ্ট রাখেননি। (৫২) এবং ইতিপূর্বে নূহের (নোয়াহ) সম্প্রদায়কেও। নিঃসন্দেহে তারা অত্যাচারী ও অবাধ্য লোক ছিল। (৫৩) এবং উৎপাটিত শহরগুলিকে তিনিই নিক্ষেপ করেছিলেন। (৫৪) অতঃপর চিরতরে তাদের দৃষ্টির অন্তরালে পাঠিয়ে দিলেন। (৫৫) অতএব তুমি তোমার প্রভুর কোন্ কোন্ অনুগ্রহকে সন্দেহ পোষণ করবে।

(৫৬) ইনিও একজন সতর্ককারী, পূর্বের সতর্ককারীদের ন্যায়। (৫৭) সেই ক্ষন (প্রলয়) আসন্ন। (৫৮) ঈশ্বর ছাড়া কেউই তা নিবারণ করতে পারে না। (৫৯) এই কথায় তুমি কি আশ্চর্য হচ্ছো? (৬০) আর তুমি না কেঁদে, হাসছো? (৬১) আর তুমি অহংকার করছ? (৬২) অতএব ঈশ্বরকে সিজদা (প্রণতিজ্ঞাপন) কর এবং তাঁরই উপাসনা কর।

অধ্যায় ৫৪ : আল - ক্বামার (চন্দ্র)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শেষ বিচারের দিন নিকটবর্তী হয়েছে এবং চন্দ্র বিদীর্ণ হয়েছে। (২) আর তারা কোন নিদর্শন দেখলে মুখ ফিরিয়ে নেবে এবং বলবেঃ এতো এক চিরাচরিত জাদু। (৩) তারা অবিশ্বাস করেছে আর নিজের প্রবৃত্তির অনুসরণ করেছে। আর প্রতিটি কাজের সময় নির্ধারিত। (৪) ওদের কাছে ঐ খবর পৌঁছে গেছে যাতে পর্যাণ্ড শিক্ষার বিষয় আছে। (৫) উচ্চ মর্যাদার তত্ত্বজ্ঞান; কিন্তু সতর্কবাণী তাদের কোন কাজে আসে না। (৬) অতএব ওদের থেকে মুখ ফিরিয়ে নাও। যে দিন আহ্বানকারী ওদেরকে এক অপ্রিয় বিষয়ের দিকে

আহ্বান করবে। (৭) সেদিন তারা দৃষ্টি নিচু করে বিক্ষিপ্ত পঙ্গপালের ন্যায্য কবর থেকে বেরিয়ে আসবে। (৮) আহ্বানকারীর দিকে দৌড়াতে দৌড়াতে। অস্বীকারকারীরা বলবেঃ এ এক কঠিন দিন।

(৯) এর আগে নূহের (নোয়াহ) সম্প্রদায়েরা অস্বীকার করেছিল, তারা আমার বান্দাকে অবিশ্বাস করেছিল আর বলেছিলঃ এ এক পাগল আর তাকে হুমকিও দেওয়া হয়েছিল। (১০) তখন সে তার প্রভুকে বলেছিলঃ আমি অসহায়, অতএব তুমি প্রতিবিধান কর। (১১) তখন আমি মুষলধারে বর্ষিত বৃষ্টির জলে আকাশের দ্বার খুলে দিলাম। (১২) এবং ধরনীতে স্রোত প্রবাহিত করে দিলাম। তখন ঐ জল নির্ধারিত উদ্দেশ্য নিয়ে একত্রিত হল। (১৩) আর আমি ওকে তক্তা ও পেরেক দ্বারা নির্মিত এক নৌযানে উঠিয়ে নিলাম। (১৪) যা আমার তত্ত্বাবধানে চলতে থাকল। ঐ ব্যক্তির পক্ষ থেকে প্রতিশোধ নেওয়ার জন্য যাকে প্রত্যাখ্যান করা হয়েছিল। (১৫) আর একে আমি নিদর্শন স্বরূপ রেখে দিয়েছি। অতএব চিন্তা করার কেউ আছে কি? (১৬) কি কঠোর ছিল আমার শাস্তি ও সতর্কবাণী! (১৭) আমি তো কুরআনকে উপদেশ গ্রহণের জন্য সহজ করে দিয়েছি। অতএব উপদেশ গ্রহণকারী কেউ আছে কি?

(১৮) আদ সম্প্রদায়ও অবিশ্বাস করেছিল। ফলে কি কঠোর ছিল আমার শাস্তি ও সতর্কবাণী! (১৯) আমি তাদের উপর এক তীব্র ঝড়ো বাতাস পাঠিয়েছিলাম নিরবিচ্ছিন্ন অশুভ (প্রচণ্ড ঠাণ্ডার সময়) দিনে। (২০) যা মানুষকে উৎখাত করেছিল যেন তারা উৎপাটিত খেজুর গাছের কাণ্ড। (২১) অতএব কি কঠোর ছিল আমার শাস্তি ও সতর্কবাণী! (২২) আমি তো কুরআনকে উপদেশ গ্রহণের জন্য সহজ করে দিয়েছি। অতএব উপদেশ গ্রহণকারী কেউ আছে কি?

(২৩) সামুদ্র জাতি ও সতর্কবার্তা উপেক্ষা করেছিল। (২৪) তারা বলেছিলঃ আমরা কি আমাদের মধ্যে থেকে একজন মানুষকে অনুসরণ করবো? তাহলে তো আমরা পথভ্রষ্ট ও উন্মাদ বলে গণ্য হবো। (২৫) আমাদের মধ্য থেকে কেবল তার কাছেই উপদেশ অবতীর্ণ হয়েছে? বরং সে তো এক উদ্ধত, মিথ্যাবাদী। (২৬) কালই তারা জানতে পারবে কে মিথ্যাবাদী আর কে উদ্ধত। (২৭) তাদেরকে পরীক্ষার জন্য আমি উল্টী পাঠাচ্ছি। তুমি প্রতীক্ষা করো। (২৮) ধৈর্য ধারণ কর, আর তাদেরকে জানিয়ে দাও যে, তাদের মধ্যে জল ভাগ করে দেওয়া হয়েছে। প্রত্যেকে জল গ্রহণের জন্য পালাক্রমে উপস্থিত হও। (২৯) কিন্তু তারা তাদের সঙ্গীকে ডাকল, তখন তারা আক্রমণ করল এবং উল্টীকে বধ করল। (৩০) কি কঠোর ছিল আমার শাস্তি ও সতর্কবাণী! (৩১) তাদের বিরুদ্ধে আমি একটি মাত্র আওয়াজ পাঠিয়েছিলাম। তাতেই তারা খোয়াড় নির্মাণকারীর খড়ের মত (দলিত-মথিত) হয়ে গিয়েছিল। (৩২) আমি তো কুরআনকে উপদেশ গ্রহণের জন্য সহজ করে দিয়েছি। অতএব উপদেশ গ্রহণকারী কেউ আছে কি?

(৩৩) লুতের সম্প্রদায়ও সতর্ককারীকে অবিশ্বাস করেছিল। (৩৪) আমি তাদের কাছে পাথর বর্ষণকারী ঝটিকা পাঠিয়েছিলাম। কেবল লুতের পরিবার রক্ষা পেয়েছিল। আমি ওদেরকে রক্ষা করলাম ভোরের আগে। (৩৫) আমার পক্ষ থেকে অনুগ্রহ সুরু প। যারা কৃতজ্ঞতা স্বীকার করে তাদেরকে এভাবেই প্রতিফল দিই। (৩৬) আর লুত ওদেরকে আমার পাকড়াও সম্পর্কে সতর্ক করেছিল; কিন্তু তারা তার সতর্কবাণী সম্বন্ধে বিতর্ক করেছিল। (৩৭) তারা তার কাছে তার অতিথিদের পেতে চাইল, তখন আমি তাদের দৃষ্টি বিলুপ্ত করে দিলাম। এখন আমার শাস্তি ও

সতর্কবাণী আশ্বাদন করো। (৩৮) প্রত্যুষে তাদের উপর বিরামহীন শাস্তি নেমে এল। (৩৯) এখন আমার শাস্তি ও সতর্কবাণী আশ্বাদন করো। (৪০) আমি তো কুরআনকে উপদেশ গ্রহণের জন্য সহজ করে দিয়েছি। অতএব উপদেশ গ্রহণকারী কেউ আছে কি?

(৪১) আর ফ্যারাও এর লোকদের কাছেও সতর্ককারী এসেছিল। (৪২) তারা আমার সমস্ত নিদর্শনকে মিথ্যা বলেছিল। তাই আমি তাদেরকে পরাক্রমশালী ও মহাশক্তিদ্বয়ের মত পাকড়াও করলাম।

(৪৩) তোমাদের অস্বীকারকারীরা কি এদের চেয়েও শ্রেষ্ঠ অথবা তোমাদের জন্য কি ঐশী গ্রন্থে ক্ষমা ঘোষণা করা হয়েছে? (৪৪) না কি তারা বলে যে, আমরা এমন একটি দল যেদল প্রভাবশালীই থাকবে। (৪৫) শীঘ্রই এই দল পরাজিত হবে এবং পিছন ফিরে পলায়ণ করবে। (৪৬) নিশ্চয়ই প্রলয়ক্ষনই হল তাদের জন্য নির্ধারিত ক্ষন এবং অন্তিম ক্ষন আরো গুরুতর ও কঠিন। (৪৭) নিঃসন্দেহে অপরাধীরা পথভ্রষ্ট এবং অজ্ঞতার মধ্যে রয়েছে। (৪৮) যে দিন তাদের উপড় করে টেনে হিঁচড়ে নরকের আগুনে নিয়ে আসা হবে। বলা হবে - আগুনের স্বাদ আশ্বাদন করো।

(৪৯) আমি সবকিছুই পরিমাপ মত সৃষ্টি করেছি। (৫০) আর আমার আদেশ তো হঠাৎই এসে পড়বে, চোখের পলকে। (৫১) আমি তোমাদের মত দলগুলিকে ধ্বংস করে দিয়েছি। অতএব চিন্তা করার কেউ আছে কি? (৫২) আর যা কিছু তারা করেছে সবই কর্মলিপিতে লেখা আছে। (৫৩) প্রত্যেক ছোট ও বড় বিষয়ও লেখা আছে। (৫৪) নিঃসন্দেহে ঈশ্বরভীরুরা বরনা সমৃদ্ধ উদ্যানে থাকবে। (৫৫) সত্যের আসনে, সর্বশক্তিমান রাজাধিরাজের সমক্ষে।

অধ্যায় ৫৫ : আর - রহমান (করণাময়)

ঈশ্বরের নামে আরম্ভ যিনি পরম করণাময় ও অতি দয়ালু।

(১) করণাময় (২) কুরআন শিক্ষা দিয়েছেন, (৩) মানুষ সৃষ্টি করেছেন, (৪) তাকে ভাষা শিখিয়েছেন। (৫) চন্দ্র ও সূর্য আছে নির্ধারিত নিয়মাধীন। (৬) তারকা ও বৃক্ষ তাঁকে সিজদা (প্রণতি জ্ঞাপন) করে। (৭) তিনি আকাশকে সমুন্নত করেছেন ও ভারসাম্য স্থাপন করেছেন, (৮) যাতে তোমরা মাপের ব্যাপারে অন্যায় না করো। (৯) তোমরা ন্যায়ের সাথে মাপ ঠিক রেখো এবং ওজনে কম দিও না।

(১০) এই ধরণীকে তিনি তাঁর সৃষ্ট জীবের জন্য স্থাপন করেছেন। (১১) এতে আছে ফলমূল ও আবরণ সমৃদ্ধ খেজুর। (১২) আর আছে খোসাওয়ালা শস্যদানা ও সুরভিত ফুল। (১৩) অতএব, তোমরা তোমাদের প্রভুর কোন্ কোন্ বিস্ময় অস্বীকার করবে? (১৪) তিনি মানুষকে সৃষ্টি করেছেন শক্ত ঠনঠনে মাটির কাঁদা থেকে। (১৫) আর তিনি জ্বিনকে সৃষ্টি করেছেন ধূস্রবিহীন অগ্নিশিখা থেকে। (১৬) অতএব, তোমরা তোমাদের প্রভুর কোন্ কোন্ বিস্ময় অস্বীকার করবে? (১৭) আর তিনিই দুই পূর্ব এবং দুই পশ্চিমের মালিক। (১৮) অতএব, তোমরা তোমাদের প্রতিপালকের কোন্ কোন্ বিস্ময় অস্বীকার করবে? (১৯) তিনিই দুই সমুদ্রের মিলিত প্রবাহ প্রবাহিত করেছেন। (২০) দুইয়ের মাঝে আছে এক অন্তরাল, যা তারা অতিক্রম করে না। (২১) অতএব, তোমরা তোমাদের প্রভুর কোন্ কোন্ বিস্ময় অস্বীকার করবে? (২২) এই দুটি থেকেই মুক্তা ও প্রবাল বের হয়। (২৩) অতএব, তোমরা তোমাদের প্রভুর কোন্ কোন্ বিস্ময় অস্বীকার করবে? (২৪) সমুদ্রে চলমান পাহাড়ের মত উঁচু নৌযানসমূহ তাঁরই। (২৫) অতএব, তোমরা তোমাদের প্রভুর কোন্ কোন্ বিস্ময় অস্বীকার করবে?

(২৬) ভূ-পৃষ্ঠে যা কিছু আছে তা ধ্বংস হয়ে যাবে। (২৭) অবশিষ্ট থাকবে কেবল তোমার প্রভুর সত্ত্বা যা মহামহিম, চির সম্মানিত। (২৮) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (২৯) আকাশ ও পৃথিবীর সকলেই তাঁর নিকট অনুগ্রহ প্রার্থনা করে। প্রতিনিয়ত তিনি কর্মে নিয়োজিত। (৩০) অতএব, তোমরা তোমাদের প্রভুর কোন্ কোন্ বিষয় অস্বীকার করবে?

(৩১) শীঘ্রই আমি তোমাদের প্রতি মনোনিবেশ করবো, হে দুই বৃহৎ কাফেলা (জ্বিন ও মানুষ)। (৩২) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৩৩) হে জ্বিন ও মানুষের দল! যদি তোমরা আকাশ ও পৃথিবীর সীমানা থেকে বের হয়ে যেতে পারো তাহলে বের হয়ে যাও। (৩৪) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৩৫) তোমাদের দিকে আগুনের স্ফুলিঙ্গ ও ধূস্র পাঠানো হলে তোমরা নিজেদেরকে রক্ষা করতে পারবে না।^১ (৩৬) অতএব, তোমরা তোমাদের প্রভুর কোন্ কোন্ বিষয় অস্বীকার করবে?

(৩৭) যে দিন আকাশ ফেটে চামড়ার মত লাল হয়ে যাবে। (৩৮) অতএব, তোমরা তোমাদের প্রভুর কোন্ কোন্ বিষয় অস্বীকার করবে?

^১ বিঃ দ্রঃ (৫৫ঃ ৩৫) এই পৃথিবী হল পরীক্ষাকেন্দ্র। পরীক্ষা চলাকালীন সময়ে কেউ যত খুশী অহংকারী হতে পারে। এমন স্বাধীনতা থাকা সত্ত্বেও, কোন জ্বিন বা মানুষ বিশ্বের সীমা অতিক্রম করতে পারে না। এর দ্বারা এটাই প্রমানিত হয় যে মানুষ সম্পূর্ণভাবে ঈশ্বরের নিয়ন্ত্রনাধীন। পরীক্ষার নির্দ্ধারিত সময় অতিক্রম হওয়ার পর ঈশ্বরের সকলকে পাকড়াও করতে শুরুর করেন, তখন কারো পক্ষে এর থেকে পরিত্রাণ লাভের উপায় থাকে না।

(৩৯) সেই দিন মানুষ বা জ্বিনকে তাদের অপরাধ সম্পর্কে জিজ্ঞাসা করা হবে না। (৪০) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৪১) লক্ষণ দেখে অপরাধীকে চিনে নেওয়া হবে। তাদের প্রত্যেককে মাথার সামনের চুল ও পা ধরে পাকড়াও করা হবে। (৪২) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৪৩) এটাই সেই নরক, অপরাধীরা যাকে অবিশ্বাস করত। (৪৪) তারা এর মধ্যে ফুটন্ত জলের মধ্যে ছোটাছুটি করবে। (৪৫) অতএব, তোমরা তোমাদের প্রভুর কোন্ কোন্ বিষয় অস্বীকার করবে?

(৪৬) আর যে ব্যক্তি তার প্রভুর সামনে দাঁড়াতে ভয় পায়, তার জন্যে রয়েছে দুটি বাগান। (৪৭) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৪৮) দুটিতেই সবুজের সমারোহ। (৪৯) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৫০) ওর মধ্যে দুটি ঝরণা প্রবাহিত হবে। (৫১) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৫২) দুটি বাগানেই প্রত্যেকটি ফলই দুই দুই প্রকারের। (৫৩) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৫৪) তারা রেশমের মোটা আস্তরণের বিছানার উপরে বালিশে হেলান দিয়ে বসবে। আর ঐ বাগানের ফলগুলো বুলে থাকবে। (৫৫) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৫৬) ওর মধ্যে থাকবে আনত নয়না রমণীরা, যাদেরকে ইতিপূর্বে কোন মানুষ বা জ্বীন স্পর্শ করেনি। (৫৭) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৫৮) তারা নীলকান্তমনি ও প্রবালের ন্যায় সৌন্দর্যমণ্ডিত। (৫৯) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৬০) ভাল কাজের পুরস্কার ভাল ছাড়া আর কি হতে পারে? (৬১) অতএব, তোমরা তোমাদের প্রভুর কোন্ কোন্ বিষয় অস্বীকার করবে?

(৬২) এছাড়াও আরো দুটি বাগান আছে। (৬৩) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৬৪) গাঢ় সবুজ রঙের। (৬৫) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৬৬) এতেও ফেনায়িত দুটি প্রবহমান ঝরণা থাকবে। (৬৭) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৬৮) তাতে থাকবে ফল, খেজুর এবং ডালিম। (৬৯) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৭০) সেখানে থাকবে সচ্ছরিত্র সুন্দরী রমণীগণ। (৭১) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৭২) ‘হুর’ (স্বর্গের অপরূপা অঙ্গরা) তাঁবুতে সুরক্ষিত। (৭৩) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৭৪) এর পূর্বে কোন মানুষ বা জ্বীন এদেরকে স্পর্শ করে নি। (৭৫) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৭৬) তারা সবুজ মসনদে মূল্যবান গালিচার উপরে হেলান দিয়ে বসবে। (৭৭) অতএব, তোমরা তোমাদের প্রভুর কোন্ কোন্ বিষয় অস্বীকার করবে? (৭৮) কত মহান তোমার প্রভুর নাম যিনি মহিমাময় ও মহানুভব!

অধ্যায় ৫৬ঃ আল - ওয়াক্কিআহ (অনিবার্য ঘটনা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) যখন মহাপ্রলয় সংঘটিত হবে। (২) এর সংঘটন অস্বীকার করার নয়। (৩) তা কাউকে করবে ভুলুন্ঠিত, কাউকে করবে সমুন্নত। (৪) যখন পৃথিবী প্রবলভাবে কম্পিত হবে। (৫) পর্বতসমূহ ভেঙে চুরমার হয়ে যাবে। (৬) তা বিক্ষিপ্ত ধূলিকণায় পরিণত হবে। (৭) আর তোমরা

তিন শ্রেণিতে বিভক্ত হয়ে যাবে।^১

(৮) অতএব, দক্ষিণ-পন্থী, কত সৌভাগ্যশালী দক্ষিণ-পন্থীরা। (৯) আর বাম-পন্থী, কত নিকৃষ্ট এই বাম-পন্থীরা। (১০) আর অগ্রগামীরা তো অগ্রগামীই থাকবে। (১১) তারাই সান্নিধ্যপ্রাপ্ত। (১২) অনুগ্রহের উদ্যানে। (১৩) এদের বৃহৎ সংখ্যা পূর্ববর্তীদের মধ্য থেকে হবে। (১৪) এবং অল্প সংখ্যক পরবর্তীদের মধ্যে থেকে হবে। (১৫) স্বর্ণখচিত আসন সমূহে (১৬) বালিশে হেলান দিয়ে মুখো-মুখি বসবে। (১৭) চির-কিশোর বালকেরা তাদের কাছাকাছি ঘুরবে (১৮) পানপাত্র, কলস ও বিশুদ্ধ শরাবের পেয়ালা নিয়ে। (১৯) যা পান করলে মাথা ব্যাথাও হবে না, জ্ঞান হারা হবে না। (২০) আর ফলের মধ্যে যা খুশী বেছে নাও। (২১) আর পাখির মাংস যা পছন্দ। (২২) এবং ডাগর নয়না অঙ্গরা (২৩) সুরক্ষিত মুক্তার মত। (২৪) তাদের কৃত-কর্মের প্রতিদান স্বরূপ। (২৫) সেখানে তারা কোন অসার কথা কিংবা পাপের কথা শুনবে না। (২৬) শুনবে শুধু শান্তি আর শান্তি।

(২৭) আর দক্ষিণাপন্থীরা কি সৌভাগ্যবান দক্ষিণ পন্থীরা। (২৮) তারা থাকবে উচ্চ স্থানে কাঁটাবিহীন বদরিকা বৃক্ষে হেলান দিয়ে,

^১ বিঃ দ্রঃ (৫৬ঃ ০৭) পার্থিব জীবনে মানুষ লক্ষ্য করে, সে স্বাধীনভাবে তার ইচ্ছামত কাজ করতে পারে। তাই পরজগতের প্রতিফল সম্পর্কে তার মনে কোন প্রভাব পড়ে না। পরজগতের সৃষ্টি, ইহজগত সৃষ্টির মতোই স্বাভাবিক বিষয়। যখন আসবে তখন সম্পূর্ণ গঠনতন্ত্র উল্টে যাবে। উচ্চ মর্যাদাধারী ব্যক্তির অবনমন ঘটবে, আবার নিম্নতর মর্যাদাধারী ব্যক্তিদের সমোন্নতি ঘটবে। সমগ্র মানব সম্প্রদায় তিনটি শ্রেণীতে বিভক্ত হবে- অগ্রবর্তী শ্রেণী (আস-সাবিকুন), দক্ষিণপন্থী শ্রেণী (আসহাব আল - ইয়ামিন) এবং বামপন্থী শ্রেণী (আসহাব আস-সিমাল)।

(২৯) কাঁদিওয়ালা কলাগাছে, (৩০) সম্প্রসারিত ছায়ায়, (৩১) প্রবাহমান জলে, (৩২) প্রচুর ফলমূলে, (৩৩) যা কখনও শেষ হবে না, নিষিদ্ধও হবে না। (৩৪) আর উন্নত বিছানা। (৩৫) আমি ঐ রমণীদের বিশেষভাবে তৈরী করেছি। (৩৬) তাদেরকে কুমারী অবস্থায় রেখেছি। (৩৭) মন-মোহিনী ও সমবয়সী করে। (৩৮) দক্ষিণ-পশ্চিমদের জন্য। (৩৯) পূর্ববর্তীদের মধ্যে থেকেও একটি বড় দল হবে (৪০) এবং পরবর্তীদের মধ্য থেকেও একটি বড় দল হবে।

(৪১) আর বামপশ্চী, কত নিকৃষ্ট বামপশ্চীরা। (৪২) আগুন এবং ফুটন্ত জলে, (৪৩) আর কালো ধোঁয়ার ছায়ায়, (৪৪) যা শীতলও নয়, আরামপ্রদও নয়। (৪৫) ইতিপূর্বে এরা ছিল সম্পন্ন লোক। (৪৬) তারা বড় পাপে অনড় থাকত। (৪৭) আর বলতঃ আমরা যখন মরে যাব এবং মাটি ও অস্থিতে পরিণত হব, তারপরও কি আমাদের পুনর্জীবিত করা হবে? (৪৮) আর আমাদের পূর্ববর্তী পিতৃ-পুরুষদেরকেও? (৪৯) বলঃ পূর্ববর্তীরা ও পরবর্তীরা (৫০) সবাইকে এক নির্ধারিত দিনের সময়ে একত্রিত করা হবে। (৫১) অতঃপর হে পথভ্রষ্ট অবিশ্বাসীরা। (৫২) অবশ্যই যাকুম গাছ থেকে আহার করবে। (৫৩) তা দিয়ে উদর পূর্ণ করবে। (৫৪) তার উপর গরম জল পান করবে। (৫৫) তৃষণার্ত উটের মত পান করবে। (৫৬) এটাই হবে প্রতিদানের দিনে তাদের আপ্যায়ন।

(৫৭) আমিই তো তোমাদের সৃষ্টি করেছি। অতএব, তোমরা বিশ্বাস করছ না কেন? (৫৮) তোমরা যে (শুক্র) নিগত কর, সে সম্পর্কে ভেবে দেখেছ? (৫৯) তোমরা এটা সৃষ্টি কর, না আমি সৃষ্টি করি? (৬০) আমি তোমাদের মধ্যে মৃত্যু নির্ধারণ করেছি এবং আমি এতে অক্ষম নই। (৬১) তোমাদের অবস্থা পরিবর্তন করতে এবং এমন আকৃতি দিতে যা তোমরা জানো না। (৬২) তোমরা কি প্রথমবারের জন্ম সম্পর্কে জানো? তাহলে

এথেকে শিক্ষা নিচ্ছ না কেন? (৬৩) তোমরা যে বীজ বপণ করো সে সম্পর্কে চিন্তা করেছ কি? (৬৪) তোমরা কি তা উৎপন্ন করো, না আমিই উৎপন্নকারী? (৬৫) আমি ইচ্ছা করলে তাকে খড়কুটো করে দিতে পারি। তোমরা তখন হতবাক হয়ে থাকবে। (৬৬) বলবেঃ আমরা তো ক্ষতিগ্রস্ত। (৬৭) বরং আমরা সম্পূর্ণ বঞ্চিত। (৬৮) তোমরা যে জল পান কর সে সম্পর্কে ভেবে দেখেছ কি? (৬৯) তোমরা কি তা মেঘ থেকে বর্ষণ করেছ, না আমিই বর্ষণকারী। (৭০) যদি আমি ইচ্ছা করি তাহলে তা অত্যন্ত লবণাক্ত করে দিতে পারি। তবুও তোমরা কেন কৃতজ্ঞতা প্রকাশ করো না। (৭১) তোমরা যে আগুন জ্বালাও সে সম্পর্কে ভেবে দেখেছ কি? (৭২) তার গাছ কি তোমরা সৃষ্টি করেছ, না আমিই তা সৃষ্টিকারী। (৭৩) আমি তা একটি স্মারক বানিয়েছি, আর পথচারীদের জন্য একটি লাভদায়ক বস্তু। (৭৪) অতএব তুমি তোমার মহান প্রতিপালকের নামের স্তুতি কর।

(৭৫) উপরন্তু, আমি শপথ করছি অস্ত্রাচলের তারকারাজীর। (৭৬) যদি তোমরা ভেবে দেখ এ এক মস্ত বড় শপথ। (৭৭) নিঃসন্দেহে এ হল মহা সম্মানিত কুরআন। (৭৮) এক সুরক্ষিত গ্রন্থে। (৭৯) একে সেই স্পর্শ করে, যাকে পবিত্র করা হয়েছে। (৮০) বিশ্ব জগতের প্রভুর পক্ষ থেকে অবতীর্ণ। (৮১) তবুও কি তোমরা এই বাণী উপেক্ষা করছো? (৮২) তোমরা কি এটা প্রত্যাখ্যান করাকেই তোমাদের উপজীব্য করে নিয়েছ?

(৮৩) তবে কেন নয়, যখন প্রাণ কণ্ঠনালীতে চলে আসে। (৮৪) আর তোমরা তখন ফ্যাল ফ্যাল করে তাকাতে থাক। (৮৫) আর আমি থাকি তোমাদের চেয়েও তার বেশি কাছে; কিন্তু তোমরা তা দেখ না। (৮৬) যদি তোমরা আমার কত্বাধীন না হও - (৮৭) তাহলে তোমরা

তার প্রাণ ফিরিয়ে আনো না কেন, যদি তোমরাই সঠিক হও? (৮৮) যদি সে প্রিয় বান্দাদের একজন হয়। (৮৯) তাহলে সেখানে তার জন্য আছে শান্তি, উত্তম সুখ সামগ্রী আর অনুগ্রহের বাগান। (৯০) আর যদি সে ডান-পক্ষীদের মধ্যে হয়। (৯১) তাহলে তাকে শান্তির অভিবাদন জানান হবে যেহেতু সে ডান-পক্ষীদের একজন। (৯২) আর যদি সে অবিশ্বাসী, পথভ্রষ্টদের মধ্যে কেউ হয়। (৯৩) তাহলে তার জন্য আছে উত্তম জলের আপ্যায়ন। (৯৪) আর নরকের দহন। (৯৫) নিশ্চয় এটা চূড়ান্ত সত্য। (৯৬) অতএব তুমি তোমার মহান প্রভুর নামে স্তুতি করো।

অধ্যায় ৫৭ঃ আল-হাদীদ (লৌহ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আকাশ ও ধরণীতে যা কিছু আছে সবই ঈশ্বরের স্তুতি করে। তিনি মহাপরাক্রমশালী, অসীম প্রজ্ঞাবান। (২) আকাশ ও ধরণীর সম্রাজ্য তাঁরই। তিনিই জীবন দান করেন এবং মৃত্যু দান করেন। তিনি সবকিছু করতে সক্ষম। (৩) তিনিই আদি, তিনিই অন্ত, তিনিই পরোক্ষ তিনিই প্রত্যক্ষ, তিনিই সর্বজ্ঞাতা। (৪) তিনিই আকাশ ও ধরণী ছয় দিনে (সময়ে) সৃষ্টি করেছেন। অতঃপর তিনি সিংহাসনে সমাসীন হয়েছেন। যা কিছু ধরণীতে প্রবেশ করে এবং যা কিছু ধরণী হতে নির্গত হয়, আকাশ থেকে যা কিছু নেমে আসে এবং আকাশে যা কিছু উঠে যায়, সবকিছুই তিনি জানেন। তোমরা যেখানেই থাকো তিনি তোমাদের সঙ্গেই আছেন, আর তোমরা যা কিছু করো, তিনি দেখতে পান। (৫) আকাশ ও ধরণীর সম্রাজ্য তাঁরই, আর ঈশ্বরের দিকেই সর্ব বিষয়ের প্রত্যাবর্তন। (৬) তিনি রাতকে দিনের মধ্যে প্রবেশ করান এবং দিনকে রাতের মধ্যে প্রবেশ করান এবং তিনি অন্তর্যামী।

(৭) তোমরা ঈশ্বর ও তাঁর বার্তাবাহকের প্রতি বিশ্বাস স্থাপন কর এবং তিনি তোমাদেরকে যা কিছুর উত্তরাধিকারী করেছেন তা থেকে ব্যয় করো। তোমাদের মধ্যে যারা বিশ্বাস আনবে ও ব্যয় করবে তাদের জন্য রয়েছে বড় প্রতিদান। (৮) তোমাদের কি হয়েছে যে, ঈশ্বরের প্রতি বিশ্বাস স্থাপন করছো না, অথচ পয়গম্বর তোমাদেরকে ডাকছে যে, আপন প্রভুর প্রতি বিশ্বাস স্থাপন কর এবং তিনি তোমাদের থেকে প্রতিশ্রুতিও নিয়েছেন। যদি তোমরা আস্থাবান হও। (৯) তিনিই তাঁর বান্দাদের প্রতি স্পষ্টবাণী অবতীর্ণ করেন, এজন্য যে, তিনি তোমাদেরকে অন্ধকার থেকে আলোর দিকে নিয়ে যেতে চান। নিঃসন্দেহে ঈশ্বর তোমাদের প্রতি অত্যন্ত স্নেহপরায়ণ ও অতি দয়ালু। (১০) আর তোমাদের হয়েছে কি যে, তোমরা ঈশ্বরের পথে ব্যয় করো না, অথচ সমস্ত আকাশ ও ধরণী শেষ পর্যন্ত ঈশ্বরেরই থাকবে। তোমাদের মধ্যে যারা বিজয়ের পরে ব্যয় করেছে ও যুদ্ধ করেছে তারা ওদের সমান হতে পারে না যারা বিজয়ের পূর্বে ব্যয় করেছে এবং যুদ্ধ করেছে,^১ তবে ঈশ্বর সবাইকে কল্যাণের প্রতিশ্রুতি দিয়েছেন। তোমরা যা কিছু করো ঈশ্বর তা জানেন।

(১১) এমন কে আছে যে, ঈশ্বরকে ঋণ দিতে পারে, ভাল ঋণ? তার জন্য তিনি তা বহুগুণ বৃদ্ধি করে দেবেন। উপরন্তু তার জন্যে রয়েছে সম্মানজনক প্রতিফল। (১২) সেদিন তুমি আস্থাবান পুরুষ এবং আস্থাবান মহিলাদের দেখবে তাদের সামনে ও ডাইনে তাদের জ্যোতিতে উদ্ভাসিত হয়ে আছে। আজ তোমাদের জন্য স্বর্গোদ্যানের সুসংবাদ, যার পাদদেশ দিয়ে নদী প্রবাহিত হবে, তোমরা ওখানে চিরকাল থাকবে, এটাই মহাসাফল্য।

^১ বিঃ দ্রঃ- (৫৭ : ১০) পরিচয় অংশে ১৩ থেকে ১৫ পৃষ্ঠা দ্রষ্টব্য।

(১৩) সেদিন কপটাচারী পুরুষ ও কপটাচারী মহিলারা আস্ত্রাবানদের বলবে, আমাদের জন্য একটু অপেক্ষা কর, যাতে আমরা কিছুটা তোমাদের আলো পাই। বলা হবেঃ তোমরা তোমাদের পিছনের দিকে ফিরে যাও এবং নিজেদের আলো খোঁজ করো। অতঃপর তাদের মাঝে একটি প্রাচীর খাড়া করে দেওয়া হবে, যাতে একটি দরজা থাকবে। তার ভিতরের দিকে থাকবে কৃপা এবং বাইরের দিকে থাকবে শাস্তি। (১৪) তারা আস্ত্রাবানদের ডেকে বলবে, আমরা কি তোমাদের সাথে ছিলাম না? তারা বলবে, হ্যাঁ; কিন্তু তোমরা নিজেরাই নিজেদেরকে বিপদগ্রস্থ করেছ। তোমরা প্রতীক্ষা করেছ এবং সন্দেহ পোষণ করতেই থেকেছ। আর মিথ্যা আশা তোমাদেরকে ধোঁকা দিয়েছে। অবশেষে ঈশ্বরের নির্ণয় এসে গেছে। আর প্রতারক তোমাদেরকে ঈশ্বর সম্পর্কে প্রতারিত করেছে। (১৫) অতএব আজ তোমাদের কাছ থেকে কোন মুক্তিপণ নেওয়া হবে না আর যারা অস্বীকার করেছিল তাদের কাছ থেকেও না। তোমাদের ঠিকানা নরক। ওটাই তোমাদের সাথী। ওটা কতই না নিকৃষ্ট ঠিকানা!

(১৬) বিশ্বাসীদের জন্য কি সেই সময় আসেনি, যখন সে অতি বিনিত হৃদয়ে ঈশ্বর ও তাঁর সত্যের স্মরণে আনত হয়ে পড়ে; যাতে তারা তাদের মত না হয়ে যায়, যাদেরকে পূর্বে গ্রস্থ দেওয়া হয়েছিল, কিন্তু সময় অতিবাহিত হওয়ায় সাথে সাথে তাদের হৃদয় কঠোর হয়ে গিয়েছিল। আর তাদের মধ্যে অনেকেই অবাধ্য। (১৭) জেনে রেখো, ঈশ্বর ভূমিকে তার মৃত্যুর পরে জীবিত করেন। আমি তোমাদের জন্য আমার নিদর্শনসূমহ বর্ণনা করে দিয়েছি যাতে তোমরা বুঝতে পারো।

(১৮) নিঃসন্দেহে দানশীল পুরুষ ও দানশীলা মহিলা এবং যারা ঈশ্বরকে ঋণ দিয়েছে, উত্তম ঋণ। তাদেরকে বহুগুন বেশী প্রতিদান দেওয়া হবে। উপরন্তু

তাদের জন্য রয়েছে এক মহাসম্মানিত প্রতিদান। (১৯) আর যারা ঈশ্বর ও তাঁর বার্তাবাহকের প্রতি বিশ্বাস স্থাপন করেছে, তারাই ঈশ্বরের নিকট সত্যনিষ্ঠ ও সাক্ষ্যদাতা বলে বিবেচিত, তাদের জন্য তাঁর প্রতিফল আর তাঁর জ্যোতি। আর যারা অস্বীকার করেছে এবং আমার নিদর্শন সমূহকে মিথ্যা বলেছে তারাই নরকের অধিবাসী।

(২০) জেনে রেখো, পার্থিব জীবন খেল-তামাশা ছাড়া আর কিছুই নয়, সাজ-সজ্জা, পারস্পরিক অহমিকা এবং সম্পদ ও সম্ভান-সম্ভতি বৃদ্ধির প্রতিযোগিতা ছাড়া আর কিছুই নয়। যেমন একটা বৃষ্টি, যার দ্বারা উৎপাদিত ফসল কৃষকদের মুগ্ধ করে। তারপর তা শুকিয়ে যায় এবং তুমি তাকে হলদে দেখতে পাও। অতঃপর তা খড়কুটো হয়ে যায়। পরকালে আছে কঠিন শাস্তি আর ঈশ্বরের ক্ষমা ও সম্ভৃতি। আর পার্থিব জীবন তো প্রতারণার উপকরন। (২১) তোমরা তোমাদের প্রভুর ক্ষমার দিকে অগ্রণী হও এমন এক স্বর্গের দিকে যার ব্যপকতা আকাশ ও পৃথিবীর সমান। তা ঐ লোকদের জন্য প্রস্তুত করা হয়েছে যারা ঈশ্বর ও তাঁর বার্তাবাহকদের বিশ্বাস করে। এটাই ঈশ্বরের কৃপা, তিনি যাকে চান তাকে দিয়ে থাকেন। আর ঈশ্বর মহান কৃপার অধিকারী।

(২২) পৃথিবীতে এবং তোমাদের জীবনে এমন কোন বিপর্যয় আসে না যা আমি সংঘটিত হওয়ার পূর্বে এক গ্রন্থে লিপিবদ্ধ করিনি। নিঃসন্দেহে এটা ঈশ্বরের পক্ষে সহজ। (২৩) যাতে তোমরা যা হারাও তাতে দুঃখ না করো। আর না ঐ জিনিষে অভিমান করো যা তিনি তোমাদিগকে দিয়েছেন। আর ঈশ্বর দান্তিক অহংকারীদের পছন্দ করেন না। (২৪) যে কৃপণতা করে এবং অন্যকে কৃপণতা করতে শিক্ষা দেয়। আর যে মুখ ফিরিয়ে নেয় (সে জেনে রাখুক যে,) ঈশ্বর তো অভাবমুক্ত, প্রশংসনীয়।

(২৫) আমি আমার পয়গম্বরদেরকে নিদর্শনসহ পাঠিয়েছি এবং তাদের সাথে গ্রন্থ ও মানদণ্ড দিয়েছি, যাতে মানুষ ন্যায়বিচার প্রতিষ্ঠা করে। আর আমি লোহাও দিয়েছি যার মধ্যে প্রচণ্ড শক্তি ও মানুষের জন্য কল্যাণ রয়েছে; এজন্য যে ঈশ্বর জানতে চান, কে না দেখেও তাঁকে ও তাঁর বার্তাবাহকদেরকে সহায়তা করে। নিঃসন্দেহে ঈশ্বর মহাশক্তিধর, পরাক্রমশালী।

(২৬) আর আমি নূহ (নোয়াহ) ও ইবরাহীমকে (আব্রাহাম) পাঠিয়েছি। আর ওদের বংশধরদের পয়গম্বরত্ব ও গ্রন্থ দিয়েছি। তাদের মধ্যে কেউ কেউ ছিল সৎপথ প্রাপ্ত। আবার তাদের অনেকেই ছিল অবাধ্য। (২৭) অতঃপর তাদের অনুগামী করে আমি আমার পয়গম্বরদের পাঠিয়েছি এবং ওদেরই অনুগামী করে মারইয়ামের পুত্র ঈসাকে (যিশু) পাঠিয়েছি এবং তাকে ইনজীল (বাইবেল) প্রদান করেছি। যারা তার অনুসরণ করেছে তাদের অন্তরে দিয়েছি সহানুভূতি ও দয়া। আর সন্যাসকে তারা নিজেরাই উদ্ভাবন করে নিয়েছে, আমি তাদের উপর এটা অনিবার্য করিনি; কিন্তু তারা ঈশ্বরের সন্তুষ্টির জন্য নিজেরাই এটাকে বেছে নিয়েছে; কিন্তু এটাও তারা ঠিকভাবে পালন করতে পারেনি, অতএব ওদের মধ্যে যারা বিশ্বাস স্থাপন করেছিল তাদেরকে আমি প্রতিদান দিয়েছি; তবে তাদের মধ্যে অধিকাংশই ছিল অবাধ্য।

(২৮) হে বিশ্বাসীগণ! ঈশ্বরকে ভয় করো এবং তাঁর পয়গম্বরদের প্রতি বিশ্বাস স্থাপন করো। ঈশ্বর নিজ অনুগ্রহে তোমাদেরকে দ্বিগুণ দেবেন। এবং তোমাদেরকে এমন আলো প্রদান করবেন যা নিয়ে তোমরা পথ চলবে এবং তোমাদেরকে ক্ষমা করবেন। ঈশ্বর ক্ষমাশীল ও অতি দয়ালু। (২৯) যাতে গ্রন্থধারীরা জানতে পারে যে, ঈশ্বরের অনুগ্রহের উপর তাদের কোন নিয়ন্ত্রনের ক্ষমতা নেই। অনুগ্রহ ঈশ্বরের নিয়ন্ত্রনাধীন। তিনি যাকে ইচ্ছা করেন তা প্রদান করেন আর ঈশ্বর বিরাট অনুগ্রহের মালিক।

অধ্যায় ৫৮ : আল - মুজাদালাহ (প্রতিবাদী পক্ষ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ঈশ্বর ঐ মহিলার কথা শুনেছেন যে তার স্বামী সম্বন্ধে তোমার সাথে বাদানুবাদ করছিল এবং ঈশ্বরের কাছে অভিযোগ জানাচ্ছিল, আর ঈশ্বর তোমাদের দুজনের কথাবার্তা শুনছিলেন। নিঃসন্দেহে ঈশ্বর সবই শোনেন সবই জানেন।

(২) তোমাদের মধ্যে যারা তাদের স্ত্রীদেরকে ত্যাগ করে এই বলে যে, ‘তুমি আমার মায়ের পীঠের মতো’, তারা জেনে রাখুক, তারা তাদের মা নয়। তারা নিঃসন্দেহে বিবেকহীন এবং অসত্য কথা বলে, আর ঈশ্বর মার্জনাকারী, ক্ষমাশীল। (৩) আর যারা তাদের স্ত্রীদেরকে তাদের মায়ের সমতুল্য হিসাবে বিবৃত করে তাদেরকে ত্যাগ করে এবং পরে নিজেদের বিবৃতি প্রত্যাহার করে, তাহলে একে ওপরকে স্পর্শ করার পূর্বে যেন তারা একটি দাসমুক্ত করে, এই উপদেশ তোমাদের দেওয়া হচ্ছে। আর তোমরা যা করো ঈশ্বর তা জানেন। (৪) যার সে সামর্থ নেই সে নিরন্তর দুমাস রোযা রাখবে পারস্পরিক সংস্পর্শে আসার পূর্বেই, এটাও যারা করতে পারবে না তাহলে ৬০ জন গরীব মানুষকে আহার করাবে। তোমরা যাতে ঈশ্বর ও তাঁর বার্তাবাহকের প্রতি খাঁটি বিশ্বাস স্থাপন করো সেই জন্য এই বিধান। এগুলো ঈশ্বরের নির্ধারিত বিধান। আর অবাধ্যদের জন্য রয়েছে যন্ত্রণাদায়ক শাস্তি।

(৫) যারা ঈশ্বর ও তাঁর বার্তাবাহকের বিরুদ্ধাচারণ করে তারা লাঞ্চিত হবে, যেভাবে এদের পূর্ববতীরা লাঞ্চিত হয়েছে। আমি সুস্পষ্ট বাণী অবতীর্ণ করেছি। আর অস্বীকারকারীদের জন্য রয়েছে লাঞ্জনাকর শাস্তি। (৬) যে দিন ঈশ্বর তাদের সকলকে পুনরায় ওঠাবেন এবং তাদের কৃত-কর্ম তাদেরকে জানিয়ে দেবেন। ঈশ্বর তার হিসাব রেখেছেন, যদিও তারা তা ভুলে গেছে। ঈশ্বর সবকিছুরই সাক্ষী।

(৭) তুমি কি দেখনি যে, ঈশ্বর সবই জানেন যা কিছু আকাশ ও পৃথিবীতে বিরাজ করছে। যদি তিনজনের গোপন পরামর্শ হয় তিনি থাকেন তার চতুর্থজন হয়ে। আর যদি পাঁচজনের গোপন পরামর্শ হয় তিনি থাকেন তার ষষ্ঠ জন হয়ে। আবার এরচেয়েও কম বা বেশী জনের হলেও তারা যেখানেই থাকুক, তিনি তাদের সঙ্গে থাকেন। অতঃপর শেষ বিচারের দিন তিনি তাদেরকে তাদের কৃতকর্ম জানিয়ে দেবেন। নিঃসন্দেহে ঈশ্বর প্রত্যেক বিষয়ই অবগত আছেন। (৮) তুমি কি দেখনি যাদেরকে গোপন পরামর্শ করতে নিষেধ করা হয়েছিল, অতঃপর তারা তাই করছে, যা থেকে তাদেরকে বিরত থাকতে বলা হয়েছিল। আর তারা পয়গম্বরের প্রতি অন্যায়, রুঢ় ব্যবহার, অবাধ্যতা করার গোপন পরামর্শ করে। এবং যখন তারা তোমার কাছে আসে তখন এমন ভাবে তোমাকে শাস্তির অভিবাদন জানায় যেভাবে ঈশ্বরও তোমাকে শাস্তির অভিবাদন জানাননি। আর মনে মনে বলেঃ আমাদের এই কথায় ঈশ্বর আমাদের শাস্তি দিচ্ছেন না কেন? ওদের জন্য নরকই যথেষ্ট, তারা তাতে নিষ্কিণ্ত হবে। কত নিকৃষ্ট সেই গন্তব্য!

(৯) হে বিশ্বাসীগণ! যখন তোমরা গোপন পরামর্শ কর সে পরামর্শ যেন পাপ, অন্যায় এবং পয়গম্বরের অবজ্ঞার গোপন পরামর্শ না হয়; বরং সৎকাজ ও ঈশ্বরভীতির বিষয়ে গোপন পরামর্শ করো এবং ঈশ্বরকে ভয় কর যাঁর কাছে তোমাদেরকে একত্রিত করা হবে। (১০) (খারাপ উদ্দেশ্যে) গোপন পরামর্শ তো শয়তানের পক্ষ থেকে, যাতে সে বিশ্বাসীগণকে কষ্ট দিতে পারে, তবে ঈশ্বরের অনুমতি ছাড়া সে তাদের কোন ক্ষতি করতে পারবে না। আর সত্যে বিশ্বাস স্থাপনকারীগণের উচিত ঈশ্বরের উপরেই ভরসা রাখা।

(১১) হে বিশ্বাসীগণ! সমাবেশে যখন তোমাদেরকে একে ওপরকে

জায়গা করে দেওয়ার জন্য বলা হয়, তোমরা জায়গা করে দেবে, তাহলে ঈশ্বরও তোমাদের জায়গা করে দেবেন। আর যখন উঠে যেতে বলা হয়, তোমরা উঠে যাবে। তোমাদের মধ্যে যারা সত্যে বিশ্বাস স্থাপনকারী এবং যাদেরকে জ্ঞান প্রদান করা হয়েছে, ঈশ্বর তাদের উচ্চ মর্যাদা দান করবেন। তোমরা যা কিছুই করো না কেন ঈশ্বর সে সম্পর্কে অবগত।

(১২) হে বিশ্বাসীগণ! যখন তোমরা পয়গম্বরের সাথে একান্তে কথা বলতে চাইবে তখন তোমাদের একান্ত কথার পূর্বে কিছু দান প্রদান করবে। তোমাদের জন্য এটাই উত্তম এবং অধিক পবিত্র। তবে যদি দেওয়ার মতো কিছু না পাও তাহলে ঈশ্বর ক্ষমাশীল ও অতি দয়ালু। (১৩) তোমরা কি একান্ত কথার পূর্বে দান প্রদানে ভয় পাচ্ছে? ঠিক আছে যদি এমন হয় যে, তোমরা দান দিতে পারলে না, আর ঈশ্বর তোমাদেরকে ক্ষমা করে দিলেন, তখন প্রার্থনা করো এবং সম্পদের উদ্বৃত্ত যথা নিয়মে দান করো। ঈশ্বর ও তাঁর বার্তাবাহকের নির্দেশ পালন করো। আর তোমরা যা করো ঈশ্বর সে সম্পর্কে অবগত।

(১৪) তুমি কি ঐ লোকদের দেখনি, যারা এমন লোকদের সাথে বন্ধুত্ব করে যাদের উপর ঈশ্বরের ক্রোধ আছে? তারা তোমাদের দলভুক্ত নয় বা তাদের দলভুক্তও নয়, তারা জেনে বুঝে মিথ্যা বিষয়ে শপথ করে। (১৫) ঈশ্বর ওদের জন্য কঠিন শাস্তি প্রস্তুত করে রেখেছেন, নিঃসন্দেহে তারা যা করে তা কত খারাপ। (১৬) তারা নিজেদের শপথসমূহকে ঢাল বানিয়ে রেখেছে, আর তারা ঈশ্বরের পথে চলতে বাধা দিয়েছে, অতএব ওদের জন্য রয়েছে অপমানজনক শাস্তি।

(১৭) ওদের সম্পত্তি এবং ওদের সমস্ত ঈশ্বরের শাস্তি থেকে ওদেরকে মোটেও বাঁচাতে পারবে না। তারা নরকবাসী। তারা সেখানেই থাকবে।

(১৮) যে দিন ঈশ্বর ওদের সবাইকে ওঠাবেন। তখন তারা তাঁর কাছে সেরকমই শপথ করবে যেমন তারা তোমাদের কাছে শপথ করত। আর তারা জানে যে তারা কিসের উপরে আছে, জেনে রেখে তারাই মিথ্যাবাদী। (১৯) শয়তান ওদেরকে বশীভূত করে ফেলেছে, আর সে ওদেরকে ঈশ্বরের স্মরণ ভুলিয়ে দিয়েছে, তারা শয়তানের দল। জেনে রেখো! শয়তানের দল অবশ্যই ধ্বংস হবে। (২০) যারা ঈশ্বর ও তাঁর বার্তাবাহকের বিরোধিতা করে তারা চরম লাঞ্ছিতদের দলভুক্ত। (২১) ঈশ্বর ঘোষণা করেছেন যে, আমি আর আমার পয়গম্বর অবশ্যই বিজয়ী হব। নিঃসন্দেহে ঈশ্বর মহাশক্তিধর, পরাক্রমশালী।

(২২) তুমি এমন কোন সম্প্রদায় পাবে না যে, যারা ঈশ্বর ও পরলোক বিশ্বাস করে অথচ এমন লোকদের সাথে বন্ধুত্ব করে যারা ঈশ্বর ও তাঁর বার্তাবাহকের বিরোধী, যদিও তারা তাদের পিতা বা তাদের ভাই অথবা পুত্র অথবা তার পরিবারের কেউ হোক না কেন। এরাই সেই লোক যাদের অন্তরে ঈশ্বর বিশ্বাস স্থাপন করেছেন। এবং আপন অনুগ্রহে যাদেরকে কৃতার্থ করেছেন। তিনি তাদেরকে এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে, সেখানে তারা চিরকাল থাকবে, ঈশ্বর তাদের প্রতি সন্তুষ্ট এবং তারাও ঈশ্বরের প্রতি সন্তুষ্ট। এরাই ঈশ্বরের দল, আর ঈশ্বরের দলই সফলকাম।

অধ্যায় ৫৯ : আল - হাশর (নির্বাসন)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আকাশ ও ধরণীর সবকিছুই ঈশ্বরের পবিত্রতা বর্ণনা করে। তিনি পরাক্রমশালী, অসীম প্রজ্ঞাবান। (২) তিনিই সেই সত্ত্বা যিনি গ্রন্থধারী

অস্বীকারকারীদের প্রথমবারের মত একত্রিত করে তাদের ঘর থেকে বিতাড়িত করে দিয়েছেন। তোমরা অনুমানও করতে পারোনি যে, তারা নির্বাসিত হবে, তারা মনে করত যে, তাদের দুর্গ তাদেরকে ঈশ্বর থেকে রক্ষা করবে; কিন্তু ঈশ্বর এমন জায়গা থেকে তাদের কাছে পৌঁছালেন যা তাদের কল্পনারও অতীত ছিল। আর তাদের অন্তরে ভীতি সঞ্চার করলেন। তারা নিজের হাতে নিজেদের ঘরবাড়ী ধ্বংস করছিল এবং বিশ্বাসীদের হাতেও। অতএব, হে দৃষ্টিসম্পন্ন ব্যক্তির! শিক্ষা নাও।

(৩) ঈশ্বর যদি এদের উপর নির্বাসন ধার্য না করতেন তাহলে এই পার্থিব জগতেই তাদের শাস্তি দিয়ে দিতেন, আর পরলোকে ওদের জন্য রয়েছে নরক যন্ত্রণা। (৪) এজন্যে যে, তারা ঈশ্বর ও তাঁর পয়গম্বরের বিরোধিতা করেছে আর যে ব্যক্তি ঈশ্বরের বিরোধিতা করে ঈশ্বর অবশ্যই তাকে কঠোর শাস্তি দেবেন। (৫) তোমরা যে কিছু কিছু খেজুর গাছ কেটে দিয়েছ এবং কতক না কেটে রেখে দিয়েছ তাতে ঈশ্বরেরই নির্দেশে, এজন্য যে, তিনি অবাধ্যদেরকে অপমাণিত করবেন।

(৬) ঈশ্বর তাঁর পয়গম্বরকে তাদের কাছ থেকে যা কিছু লব্ধ সম্পদ দিয়েছেন তার জন্য তোমরা ঘোড়া বা উটে আরোহন করে অভিযান চালাওনি; কিন্তু ঈশ্বর তাঁর পয়গম্বরদের যাকে ইচ্ছা ক্ষমতা দান করেন। আর ঈশ্বর সবকিছুই করতে সক্ষম। (৭) ঈশ্বর তাঁর পয়গম্বরকে জনপদবাসীদের কাছ থেকে যা কিছু লব্ধ সম্পদ দিয়েছেন, তা ঈশ্বর ও পয়গম্বরের জন্য, আত্মীয় স্বজনের জন্য, অনাথ এবং নির্ধন ও মুসাফিরদের জন্য। যাতে তা তোমাদের সম্পদশালীদের মধ্যে আবর্তিত না হয়। আর পয়গম্বরতোমাদের যা কিছু দেয় তা গ্রহণ করো এবং যা নিতে নিষেধ করে তা নিওনা। আর ঈশ্বরকে ভয় করো। ঈশ্বর কঠোর শাস্তিদাতা। (৮) ঐ সব দেশত্যাগী গরীবদের জন্য, যারা

তাদের ঘর-বাড়ী ও ধন-সম্পদ থেকে বহিস্কৃত হয়েছে। তারা ঈশ্বরের অনুগ্রহ ও সম্ভ্রুতি কামনা করে আর তারা ঈশ্বর ও তাঁর পয়গম্বরকে সহায়তা করে, এরাই সঠিক লোক।

(৯) আর যারা প্রথম থেকেই মদীনায় বসবাস করে আর নিজ আস্থায় অটুট এবং যারা দেশত্যাগ করে ওদের কাছে এসেছে তাদেরকে এরা ভালবাসে, তাদেরকে যা দেওয়া হয়েছে তার জন্য তারা অন্তরে কোন আকাঙ্ক্ষা পোষণ করে না; নিজেরা অভাবগ্রস্ত হলেও নিজেদের উপর তাদেরকে অগ্রাধিকার দেয়। মনের কার্পণ্য থেকে যাদেরকে মুক্ত রাখা হয়েছে তারাই সফলকাম। (১০) আর যারা তাদের পরে এসেছে তারা বলেঃ হে আমাদের প্রভু! আমাদেরকে ক্ষমা করুন আর আমাদের ঐ ভাইদেরকেও যারা আমাদের পূর্বে বিশ্বাস স্থাপন করেছে। আর আমাদের অন্তরকে আমাদের বিশ্বস্ত ভাইদের প্রতি বিদ্বেষ থেকে মুক্ত রাখুন। হে আমাদের প্রভু! আপনিতো অত্যন্ত স্নেহপরায়ণ এবং অত্যন্ত কৃপাশীল।

(১১) তুমি কি ঐ লোকদের দেখনি, যারা কপটতায় লিপ্ত? তারা তাদের গ্রন্থধারী (ইহুদী ও খৃষ্টান) ভাইদের বলে, যদি তোমাদেরকে বহিস্কার করা হয় তাহলে আমরাও তোমাদের সাথে নিষ্ক্রান্ত হব। তোমাদের ব্যাপারে আমরা কারো কথা মানবো না। যদি তোমাদের সাথে যুদ্ধ হয় তাহলে আমরা অবশ্যই তোমাদেরকে সাহায্য করবো; কিন্তু ঈশ্বর সাক্ষ্য দিচ্ছেন, তারা অবশ্যই মিথ্যাবাদী। (১২) যদি ওদের বহিস্কার করা হয় তাহলে তারা ওদের সাথে নিষ্ক্রান্ত হবে না। আর যদি ওদের সাথে যুদ্ধ হয় তাহলে তারা ওদের সহায়তা করবে না। যদি সাহায্য করতে আশ্ৰয় সেও তাহলে তারা অবশ্যই পৃষ্ঠপ্রদর্শন করবে, অতঃপর তারা কোথাও সাহায্য পাবে না।

(১৩) নিঃসন্দেহে ওদের অন্তরে ঈশ্বরের চেয়ে তোমাদের ভয়ই বেশী। এর কারণ তারা নির্বোধ লোক। (১৪) এরা একত্রিত হয়ে কখনই তোমাদের সাথে যুদ্ধ করবে না। তবে কেবল সুরক্ষিত জনপদের মধ্যে থেকে অথবা দেয়ালের আড়াল ব্যতীত। ওদের নিজেদের মধ্যেই প্রচণ্ড সংঘাত। তুমি ওদেরকে ঐক্যবদ্ধ মনে করছো অথচ ওদের মধ্যে মনের মিল নেই। এর কারণ তারা একদল নির্বোধ লোক।

(১৫) এরা তাদের মতই, যারা এদের অব্যবহিতপূর্বে নিজেদের কৃতকর্মের পরিণতি আশ্বাদন করেছে। এদের জন্য রয়েছে যন্ত্রণাদায়ক শাস্তি। (১৬) শয়তানের মত এরা মানুষকে বলে অস্বীকারকারী হয়ে যাও। আর যখন সে অস্বীকারকারী হয়ে যায় তখন সে বলেঃ তোমাদের প্রতি আমি বিরক্ত। আমি ঈশ্বরকে ভয় করি যিনি সমস্ত ব্রহ্মাণ্ডের প্রভু। (১৭) অতঃপর দুজনের শেষ পরিণতি নরক, যেখানে উভয়েই চিরকাল থাকবে আর অত্যাচারীর শাস্তি এটাই।

(১৮) হে বিশ্বাসীগণ! ঈশ্বরকে ভয় করো। প্রত্যেক ব্যক্তির ভেবে দেখা উচিত, আগামী কালের জন্য সে কি প্রেরণ করল। আর ঈশ্বরকে ভয় করো। নিঃসন্দেহে তোমরা যা কর ঈশ্বর সবই অবগত। (১৯) আর তোমরা ওদের মত হয়ে যেওনা যারা ঈশ্বরকে ভুলে গেছে। যার ফলে ঈশ্বরও ওদেরকে ওদের প্রাণের কথা ভুলিয়ে দিয়েছেন। এরাই হল অবাধ্য। (২০) স্বর্গের অধিবাসী আর নরকের অধিবাসী কখনই সমান হতে পারে না। স্বর্গের অধিবাসীরাই সফলকাম।

(২১) আমি যদি এই কুরআনকে পাহাড়ের উপরে অবতীর্ণ করতাম তাহলে তুমি দেখতে সে ঈশ্বরের ভয়ে ধসে গেছে এবং বিদীর্ণ হয়ে গেছে। আমি মানুষের জন্য এসব দৃষ্টান্ত বর্ণনা করি, যাতে তারা চিন্তা করে।

(২২) তিনিই ঈশ্বর যিনি ছাড়া কেউই উপাস্য নেই, পরোক্ষ ও প্রত্যক্ষ সম্পর্কে অবগত, তিনি পরম করুণাময়, অসীম দয়ালু। (২৩) তিনিই ঈশ্বর, যিনি ব্যতীত কোনও উপাস্য নেই। মহাঅধিপতি, অভাবমুক্ত, পরম শান্তিদাতা, মহাসংরক্ষক, পরাক্রমশালী, মহাশক্তিবান, মহানুভব, মানুষ তাঁর সাথে যে অংশীদার বানায় তিনি তা থেকে পবিত্র। (২৪) তিনিই ঈশ্বর সৃষ্টিকর্তা, মহাউদ্ভাবক, মহারূপকার, উত্তম নামসমূহ তাঁরই। আকাশ ও ধরণীর সবকিছুই তাঁরই স্তুতি করছে। তিনি পরাক্রমশালী, অসীম প্রজ্ঞাবান।

অধ্যায় ৬০ঃ আল-মুমতাহিনা (পরীক্ষিতা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে বিশ্বাসীগণ! তোমরা আমার শত্রুদের এবং তোমাদের শত্রুদের বন্ধুরূপে গ্রহণ করো না। তোমরা কি তাদের কাছে বন্ধুত্বের বার্তা পাঠাও; অথচ তোমাদের কাছে যে সত্য এসেছে তারা তা প্রত্যাখ্যান করেছে। তারা তোমাদের এবং পয়গম্বরকে একারণেই বহিস্কার করেছে যে, তোমরা তোমাদের প্রভু ঈশ্বরের প্রতি বিশ্বাস স্থাপন করেছো। তোমরা যদি আমার পথে সংগ্রাম করার জন্য এবং আমার সম্ভূতি লাভের উদ্দেশ্যে বের হয়ে থাকো, তবে কিভাবে গোপনে তাদের সাথে যোগাযোগ কর? আমি জানি তোমরা যা গোপন করো আর যা প্রকাশ করো। আর তোমাদের মধ্যে যে এটা করছে, সে অবশ্যই সরল পথ থেকে বিচ্যুত হয়েছে। (২) তারা যদি তোমাদেরকে নাগালে পায় তাহলে তারা তোমাদের সাথে শত্রুতা করবে। তারা হাত এবং মুখ দ্বারা তোমাদের কষ্ট দেবে। আর চাইবে যে, তোমরাও যে কোন প্রকারে অস্বীকারকারী হয়ে যাও। (৩) তোমাদের আত্মীয়-স্বজন এবং তোমাদের সম্মান-সম্মতি পুনরুত্থানের দিনে কোনই কাজে আসবে না। তিনি

তোমাদের মধ্যে নিষ্পত্তি করবেন। তোমরা যা কর ঈশ্বর তা দেখতে পান।

(৪) তোমাদের জন্য ইবরাহীম (আব্রাহাম) ও তার সঙ্গীদের মধ্যে উত্তম আদর্শ (নমুনা) রয়েছে। যখন তারা তাদের সম্প্রদায়কে বলেছিলঃ আমরা তোমাদের থেকে আলাদা এবং তোমরা ঈশ্বর ব্যতীত যাকে উপাসনা কর তার সাথে আমাদের কোন সম্পর্ক নেই। আমরা তোমাদেরকে প্রত্যাখ্যান করলাম আর আমাদের ও তোমাদের মধ্যে চিরকালের জন্য শত্রুতা ও বিদ্বেষ সৃষ্টি হল, যতক্ষণ না তোমরা এক ঈশ্বরের প্রতি বিশ্বাস স্থাপন করো। তবে ইবরাহীম (আব্রাহাম) তার পিতাকে বলেছিলঃ আমি তোমার জন্য ক্ষমা প্রার্থনা করবো। যদিও ঈশ্বরের সামনে তোমার জন্য আমার কিছু করার ক্ষমতা নেই। হে আমাদের প্রতিপালক! আমরা তোমার উপরই ভরসা করেছি এবং তোমার কাছেই ফিরে এসেছি, আর তোমার কাছেই প্রত্যাবর্তন। (৫) হে আমাদের প্রতিপালক! আমাদেরকে অবজ্ঞাকারীদের কাছে উৎপীড়নের পাত্র করো না। হে আমাদের প্রতিপালক! আমাদের ক্ষমা করো। তুমিই তো নিঃসন্দেহে মহা পরাক্রমশালী অসীম প্রজ্ঞাবান। (৬) নিঃসন্দেহে তোমাদের জন্য তাদের মধ্যে উত্তম আদর্শ রয়েছে, অবশ্য যারা ঈশ্বর ও পরকাল প্রত্যাশা করে। আর যে বিমুখ হয় সে জেনে রাখুক ঈশ্বর অভাবমুক্ত, সমস্ত প্রশংসার অধিকারী। (৭) সম্ভবতঃ ঈশ্বর তোমাদের এবং ওদের মধ্যে বন্ধুত্ব সৃষ্টি করে দেবেন, যাদের সাথে তোমাদের শত্রুতা আছে। ঈশ্বরই সবকিছুই করতে পারেন এবং ঈশ্বর ক্ষমাশীল ও অতি দয়ালু।

(৮) যারা দ্বীনের (ধর্মের) ব্যাপারে তোমাদের সাথে যুদ্ধ করেনি এবং তোমাদেরকে তোমাদের ঘর-বাড়ী থেকে বহিস্কার করে দেয়নি, তাদের সাথে সদাচার করতে এবং তাদের সাথে ন্যায় করতে ঈশ্বর তোমাদের নিষেধ করেন না, ঈশ্বর তো ন্যায়বিচারকারীদের ভাল বাসেন। (৯) ঈশ্বর

কেবল তাদের সম্পর্কে নিষেধ করেন যারা ধর্মীয় কারণে তোমাদের সাথে যুদ্ধ করে আর তোমাদের ঘর-বাড়ী থেকে তোমাদের উৎখাত করেছে এবং তোমাদেরকে বের করে দিতে সাহায্য করেছে। যারা তাদের সাথে বন্ধুত্ব করে তারাই অত্যাচারী।

(১০) হে বিশ্বাসীগণ! যখন তোমাদের কাছে বিশ্বাসী মহিলাগণ হিজরত (প্রবাস) করে আসে তখন তোমরা তাদের যাচাই করো, ঈশ্বর তাদের বিশ্বস্ততা সম্পর্কে ভালভাবেই জানেন। যদি তোমরা জানতে পারো যে, তারা আস্তাবান তাহলে তাদেরকে অবিশ্বাসীদের কাছে ফেরৎ পাঠাবে না। ঐ মহিলা তাদের জন্য বৈধ নয়, আর না তারাও ওই মহিলার জন্য বৈধ। অবিশ্বাসী স্বামীরা তাদের জন্য যা ব্যয় করেছে তা তাদেরকে দিয়ে দাও। আর যদি তোমরা তাদেরকে বিবাহ করো তাহলে তোমাদের কোন পাপ নেই, যদি তোমরা তাদেরকে তাদের যৌতুক প্রদান করে থাকো। আর তোমরাও অবিশ্বাসী মহিলাদেরকে বিবাহ-বন্ধনে আটকে রেখো না। তোমরা তাদের জন্য যা ব্যয় করেছ তা চেয়ে নিতে পার। আর অবিশ্বাসীরা যা ব্যয় করেছে তাও তোমাদের কাছ থেকে চেয়ে নিতে পারে। এটাই ঈশ্বরের আদেশ, তিনি তোমাদের মধ্যে মীমাংসা করে দেন। ঈশ্বর মহাজ্ঞানী, অসীম প্রজ্ঞাবান। (১১) তোমাদের কোন স্ত্রী যদি তোমাদের ছেড়ে অবিশ্বাসীদের অধীনে চলে যায়, অতঃপর যদি তোমাদের সুযোগ আসে (তাকে তাদের নিকট হতে নিজের কাছে ফেরৎ নেওয়ার), তাহলে তারা যাদেরকে ছেড়ে আসে, তারা যে পরিমান যৌতুক তাদেরকে দিয়েছিল, তার সমপরিমান অর্থ তাদেরকে প্রদান কর। ঈশ্বরকে ভয় করো যাঁর উপর তোমরা বিশ্বাস স্থাপন করেছো।

(১২) হে পয়গম্বর! যখন আস্তাবতী মহিলারা তোমার কাছে এসে

এই মর্মে আনুগত্যের শপথ করে যে, তারা ঈশ্বরের সাথে কোন কিছুকে অংশীদার স্থাপন করবে না, চুরি করবে না, ব্যাভিচার করবে না, আর তারা নিজ সন্তান হত্যা করবে না, জেনে শুনে মিথ্যা অপবাদ রটাবে না এবং ভালকাজে তোমার আদেশ অমান্য করবে না, তখন তুমি তাদের আনুগত্য গ্রহণ করো। ওদের জন্য ঈশ্বরের কাছে ক্ষমা প্রার্থনা করো। নিঃসন্দেহে ঈশ্বর ক্ষমাশীল ও অতি দয়ালু।

(১৩) হে বিশ্বাসীগণ! এমন লোকদের সাথে বন্ধুত্ব করো না যাদের উপর ঈশ্বর অসন্তুষ্ট। তারা তো পরকাল সম্পর্কে নিরাশ হয়ে গেছে, যেমন ভাবে অবিশ্বাসী কবর বাসীরা নিরাশ হয়ে গেছে।

অধ্যায় ৬১ঃ আস-সাফ্ফ (সারিবদ্ধ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আকাশ ও ধরণীর প্রত্যেকটি বস্তুই ঈশ্বরের উপাসনা করে। তিনি মহা পরাক্রমশালী, অসীম প্রজ্ঞাবান। (২) হে বিশ্বাসীগণ! তোমরা যা করো না তা বলো কেন? (৩) তোমরা যা কর না, তা বলা, ঈশ্বরের কাছে খুবই অসন্তোষজনক। (৪) ঈশ্বর তো ঐ লোকদের পছন্দ করেন, যারা তাঁর পথে অটল থেকে সারিবদ্ধভাবে যুদ্ধ করে যেন তারা এক লৌহ নির্মিত প্রাচীর।^১

(৫) আর যখন মুসা (মোজেস) তার সম্প্রদায়কে বলেছিলঃ হে আমার লোকেরা! তোমরা আমাকে কেন কষ্ট দিচ্ছে, অথচ তোমরা জান যে, আমি তোমাদের কাছে ঈশ্বরের প্রেরিতপয়গম্বর। অতএব যখন তারা বক্রপথ ধরল তখন ঈশ্বরও তাদের অন্তর বক্র করে দিলেন। ঈশ্বর অবিশ্বাসীদের সৎপথ প্রদান করেন না।

^১ বিঃ দ্রঃ (৬১ঃ ০৪) পরিচয় অংশে ১৩ থেকে ১৫ পৃষ্ঠা দ্রষ্টব্য।

(৬) আর যখন মারইয়ামের পুত্র ঈসা (মেরী পুত্র যিশু) বলেছিলঃ হে ইসরাইলের সন্তানেরা! আমি তোমাদের কাছে ঈশ্বরের প্রেরিত পয়গম্বর, ঐ তৌরাতের (তোরাহ) সমর্থক যা আমার পূর্ব থেকে বিদ্যমান এবং সুসংবাদ দাতা। একজন পয়গম্বর, যে আমার পরে আসবে, তার নাম হবে আহমদ। অতঃপর সে যখন স্পষ্ট প্রমাণাদী নিয়ে এল তখন তারা বললঃ এতো পরিষ্কার জাদু। (৭) তার চেয়ে বড় অন্যায়কারী আর কে হবে যে ঈশ্বরের বিরুদ্ধে মিথ্যা বানিয়ে বলে, অথচ তাকে তাঁর কাছে আত্মসমর্পনের ডাক দেওয়া হচ্ছে। ঈশ্বর অন্যায়কারী লোকদের পথ প্রদর্শন করেন না। (৮) তারা ফুৎকার দিয়ে ঈশ্বরের জ্যোতি নিভিয়ে দিতে চায়; কিন্তু ঈশ্বর তাঁর জ্যোতি পূর্ণরূপে প্রকাশ করেন, অস্বীকারকারীদের কাছে তা যতই অপ্রিয় হোক না কেন। (৯) তিনিই পাঠিয়েছেন তাঁর পয়গম্বরকে পথ নির্দেশ ও সত্য দ্বীন (ধর্ম) সহ, যাতে তিনি একে সকল ধর্মের উপর কর্তৃত্ব প্রদান করতে পারেন, অংশীবাদীদের নিকট তা যতই অপ্রিয় হোক না কেন।

(১০) হে বিশ্বাসীগণ! আমি কি তোমাদেরকে এমন এক বাণিজ্যের পথ বলে দেব, যা তোমাদেরকে এক কঠিন শাস্তি থেকে রক্ষা করবে? (১১) তোমরা ঈশ্বর ও তাঁর বার্তাবাহকের উপর বিশ্বাস স্থাপন করো এবং ঈশ্বরের পথে তোমাদের ধন-সম্পদ ও জীবন দিয়ে সংগ্রাম করো। এটাই তোমাদের জন্য সর্বোত্তম যদি তোমরা জানতে। (১২) ঈশ্বর তোমাদের পাপসমূহ ক্ষমা করবেন এবং তোমাদেরকে এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে; এবং উৎকৃষ্ট আবাস সমূহে যা চিরস্থায়ী স্বর্গের উদ্যানে অবস্থিত। এটাই বড়ো সাফল্য। (১৩) তোমাদের পছন্দনীয় আরও একটি অনুগ্রহ যেটা তোমাদের অভিপ্রায়। ঈশ্বরের সাহায্য এবং নিকটবর্তী এক বিজয়, আস্থাবানদের এর সুসংবাদ দাও।

(১৪) হে বিশ্বাসীগণ! তোমরা ঈশ্বরের সাহায্যকারী হয়ে যাও। যেমন মারইয়ামের পুত্র ঈসা (মেরীপুত্র যিশু) তার সাথীদের বলেছিলঃ কে ঈশ্বরের জন্য আমার সাহায্যকারী হতে চাও? সাথীরা বলেছিলঃ আমরাই ঈশ্বরের সাহায্যকারী। অতঃপর ইসরাইলের সন্তানদের মধ্যে কিছু লোক বিশ্বাস স্থাপন করল আর কিছু লোক অস্বীকার করল। যারা বিশ্বাস স্থাপন করেছিল আমি তাদেরকে শত্রুর বিরুদ্ধে শক্তি যুগিয়েছিলাম, ফলে তারা বিজয়ী হয়েছিল।

অধ্যায় ৬২ঃ আল-জুমুআহ (সমাবেশ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ঈশ্বরের স্তুতি করছে প্রত্যেকটি বস্তু যা আকাশসমূহে এবং ধরণীতে বিরাজমান, যিনি মহা অধিপতি, মহাপবিত্র, পরাক্রমশালী, অসীম প্রজ্ঞাবান। (২) তিনিই নিরক্ষরদের মধ্যে তাদের থেকেই একজন পয়গম্বর পাঠিয়েছেন যে তাদের কাছে তাঁর বাণীসমূহ পাঠ করে শোনায়। তাদেরকে কলুষমুক্ত করে এবং তাদেরকে গ্রন্থ ও তত্ত্ব জ্ঞান শিক্ষা দেয়। আগে তো তারা স্পষ্ট বিভ্রান্তির মধ্যেই ছিল। (৩) আর তাদের অন্যান্যের জন্য, যারা এখনও তাদের সাথে সন্মিলিত হয় নি। তিনিই মহা পরাক্রমশালী, অসীম প্রজ্ঞাবান। (৪) এটা ঈশ্বরের অনুগ্রহ, তিনি যাকে ইচ্ছা করেন তাকেই তা দান করেন। ঈশ্বর বড়ই অনুগ্রহের মালিক।

(৫) যাদেরকে তৌরাতে (তোরাহ) বাহক বানানো হয়েছিল; কিন্তু তারা তা বহন করেনি, তাদের অবস্থা পুস্তক বহনকারী গাধার মত। কতই না নিকৃষ্ট উদাহরণ ঐ লোকদের জন্য, যারা ঈশ্বরের নিদর্শন সমূহ অবিশ্বাস করেছে! ঈশ্বর অত্যাচারীদের সৎপথ দেখান না। (৬) বলঃ হে ইহুদী

সম্প্রদায়! যদি তোমাদের ভুল ধারণা থাকে যে, তোমরা অন্যদের তুলনায় ঈশ্বরের অধিক প্রিয় তাহলে তোমরা মৃত্যু কামনা কর, যদি তোমরা সঠিক হও। (৭) আর তারা কখনই মৃত্যু কামনা করবে না, তাদের নিজেদের কৃত কর্মের কারণে। ঈশ্বর অত্যাচারীদের ভাল করেই জানেন। (৮) বলঃ যে মৃত্যু থেকে তোমরা পালাতে চাইছ তা অবশ্যই আসবে, আর তোমাদের পরোক্ষ ও প্রত্যক্ষ সম্পর্কে অবগত সত্ত্বার কাছে নিয়ে যাওয়া হবে, তখন তিনি তোমাদের বলে দেবেন যা তোমরা করতে।

(৯) হে বিশ্বাসীগণ! যখন সমাবেশের দিনে প্রার্থনার জন্য ডাক দেওয়া হয়, তখন তোমরা ঈশ্বরের স্মরণে বেরিয়ে পড় এবং কেনা-বেচা বন্ধ রাখো, এটাই তোমাদের জন্য উত্তম যদি তোমরা জানতে। (১০) প্রার্থনা সম্পূর্ণ হলে ধরণীতে ছড়িয়ে পড় এবং ঈশ্বরের অনুগ্রহ সন্ধান করো ও ঈশ্বরকে অধিক স্মরণ করো, যাতে তোমরা সফল হও। (১১) আর যখন তারা কোন ব্যবসা অথবা বিনোদন দেখে তখন তারা তোমাকে দণ্ডায়মান অবস্থায় রেখে সেদিকেই ছুটে যায়। বলঃ ঈশ্বরের কাছে যা আছে তা ব্যবসা ও বিনোদন অপেক্ষা শ্রেষ্ঠ। আর ঈশ্বরই সর্বশ্রেষ্ঠ জীবিকাদাতা।

অধ্যায় ৬৩ঃ আল - মুনাফিকুন (কপটাচারীগণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) যখন কপটাচারী লোকেরা তোমার কাছে আসে, তখন বলেঃ আমরা সাক্ষ্য দিচ্ছি যে, আপনি নিঃসন্দেহে ঈশ্বরের বার্তাবাহক। ঈশ্বর জানেন যে, তুমি অবশ্যই তাঁর বার্তাবাহক; তবে ঈশ্বর সাক্ষ্য দিচ্ছেন যে, এই কপটাচারীরা অবশ্যই মিথ্যাবাদী। (২) তারা তাদের শপথকে ঢাল বানিয়ে

রেখেছে, আর তারা ঈশ্বরের পথে বাধা দেয়। তারা যা করে নিঃসন্দেহে তা খুবই মন্দ। (৩) তার কারণ যে, তারা বিশ্বাস স্থাপন করার পর আবার অবিশ্বাসী হয়ে গেছে। যে জন্য তাদের অন্তরে মোহর মেরে দেওয়া হয়েছে, তাই তারা বোঝে না।

(৪) তুমি যখন তাদের দেখ, তাদের শরীর তোমাকে মুগ্ধ করে এবং তারা যদি কথা বলে, তাদের কথা তুমি শোন। তারা ঠেস দেওয়া কাঠের মত। তারা প্রতিটি আওয়াজকে তাদের বিরুদ্ধে মনে করে। এরাই শত্রু, তাদের সম্পর্কে সতর্ক হও। ঈশ্বর এদের ধ্বংস করুন! এরা কিভাবে বিভ্রান্ত হচ্ছে! (৫) যখন তাদেরকে বলা হয়ঃ এসো, ঈশ্বরের বার্তাবাহক তোমাদের জন্য ক্ষমা প্রার্থনা করবেন, তখন তারা নিজেদের মাথা ঘুরিয়ে নেয়, আর তুমি দেখবে যে, তারা অহংকারের উপরেই অটল থাকে। (৬) তুমি তাদের জন্য প্রার্থনা কর আর না কর তা তাদের কাছে সমান। ঈশ্বর কখনই ওদের ক্ষমা করবেন না। অহংকারী লোকদের ঈশ্বর পথ দেখান না।

(৭) এরাই তারা যারা বলেঃ যারা ঈশ্বরের বার্তাবাহকের সান্নিধ্যে আছে তাদের জন্য ব্যয় করো না, যতক্ষণ না তারা ছত্রভঙ্গ হয়ে যায়। অথচ ঈশ্বরই আকাশ ও পৃথিবীর ধনভাণ্ডারের মালিক; কিন্তু কপটাচারীরা তা বোঝে না। (৮) তারা বলেঃ যদি আমরা মদীনায় ফিরে যাই তাহলে মর্যাদাবানগণ ওখান থেকে হীনবলদের বহিষ্কার করে দেবে। যদিও সম্মান ঈশ্বর এবং তাঁর বার্তাবাহকের জন্য এবং আস্থাবানদের জন্য; কিন্তু কপটাচারীরা তা জানে না।

(৯) হে বিশ্বাসীগণ! তোমাদের সম্পদ ও সন্তান যেন তোমাদেরকে ঈশ্বরের স্মরণ থেকে উদাসীন না করতে পারে, আর যারা এমন করবে (উদাসীন হবে) তারাই ক্ষতিগ্রস্ত লোকদের দলভুক্ত হয়ে যাবে। (১০) আমি যা কিছু তোমাকে দিয়েছি তা থেকে ব্যয় করো মৃত্যু আসার পূর্বে; তখন

সে বলবেঃ হে আমার প্রভু ! আপনি আমাকে আরো কিছু সময় দিলেন না কেন? আমি দান করতাম এবং সৎলোকদের দলভুক্ত হতাম। (১১) সময় এসে গেলে ঈশ্বর কখনই কোন প্রাণকে অবকাশ দেন না। আর ঈশ্বর জানেন যা কিছু তোমরা করো।

অধ্যায় ৬৪ : আত-তাগাবুন (লাভ-ক্ষতি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) ঈশ্বরের স্তুতি করছে প্রত্যেক বস্তু যা কিছু আকাশে আছে আর প্রত্যেক বস্তু যা কিছু পৃথিবীতে আছে। রাজত্ব তাঁরই, প্রশংসা তাঁরই। তিনি সবকিছু করতে সক্ষম। (২) তিনিই তোমাদেরকে সৃষ্টি করেছেন; অতঃপর তোমাদের মধ্যে কেউ হয়েছে অবিশ্বাসী আবার কেউ বিশ্বাসী। ঈশ্বর দেখেন যা কিছু তোমরা কর। (৩) তিনিই আকাশ ও পৃথিবীকে যথাযথভাবে সৃষ্টি করেছেন, তোমাদের আকৃতি দিয়েছেন এবং তোমাদের আকৃতি সুন্দর করেছেন। তাঁর কাছেই প্রত্যাবর্তন। (৪) আকাশ ও পৃথিবীতে যা কিছু আছে তিনি তা সবই জানেন। আর তিনি জানেন যা কিছু তোমরা গোপন করো যা কিছু প্রকাশ করো। আর ঈশ্বর অন্তর সমূহের কথাও জানেন।

(৫) তোমার কাছে কি ওদের সংবাদ পৌঁছায়নি যারা এর পূর্বে অবিশ্বাস করেছিল, তারা তাদের কৃতকর্মের স্বাদ আস্বাদন করেছে। আর ওদের জন্য রয়েছে যন্ত্রণাদায়ক শাস্তি। (৬) এটা এই কারণে যে তাদের কাছে স্পষ্ট প্রমাণ নিয়ে পয়গম্বর এসেছিল, তখন তারা বলেছিল : মানুষই কি আমাদের নেতৃত্ব করবে? অতএব তারা অবিশ্বাস করল এবং মুখ ফিরিয়ে নিল। এমন লোকদের জন্য ঈশ্বর কোন আবশ্যিকতা অনুভব করেন না। ঈশ্বর স্বয়ং অভাবমুক্ত এবং অতি প্রশংসিত

(৭) অস্বীকারকারীদের দাবী যে, তাদেরকে কখনই পুনরায় উঠানো হবে না। বলঃ হ্যাঁ, আমার প্রভুর শপথ। তোমাদেরকে অবশ্যই উঠানো হবে। অতঃপর তোমরা যা করেছ, তোমাদেরকে তা অবশ্যই অবহিত করা হবে। আর এ ঈশ্বরের পক্ষে খুবই সহজ। (৮) অতএব ঈশ্বরের উপর বিশ্বাস স্থাপন কর এবং তাঁর পয়গম্বরের উপর এবং সেই জ্যোতির উপরে যা আমি অবতীর্ণ করেছি। আর ঈশ্বর জানেন যা কিছু তোমরা করো। (৯) যে দিন অর্থাৎ সমবেত হওয়ার দিনে তিনি তোমাদেরকে একত্রিত করবেন সেই দিনটি হবে লাভ-ক্ষতির দিন। আর যে ব্যক্তি ঈশ্বরের উপর বিশ্বাস স্থাপন করেছিল এবং সৎকর্ম করেছিল, ঈশ্বর তার পাপ মোচন করবেন এবং তাকে এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে, সেখানে সে চিরকাল থাকবে। এটাই বড় সাফল্য। (১০) আর যারা অস্বীকার করেছে ও আমার নিদর্শন সমূহ অবিশ্বাস করেছে, এরাই নরকবাসী, ওখানেই তারা চিরকাল থাকবে। আর তা খুবই নিকৃষ্ট গন্তব্য।

(১১) যে বিপদই আসুক না কেন ঈশ্বরের অনুমতিতেই আসে। আর যে ঈশ্বরের উপর বিশ্বাস রাখে ঈশ্বর তার অন্তরকে সঠিক দিক-নির্দেশনা দেন। ঈশ্বর সবকিছুই ভালভাবে জানেন। (১২) তোমরা ঈশ্বরের আনুগত্য কর এবং পয়গম্বরের আনুগত্য কর। আর যদি তোমরা মুখ ফিরিয়ে নাও তাহলে আমার পয়গম্বরের দায়িত্ব শুধু স্পষ্টভাবে পৌঁছে দেওয়া। (১৩) ঈশ্বর, তিনি ছাড়া কোন উপাস্য নেই। আস্থাবানেরা যেন ঈশ্বরের উপরেই ভরসা রাখে।

(১৪) হে বিশ্বাসীগণ! তোমাদের স্ত্রী এবং সন্তান-সন্ততিদের মধ্যে কেউ কেউ তোমাদের শত্রু। অতএব ওদের থেকে সাবধান থাকো। আর যদি তোমরা মার্জনা করো, উপেক্ষা করো ও ক্ষমা কর তাহলে ঈশ্বরও ক্ষমাশীল ও অতি দয়ালু। (১৫) তোমাদের সম্পদ ও তোমাদের সন্তান-সন্ততি একটি পরীক্ষার

বিষয়। আর ঈশ্বরের কাছে আছে বড় প্রতিফল। (১৬) অতএব যতটা পারো ঈশ্বরকে ভয় করো, শোন, আনুগত্য কর ও দান কর। এটাই তোমাদের জন্য মঙ্গল। আর যে ব্যক্তি মনের লোভ এবং কাৰ্পণ্য থেকে মুক্ত তারাই সফলকাম। (১৭) তোমরা যদি ঈশ্বরকে একটি উত্তম ঋণ দাও তাহলে তিনি তা কয়েকগুণ বাড়িয়ে দেবেন এবং তোমাদের ক্ষমা করবেন। ঈশ্বর পরম গুণগ্রাহী, পরম ধৈর্যশীল। (১৮) তিনি পরোক্ষ ও প্রত্যক্ষ সম্পর্কে অবগত, মহাপরাক্রমশালী, অসীম প্রজ্ঞাবান।

অধ্যায় ৬৫ : আত-তালাক (বিবাহ-বিচ্ছেদ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে পয়গম্বর! যখন তোমরা স্ত্রীদের সাথে বিবাহ বিচ্ছিন্ন কর তখন ওদের বিশুদ্ধির মেয়াদের প্রতি লক্ষ্য রেখে বিবাহ বিচ্ছিন্ন কর এবং বিশুদ্ধির মেয়াদের গণনা করতে থাকো। আর ঈশ্বরকে ভয় করো, যিনি তোমাদের প্রভু। ওই স্ত্রীদেরকে ওদের ঘর থেকে বহিস্কার করে দেবে না আর তারা নিজেরাও যেন নিষ্কান্ত না হয়। তবে তারা প্রকাশ্য কোন অশ্লীল কাজ করলে ভিন্ন কথা। এগুলো ঈশ্বরের সীমারেখা। যে ব্যক্তি ঈশ্বরের সীমারেখা লঙ্ঘন করে, সে তার নিজের উপরেই অত্যাচার করে। তুমি জানো না, এই বিবাহ বিচ্ছেদের পর ঈশ্বর হয়তো কোন উপায় বার করবেন। (২) অতঃপর তারা তাদের মেয়াদ শেষে উপনীত হলে হয় তাদের রীতি অনুযায়ী রেখে দাও অথবা রীতি অনুযায়ী পরিত্যগ কর এবং নিজেদের মধ্যে দুজন বিশুদ্ধ সাক্ষী রাখবে, আর তোমরা ঈশ্বরের জন্য সঠিক সাক্ষ্য দেবে। যে ঈশ্বর ও পরকাল বিশ্বাস করে, এই উপদেশ তাকেই দেওয়া হচ্ছে। আর যে ঈশ্বরকে ভয় করবে, ঈশ্বর তার জন্য পথ বের করবেন। (৩) আর তাকে এমন জায়গা

থেকে জীবিকার ব্যবস্থা করবেন যা সে কোন দিন কল্পনাও করেনি। আর যে ব্যক্তি ঈশ্বরের উপর ভরসা করে, তার জন্য ঈশ্বরই যথেষ্ট। নিঃসন্দেহে ঈশ্বর তাঁর উদ্দেশ্য পূরণ করেন। ঈশ্বর প্রত্যেক বস্তুর জন্য একটি সীমা নির্ধারিত করে রেখেছেন।

(৪) তোমাদের নারীদের মধ্যে যারা মাসিক ঋতুবর্তী বয়স অতিক্রান্ত হয়েছে তাদের সম্পর্কে তোমাদের যদি সন্দেহ হয় তাহলে তাদের বিশুদ্ধির মেয়াদ তিনমাস। এরকমই ওদেরও বিশুদ্ধির মেয়াদ যারা এখনও ঋতুবর্তী হয় নি। গর্ভবতী নারীদের বিশুদ্ধির মেয়াদ সন্তান প্রসব করা পর্যন্ত। আর যে ঈশ্বরকে ভয় করবে, ঈশ্বর তার কাজ সহজ করে দেবেন। (৫) এটাই ঈশ্বরের নির্দেশ যা তোমাদের প্রতি অবতীর্ণ করেছেন। আর যে ঈশ্বরকে ভয় করে ঈশ্বর তার পাপসমূহ মোচন করবেন এবং তাকে বড় প্রতিফল দান করবেন।

(৬) তোমরা ঐ মহিলাদের তোমাদের সামর্থ অনুযায়ী বাসস্থানের ব্যবস্থা করো যেমন বাসস্থানে তোমরা বাস করো। তাদেরকে সংকটে ফেলার জন্য তাদের ক্ষতি করবে না। তারা গর্ভবতী হয়ে থাকলে সন্তান প্রসব করা পর্যন্ত তাদের খরচ বহন করবে। আর যদি সে তোমাদের সন্তানদের স্তন্য পান করায় তাহলে তার পারিশ্রমিক তাকে দিয়ে দাও এবং নিজেদের মধ্যে সঙ্গতভাবে পরামর্শ করে নেবে। আর যদি তোমরা উভয়পক্ষ একে অপরের প্রতি কঠোর হও তাহলে সন্তানের বাবার পক্ষে অন্য কোন নারী বুকের দুধ পান করাবে। (৭) বিভবান ব্যক্তি তার বিভূ অনুযায়ী ব্যয় করবে এবং যার জীবিকা সীমিত করা হয়েছে, সে ব্যয় করবে ঈশ্বর তাকে যেমন দিয়েছেন তা থেকে। ঈশ্বর যাকে যতটুকু দিয়েছেন তার চেয়ে বেশী তিনি কাউকে ব্যয় করতে বলেন না। কষ্টের পর ঈশ্বর স্বাচ্ছন্দ দান করবেন।

(৮) অনেক জনপদ আছে যারা তাদের প্রভুর নির্দেশ থেকে মুখ ফিরিয়ে

নিয়েছে, ফলে আমি তাদের কঠোর হিসাব নিয়েছি এবং তাদেরকে ভয়ানক দণ্ড দিয়েছি। (৯) অতএব তারা তাদের কৃতকর্মের স্বাদ আস্বাদন করেছে এবং ক্ষতিই ছিল তাদের কর্মের পরিণতি। (১০) ঈশ্বর তাদের জন্য কঠিন শাস্তি প্রস্তুত করে রেখেছেন। অতএব ঈশ্বরকে ভয় করো, হে বুদ্ধিমানেরা! যারা বিশ্বাস স্থাপন করেছো। ঈশ্বর তোমাদের কাছে একটি উপদেশ অবতীর্ণ করেছেন। (১১) একজন পয়গম্বর যিনি তোমাদের কাছে ঈশ্বরের স্পষ্ট বাণী সমূহ পাঠ করে শোনায়ে, যার দ্বারা ওই লোকদেরকে অন্ধকার থেকে আলোয় নিয়ে আসে, যারা বিশ্বাস স্থাপন করেছে এবং সৎকর্ম করে। আর যে ব্যক্তি ঈশ্বরের উপর বিশ্বাস স্থাপন করে এবং সৎকর্ম করে তাকে তিনি এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে। সেখানে তারা চিরকাল থাকবে। ঈশ্বর তাদের জন্য উত্তম জীবিকার ব্যবস্থা করেছেন। (১২) ঈশ্বরই সেই মহান সত্ত্বা যিনি সৃষ্টি করেছেন সপ্ত আকাশ এবং পৃথিবীও সেই পরিমাণে, যার মধ্যে তাঁরই নির্দেশ অবতীর্ণ হয়, যাতে তুমি জানতে পারো যে, ঈশ্বর সর্ববিষয়ে ক্ষমতাশীল এবং ঈশ্বর সবকিছুই তাঁর জ্ঞানের পরিবেষ্টনে রেখেছেন।

অধ্যায় ৬৬ঃ আত-তাহরীম (নিষেধাজ্ঞা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে পয়গম্বর! তুমি কেন ঐ জিনিষকে অবৈধ করছো যা ঈশ্বর তোমার জন্য বৈধ করেছেন। তোমার স্ত্রীদের মন রক্ষার জন্য? ঈশ্বর বড়ই ক্ষমাশীল ও অতি দয়ালু। (২) ঈশ্বর তোমাদের জন্য তোমাদের শপথ থেকে অব্যাহতির বিধান দিয়েছেন। ঈশ্বর তোমাদের সংরক্ষক। তিনি মহাজ্ঞানী, অসীম প্রজ্ঞাবান।

(৩) পয়গম্বর একসময় তার এক স্ত্রীকে গোপনে একটি কথা বলেছিল। সে কথাটি গোপন রাখে নি এবং ঈশ্বর পয়গম্বরকে সে কথা অবহিত করালেন; তখন পয়গম্বর তার কিছু কথা জানিয়ে দিল আর কিছু কথা জানাতে উপেক্ষা করল। সে যখন তা ঐ স্ত্রীকে জানালো তখন সে বললঃ আপনাকে এটা কে জানালো? সে বললঃ যিনি সবকিছুই জানেন, সবকিছুর খবর রাখেন তিনিই আমাকে জানিয়েছেন। (৪) যদি তোমরা উভয়ে ঈশ্বরের দিকে প্রত্যাবর্তন করো তাহলে তোমাদের অন্তর ঝুঁকে পড়েছে; কিন্তু যদি তোমরা পয়গম্বরের বিরুদ্ধে একে অপরের সাহায্য করো, তবে জেনে রেখো তার বন্ধু ঈশ্বর এবং জিব্রাঈল ও সদাচারী বিশ্বাসীগণ এছাড়াও দেবদূতগণও তার সাহায্যকারী। (৫) যদি পয়গম্বর তোমাদের সবাইকে বিবাহ বিচ্ছিন্ন করে তাহলে তার প্রভু তোমাদের পরিবর্তে তাকে তোমাদের চেয়ে ভাল স্ত্রী দিতে পারেন। যারা হবে আত্ম-সমর্পণকারিণী, বিশ্বাসী, আনুগত্যকারিণী, অনুশোচনাকারিণী, উপাসনায় নিষ্ঠাবতী, উপবাসকারিণী, বিধবা এবং কুমারী।

(৬) হে বিশ্বাসীগণ! তোমরা তোমাদের নিজেদেরকে ও তোমাদের পরিবার-পরিজনকে সেই আগুন থেকে রক্ষা করো যার ইন্ধন হবে মানুষ ও পাথর, ওখানে কঠোর স্বভাবের শক্তিশালী দেবদূত নিযুক্ত আছে। ঈশ্বর তাদেরকে যে আদেশ দেন তারা তার অবাধ্যতা করে না, আর তারা তাই করে যে আদেশ তাদের দেওয়া হয়। (৭) হে অস্বীকারকারীরা! আজ অজুহাত দেখিও না। তোমরা তারই প্রতিফল পাচ্ছে যা তোমরা করতে।

(৮) হে বিশ্বাসীগণ! ঈশ্বরের সন্মুখে আন্তরিকভাবে অনুশোচনা করো। আশা করা যায় তোমাদের প্রভু তোমাদের পাপসমূহ ক্ষমা করে দেবেন এবং তোমাদেরকে এমন উদ্যানে প্রবেশ করাবেন যার পাদদেশ দিয়ে নদী প্রবাহিত হবে। ঈশ্বর সেদিন পয়গম্বর ও তার সঙ্গী বিশ্বাসীগণকে অপমানিত করবেন

না। তাদের জ্যোতি তাদের সামনে এবং ডানদিকে ধাবিত হবে। তারা বলবেঃ হে প্রভু ! আমাদের জ্যোতিকে পূর্ণতা দান করুন, আর আমাদের ক্ষমা করুন, নিঃসন্দেহে আপনি সবকিছুই করতে সক্ষম।

(৯) হে পয়গম্বর ! অবিশ্বাসী এবং কপটচারীদের সাথে যুদ্ধ করো এবং তাদের প্রতি কঠোর হও। তাদের ঠিকানা নরক। আর সেটা কতইনা খারাপ গন্তব্য। (১০) ঈশ্বর অবিশ্বাসীদের জন্য উদাহরণ দিচ্ছেন - নূহের স্ত্রীর এবং লূতের স্ত্রীর। দুজনেই আমার বান্দাদের মধ্যে দুজন সৎলোকের স্ত্রী ছিল; কিন্তু তারা তাদের সাথে বিশ্বাসঘাতকতা করেছিল। ফলে তারা দুজন তাদের দুজনকে ঈশ্বরের হাত থেকে বাঁচাতে কিছুই করতে পারেনি। আর দুজনকেই বলা হলোঃ নরকবাসীদের সাথে নরকে প্রবেশ করো।

(১১) ঈশ্বর বিশ্বাসীদের জন্য ফ্যারাও এর স্ত্রীর উদাহরণ দিচ্ছেন। সে বলেছিল : হে আমার প্রভু ! আমার জন্য আপনার কাছে স্বর্গে একটি ঘর বানিয়ে দিন আর আমাকে ফ্যারাও ও তার অপকর্ম থেকে বাঁচান এবং আমাকে অত্যাচারীদের হাত থেকে রক্ষা করুন। (১২) আর ঈমরানের কন্য মারইয়ামের উদাহরণ, যে তার সতীত্ব রক্ষা করেছিল; অতঃপর আমি তার মধ্যে আমার আত্মা সঞ্চার করে দিয়েছিলাম। সে তার প্রভুর বাণী ও গ্রন্থ সমূহকে সত্য বলে বিশ্বাস করেছিল; আর সে ছিল অনুগত বান্দাদের একজন।

অধ্যায় ৬৭ঃ আল-মুল্ক (রাজ্য)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) মহিমাষিত সেই সত্ত্বা, যাঁর হাতে যাবতীয় কতৃৎ। তিনি সবকিছু করতে সক্ষম। (২) যিনি মৃত্যু ও জীবন সৃষ্টি করেছেন যাতে তিনি তোমাদের পরীক্ষা

করতে পারেন যে, তোমাদের মধ্যে কে সৎকাজ করে। তিনি পরাক্রমশালী, ক্ষমাশীল। (৩) যিনি স্তরে স্তরে সপ্ত আকাশ সৃষ্টি করেছেন। করুণাময়ের সৃষ্টিতে তুমি কোন ত্রুটি খুঁজে পাবে না। ভাল করে দেখে নাও, কোথাও কোন ত্রুটি দেখতে পাচ্ছে কি? (৪) বার বার দৃষ্টি ঘুরিয়ে দেখ, দৃষ্টি ক্লান্ত ও ব্যর্থ হয়ে তোমার দিকেই ফিরে আসবে।

(৫) আর আমি নিকটবর্তী আকাশকে প্রদীপমালা দিয়ে সুসজ্জিত করেছি, সেগুলোকে শয়তানদের বিতাড়নের মাধ্যম বানিয়েছি। আর ওর জন্য আমি নরকের শাস্তি তৈরী করে রেখেছি। (৬) আর যারা তাদের প্রভুকে অবিশ্বাস করেছে, তাদের জন্য রয়েছে নরক-যন্ত্রণা, আর সে গন্তব্য কত নিকৃষ্ট! (৭) যখন ওদের সেখানে নিক্ষেপ করা হবে তখন তারা ফুটন্ত উদ্বেলিত আওয়াজ শুনবে। (৮) আর তা টগবগ করে ফুটে থাকবে, মনে হবে যেন সে ক্রোধে ফেটে পড়বে। যখনই তাতে কোন দলকে নিক্ষেপ করা হবে, তার রক্ষীরা তাকে জিজ্ঞাসা করবে, তোমাদের কাছে কি কোন সতর্ককারী আসেনি? (৯) তারা বলবেঃ হ্যাঁ, আমাদের কাছে সতর্ককারী এসেছিল; কিন্তু আমরা তাকে বিশ্বাস করিনি এবং আমরা বলেছিলাম যে, ঈশ্বর কোন কিছুই অবতীর্ণ করেন নি, তোমরা বড়ই পথভ্রষ্টতার মধ্যে পড়ে আছো। (১০) তারা আরো বলবেঃ আমরা যদি শুনতাম বা বুঝতাম তাহলে নরকবাসী হতাম না! (১১) অতএব তারা অপরাধ স্বীকার করবে, ধিক নরকবাসীদের!

(১২) যারা না দেখেও তাদের প্রভুকে ভয় করে, তাদের জন্য রয়েছে ক্ষমা ও এক বড় পুরস্কার। (১৩) তোমরা তোমাদের কথা গোপনে বলো বা প্রকাশ্যে বলো তিনি অন্তরের কথাও জানেন। (১৪) যিনি সৃষ্টি করেছেন তিনি জানবেন না? তিনি সূক্ষ্মদর্শী মহাবিজ্ঞ।

(১৫) তিনিই পৃথিবীকে তোমাদের বশীভূত করে দিয়েছেন; অতএব

তোমরা তার পথে-প্রান্তরে চল এবং তাঁর দেওয়া জীবিকা থেকে আহার কর। তাঁর কাছেই পুনরুত্থান। (১৬) তোমরা কি তাঁর থেকে নির্ভয় হয়ে গেলে, যিনি আকাশে আছেন, তিনি তোমাদেরকে ভূমিতে ধ্বসিয়ে দেবেন এবং ভূমি কাঁপতে থাকবে। (১৭) তোমরা কি তাঁর থেকে নির্ভয় হয়ে গেলে যিনি আকাশে আছেন যে, তিনি তোমাদের উপর পাথর বর্ষণকারী ঝড় পাঠিয়ে দেবেন এবং তখন তোমরা জানতে পারবে আমার সতর্কবাণী কেমন ছিল? (১৮) এদের পূর্ববর্তীরাও অবিশ্বাস করেছিল; অতএব কেমন হয়েছিল আমার প্রত্যাখ্যান?

(১৯) তারা কি তাদের মাথার উপরে পাখীদের দিকে দেখে না ডানা মেলে আবার কখনও ডানা গুটিয়েও নেয়? করুণাময় ছাড়া কেউ নেই যে, তাদের ধরে রাখেন। নিঃসন্দেহে তিনি সবকিছুই দেখছেন। (২০) কে আছে যে, তোমাদের সেনা হয়ে করুণাময়ের বিরুদ্ধে তোমাদের সাহায্য করতে পারে? অস্বীকারকারীরা ধোঁকার মধ্যে পড়ে আছে। (২১) কে আছে যে তোমাকে জীবিকা দিতে পারে, যদি ঈশ্বর তাঁর জীবিকা বন্ধ করে দেন? বরং তারা অবাধ্যতা ও অনীহার মধ্যে অটল রয়েছে।

(২২) একজন মুখে ভরদিয়ে চলে, আরেকজন সোজা হয়ে সরল পথে চলে; দুজনের মধ্যে কার পথ চলা সঠিক? (২৩) বলঃ তিনিই তোমাদেরকে সৃষ্টি করেছেন এবং তোমাদের জন্য কান, চোখ ও অন্তর দিয়েছেন। তোমরা খুবই কম কৃতজ্ঞতা প্রকাশ করো। (২৪) বলঃ তিনিই তোমাদেরকে পৃথিবীতে ছড়িয়ে দিয়েছেন এবং তাঁর কাছেই তোমাদের একত্রিত করা হবে।

(২৫) আর তারা বলেঃ সেই প্রতিশ্রুতি কখন হবে? যদি তুমি সঠিক হও? (২৬) বলঃ সে জ্ঞান তো ঈশ্বরের কাছে আছে। আমি তো কেবল একজন সতর্ককারী। (২৭) অতএব তারা যখন তা কাছে আসতে দেখবে

তখন তাদের চেহারা বিবর্ণ হয়ে যাবে যারা অবজ্ঞা করেছিল, আর বলা হবে যে, এই সেই জিনিষ যা তোমরা চাইতে। (২৮) বলঃ ঈশ্বর যদি আমাকে মৃত্যু দিয়ে দেন আর ঐ লোকদের যারা আমার সঙ্গে আছে, অথবা আমার উপর অনুগ্রহ করেন, তাহলে অবজ্ঞাকারীদের কঠিন শাস্তি থেকে কে রক্ষা করবে? (২৯) বলঃ তিনি করুণাময়, আমরা তাঁর প্রতি বিশ্বাস স্থাপন করেছি এবং তাঁর উপরেই ভরসা করেছি। আর শীঘ্রই তোমরা জানতে পারবে যে, স্পষ্ট পথদ্রষ্টায় কারা আছে। (৩০) বলঃ তোমরা আমাকে বলো তো, যদি তোমাদের জল ভূগর্ভে চলে যায় তাহলে কে এমন আছে যে তোমাদের জন্য স্বচ্ছ জল নিয়ে আসবে?

অধ্যায় ৬৮ : আল - কলম (কলম)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) নূন - কলমের শপথ, আর লোকেরা যা কিছু লেখে। (২) তুমি তোমার প্রভুর কৃপায় উন্মাদ নও। (৩) আর নিঃসন্দেহে তোমার জন্য রয়েছে অশেষ পুরস্কার। (৪) আর তুমি এক মহান চরিত্রের অধিকারী। (৫) অতএব অতিশীঘ্রই তুমি দেখবে আর তারাও দেখবে। (৬) তোমাদের মধ্যে কে বিকারগ্রস্ত ছিল? (৭) তোমার প্রভুই ভাল জানেন, কে তাঁর পথ থেকে বিচ্যুত হয়েছে আর সঠিক পথে যারা চলছে তাদেরকেও তিনি ভালই জানেন।

(৮) অতএব তুমি এই অবিশ্বাসীদের কথা মতো চলবে না। (৯) তারা চায় তুমি নমনীয় হও, তাহলে তারাও নমনীয় হবে। (১০) আর তুমি এমন ব্যক্তির কথা মানবে না যে অধিক শপথকারী, লাঞ্চিত, (১১) পশ্চাতে নিন্দাকারী এবং কুৎসা রটনাকারী, (১২) ভাল কাজে বাধাদানকারী, সীমালঙ্ঘনকারী,

পাপিষ্ঠ, (১৩) পাষান হৃদয় এবং সর্বোপরি অধম, (১৪) এই জন্য যে তাদের ধনবল ও জনবল আছে। (১৫) যখন তার কাছে আমার বাণী সমূহ পাঠ করে শোনান হয়, তখন সে বলেঃ এতো আগেকার লোকদের উপকথা। (১৬) শীঘ্রই আমি তার নাকে চিহ্ন করে দেবো।

(১৭) আমি তো তাদের পরীক্ষা করেছিলাম। যেমনভাবে আমি বাগানওয়ালাদের পরীক্ষা করেছিলাম। যখন তারা শপথ নিয়েছিল যে তারা সকালেই বাগানের ফল আহরণ করবে। (১৮) তারা ঈশ্বরের স্তুতি করেনি (১৯) অতঃপর ওই বাগানের উপর তোমার প্রভুর পক্ষ থেকে বিপর্যয় নেমে এল যখন তারা ঘুমাচ্ছিল। (২০) সকালে সেটা এমন হয়ে গেল যেন ফসল কাটা উষর ভূমি। (২১) অতএব সকালে তারা একে অপরকে ডাক দিল। (২২) সকাল সকাল বাগানে চল যদি ফল আহরণ করতে চাও। (২৩) তারপর যেতে যেতে তারা চুপি চুপি বলছিল। (২৪) আজ যেন কোন অভাবী মানুষ তোমাদের সাথে বাগানে না ঢোকে। (২৫) তারা বিরত রাখতে পারবে - এই চিন্তা করে অতি প্রত্যাশে বাগানের দিকে গেল। (২৬) তারপর যখন বাগান দেখল তখন বলল নিশ্চয়ই আমরা পথ ভুলে এসেছি। (২৭) নিশ্চয় আমরা চুড়ান্তভাবে বিনষ্ট হয়েছি। (২৮) তাদের মধ্যে যে শ্রেষ্ঠ ব্যক্তি ছিল সে বললঃ আমি কি তোমাদেরকে তোমাদের প্রভুর স্তুতি করতে বলিনি? (২৯) তারা বললঃ আমাদের প্রভু পবিত্র, আমরাই অত্যাচারী। (৩০) অতঃপর তারা একে অন্যের প্রতি দোষারোপ করতে লাগল। (৩১) তারা বললঃ হায় আফসোস! নিঃসন্দেহে আমরা সীমালঙ্ঘন করে ফেলেছি। (৩২) আমাদের প্রভু হয়ত এই বাগানের পরিবর্তে আমাদেরকে এর চেয়েও কোন ভাল বাগান দেবেন। আমরা তাঁর কাছেই আশা করি। (৩৩) এভাবেই শাস্তি আসে, আর পরলোকের শাস্তি এর চেয়েও বড়, যদি তারা জানত!

(৩৪) নিঃসন্দেহে ঈশ্বর-ভীরুদের জন্য তাদের প্রভুর কাছে রয়েছে স্বর্গের সুখোদ্যান। (৩৫) আমি কি অনুগতদের অবাধ্যদের সঙ্গে সমতুল্য করে দেব? (৩৬) তোমাদের কি হল? তোমরা কেমন বিচার করছো? (৩৭) তোমাদের কাছে কি কোন গ্রন্থ আছে? (৩৮) তাতে তোমরা যাই পছন্দ কর, তাই মঞ্জুর করা হয়। (৩৯) না কি আমার কাছ থেকে শেষ বিচারের দিন পর্যন্ত কার্যকারী কোন অঙ্গীকার প্রাপ্ত হয়েছে যে, তোমরা যা সিদ্ধান্ত নেবে, তাই প্রাপ্ত হবে। (৪০) তাদেরকে জিজ্ঞাসা করো যে, এদের মধ্যে কে এ বিষয়ের জিহ্মাদার? (৪১) না কি তাদের কোন অংশীদার আছে? তাহলে তারা তাদের অংশীদারদের নিয়ে আসুক যদি তারা সঠিক হয়।

(৪২) যে দিন সত্যের পর্দা উন্মোচিত হবে এবং লোকদেরকে সিজদা (প্রণতি জ্ঞাপন) করতে বলা হবে, তখন তারা সিজদা (প্রণতি জ্ঞাপন) করতে পারবে না। (৪৩) ওদের দৃষ্টি অবনত থাকবে, লাঞ্ছনা ওদেরকে আচ্ছন্ন করে রাখবে। তারা যখন নিরাপদ ও সুস্থ ছিল তখনও ওদেরকে সিজদার (প্রণতি জ্ঞাপনের) জন্য ডাকা হতো। (৪৪) অতএব যারা এই বাণী অবিশ্বাস করে তাদেরকে আমার হাতে ছেড়ে দাও। আমি তাদেরকে ধীরে ধীরে এমনভাবে পাকড়াও করবো যে, তারা জানতেই পারবে না। (৪৫) ওদেরকে আমি অবকাশ দিচ্ছি। নিঃসন্দেহে আমার কৌশল খুবই মজবুত।

(৪৬) তুমি কি তাদের কাছে ক্ষতি-পূরণ চাইছো? যে তারা অর্থ-দণ্ডের বোঝায় নত হয়ে যাচ্ছে। (৪৭) অথবা তাদের কাছে কি অদৃশ্যের জ্ঞান আছে যে, তারা লিখে রাখে? (৪৮) অতএব তুমি তোমার প্রভুর নির্দেশের জন্য ধৈর্য ধরে অপেক্ষা কর এবং মাছ-ওয়ালা (ইউনুস পয়গম্বর) মত হয়ো না। সে চিন্তা গ্রস্ত অবস্থায় আমাকে ডেকেছিল। (৪৯) যদি তার প্রভুর অনুগ্রহ তার সাথে না থাকত তাহলে তো সে নিন্দিত অবস্থায় উন্মুক্ত প্রান্তরে নিষ্কিপ্ত হতো। (৫০)

অতঃপর তার প্রভু তাকে সম্মানিত করলেন এবং তাকে সৎকর্মশীলদের দলভুক্ত করলেন। (৫১) আর এই অবজ্ঞাকারী লোকেরা যখন উপদেশ শোনে তখন এমনভাবে মন্দ দৃষ্টি দিয়ে তাকায় যেন তোমাকে আছড়ে ফেলবে, এবং তারা বলে-এতো একটা পাগল। (৫২) আর এটা বিশ্ব-জগতের জন্য এক উপদেশ।

অধ্যায় ৬৯ : আল-হাক্কাহ (অনিবার্যক্ষন)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) অবশ্যম্ভাবী ব্যাপার। (২) কি সেই অবশ্যম্ভাবী ব্যাপার? (৩) তুমি কি জানো সেই অবশ্যম্ভাবী ব্যাপারটা কি? (৪) সামুদ এবং আদ সম্প্রদায় বিশ্বাস করেনি যে বিপর্যয় তাদেরকে আঘাত করবে। (৫) অতএব সামুদকে এক ভয়ানক দুর্ঘটনায় ধ্বংস করা হয়েছিল। (৬) আর আদ সম্প্রদায়কে এক প্রচণ্ড ঝড়ো হাওয়া দ্বারা ধ্বংস করা হয়েছিল। (৭) তাদের উপরে ঈশ্বর তা নিরন্তর সাত রাত আর আটদিন বহাল রেখেছিলেন। তুমি দেখতে, মানুষগুলো মাটিতে প্রণত হয়ে পড়ে আছে যেন খেজুর গাছের শূন্য গর্ভ কাণ্ড। (৮) তুমি কি ওদের কোন অবশিষ্টাংশ দেখতে পাও? (৯) ফ্যারাও ও তার পূর্ববর্তীরা এবং উল্টে দেওয়া জনপদগুলো গর্হিত অপরাধ করেছিল। (১০) তারা তাদের প্রভুর বার্তাবাহককে অস্বীকার করেছিল, যার জন্য তিনি তাদেরকে কঠোরভাবে পাকড়াও করেছিলেন। (১১) আর যখন জল বিপদ সীমা অতিক্রম করেছিল, তখন আমি তোমাদেরকে নৌকায় আরোহণ করিয়েছিলাম। (১২) যাতে আমি এটা তোমাদের জন্য স্মৃতির বিষয় বানিয়ে দিই আর শ্রবণকারী কর্ন যেন এটাকে স্মরণ রাখে।

(১৩) আর যখন শিংগায় (মহাশঙ্খে) হঠাৎই ফুৎকার দেওয়া হবে। (১৪) ভূমি ও পাহাড়গুলোকে উঠিয়ে একেবারেই চূর্ণ-বিচূর্ণ করে দেওয়া হবে।

(১৫) সেই দিন যা ঘটাব ঘটে যাবে। (১৬) আকাশ বিদীর্ণ হয়ে যাবে এবং সেদিন সে অতি ক্ষীণ হয়ে পড়বে। (১৭) আর দেবদূতরা থাকবে তার প্রান্তদেশে। আটজন দেবদূত সেদিন তোমার প্রভুর সিংহাসন নিজেদের উপর তুলে ধরবে। (১৮) সেদিন তোমাদেরকে উপস্থিত করা হবে। তোমাদের কোন তথ্যই সেদিন গোপন থাকবে না।^১

(১৯) যে ব্যক্তিকে তার কর্মপত্র তার ডান হাতে দেওয়া হবে, সে বলবেঃ এই নাও আমার কর্মপত্র পড়ে দেখ। (২০) আমি জানতাম যে, আমাকে আমার হিসাব দিতে হবে। (২১) অতএব সে তার পছন্দমত সুখে জীবন-যাপন করবে। (২২) উচ্চ উদ্যানে। (২৩) তার ফলগুলি নাগালের মধ্যে থাকবে। (২৪) তৃপ্তি সহকারে আহার কর আর পান করো, তোমাদের সেই কর্মের বিনিময়ে, বিগত দিনে যা তোমরা করেছিলে। (২৫) আর যে ব্যক্তির কর্মপত্র তার বাম হাতে দেওয়া হবে, তখন সে বলবেঃ হায়! যদি আমার কর্মপত্র না দেওয়া হত! (২৬) আমি জানতাম না আমার হিসাব কি হবে। (২৭) হায়! যদি সেই মৃত্যুতেই আমার সবকিছু শেষ হয়ে যেত! (২৮) আমার সম্পদ আমার কোন কাজে আসল না। (২৯) আমার ক্ষমতাও তো শেষ হয়ে গেল। (৩০) তাকে ধরো ও তাকে বেড়ি পরিয়ে দাও। (৩১) তারপর তাকে নরকে নিক্ষেপ করো। (৩৩) এই ব্যক্তি মহান ঈশ্বরকে বিশ্বাস করত না। (৩৪) এবং গরীব মানুষকে আহার করাতে উৎসাহ দিত না।

^১ বিঃ দ্রঃ - (৬৯ঃ ১৮) পৃথিবী মানুষের জন্য একটি পরীক্ষাগার। যখন পরীক্ষার পর্ব শেষ হবে, এই পৃথিবীকে ধ্বংস করে দেওয়া হবে এবং নতুন পৃথিবী তৈরী করা হবে, নতুন আবশ্যিকতাপরিপূরণের লক্ষ্যে। বর্তমানে ঈশ্বরের মহিমা পরোক্ষভাবে প্রতিভাত হয়, কিন্তু তখন তার ওপার মহিমা প্রত্যক্ষ ভাবে প্রতিভাত হবে।

(৩৫) তাই আজ এখানে ওকে সহানুভূতি দেখাবার কেউ নেই। (৩৬) কোন খাদ্য নেই, একমাত্র পুঁজ ছাড়া। (৩৭) যা কেবল অপরাধীরাই খাবে।

(৩৮) শুধু তাই না, আমি শপথ করছি ঐ সব জিনিষের যা তোমরা দেখতে পাও। (৩৯) আর যা তোমরা দেখতে পাও না। (৪০) নিঃসন্দেহে এ এক সম্মানীয় বার্তাবাহকের বাণী। (৪১) আর এটা কোন কবির কথা নয়, তোমরা খুবই কম আস্থাশীল। (৪২) আর এটা কোন ভবিষ্যৎ বক্তারও কথা নয়, তোমরা খুবই কম চিন্তা করো। (৪৩) এটা বিশ্বপ্রতিপালকের কাছ থেকে অবতীর্ণ। (৪৪) সে যদি আমার নামে কোন কথা বানিয়ে বলত, (৪৫) তাহলে অবশ্যই আমি তার ডান হাত ধরে ফেলতাম। (৪৬) তারপর তার জীবন ধমনী ছিন্ন করে দিতাম। (৪৭) তখন তোমাদের কেউ একাজে আমাকে বাধা দিতে পারতে না। (৪৮) নিঃসন্দেহে এটা এক উপদেশ ঈশ্বর ভীরুদের জন্য। (৪৯) আমি তো জানি, তোমাদের মধ্যে কেউ কেউ এটাকে মিথ্যা মনে করে। (৫০) অবিশ্বাসীদের জন্য এটা তো অনুতাপের কারণ। (৫১) এটা নিশ্চিত সত্য। (৫২) অতএব তুমি তোমার মহান প্রতিপালকের নামের মহিমা ঘোষণা করো।

অধ্যায় ৭০ঃ আল-মা'আরিজ (আরোহী সিঁড়ি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) একজন অস্বীকারকারী চাইল শাস্তি দ্রুত সংঘটিত হোক- (২) যারা অস্বীকার কারী তাদের উপর কোন শক্তি ঈশ্বরকে প্রতিহত করতে পারবে না। (৩) তাদের শাস্তি দান থেকে। তিনিই হলেন আরোহী সিঁড়ির মালিক। (৪) দেবদূত এবং জিবরাঈল এতে চড়েই তাঁর দিকে যায়। এমন একটি দিন

যার পরিমাণ পঞ্চাশ হাজার বছরের সমান। (৫) অতএব তুমি উত্তমরূপে ধৈর্য ধারণ কর। (৬) তারা তাকে দূরে মনে করছে, (৭) কিন্তু আমি তাকে কাছে দেখছি। (৮) যে দিন আকাশ তরল আমার মত হয়ে যাবে। (৯) পর্বতগুলো ধুনিত রঙ্গিন পশমের মত। (১০) আর কোন বন্ধু কোন বন্ধুর খবর জিজ্ঞেস করবে না। (১১) যদিও তারা একে ওপরের দৃষ্টি গোচরে থাকবে। অপরাধীরা ওই দিনের শাস্তি থেকে বাঁচার জন্য মুক্তিপণ হিসাবে উপস্থাপন করতে চাইবে - নিজের পুত্র, (১২) নিজের স্ত্রী এবং নিজের ভাইকে। (১৩) এবং নিজের পরিবার পরিজন, যারা তাকে আশ্রয় দিত। (১৪) এবং পৃথিবীর সকলের দ্বারা মুক্তিপণ দিয়ে নিজেকে রক্ষা করবে।

(১৫) কখনই নয়, এটা তো এক জলন্ত আগুন। (১৬) যা চামড়া খসিয়ে নেবে। (১৭) সে (নরক) ওদের প্রত্যেককে ডাকবে যে (সত্য) উপেক্ষা করেছিল এবং (সত্য থেকে) মুখ ফিরিয়ে নিয়েছিল। (১৮) (সম্পদ) সংগ্রহ ও সংরক্ষণ করেছিল। (১৯) মানুষ সৃষ্টিগত ভাবে অস্থিরচিত্ত। (২০) কষ্টের মধ্যে পড়লে ঘাবড়ে যায়। (২১) আর যখন অবস্থা ভাল হয় তখন কার্পণ্য করে। (২২) তবে এর ব্যতিক্রমী হল প্রার্থনাকারীরা। (২৩) যারা নিয়মিত প্রার্থনা সম্পাদন করে। (২৪) যারা নিজের সম্পদ থেকে একটি অংশ প্রদান করে - (২৫) যাগ্ণকারী ও বঞ্চিত ব্যক্তির জন্য। (২৬) যারা শেষ বিচারের দিনকে বিশ্বাস করে। (২৭) আর যে তার প্রভুর শাস্তিকে ভয় পায়। (২৮) নিঃসন্দেহে তার প্রভুর শাস্তি থেকে কারো নির্ভয় হওয়া উচিত নয়। (২৯) যারা তাদের যৌনাঙ্গ সংযত রাখে। (৩০) তাদের স্ত্রী এবং (বৈবাহিক সূত্রে আবদ্ধ) অধিকারভুক্তগন ব্যতীত - এক্ষেত্রে তারা নিন্দনীয় হবে না। (৩১) যারা এছাড়াও অন্যকে কামনা করে তারা হবে সীমালঙ্ঘনকারী। (৩২) যারা তাদের আমানত ও প্রতিশ্রুতি রক্ষা করে, (৩৩) যারা তাদের সাক্ষ্যদানের উপর অটল থাকে, (৩৪) আর যে তার প্রার্থনার প্রতি যত্নবান থাকে, (৩৫) এরাই স্বসন্মানে স্বর্গে স্থান পাবে।

(৩৬) এই অবজ্ঞাকারীদের কি হল যে, তারা তোমার দিকে দৌড়ে চলে আসছে। (৩৭) ডানদিক থেকে এবং বামদিক থেকে দলে, দলে।

(৩৮) তাদের প্রত্যেকেই কি আশা করে যে, তাকে সুখের স্বর্গে প্রবেশ করানো হবে? (৩৯) কখনই নয়, আমি তাদেরকে যে জিনিষ দিয়ে সৃষ্টি করেছি তা তারা জানে।

(৪০) অতএব না, আমি শপথ করছি পূর্বও পশ্চিমের প্রভুর, নিশ্চয়ই আমি সক্ষম। (৪১) তাদের পরিবর্তে তাদের চেয়ে ভাল মানুষ সৃষ্টি করতে। তাতে আমি অক্ষম নই। (৪২) অতএব ওদেরকে বলতে ও ক্রীড়া-কৌতুক করতে দাও, যতক্ষণ না তারা তাদের সেই প্রতিশ্রুত দিনটির সাথে সাক্ষাৎ করে। (৪৩) সেদিন তারা কবর থেকে বেরিয়ে ছুটতে থাকবে, যেন তারা কোন লক্ষ্যের দিকে ছুটছে। (৪৪) তাদের দৃষ্টি অবনত হবে, অপমান তাদের আচ্ছন্ন করে রাখবে; এই সেই দিন যা তাদেরকে প্রতিশ্রুতি দেওয়া হয়েছিল।

অধ্যায় ৭১ : নূহ (নোয়াহ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আমি নূহকে (নোয়াহ) তার সম্প্রদায়ের কাছে বার্তাবাহক করে পাঠিয়েছিলাম, একথা বলে যে - কঠিন শাস্তি আসার আগে তোমার সম্প্রদায়কে সতর্ক করো। (২) সে বলেছিল : হে আমার সম্প্রদায়! আমি তোমাদের জন্য একজন স্পষ্ট সতর্ককারী। (৩) তোমরা ঈশ্বরের উপাসনা করো এবং তাঁকে ভয় করো আর আমার আনুগত্য করো। (৪) ঈশ্বর তোমাদের পাপসমূহ ক্ষমা করবেন এবং তোমাদেরকে এক নির্ধারিত সময় পর্যন্ত অবকাশ দেবেন। নিঃসন্দেহে যখন ঈশ্বরের নির্ধারিত সময় এসে যায় তখন তা আর বিলম্বিত করা যায় না।

(৫) নূহ (নোয়াহ) বলেছিলঃ হে আমার প্রভু ! আমি তো আমার সম্প্রদায়কে দিনরাত ডেকেছি। (৬) কিন্তু আমার ডাক তাদের সাথে শুধু দূরত্বই বৃদ্ধি করেছে। (৭) আর আমি যখনই ওদেরকে ডেকেছি, যাতে তুমি ওদের

ক্ষমা করে দাও, তখনই তারা কানে আঙুল দিয়ে, কাপড় দিয়ে নিজেদেরকে ঢেকে, জিদ ধরে থেকেছে এবং দারুণ অহংকার করেছে। (৮) অতঃপর আমি ওদেরকে প্রকাশ্যে ডেকেছি। (৯) তারপর তাদেরকে জন সমক্ষে আহ্বান জানিয়েছি এবং গোপনেও ওদেরকে বুঝিয়েছি। (১০) আমি বলেছি যে, আপন প্রভুর কাছে ক্ষমা প্রার্থনা কর, নিঃসন্দেহে তিনি পরম ক্ষমাশীল। (১১) তাহলে তিনি তোমাদের জন্য আকাশ থেকে পর্যাপ্ত বৃষ্টি বর্ষণ করবেন। (১২) আর তোমাদের সম্পদ ও সম্ভান বৃদ্ধি করে দেবেন এবং তোমাদের জন্য বাগ-বাগীচা ও নদ-নদী বানিয়ে দেবেন। (১৩) তোমাদের কি হল যে, তোমরা ঈশ্বরের শ্রেষ্ঠত্ব স্বীকার করছ না? (১৪) অথচ তিনিই তোমাদেরকে বিভিন্ন পর্যায়ে সৃষ্টি করেছেন। (১৫) তোমরা কি দেখনি যে, কিভাবে ঈশ্বর সপ্ত আকাশকে স্তরে স্তরে সৃষ্টি করেছেন? (১৬) আর তাতে চাঁদের জ্যোতি এবং সূর্যকে প্রদীপরূপে সৃষ্টি করেছেন। (১৭) এবং ঈশ্বর তোমাদেরকে পৃথিবী (মাটি) থেকে বিশেষভাবে উদগত করেছেন। (১৮) আবার তিনি তোমাদেরকে পৃথিবীতে (মাটিতে) ফিরিয়ে নেবেন, এবং তা থেকেই তোমাদেরকে পুনরুত্থিত করবেন। (১৯) আর ঈশ্বর তোমাদের জন্য ভূমিকে সমতল বানিয়েছেন। (২০) যাতে তোমরা তার প্রশস্ত রাস্তায় পথ চলতে পারো।

(২১) নূহ (নোয়াহ) বললঃ প্রভু! এরা আমার কথা শোনেনি, এবং এমন ব্যক্তির অনুসরণ করেছে যার সম্পত্তি ও সম্ভান কেবল ওদের ক্ষতিই বৃদ্ধি করেছে। (২২) আর এরা এক বড় ষড়যন্ত্র করেছে। (২৩) এরা আরো বলেছেঃ তোমরা তোমাদের উপাস্যদের কখনই ত্যাগ করো না; ত্যাগ করো না ওয়াদ কিংবা সুওয়াকে, অথবা ইয়াগুছ, ইয়াউক ও নাসরকে। (২৪) আর তারা অনেক লোককেই পথভ্রষ্ট করেছে। এখন আপনি এই পথভ্রষ্ট লোকদের পথভ্রষ্টতা বৃদ্ধি করুন। (২৫) তাদের পাপের কারণেই তাদেরকে ডুবিয়ে দেওয়া হয়েছে

এবং পরে নরকে নিক্ষেপ করা হয়েছে; অতঃপর তারা ঈশ্বর ব্যতীত কোনই সাহায্যকারী পায়নি।

(২৬) নূহ (নোয়াহ) বললঃ হে আমার প্রভু! এই অস্বীকারকারীদের কাউকে পৃথিবীতে বসবাস করার জন্য ছেড়ে দেবেন না। (২৭) যদি আপনি ওদেরকে ছেড়ে দেন, তাহলে এরা আপনার বান্দাদের বিপথগামী করবে। আর এদের বংশ থেকে যেই জন্ম নেবে সে পাপী এবং কঠোর অবজ্ঞাকারীই হবে। (২৮) হে আমার প্রভু! আমাকে ক্ষমা করুন এবং আমার পিতা-মাতাকে ক্ষমা করে দিন। আমার ঘরে আস্ত্রাবান হয়ে যে প্রবেশ করে, তাকেও আপনি ক্ষমা করে দিন। আর সকল আস্ত্রাবান পুরুষ ও আস্ত্রাবান মহিলাদের ক্ষমা করে দিন, আর ধ্বংস ব্যতীত অত্যাচারীদের কোন কিছুই বৃদ্ধি করবেন না।

অধ্যায় ৭২ঃ আল-জ্বিন (জ্বিন জাতি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বলঃ আমাকে বার্তা পাঠানো হয়েছে যে, জ্বিনদের একটি দল কুরআন শুনে বলেছে যে, আমরা এক বিস্ময়কর কুরআন শুনেছি। (২) যা সঠিক পথনির্দেশ করে, তাই আমরা তার উপর বিশ্বাস স্থাপন করেছি আর আমরা আমাদের প্রতি পালকে র সাথে কাউকে অংশীদার স্থির করবো না। (৩) আর আমাদের প্রতি পালকে র মর্যাদা সুউচ্চ। তাঁর না কোন পত্নী আছে আর না কোন সন্তান। (৪) আমাদের নির্বোধ ব্যক্তির ঈশ্বর সম্পর্কে অনেক বাস্তব-বিরোধী কথা-বার্তা বলতো। (৫) আর আমরা মনে করেছিলাম যে, মানুষ ও জ্বিন ঈশ্বর সম্পর্কে কখনো মিথ্যা কথা বলবে না। (৬) কতক মানুষ ছিল, যারা কতক জ্বিনের কাছে আশ্রয় নিত, ফলে তারা জ্বিনদের অহংকার আরো বাড়িয়ে দিয়েছিল।

(৭) তারাও মনে করেছিল যেমন তোমরা মনে করো যে, ঈশ্বর কাউকে পুনরুত্থিত করবেন না।

(৮) আর আমরা আকাশে গিয়ে তার তথ্য সংগ্রহ করতে চেয়েছিলাম; কিন্তু দেখলাম, তা কঠোর প্রহরাধীন এবং উচ্চায় পরিপূর্ণ। (৯) আমরা আকাশের বিভিন্ন স্থানে শোনার জন্য অবস্থান নিতাম। কিন্তু এখন যে শুনতে চাইবে, সে তার জন্য প্রস্তুত জলন্ত উচ্কার সন্মুখীন হবে। (১০) আমরা জানি না পৃথিবীর অধিবাসীদের জন্য অমঙ্গল চাওয়া হয়েছে না তাদের প্রতিপালক তাদের জন্য মঙ্গল চেয়েছেন। (১১) আমাদের মধ্যে কতক আছে সৎকর্মপরায়ণ আর কতক তার ব্যতিক্রম। আমরা বিভিন্ন মতের অনুসারী। (১২) আমরা বুঝে গেছি যে, পৃথিবীতে আমরা ঈশ্বরকে পরাজিত করতে পারবো না। আর পালিয়ে গিয়ে তাঁকে ব্যর্থ করতে পারবে না। (১৩) আমরা যখন উপদেশ শুনলাম তখন আমরা তার উপর বিশ্বাস স্থাপন করলাম। যে ব্যক্তি তার প্রতিপালকের প্রতি বিশ্বাস স্থাপন করবে তার কোন ক্ষতি বা অত্যাচারের আশঙ্কা থাকবে না। (১৪) আর আমাদের মধ্যে কিছু আত্মসমর্পণকারী আছে, আবার কিছু দিশাহীনও আছে। অতএব যে আত্মসমর্পণ করেছে সে সঠিক পথ খুঁজে নিয়েছে। (১৫) আর যারা দিশাহীন তারা ই নরকের ইন্ধন হবে।

(১৬) আমাকে বার্তা দেওয়া হয়েছে যে, এরা যদি সঠিক পথে থাকত তাহলে এদেরকে প্রচুর বৃষ্টি বর্ষনের মাধ্যমে সমৃদ্ধ করতাম। (১৭) যাতে এর দ্বারা তাদের পরীক্ষা করতে পারি। আর যে তার প্রভুর স্মরণ থেকে মুখ ফিরিয়ে নিবে, তিনি তাকে কঠোর শাস্তি দেবেন। (১৮) আর এই যে, মসজিদ সমূহ ঈশ্বরের উপাসনার জন্য,

অতএব তোমরা ঈশ্বরের সাথে আর কাউকে ডেকো না। (১৯) আর যখন ঈশ্বরের বান্দা, ঈশ্বরকে ডাকার জন্য দণ্ডায়মান হল, তখন তারা এতো অধিক সংখ্যায় তার নিকটে ভিড় জমালো যে তার শ্বাস রোধ হওয়ার উপক্রম হল। (২০) বলঃ আমি কেবল আমার প্রভুকেই ডাকি এবং তাঁর সাথে কাউকে অংশীদার স্থাপন করি না। (২১) বলঃ আমার কোন ক্ষমতা নেই তোমাদের কোন ক্ষতি করার আর না কোন ভাল করার। (২২) বলঃ আমাকে ঈশ্বরের থেকে কেউ বাঁচাতে পারবে না। আর তিনি ব্যতীত আমি কোন আশ্রয়স্থলও পাবো না। (২৩) আমার দায়িত্ব হল কেবলমাত্র ঈশ্বরের পক্ষ হতে আমি যা প্রাপ্ত হয়েছি তা পৌঁছে দেওয়া এবং তাঁর বার্তা প্রচার করা। আর যে ঈশ্বর ও তাঁর বার্তাবাহককে অমান্য করবে, তার জন্য রয়েছে নরকের আগুন; সেখানে তারা চিরস্থায়ী হবে।

(২৪) এমনকি যখন তারা সেই জিনিষটা দেখবে যার প্রতিশ্রুতি তাদেরকে দেওয়া হয়েছে, তখন তারা জানতে পারবে যে, কার সাহায্যকারী দুর্বল আর কে সংখ্যায় কম। (২৫) বলঃ আমি জানি না যার প্রতিশ্রুতি তোমাদের দেওয়া হয়েছে তা কি নিকটে, না আমার প্রভু তার জন্য দীর্ঘ মেয়াদ নির্ধারিত করে রেখেছেন? (২৬) পরোক্ষের খবর তিনিই জানেন। তিনি তার পরোক্ষ কাউকে জানান না। (২৭) এই পয়গম্বর ছাড়া তিনি যাকেই পছন্দ করেছেন, তার সামনে ও পিছনে প্রহার ব্যবস্থা করেন। (২৮) যাতে ঈশ্বর জানতে পারেন যে, তারা তাদের প্রভুর বার্তা পৌঁছে দিয়েছে কি না। আর তাদের কাছে যা কিছু আছে, তা তিনি পরিবেষ্টন করে রেখেছেন। তিনি সব কিছুরই সংখ্যার হিসাব রাখেন।

অধ্যায় ৭৩ঃ আল-মুয্যাম্মিল (চাদরাবৃত)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে বজ্রাবৃত, (২) রাতে দাঁড়িয়ে থাক বেশির ভাগ সময়। (৩) রাতের অর্ধেক অথবা তার থেকে কিছু কম। (৪) অথবা এর চেয়ে কিছু বেশি, আর কুরআনকে থেমে থেমে পড়। (৫) আমি তোমার উপর এক গুরুত্বপূর্ণ বিষয়ের ভার দিতে যাচ্ছি।

(৬) নিশ্চয় (উপাসনার উদ্দেশ্যে) রাত্রি জাগরণ প্রবৃত্তি দমনের জন্য খুবই কার্যকরী উপায় এবং প্রার্থনার জন্য খুবই উপযোগী। (৭) দিনের বেলায় তোমার অনেক কাজ থাকে। (৮) আর তোমার প্রভুকে স্মরণ কর এবং (অন্য ব্যস্ততা ছিন্ন করে) একনিষ্ঠভাবে তাতে মগ্ন হও। (৯) তিনিই পূর্ব ও পশ্চিমের মালিক, তিনি ছাড়া কেউ উপাস্য নেই, অতএব তুমি তাঁকেই নিজের অভিভাবক বানিয়ে নাও। (১০) আর লোকেরা যা বলে তাতে ধৈর্য রাখো এবং তাদেরকে সৌজন্য সহকারে বর্জন করো। (১১) আর অবিশ্বাসী বিলাস সামগ্রীর অধিকারীদের ব্যাপার আমার উপরে ছেড়ে দাও এবং ওদেরকে কিছু অবকাশ দাও। (১২) আমার কাছে আছে শৃঙ্খল ও নরক। (১৩) আর গলায় আটকে যাওয়া খাদ্য এবং যন্ত্রণাদায়ক শাস্তি। (১৪) যে দিন ভূমি আর পাহাড় কাঁপতে থাকবে আর পাহাড়গুলো বালির স্তূপে পরিণত হবে।

(১৫) আমি তোমাদের কাছে একজন পয়গম্বর পাঠিয়েছি তোমাদের উপর সাক্ষী বানিয়ে, যেভাবে আমি ফ্যারাও এর নিকট একজন পয়গম্বর পাঠিয়েছিলাম। (১৬) কিন্তু ফ্যারাও সেই বার্তাবাহকের কথা মানেনি, তাই আমি তাকে ধরেছি কঠিন ধরা। (১৭) অতএব তোমরাও যদি অবিশ্বাস করো

তাহলে সেদিনের শাস্তি থেকে কিভাবে নিস্তার পাবে, যে দিন কিশোরকে বৃদ্ধে পরিণত করে দেবে। (১৮) যাতে আকাশ ফেটে যাবে, নিঃসন্দেহে তাঁর প্রতিশ্রুতি বাস্তবায়িত হবেই। (১৯) এটা এক উপদেশ, অতএব যার ইচ্ছা সে তার প্রভুর পথ অবলম্বন করুক।

(২০) তোমার প্রভু জানেন, তুমি রাতের প্রায় তিনভাগের দুভাগ, অথবা অর্ধেক রাত, কখন ও বা তিনভাগের একভাগ রাত প্রার্থনারত অবস্থায় দণ্ডায়মান থাকো, ঠিক তেমনই তোমার সাথীদের একটি দলও। আর ঈশ্বরই রাত-দিনের পরিমাপ নির্ধারণ করেন। তিনি জানেন তোমরা এটা পুরোপুরি পালন করতে পারবে না। অতএব তিনি তোমাদেরকে কৃপা করেছেন। অতএব কুরআন যতটুকু পাঠ করা সহজ হয় ততটুকু পাঠ করো। তিনি জানেন তোমাদের মধ্যে কেউ কেউ অসুস্থ থাকবে, কেউ কেউ ঈশ্বরের অনুগ্রহের খোঁজে ধরণীতে ব্যস্ত থাকবে এবং এমনও লোকও থাকবে যারা ঈশ্বরের রাস্তায় সংগ্রাম করবে। তাই এথেকে পাঠ কর, যতটা তোমার জন্য সহজসাধ্য হয়, প্রার্থনা প্রতিষ্ঠা কর এবং সম্পদের উদ্বৃত্ত যথা নিয়মে দান কর, ঈশ্বরকে ঋণ দাও, উত্তম ঋণ। তোমাদের আত্মার মঙ্গলের জন্য যা কিছু সৎকর্ম অগ্রিম প্রেরণ করবে, তা তোমার ঈশ্বরের কাছে পেয়ে যাবে। আরো বর্ধিত আকারে, তার দেওয়া মহোত্তর পুরস্কার হিসাবে। তোমরা ঈশ্বরের কাছে ক্ষমা প্রার্থনা কর। নিঃসন্দেহে ঈশ্বর ক্ষমাশীল ও অতি দয়ালু।

অধ্যায় ৭৪ : আল - মুদ্দাস্‌সির (বস্ত্রাবৃত্ত)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) হে বস্ত্রাবৃত্ত! (২) ওঠো এবং লোকদের সতর্ক কর। (৩) তোমার প্রতিপালকের গৌরব বর্ণনা করো। (৪) তোমার পোষাক পবিত্র রাখো।

(৫) অপবিত্রতা পরিহার করো। (৬) কিছু পাওয়ার আশায় উপকার করো না। (৭) আর আপন প্রতিপালকের জন্য ধৈর্য ধারণ করো।

(৮) যেদিন শিংগায় (মহাশঙ্খে) ফুৎকার দেওয়া হবে, (৯) সেদিনটি হবে এক কঠিন দিন। (১০) অবিশ্বাসীদের জন্য সহজ হবে না। (১১) যে ব্যক্তিকে আমি একাকী সৃষ্টি করেছি তাকে আমার হাতে ছেড়ে দাও। (১২) আর আমি তাকে বিপুল ধন-সম্পদ দিয়েছি (১৩) তার পাশে থাকা পুত্রগণ, (১৪) আর তাকে সার্বিক স্বচ্ছলতা দান করেছি; (১৫) তবুও সে চায় তাকে আমি আরো অধিক দিই। (১৬) কখনই নয়, সে তো আমার নিদর্শনসমূহের বিরোধী। (১৭) শীঘ্রই আমি তাকে এক কষ্টদায়ক চড়াইতে (পাহাড়ে) আরোহণ করাব।

(১৮) সে চিন্তা করল আর সিদ্ধান্ত নিল। (১৯) এবং পরিতাপ তার জন্য! কিভাবে সে সিদ্ধান্ত নিল! (২০) সে ধ্বংসপ্রাপ্ত হোক! কিভাবে সে এমন সিদ্ধান্ত নিল! (২১) তারপর সে দেখল। (২২) অতঃপর ঈদুটি করল ও বিকৃত মুখভঙ্গি করল। (২৩) তারপর বললঃ এতো প্রাচীনকাল থেকে চলে আসা এক জাদু ছাড়া কিছুই নয়। (২৫) এতো মানুষেরই বাণী।

(২৬) আমি তাকে শীঘ্রই নরকে নিক্ষেপ করবো। (২৭) তুমি কি জান, নরক কি? (২৮) এটা জীবিতাবস্থায় থাকতেদেবে না, বা মৃত অবস্থায় ছেড়ে দেবে না। (২৯) চামড়া ঝলসে দেবে। (৩০) প্রহরায় উনিশ জন দেবদূত। (৩১) আর আমি দেবদূতদেরকে নরকের তত্ত্বাবধায়ক বানিয়েছি। আর তাদের এই সংখ্যা নির্ধারণ করেছি কেবল অবজ্ঞাকারীদের পরীক্ষার জন্য, যাতে গ্রন্থধারীদের প্রত্যয় জন্মে, আস্থাবানদের আস্থা বৃদ্ধি পায় এবং গ্রন্থধারী আর আস্থাবানগণ কেউই সন্দেহ পোষন না করে। আর যাদের অন্তরে ব্যাধি আছে সেই সব অবিশ্বাসী লোকেরা বলবেঃ এর মধ্যে

ঈশ্বর কি তাৎপর্য রেখেছেন? এভাবে ঈশ্বর যাকে ইচ্ছা পথভ্রষ্ট করেন আর যাকে ইচ্ছা পথ দেখান। আর তোমার প্রভুর বাহিনী সম্পর্কে কেবল তিনিই জানেন। আর এই বর্ণনা তো সমস্ত মনুষ্যের জন্য নিছক উপদেশ।

(৩২) কখনও নয়, চন্দের শপথ, (৩৩) রাতের শপথ যখন তা চলে যায়, (৩৪) এবং প্রভাতের শপথ যখন তা উদ্ভাসিত হয়। (৩৫) নিঃসন্দেহে নরক গুরুতর বিষয়সমূহের একটি। (৩৬) মানুষের জন্য সতর্কবাণী স্বরূপ। (৩৭) সমান ভাবে সকলের জন্য যারা অগ্রসর হয় বা পশ্চাতে থাকে। (৩৮) প্রত্যেক ব্যক্তি তার কৃতকর্মের জন্য দায়বদ্ধ। (৩৯) ডানদিকের লোকেরা ব্যতীত। (৪০) তারা থাকবে স্বর্গোদ্যানে, একে অপরের কাছে জানতে চাইবে, (৪১) অপরাধীদের সম্পর্কে, (৪২) কোন্ কাজ তোমাদের নরকে নিয়ে এল? (৪৩) তারা বলবেঃ আমরা প্রার্থনা কারীদের দলভুক্ত ছিলাম না, (৪৪) গরীবদের খাবার দিতাম না, (৪৫) আমরা বিভ্রান্ত সমালোচনাকারীদের সাথে অসার সমালোচনায় মগ্ন থাকতাম, (৪৬) এবং বিচারের দিনকে মিথ্যা বলতাম। (৪৭) শেষ পর্যন্ত আমাদের নিশ্চিত পরিণতি এসে গেছে। (৪৮) ফলে সুপারিশকারীদের সুপারিশ তাদের কোন কাজে আসবে না।

(৪৯) তাদের কি হলো যে, তারা উপদেশবাণী (কুরআন) হতে মুখ ফিরিয়ে নেয়? (৫০) ভীত সম্ভ্রান্ত গাধার মতো। (৫১) সিংহের ভয়ে পলায়ন করছে। (৫২) বরং ওদের মধ্যে প্রত্যেকেই চায় যে, তাদেরকে উন্মুক্ত গ্রন্থ দেওয়া হোক। (৫৩) কখনও নয়, বরং এরা পরলোকের ভয় করে না। (৫৪) কখনও নয়, এটাতো এক উপদেশবাণী। (৫৫) অতএব যার মন চায় সে এথেকে উপদেশ গ্রহণ করুক। (৫৬) তবে ঈশ্বর চাইলেই তারা এথেকে উপদেশ গ্রহণ করবে, তাঁকেই ভয় করা উচিত এবং তিনিই ক্ষমা করার অধিকারী।

অধ্যায় ৭৫ঃ আল-ক্বিয়ামাহ (পুনরুত্থান দিবস)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আমি শপথ করছি পুনরুত্থান দিবসের। (২) আরও আমি শপথ করছি নিন্দুক আত্মার। (৩) মানুষ কি মনে করে যে, আমি তার অস্থিসমূহ একত্রিত করতে পারবো না। (৪) কেন নয়, আমি তার আঙুলের অগ্রভাগ পর্যন্ত ঠিকভাবে পুনর্বিন্যাস করতে সক্ষম। (৫) তবুও মানুষ তার সন্মুখে যা আছে তা অস্বীকার করতে চায়। (৬) তারা প্রশ্ন করে, পুনরুত্থানের দিবস কবে আসবে? (৭) যখন দৃষ্টি ধাঁধিয়ে যাবে, (৮) আর চন্দ্র জ্যোতিশূন্য হয়ে যাবে, (৯) সূর্য এবং চন্দ্রকে একত্রিত করে দেওয়া হবে। (১০) সেদিন মানুষ বলবেঃ কোথায় পালাবো? (১১) কখনও না, কোন আশ্রয়স্থল নেই। (১২) সেদিনের ঠিকানা কেবল তোমার প্রভুর কাছেই। (১৩) মানুষকে সেদিন জানিয়ে দেওয়া হবে, যা সে সামনে পাঠিয়েছে ও যা পিছনে রেখে এসেছে। (১৪) বরং মানুষ নিজের সম্বন্ধে ভালভাবে জানে। (১৫) যদিও সে নানা অজুহাত পেশ করে থাকে।

(১৬) (হে পয়গম্বর) প্রত্যাদেশ তাড়াতাড়ি শিখে নেওয়ার জন্য তুমি দ্রুত তোমার জিহ্বা সঞ্চালন করো না। (১৭) এর সংগ্রহ ও পাঠের ব্যবস্থা করা আমারই দায়িত্ব। (১৮) তাই যখন আমি তা শোনাই তখন তুমি সেই পাঠ অনুসরণ করো। (১৯) এরপর তা বুঝিয়ে দেওয়ার দায়িত্ব আমারই।

(২০) কখনও না, তোমরা বরং পার্থিব জীবনটাকেই ভালবাস। (২১) এবং পরকালকে উপেক্ষা করো। (২২) সেদিন কোন কোন মুখমণ্ডল হবে প্রফুল্ল। (২৩) তারা তাদের প্রভুর দিকে দেখতে থাকবে। (২৪) আর কোন কোন মুখমণ্ডল হবে উদাস। (২৫) তারা ধারণা করবে যে, তাদের উপর এক বিপর্যয়

নেমে আসবে। (২৬) কখনও নয়, যখন প্রাণ কণ্ঠাগত হবে, (২৭) আর বলা হবে, কোন জাদুকর কি তাকে বাঁচাতে পারবে? (২৮) আর সে বুঝে নেবে যে, এটাই বিদায়ের সময়। (২৯) এবং পায়ের সাথে পা জড়িয়ে যাবে। (৩০) সেই দিনটি হবে তোমার প্রভুর দিকে যাওয়ার।

(৩১) সে বিশ্বাসও করেনি আর প্রার্থনাও করেনি। (৩২) বরং অবিশ্বাস করেছে আর মুখ ফিরিয়ে নিয়েছে। (৩৩) অতঃপর দন্তভরে তার নিজের লোকের কাছে চলে গেছে। (৩৪) পরিতাপ তোমার জন্য! (হে মানুষ) সত্যি, তোমার জন্য পরিতাপ! (৩৫) পুনরায় পরিতাপ তোমার জন্য! (হে মানুষ) সত্যি, তোমার জন্য পরিতাপ! (৩৬) মানুষ কি মনে করে তাকে বৃথাই ছেড়ে দেওয়া হবে? (৩৭) সে কি নিষ্কিন্তু এক শুক্র বিন্দু ছিল না? (৩৮) তারপর সে পরিনত হল জোঁকের ন্যায় রক্তের এক ঘনিভূত দ্রব্য, তারপর ঈশ্বর তাকে সৃষ্টি করেছেন এবং সুন্দর আকৃতি দিয়েছেন। (৩৯) তারপর তাকে দুই প্রকারের করে দিয়েছেনঃ পুরুষ ও নারী। (৪০) এই সৃষ্টিকর্তা কি মৃতদেরকে জীবিত করতে সক্ষম নন?

অধ্যায় ৭৬ঃ আল - ইনসান (মানব সম্প্রদায়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) মানুষের উপর দিয়ে কখনও এমন একটা সময় অতিবাহিত হয়েছে যখন সে উল্লেখযোগ্য কিছু ছিল না। (২) আমি মানুষকে এক ফোঁটা মিশ্রিত তরল থেকে সৃষ্টি করেছি তাকে পরীক্ষা করবো বলে; তাই তাকে শ্রবণশক্তি সম্পন্ন ও দৃষ্টিশক্তি সম্পন্ন করেছি। (৩) তারপর তাকে পথ বুঝিয়ে দিয়েছি, এখন হয় সে কৃতজ্ঞ হবে, না হয় অকৃতজ্ঞ।

(৪) আমি অস্বীকারকারীদের জন্য শিকল, বেড়ী ও জ্বলন্ত আগুন প্রস্তুত রেখেছি। (৫) সৎকর্মশীলরা এমন এক পেয়ালা থেকে পান করবে যাতে কাফুরের মিশ্রণ থাকবে। (৬) ওর ঝর্ণা থেকে ঈশ্বরের বান্দারা পান করবে এবং তারা এই ঝর্ণাকে যথা ইচ্ছা প্রবাহিত করবে। (৭) তারা অঙ্গীকার পূর্ণ করে, এবং এমন একটি দিনকে ভয় করে যার কঠোরতা হবে ব্যাপক। (৮) খাদ্যের প্রতি আসক্তি থাকা সত্ত্বেও তারা দরিদ্র, অনাথ এবং বন্দীদের খাদ্য দান করে, (৯) (এবং বলেঃ) আমরা তোমাদের যা আহার করাই তা কেবল ঈশ্বরের সন্তুষ্টির জন্য। এর জন্য তোমাদের কাছে কোন প্রতিদান বা কৃতজ্ঞতা চাই না। (১০) আমরা আমাদের প্রভুর কাছ থেকে এক কঠোর ও বিপদময় দিনের ভয় করি। (১১) তাই ঈশ্বর তাদেরকে সেদিনের অনিষ্ট থেকে রক্ষা করবেন এবং তাদেরকে উৎফুল্লতা ও আনন্দ দান করবেন। (১২) এবং তাদের ধৈর্যের বদলে তাদেরকে স্বর্গ ও রেশমী বস্ত্র প্রদান করবেন। (১৩) তারা খাটের উপর হেলান দিয়ে বসবে, সেখানে তারা অতিশয় গরম বা অতিশয় শীত অনুভব করবে না। (১৪) উদ্যানের ছায়া তাদের উপর নুয়ে থাকবে এবং ফল-মূল তাদের নাগালের মধ্যে থাকবে। (১৫) এবং তাদেরকে পরিবেশন করা হবে রৌপপাত্রে এবং (কাঁচের পেয়ালায়) স্ফটিকের মত পান পাত্রে। (১৬) রূপোর তৈরী স্ফটিকের মত স্বচ্ছ পানপাত্রে পরিবেশনকারীরা উপযুক্ত পরিমাপে সেগুলো পূর্ণ করবে।

(১৭) সেখানে তাদেরকে অন্য এক পানীয় পান করানো হবে যাতে থাকবে আদার মিশ্রণ। (১৮) জান্নাতের একটি বারনা যাকে ‘সালসাবীল’ বলা হয়। (১৯) তাদের সেবায় নিযুক্ত থাকবে চির কিশোরগণ। তুমি তাদেরকে দেখলে মনে করবে যে যেন মুক্তা ছড়ানো রয়েছে। (২০) আর তুমি যেখানেই দেখবে, সেখানেই মহাপুরস্কার ও মহান সম্রাজ্য দেখতে

পাবে। (২১) তাদের গায়ে থাকবে সবুজ পাতলা রেশমীবস্ত্র এবং মোটা রেশমী বস্ত্রও। আর তাদেরকে পরানো হবে রূপোর কঙ্কন। আর তাদের প্রভু তাদেরকে পবিত্র পানীয় পান করাবেন। (২২) নিঃসন্দেহে এটা তোমাদের পুরস্কার, আর তোমাদের প্রচেষ্টা গৃহীত হয়েছে।

(২৩) আমিই তোমার উপরে পর্যায়ক্রমে কুরআন অবতীর্ণ করেছি। (২৪) অতএব তোমার প্রভুর নির্দেশের জন্য প্রতিক্ষা কর এবং ওদের মধ্যে কোন পাপী অথবা কৃতঘ্নের কথা শুনো না। (২৫) আর তোমার প্রতি পালকের নাম স্মরণ করো সকাল সন্ধ্যায়। (২৬) এবং রাতেও তাকে সিজদা (প্রণতিজ্ঞাপন) করো এবং তাঁরই স্তুতি করো রাতের অধিক সময় ধরে। (২৭) ওই লোকেরা (যারা ঈশ্বরের প্রতি বিস্মরণশীল) তাৎক্ষণিক মুনাফা কামনা করে এবং পরবর্তী কঠিন দিবসকে উপেক্ষা করে। (২৮) আমিই তাদের সৃষ্টি করেছি এবং তাদের গঠন মজবুত করেছি। আবার আমি যখন ইচ্ছা করবো তখন তাদের পরিবর্তে তাদের মতই আরেক দলকে নিয়ে আসবো। (২৯) এটা একটা উপদেশ; অতএব যে চায় সে যেন তার প্রভুর দিকের পথ অবলম্বন করুক। (৩০) ঈশ্বর (পথ প্রদর্শন করতে) না চাইলে তোমরা চাইতে পারো না। নিশ্চয়ই ঈশ্বর মহাজ্ঞানী, পরম প্রজ্ঞাবান। (৩১) তিনি যাকে ইচ্ছা করেন স্বীয় অনুগ্রহের অন্তর্ভুক্ত করেন আর অত্যাচারীদের জন্য তিনি যন্ত্রণাদায়ক শাস্তি প্রস্তুত রেখেছেন।

অধ্যায় ৭৭ঃ আল-মুরসালাত (প্রেরিতগণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বাতাসের শপথ, যা প্রেরণ করা হয়, (২) তারপর যখন তা

প্রবল বেগে ধাবমান হয়, (৩) আর মেঘরাশীকে বহন করে ছড়িয়ে দেয়, (৪) ন্যায়-অন্যায়ের পার্থক্যকারী বাণী সমূহের, (৫) আর প্রত্যাশে বহনকারী দেবদূতগণের - (৬) অনুশোচনা স্বরূপ বা সতর্কতা স্বরূপ। (৭) তোমাদেরকে যে প্রতিশ্রুতি দেওয়া হচ্ছে তা অবশ্যই বাস্তবায়িত হবে।

(৮) অতএব, যখন তারকারাজি জ্যোতিশূন্য হয়ে যাবে (৯) এবং আকাশ বিদীর্ণ হবে, (১০) পাহাড়-পর্বত-চূর্ণ-বিচূর্ণ করে দেওয়া হবে, (১১) এবং যখন পয়গম্বরগণকে নির্ধারিত সময়ে একত্রিত করা হবে। (১২) কোন্ দিনের জন্য এসব স্থগিত রাখা হয়েছে? (১৩) চুড়ান্ত নিষ্পত্তির দিনের জন্য। (১৪) তুমি কি জানো চুড়ান্ত নিষ্পত্তির দিন কি? (১৫) অবিশ্বাসকারীদের জন্য বিনাশের দিন। (১৬) আমি কি পূর্ববর্তীদেরকে ধ্বংস করিনি? (১৭) অতঃপর পরবর্তীদেরকেও তাদের অনুগামী করবো। (১৮) আমি অপরাধীদের সাথে এমনই করে থাকি। (১৯) অবিশ্বাসীদের জন্য সেদিন বিনাশের দিন।

(২০) আমি কি তোমাদেরকে তুচ্ছ তরল হতে সৃষ্টি করিনি? (২১) তারপর তা এক নিরাপদ স্থানে (জরায়ুতে) রেখেছি। (২২) একটি নির্দিষ্ট মেয়াদ পর্যন্ত। (২৩) এভাবেই আমি ক্রমবৃদ্ধির স্তর নির্ধারণ করেছি এবং নিশ্চয় আমার নির্ধারণের ক্ষমতা কতই না উত্তম। (২৪) সেদিন অবিশ্বাসীদের জন্য বিনাশের দিন! (২৫) আমি কি ভূমিকে ধারণকারী করিনি? (২৬) জীবিত ও মৃতদের জন্য? (২৭) তাতে আমি সুদৃঢ় উঁচু পর্বতমালা স্থাপন করেছি আর তোমাদেরকে সুপেয় জল পান করিয়েছি। (২৮) সেদিন অবিশ্বাসীদের জন্য বিনাশের দিন!

(২৯) তোমরা যা অবিশ্বাস করতে তার দিকেই চল। (৩০) তিন শাখা বিশিষ্ট ছায়ার দিকে চল। (৩১) যাতে না আছে শীতল ছায়া, আর

না তা অগ্নিশিখা থেকে রক্ষা করে। (৩২) যা প্রাসাদের মতো বড় বড় অগ্নি-স্ফুলিঙ্গ বর্ষণ করবে। (৩৩) যেন তা হলুদ বর্ণের উটের পাল। (৩৪) সেদিন অবিশ্বাসীদের বিনাশের দিন। (৩৫) এ সেই দিন যে দিন লোকেরা কথা বলতে পারবে না। (৩৬) এবং তাদেরকে কোন আপত্তি পেশ করার অনুমতি দেওয়া হবে না। (৩৭) সেদিন অবিশ্বাসীদের বিনাশের দিন! (৩৮) এদিন শেষ বিচারের দিন। আমি তোমাদেরকে ও পূর্ববর্তীদেরকে একত্রিত করে নিয়েছি। (৩৯) যদি তোমাদের কোন যুক্তি থাকে তাহলে আমার বিরোধিতা কর। (৪০) সেদিন অবিশ্বাসীদের বিনাশের দিন!

(৪১) নিঃসন্দেহে ঈশ্বরভীরুরা থাকবে ছায়া ও ঝরনার মধ্যে। (৪২) এবং তাদের কাঙ্ক্ষিত ফলমূলের মধ্যে। (৪৩) তৃপ্তি সহকারে আহার কর এবং পান কর। তোমাদের সেই কর্মের বিনিময়ে যা তোমরা করতে। (৪৪) আমি সৎ মানুষদের এভাবেই প্রতিদান দিই। (৪৫) সেদিন অবিশ্বাসীদের বিনাশের দিন! (৪৬) আহার কর আর কিছুদিন উপভোগ করে নাও, নিঃসন্দেহে তোমরা অপরাধী। (৪৭) সেদিন অবিশ্বাসীদের বিনাশের দিন! (৪৮) যখন তাদেরকে বলা হত অবনত হও, তখন তারা অবনত হত না। (৪৯) সেদিন অবিশ্বাসীদের বিনাশের দিন! (৫০) এখন এরপরে তারা কিসের উপর বিশ্বাস স্থাপন করবে?

অধ্যায় ৭৮ঃ আন - নাবা (সংবাদ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) লোকেরা কি ব্যাপারে জিজ্ঞেস করছে? (২) সেই বড় খবরের ব্যাপার। (৩) যা নিয়ে তাদের মধ্যে মতানৈক্য রয়েছে। (৪) কখনও না, শীঘ্রই তারা জানবে। (৫) অবশ্যই, তারা শীঘ্রই জানবে। (৬) আমি কি ভূমিকে

বিছানা বানাইনি? (৭) আর পর্বতসমূহকে পেরেক? (ঠেক দেওয়া স্তম্ভ)। (৮) আমি তোমাদিগকে জোড়ায় জোড়ায় সৃষ্টি করেছি। (৯) আর ঘুমকে বানিয়েছি তোমাদের ক্লান্তি দূর করার জন্য। (১০) আর রাতকে আবরণ বানিয়েছি। (১১) এবং দিনকে জীবিকা উপার্জনের সময় বানিয়েছি। (১২) তোমাদের উপর সুদৃঢ় সপ্ত আকাশ বানিয়েছি। (১৩) তাতে একটি অতি উজ্জ্বল প্রদীপ স্থাপন করেছি। (১৪) আর আমি বৃষ্টি-বাহী মেঘমালা থেকে প্রচুর বৃষ্টিপাত করেছি। (১৫) যাতে আমি ওর মাধ্যমে উৎপন্ন করি শস্য ও উদ্ভিদ। (১৬) এবং ঘন গাছপালা বিশিষ্ট বাগান। (১৭) নিঃসন্দেহে বিচারের দিন নির্ধারিত আছে।

(১৮) যে দিন ‘সূর’ (মহাশঙ্খ) এ ফুৎকার দেওয়া হবে, আর তোমরা দলে দলে আসবে। (১৯) আকাশ খুলে দেওয়া হবে, ফলে তা বহু দ্বার বিশিষ্ট হবে। (২০) এবং পর্বতসমূহকে নিশ্চিহ্ন করে দেওয়া হবে ফলে সেগুলো মরীচিকায় পরিণত হবে। (২১) নিঃসন্দেহে নরক তো অপেক্ষায় আছে। (২২) বিদ্রোহীদের ঠিকানা। (২৩) সেখানে শীঘ্রই যুগ যুগ ধরে বাস করবে। (২৪) সেখানে তারা কোন ঠাণ্ডা কিংবা কোন পানীয় আশ্বাদন করবে না, (২৫) ফুটন্ত জল ও পুঁজ ব্যতীত। (২৬) কর্মফলের প্রতিদানে। (২৭) তারা হিসাবের ভয় করত না। (২৮) আর তারা আমার বাণীসমূহকে পরিপূর্ণভাবে অস্বীকার করত। (২৯) আমি সবকিছুই লিখিতভাবে সংরক্ষণ করে রেখেছি। (৩০) অতএব স্বাদ আশ্বাদন করো, আমি কেবল তোমাদের শাস্তি বৃদ্ধিই করে যাব।

(৩১) নিঃসন্দেহে যারা ঈশ্বরকে ভয় করত তাদের জন্য এক বিরাট সাফল্য রয়েছে। (৩২) বাগান এবং আঙুর। (৩৩) সমবয়স্কা যুবতী কুমারীগণ। (৩৪) পরিপূর্ণ পেয়ালা। (৩৫) সেখানে তারা কোন নিরর্থক ও অসত্য কথা

শুনবে না। (৩৬) এ সবই প্রতিফল, তোমার প্রভুর পক্ষ থেকে; তাদের কর্ম অনুসারে। (৩৭) করুণাময়ের পক্ষ থেকে যিনি আকাশ, পৃথিবী ও তার মধ্যে যা কিছু আছে সবার প্রভু। তাঁর নিকট কারো কথা বলার সামর্থ্য থাকবে না। (৩৮) যে দিন জিব্রাঈল ও দেবদূতগণ সারিবদ্ধ ভাবে দাঁড়াবে, কেউ কথা বলবে না কিন্তু করুণাময় যাকে অনুমতি দেবেন সে ব্যতীত, এবং সে সঠিক কথা বলবে। (৩৯) সেই দিনটি নিশ্চিত; অতএব যে চায় সে তার প্রভুর কাছে আশ্রয় নিক। (৪০) আমি তোমাকে এক নিকটবর্তী শাস্তি সম্পর্কে সতর্ক করলাম; সেদিন মানুষ তার হাতের অর্জিত কৃতকর্মকে দেখবে আর অস্বীকারকারীরা বলবেঃ হায়! আমি যদি মাটি হয়ে যেতাম!

অধ্যায় ৭৯ : আন-নাযিআত (নিমজ্জিত)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ শিকড় ছেঁড়া বাতাসের। (২) আর শপথ, মৃদু গতিতে চলা বাতাসের। (৩) আর শপথ, ভাসমান মেঘের। (৪) অতঃপর যারা এগিয়ে চলে তাদের। (৫) এবং যারা সকল কর্ম নির্বাহ করে। (৬) সেদিন মহা কম্পন (পৃথিবীকে) প্রকম্পিত করবে। (৭) তাকে অনুসরণ করবে পরবর্তী (প্রকম্পন)। (৮) কত হৃদয় সেদিন কাঁপতে থাকবে। (৯) তাদের দৃষ্টি থাকবে অবনত। (১০) তারা বলেঃ আমরা কি পূর্বাবস্থায় ফিরে যাব? (১১) ক্ষয়প্রাপ্ত অস্থিতে পরিণত হওয়ার পরেও? (১২) তারা বলেঃ এই প্রত্যাবর্তন তো খুবই ক্ষতিকর হয়ে দাঁড়াবে। (১৩) তা তো কেবল এক আওয়াজ হবে। (১৪) তারপর হঠাৎই (একে একে) এক ময়দানে উপস্থিত হবে।

(১৫) মূসার (মোজেসের) কথা তোমার কাছে পৌঁছেছে কি?

(১৬) যখন তার প্রভু তাকে পবিত্র তুবা উপত্যকায় সম্মোদন করেছিলেন। (১৭) ফ্যারাও এর কাছে যাও, সে বিদ্রোহী হয়ে গেছে। (১৮) তাকে গিয়ে বলঃ তোমার কি শুধরে যাওয়ার ইচ্ছা আছে? (১৯) আমি কি তোমাকে তোমার প্রভুর দিকের পথ দেখাব, যাতে তুমি ভয় কর? (২০) অতঃপর মুসা (মোজেস) তাকে মহা নিদর্শন দেখাল; (২১) কিন্তু সে অবিশ্বাস করল ও অবাধ্য হল। (২২) আবার সে পিছনে ফিরে পূর্বের কর্মে সচেপ্ট হল। (২৩) তারপর তার লোকজনদের একত্রিতকরল এবং ঘোষণা করল, (২৪) আমিই তোমাদের সর্বশ্রেষ্ঠ প্রভু। (২৫) তাই ঈশ্বর তাকে পরলোক ও পার্থিব জগতের শাস্তি দ্বারা পাকড়াও করলেন। (২৬) নিঃসন্দেহে এতে এক শিক্ষা আছে প্রত্যেক ব্যক্তির জন্য যারা ভয় করে।

(২৭) তোমাদেরকে বানানো বেশী কঠিন কাজ না আকাশকে; ঈশ্বরই ওটা বানিয়েছেন। (২৮) তিনি এর ছাদ উঁচু করেছেন এবং একে সুগঠিত করেছেন। (২৯) এর রাতকে তিনি অন্ধকারাচ্ছন্ন করেছেন এবং এর দিনকে করেছেন জ্যোতিষ্মান। (৩০) এরপরে তিনি ভূমিকে বিস্তৃত করেছেন। (৩১) তা থেকে তিনি বের করেছেন জল ও তৃণভূমি। (৩২) আর পর্বতসমূহ স্থাপন করেছেন। (৩৩) তোমাদের ও তোমাদের গবাদী পশুদের জীবনসামগ্রী রূপে।

(৩৪) তারপর যখন মহাবিপদ আসবে। (৩৫) সেদিন মানুষ তার কৃতকর্ম স্মরণ করবে। (৩৬) এবং নরককে প্রকাশ্যে দেখানো হবে। (৩৭) তাই যারা বিদ্রোহ করেছে। (৩৮) আর পার্থিব জীবনকে অগ্রাধিকার দিয়েছে। (৩৯) নরক হবে তাদের ঠিকানা। (৪০) আর যে তার প্রভুর সামনে দাঁড়ানোর ভয় করেছে এবং কু-প্রবৃত্তি থেকে নিজেকে বিরত রেখেছে। (৪১) অবশ্য স্বর্গই হবে তার ঠিকানা। (৪২) তারা তোমাকে মহাপ্রলয়ের দিন সম্পর্কে প্রশ্ন করে যে, তা কখন সংঘটিত হবে? (৪৩) ওদের মন্তব্যে তোমার কি

সম্পর্ক? (৪৪) এই ব্যাপারটি তোমার প্রভুর সাথে সম্পর্কিত। (৪৫) তুমি তো কেবল সতর্ককারী ওই ব্যক্তির, যে ভয় করে। (৪৬) সেদিন তারা তা দেখবে, মনে করবে তারা এজগতে ছিলই না মাত্র একটি সকাল বা একটি সন্ধ্যা ছাড়া।

অধ্যায় ৮০ঃ আল-আবাসা (ভ্রুকুণ্ঠিত)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) সে ভ্রুকুণ্ঠিত করল এবং মুখ ফিরিয়ে নিল। (২) তার কাছে অন্ধ লোকটি এসে পড়ায়। (৩) তুমি কেমন করে জানবে, সে হয়ত পরিশুদ্ধ হতো। (৪) অথবা উপদেশ গ্রহণ করত এবং এই উপদেশ তার কাজে আসত। (৫) যে লোক কারো পরোয়া করে না (৬) তুমি তার চিন্তায় মশগুল হয়ে আছো। (৭) অথচ তারা পরিশুদ্ধ না হলেও তোমার কোন দায়িত্ব নেই। (৮) পক্ষান্তরে, যে তোমার কাছে ছুটে এল (৯) এবং সে ভয়ও করে (১০) তাকে তুমি গুরুত্ব দিলে না। (১১) কখনও নয়, এটা তো একটা উপদেশ। (১২) অতএব যে ইচ্ছা করবে, সে তা স্মরণ রাখবে। (১৩) ওটা সম্মানিত গ্রন্থে (লাওহে মাহফুজে) লিপিবদ্ধ, (১৪) যা শ্রেষ্ঠ এবং পবিত্র। (১৫) লেখকদের হাতে, (১৬) যারা সম্মানিত ও পুণ্যবান।

(১৭) পরিতাপ মানুষের জন্য! সে কত অকৃতজ্ঞ! (১৮) ঈশ্বর তাকে কোন্ বস্তু দিয়ে সৃষ্টি করেছেন? (১৯) একটি ফোঁটা থেকে তাকে সৃষ্টি করেছেন, তারপর তার মান নির্ণয় করেছেন। (২০) তারপর তার জন্য পথ সহজ করে দিয়েছেন। (২১) তারপর তার মৃত্যু ঘটান এবং কবরস্থ করেন। (২২) তারপর যখন তিনি ইচ্ছা করবেন তাকে পুনর্জীবিত করবেন। (২৩) তবুও মানুষ তাঁর আদেশ মান্য করতে অস্বীকৃত হয়। (২৪) মানুষ তার খাদ্যের প্রতি লক্ষ্য করুক। (২৫) আমি প্রচুর পরিমাণ

বৃষ্টি বর্ষণ করি। (২৬) তারপর ভূমিকে যথোচিতভাবে বিদীর্ণ করি। (২৭) এবং তা থেকে শস্য উৎপন্ন করি। (২৮) আঙুর, শাক-সবজি, (২৯) জলপাই, খেজুর, (৩০) ঘন গাছপালা বিশিষ্ট বাগান, (৩১) ফল ও সবুজের সমারোহ, (৩২) তোমাদের ও তোমাদের গবাদীপশুদের জীবনোপকরণ রূপে।

(৩৩) অতঃপর যখন কর্ণ বিদারক বিকট শব্দ উঠবে, (৩৪) যে দিন মানুষ তার ভাই এর নিকট থেকে পালাবে, (৩৫) তার মা-বাবা থেকে, (৩৬) তার স্ত্রী থেকে এবং পুত্র থেকে, (৩৭) সেদিন তাদের প্রত্যেকেই নিজের নিয়ে অধিক চিন্তিত থাকবে। (৩৮) কোন কোন মুখ সেদিন উজ্জ্বল থাকবে, (৩৯) সহাস্য ও প্রফুল্ল। (৪০) আর কোন কোন মুখ সেদিন ধূলি ধূসরিত থাকবে, (৪১) এবং সেগুলি থাকবে কালিমালিপ্ত। (৪২) এই লোকেরাই অস্বীকারকারী, পাপাচারী।

অধ্যায় ৮১ : আত-তাকবীর (ভাঁজ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) সূর্যকে যখন দীপ্তিহীন করা হবে, (২) এবং নক্ষত্ররাজী জ্যোতি শূন্য হয়ে যাবে, (৩) আর পাহাড়গুলোকে চলমান করা হবে, (৪) যখন দশমাসের গর্ভবতী উষ্ট্রীগুলো অযত্নে পরিভ্রমণ করবে, (৫) যখন সমস্ত বন্য পশুদেরকে একত্রিত করা হবে, (৬) যখন সমুদ্রগুলোকে উত্তাল করা হবে, (৭) যখন আগ্নেয়গুহাগুলি বিভিন্ন শ্রেণীতে বিভিক্ত করা হবে, (৮) যখন জীবন্ত সমাধি দেওয়া কন্যা সন্তানদের জিজ্ঞাসা করা হবে, (৯) কোন অপরাধে তাকে হত্যা করা হয়েছিল, (১০) যখন কর্মলিপি খোলা হবে, (১১) যখন আকাশ আবরণমুক্ত হবে, (১২) আর নরকের আগুন প্রজ্জ্বলিত করা হবে, (১৩) স্বর্গকে নিকটে আনা হবে, (১৪) তখন প্রত্যেক ব্যক্তি জানতে পারবে

যে, সে কি নিয়ে এসেছে।^১

(১৫) আমি পশ্চাদপসরণকারী নক্ষত্রের শপথ করছি। (১৬) ঐ তারকারাজী যারা তাদের গতিপথে সঞ্চারমান হয় এবং অন্তর্মিত হয়। (১৭) শপথ রাতের যখন তার অবসান ঘটে (১৮) এবং প্রভাতের যখন তার আবির্ভাব হয়। (১৯) নিশ্চয় এই বাণী (কুরআন) সম্মানিত দূতের মাধ্যমে আনীত হয়েছে। (২০) মহাসিংহাসনের মালিকের নিকট হতে ক্ষমতা ও উচ্চ মর্যাদা প্রাপ্ত, (২১) মান্যবর ও বিশ্বাসভাজন। (২২) আর তোমাদের সাথী উল্লাদ নয়। (২৩) সে তাকে (দেবদূত) স্পষ্ট দিগন্তে প্রত্যক্ষ করেছে। (২৪) আর সে অদৃশ্য বিষয় নিয়ে অতি উৎসুক নয়। (২৫) আর এ অভিশপ্ত শয়তানের বাণী নয়। (২৬) অতএব তোমরা কোথায় যাচ্ছে? (২৭) এটা তো বিশ্ব-বাসীর জন্য এক উপদেশ। (২৮) তোমাদের মধ্যে যে সরল পথে চলতে চায়, তার জন্য। (২৯) আর ঈশ্বর (পথ প্রদর্শন করতে) না চাইলে তোমরা কিছুই চাইতে পার না।

অধ্যায় ৮২ঃ আল-ইন্ফিতার (চূর্ণবিচূর্ণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) যখন আকাশ ফেটে যাবে, (২) আর তারকারা ছড়িয়ে যাবে, (৩) আর যখন সমুদ্র বহমান হবে, (৪) কবর গুলো খুলে দেওয়া হবে,

^১ বিঃ দ্রঃ (৮১ঃ ১৪) কুরআনের বিভিন্ন জায়গায় প্রলয়দিবস বা শেষ বিচার দিবসের বর্ণনা দেওয়া হয়েছে। যখন প্রলয়দিবসের আগমন ঘটবে, তখন পৃথিবীর ভারসাম্য বিনষ্ট হবে এবং মানুষ অসহায় বোধ করবে। সেই দিন সংকর্ম ব্যতীত সমস্ত কিছুই গুরুত্বহীন হয়ে যাবে। তখন অত্যাচারিত মানুষেরা তাদের অত্যাচারীদের উপর নিজেদের ইচ্ছামত প্রতিশোধ গ্রহণ করতে পারবে।

(৫) প্রত্যেকেই জানবে যে, সে আগে কি পাঠিয়েছে আর পিছনে কি ছেড়ে এসেছে। (৬) হে মানুষ! কি তোমাকে বিভ্রান্ত করল তোমার দয়াবান প্রভু সম্পর্কে? (৭) যিনি তোমাকে সৃষ্টি করলেন, তোমাকে সুঠাম করলেন এবং সুসামঞ্জস্যপূর্ণ করলেন, (৮) তিনি যেমন চাইলেন তেমন আকৃতি দিলেন। (৯) না কখনই না, তোমরা বরং বিচার দিনকে অবিশ্বাস করে থাকো। (১০) তোমাদের উপরে অবশ্যই পর্যবেক্ষক নিযুক্ত আছে। (১১) সম্মানিত লেখকেরা। (১২) তোমরা যাই করো তারা সব জানে। (১৩) নিঃসন্দেহে পুন্যবানেরা সুখে থাকবে (১৪) এবং অপরাধীরা অবশ্যই নরকে। (১৫) তারা বিচারের দিনে তাতে প্রবেশ করবে। (১৬) তা থেকে তারা কোনদিন বিচ্ছিন্ন হবে না। (১৭) তুমি কি জান, বিচারের দিন কি? (১৮) পুনরায়, তুমি কি জান, বিচারের দিন কি? (১৯) যে দিন কেউ কারো জন্য কিছুই করতে পারবে না। সেদিনের কর্তৃত্ব হবে একমাত্র ঈশ্বরের।

অধ্যায় ৮৩ঃ আল-মুতাফ্ফিফীন

(যারা ওজনে কম দেয়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বিনাশ তাদের জন্য, যারা মাপে ও ওজনে কম দেয়। (২) যারা মানুষের কাছ থেকে মেপে নেওয়ার সময় পুরো নেয়। (৩) আর দেওয়ার সময় মাপ বা ওজন কম দেয়। (৪) তারা কি বোঝে না যে, তাদেরকে আবার উঠানো হবে (৫) এক মহাদিবসে। (৬) যে দিন মানুষ বিশ্বজগতের প্রভুর সামনে দণ্ডায়মান হবে। (৭) কখনই না, নিশ্চয়ই পাপীদের কর্মপত্র সিঁজীনে থাকবে। (৮) সিঁজীনে কি তা তুমি জান কি? (৯) সুলিখিত এক পুস্তক। (১০) সেদিন অবিশ্বাসকারীদের জন্য বিনাশ! (১১) যারা বিচারের দিনকে অবিশ্বাস করে।

(১২) তবে প্রত্যেক সীমালঙ্ঘনকারী, পাপীই কেবল তা অবিশ্বাস করে।
 (১৩) যখন তার কাছে আমার বাণী সমূহ পাঠ করে শোনানো হয়, তখন সে বলেঃ এতো পূর্ববর্তীদের উপকথা সমূহ। (১৪) কখনই নয়, বরং তাদের কৃতকর্ম তাদের হৃদয়ের উপর আবরণ ফেলে দিয়েছে। (১৫) কখনই নয়; বরং সেদিন তাদের ও তাদের প্রভুর মাঝে একটা অন্তরাল থাকবে। (১৬) তারপর তারা নরকে প্রবেশ করবে। (১৭) তারপর বলা হবেঃ এটাই সেই জিনিষ যা তোমরা অবিশ্বাস করতে।

(১৮) কখনই নয়, নিঃসন্দেহে পূন্যবানদের কর্ম পত্র থাকবে ইল্লিয়ীনে।
 (১৯) তুমি জান কি ইল্লিয়ীন কি? (২০) সুলিখিত এক পুস্তক। (২১) নিকটে অবস্থানকারী দেবদূতরা ওটা প্রত্যক্ষ করবে। (২২) নিঃসন্দেহে পুণ্যবানেরা স্বাচ্ছন্দে থাকবে। (২৩) তারা পালঙ্কে বসে বসে দেখবে। (২৪) তাদের চেহারা স্বাচ্ছন্দের সজীবতা দেখতে পাবে। (২৫) তাদেরকে সীলমোহর কৃত বিশুদ্ধ পানীয় পান করতে দেওয়া হবে। (২৬) যার সীলমোহর হবে কস্তুরীর। অতএব এর জন্য প্রতিযোগীদের প্রতিযোগিতা করা উচিত। (২৭) এর মিশ্রণ হবে তাসনীমের জল। (২৮) এটা একটা ঝরনা যা থেকে নৈকট্যপ্রাপ্তরা পান করবে। (২৯) নিঃসন্দেহে অপরাধীরা সত্যে বিশ্বাস স্থাপনকারীদের উপহাস করত। (৩০) তারা যখন তাদের পাশ দিয়ে যেত তখন নিজেরা পরস্পর চোখ টিপে বিদ্রূপ করত। (৩১) আর যখন নিজের লোকদের কাছে ফিরতো তখন তাদের নিয়ে ঠাট্টা বিদ্রূপ করতো। (৩২) আর যখন তাদেরকে দেখতো, তখন (ঘৃণাপূর্ণ ভাবে) বলতঃ এই লোকগুলি নিশ্চিতভাবে বিপথগামী। (৩৩) অথচ তাদেরকে ওদের তত্ত্বাবধায়ক করে পাঠানো হয় নি। (৩৪) অতএব আজ আস্থাবানেরা অস্বীকারকারীদেরকে উপহাস করছে। (৩৫) পালঙ্কে বসে বসে দেখছে। (৩৬) বাস্তবে অস্বীকারকারীদেরকে তাদের কৃতকর্মের পর্যাণ্ত প্রতিফল পেয়েছে।

অধ্যায় ৮৪ : আল-ইনশিক্বাক (চৌচির)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) যখন আকাশ বিদীর্ণ হবে, (২) সে তার প্রভুর আদেশ পালন করবে এবং এটাই তার করণীয়। (৩) আর যখন ভূমিকে বিস্তৃত করে দেওয়া হবে, (৪) আর সে তার ভিতরের সবকিছু বাইরে নিষ্ক্ষেপ করে দিয়ে শূন্য হয়ে যাবে, (৫) সে তার প্রভুর আদেশ পালন করবে এবং এটাই তার করণীয়। (৬) হে মানুষ! তোমাদের প্রভুর অভিমুখে কঠোর পরিশ্রম করার পর তোমরা তার সাক্ষাৎ পাবে। (৭) তখন যাকে তার কর্মপত্র তার ডান হাতে দেওয়া হবে (৮) তার খুব সহজ হিসাব নেওয়া হবে। (৯) এবং আনন্দের সাথে নিজের লোকদের কাছে ফিরে আসবে। (১০) আর যার কর্মপত্র পিঠের পিছন থেকে দেওয়া হবে (১১) সে মৃত্যু কামনা করবে। (১২) এবং নরকে প্রবেশ করবে। (১৩) সে তার নিজের লোকদের কাছে প্রফুল্ল থাকত। (১৪) সে মনে করত কখনও ফিরে আসবে না। (১৫) কেন নয়? তার প্রভু তার উপর দৃষ্টি রাখতেন। (১৬) আমি শপথ করছি গোধূলী লগ্নের, (১৭) রাতের এবং রাত যেসব জিনিষকে আচ্ছন্ন করে তার (১৮) এবং চন্দ্রের যখন তা পূর্ণ হয়, (১৯) অবশ্যই তোমরা এক দশা থেকে আরেক দশায় আরোহন করবে। (২০) সুতরাং তাদের কি হল যে, তারা বিশ্বাস করে না? (২১) আর যখন তাদের সামনে কুরআন পাঠ করা হয় তখন তারা অবনত হয় না; (২২) বরং প্রত্যাখ্যান করে। (২৩) তারা তাদের অন্তরে যা কিছু সঞ্চয় করে ঈশ্বর তা সবিশেষ অবগত। (২৪) অতএব ওদেরকে এক যন্ত্রণাদায়ক শাস্তির সংবাদ দিয়ে দাও। (২৫) কিন্তু যারা সত্যে বিশ্বাস করে ও সংকর্ম করে, তাদের জন্য রয়েছে অন্তহীন এক পুরস্কার।

অধ্যায় ৮৫ : আল - বুরজ (নক্ষত্রপুঞ্জ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তারামণ্ডল সম্বলিত আকাশের শপথ, (২) আর প্রতিশ্রুত দিনের, (৩) দ্রষ্টা ও দৃষ্টের, (৪) ধ্বংস হয়েছে খাদের অধিপতির, (৫) যাতে ইন্ধনপ্রাপ্ত আগুনের তাপ ছিল, (৬) যখন তারা তার কিনারায় বসে ছিল; (৭) তারা আস্ত্রাবানদের সাথে যা করছিল তা প্রত্যক্ষ করছিল। (৮) ওদের সাথে তাদের শত্রুতা শুধু একারণেই ছিল যে, তারা পরাক্রমশালী ও সকল প্রশংসার অধিকারী ঈশ্বরকে বিশ্বাস করত। (৯) তাঁরই সম্রাজ্য আকাশ ও ধরণীতে আর ঈশ্বর সবকিছু প্রত্যক্ষ করছেন। (১০) যারা আস্ত্রাবান পুরুষ ও আস্ত্রাবান মহিলাদের প্রতারিত করেছে এবং অনুশোচনা করেনি ওদের জন্য রয়েছে নরকের শাস্তি। (১১) নিঃসন্দেহে যারা বিশ্বাস স্থাপন করেছে এবং সংকর্ম করেছে তাদের জন্য রয়েছে উদ্যান যার পাদদেশ দিয়ে নদী প্রবাহিত, এটাই বড় সফলতা। (১২) নিঃসন্দেহে তোমার প্রভুর পাকড়াও বড়ই শক্ত। (১৩) তিনিই সূচনা করেন আবার তিনিই পুনরাবৃত্তি করবেন। (১৪) তিনিই ক্ষমশীল, পরম স্নেহপরায়ণ। (১৫) মহা সিংহাসনের অধিপতি। (১৬) তিনি যা চান তাই করতে সক্ষম। (১৭) তোমার কাছে কি সেনাদলের সংবাদ পৌঁছেছে? (১৮) ফ্যারাও ও সামুদের? (১৯) তবুও এই অস্বীকারকারীরা তাদের অবিশ্বাসে অনড় রয়েছে। (২০) তবে ঈশ্বর ওদেরকে চতুর্দিক থেকে পরিবেষ্টন করে রেখেছেন; (২১) নিশ্চয় এটা গৌরবময় কুরআন। (২২) লওহে-মাহফুযে (সংরক্ষিত ফলকে) লিপিবদ্ধ আছে।

অধ্যায় ৮৬ঃ আত-তারিক (নৈশ আগন্তুক)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ আকাশের ও রাতে আগমনকারীর! (২) তুমি কি জান, রাতে আগমনকারী কি? (৩) এক উজ্জ্বল নক্ষত্র। (৪) কোন মানুষই এমন নেই যার উপর তত্ত্বাবধায়ক নেই। (৫) তাই মানুষের ভাবা উচিত যে, তাকে কোন্ বস্তু থেকে সৃষ্টি করা হয়েছে। (৬) তাকে সবোপযোগী স্বল্পিত এক তরল থেকে সৃষ্টি করা হয়েছে। (৭) যা বেরিয়ে আসে পিঠ ও বুকের মধ্য থেকে। (৮) নিঃসন্দেহে তিনি তা পুনঃসৃষ্টি করতে সক্ষম। (৯) যে দিন গোপন কাজগুলো পরীক্ষা করা হবে। (১০) সেদিন মানুষের কাছে না কোন ক্ষমতা থাকবে আর না কোন সাহায্যকারী। (১১) শপথ আকাশের, নিয়ত ঘূর্ণায়মান, (১২) এবং শপথ ধরণীর যা বিদীর্ণ হয়ে যায়, (১৩) নিশ্চয় এটা একটা চূড়ান্ত সিদ্ধান্তদায়ক বাণী। (১৪) এটা অনর্থক নয়। (১৫) তারা একটা চক্রান্ত করছে। (১৬) আর আমিও কৌশল করি। (১৭) অতএব অস্বীকারকারীদের অবকাশ দাও, ওদেরকে অবকাশ দাও কিছুদিনের।

অধ্যায় ৮৭ঃ আল-আ'লা (সর্বোচ্চ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তোমার প্রভুর নামের পবিত্রতা বর্ণনা করো যিনি সবচেয়ে শ্রেষ্ঠ। (২) যিনি তৈরী করেছেন তারপর সুসামঞ্জস্যপূর্ণ করেছেন। (৩) তিনি (সকল অস্তিত্বশীলদের) প্রকৃতি নির্ধারণ করেছেন এবং তদানুসারে পথ প্রদর্শন করেছেন। (৪) যিনি সবুজ ঘাস উৎপন্ন করেছেন। (৫) অতঃপর তাকে কালো বর্ণের আবর্জনায় পরিণত করেছেন। (৬) আমি

তোমাকে পাঠ করা য়া তুমি ভুলবে না। (৭) কিন্তু ঈশ্বর যা ইচ্ছা করেন তা ব্যতীত। তিনি প্রত্যক্ষ জানেন আর যা গোপনে আছে তাও। (৮) আর আমি তোমাকে সহজ পথে নিয়ে যাব। (৯) অতএব উপদেশ দাও, যদি উপদেশ উপকারে আসে। (১০) যে ভয় করে সে উপদেশ গ্রহণ করবে। (১১) আর সে এর থেকে মুখ ফিরিয়ে নেবে যে অভাগা। (১২) তারা ভয়ঙ্কর আগুনে প্রবেশ করবে। (১৩) অতঃপর সে সেখানে মরবেও না, আবার বাঁচবেও না। (১৪) যে নিজেকে শুদ্ধ করেছে সেই সফল হয়েছে। (১৫) যে স্বীয় প্রভুর নাম স্মরণ করে এবং প্রার্থনা করে। (১৬) তবে তোমরা পার্থিব জীবনকে প্রাধান্য দাও। (১৭) অথচ পরলোকের জীবনই শ্রেয় ও স্থায়ী। (১৮) নিশ্চয় এটা পূর্বের গ্রন্থেও আছে। (১৯) (বিশেষতঃ) মুসা (মোজেস) ও ইবরাহীমের (আব্রাহামের) গ্রন্থে।

অধ্যায় ৮৮ : আল - গাশিয়াহ (অপ্রতিরোধ্য ঘটনা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তোমার কাছে আচ্ছন্নকারীর (কিয়ামতের) সংবাদ পৌঁছেছে কি ?
 (২) সেদিন কতিপয় চেহারা হবে অপমানিত। (৩) শ্রান্ত, ক্লান্ত। (৪) তারা জ্বলন্ত আগুনে পতিত হবে। (৫) তাদেরকে ফুটন্ত ঝরনা থেকে জল পান করানো হবে। (৬) তাদের খাদ্য হবে একমাত্র কাঁটাওয়ালা তৃণ ঝাড়। (৭) যা না তাদেরকে পুষ্ট করবে আর না ক্ষুধা নিবারণ করবে। (৮) কতিপয় চেহারা সেদিন হবে আনন্দোজ্জ্বল। (৯) নিজেদের কর্মের জন্য সন্তুষ্ট থাকবে। (১০) সুউচ্চ উদ্যানে। (১১) সেখানে তারা কোন অসার কথা শুনবে না। (১২) সেখানে থাকবে বহমান ঝরণা। (১৩) সেখানে থাকবে উন্নত শয্যা। (১৪) উন্নত পানপাত্র, (১৫) এবং সারি সারি বিছানো গদি,

(১৬) আর গালিচা সব জায়গায় বিছানো থাকবে। (১৭) তারা কি তাহলে উটগুলির প্রতি তাকিয়ে দেখেনা যে, কিভাবে তাদেরকে সৃষ্টি করা হয়েছে? (১৮) এবং আকাশের দিকে লক্ষ্য করে না যে, কিভাবে তা উচ্ছে স্থাপন করা হয়েছে? (১৯) পাহাড়গুলোর দিকে যে, কিভাবে সেগুলো স্থাপিত করা হয়েছে? (২০) এবং পৃথিবীর দিকে যে, কিভাবে তাকে বিছানো হয়েছে? (২১) অতএব উপদেশ দাও, বস্তুতঃ তুমি একজন উপদেশ দাতা। (২২) তুমি তাদের উপর কর্ম নিয়ন্ত্রক নও। (২৩) কিন্তু যে মুখ ফিরিয়ে নিয়েছে এবং অবিশ্বাস করেছে, (২৪) ঈশ্বর তাকে শাস্তি দেবেন। (২৫) আমার কাছেই ওদের প্রত্যাবর্তন। (২৬) তারপর তাদের হিসাবের দায়িত্ব আমারই।

অধ্যায় ৮৯ঃ আল - ফজর (ভোর)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ প্রভাতের (২) আর দশ রাতের। (৩) জোড় এবং বিজোড়ের (৪) এবং রাতের, যখন তা গত হতে থাকে। (৫) কেননা বোধসম্পন্নদের জন্য তো এতে অনেক নিদর্শন আছে। (৬) তুমি কে দেখনি, তোমার প্রভু ‘আদ’ সম্প্রদায়ের সাথে কি আচরণ করেছিলেন? (৭) স্তম্ভধারী ‘ইরাম’ সম্প্রদায়ের সাথে? (৮) তাদের মতো কোন জাতি পৃথিবীতে সৃষ্টি করা হয় নি। (৯) ‘সামুদ’ সম্প্রদায়ের সাথে, যারা উপত্যকায় পাথর খোদাই করত? (১০) আর কীলকের অধিপতি ফ্যারাও এর সাথে? (১১) যারা দেশের মধ্যে বিদ্রোহ করেছিল। (১২) এবং সেখানে অনেক অশান্তি সৃষ্টি করেছিল। (১৩) যার ফলে তোমার প্রভু তাদের উপর শাস্তির কশাঘাত হানলেন। (১৪) তোমার প্রভু অবশ্যই সতর্ক দৃষ্টি রাখেন। (১৫) অতএব মানুষের ব্যাপার

হল এই যে, যখন তার প্রভু তাকে পরীক্ষা করার জন্য তাকে সম্মান ও কল্যাণ দান করেন, তখন সে বলেঃ আমার প্রভু আমাকে সম্মান দিয়েছেন। (১৬) আর যখন তিনি তাকে পরীক্ষা করার জন্য তার জীবিকা সংকুচিত করেন, তখন সে বলেঃ আমার প্রভু আমাকে অপমাণিত করে দিয়েছেন। (১৭) কখনও নয়, বরং তোমরাই অনাথকে মর্যাদা দাও না। (১৮) আর নির্ধনকে আহার করাতে একে অপরকে উৎসাহিত কর না। (১৯) আর তোমরা দুর্বলের উত্তরাধিকারসূত্রে প্রাপ্ত সম্পত্তি আত্মসাৎ কর। (২০) এবং সম্পদকে খুবই ভালবাস। (২১) কখনও নয়, যখন পৃথিবীকে ভেঙে চূর্ণ-বিচূর্ণ করা হবে। (২২) যখন তোমার প্রভু এবং সারিবদ্ধ দেবদূতগণ অবতরন করবেন। (২৩) এবং সেই দিন নরককে দৃষ্টিগোচর করানো হবে, তখন মানুষ সতর্ক হবে, কিন্তু সেই সতর্কতা তার কি কাজে আসবে? (২৪) তারা বলবেঃ হায়! যদি আমি আমার জীবনের জন্য আগে কিছু পাঠাতাম! (২৫) অতএব সেদিন ঈশ্বরের সমতুল্য শাস্তি কেউ দেবে না। (২৬) এবং তিনি যেমন বাঁধবেন তেমন বাঁধন কেউ বাঁধতে পারবে না। (২৭) হে পরিতৃপ্ত আত্মা! (২৮) তোমার প্রভুর কাছে ফিরে চল। তুমি তাঁর প্রতি প্রসন্ন আর তিনিও তোমার প্রতি প্রসন্ন। (২৯) অতএব আমার বান্দাদের দলভুক্ত হও। (৩০) আর প্রবেশ কর আমার স্বর্গে।

অধ্যায় ৯০ঃ আল-বালাদ (শহর)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আমি শপথ করছি এই নগরীর (মক্কার)। (২) আর তুমি এই শহরে বসবাস করো। (৩) শপথ, পিতা ও তার সন্তানের। (৪) অবশ্যই আমি মানুষকে সৃষ্টি করেছি কষ্টের এবং পরীক্ষার জীবন দিয়ে। (৫) সে কি মনে করে যে, তার উপর কেউ ক্ষমতাবান নেই? (৬) সে বলে আমি বিপুল

সম্পদ ব্যয় করেছি। (৭) সে কি মনে করছে যে, তাকে কেউ দেখেনি? (৮) আমি কি তাকে দুটি চোখ দিইনি? (৯) একটি জিহ্বা, দুটি ওষ্ঠ! (১০) আর আমি তাকে দুটি পথ বলে দিয়েছি। (১১) কিন্তু সে সমুন্নতির পথ গ্রহণ করে নি। (১২) তুমি কি জান সেই সমুন্নতির পথটি কি? (১৩) তা হল - দাসমুক্তি, (১৪) অথবা দূর্ভিক্ষের সময় অন্ন দান করা (১৫) অনাথকে, আত্মীয়কে, (১৬) দূর্দশাগ্রস্ত অভাবীকে, (১৭) এবং তাদের অন্তর্ভুক্ত হওয়া যারা বিশ্বাস স্থাপন করেছে এবং যারা একে অপরকে ধৈর্য ধারণ ও দয়া প্রদর্শনের উপদেশ দেয়; (১৮) এরাই ভাগ্যবান। (১৯) আর যারা আমার নিদর্শন সমূহ অবিশ্বাস করে, তারাই হতভাগা। (২০) তাদের উপরেই আগুন আচ্ছন্ন করে রাখবে।

অধ্যায় ৯১ঃ আশ - শামস (সূর্য)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ সূর্যের ও তার প্রখর রৌদ্রের, (২) এবং চন্দ্রের যখন সে সূর্যের পরে আবির্ভূত হয়, (৩) আর শপথ দিবসের, যখন তা (সূর্যকে) প্রকাশ করে। (৪) এবং রাতের যখন তা ওকে ঢেকে রাখে, (৫) এবং আকাশের, যেমন তাকে তৈরী করা হয়েছে, (৬) এবং পৃথিবীর যেমন তাকে বিস্তৃত করা হয়েছে, (৭) এবং মানুষের যেমন তাকে সুষম করা হয়েছে। (৮) অতঃপর তাকে তার পাপ-পুণ্যের জ্ঞান দেওয়া হয়েছে। (৯) যে নিজেকে পবিত্র করেছে সে সফল হয়েছে। (১০) আর যে নিজেকে দূষিত করেছে সে অসফল হয়েছে। (১১) 'সামুদ' জাতিরা অবাধ্যতার কারণে অবিশ্বাস করেছে। (১২) যখন তাদের মধ্যে দুষ্কৃতম ব্যক্তিটি সক্রিয় হয়েছিল, (১৩) ঈশ্বরের বার্তাবাহক তাদেরকে বলেছিলঃ 'এটা ঈশ্বরের উষ্টি। একে জল পান করতে দাও।' (১৪) কিন্তু তারা তাকে অবিশ্বাস করল এবং উষ্ট্রিকে

হত্য করল। তারপর তাদের প্রভু তাদের পাপের কারণে তাদের ধ্বংস করে একাকার করে দিলেন। (১৫) আর তিনি এর পরিণতির ভয় করেন না।

অধ্যায় ৯২ঃ আল-লাইল (রাত্রি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ, আচ্ছাদিত রাতের, (২) এবং উদ্ভাসিত দিনের, (৩) আর তাঁর, যিনি সৃষ্টি করেছেন নর ও নারী। (৪) তোমাদের কর্মপ্রয়াস অবশ্যই ভিন্ন ভিন্ন। (৫) অতএব যে দান করে এবং ভয় করে, (৬) এবং যা ভালো তা সত্য বলে মেনে নেয়। (৭) আমি তাকে সরলপথ সুগম করে দেব। (৮) আর যে কৃপণতা করে ও উদাসীন থাকে, (৯) এবং যা উত্তম তা অবিশ্বাস করে। (১০) আমি তার জন্য কঠোর পথ সুগম করে দেব। (১১) আর তার সম্পদ তার কোনই কাজে আসবে না, যখন সে অধঃপতিত হবে (নরকে)। (১২) আমার দায়িত্ব তো পথের সন্ধান দেওয়া। (১৩) নিঃসন্দেহে ইহকাল ও পরকালের কতৃত্ব তো আমারই। (১৪) তা আমি তোমাকে লেলিহান আগুন সম্পর্কে সতর্ক করলাম। (১৫) অত্যন্ত দুর্ভাগা ব্যক্তিই তাতে নিক্ষিপ্ত হবে। (১৬) যে অবিশ্বাস করেছে এবং মুখ ফিরিয়ে নিয়েছে। (১৭) আর তা থেকে সুরক্ষিত রাখা হবে অধিক ঈশ্বরভীরুদের। (১৮) যে নিজের পবিত্রতা অর্জনের জন্য নিজের সম্পদ ব্যয় করে। (১৯) এবং তার প্রতি কারও অনুগ্রহের প্রতিদান হিসাবে নয়। (২০) কেবলমাত্র মহান ঈশ্বরের সম্ভৃতি লাভের প্রত্যাশায়। (২১) আর শীঘ্রই সে সন্তোষ লাভ করবে।

অধ্যায় ৯৩ঃ আয-যুহা (গৌরবান্বিত সকাল)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) রৌদ্রজ্বল দিনের শপথ, (২) এবং রাতের যখন তা অন্ধকারাচ্ছন্ন

হয়ে যায়। (৩) তোমার প্রভু তোমাকে পরিত্যাগ করেন নি, আর তিনি তোমার প্রতি অসন্তুষ্টও হন নি। (৪) আর পরলোক তোমার জন্য পার্থিব জীবনের চেয়ে উত্তম। (৫) তোমার প্রভু অবশ্যই তোমাকে অনুগ্রহ করবেন এবং তুমি সন্তুষ্ট হবে। (৬) ঈশ্বর কি তোমাকে অনাথ অবস্থায় পাননি? তারপর তিনিই তোমাকে আশ্রয় দিয়েছেন। (৭) তিনিই তোমাকে পথহারা অবস্থায় পেয়েছিলেন; তারপর পথের সন্ধান দিয়েছেন। (৮) তিনিই তোমাকে নির্ধন অবস্থায় পেয়েছিলেন; তারপর তোমাকে সম্পদ দান করেছেন। (৯) অতএব তুমি অনাথদের উপরে কঠোরতা দেখিওনা। (১০) আর তুমি ভিখারীদেরকে ধমক দিওনা। (১১) আর তুমি তোমার প্রভুর অনুগ্রহের কথা বর্ণনা করো।

অধ্যায় ৯৪ঃ আল-ইনশিরাহ (স্বস্তি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আমি কি তোমার বন্ধ উন্মুক্ত করে দিইনি? (২) আর তোমার সেই বোঝা অপসারণ করেছি, (৩) যা তোমার পিঠে দূর্বহ হয়ে ছিল। (৪) এবং তোমার খ্যাতি সমুন্নত করেছি। (৫) কষ্টের সাথে আছে স্বস্তি। (৬) নিশ্চয়ই কষ্টের সাথে আছে স্বস্তি। (৭) অতএব যখন অবকাশ পাবে, তখন পরিশ্রম করবে। (৮) আর নিজের প্রতিপালকের প্রতি গভীরভাবে মনোনিবেশ কর।

অধ্যায় ৯৫ঃ আত-ত্বীন (ডুমুর)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ ডুমুর এবং অলিভের। (২) আর সিনাই পর্বতের। (৩) আর

এই সুরক্ষিত নগরীর। (৪) আমি মানুষকে সবচেয়ে সুন্দর গঠনে সৃষ্টি করেছি। (৫) তারপর তাকে সর্বনিম্নে নিক্ষেপ করেছি। (৬) কিন্তু যারা বিশ্বাস স্থাপন করেছে এবং সৎকাজ করেছে, তাদের জন্য রয়েছে অন্তহীন প্রতিফল। (৭) সুতরাং এখন কি তোমাকে প্রতিফল সম্পর্কে অবিশ্বাসী করে তুলল? (৮) ঈশ্বর কি বিচারকদের মধ্যে সর্বশ্রেষ্ঠ বিচারক নন?

অধ্যায় ৯৬ঃ আল-আলাক (জমাট বাধা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তুমি পড়ো তোমার প্রতিপালকের নাম নিয়ে, যিনি সৃষ্টি করেছেন।
 (২) তিনি মানুষ সৃষ্টি করেছেন জমাটবদ্ধ রক্ত থেকে। (৩) পড়ো : তোমার প্রতিপালক বড়ই উদার। (৪) যিনি কলমের সাহায্যে শিক্ষা দিয়েছেন। (৫) মানুষকে শিখিয়েছেন যা সে জানতো না। (৬) তবুও মানুষ উদ্ধত আচরন করে, (৭) কারণ, মানুষ নিজেকে স্ব-নির্ভর মনে করে। (৮) নিঃসন্দেহে তোমার প্রতি পালকের কাছেই ফিরতে হবে। (৯) তুমি কি ঐ ব্যক্তিকে দেখেছ, যে বাধা দেয়, (১০) এক বান্দাকে, যখন সে প্রার্থনা করে? (১১) তোমরা কি মনে করো, সে সঠিক পথে আছে, (১২) অথবা ঈশ্বরভীরুতার শিক্ষা দেয়? (১৩) তুমি কি দেখেছ কিভাবে সে সত্য অস্বীকার করে এবং তার থেকে বিমুখ হয়েছে? (১৪) সে কি জানে না যে, ঈশ্বর দেখছেন? (১৫) অবশ্যই, যদি সে বিরত না হয় তাহলে আমি তার মাথার সামনের কেশগুচ্ছ ধরে টেনে আনবো। (১৬) মিথ্যাচারী, পাপাচারীর কেশগুচ্ছ। (১৭) সে তার সমর্থকদের ডাকুক। (১৮) আমিও নরকের দেবদূতদের ডাকবো। (১৯) সাবধান! তুমি তার কথা শুনোনা, বরং সিজদা (প্রণতি জ্ঞাপন) কর আর নৈকট্য অর্জন কর।

অধ্যায় ৯৭ঃ আল-ক্বদর (ভাগ্য রজনী)

ঈশ্বরের নামে আরম্ভ যিনি পরম করুণাময় ও অতি দয়ালু।

- (১) আমি একে (কুরআন) মহিমান্বিত রজনীতে অবতীর্ণ করেছি।
 (২) তুমি কি জান মহিমান্বিত রজনী কি? (৩) মহিমান্বিত রজনী হাজার মাসের চেয়েও শ্রেষ্ঠ। (৪) দেবদূত এবং (জিবরাঈল) রহ এ রাতে তাদের প্রভুর অনুমতিক্রমে সকল নির্দেশ নিয়ে নেমে আসে। (৫) এই রজনী শান্তির রজনী, উষার আবির্ভাব পর্যন্ত অব্যাহত থাকে।

অধ্যায় ৯৮ঃ আল-বাইয়িনাহ (স্পষ্ট প্রমাণ)

ঈশ্বরের নামে আরম্ভ যিনি পরম করুণাময় ও অতি দয়ালু।

- (১) গ্রন্থধারীদের (ইহুদী ও খৃষ্টান) মধ্যে সত্য অস্বীকারকারীরা এবং বহুশ্বরবাদীরা তাদের অবিশ্বাস থেকে নিবৃত্ত হবে না যতক্ষণ - তাদের কাছে সুস্পষ্ট প্রমাণ না আসে। (২) ঈশ্বরের পক্ষ থেকে এমন এক পয়গম্বর যিনি পবিত্র গ্রন্থ পড়ে শোনাবেন। (৩) যা ন্যায়নিষ্ঠ কর্মবিধি সংকলিত হবে। (৪) আর যারা গ্রন্থধারী ছিল তারা স্পষ্ট প্রমাণ আসার পরেও বিভক্ত হয়ে গেল। (৫) অথচ তাদেরকে এই আদেশ দেওয়া হয়েছিল যে, তারা যেন ঈশ্বরের উপাসনা করে বিশুদ্ধ চিত্ত হয়ে এবং আন্তরিক আস্থা জ্ঞাপন করে, নিয়মিত প্রার্থনা করে এবং সম্পদের উদ্ধৃত্ত যথা নিয়মে দান করে, আর এটাই সঠিক ধর্ম। (৬) নিঃসন্দেহে গ্রন্থধারী ও অংশীবাদীদের মধ্যে যারা অবিশ্বাসী তারা ই নরকের আগুনে নিক্ষিপ্ত হবে এবং চিরকাল সেখানেই থাকবে, এরাই সৃষ্টির সর্ব নিকৃষ্ট। (৭) যারা বিশ্বাস স্থাপন করেছে এবং সৎকর্ম করেছে এরাই সৃষ্টির সর্ব উৎকৃষ্ট। (৮) তাদের পুরস্কার তাদের প্রভুর কাছে চিরস্থায়ী উদ্যান যার পাদদেশ দিয়ে নদী প্রবাহিত, তারা চিরকাল সেখানে থাকবে। ঈশ্বর

তাদের প্রতি সন্তুষ্ট এবং তারাও ঈশ্বরের প্রতি সন্তুষ্ট। এই সব কিছু সেই ব্যক্তির জন্য যে তার প্রভুকে ভয় করে।

অধ্যায় ৯৯ঃ আয-যিল্‌যাল (ভূমিকম্প)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) যখন পৃথিবীকে প্রকম্পিত করা হবে। (২) আর পৃথিবী তার বোঝা নিক্ষেপ করে দেবে। (৩) আর মানুষ বলবেঃ তার কি হল? (৪) সেদিন পৃথিবী তার বৃত্তান্ত বর্ণনা করবে। (৫) কেননা তোমার প্রভু তাকে এরকমই আদেশ দেবেন। (৬) সেদিন মানুষ আলাদা আলাদা দলে বিভক্ত হয়ে বেরিয়ে আসবে, যাতে তাদেরকে তাদের কর্মসমূহ দেখানো যায়। (৭) সুতরাং যে অণুপরিমাণ ভালকাজ করবে, সে তা দেখতে পাবে। (৮) আর যে অণুপরিমাণ মন্দকাজ করবে, সেও তা দেখতে পাবে।

অধ্যায় ১০০ঃ আল-আদিয়াত (হ্রেষাধ্বনি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ ঐসব ঘোড়ার যারা উর্ধ্বশ্বাসে দৌড়ায়, (২) যাদের ক্ষুরের আঘাতে স্ফুলিঙ্গ বের হয়, (৩) যারা ভোরের সময় হানা দেয়, (৪) ধূলি উড়িয়ে (৫) শত্রু সেনার অভ্যন্তরে ঢুকে পড়ে। (৬) নিঃসন্দেহে মানুষ তার প্রভুর প্রতি অকৃতজ্ঞ। (৭) আর সে নিজেই এর বড় সাক্ষী। (৮) আর সম্পদের মোহে সে অনড়। (৯) সে কি সেই সময়ের কথা জানে না, যখন তাকে কবর থেকে বাহির করা হবে? (১০) এবং বাহির করা হবে, যা কিছু অন্তরে আছে? (১১) তাদের প্রভু তাদের সেদিনের অবস্থা সম্পর্কে অবশ্যই অবগত রয়েছেন।

অধ্যায় ১০১ঃ আল-ক্বারিআহ (মহাপ্রলয়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) মহাপ্রলয়। (২) মহাপ্রলয় কি? (৩) তুমি কি জান, কি সেই মহাপ্রলয়? (৪) সেদিন মানুষ হবে বিক্ষিপ্ত পতঙ্গের মত। (৫) আর পাহাড়গুলো হবে ধুনিত রঙিন পশমের মত। (৬) তখন যার পাল্লা ভারী হবে (৭) সে মনের মত আরামে থাকবে। (৮) আর যার পাল্লা হালকা হবে (৯) তার ঠিকানা অতল গহ্বর। (১০) তুমি কি জান, সেটা কি? (১১) উত্তপ্ত আগুন।

অধ্যায় ১০২ঃ আত-তাকাসুর (প্রাচুর্যের লালসা)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) প্রাচুর্যের লালসা তোমাদেরকে ভুলিয়ে রেখেছে। (২) যতক্ষণ না তোমরা কবরে উপনিত হও। (৩) এটা কখনও ঠিক নয়, খুব শীঘ্রই তোমরা জানতে পারবে। (৪) অতঃপর, এটা কখনও ঠিক নয়, তোমরা শীঘ্রই জানতে পারবে। (৫) সাবধান! যদি তোমরা নিশ্চিত ভাবে জানতে (৬) যে, তোমরা অবশ্যই নরকের সাক্ষাৎ পাবে। (৭) তখন তোমরা তা নিশ্চিত প্রত্যক্ষ করবে। (৮) অতঃপর সেদিন অবশ্যই তোমাদেরকে কল্যাণ সম্পর্কে জিজ্ঞাসা করা হবে।

অধ্যায় ১০৩ঃ আল-আসর (অতিক্রান্ত সময়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) শপথ অতীত হওয়া সময়ের। (২) নিঃসন্দেহে মানুষ ক্ষতির মধ্যে রয়েছে। (৩) তবে তারা নয়, যারা বিশ্বাস করে, সংকাজ করে, একে অপরকে সত্যের উপদেশ দেয় এবং একে অপরকে ধৈর্যের উপদেশ দেয়।

অধ্যায় ১০৪ঃ আল-হুমাযাহ (নিন্দুক)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বিনাশ প্রত্যেক ব্যাঙ্গকারী ও পরনিন্দাকারীর! (২) যে সম্পদ জমা করে এবং গুনে গুনে রাখে! (৩) সে মনে করে যে, তার সম্পদ চিরকাল তার সাথে থাকবে। (৪) কখনই নয়, তাকে নিক্ষেপ করা হবে হুতামায়। (৫) আর তুমি কি জান হুতামা কী? (৬) ঈশ্বরের প্রজ্জ্বলিত আগুন। (৭) যা হৃদয় পর্যন্ত পৌঁছাবে। (৮) এ আগুন তাদেরকে সমস্ত দিক থেকে পরিবেষ্টন করবে। (৯) উঁচু উঁচু স্তম্ভ সমূহে।

অধ্যায় ১০৫ঃ আল-ফীল (হাতি)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তুমি কি দেখনি, তোমার প্রভু হস্তী অধিপতিদের সাথে কিরূপ আচরণ করেছেন? (২) তিনি কি তাদের চক্রান্ত ব্যর্থ করে দেননি? (৩) তিনি তাদের বিরুদ্ধে ঝাঁকে ঝাঁকে পাখি (আবাবীল) পাঠিয়েছিলেন। (৪) যারা তাদের উপরে পাথরের কাঁকর নিক্ষেপ করছিল। (৫) অতঃপর তিনি তাদেরকে ভক্ষিত তৃণের মত করে দিয়েছিলেন।

অধ্যায় ১০৬ঃ কুরাইশ (কুরাইশ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) কুরাইশদের নিরাপত্তার জন্য। (২) তাদের শীত এবং গ্রীষ্মকালীন যাত্রার সময়কালে তাদের নিরাপত্তা। (৩) অতএব তারা যেন এই ঘরের প্রভুর উপাসনা করে। (৪) যিনি তাদেরকে ক্ষুধায় অন্ন দিয়েছেন এবং তাদেরকে ভয়মুক্ত করেছেন।

অধ্যায় ১০৭ঃ আল-মা'উন (তুচ্ছ দ্রব্য)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) তুমি কি ঐ ব্যক্তিকে দেখনি যে বিচার দিনকে অবিশ্বাস করে? (২) ঐ সেই ব্যক্তি যে অনাথকে তাড়িয়ে দেয়। (৩) আর নির্ধনকে খাদ্য দানে উৎসাহ দেয় না। (৪) ওই সমস্ত প্রার্থনাকারীদের জন্য পরিতাপ (৫) যারা তাদের প্রার্থনার ব্যাপারে অমনোযোগী। (৬) যারা লোক দেখানোর জন্য করে থাকে। (৭) আর কাউকে প্রয়োজনীয় গৃহ সামগ্রীও দেয় না।

অধ্যায় ১০৮ঃ আল-কওসর (প্রাচুর্য)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আমি তোমাকে প্রাচুর্য দান করেছি। (২) অতএব তোমার প্রভুর নিকট প্রার্থনা কর এবং তাকেই উৎসর্গ কর। (৩) নিঃসন্দেহে তোমার শত্রুরাই নির্বংশ।

অধ্যায় ১০৯ঃ আল-কাফিরুন (সত্য প্রত্যাখ্যানকারী)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বলঃ হে অবিশ্বাসীরা! (২) আমি তার উপাসনা করি না, যার উপাসনা তোমরা করো। (৩) আর তোমরাও তাঁর উপাসনা করো না, যাঁর উপাসনা আমি করি। (৪) আবার তোমরা যার উপাসনা করে আসছো, আমি তো তার উপাসনা করবো না। (৫) এবং আমি যাঁর উপাসনা করি, তোমরা

তো তাঁর উপাসনা করবে না। (৬) তোমাদের জন্য তোমাদের দ্বীন (ধর্ম) আর আমার জন্য আমার দ্বীন (ধর্ম)।

অধ্যায় ১১০ঃ আন-নাসর (সাহায্য)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) যখন এসে যায় ঈশ্বরের সাহায্য ও বিজয়। (২) আর তুমি দেখবে লোকেরা দলে দলে ঈশ্বরের ধর্মে প্রবেশ করেছে। (৩) তখন তোমার প্রভুর পবিত্রতা ও প্রশংসা বর্ণনা কর, আর তাঁর কাছে ক্ষমা প্রার্থনা কর। নিঃসন্দেহে তিনি বড়ই ক্ষমাশীল।

অধ্যায় ১১১ঃ সূরা আল-লাহাব (অঙ্গারবর্ণ)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) আবু লাহাবের হাত ধ্বংস হোক আর সে ধ্বংস হোক! (২) তার ধনসম্পদ ও তার উপার্জন তার কোন উপকারে আসে নি। (৩) সে শীঘ্রই জ্বলন্ত আগুনে নিক্ষিপ্ত হবে। (৪) আর তার স্ত্রীও, সে জ্বালানী কাঠ মাথায় নিয়ে ঘোরে। (৫) তার গলায় পাকানো রশি।

অধ্যায় ১১২ঃ সূরা আল-ইখলাস (একত্ব)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বলঃ তিনিই ঈশ্বর, অদ্বিতীয়। (২) ঈশ্বর অমুখাপেক্ষী (৩) তিনি কাউকে জন্মদান করেন নি এবং তিনি ও জন্মগ্রহণ করেন নি। (৪) এবং কেউই তাঁর সমকক্ষ নয়।

অধ্যায় ১১৩ঃ আল-ফালাক (উষাকাল)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বলঃ আমি আশ্রয় চাইছি প্রভাতের প্রভুর। (২) তিনি যা সৃষ্টি করেছেন, তার অনিষ্ট হতে। (৩) অন্ধকার রাতের অনিষ্ট থেকে যখন তা নেমে আসে। (৪) এবং যারা গ্রস্থিতে ফুঁ দেয় তাদের অনিষ্ট থেকে। (৫) এবং হিংসুকের অনিষ্ট থেকে, যখন সে হিংসা করে।

অধ্যায় ১১৪ঃ আন-নাস (মানব সম্প্রদায়)

ঈশ্বরের নামে আরম্ভ যিনি পরম করুণাময় ও অতি দয়ালু।

(১) বলঃ আমি আশ্রয় চাই মানুষের প্রভুর। (২) মানুষের অধিপতির। (৩) মানুষের উপাস্যের। (৪) আত্মগোপনকারী কুমন্ত্রণাদাতার অনিষ্ট থেকে। (৫) যে মানুষের মনে কুমন্ত্রণা দেয়। (৬) জ্বীন ও মানুষের মধ্য থেকে।

Quran Translations



- English
- French
- Spanish
- German
- Dutch
- Italian
- Russian
- Portuguese
- Polish
- Japanese
- Korean
- Thai
- Chinese
- Ukrainian
- Chichewa
- Filipino
- Hebrew
- Sinhalese
- Burmese
- Swahili
- Rwandese
- Czech
- Romanian
- Bengali
- Urdu
- Hindi
- Malayalam
- Tamil
- Marathi
- Telugu
- Gujarati
- Punjabi
- Kannada
- Dogri
- Assamese
- Manipuri

To order a printed copy of the Quran, please log on to:
www.goodwordbooks.com, www.cpsglobal.org

To order Quran copies for hotels, hospitals and prisons please
contact: info@goodwordbooks.com, info@cpsglobal.org
Mob: +91-8588822672

For requirements in the US and Canada, please contact:
kkaleemuddin@gmail.com Mob. +1 617-960-7156

Useful Links:

Quran.me

mwkhan.com

cpsglobal.org

drmariakhan.com

englishquran.me

www.goodwordbooks.com

পবিত্র কুরআন

আল কুরআন হলো সমগ্র মানবজাতির জন্য পবিত্র নির্দেশনা ও সুসংবাদ সংবলিত এক গ্রন্থ যা মানুষকে পারমার্থিক ও বৌদ্ধিক সত্য উদঘাটনে উদ্বুদ্ধ করে। প্রত্যেক বই এর একটি বিষয় (Subject) থাকে। কুরআনের বিষয় হল ঈশ্বরের সৃষ্টি নির্মাণ পরিকল্পনা (Creation Plan of God)-এর সাথে মানুষকে অবগত করান, অর্থাৎ মানুষকে একথা বলা যে, ঈশ্বর এই বিশ্ব সংসার কি জন্য তৈরী করেছেন। মানুষকে পৃথিবীতে বসবাস করানোর উদ্দেশ্য কি? মৃত্যুর পূর্বের জীবনকাল হতে মানুষের নিকটে কি কাঙ্ক্ষিত এবং মৃত্যুর পরের জীবনে মানুষের সাথে কি ঘটবে। মানুষ এক অমর সৃষ্টি। তার জীবনযাত্রা মৃত্যুর পরেও চলতে থাকে। কুরআন এই সম্পূর্ণ জীবনযাত্রার জন্য পথ প্রদর্শকের মর্যাদা রাখে। মানুষকে এই বাস্তবিকতা সম্পর্কে অবগত করান, এটাই কুরআনের উদ্দেশ্য আর এটাই কুরআনের বার্তার বিষয়। জ্ঞান দীপন, ঈশ্বরের নৈকট্য অর্জন, শান্তি ও আধ্যাত্মিকতা হলো কুরআনের মূল বিষয়বস্তু। কুরআনে ব্যবহৃত বিভিন্ন শব্দ সমূহ যথা- ‘তাওয়াসসুম’, ‘তাদাব্বুর’ এবং ‘তাফাক্কুর’-দ্বারা পৃথিবীতে ছড়িয়ে থাকা ঈশ্বরের নিদর্শনসমূহ সম্পর্কে অনুচিন্তন, অনুধাবন ও অনুধ্যানের মাধ্যমে জ্ঞানার্জনের প্রতি ইঙ্গিত করা হয়েছে। এই বিষয়গুলি বিবেচনা করে এই পুস্তকে কুরআনের অনুবাদ ও ব্যাখ্যা মূলক টীকাগুলি উপস্থাপন করা হয়েছে।

goodwordbooks.com cpsglobal.org

Goodword Books

ISBN 978-93-86589-15-6



9 789386 589156